

1895


~~P.P.IX.~~


A.V-61, 28



13-31010







# RESPONSIONES ALIQVORVM CASVVM MORALIVM

SPECTANTIVM PRÆCIPVE  
ad personas Regulares, &c  
etiam Seculares.

*Data à FR. LAURENTIO DE PORTEL,  
Ordinis P. N. Francisci de Observantia, Prouincia  
Algarbiorum in Portugallia: quondam Mi-  
nistro Prouinciali, & Lectore Theologo  
in eadem Prouincia.*



TURNONI,  
Sumptibus LAURENTII DVRAND

M. DC. XXXIII.  
CVM APPROBATIONIBVS

ss 83 casy. et Caroli



THE NEW YORK PUBLIC LIBRARY  
ASTOR LENOX TILDEN FOUNDATION  
1907

24

THE NEW YORK PUBLIC LIBRARY  
ASTOR LENOX TILDEN FOUNDATION  
1907

66



Illustrissimo Domino,

D. IVSTO HENRICO  
A T V R N O N E,  
Comiti Rossilionæo.

*LAVRENTIUS DVRAND, S.P.*




Eliotropium, nobilissimum illud naturæ suas opes explicantis miraculum, nisi ad Solis radios calycem non explicat; eius vultum suspi-  
ciendo, tuetur suæ pulchritudinis  
majestatem; nec aliunde, quàm à Siderum Prin-  
cipe sui motus periodos mutuatur: ut vel helio-  
tropium in cælo moveri quis dicere possit, vel  
Solem in terras defluxisse, ut floris illius motum  
& gloriam amuletur. Ita est: non pluribus radiis  
quàm oculis æmulum suum ex editissima cæli  
speculâ ita Sol contemplatur, ut eius unius gra-  
tiâ lucere videatur; & heliotropium immortali-  
tatem sperare valeat, si tantum Ducem indefef-  
so conatu sequatur.

Imaginem tuam in Sole adumbratam ( Comes Illustrissime ) intellexerit quisquis memoriâ repetet quàm gloriosè Turnonia Domus in Gallico cælo emicuerit ; & verò quàm liberaliter acceptum hæreditario iure à Majoribus virtutis, & nobilitatis splendorem in omnes Gallix quâquâ protenditur regiones vix adolescens diffuderis, & in dies magis, magisque diffundas; adeò vt qui te vnum accuratiùs inspiciat, in splendidissimo antiquissimæ familiæ furculo coalescentem vetustissimi trunci maiestatem veneretur. Majores tui, & purpuræ suæ fulgore orbem perstrinxerunt, & Gallici nominis celebritatem proprio sanguine consignârunt ; ne quis de Francorum gloria dubitaret, quam adeò illustris cruor sanxisset. Ea verò fuit illorum in disciplinas liberales beneuolentia, vt totos sibi sine harum Virginum iniuria Mars vindicare non posset.

Ne vtramque illam gloriam in te paterêris desiderari ( Comes Illustrissime ) bellicum animi impetum cum scientiarum amore ita feliciter copulâsti, vt Martem inter arma, inter Musas Apollinem te singuli demirentur. Inde factum est vt hoc heliotropium, quod nomini tuo inscribitur, nisi ad tuos radios in Gallico Solo explicare non potuerit elegantiam ; atque vt in lucem tuis prodit auspiciis, ita si quos habuerit sui studiosos tibi acceptum referet, & eam legentium

gentium humanitatem in fontem vnde proflu-  
xerit, pluribus nominibus est refuturum. Nec  
est quod tibi persuadeas florem hunc in Gallias  
ab exteris regionibus aduectum tibi fortuito de-  
dicari. Enimvero cui melius ingenij partus,  
quàm adolescenti ingeniosissimo; cui aptius  
peregrinæ opes, quàm exquisitarum rerum sa-  
crario; cui magis ex condicito, Musarum speci-  
men, quàm consecretur? V A L E.



## Ad pium Lectorem.

**N**O N adeò de me confido, vel præsumo, ut aliis dare me consilia posse confidam, sicut multi graues dedere Doctores, sicut Panorm. Nauar. Parizius, Surdus, Farinacius, & alij, qui suis doctis consiliis multum animarum profuere salutis. Ea de causa huic opusculo non affixi titulum consiliorum, sed responsionum, quia illas dedi aliquando inuitus, & semper rogatus, & quasi situs. Qui verò rogatus, & quasi situs facit, audaciæ, vel temeritatis argui non potest: culpa fit illorū qui meas indoctas, & ineptas responsiones postularunt, putantes me aliquid esse, cum nihil sim. Quòd item illas prælo dederim, condemnandus non sum, quia similiter rogatus feci, & non semel suafus. Agnosco meam insufficientiam, & me non consultorem, sed consilij indigum profiteor. Illud tamen (quod me etiam mouere potuit) in lectorem memoriam reuoco, non contemnendos Doctores, Cyrillum videlicet super Ioan. & Theophilat. credere, ea de causa Christum D. Ioan. 6. ab Apostolo Philippo solum, quasiuisse, unde possent emi panes pro illa turba saturanda, quia Philippus inter Apostolos tardioris & simplicioris erat ingenij: per quod fortè voluit Christus D. inter alia, nos docere, etiam à simplicibus, ac rudibus aliquando consilium esse petendum, si  
spere



ſperetur, quòd aliquid opportunum dicent. *Adduce*  
*etiam in memoriam Lectoris illud Adagium, quod*  
*Paulus Manutius in ſuo lib. Adagiorũ ponit col. 238.*  
*dicens : Sæpè etiam eſt Holitor valdè opportuna*  
*locutus. Ideſt, aliquando Ruſticus Hortulanus dedit*  
*bonum, & accommodatum conſilium. Quod etiam*  
*probari poſſet exemplo illius ſeueri Regis Vandalo-*  
*rum, qui cum D. Paulino ſuo captiuo, hortulano pu-*  
*tato, familiariter, & in ſecreto colloquebatur, illius*  
*monita non contemnens. Gemma enim, & margarita*  
*etiam in ſterquilinio inuenta, non contemnitur. Si*  
*ergo infinita ſapientia Chriſtus Dominus non dedi-*  
*gnatus eſt à Philippo Apoſtolo conſilium petere, cum*  
*eſſet tardus, iuxta Cyrillum, & Theophylatum, &*  
*gener Regis Vandalorum ab hortulano Paulino ſimi-*  
*liter. Ne dedignetur, quaſo, Lector has meas Reſpon-*  
*ſiones, licèt indoctas, perlegere, fortè enim in illis*  
*aliquid opportunum reperiet à Ruſtico holitore di-*  
*ctum. Quod ſi inuenerit, grãtias referat Deo; qui*  
*linguas infantium facit eſſe diſertas. Si verò non*  
*inuenerit, corrigat, & emendet: ego enim libens,*  
*cunctorum iuſta cenſura, & correctioni parebo.*

Vale in Domino.

**V**istas as informações pode-se imprimir este liuro intitulado, *Responſiones aliquorum casuum Moralium, &c.* & depois de impresso torne conferido com o original, para se dar licença para correr, & sem ella não correrá. Lisboa aos 24.de Outubro, de 1628.

*Gaspar Pereira. Francisco Barreto.*

**D**ou licença para se imprimir este liuro. Lisboa a 36.de Outubro de 628.

*Gaspar do Rego d'Afonseca.*

**Q**ue se possa imprimir este liuro, vistas as licenças do sancto Officio, & Ordinario, & não correrá sem tornar à mesa para ser taixado. Em Lisboa a 31. de Outubro, de 628.

*Pimenta de Abreu. Mesquita.*

**E**X mandato Reuerendi admodum P.N.Fr.Laurentij ab Annunciatione Lectoris Iubilati, ac Prouincialis Prouinciæ Algarbiorum, Ordinis B. Patris N. Francisci de Obseruantia, accuratè, & cum summa voluptate legi has aliquorum casuum Moralium Responſiones, datas à R.P.Fr.Laurentio de Portel, huius nostræ Prouinciæ quondam Ministro Prouinciali, ac Lectore Theologo, viro eruditissimo, in quibus non solum quod orthodoxæ fidei, rectève fidelium institutioni aduersetur, apparet nihil, verum pietatis, ac scientiæ plenæ sunt omnes, & obscuris rebus, eius stylus facilis, fœlix ingenium, in inquirenda veritate indefessus labor, lumen inferunt non exiguum; quare si typis mandentur, non minus ad Iurisconsultorum, quàm Theologorum

logorum vsum accommodatè deferuient,quippe ita in illis omnia eruditè discutiuntur,ac terminantur,vt nihil amplius in hoc argumento desiderari posse videatur. Vlyssipone, in Cænobio D.P.Francisci de Enxobregas,die vlt.Maij,628.

*Fr.Ioannes Cardozo.Calificator,& Censor.*

---

**C**Oncedo facultatem vt imprimatur. In Conuentu D.Francisci de Enxobregas,die 20.Maij,1628.

*Fr.Laurentius ab Annunciatione,Minister Prouincialis.*

---

**H**Æc prælo excussa , adæquè ac fideliter , referunt eosdem casus, qui ab auctore multis modis commendabili,manu propria, sunt exarati, & à me sedula mente recogniti. Vlyssipone, apud domum Diui Bernardi,17.Februarij,de 630.

*Fr.Felician.Montel.*

---

**T**Axase este liuro em tres tostoës. Em Lisboa , 27. de Feuer.de 630.

*Araujo. Cabral. Salazar. Barreto.*

---

*Approbationes Calificatorum,Censorumque  
Sanctæ Inquisitionis.*

**R**omulus Romanæ vrbis conditor notissimus,vt tam belli pacisque tempore cuncta componeret , populûmque Romanum tum sanctorum legum munimen,tum sublimium trophæorum,g'oria cæteris orbis nationibus anteferreret : sibi fecisse satis,totique Reipublicæ Romanæ sufficienter consuluisse existimauit,si viros aliquos conspicuos designaret quorum quilibet sic esset morum concinnitate ornatus,sic armis ac solertia eminens, vt iacentem Rempublicam erigere, oppugnatam defendere,subactam ad libertatem reuocare potuisset,ne vquam illa toto terrarum orbe suspicienda Ciuitas vicitura videretur. Similiter in re dissimili fecisse reor S.Theologiæ professorem celeberrimum, venerabilem patrem Fr.Laurentium à Portel , clarissimæ Minorum familiæ ex heroibus satorem vnum,commāemque parentem,

tem, atque Algarbiorum prouinciæ quondam Prouincialem erarissimum, qui & regularium, & secularium personarum status cōmodè auxiliatum tri arduis, librum edidit fugiferum responsionum varietate veluti armatura quadam adeò accinctum, vt impetentium scrupulorum vim repellere, controuersiarum complicationes soluere, sophismatum ambages explicare, vterque status si excubuerit indifficiliter queat: quinimò ab eo tanquam ab armentario districtum gladium arripiat, quo immaculatam Deparae Conceptionem contra impugnantes propugnet, procaces eorundem rationes retundat, infesta argumenta in ipsos retorqueat, ac tandem immunem, & illaenam ab originali labe audeat vindicare opus integrius eruditione, simul ac breuitate, qua solet venerabilis Pater in aliis voluminibus iam in lucem editis veluti alter amœnissimus fons vbertim scrutare conspiciatur, ita congruum orthodoxiæ, morumque integritati, vt à sacris Conciliis, ac sanctorum Patrum dogmatibus non dissideat, sed maturitate consilij, iustaque rerum ponderatione vbilibet splendeat: propterea dignum quòd excudatur, vt vnusquisque propriæ conscientiæ ebullitiones, ac mortis cohibeat, oneribus exoneret, vtraque Respublica Ecclesiastica scilicet, & ciuilis recto tramite dirigatur, ac tandem cuncti fideles in ambiguis suorum votorum compotes efficiantur. Vlyssipone, apud Dominam Exiliij, kalendis Augusti, anno 628

*Disser Fr. Felicianus Montel.*

**P**RAEIDI hunc librum, cuius titulus est, *Responsiones aliquorum casuum Moralium, &c.* compositum à Patre Magistro Fr. Laurentio de Portel, Ordinis B. Francisci de Obseruantia, Prouinciæ Algarbiorum in Portugalia, in quo nihil reperi quod Catholicæ fidei, aut bonis moribus aduersetur; pluriima verò quæ opus, Authoris que præclaram doctrinam, eruditionem, & in controuersis decidendis perspicuitatem maximè commendant: ideòque typis excudendum censeo. Vlyssipone, in domo D. Rochi Societatis IESV, 12. Octobris, an. 1628.

*D. Iorge Cabral.*

**L**IBRUM cui Titulus est, *Responsiones aliquorum Casuum Moralium, &c.* præcipuè ad personas regulares, ac etiam seculares, data à Fr. Laurentio de Portel, &c. Nos infra scripti in sacra Theologiæ facultate Magistri, perlegimus, nihilque in eo Fidei Orthodoxæ contrarium reperimus. Lugduni, 5. Septembris, 1633.

*Fr. Cl. Cochet.*

*Frater Ioannes Portier, Magister & Prior Conuentus Lugdunensis, Ordinis Fratrum Prædicatorum.*

CASVS CONTENTI IN  
hoc Libro sunt sequentes.

<b>C</b> asus 1. De beneficio, vel officio recepto ab incapaci ob censuram, quomodo possit renouari,	pagina 1
Casus 2. An dispensans semper debeat iniungere aliquod onus, vel pœnitentiam dispensato,	8
Casus 3. De dispensatione cuiusdam Bigami iam ordinati,	16
Casus 4. De quodam Legato relicto conuentui Minorum cum clausula contraria sua Regula,	24
Casus 5. De quodam Nouitio expulso, sed appellante,	27
Casus 6. De homicidio quodam commissio ante ingressum Religionis,	35
Casus 7. De alio homicida ante ingressum Religionis,	40
Casus 8. De alio homicida ante ingressum Religionis,	47
Casus 9. De professione Nouitiæ facta per metum, & alias circumstantias,	54
Casus 10. De alia professione Nouitiæ dubia ex defectu suffragiorum,	66
Casus 11. De Prouinciali dante suffragium in professione Nouitiæ,	73
Casus 12. De conuentu Monialium demisso Ordinario à suo Prouinciali,	81
Casus 13. Si possit eligi in Abbatisam at: ingens annuum sed non completum,	97
Casus 14. De electione Abbatisæ facta voce tenus sine schedulis obsignatis,	102
Casus 15. De quodam conuentu Monialium translato ad alium locum, repugnante Episcopo suo Pralato,	107
Casus 16. De congregatione quorundam hominum sub forma Terisariorum,	116
Casus 17. De alienatione cuiusdam rei relicte Monialibus	

# INDEX CASVVM.

<i>cum conditione ne posset alienari,</i>	126
<i>Casus 18. De Pralato locali appellante à suo Prouinciali tempore visitationis,</i>	132
<i>Casus 19. De punitione cuiusdam Religiosi delinquentis extra suam prouinciam, &amp; extra regnum suum,</i>	144
<i>Casus 20. De visitatione generali, &amp; an testes denunciantes, sint postea ratificandi,</i>	149
<i>Casus 21. De vno conuentu Monialium recusante suū prouincialem ne visitaret, tempore electionis Abbatisa creāde,</i>	155
<i>Casus 22. De quodam Pralato audiente reum solum verbo tenens, &amp; de subdito ea de causa appellante,</i>	166
<i>Casus 23. De quodam teste fatente veritatem, &amp; nollente subscribere dictis à se,</i>	175
<i>Casus 24. An Pralatus Regularis in processu sui subditi teneatur seruare quandam legem principis secularis,</i>	180
<i>Casus 25. De quodam Religioso machinante mortem sui Pralati, non secuto effectu,</i>	192
<i>Casus 26. De quodam Religioso reo confitente delictum non iuridicè quem Pralatus sic fatentem voluit punire,</i>	211
<i>Casus 27. De Abbatisa admittente seculares intra claustrum, bona fide,</i>	216
<i>Casus 28. De quodā Religioso dubitante de suo Baptismo,</i>	221
<i>Casus 29. De electione cuiusdam Monialis ad certum officium, à qua fuit appellatum.</i>	246
<i>Casus 30. An Prouincialis, maximè Minorum, habeat suffragium in electione Monialium,</i>	260

## PARS SECVNDA.

<b>C</b> asus 1. De suffragio dando in capitulo per procuratorem missum,	pagina 273
Casus 2. De legato relicto cuidam puero si foret clericus, & postea factus est Religiosus, an illi debeat legatum,	268.
Casus 3. De quadam donatione facta uni Comuentui de certa possessione immobili,	281

# INDEX CASVVM.

- Casus 4. De electione cuiusdā Prouincialis, quem praeses noluit confirmare,* 300
- Casus 5. De quadam praecedentia loci inter duos Religiosos graues,* 318
- Casus 6. De alia praecedentia locorum,* 326
- Cas 7. De quodā nouitio expulso post annum cum dimidio eo quod nō potuerint fieri informationes precepta à Sixto V. 342*
- Cas. 8. de quodam nouitio recepto ad chorum, & postea translato ad statum laici,* 351
- Cas. 9. De quibusdā secularibus ligantibus, & capientibus quosdam Religiosos de mandato sui capitanei secularis,* 365
- Cas. 10. De quodam Religioso translato ad alium ordinem strictiorem, non obtenta licentia sui Prelati,* 372
- Cas. 11. De duobus Religiosis citati quibus non est datum tempus, nec locus commodus ad respondendum,* 380
- Cas. 12. Quod haeres defuncti sepulti apud Religiosos non teneatur curare ut tot officia, & missae dicantur apud clericos parochia, quot defunctus iussit fieri apud Religiosos,* 386
- Cas. 13. De quadā Bulla D. Gregor. XV. in qua Episcopis concessit aliquā iurisdictionem super Moniales Regulariū.* 393
- Cas. 14. An Moniales S. Clarae subditi Episcopo gaudeā priuileg. Minor. & alius casus circa unū cōuentū illarum,* 409
- Cas. 15. An possit Goardianus in Ordine Minorum esse Goardianus ultra tres annos,* 414
- Cas. 16. Dubia quadam suborta in materia electionum,* 416
- Cas. 17. De quodā inre patronatus in conuentu Monialiū,* 426
- Cas. 18. An aliqua Religio possit conacere statutum contra aliquid contentum in sua Regula,* 433
- Cas. 19. Vbi sint dicenda missa relicta à defuncto non designante locum,* 443
- Cas. 20. De donatione cuiusdam sepultura, qua fuerat alteri data & possessa,* 477
- Cas. 21. De quadā iurisdictione delegata à quodā superiore,* 480
- Cas. 22. De priuilegio cuiusdam domini saecularis patroni cu-*

# INDEX CASVVM.

<i>iusdam conuentus Monialium,</i>	453
<i>Cas. 23. De confessore Religioso audiente confessiones contra prohibitionem sui Pralati,</i>	466
<i>Cas. 24. An Moniales S. Clara prima Regula possint habere pensionem vitalitiam pecunie sibi relictam,</i>	471
<i>Cas. 25. De quadam quarta funerali soluenda parochio,</i>	476
<i>Cas. 26. De quodam iudice conseruatore creato ab vno Goardiano pro quadam funerali non soluenda,</i>	482
<i>Cas. 27. De quodam Abbate idiota electo,</i>	494
<i>Cas. 28. De quodam Prouinciali agroto non valente visitare prouinciam,</i>	500
<i>Cas. 29. De quibusdam confessoribus secularium certo modo electis in quadam Religione,</i>	502
<i>Cas. 30. De absolutione cuiusdam excommunicati impensa ab altero excommunicato,</i>	507
<i>Cas. 31. Explicatur Bulla D. Urbani VIII. qua abrogat aliquas immunitates particularibus Religiosis concessas,</i>	513
<i>Cas. 32. Respondetur 19. propositionibus cuiusdam Doctaris contra materiam voti, &amp;c.</i>	533

---

## P A R S   T E R T I A.

<b>C</b> asus 1. <i>An Episcopus successor teneatur soluere debita sui antecessoris defuncti,</i>	pagina 594
<i>Cas. 2. De quodam matrimonio pretense ab vna femina,</i>	605
<i>Cas. 3. De quadam donatione facta per clericum cuidam filia fratris sui,</i>	609
<i>Cas. 4. De quodā patre exheredare filium sibi iniuriosum,</i>	618
<i>Cas. 5. De duabus dispensationibus dubiis obtentis circa matrimonium contrahendum,</i>	637
<i>Cas. 6. De quibusdam sponsalibus de futuro iuratis,</i>	644
<i>Cas. 7. De aliis sponsalibus de futuro, cum defloratione inter virum nobilem, &amp; feminam plebeam,</i>	647
<i>Cas. 8. De quadam dispensatione circa matrimonium obtenta cum falsa narratione,</i>	655



# INDEX CASVVM.

<i>Caf. 9. De quodam ingreffo Religionem poft matrimonium ratum cum certa dubia circumftantia,</i>	660
<i>Caf. 10. De quodam defuncto mortuo in duello, &amp; fepulto in loco facro,</i>	667
<i>Caf. 11. De quodam officio Lectoris promifo à Prelato per op- pofitionem inter duos,</i>	673
<i>Caf. 12. De quodā Clerico caufante abortum fœmina,</i>	679
<i>Caf. 13. De alio abortu caufato à Sacerdote cum aliis circum- ftantiis,</i>	688
<i>Caf. 14. De quodam dote facta Clerico pro patrimonio ad Ordines recipiendos,</i>	696
<i>Caf. 15. De quodam emptione tritici annualis non ftatim ob- lato redditu annuali tritici.</i>	704
<i>Caf. 16. Notata quedā circa emptionē, feu cōtractū cenfus,</i>	711
<i>Caf. 17. De quodam matrimonio contracto cum conditionibus circa dotem, &amp; arras,</i>	715
<i>Caf. 18. De cuiusdam virginis defloratione per metum,</i>	731
<i>Caf. 19. De quodā emphyteufi cū certis cōditionibus facta,</i>	737
<i>Caf. 20. An poffit Epifcopus celebrare, &amp; celebrari facere in Oratoriis priuatis,</i>	743
<i>Caf. 21. De quodam iudice dante confilium Reo in secreto, an poffit effe iudex,</i>	750
<i>Caf. 22. De faciente peccatum, quod in fe eft mortale; fed ille putauit folū effe veniale,</i>	755
<i>Caf. 23. De quodam confeffore reuelante furtum iudici de li- centia latronis, an fuerit irregularis,</i>	757
<i>Caf. 24. De quodam legato pro redimenda puella captiua,</i>	762
<i>Caf. 25. An Monialis illegitima, &amp; bigama poffit effe Abba- tiffa,</i>	765
<i>Caf. 26. De quodā parochō, qui dixit populo miffam ficcā,</i>	770
<i>Caf. 27. De quodam reftitutione facienda,</i>	773
<i>Caf. 28. Dubia quedā circa Officiū Cōceptionis Deiparæ,</i>	777
<i>Caf. 29. De parochō excommunicante parochianum eo q' dā Miffam non audiret in propria Parochia,</i>	783

# INDEX CASVVM.

<i>Caf. 30. De quodam contractu in materia census,</i>	788
<i>Caf. 31. De Tubellione nollēte approbare certū testamentū,</i>	793
<i>Caf. 32. Professio nulla cuiusdam Monialis,</i>	802
<i>Caf. 33. De quodā donatione facta monasterio Monialiū,</i>	811
<i>Caf. 34. De quadā licētia cōfirmata à Domino Collectore,</i>	817
<i>Caf. 35. De iurisdictione Provincialis super conuentum Monialium, circa solutionem cuiusdam debiti,</i>	820
<i>Caf. 36. De obligatione dandi alimenta fratri minori litiganti contra monasterium,</i>	825
<i>Caf. 37. De absolutione cuiusdā notory percussoris clerici,</i>	829
<i>Caf. 38. De ingressu fœminarum in monasteria virorum pro solo videndo ornatu claustrī extra processionem,</i>	834
<i>Caf. 39. An possint Regulares extra suos conuentus ministrare Eucharistiā secularibus in Oratoriis,</i>	839
<i>Caf. 40. De clerico ordinato sine interstītiis, &amp; extra tēpora,</i>	849
<i>Caf. 41. De clerico qui recipit tres Ordines sacros omīssis omnibus Ordinibus minoribus,</i>	857
<i>Caf. 42. De quinquennio ad reclamandum contra professionem ex Tridentino quomodo sit computandum,</i>	864
<i>Caf. 43. De quadam obligatione Missarum, &amp;c.</i>	868
<i>Caf. 44. De quodam adulterio putato, diuorio, dote, &amp;c.</i>	873
<i>Caf. 45. De quadam donatione &amp; dote facta filia à patre,</i>	878
<i>Caf. 46. De dispensatione cuiusdā voti cundi in Ierusalē,</i>	883
<i>Caf. 47. An clerici possint exercere mercaturam per personam interpositam,</i>	885
<i>Caf. 48. De quadam electione dubia,</i>	891
<i>Caf. 49. Explicatur quoddam priuilegiū Martini V. &amp;c.</i>	897
<i>Caf. 50. De quodam voto castitatis emissō à certa fœmina cum certa circumstantia,</i>	900
<i>Caf. 51. An possit praelatus punire subditum suum culpatum in peccato nefando,</i>	906
<i>Caf. 52. Quis est ultimus de priuilegiis: vna vocis oraculo reuocatis, &amp; iterum confirmatis,</i>	909

PRIMA



PRIMA PARS

RESPONSIONVM  
MORALIVM SPECTAN-  
TIVM PRÆCIPVE AD  
PERSONAS REGVLARES,  
ET ECCLESIASTICAS.

---

CASVS I.

*De officio , vel beneficio nulliter obtento,  
eiusque remedio.*



ONSTAT ex multis Iuribus, praxi  
Ecclesiæ, & Doctoribus, quod si ali-  
quis existens irregularis, inhabilis  
ad officia, vel excommunicatus ob  
aliquod delictum, vel simile impedi-  
mentum, obtinuit aliquod officium,  
vel beneficium Ecclesiasticum, talis impetratio est  
nulla in iure, & talis impetrans non potest in con-  
scientia illud possidere. Hoc posito; contigit vt Petrus  
existens cum aliquo ex illis tribus impedimentis, im-  
petrauerit, & acceptauerit aliquod officium, vel bene-  
ficiū Ecclesiasticum, quod non potest in conscientia

A

possidere. Queritur an Petrus obtenta secreto absolute, dispensatione, vel habilitatione predictorum impedimentorum, possit secunda conscientia manere, & possidere illud officium, vel beneficium nulliter collatum, absque eo quod procuret nouam collationem officij, vel beneficij a potente illud conferre: an vero debet nouam collationem procurare post ablatum impedimentum? Qui casus saepe solet euenire.

1 Dux sunt opiniones. Prima est Nauarri *in sim. cap. 27. num. 94.* & Panorini *in cap. Innocent. num. 11. de elect.* & Lessij *lib. 2. de iust. cap. 34. de bio 22. num. 2. 119.* & aliorum, qui dicunt talem possessorem officij, vel beneficij, ablato illo impedimento secreto per dispensationem &c. indigere noua impetratione officij, vel beneficij facta à vero collatore, alias non manere securam in conscientia. Probant primo quia Canonis absolute reddunt irritam talem collationem, vel electionem cum tali impedimento nec meminerunt acceptationis factae ab isto postquam fuit absolutus, vel dispensatus. Secundo. Electi, vel prouisi, vel praesentati in excommunicatione, vel alio impedimento facile possent differre acceptationem, & interim curare se absolui, & ita nihil illistale impedimentum obesset, quod videtur contra mentem Canonum. Tertio. Quando contractus, vel consensus alicuius est irritus ob impedimentum occultum alterius partis, non satis est tolli illud impedimentum, sed opus est nouo consensu alterius, ut patet in contractu matrimonij: ergo similiter hic opus est nouo consensu electorum, vel collatoris, quo confirmetur prior actus, aut veluti in eo persistere.

2 Secunda opinio est Speculatoris, Innocent. Hostiensis. Ioan. Andr. Ancharran. Sapia, Calderin. Milis, Felini,

Felini, & aliorum, quos citat, ac sequitur Sanchez *lib. 8. de Matrim. disp. 7. num. 12.* Hi omnes dicunt, quod sublato impedimento per absolutionem, dispensationem, vel habilitationem superuenientem, si taliter impeditus, & iam dispensatus in secreto, denuò acceptat in secreto officium, vel beneficium, præteritam collationem, vel electionem conualescere, & tribuere ius validum in foro conscientiae, ita ut non sit necessaria noua collatio officij, vel beneficij. Huius opinionis doctores dicunt necessarias esse sequentes conditiones ut hoc verum sit. Prima ut impedimentum sit occultum: alioqui actus nullum haberet colorem, sed esset planè irritus in foro externo. Secunda, ut id in nullius cedat præiudicium: si enim duo electi essent, præferendus esset qui caret impedimento, quia hic solus absolutè ius habet. Tertia, ut si sciens suum impedimentum, acceptaret collationem beneficij, non solum impetret dispensationem illius prioris impedimenti, sed etiam illius quod incurrit per talem acceptationem: Ita enim acceptando incurrit vitium intrusionis, per quod fit inhabilis ad idem beneficium & si non ad alia; vnde etiam eget dispensatione huius impedimenti, qua obtenta poterit beneficium retinere.

Hæc sententia sic explicata, & modificata, probari potest. Nam electio illa fuit valida ex parte eligentium, vel collatoris beneficij, vel presentatoris (ut supponitur) sed solum requiritur capacitas in electo: ergo ubi primum fuerit factus capax per sublationem impedimenti, ex vi prioris actus ius acquireret: sicut cum quis acceptat in excommunicatione collationem ibi factam ante excommunicationem, sublato illo impedimento ius acquirit absolutum ex vi illius acceptationis. Secundo, quia electores in priori voluntate

manere censentur, cum illam non renocauerint : ergo vis electionis manet, ac proinde poterit illam acceptare sublato impedimento. Tertio probatur à simili exemplo efficaci : Nam is cuius professio fuit irrita propter aliquod impedimentum, vt ob defectum ætatis, vel quia annus nouitiatus non fuit integer, vel quia non consentit interius in emissionem votorum, iste talis sublato impedimento potest manere in Religione, & ratificare suam professionem absque noua admissione prælati, vt communiter tenent Doctores : ergo similiter in nostro casu sufficit, vt impedimento sublato, acceptet apud se collationem, vel electionem præteritam. Eandem sententiam tenet Henriquez *tom. 2. lib. de excom. lib. 13. cap. 13. §. 3.*

3 Ex his duabus opinionibus prima est securior, vt vides; & probatur rationibus efficacioribus, & proinde in praxi, si commodè fieri possit, consulenda. Secunda vero opinio fulcitur pluribus, & grauioribus doctoribus, & sufficientibus rationibus, ita vt condemnandus non sit, qui illam sequi voluerit, maximè in casu magnæ difficultatis, quando videlicet difficillimè impetrabitur noua collatio beneficii nulliter obtenti, & illius renunciatio cedit in notabilem infamiam possidentis : Tunc enim potest quicumque sequi opinionem minus probabilem, vt optimè tradit Sanchez *lib. 2. de Matrim. disput. 56. num. 8.* ex Soto & Nauar. dicentibus quod periculum graue facit vt formido præpòderet opinioni. Imo maius est quod tradit idem Sanchez *lib. 7. de Matrim. disp. 37. num. 38.* videlicet, posse excommunicatum, vel irregularem occultum acceptare beneficium, si non possit illud renunciare absque magna infamia, & acceptet illud cum animo obtinendi dispensationem, vel cum animo renuncian-  
di cum

## PRIMA PARS. CASVS I. 5

di cum poterit absque infamia: quia videlicet in his omnibus præualet præceptum maius naturale de honore proprio tuendo, quam præceptum positium Ecclesiæ prohibentis hunc sic impeditum acceptare.

4 Ad primum argumentum prioris opinionis, concessio antecedente neganda est consequentia: quamuis enim canones damnent, annullent collationem factam taliter impedito, id intelligendum est pro tunc durante impedimento: Secus si ablato impedimento daret eadem intentio collatoris, vel electorum, prope præsumitur durare: nec opus fuit ut Canones mentionem facerent acceptationis factæ à beneficiario post ablatum impedimentum, quia leges non semper omnia necessaria exprimunt, satis est quod innuant, & ex ipsa lege colligatur. Colligitur autem ex benigna Ecclesia quod impeditus aliquo impedimento ex supradictis, ablato impedimento, retineat secure suum officium, vel beneficium à superiore collatum, & non reuocatum. Nec deest exemplum aliquale rem confirmans. Nam videmus sacramentum baptismi receptum cum obice, & sacramentum poenitentiae informe, cum in sua collatione non sint sortita effectum propter impedimentum peccati, ablato hoc impedimento postea per absolutionem sortiri effectum gratiæ postquam iam non existit forma sacramenti, nisi moraliter, ut communiter tradunt Doctores. Eodem modo in re minori, dispensatione scilicet, si dispensatio superuenit sublato impedimento, collatio præterita adhuc moraliter existens sortietur suum effectum licet illum sortita non fuerit cum primo data fuit propter impedimentum, & in dispositionem recipientis officium, vel beneficium. Ad secundum concedendum est totum, ac dicendum non esse hoc contra mentem

Canonum, vt patet ex dictis proximè ad solutionem primi. Sic enim præsumendum est benigna Ecclesia vt velit sublato impedimento, collationem officij præteritam conualescere, cum collatio illa prima daret adhuc moraliter, nec sit reuocata à collatore officij, vel beneficij. Ad tertium concessa Ma. dicendum est ad Minorem, non in omni contractu nullo ob defectum consensus alicuius partis esse necessarium pro reualidatione illius nouum consensum alterius partis: patet in exemplo professionis supra posito. Nam professio est contractus inter professum & Religionem, vt docet communis opinio: & tamen quando professio fuit nulla ex eo quod profitens non consensit in professione, vt hæc professio nulla reualidetur, sufficit solum vt postea professus interius consentiat, & non requiritur nouus consensus Religionis, vt omnes fatentur. Imo (quod maius est) in matrimonio, quod est clarè contractus, si alter coniux in contractu ipsius non consensit interius, vel ob metum, vel quid simile, ob cuius defectum matrimonij contractus fuit nullus, vt hoc tale matrimonium reualidetur non requiritur quod denuo consentiat ille coniux qui iam verè in initio consensit, sed sufficit vt consentiat, & acceptet denuo ille qui prius non consensit, vt optimè fulse, & docte tradit Sanch. *lib. 2. de matrim. disput. 2. num. 9.* citans vltra quindecim Doctores: quod facit satis pro hac sententia, & facile applicatur ad solutionem huius tertij argumenti.

Adhuc pro consolatione, & remedio istorum acceptantium officia, vel beneficia cum impedimento annullatiuo, noto primo cum Henric. *cit. lib. 13. cap. 14.* illum teneri quam citius fieri possit procurare remedium dispensationis, & reualidationis, aliàs peccabit

M. &c



M.&c incurreret alias pœnas: interim vero dum procurat diligenter remedium, si ex renuntiatione illius officij incurreret magnum scandalum, & infamiam, non tenebitur renuntiare ob causam supradictam de præcepto naturali seruandæ famæ. Si autem absque læsione facere possit tenetur renuntiare. Pro quo adhuc videri potest Sanch. cit. lib. 7. de matrim. disp. 37. num. 38. vbi ponit casum ad hoc intentum inseruientem.

¶ Noto secundo, in hac materia, quod in Religiosis maximè Franciscana, in capitulis vbi solent fieri electiones præses capituli proximè ante electionem solet absoluerè, & dispensare, & habilitare omnes electores ibi eligentes, vt illorum suffragia valida ibi sint. Et pro ista consuetudine aduerto primo, quod si aliquis istorum electorum in illo capitulo fuerit electus ad aliquod officium, & antea habebat aliquod impedimentum excommunicationis, irregularitatis, vel inhabilitatis, tale impedimentum sufficienter manet sublatum per illam absolutionem, & dispensationem generalem, ita vt nulla postea dispensatione indigeat. Probatur claro exemplo Episcopi quando confert ordines, qui ante collationem ordinum absoluit, ac dispensat in communi omnes ibi existentes, & aufert ab illis omne impedimentum impediens receptionem iustam illius Sacramenti. Et hæc absolutio data in communi, & generalis dispensatio liberat omnes ibi præsentés ab omni impedimento occulto, vt tenet Nauar. consilio 49. de sentent. excom. ar. 12. vers. ad secundum, & Zerola in praxi, parte 2. ver. ordo §. secundo solet Episcopus, & seqq. vbi citat cap. solite de Maier. & abed. Aduerto secundo quod ista absolutio, vel dispensatio generalis data à præside capituli non prodest absentibus extra capitulum. Nam præses capituli, vtitur his

## 8 PRIMA PARS. CASVS II.

verbis: *Absoluo vos, dispenso vobiscum &c.* quibus verbis alloquitur solum præsentes. Vnde si qui postea eliguntur absentes in goardianos, vel similia officia, & habent aliquod impedimentum occultum annullatium electionis, & iste sic impeditus acceptat officium, debet quærere, & procurare remedium iuxta regulas suprapositas. Neque enim præsens electionis, dicens, facta electione absentis, ego confirmo istam electionem; per hanc confirmationem dispensat in impedimento occulto electi absentis, sed supponit illum esse vereabilem pro dicto officio obtinendo: & electum confirmare, non est illum dispensare: sunt enim valde diuersa confirmare, & dispensare.

---

## CASVS II.

*An dispensans cum aliquo semper debeat iniungere aliquod onus, vel pœnitentiam dispensato.*

**V**Idi ego iam Religiosum doctum satis afflictum, eo quod multo tempore vsus fuerit certa dispensatione, & dubitabat an Prælatus dispensans imposuerit sibi condignam pœnitentiam, vel satisfactionem pro onere ablato. Videtur enim de necessitate dispensationis, vt Prælatus, siue confessor dispensans in quauis re, imponat dispensato debitam, & condignam pœnitentiam, vel onus aliquod pro onere ablato.

Videtur hoc probari, primò in materia obseruationis diei festi: nam cap. *licet de ferijs*, concedit Papa vt dispensetur cum piscatoribus ad capiendos pisces Ale-  
cias

as in die festo cum hoc onere, vt post capturam dent aliquam eleemosinam Ecclesiis & pauperibus. Et secundo Panormit. ad idem cap. *licet de ferijs. num. 4.* dicit virtute eiusdem capituli imponi posse onus alicuius eleemosinæ dispensato ad non ieiunandum. Et in *compend. Mendicantium ver.* Officium diuinum primo, §. 9. Leo X. concedit vt prælatus Minorum possit dispensare cum fratre infirmo ne recitet horas canonicas, iniungendo tamen illi aliquod onus leue, quod sibi videbitur. Ecce in materia diei festi, ieiunij, & officij diuini iubetur dispensans imponere dispensato aliquod onus condignum. Denique in litteris summi pœnitentarij Romani directis ad Doctorem Theologū, vel Canonistam pro dispensandis in voto Religionis, castitatis, & pro matrimonio nullo, & pro irregularibus dispensandis, ac similibus (de quo latè Sanchez lib. 8. de Matr. disput. 34. & 35.) post commissionem ad dispensandum monet summ. pœnitentarius, vt dispensato imponatur condigna pœnitentia, vt ieiunij, & obligationis confessionis sacramentalis certis mensibus, idque perpetuo, vel aliorum similium operum pœnitentiæ prout qualitas negotij postulauerit. Videtur ergo quod semper prælatus dispensans, vel confessor debeat dispensato aliquam imponere pœnitentiam condignam.

I Pro parte verò contraria, quod scilicet non semper dispensans debeat iniungere pœnitentiam, facit, quod commutatio voti v. g. & dispensatio voti differunt valde: nam commutatio non tollit onus voti, sed mutat illud in aliud onus fauorabilius, & proinde iniungitur aliud opus: at dispensatio tum in voto, tum in quouis alio præcepto tollit omnino obligationem præcepti, ita vt amplius non obliget, vt tradunt com-

muniter Doctores, maxime Azor *tom. 5 lib. 5. cap. 1 §. 8.*  
 1. & patet ex diffinitione dispensationis ab omnibus  
 recepta, quæ est hæc, iuxta Suarez *tom. de leg. lib. 6. cap.*  
*10. m. 7.* est legis humanæ relaxatio. Alij addunt quod  
 sit relaxatio iuris communis facta cum causæ cogni-  
 tione, ab habente potestatem dispensandi. Vnde cum  
 in diffinitione non ponatur quod debeat fieri cum in-  
 iunctione pœnitentiæ, non est de ratione, ac obligatio-  
 ne dispensationis, vt fiat semper cum iniunctione pœ-  
 nitentiæ. Præterea quod detur aliquando dispensatio  
 valida in irregularitate etiam contracta ob culpam,  
 nulla imposita pœnitentia, patet ex fine casus præce-  
 dentis, vbi diximus ex Nauarr. & Zerola Episcopum  
 absoluentem, vel dispensantem in communi cum or-  
 dinandis, vere illos absoluerunt, ac dispensare in omni-  
 bus irregularitatibus occultis, si quas habent: & ta-  
 men Episcopus nullam imponit pœnitentiam dispen-  
 satis. Quod idem clarius docet Nauarr. *cap. 25. in sum.*  
*num. 15.* circa Religiosos dicens, quod si prælatus illo-  
 rum in visitationibus, & in capitulis absoluat, ac dis-  
 penset cum omnibus in communi, manent omnes di-  
 pensati etiam ab irregularitate tunc oblita, ita vt non  
 indigeant postea vlla dispensatione: & tamen prælati  
 hic dispensantes in visitationibus generaliter nullam  
 imponunt pœnitentiam dispensatis etiam pro irregu-  
 laritate: ac proinde non videtur obligari dispensans  
 prælatus, vel confessor semper imponere pœniten-  
 tiam dispensatis. Ecce pro vtraque parte vides autho-  
 ritates, & rationes ad probandum, esse, ac non esse ne-  
 cessarium, vt dispensans imponat pœnitentiam ali-  
 quam dispensato. Ego hoc dubium apud nullum Do-  
 ctorem in terminis decisum inueni. Pro meo tamen  
 tenui iudicio, ad illius resolutionem noto sequentia.

2 Primo noto, quod si superior in particulari casu committit alicui vt dispenset seruata certa forma, quam assignat, dispensans tenetur seruare illam formam, alias nihil faciet, vt omnes Doctores dicunt, quia non seruata forma actus, vel mandati totum corrumpit. Vnde si committens dispensationem dicit, quod dispensans iniungat certam particularem pœnitentiam, illa assignata debet imponi. Si vero dicat solum in genere quod imponat illi pœnitentiam: tunc dispensans aliquam debet imponere quam iudicauerit sufficientem arbitrio prudentis viri, ac dispensatoris Dei. Si vero committens dispensationem non exprimit vt dispensans imponat pœnitentiam, quo pacto multa priuilegia concessa Religiosis à Summo Pontifice solum dicunt in communi, & concedunt quod possint in tali, vel tali materia dispensare cum Religiosis, vel sæcularibus, tunc maior est difficultas, cuius resolutio petenda est ex materia circa quam dispensatur.

3 Sit ergo prima conclusio. Quando ex parte petentis, dispensationem datur morbus, vel impotentia naturalis implendi præceptum, vel res in qua dispensatur non est pœna aliqua contracta ex aliquo delicto, non tenetur dispensans imponere aliquam pœnitentiam dispensato. Hæc satis colligitur ex dictis à Suarez *rem. de legibus lib. 6. cap. 18. num. 14.* vbi ait. quod quando in materia dispensationis datur talis causa, vel necessitas, quæ excuset à seruando præcepto, tunc non tam proprie dicetur prælatus dispensare, quam interpretari legem, seu dicere, ibi legem non obligare: vnde sequitur ibi non debere imponere pœnitentiam, cum tam clara detur causa dispensandi, & dispensatio tollat omnino obligationem legis. Probatur primo ex dicto communi, Necessitas non habet legem: vt habetur *cap. con-*  
*filiam*

*filium de obseruat. ieiunij.* Vbi Papa respondit, quod non seruantibus ieiunium quadragesimale, & tunc manducantibus carnem ob magnam famis inedia, & penuriam annonæ, non esset pœnitentia aliqua imponenda. Et *cap. ad audientiam de clerico non resid.* excusatur clericus à residentia, & fructuum amissione propter infirmitatem corporalem. Vbi optime glossa *verbo infirmitas*, citans multos textus iuris ciuilibis, & canonici, dicit ad hoc intentum, quod infirmo afflicto non est danda afflictio: nec pœna debet in culpam verti, imo potius afflicto miserendum est, & compatiendum, nec duplici damno debet aliquis affici. Quæ omnia clarescunt ad hoc quod non sit imponenda pœnitentia dispensato infirmo circa ieiunium, vel non potenti dicere horas canonicas absque magna difficultate, esset enim hoc afflicto dare afflictionem. Idem colligitur ex *cap. clericum victum 91. dist.* & hoc applicabis ad similes necessitates dispensandas. Quod adeo verum est, vt teneat Sanchez *lib. 3. de Matr. disp. 1. omm. 9.* cum multis ibi citatis, quod quando adest legitima causa dispensandi, non potest Ordinarius imponere pœnam aliquam pecuniariam dispensato. Si autem quæras an hoc etiam verum sit in dispensatione voti? Dico quod tanta poterit esse necessitas vouentis, vel difficultas in implendo voto, vt in illius dispensatione nulla sit pœnitentia imponenda, quia tunc habebunt locum supra dicta, quod necessitas nō habet legem, & quod afflicto non est danda afflictio. Excipe si committens dispensationem voti iubet imponi pœnitentiam, vt solet iubere summ. pœnitentiarius in litteris de quibus supra circa dispensandos in voto Religionis, vel castitatis. In illis enim forte reperitur minor causa dispensandi, maxime quia vt plurimum petunt similes dispensationes,

nes, vt possint matrimonium contrahere. Quod vero dixi in conclusione non esse imponendam pænitentiam dispensato in re quæ non est pæna orta ex aliquo delicto, melius intelliges ex conclusione sequenti: & probatur statim ex supra dictis, quia vbi non est culpa, nec pæna culpæ imponenda, cum pæna culpæ tantum respondeat.

4 Secunda conclusio. Quando prælatus dispensat in aliqua pæna, seu aliquo impedimento orto ex aliquo delicto, vt in irregularitate homicidii, vel indebitæ celebrationis, & similibus, vel tollit inhabilitatem contractam ex delicto, tunc debet imponere aliquam pænitentiam dispensato. Hæc colligitur ex illis litteris summ. pænitentiarij, de quibus supra, & ex consuetudine Summorum Pontificum, qui quando committunt Ordinariis, vel aliis prælatis hodie vt dispensent cum aliquibus, solent dicere in commissione, quod illis iniungant salutarem pænitentiam. Sic Concilium Trid. sess. 24. cap. 6. de reform. concedens Episcopis vt dispensent in irregularitatibus, pænis, &c. vt ibi addit: *Imposita pænitentia salutari*. Et ratio naturalis videtur dictare, vt scilicet vna pæna, irregularitas v.g. per aliam pænam tollatur, vel potius compensetur. Id quod ego probo exemplo claro. Nam quando Summi Pontifices concedunt indulgentias, semper iniungunt aliquod onus, & quasi pænitentiam implendam per illum, qui debet lucrari indulgentiam: cuius hæc est ratio, quia cum per indulgentiam relaxetur pæna debita in purgatorio, consentaneum est, vt lucraturo indulgentiam aliqua pæna imponatur subeunda pro illa pæna debita in purgatorio. Eodem modo, quando prælatus per dispensationem tollit aliquam pænam irregularitatis, excommunicationis, vel inhabilitatis, vel impedi-

impedimentum ortum ex delicto, conueniens est, imo debitum, vt imponat aliquam penam subeundam à dispensato pro pœna ablata per dispensationem. Obijcies: Male ergo faciunt prælati regulares, imo videntur nulliter dispensare, quando iuxta supradicta ex Nauarro & Zêrola, in capitulis & visitationibus dispensant in communi cum irregularibus, &c. cum ibi nullam imponant particularem penitentiam dispensatis, quorum aliqui forte habebunt irregularitates ortas ex delicto. Respondeo tamen prædictos prælatos valide tunc dispensare modo prædicto. Primo quia aliqualem imponunt ibi penitentiam possibilem, prosterminuntur enim Religiosi humo, & dicunt confessionem generalem, cum aliquot Ave Maria impositis, quæ est aliqualis penitentia. 2. Ibi non est possibile aliquam particularem penitentiam imponi, quia non debent delicta occulta ibi in publico reuelari. Tertio, potest dici quod illud est extraordinarium beneficium quod volunt, & possunt facere Summi Pontifices, concedentes vt prælati in actu celebri capitulari dispensent in communi cum irregularibus non imposita penitentia: id enim potest facere Papa, & id potest concedere cum sit supra omnem legem Ecclesiasticam.

Ex his potest responderi ad argumenta prioris partis. Nam ad primum ex cap. *licet de ferijs*, responder Sanchez citata *diff. 10. num. 11*. quod ibi Papa non concedit absolute vt dispensetur cum illis piscatoribus Aleciarum, sed indulget vt commutetur lex diei festi in illam eleemosinam: diuersa vero sunt inter se dispensatio in lege, & commutatio legis. Nam dispensatio tollit omnem obligationem legis, commutatio vero mutat vinculum legis in aliud vinculum: & Papa ibi non dicit, Dispensamus: sed ait. *Indulgemus vt liceat diebus*



*diebus Dominicis &c.* Secundo responderi potest voluisse Papam in illa particulati dispensatione piscationis onus illud imponi, & propterea in illa seruanda est talis forma pro vt supra diximus. Secus in aliis iuxta regulas supra traditas. Tertio respondet Sanch. *citato num. 11.* quod illa eleemosyna non imponitur de præcepto, sed de consilio, quæ est verior, & clarior responsio. Ad secundum Panormitani respondet Sanch. *citato num. 11.* cum Sylues, Tabiena, & aliis, illam eleemosynam pro dispensatione ieiunij non iuberi imponi ex præcepto, sed ex consilio pro maiori securitate. Et hoc clarius intelligetur per responsionem ad exemplum secundum positum in secundo eodem argumento ex Leone X. iubentis, vt cum dispensatur cum fratre infirmo ne dicat officium D. eidem imponatur aliquod onus quotidianum: Ad hoc enim, & similia exempla dicendum est, aliquando summos Pontifices dispensare in aliquibus, & inbere imponi pœnitentias pro maiori securitate & ad tollendos scrupulos, cum tamen aliquando in aliquibus dubiis non esset in rigore necessaria dispensatio. Et faciunt in hoc summi Pontifices quod consulit Suarez *lib. 6. de voto cap. 17. num. 21.* & alij, videlicet, quod quando dubium est an causa ad dispensandum sit vrigens, vel sufficiens, prælatus dispensans pro maiori securitate vtatur simul commutatione iniungendo aliquod onus leue. & sic simul dispensat, & commutat: & sic fecit Leo X. in illa cōcessione, & alij summi Pontifices in similibus, cum tamen vt diximus in rigore aliquando non sit necessaria impositio alicuius pœnitentiæ pro dispensatione ieiunij, vel recitatione diuini officij, vt cum morbus, vel imbecillitas, vel impotentia sunt claræ, & magnæ, & manifestæ. Ad exemplum denique litterarum  
sum.

sum. pœnitentiarij iubentis imponi pœnitentias dispensatis, iam supra diximus in secunda conclusione id fieri quod dispensatur in pœna orta ex delicto, vel in impedimento orto ex culpa, & proinde tunc seruandam esse formam traditam à summo pœnitentiaro.

Ex his colligo quod confessor regularis, qui per concessionem Pij V. de licentia sui prouincialis dispensat cum vxoratis qui fornicati sunt cum consanguineis alterius coniugis ad petendum debitum, debent imponere illis pœnitentiam particularem, quia dispensant in pœna, vel impedimento orto ex delicto.

Vltimo aduerto quod si Papa in aliquo priuilegio, vel concessione, vel alius prælatus committant alicui vt dispensez imposita pœnitentia, vel assignata aliqua forma seruanda in dispensatione, & ista pœnitentia, vel forma omittatur, dispensatio erit nulla eo quod non sit seruata forma mandati. Habetur in *cap. cum dilecta de rescriptis*, & *cap. venerabili de offi. delegati*, & tenet Sanchez 8. de *Matrim. disput. 34. num. 26.*

## CASVS III.

*De dispensatione Bigami.*

QV I D A M clericus ante ordines susceptos contraxit matrimonium in Brasilia cum duabus virginibus successiue; quibus mortuis, suscepit ordines sacros, & præsbyter factus est, non aduertens clarum impedimentum Bigamiæ realis: celebrauit sæpius,  
imo

imo obtinuit quandam cappellaniam fundatam à quodam suo consanguineo. Post hæc conscius sui impedimenti, & irregularitatis, existens Olyssipone adiuit duos conuentus Religiosorum, in quibus patres doctos illorum interrogauit, an per illorum priuilegia possent cum illo dispensare vt secunda conscientia posset in officio sacerdotis ministrare? Et dato quod illi non possent, an cum illo posset Episcopus dispensare? Et ante responsionem casus, vt sciatur grauitas, ac difficultas illius; Noto hunc clericum primo esse irregularem propter bigamiam realem vt patet, quæ ferè nunquam dispensatur ad ordines. Secundo per susceptionem ordinum indebitam, incurrit suspensionem. Tertiò per eandem ordinum susceptionem indebitam incurrit excommunicationem, quam semper Episcopus ordinans ante ordinum collationem fulminat contra illos qui accesserint cum aliquo impedimento, teste Syluestro *ver. Irregularitas*: & sic postea celebrans incurrit nouam irregularitatem. Et potest adhuc colligi ex Syluestro *cu. uo verbo §. 27. Quod celebrans suspensus incurrit tertiam irregularitatem*. Et ultimo potest adhuc dici quod si illa cappellania quam acceptauit, erat instituta auctoritate Episcopi, ita vt transiret in beneficium, iuxta notata per Azorium *tom. 2. lib. 3. cap. 8. quest. 3.* iste clericus etiam incurrit pœnas acceptantis beneficium Ecclesiasticum cum impedimento irregularitatis.

¶ Ego pro remedio istius, vel similis impediti dixi, quod si Episcopus in hoc casu posset dispensare via ordinaria, nos etiam possemus per priuilegia: Nam Sixtus IV. concessit Patribus Minimis; vt possent audire cōfessiones secularium, eosque absolueret ab omnibus censuris, & cum illis dispensare in omnibus ir-

regularitatibus referuatis ordinario ; habetur in compendio Mendicantium *ver. absolutio quoad seculares* 2. §. 20. Circa quam concessionem , licet Corduba *Annotat. ad compendium in dicto* §. 20. dicat Patres Minimorum non vti ista concessione quoad dispensationem vllius irregularitatis cum sæcularibus , & ita se audiuisse à quodam Prouinciali Ordinis Minimorum. Ad quod ego dico , quod ille Prouincialis fortè non erat tam doctus ac fuit Vega pater minimus , ac doctissimus ; *qui in sum. ver. Absolutio casu* 44. §. dixe *que lo dicho* , refert idem priuilegium Sixti III. illis concessum ad dispensandum cum seculares in irregularitatibus modo supradicto ; & non dicit in sua Religione abstineri à tali dispensatione , quod debuit dicere si ita esset. Præterea Rodriguez *tom. 1. ff. quæst. 61. art. 3.* referens idem priuilegium , ait Iulium secundum declarasse , & extendisse idem priuilegium Sixti III. datum Minimis vt intelligeretur eos id posse etiam circa seculares , & Ecclesiasticas personas.

2 Tertio Henriquez *tom. 1. lib. 7. de Indulgentiis cap. 28. §. 5.* ait Patres Minimorum Romæ vt illo priuilegio Sixti III. quoad seculares , etiam dispensando in irregularitate modo supradicto. Quamuis autem ibi Henriquez dicat solum prælatum Minimorum sic dispensare : Ego video quod verba priuilegij id non specificant de solis Prælatis , sed concedunt illud Patribus Minimis. Volui hæc semel fusius ponere vt designat quis mirari , si dicentem me audiat , posse Regulares aliquando dispensare cum clericis , vel sæcularibus in aliqua irregularitate ; Datur enim tam clarum priuilegium , & affirmatur à tribus Doctoribus supra citatis grauib. & recentioribus. Et nihilominus his non obstantibus ego non consulo vt Regulares hodie virtute illius

illius priuilegij dispensent cum sæcularibus in aliqua irregularitate, quia video non esse in vsu apud Religiosos, nec de tali vsu vnquam audiui.

Tota ergo dubitatio est an cum isto clerico bigamo posset Episcopus dispensare in omnibus illis impedimentis citatis supra, ita vt posset Ordinum vsum liberum habere? Et quidem in prima irregularitate bigamiz clarum est non posse Episcopum dispensare ad ordines, vt patet ex *cap. 2. de bigamis*, & ex *cap. Nuper eodem tit.* adeo vt multi doctores dixerint, nec summum Pontificem posse in illa dispensare, teste Suarez *tom. de Censur. disput. 49. sect. 6. num. 2.* Quod tamen falsum est; potest enim Papa dispensare.

3 Addo quod nec potest Episcopus dispensare in illa per illam amplam concessionem Concilij Trid. *sess. 24. cap. 6.* vbi concedit Episcopis quod dispensent in omni irregularitate, excepta illa, quæ nascitur ex homicidio voluntario: Non inquam possunt; quia ibi Concilium solum concedit vt dispensent in irregularitate orta ex delicto: Bigamia vero realis non oritur ex delicto, quia sine peccato quis contrahit cum duabus vxoribus luccessiuè. Posset tamen Episcopus dispensare cum isto clerico in aliis censuris, & irregularitatibus istius clerici occultis, & natis ex delicto per dictam concessionem Tridentini.

Vnum solum refugium manet circa istum clericum circa prædictam bigamiam dispensandam, an videlicet, possit Episcopus cum illo in illa dispensare eo modo, quo Episcopus solet dispensare in impedimentis occultis matrimonij dirimentibus, postquam matrimonium iam contractum est Suppono certissimum apud omnes iuxta Sanchez *lib. 2. de Matrim. disput. 46. à num. 2.* posse Episcopum dispensare in impedimento

dirimente matrimonium, quando casus est secretus, & instat magna necessitas periculi animæ, & scandali, &c. quod ibi fuisse probat Sanchez cum multis Doctoribus, & praxis id obseruat. Videtur enim casus omnino similis propter rationes ibi adductas à Sanchez, quæ huic casui possunt applicari.

4 Quibus visis, & consideratis ego credo quod Episcopus possit dispensare cum isto bigamo quoad bigamiam realem occultam in alio regno, posse item dispensare in aliis illius impedimentis occultis eodem modo Et imprimis habeo eundem Sanchez authorem in lib. 7. de *Matrim. disp.* 86. num. 14. Vbi ait existente penuria Sacerdotum, & Ministrorum (ut fortè in India Occidentali) posse Episcopum dispensare cum bigamo ad ordines sacros, & innuit licet sit casus publicus: dummodo sit magna necessitas, & difficultas ad eundi Romam: & remittit se ad illam doctrinam à se traditam cit. lib. 2. de *Matrim. disp.* 40 ubi probat posse dispensare Episcopum in impedimentis secretis matrimonij urgente magna necessitate. Rationes illius citata disp. 40. ad hunc etiam casum conducentes, sunt hæc. Prima, quia quamuis de ordinario non possit Episcopus, & inferior dispensare in lege Papæ, vel Concilij, potest tamen id facere in casu magnæ necessitatis quando ad Papam aditus non patet (id est commodè) & citat pro hoc septem. vel octo Doctores graues: At in casu istius clerici concurrit difficultas magna ad eundi Papam, concurrit etiam periculum honoris, si enim viderint illum cessare à celebratione Missæ, sinistrè de illo poterunt iudicare: concurrit etiam paupertas, quia fortè ex capellania, & Missæ elemosynis solum sustentatur: quo in casu tantæ necessitatis ex Epichea poterit Episcopus dispensare, sicut ex eadem Epichea

Epichea dispensat in impedimentis occultis matrimonio-  
nij Secūda, quia Episcopus in sua diœcesi potest quid-  
quid Papa potest in tota Ecclesia, vt omnes fatentur,  
nisi ipse Papa sibi referuet aliqua, vt solet, & potest.  
Hæc autem reseruatio fit pro salute animarum, & sa-  
lubriori regimine: At si in causa maximæ necessitatis,  
qualis est ista attentis circumstantiis, teneret talis re-  
seruatio, vergeret in dispendium; & periculum ani-  
marum, vt constat: Ergo non est credendum quod Pa-  
pa velit in tali occasione, & necessitate quod Episco-  
pus nequeat dispensare.

§ Tertia, quia fortior est reseruatio cum Papa reser-  
uat sibi absolutionem alicuius criminis grauissimi, vt  
contenti in Bulla Cœnæ, quam sit reseruatio bigamię,  
quæ non est peccatum, sed impedimentum canonici-  
cum: Et tamen probabilissimum est posse Episcopum  
absolvere in primo casu, quando ratione impedimenti  
non est regressus, vel recursus ad Papam, vt tenent  
Doctores citati ab Henriq. *lib. 6. de pœnitent. cap. 16.  
num. 1. & cap. 9. num. 7.* Vbi idem asserit de casibus re-  
seruatis in Motibus propriis Sixti V. non obstante ri-  
gidissima reseruatione in illis contenta: Ergo à simili  
in casu istius magnæ necessitatis attentis circumstan-  
tiis poterit Episcopus dispensare cum isto bigamo,  
cum in reseruatione dispensationis cum bigamo non  
sit tam stricta reseruatio, nec tam rigida sicut in Bullis  
citatis Sixti V. Vltimo facit quod iste bigamus, qui bi-  
gamiam contraxit in Brasilia, & hodie est Olyssipone,  
vel Eboræ, est bigamus Eboræ occultus, nec impedi-  
mentum eius deductum est ad forum contentiosam,  
vt patet: At potest Episcopus dispensare in casu, in  
quo alias non poterat, si esset publicus alibi, si est oc-  
cultus in hoc loco, vt tenet Sanchez cum multis *lib. 2.*

*Decal. cap. 11 à num. 19.* qui tamen *num. 20.* aduertit tūc dici occultum v. g. Vlyssipone, quando non est spes, fore vt ad Vlyssiponem res deferatur, v. g. ex Brasilia. Ergo cum ille casus alibi publicus, hīc tamen sit occultus, nec sit spes fore vt deferatur ex Brasilia Vlyssiponem, poterit in illo dispensare. Et adhuc probatur, quia tota difficultas dispensandi cum bigamo reali est, quia textus, & Doctores dicunt non posse Episcopum cum eo dispensare ad ordines suscipiendos etiam Minores: At cum isto bigamo hodie iam non dispensatur ad ordines sacros suscipiendos (iam enim illos habet, quamuis illicitē) sed dispensatur cum illo in executione Ordinum, quod est multo minus, quam dispensare ad illos recipiendos: ergo poterit Episcopus cum illo dispensare in executione Ordinum.

6 Obiicis. Si per te hoc potest Episcopus: ergo etiam Prælati Religionis cuiusque per sua priuilegia poterit dispensare cum isto bigamo, quia supra diximus, quod si potest Episcopus, potest & Prælati regularis per priuilegium Sixti III. supra citatum. Respondeo negando consequentiam: Nam vt optimè notat Sanchez *citata disp. 40. num. 9.* licet Episcopi possint per Epicheam dispensare in illis impedimentis occultis matrimonij, & alias Regulares habeant priuilegium dispensandi in casibus Episcopalibus; hi casus occulti in quibus dispensant Episcopi pro magna necessitate, non sunt casus Episcopales, sed sunt casus Papales, & ideo non possunt Religiosi per sua priuilegia dispensare in illis etiam occultis, etiam si occurrat magna necessitas. Vide Henriq. *lib. 6. de Pœnit. cap. 14. num. 7. littera P.* & Rodriguez in *Bulla citata. §. 9. num. 118.*

7 Et adhuc circa id quod paulò suprà dixi iuuare ad hanc dispensationem facilitandam, esse casum occultum in



tum in hoc loco, facit, quod Patribus D. Hieron. in suo *compendio. vers.* Ordines sacri §. 6. conceditur quod bigamus de longinquis partibus, & ignotis, seu ignotus in hoc loco possit dispensari à Prælato, & ad sacros ordines promoueri. Si ergo conceditur Prælato Religionis erga subditum, idque non existente necessitate, & ad promotionem Ordinum, valdè credibile est illud concedi per Epicheam Episcopo circa suum clericum existentem tam vrgenti necessitate, & non ad recipiendos ordines, sed ad ministrandū in iam susceptis:

8 Quæris an iste bigamus potuerit excusari, vel releuari ab istis irregularitatibus, & censuris incurrendis ob bonam fidem, vel ignorantiam quam semper habuit in hoc toto tempore? Responsio pendet ex illis quæ tradidi *tom. 2. Dubiorum Regular. ver. Ignorantia. num. 18. & seqq.* Ex quo loco breuiter dico, quod irregularitas bigamiæ realis, & cætera quæ incurruntur absque peccato, propter solam indecentiam operantis, istæ incurruntur quantumcumque operans ignoret illas, & habeat bonam fidem. Aliæ verò irregularitates & censuræ quæ nascuntur ex delicto, vt ex celebratione in excommunicatione, & similes, non contrahuntur si operans habet ignorantiam iuris positui illas imponentis: facit inter alia *cap. 2. de constit. in 6. cum glossa ibidem.* Vide inter alios Sanchez *lib. 9. de matrim. tot. disp. 32.* & Henricq. *lib. de excomm. cap. 21. num. 1. & seqq.* & hæc bona fides, vel ignorantia istius bigami etiam attendenda est pro faciliiori dispensatione.

9 Et adhuc pro consolatione istius clerici, vel similibus irregularium carentium remedio de præsentis moneo vt videas Rodriguez in *sim tom. 1. ver. Irregularitas ex homicidio casuali, contr. 1.* vbi ait, quod si irregularis, vel excommunicatus non habet de præsentis

remedium absolutionis, & timet notabilem infamiam si non celebret, tunc præmissa contritione, & confessione poterit celebrare absque peccato durante illo periculo, & quod ob talem celebrationem non incurret aliquam censuram durante illo periculo, dummodo faciat totum quod poterit pro dispensatione obtinenda Et citat Castr. Nauar. & Gutierrez, & tenet idem Zerola 2. par. praxis, ver. Irregularitas. quæst. 9.

## CASVS IV.

*De legato relicto Franciscano conuentui  
cum clausula prohibita.*

**Q**uidam defunctus in suo testamento sic disposuit. *Tales redditus annuales, quos habeo tritici, & pecunie possideat in sua vita solum Petrus clericus meus consanguineus, & per mortem ipsius hos redditus annuales relinquendo conuentui sancti Francisci huius oppidi Oliuēca, ut ipse conuentus eos acquirat, ut heres illorum, & tradantur Syndico conuentus, ut semper expendantur in necessitatibus infirmorum.* Sic ibi in testamento. Iste clericus sic institutus vsusfructuarius in vita, vult facere pactum, & contractum cum conuentu prædicto, & Syndico, ut sibi relinquuntur liberi prædicti redditus annuales, ita ut de illis possit testari libere in morte: & per modum emptionis, & venditionis dat statim conuentui quingentos aureos, dummodo conuentus & Syndicus renuntient quidquid iuris habere possit ad illos redditus annuales per mortem ipsius clerici nunc viuentis. Quæritur an possit prædictus conuentus Minorum, & ip-  
sius

fius Syndicus facere hoc pactum, & venditionem.

Et videtur quod possit. Nam licet videantur fratres Minores incapaces talis legati, vel potius hæreditatis tali modo relictæ propter *cap. exiit de ver. signific. in 6. §.* ad hæc: Nihilominus postea Clemens VII. in Bullario Rodriguez fol. 761. concessit Minoretis: *Ut Minister Prouincialis, vel Goardianus cum Discretis sui conuentus, quando sibi relictæ fuerint legata quorum non sint capaces per suam regulam, possint per suos Syndicos pacisci cum executoribus testamentorum, vel heredibus circa prædicta legata, vel institutiones sicut illis visum fuerit, ut soluant semel tantum in pecunia, vel alijs rebus una tantum vice ipsis fratribus pro illorum necessitatibus subleuandis, & quod heredes auctoritate Apostolica in perpetuum liberentur ad aliquid ultra soluendum, &c.* Quæ concessio satis clara est & satis fauet ad intentum quod possit Syndicus facere prædictum contractum, & venditionem. Et Rodriguez tom. 2. qq. q. 126. art. 6. citans hanc concessionem innuit posse hodie Minoritas illi strare, & illa uti.

Nihilominus ego respondi prædictum conuentum, & Syndicum non posse acceptare tale pactum, vel venditionem, nec per mortem huius clerici posse acceptare, vel possidere prædictos redditus annuales tritici & pecuniæ. Moueor quia prædictum legatum sub tali forma repugnat nostræ regulæ Minorum. Constat ex declaratione Papæ Nicolai in *cap. Exiit citato, & §.* Ad hæc, ubi explicans quæ legata per testamentum possint acceptare Minores stante puritate suæ regulæ, sic ait: *Declaramus & ordinamus, quod si testator modum secundum quem fratribus (eorum conditione inspecta) recipere non liceret exprimat in legando, ut si legaret vineam, vel agrum ad colendum, vel similia verba in similibus proferret à tali legato. & eius receptione per conuentum modum*

*fratres abstineant.* Hoc ipsum clarius expressit Clemens V. in *Clement. Exini de paradiso de verb. signific. versiculo*. Cumque annui redditus: vbi expresse asserit redditus annuales repugnare mendicanti, & paupertati Minorum fratrum. At constat hoc legatum, de quo agimus esse redditus annuales, & suo modo esse agrum ad colendum, vel quid simile: ergo hoc legatum clare repugnat paupertati, & puritati regulæ Minorum.

4 Supposito vero quod clare repugnat Regulæ nostræ, dico non posse nos circa illud vti concessione prædicta Clementis VII. paciscendo cum hæredibus, & vendendo illud pro vna vice, sicut citatus Clemens VII. dixit in sua concessione: probo euidenter, quia citata concessio Clementis VII. est dispensatio circa puritatem, & paupertatem regulæ, cum dispense in legato repugnante Regulæ: iuxta Clementinam *Exini*, citatam. At capitulum generale Minorum postea sæpe sæpius renunciauit clare omnibus dispensationibus Papalibus, per quas regulæ puritas, & paupertas minui potest. Et fecit protestationem quod Ordo noster volebat seruare regulam pure iuxta declarationes Nicolai *cit. cap. Exist.* & Clementis V. *cit. Clement. Exini*, reiectis dispensationibus quibuscumque. Constat hoc præcipue ex capitulo generali Tolletano celebrato anno 1606. *tit. de obseruantia regula.* Et nouissime id ipsum decreuit, & statuit capitulum generale Segouienſe ad finem *tit. de dispensatione Regula, &c.* Quod autem tota Religio in capitulo generali cum ipso Generali præſidente poſſit renunciare cuicumque priuilegio Papali, conceſſit Léo X. in *compendio. Mendic. ver. Generalis. §. 24.* vbi ſtatuit, & etiam aduertit ibi Collector, quod ſi Generalis cum capitulo decernant non eſſe v̄tendum aliqua conceſſione Papali, ſcripta, vel

vel concessa per viux vocis oraculum , non possunt postea fratres , vel Moniales nostri Ordinis vti prædicta concessione , vel priuilegio Pontificio. Ex quibus omnibus satis constat non posse dictum Conuentum Minorum, vel Syndicum illius de præsentī facere tale pactum , & venditionem annuorum reddituum : nec per mortem Clerici possidentis illos acceptare. sed relinquendos esse hæredibus ad quos pertineant.

---

## C A S V S V.

*De quodam Nouitio expulso , sed reclamante.*

1 **I**N quodam Conuentu fuit quidam Nouitius, qui gestauit habitum per menses vndecim: Mense vndecimo expleto audiuit Prælatus tertio suffragia Conuentus, quæ erant vltima suffragia secundum statuta Religionis , & maior pars Conuentus dedit illi suffragia ad professionem, sicut fecerat 4. & 8. mensibus : nec secundum statuta Religionis amplius suffragia suscipiebantur, sed cum solis suffragiis vndecimi mensis admittitur ad professionem expleto mense duodecimo, cuius finis expectatur. Interim ante cõpletum mensem duodecimum , Nouitius molestatus pœnitentia sibi iniuncta à Magistro Nouitiorum, quã non acceptauit quasi iratus, & impatiens petiuit vestes suas seculares, dicens se velle exire: Iussit Prælatus dare, & exiuit. Eodem tempore constitit in Conuentu inter multos fratres , maxime ex Magistro Nouitiorum, & aliis prædictum Nouitium esse malæ indolis, duræ ceruicis , & in aliquibus occasionibus ostendisse mores

mores Religioni repugnantes : imo & ante habitus susceptionem non bonam famam habuisse in aliquibus moribus, de quibus Religio antea conscia non fuit, si enim sciret, ad habitum non reciperet. Nouitius sic positus extra Conuentum cum habitu seculari, pœnitens facti, post sex vel octo dies coram prælato habitum repetiit, allegans se calore iracundiæ inconsiderate vestes petiisse, habereque restitutionem, nec posse repelli, eo quod iam Conuentus pro illo suffragatus fuerit vltimis suffragiis. Prælatus negauit illi secundam receptionem, solum allegans ipsum Nouitium sponte exiuisse. Nouitius litem mouit Prælato superiori, vt iterum ad habitum, & professionem reciperetur.

2 Quæritur an teneatur Religio illum iterum ad habitum, & professionem admittere, & ad id cogi possit ex iustitia? Et pro parte affirmatiua, quod Conuentus ad id obligetur, videtur probari, quia iam Conuentus vltima suffragia pro eo tulit, per quæ sibi placuit illum ad professionem recipere : & tunc per Regulam iuris vigesimam primam. *Quod semel placuit amplius displicere non potest.* Cum ergo iam placuerit Conuentui dare illi professionem ob suffragia data ad profitendum, iam Conuentus non potest pœnitere, nec resilire ab hoc dato consensu. Secundo, quia non obstat, quod ipse sponte exierit petens vestes, id enim fecit inconsiderate. & calore iracundiæ: Quod vero sit calore iracundiæ non valet nisi postea ratificetur, vt tradit optime Nauarrus tom. 1. suorum operum, super cap. Si quis iratus, 2. quæst. 3. num. 3. pro quo citat Bartolum dicentem alienationem per iracundiam factam non valere, vltra alia quæ ibi dicit: At iste Nouitius petiit vestes, & exiuit afflictione pœnitentiæ iniunctæ sibi à Magistro,

Magistro, vt dicitur. Tertio, quia renunciatio facta non omnino sponte, non valet, *cap. Super hoc, de renunciatio.* vbi Papa dicit non esse facile credendum quemdam sponte renunciaſſe cuidam beneficio multis laboribus & expenſis acquiſito, ex quo ſuſtentari debet. At iſte Nouitiuſ per multos labores, & pœnitentias vnius anni Nouitiatus acquiſierat ius ad ſtatum Monachalem, ex quo poterat ſuſtentari, ac proinde credendum non eſt illum ſponte renunciaſſe iuri quod iam habebat per vltima ſuffragia Conuentus, vt admitteretur ad profeſſionem, ac proinde ſua renunciatio, & exitus non videntur illi nocere.

3 Pro ſolutione aduerto quod in iſta Religione, in qua hoc contigit, ſolent Prælati, non obſtante quod Nouitiuſ iam habeat vltima ſuffragia Conuentus, in ipſa adhuc hora profeſſionis percontari à fratribus capitulariter congregatis an ſciant aliquem defectum, vel impedimentum Nouitij propter quod non debeat ad profeſſionem admitti; inuentoque defectu ad illam non recipitur; & eſt hoc fundatum in iure, vt ſtatim dicam. Adhuc enim per ſuffragia Conuentus data, Nouitiuſ non incorporatur Religioni, vt patet, ſed ſolum habet ius vt recipiatur, ſi aliunde non conſtet de impedimento.

4 Secundo aduerto quod ſi poſt data vltima ſuffragia pro Nouitio ad profeſſionem, non appareat aliquod impedimentum ſecretum, velitque Nouitiuſ profiteri, non poteſt iam Conuentus illum voluntarie expellere. Præcedit enim contractus, virtualis inter Conuentum & Nouitium, vt ſi in anno nouitiatus Conuentus in illo experiatur mores conuenientes ad vitam Monasticam, illum Conuentus recipiet ad profeſſionem: iam vero à contractu, & conditionibus contractus

contractus neutra pars potest resilire ad libitum, vt tradunt Doctores in materia contractuum. Et hoc magis confirmatur ex eo quod dixi in 1. tom. *dubio. regul. verbo* Nouitius. *num.* 54. vbi cum Corduba & Miranda probaui peccare M. Religiosum negantem suffragium Nouitio absque vlla causa, ob quasi contractum iam ibi interuenientem. Quod à fortiori dicendum est de Conuentu non recipiente Nouitium ad professionem, pro quo iam totus Conuentus suffragatus est, nec de nouo contra Nouitium culpa aliqua cognoscitur, tenetur enim Conuentus quali ex iustitia, ob clarum pactum, & contractum præcedentem.

§ Hoc posito ad intentum, respondeo prædictum Nouitium non posse licite mouere litem Prælato vt iterum recipiatur ad habitum, & professionem, neque Prælatum, vel Conuentum ad id teneri, vel posse obligari. Prima & principalis ratio huius rei est, quoniam Conuentus post data suffragia pro Nouitio ad professionem sciuit culpas illius, tum in nouitiatu, tum in sæculo commissas, quas si sciret pro Nouitio non daret suffragium; & licet Nouitius per suffragia sibi data habuerit ius ad rem, vt reciperetur ad professionem; hoc tamen ius non obstat, quin cognitis postea culpis ante professionem, possit ab Ordine expelli. Est clarissimum exemplum in cap. *Cum nobis olim. de elect.* vbi Papa decernit quod postquam aliquis concorditer fuerit electus ad aliquod officium, & habeat iam ius ad illud propter suffragia electorum, nihilominus præses electionis ex officio, etiam nemine opponente, inquirat de moribus, & vita electi, & si illum defectuosum inueniat, non confirmet, sed repellat. Et ad hoc intentum citat ibi glossa in verbo *Ex officio, cap. Venerabilem. de elect. & cap. priusquam. 28. distinet.* Quod clarissime



riſſimè facit pro noſtro caſu: quamuis enim iſte Nouiti-  
us per vltima ſuffragia Conuentus ſibi data habuerit  
ius ad profeſſionem, adhuc Prælatus ex officio ante  
profeſſionem poteſt requirere de illius defectibus, &  
illis inuentis illum repellere, & eiicere ab Ordine, vt  
diximus ſupra, ſolere fieri in iſta Religione, in qua  
Prælatus in hora profeſſionis, abſente Nouitio, quarit  
de vita, & moribus illius ore tenus, ad prædictum in-  
tentum, & iuxta textus proximè adductos. Secundo  
probatur ex iis, quæ tradit *gloſſ. 2. ad dictam regulam*,  
quod ſemel placuit, in 6. vbi dicit poſſe aliquem reuo-  
care, ac ſibi diſplicere, quando poſt conſenſum ſciuit  
de nouo aliquid, quod ſi antea ſciret, non conſentiret  
antea, & habetur expreſſè *cap. Vt circa de elect. in 6. &  
cap. Nulli de exceptionibus*, & multis aliis textibus, ibi  
citatis à gloſſa: cum ergo Conuentus poſt data vltima  
ſuffragia pro iſto Nouitio ſciuerit defectus notabiles  
illius, poterit pœnitere de ſuffragiis pro illo datis, il-  
læque reuocare, & illum expellere. Et hoc maximè  
conformat cum Bullis Sixti V. per quas iubetur vt  
fiant informationes circa Nouitium, ne recipiantur  
ad ordinem illi, qui malis moribus ſunt imbuti. Ter-  
tio probatur, quia ignorans, vel errans non conſentit,  
vt habetur 38. *diſtinct. cap. Quamuis*, & *cap. Si de be-  
neſicio de prabendis*, & colligitur ex Clementina pri-  
ma *de procuratoribus*, vbi gloſſa in verbo *Scienter*. At  
Conuentus quando dedit ſuffragia pro iſto Nouitio  
ignorabat illius defectus in Nouitiatu, & in ſaculo,  
ergo etiam ſi dederit ſuffragia non conſenſit, quia ne-  
ſciuit, & errauit. Quod adeo verum eſt, vt dixerit Na-  
uarrus *lib. 3. conſil. tit. de Regul. num. 11.* quod ſi aliqua  
Religio habet ſtatutum quod non recipiantur ad pro-  
feſſionem Chriſtiani noui, & aliquis hac labe macu-  
latus

latus in professione rogatus de illa, eam negaret, & post professionem constaret illum tali macula laborare, ait Nauarrus. Professionem istius fore nullam, non ex vi talis statuti, sed posse eiici ab ordine, quia defuit consensus in professione ex parte ipsius Ordinis, qui non intendit se ipsum obligare taliter maculato: Est enim professio contractus mutuus, in quo si deficiat consensus vnius partis, est nullus. Si autem hoc dixit Nauarrus de iam admissio ad professionem, quæ est maius vinculum, quando illius defectus fuit ignoratus; à fortiori idem affirmaret de isto nostro professione, cuius defectus sunt ignorati.

6 Quæris: an ad impediendam professionem istius sufficiat vnus tantum testis gravis, & omni exceptione maior, qui detegit in capitulo defectus notabiles istius Nouitij, qualis erit solus Magister Nouitiorum, vel quis similis? Et videtur quod sufficiat: nam etiam ad impediendum matrimonium antequam fiat, sufficit vnus testis gravis cum circumstantiis, quas refert Sanchez fusc. lib. 2. de marrim. disp. 71. vbi multos citat. Ita vt aliqui addant teneri quemlibet denunciare tale impedimentum, etiam si sit occultum, quia intenditur vitatio peccati. Et in hoc nostro casu intenditur bonum commune Religionis, & vitatio mali publici; magis vero ponderat bonum commune Religionis, quam istius Nouitij, ad hoc vt debeat illius defectus occultus manifestari, ita tamen vt non sciatur per confessionem. Illud vero quod dicitur non sufficere vnum testem ad impediendum, quando agitur de præiudicio tertij, quale præiudicium hic videtur fieri Nouitio; illud inquam intelligendum videtur quando agitur de præiudicio tertij inferendo iniuste, secus si iuste illi inferatur: & ipse sibi imputet quod habens tale impedi-

mentum

mentum intentauerit Monachatum. Nihilominus ego in hoc casu maturius procedendum duxerim, & dicerem non sufficere vnum tantum testem diuulgantem defectum notabilem Nouitij, ad impediendam illius professionem, nisi cum tali teste concurrat fama, & talia iudicia, quæ faciant probationem: Est enim res grauissima expellere Nouitium ab Ordine postquam Conuentus habet suffragia: & ideo maiori probatione indiget quam vnius testis quantumcumque grauissimi. In hoc autem scrupulum non habeo, debere, ac teneri quemlibet Religiosum prodere defectum Nouitij etiam occultum, dummodo non sciuerit per confessionem sacramentalem; idque ob rationem proximè dictam, quia bonum commune Ordinis preponderat bono particulari Nouitij. Et quia si secretum non obligat cum præiudicio tertij, minus obligabit cum præiudicio totius Religionis. Vide quæ tradit in simili materia, Sanchez *lib. 3. de Matrim. disput. 13. num. 2.* cum multis ibi dictis, & citatis.

Ad primum argumentum in oppositum adductum, patet solutio ex dictis paulo supra cum glossa eiusdem Regulæ; videlicet quod potest quis sibi displicere, & potest reuocare id quod sibi placuerat, quando post consensum sciuit de nouo aliquid, quod si ante sciret, non daret consensum. Addit ibi glossa etiam posse aliquem dissentire, & resilire à priori consensu, propter causam denuo superuenientē: At in hoc casu post data suffragia, & consensum conuentus, superuenit noua causa, & in ordine detestabilis, quod scilicet iste Nouitius noluerit acceptare disciplinam iniunctam à Magistro, quod etiam à professis fieri, valdè odiosum est, ac seuerè punitur. Superuenit etiam quod ipse spontè à Conuentu exiuit, quæ ambo prodant animum du-

rum, & inobedientem, & ad Religionem nullo modo accommodatum. Ad secundum, dico quod licet id fecerit calore iracundiæ, & taliter facta non valeant ut plurimum, non cogit quod iterum debeat recipi; nam obstat aliud impedimentum vehemens, id est cognitio defectuum, quos habet Nouitius, propter quos conuentus non debet, imo non potest illum recipere. Adde quod ille textus *cap. si quis iratus*, non omnino probat esse omnino nullum quod sit calore iracundiæ: alias dicendum esse, quod occidens hominem calore iracundiæ nullam pœnam mereretur. Ad tertium dato quod demus renunciationem habitus factam ab isto Nouitio, non fuerit facta sponte, non sequitur quod Religio teneatur illum recipere, obstat enim ex alio capite impedimentum ne recipiat, videlicet cognitio defectuum quos habet, quibus stantibus Religio non consensit verè, & poterat illum expellere etiam nolentem. Adde quod iudicia sunt clara quod sponte exierit, & renuntiauerit; nam restitit Magistro Nouitiorum, petiit vestes sæculares, quæ videntur spontanea, & non coacta. In citato vero textu huius argumenti Papa non dicit absolutè renunciantem tali beneficio renunciare coacte: Sed colligi inde aliquatiter, quod non renuntiauerit sponte, & ideo mandat ibi Papa inquiri si vis aliqua interuenerit. In

hoc autem casu indicia sunt quod non vi,  
sed sponte exierit ob durum animum,  
non bonis moribus  
ornatum & liberioris  
vitæ intuitu.

## CASVS VI.

*Homicidium factum à Religioso ante Ordinis ingressum.*

I Quidam adolescens annorum viginti, existens in agro prope urbem, coram tribus testibus occidit quendam hominem seruum captiuum, sed valde robustum: illum vero occidit quia seruus verba iniuriosa prior protulerat contra istum adolescentem, & tres socios: Iste vero adolescens, ut fatetur, erat præ aliis natura impatiens, & prætendit in hoc sumere vindictam de verbis contra se prolatis, & gladio occidit. Postmodum iste ingressus est Religionem quādam approbatam, & in illa professus est, & manifestato delicto coram prælato dispensauit prælatus cum illo in irregularitate, & recepit ordines sacros, factusque sacerdos celebrat: Et causa qua motus est prælatus ad dispensandum, fuit quod casus esset occultus: ille enim recepit habitum in loco remoto à loco delicti, intra tamen idem regnum, & mutauit nomen in professione, ut casus esset occultior. Contigit iste casus ante Bullas Sixti V. contra criminosos non recipiendos ad ordinem, sed Religiosus iste hodie viuit. Antequam Prælatus ordinis dispensaret, illius consanguinei coram sum. Pontifice Romæ procurarunt dispensationem irregularitatis, quam tamen non obtinuerunt: respondit enim Papa ut se ordinis Prælati manifestaret: & hoc non obstante, postea Prælati dispensarunt, & ipse celebrabat. Nouit hoc quidam Episcopus, qui erat conscius istius casus, & monuit Prouincialem

istius Religiosi, dicens se mirari quomodo ille celebra-  
ret Missam, cum esset tam publicus irregularis, eo  
quod in illa ciuitate iuxta quam fecit homicidium,  
erat publicum eius delictum divulgatum à tribus so-  
ciis ipsius homicidæ, propter hæc denuo iste Religio-  
sus magnis scrupulis agitatus est, aliis dicentibus il-  
lum non esse bene dispensatum, aliis è contra pro illo  
affirmantibus.

2 Quæritur primo, an istud homicidium fuerit vo-  
luntarium? Secundo, an fuerit notorium? Tertio, an po-  
tuerint prælati Religionis cum illo dispensare virtute  
suorum priuilegiorum, maximè quando Papa eidem  
negauerit antea dispensationem?

3 Circa primum dubium nimis inclinor vt sentiam  
hoc homicidium fuisse voluntarium, saltem in foro  
externo. Nam iste percussit ense, instrumento apto ad  
mortem; percussit animo vindictæ: erat feruidus, &  
impatiens, vt ille fatetur: fuit causa prima & proxima  
mortis: non constat de illo quod proposuerit in animo  
non occidere, sed solum percutere: imo ex modo per-  
cutiendi constat quod voluit occidere, gladio enim  
pectus, vel ventrem percussit, quod Lusitani vocant  
(*dar estocadas*) quod genus percussione supponit vo-  
luntatem occidendi, & ille fatetur quod percusserit  
sic, *com estocada*: Ergo virtualiter saltem voluit clarè  
occidere, & sic non casu, sed voluntariè occidit. Tradit  
hæc ferè in terminis Suarez *tom. de censuris disput. 64.*  
*sect. 1. num. 4. & clarius num. 5. & Nauar. in sum. cap. 27.*  
*num. 240.*

4 Ad secundum dico, hoc homicidium fuisse publi-  
cum, sed non fuisse notorium. Colligitur ex Nauarro  
*in sum. cap. 25. num. 73.* vbi ait diuersum quid esse  
peccatum publicum, seu famosum, à delicto notorio:  
nam

nam famosum, vel publicum esse potest id quod vnus, vel duo, vel tres tantum viderunt in secreto, & postea diuulgarunt, & sic per famam fuit factum publicum. Notorium autem est quod fit loco publico, & videntibus multis; vel illud quod scit euidenter maior pars populi vicinorum, aut collegij. Nota verbum, scire, & euidenter. De hoc autem homicidio non sciuerunt euidenter, nisi tres socij delinquentis: tota vero ciuitas, vel pars illius non sciuit euidenter, sed ex relatione horum trium. Vnde infert Nauarrus citato loco, quod pauciorum scientia quam sex non facit rem notoriam, quando illi non sunt maior pars illius congregationis, cuius respectu illud dicitur notorium. Idem terminis tenet Zerola sequens in hoc Nauarr. *in 1. parte praxis. ver.* Excommunicationis causa formalis. *dub. 3.* & *in 2. par. ver.* Excomm. *dub. 9.* vbi respondet non esse euitandum tamquam notorium percussorem Clerici, illum Religiosum, qui in Refectorio, vel Sacristia manus violentas iniecit in aliū Religiosum, si ibi aderant pauciores testes quā sex. Quod est valde notandum & seruit ad sedandos quotidianos scrupulos, & fundatur in proxime dicta Nauarri doctrina. Imo maius est quod tradit Farinacius *tom. de Inquisitione. tota quest. 21. a num. 11. & seqq. maxime num. 47. fol. 185.* vbi dicit ad notorium requiri decem testes, & non sufficere pauciores. Vide etiam ibidem *num. 49. & 55.* Adde gloss. *in cap. Manifesta. 2. quest. 1.* vbi glossa summaria dicit; quod illud, quod sciunt quinque, dicitur occultum. Cum ergo de hoc homicidio tres tantum sciuerint euidenter, & reliqua pars vrbs quam statim intrarunt sciuerit, vel potius crediderit ex fama solum: concluditur manifeste, non fuisse hoc delictum notorium in vrbe, licet fuerit publicum, seu publicatum, seu famo-

sum; quod facit multum pro statim dicendis circa Prælatum dispensaturum in Religione.

Et antequam respondeam ad tertium principale quæsitum, suppono professionem istius homicidæ fuisse validam, nondum enim, ut dixi, publicata erat Bulla Sixti V. prohibens homicidas, & similes criminosos recipi ad habitum monasticum, sed sicut ex relatione cognoui, contigit homicidium vno, vel duobus annis ante prædictæ Bullæ publicationem, ac proinde professio fuit valida, quia de iure communi homicida non prohibetur fieri Religiosus, ut ego trado 1. tom. *Dubiorum regul. ver.* Nouitij qualitates iuxta Bullam Sixti V. num. 12. & ibidem probo cum textu & duobus exemplis.

Hoc posito ad principale quæsitum tertium istius dubij, vel casus, dico, potuisse prælatos istius Religionis dispensare valide cum isto sic professo homicida ad omnes Ordines sacros suscipiendos, & ad ministrandum in omnibus illis. Constat hoc manifeste ex privilegio Martini V. concessio Benedictinis (quo etiam fruitur Ordo nostri homicidæ) in *Compendio. ver.* Dispensatio. §. 24. per quod prædictis Patribus concessit, *Ut Prior possit absolueret subditos in omni censura Ecclesiastica etiam Papa reservata, & cum eis in omni irregularitate dispensare, in morte videlicet, membrorum truncatione, &c. dum tamen aliquid horum trium notorium non sit.* Itaque solum notorium homicidium excipit: At iam probauimus hoc homicidium non fuisse notorium: Ergo potuit prælatus Ordinis cum illo dispensare. Tenet hoc ipsum Corduba addit. ad *Compend. super* §. 24. Neque obstat quod ista irregularitas contracta fuerit ab isto homicida ante ingressum Religionis, quando non erat subditus prælati regularis: Non obstat, quia  
Prælati



Prælati regulares possunt etiam absoluerè subditos à censuris , & dispensare in irregularitatibus contràctis ante ingressum Religionis ; idque postquam subditi professi sunt, vt concessit Gregorius XIV. Ordini Ministrorum infirmorum Romæ teste Capuccino *Addit. ad compendium. 1. part. fol. 27.* & patet à simili : nam prælati dispensant cum subditis professis circa vota emissà in sæculo , & dispensant cum illis in irregularitate orta eo quod sint illegitimi , vt possint esse prælati, quam irregularitatem contraxerunt in sæculo.

7 Neque obstat quod dicitur in informatione aditum fuisse Papam pro dispensatione , eamque non concessisse , sed dixisse , vt se Ordini manifestaret , & quod haberet dispensationem gratis : Sic ego vidi in informatione scripta per ipsum Religiosum. Non inquam obstat, quia etiam si Papa consultus pro dispensatione alicuius casus illam deneget , & patiens repulsam adeat Episcopum , vel Prælatum Regularem potentes aliàs ex officio, vel priuilegio dispensare, poterit Episcopus, vel talis Prælatus dispensare, non obstante negatione Summi Pontificis Ita in terminis tenet Sanchez *lib. 8. de matrim. disp. 14. num. 5. & seqq.* hoc tamen limitat solum , quando Papa consultus, & causam cognoscens , diceret non adesse causam iustam dispensandi ; tunc enim ait Episcopum, vel Prælatum Regularem non posse. Secus si noua causa superueniat post negationem Papæ. Et ratio clara est adducta à Sanch. Nam hoc quod est Papam iam esse consultum , eumque denegasse dispensationem , vel non solere dispensare, non tollit iurisdictionem, facultates, vel priuilegia Prælatorum inferiorum potentium aliàs ob præmissa dispensare : nec Papa per illam negationem dispensationis prohibet quin dispensent inferiores , nec

illorum facultates aut priuilegia reuocat, vt patet: ergo poterunt vti sua iurisdictione, vel priuilegio, ac proinde dispensare. Addo quod Papa in responsione data in isto casu, quod iste Religiosus homicida se manifestaret Prælato Ordinis, vt haberet dispensationem gratis, videtur clare supposuisse quod Prælatus Ordinis posset cum illo dispensare per sua priuilegia, quæ optime nouerat Summus Pontifex, tanquam Princeps habens omnia iura in pectore: & sic dispensatio data per Prælatum daretur gratis, & proinde non esset necessaria dispensatio Sedis Apostolicæ obtinenda cum expensis.

---

## CASVS VII.

*De alio homicida ante ingressum Religionis.*

**Q**uidam adolescens paræ ætatis 16. annorum, iniuriatus à quodam viro, animo se vendicandi proposuit alapam impingere viro iniuriatori, & ita fecit de facto in publica platea. Quia tamen puer videbat virum esse superiorem viribus secum tulit pugionem paruum (*vulgo adaga*) solum animo vt metum viro inculceret, ne se puerum occideret. Impacta alapa, vir puerum aggreditur iratus: puer pugionem è vagina eduxit solum animo terrendi, ac repellendi: & præ metu ignorat puer si ipse actiue virum percusserit, an vir incautus pugione se ipsum percusserit: sed tamen ex percussione vir mortuus est. In hoc tamen certus est iuuenis quod non intendit occidere, sed terrere: Si enim mortem cogitaret, à vindicta abstineret omnino. Iste

no. Iste iuuenis habebat antea votum Religionis: & ob tale votum ingressus est postea Religionem approbatam in conuentu remoto à loco delicti, vbi delictum erat omnino occultum, & expleto Nouitiatu professus est post publicatam Bullam Sixti Quinti prohibentem homicidas, & criminosos recipi ad Religionem.

Quæsitum fuit, primo, an posset esse Religiosus, & vtrum illius professio valida fuerit?

Secundo an istud homicidium fuerit casuale, vel voluntarium?

Tertio, si protestatio facta in professione à Prælati ne habeant culpas, vel impedimenta, intelligitur etiam de impedimento homicidij?

2 Ad primum quæsitum dico, quod si professio facta fuit durante Bulla Sixti V. contra homicidas ab anno 1588. vsque ad annum 1602. professio fuit nulla, tum quod homicida erat, & sic inhabilis ad profitendum per dictam Bullam: tum etiam quia per tale homicidium viri contraxit debita soluenda hæredibus defuncti occisi iuxta qualitatem personæ, vt Doctores tradunt in materia homicidij: Iam vero habens debita soluenda non poterat esse Religiosus per eandem Bullam: & sic habebat duo impedimenta annullantia professionem, homicidium scilicet, ac debita. Quod vero debita resultantia ex homicidio impedirent etiam professionem, colligo ex Rodriguez, *qui 3. tom. qq. q. 19. art. 9.* Et Miranda *tom. 1. Man. fol. 162. in fine*, dicunt hominem, qui promisit virgini matrimonium, & sub hac spe illam deflorauit, non posse profiteri postea in Religione propter debita quibus astrictus est illi fœminæ, vt saltem illi dotem assignet, &c. Quod eadem ratione dici debet de illo, qui ratione

homicidij contrahit debita restituenda hæredibus occisi, de quo vide Nauar. *in summ. cap. 15. num. 19. & seqq.* Si vero ista professio facta fuit post annum 1602. (vt puto fuisse ex coniecturis) in quo anno Clemens VIII. reduxit Bullas Sixti V. ad terminos iuris communis, talis professio valida fuit, quia homicidæ per ius commune non prohibentur esse Religiosi, vt patet ex *cap. Admonere 33. quest. 2. & duobus exemplis quæ tradidi in 1. tom. Dub. Regul. ver. Nouitius num. 12.* Imo videtur quod etiam stante rigore Bullæ Sixti V. ne recipiantur ad habitum homicidæ, poterat iste recipi, eo quod habebat votum Religionis: Nam Rodriguez *in sum. ver. Nouitios cap. 3. num. 6.* tenet, quod etiam stante Bulla Sixti V. poterat recipi ad habitum homicida, qui ante habebat votum intrandi Religionem: quia de tali non præsumitur quod intret Religionem animo declinandæ pœnas, & iurisdictionem iudicis sæcularis; sed id facit ex obligatione voti. Et citat ad hoc Baldum, & Couarr. & idem dicit idem Rodriguez *in Addit. ad summ. eodem ver. & num.* Aduerto tamen, quod licet iste non sit impeditus de iure communi vt profiteatur, nihilominus Prouincialis non potest eum recipere ad ordinem, eo quod in rigore criminofus, & homicida est. Clemens vero VIII. in sua Bulla teuocatoria, seu moderatoria Bullarum Sixti V. quamuis Bullas Sixti V. reduxerit ad terminos iuris communis, decreuit nihilominus vt Prælati recipientes ad habitum tales criminofos incurrant hodie pœnas in prædictis Bullis Sixti V. positas contra Prælatos illos recipientes; quod debet intelligi si id scienter fecerint.

3 Ad secundum quæsitum dico resolute, & absque dubio quod istud homicidium non fuit voluntarium, sed casuale. Constat omnino ex dictis *in casu 6. præcedente,*

dente, num. 3. & Doctoribus ibi citatis. Ex eo, quod ego dixi in 2. tom. *Dubiorum Regular. ver.* Homicidium num. 5. Nam ad homicidium voluntarium requiritur expressa, & directa voluntas, & spontanea occidendi. Et iste talem voluntatem non habuit, imo formauit voluntatem oppositam, & positiuam, videlicet non occidendi, sed terrendi. Sic tenet expresse Suarez tom. de *Censur. disput. 64. sect. 1. num. 4.* Hic vero solum directe, & expresse intendit alapa percutere, quæ percussio non est causatiua mortis vt patet: Si autem detulit pugionem, per illum solum intendit terrere, non occidere: & dubitat an ipse percusserit actiue, an vero ipse occisus incaute se per pugionem immiserit. Adde, quod post alapam impactam iniuste, cum viderit puer robustum hominem super se iratum irruere, merito mortem sibi imminentem timere potuit, ac proinde se pugione defendere vsque ad occisionem inuadentis; & proinde in tali defensione occidens iam non erat homicida voluntarius, sed casualis, licet antea dederit causam pugnae. Tenet hoc fuse, & docte Sayro in *Clau. Regia lib. 7. cap. 10. à num. 18. maxime num. 24.* vbi citat Alensem, Sotum, Nauar. & Gregor. de Valença, Philarch. cum quibus omnibus dicit, quod licet occisor daret operam rei illicitæ (vt iste) vel ante pugnam dederit causam vt mortuus se occisorem aggrediretur, si tamen postea iste occisor se defendens, occidit, non est homicida voluntarius; quod in hoc casu maxime locum habere videtur, quia puer debilis inuadebatur à viro robusto: & proinde occisio pro defensione propria non est voluntaria.

4 Tertium quæsitum plura inuoluit dubia. Primo enim Leo X concessit nobis, vt citat Rodriguez tom. 3. *quæst. 17. art. 9.* vt Prælati possint eiicere ab Ordine illum

lum professum, qui in professione rogatus, tacuit gra-  
uia crimina, de quibus in sæculo fuerat infamatus: hic  
vero non potuit non infamari in sæculo de isto homi-  
cidio, & alapa, cum publice in populo fecerit. Secun-  
do, quia statuta nostra Generalia Tolletana, in *proæmio*  
*fol. 69. pag. 1.* iubebant fieri Nouitio interrogationes,  
inter quas vna erat, An fuerit in sæculo infamatus ali-  
qua infamia vulgari? Ille vero fuit in populo infama-  
tus de homicidio, & alapa. Et quod hoc delictum pa-  
riat infamiam, probatur ex cap. *Omnes 6. quest. 1.* vbi  
dicitur infames esse illos, qui ob aliquam culpam ad  
ordines promoueri non possunt, teste Syluestro *ver. In-*  
*famia. quest. 6.* Cum ergo professio sit contractus inter  
profitemem, & Ordinem, & Ordo admittens apponat  
illas condiciones, vt non fuerit infamis in sæculo, non  
habuerit delicta graua, &c. Videtur quod professio  
istius tacentis homicidium fuerit nulla, & quod ex  
consequenti potuerit post professionem, cognito deli-  
cto expelli à Religione.

§ Verum pro consolatione, & remedio istius pro-  
fessi, & aliorum similium, qui solent sic impediti ad  
Ordinem recipi. Dico primo, in nostra Franciscana  
Religione, Nouitium ante professionem non interro-  
gari in particulari an fuerit homicida. Patet ex citato  
*fol. 69. Statutorum Tolletanorum*, in Interrogatorio ibi  
posito. Et ex eodem libro *Statutorum generalium* anno  
*1583. fol. 128. pag. 2. tit. de qualitatibus Nouitiorum*,  
vbi non iubetur rogari de homicidio; ait tamen quod  
non fuerit infamis. Nouissime vero Statuta generalia  
Segouiae *tit. de professione*, iubent fieri protestationem  
Nouitio sub hac tantum forma: Quod non descendat  
intra quartum gradum de Iudæis, Mahumetanis, vel  
hæreticis damnatis, aliàs professio erit irrita: Et nihil  
aliud

aliud iubent ininterrogari, licet in principio in 1. pagina, eadem statuta alia iubeant interrogari, in quibus non continetur homicidium. Neque illis in 1. receptione ad habitum sit protestatio. Si vero aliquis Goatdianus ante professionem interrogaret de homicidio cum protestatione nullitatis professionis; id faceret ex motu suo proprio, non ex statutis, ut patet: Et sic illius protestatio in hoc particulari non noceret, quia ille non potest facere peculiare interrogationes præter assignatas à generali statuto. Tota ergo dubitatio est an iste homicida professus possit ab ordine expelli cognito suo delicto post professionem, cum illum negauerit saltem in genere, & negauerit se fuisse infamatum in sæculo; idque ob concessionem citatam Leonis X. & propter statutum interrogans de infamia.

6 Et quidem quoad Decretum Leonis X. credo, quod illo non obstante, istius professio valida fuit. Leo enim X. non definit ibi taliter negantem non esse professum, sed quod possit expelli ab ordine ob culpam negationis. Secundo, dico Leonem X. loqui tantum de negante in professione: *Gravissima & scandalosa criminalis, monitione super his per prædictos prælatos præmissa.* Sic habent verba textus. At crimen homicidij pro sua defensione, non est crimen gravissimum, & scandalosum: non enim homicidium sic scandalizat, sicut alia crimina graviora. Adde quod Papa ibi requirit quod de tali crimine specialiter fuerint interrogati. Ille vero de homicidio non fuit specialiter interrogatus, & proinde ex vi istius decreti Leonis X. credo quod nec professio annulletur, nec Religio possit illum expellere. Quod attinet ad statutum allegatum, requirens ut Novitius non habuerit vulgarem infamiam in sæculo. Potest primo responderi iuxta proxime dictum, quod delictum

delictum homicidij non infamatur vulgariter loquendo; maxime pro defensione commissum: imo apud populares aliquando laudatur ( licet iniuste. ) Secundo dici potest hunc non fuisse infamem in loco, in quo habitum recipit, absentauit enim se, vt dicitur, eiusque delictum fuit omnino occultum, ita vt Religio per illius receptionem nullam pati posset infamiam. Tertio dico quod licet per professionem fiat contractus inter Ordinem, & professum modo iam exposito, nihilominus non cuiusque conditionis defectus annullat professionem: probo exemplo claro. Nam in nostris statutis generalibus supracitatis dicitur, quod si Nouitius fuerit morbo aliquo contagioso, vt gallico, infectus, & de illo rogatus, negauerit, postea expellatur, & professio sit nulla. Et nihilominus graues Doctores dicunt tale statutum non posse practicari, nec talem Nouitium negantem hunc morbum, posse expelli ab Ordine. Ita Sanchez in 2. tom. Decal. lib. 5. cap. 4. num. 57. & 58. citans pro se Rodrig. & dans causam; quia cum expulsio ab Ordine sit res grauissima, requirit culpam grauissimam, qualis non est negare morbum contagiosum in professione. Quod ego comprobo, & declaro: nam vt Religiosus post professionem reddatur incorrigibilis, & possit expelli ab ordine requiruntur tria delicta graua, & atrocia iuxta Bullas Pontificias: at negare in professione homicidium casuale pro defensione, non est adeo graue crimen vt propter illud mereatur expelli. Iuuat etiam praxis Religionum; ego enim ex quinquaginta annis meae professionis vsque nunc, nullum vidi ab ordine expelli ob crimen negatum in professione, licet propter illud aliqualem passus fuerit infamiam. In hoc tamen certus sum, quod taliter professi negantes delictum in professione, etiam si



etiāsi fuerit infame, vel negantes morbum galli-  
cum, sunt verè professi, vt ait Sanchez proxime citato  
num. 57. & dat exemplum, quia, sicut non omnis error,  
vel deceptio annullat matrimonium carnale, sed solus  
error personæ liberæ. Ita non omnis error, vel dece-  
ptio annullat matrimonium spirituale professionis,  
sed sola deceptio circa substantialia professionis, vt  
defectus consensus, metus grauissimus, & alia similia.

---

## CASVS VIII.

*De alio homicida ante ingressum Religionis.*

**D**Vo iuuenes rixati sunt adinuicem: vnus percus-  
sit alterum vulnere leui: percussus per suum ma-  
lum regimen in cibis, & deambulationibus, mortuus  
est, asserente Chirurgo vulnus non fuisse mortale, sed  
ipsum ex malo suo regimine mortuum esse. Postea  
percursor intrauit Religionem, & erat in nouitiatu,  
quando mihi hoc dubium propositum fuit: & casus  
fuit omnino secretus.

Quæsitum est primo an aliquam irregularitatem  
contraxerit iste percussor? Secundo, an dato quod il-  
lam contraxerit, possit esse Religiosus, & profiteri.  
Tertio, an existens in nouitiatu rogatus de aliquo de-  
licto impediēte in communi teneatur se manifesta-  
re, & fateri delictum suum? Et declaratur pro meliori  
casus decisione, quod iuuenis mortuus fuit aggressor,  
& author rixæ.

**I** Ad primum dico rem esse certissimam illum in-  
currisse irregularitatem, mitiorem tamen, & ortam ex  
homicidio

homicidio casuali. Est communis Doctorum & definitur in cap. *Significasti o primeiro*, & cap. *Dilectus de homicidio*, & tradunt Summistæ omnes ver. *Irregularitas*. Quod vero hoc homicidium fuerit casuale, & non voluntarium, iam manet probatum ex dictis in duobus casibus præcedentibus. Nam hoc homicidium non fuit volitum directe in se, neque in aliqua causa efficaci illud causante. Etenim vulnus inflictum non fuit mortale teste Chirurgo: Præterea iste occisor fuit prouocatus à defuncto aggressore: & propterea poterat percutere pro sui defensione: quæ omnia probant iuxta dicta in casibus præcedentibus, non fuisse homicidium voluntarium. Hoc ipsum, fuisse hoc homicidium solum casuale, tenet in terminis Suarez *tom. de censur. disput. 45. sect. 6. num. 19. citatque cap. fin. de homicid. in 6. & in num. 18.* præcedenti ait esse opinionem communem, & citat aliquos. Idem tenet Lessio *lib. 2. de iust. cap. 9. dub. 15.* & isti citant alios multos. Ratio potissima tradita à Suarez est; quia irregularitas homicidij voluntarij non incurritur nisi quando quis est causa proxima mortis: & non sufficere quod sit causa remota: At iste percussor non fuit causa proxima mortis, vulnus enim leue quod inflixit non causauit mortem proxime, sed malum regimen, & culpa ipsius percussus. Fauet quod tenet Iulius Clarus in *Pract. crim. §. homicidium num. 31. & 42.* dicens, quod prouocatus si occidat non habet pœnam ordinariam homicidæ, & quod, si percussus leuiter, obiit ex malo suo regimine percussor non meretur pœnam homicidæ: sed iste de quo quæritur fuit prouocatus, vt patet; & mortuus alter non obiit ex vulnere leui, sed ex malo suo regimine: ergo percussor non incurrit pœnam rigorosam homicidæ, qualis est irregularitas homicidij voluntarij; sed

rijs; sed solum ortam ex casuali. Addo tamen quod si iste prouocatus percussit ita vt non peccaret ob iustam defensionem, nec excessit moderamen inculpatæ tutelæ, tunc non incurrit vllam irregularitatem: ita tradunt communiter Doctores: maxime Nauar. *consil.* 36. *de homicidio*. Et Suarez *tom. de Censur. disp.* 46. *sect.* 1.

2 Ad secundum dico hunc homicidam posse esse Religiosum valide, si intret Religionem; quia vt iam supra dixi *casu* 6. homicida de iure communi non prohibetur fieri Religiosus. Quamuis autem Sixtus V. in sua Bulla eius professionem fecerit irritam, & nullam, postea Clemens VIII. Bullas Sixti Quinti reuocauit, & reduxit ad terminos iuris communis, quod ius commune, non annullat professionem homicide, vt probaui 1. *tom. Dubiorum Regular. ver.* Nouitius *num.* 12. Quod insuper probo nam multi Pontifices concesserunt Prælati Religionum priuilegia dispensandi cum suis subditis in irregularitate homicidij voluntarij, & casualis, vt suppono: quibus priuilegijs vtuntur Prælati Religionum, vt plurimum cum homicidis Religiosis, qui homicidium commiserunt ante ingressum Religionis, supponentes clare, quod illorum homicidia patrata ante nouitiatum non annullarunt professionem: & id videntur etiam supposuisse Summi Pontifices concedentes illa priuilegia dispensandi; cum non distinxerint de irregularitate contracta ante vel post professionem, potuit ergo hic homicida valide profiteri. Dico valide: nam si possit profiteri licite, dicam statim in responsione ad tertium. Interim addo, iuxta supradicta, posse Prælatum dispensare cum isto homicida in irregularitate homicidij casualis, vt tradit Rodriguez 1. *tom. quest. q.* 24. *art.* 3. & ego dixi 1. *tom. Dubiorum Regular. ver.* Dispensare.

*num. 9.* Hanc tamen dispensationem dare non poterit Prælatus isti homicidæ, quandiu fuerit Nouitius: nam quandiu Nouitius est, non est illius subditus, vt patet: Summi vero Pontifices prædicta priuilegia concedūt Prælati, vt dispensent cum suis subditis. Si enim Prælati possent dispensare in irregularitatibus cum Nouitiis, daretur aliquando occasio vt aliqui homicidæ voluntarij fierent Nouitij, vt tempore nouitiatus obtinerent dispensationem irregularitatis homicidij voluntarij, quam Papa non solet concedere, & postea exirent à Religione; quod est contra mentem Pontificis.

3 Tercium quæsitum maiorem habet difficultatem, an scilicet iste Nouitius teneatur se prodere in nouitiatu, & delictum præteritum fateri? Videtur enim teneri: imo & videtur, quod peccauerit, & peccet petendo habitum, & professionem sibi prohibitam per legem Papalem. Quamuis enim Clemens VIII. reuocauit Bullas Sixti V. ad terminos iuris cõmunis quoad valorem tantum professionis: tamen illæ Bullæ hodie manent in suo robore, quatenus impediunt ne illi criminosi homicidæ, & ceteri fiant Religiosi; adeo vt Prouinciales eos recipientes incurrant pœnas positas à Sixto V. vt inter alios explicat Sanchez *tom. 1. Decal. lib. 4. cap. 16. num. 39. in fine.* Itaque hodie homicidium, latrocinium, & similia delicta posita à Sixto V. licet non annullent professionem, nec sint impedimenta dirimentia professionem: sunt tamen impedimenta impediencia iuxta legem Papæ ne homicida, vel latro licite possit intrare in Religionem, & in illa profiteri. Quod applicans ad intentum, dico quod videtur, hunc homicidam Nouitium peccasse petendo habitum Ordinis habens impedimentum Papale ad profitendum;  
Si vero

Si vero in hoc peccauit, tenetur se prodere, vel exire vt non profiteatur cum impedimento isto Papali. Adde, quod si profiteatur, & postea manifestetur eius homicidium, nocebit valde Prouinciali, qui illum inhabilem recepit ad Ordinem, & punietur Prouincialis rigorosis pœnis à Sixto V. impositis; quæ omnia videntur probare hunc Nouitium homicidam, vel peccasse in habitus receptione, vel teneri ad exeundum, vel se manifestandum, & petendum dispensationem ab illo qui dare possit. Et hoc dubium tangit etiam homicidas illos duos, de quibus diximus in 6. & 7. *casibus*, & hîc dicta etiam applicabuntur.

4 Pro istorum dubiorum resolutione, dico primo, quod si iste Nouitius bona fide habitum suscepit, non credens se peccare in illo petendo cum tali impedimento, tunc nihil peccauit ob bonam fidem, quæ excusat à peccato etiam in opere de se non bono: & multo magis in isto opere Religionis profitendæ, quod de se est clare bonum.

5 Secundo dico, quod iste casus resoluendus est per alium quem tractat Sanchez *lib. 7. de matrim. disput. 17.* ibi quærit an habens impedimenta matrimonij non dirimentia (quæ ille recenset *eodem lib. 7. disput. 6.*) v.g. vxoricidium, interfectio clerici, & similia, quæ impediunt quidem, sed non dirimunt matrimonium, sunt tamen statuta per leges Ecclesiasticas: an inquam contrahens matrimonium cum aliquo ex his non dirimentibus, sed solum impediuntibus, & prohibentibus, peccet mortaliter, & teneatur abstinere à contrahendo matrimonio ob tale impedimentum solum impediens? Et resoluit *citata disp. 17.* cum multis citatis, quod talis contrahens matrimonium cum aliquo impedimento non dirimente, sed solum prohibente, non

peccat mortaliter, imo nec venialiter. Excepto illo, qui habet votum castitatis, vel Religionis, vel contraxit sponsalia cum alia: hæc enim duo impedimenta voti, & sponsalium sub mortali impediunt ne contrahatur matrimonium, & sunt impedimenta impediencia matrimonium non dirimentia. Cætera vero impediencia matrimonij solum impediencia, vt vxoricidium, interfectio Sacerdotis, Cathecumenus, &c. hodie non impediunt sub mortali: Et sic non peccabit ille qui affectus aliquo ex illis contraxerit matrimonium Ratio præcipua Sanchez est, quia per consuetudinem, & tolerantiam Episcoporum iam obtinet præscriptio contra illas leges, ita vt nec petatur dispensatio pro vlllo ex prædictis impedimentis solum impediencia, excepto voto, & sponsalibus. Hæc doctrina multam habet similitudinem in nostro casu. Nam illa impedimenta posita à Sixto circa professionem, vt plurimum hodie sunt impedimenta non dirimentia post moderationem Clementis VIII. v.g. homicidium, & latrocinium; non enim dirimunt, sed impediunt tantum professionem. Quo posito (saluo meliori iudicio) pie videtur posse dici, quod homicida petens habitum Religionis, si sit occultus, non peccabit mortaliter, tum quia praxis videtur iam hanc consuetudinem introduxisse per annos viginti quinque à quo tempore Clemens VIII. reuocans Bullas Sixti V. voluit homicidium non esse impedimentum dirimens professionis, maxime cum neque ante Sixtum V. illam dirimeret. Et cum videamus post illam moderationem Clementis VIII. multos homicidas occultos Religiones intrare, vt animas suas saluent, & nemo illos condemnat nec obligat ad ex-eundum.

6 Secundo dico hunc Nouitium homicidam postquam

quam bona fide suscepit habitum, non teneri se manifestare, cum eius delictum sit omnino occultum. Probatur ex illo communi dicto Theologorum, quod præceptum conseruandæ propriæ famæ, & honoris, præualet cuicumque præcepto positiuo Ecclesiastico, de quo sunt multa exempla, & nos aliqua tradidimus in præcedentibus. Id ipsum habetur in *cap. Quis aliquando* § his autoritatibus. *de pœnit. dist. 1.* vbi dicitur: Non dico tibi vt te prodas. Quod adeo verum est, vt dicat Zerola in *1. par. praxis ver. hæretici. §. ad trigesimum quintum*, quod nec hæreticus tenetur se prodere. Vide Nauarr. *consil. 5. de hæreticis. num. 3.*

7 Quæris: Quid si Prælatus ante receptionem habitus, & ante informationes factas, ex decreto Clementis VIII. huic homicidæ iuramentum exhibeat, rogans in genere an habeat aliquod impedimentum ex positis à Sixto V. an possit tacere hoc homicidium sine peccato: Difficilis sane quæstio est. Ad quam imprimis dico, quod si illius homicidium fuit omnino occultum, & præterea si fuit factum sine peccato, vt hoc videtur fuisse pro sui defensione & quia occidens fuit prouocatus: credo quod sine peccato poterit illud tacere, cum non teneatur prodere se, vt dixi; nec Prælatus possit licitè interrogare de delicto omnino occulto: & tunc homicida possit in negatione vti ambiguitate se nescire, vel non fecisse, ita vt teneatur fateri, vel quid simile. Vide quæ dixi *tom. 2. Dub. Reg. ver. Iuramentum num. 13. & 16.* Si vero homicidium non fuit omnino occultum, est tamen occultum in hoc loco vbi habitum vult recipere, neque est spes vt detegatur, illique exhibeatur iuramentum, an habeat in genere aliquod impedimentum de assignatis à Sixto V. an possit negare, & dicere se nullum habere, intel-

ligens secum, vel apud se, se non habere impedimentum dirimens professionem, cum homicidium illius eam non dirimat? Videtur quod adhuc potest negare, tum quia eius homicidium hinc occultum est, neque est periculum quod vnquam diuulgetur, neque illud dirimat professionem: nec teneatur se infamare. Sed hoc resolute non assero, neque consulo. Hoc tantum dico; quod forte iuuabit ad hoc dubium videre dicta à Sanchez *tom. 2. Decalog. toto cap. 28.* & alios cum disputant de iuramento.

8 Adhuc circa hunc casum aduerto, mihi dictum fuisse istum occisum fuisse mortuum in hospitali publico quia erat pauper: quo casu, cum iste occisor occiderit prouocatus, & in sui defensionem, non teneatur aliquid restituere hæredibus defuncti, sed solum tenetur restituere expensas hospitali, quas fecit in ipsius curatione. Ita Lessius *lib. 2. de inst. cap. 9. dub. 15.* & Azor *tom. 3. lib. cap. 11. in fine.* Nam vnusquisque solum tenetur restituere damnum, quod dedit: at iste non intulit mortem, vt supra diximus: ergo non tenetur restituere damna secuta ex morte, sed solas expensas hospitalis factas pro vulnere leui quod causauit.

## CASVS IX.

*De professione cuiusdam Nonitiæ facta per me-  
tum, & alias circumstantias.*

QVædam mulier in secreto contraxit sponsalia cum quodam viro: pater fœminæ de hoc factus certior, idque nimis moleste ferens, filiam inuitam posuit



posuit in Monasterio Olyssipone vt esset Monialis, ipseque pater, & mater minati sunt quod si tali viro nuberet, se illam exhæredaturos, & interfekturos: In vna domo eam incluserunt multis opprobriis afficientes ante ingressum Monasterij. Postea ad Conuentum Monialium deferentes, Prælatæ dixerunt, quod si illam efficaciter mouerent ad professionem, Conuentui erant multa donaturi. In Nouitiatu à multis Monialibus, maxime ab vna, sollicitabatur ad professionem, ob munera, ac donatiua quæ huic speciali parentes mittebant. Quando ab Ordinario ad crates factum fuit examen libertatis, à parte interiori Conuentus astant Magistra Nouitiarum prope illam, vt illius metu Nouitia veritatem sponsaliorum taceret: & se ad professionem faciendam paratam diceret: & ipsa Nouitia nolebat subscribere examini scripto à Vicario generali: ita vt aliquæ Moniales illā cogerent subscribere. Tempore professionis faciendæ sponsus Nouitiæ, ( qui litem matrimonialem iam mouerat ) coram Ordinario supplicauit, vt per censuras interdiceret Prouinciali, & Prælatæ Conuentus, ne prædictam Nouitiam ad professionem admitterent. Episcopus sub censura excommunicationis ipso facto mandauit Prouinciali, & Prælatæ, ne illam ad professionem admitterent; & sub eadem censura ne Moniales illi suffragium darent, donec lis matrimonialis finiretur. Quo non obstante, Prælata auditis suffragiis Monialium, Nouitiam ad professionem recepit. Professio facta est quasi clanculum, ita vt etiam extra Conuentum custodes vigiles adhiberentur, ne aliquod nouum mandatum professionem impediens de foris intimaretur. Et declaratur, quod aliquæ sunt Moniales, quæ Nouitiam audierunt dicentem se nunquam velum nigrum pro-

fefsionis super caput suum fore imposituram.

His positis quæsitum fuit primo, an Ordinarius in hoc casu valide potuerit Prouincialem, Prælatum, & Moniales excommunicare, ne darent suffragia, ac professionem?

Secundo, an dicta professio fuerit nulla ex eo quod prohibita ab Ordinario, qui erat iudex examinis, & causæ Matrimonialis?

Tertio, an fuerit professio nulla ex eo quod in illa dederint suffragium Moniales excommunicatæ, & receperit professionem à Præлата excommunicata: & professæ fuerit etiam Nouitia excommunicata: Nam etiam Ordinarius sub excommunicatione prohibuit Nouitiæ, ne profiteretur.

Quarto, an dicta professio fuerit nulla propter tot circumstantias metus reuerentialis, seu cadentis in virtum constantem.

Quinto, an sit obligatio Ordinarij prædictam nulliter professam extrahere ab illo Conuentu, & eam ponere in alio loco tuto, & securo, ut possit libere respondere pro causa Matrimoniali, & pro causa professionis; cum constet illam in illo Conuentu non habere libertatem, tum ob prædicta, tum quia hodie post professionem illi stricte prohibeatur ne epistolas foras mittat, vel recipiat.

Iste casus multa inuoluit, quorum responsa iuuabunt ad multos alios casus similes quotidie contingentes. Et res fuit apud me noua, mirabilis, & non audita, & maxime, ut in tali vrbe eueniret.

1. Quod ergo attinet ad primum quæsitum, Sanchez lib. 7. de Matrim. disput. 33. num. 21. tenet cum multis Doctoribus, & textibus in causa Matrimoniali dum Religiosus, vel Religiosa citantur quod matrimo-

nium

nium ante contraxerint, non posse Episcopum contra illos, vel cōtra ipsorum superiores procedere per censuras excommunicando, vel aliam censuram fulminando. Ratio illius est, quia Religiosi habent priuilegia, maxime Mendicantes, vt non possint excommunicari ab Episcopis nisi ad id specialem facultatem habuerint. Vnde Concilium Tridentinum, quod vltimum Concilium fuit Ecclesiæ, & aliqua priuilegia Religionum reuocauit, in solis duobus, vel tribus casibus, quos ibi citat, concessit Episcopis vt possint contra Religiosos per censuras procedere tanquam Sedis Apostolicæ delegati. Hi casus sunt, primo vt quando Nouitij masculi, vel fœminæ exeunt à Nouitiatu ad mundum, possint Episcopi cogere per censuras Religiosos, vt eisdem exeuntibus restituant omnia supellectilia quæ attulerant. 2. vt possint per censuras cogere Moniales ad seruandam clausuram. 3. vt possint eosdem Regulares cogere per censuras ne celebrent Missas in oratoriis, *sess. 25. de Regul. cap. 16. & ibidem cap. 5. & sess. 22. in decreto de obser. in celebr. Miss.* Cum ergo Concilium quoties voluit posse Episcopos Religiosis censuras imponere, id expresse, sicut in tribus citatis locis; signum est quod in aliis occasionibus id Episcopis denegauerit, sciens Religiosos habere priuilegia ne possint ab aliquo excommunicari, quæ priuilegia in illis solis tribus casibus expressis voluit derogare. Cum ergo iste casus, de quo agimus, videlicet, professionis dandæ, vel matrimonij contrahendi, nō sit ex illis tribus, sequitur quod non potuerit Ordinarius in hoc casu excommunicare valide Prouincialem, Priorissam, & Moniales gaudentes citato priuilegio, ne professionem darent, vel suffragia prædictæ Nouitiæ.

2 In oppositum vero Farinacius in suo libro *Declarationum Cardinalium ad sess. 25. cap. 11. de Regular. prope finem*, ait Illustrissimos Dominos Cardinales declarasse, quod Episcopi poterant per censuras procedere contra Prælatas Monialium, si non obedierint Episcopis in materia examinis Nouitiarum, certiores faciendo Episcopos, vel professionem dantes ante prædictum examen. Quod si dicas hunc librum *Declarationum Cardinalium* ex Farinacio, esse prohibitum ab Ecclesia in Catalogo Romano, & ideo non habere autoritatem. Dico, quod eandem *Declarationem Cardinalium* in terminis citat, & ponit Marzill, in suo libro *Declarationum Cardinalium ad citatam sess. 25. Trident. §. si Monialis. ad cap. 17.* sub his verbis: *Contra facientes ergo (Moniales, & Superiores) poterit idem Ordinarius coercere, non solum pœnis à Concilio Tridentino statutis, & præscriptis, sed etiam Ecclesiasticis censuris, & alijs iuris remedijs, non obstantibus quibuscumque privilegijs.* Sic ibi. Et ego non credo quod prædicta declaratio citetur falso. Saltem enim Marzilla est author satis grauis, & pius, Religiosus, & Consultor in sancto Officio, Farinacius vero, licet in illo libro prohibitus sit, est tamen Autor Catholicus, & in alijs libris suis valde laudatus apud Iuristas, & Romæ vixit. Vnde non videtur quod prædicta declaratio Cardinalium falso citetur. Quod si vera est magis præponderat illa sola, quam tot Doctores citati à Sanchez, dicentes non potuisse in hoc Ordinarium excommunicare Prouincialem, & Moniales. Et hoc ipsum contra Sanchez affirmat Salcedo *Addit. ad præct. Bern. Diaz cap. 3. littera A. §. punire.* Et mihi videtur satis credibile propter dictam declarationem: & præterea quia in casu tantæ necessitatis, si Ordinarius vellet procedere contra prædictas Moniales per alia iuris

iuris remedia sine censuris, vt per pœnas pecuniarias, vel quid simile, remedium esset tardum, & fere frustraneum, cum Moniales essent pauperes: & pœna excommunicationis plus timeatur, saltem à viris Religiosis, quam pœna pecuniaria, quæ fere nunquam effectum habet posita Religiosis. Hoc volui paulo fufius explicare, quia poterit non semel contingere, quando Ordinarij procedunt contra Religiosos.

3 Ad secundum, & tertium quæsitum simul dico imprimis, dato quod Ordinarius valide excommunicauerit Nouitiam, Prælatam, & Moniales dantes suffragia, prædictam professionem non fuisse nullam ex hoc capite præcise. Nam quod attinet ad Moniales, dato quod essent vere excommunicatæ, valide tamen possent dare suffragia Nouitiæ ad profitendum (quidquid sit de illarum peccato) probo, quia dare suffragium pro Nouitio, non est electio canonica, vt patet: nam in electionibus de multis eligitur vnus, aliis relictis. At in Nouitio non eligitur vnus relictis aliis: sed potius dare suffragium Nouitio, est approbare illum, non eligere. Quamuis ergo ius canonicum prohibeat ne excommunicatus valide eligat: non prohibet quin excommunicatus valide ferat suffragium pro Nouitio. Similiter dico de Nouitia profitente, & de Præлата excommunicata, quod licet ambæ essent excommunicatæ, adhuc professio esset valida, etiamsi essent excommunicatæ declaratæ, quales istæ non fuerunt. Quod autem professio excommunicati sit valida primo innuit Nauar. lib. 4. *Consiliorum. tit. de sponsalibus. consil. 38.* dum ait valere matrimonium Catholici cum hæretica, licet per ius prohibeatur: æquiparant enim Doctores matrimonium carnale cum spiritali professionis, quoad valorem & obligationem. Et quoad excommunicatum emitten-

emittentem professionem validam, tenet expresse Rodriguez *tom. 3. quest. 9. 17. art. 14.* citans Innocent Abbatem, Rebuffum, & alios. Idem tenet Comitulus in *Respons. Moral. lib. 2. quest. 8. ad finem.* Vbi ait validam fuisse professionem fœminæ cuiusdam, quæ e mentito sexu, & habitu, fecit professionem in Conuentu Religiosorum Masculorum : & constat talem fœminam actu extitisse excommunicatam propter ingressum in clausuram monasterij virorum. Hoc ipsum denique colligitur ex cap. *Cum illorum. de sentent. excomm.* vbi dicitur quod fuit valida professio cuiusdam percussoris Clerici, quod est plus. Si vero ex parte Nouitiæ excommunicatæ professio tenuit, etiam valida fuit ex parte Prælatæ, etiam excommunicatæ, quia est eadem ratio: nam professio est quidam contractus inter professum, & Religionem acceptantem: at excommunicatus non prohibetur facere contractus, etiamsi sit declaratus, vt Doctores tradunt in materia *de excomm.*

4 Ad quartum, quod est principale dubium, dico certissime hanc professionem fuisse nullam propter metum grauissimum variis modis incussum. Et antequam illud in particulari ostendam, suppono certissimum, quod professio facta per metum redditur nulla. Constat ex Concil. Trid. *sess. 25. cap. 19. de Regular.* vbi præcipuam causam ad probandam professionis nullitatem, ait esse metum, aut vim. Nunc probō in hac professione interuenisse metum cadentem in virum constantem. Nam primo, parentes minati sunt mortem, & exheredationem, & illam in domo particulari clauferunt ante ingressum Religionis, variis opprobriis afficientes: quæ omnia clare sufficiunt, imo superabundant ad causandum metum non quemcumque, sed cadentem in virum constantem: necdum in fœmina, sed

na, sed etiam in viro robusto. Minus vero malum comminatum, seu minor causa metus sufficit circa faminam, quia fragilis est, quam circa virum, ut dicatur metus cadens in virum constantem, ut late probat Sanchez *lib. 4. de matrim. disp. 3. num. 2.* & Sayr. citans multos: & ex dictis ibidem de metu cadente in virum constantem, satis constat metum incussum huic Nouitiæ fuisse viri constantis metum. Arbitrio vero iudicis relinquitur, iudicare quis sit metus cadens in virum constantem, ut ait Sanchez *cit. disp. 5. lib. 4.*

5 Particularis vero causa metus grauis fuit in fœmina comminatio exhæredationis facta à parentibus: hæc enim sola sufficiebat ad causandum metum grauem, ut tradit Sanchez *cit. disput. 5. num. 25.* concurrit etiam quasi forma carceris; eam namque parentes in particulari domo clausam veluti carcerarunt. Concurrit præterea sollicitatio Monialium intra clausuram quæ sollicitabant illam, ut profiteretur. Adde modum professionis clanculum factæ, cum custodibus extra positis, & cæteris quæ narrantur: quæ omnia superabunde probant metum cadentem in virum constantem hic interuenisse.

6 Addo, metum reuerentialem etiam interuenisse tum ratione Magistræ Nouitiarum positæ à tergo tempore examinis facti ad crates, ut Nouitia timeret dicere se nolle esse professam: Imò & Abbatissa cum spe promissionum sibi factarum, sollicitans Nouitiam ad profitendum causabant metum reuerentialem, iuxta tradita à Sanchez *citato lib. 4. disp. 6. num. 24. & seq.* ubi agit quarum personarum timor, vel respectus causet metum reuerentialem. Quod vero solus respectus, vel timor Abbatissæ sperantis promissa munera ex professione, ad illamque inuitantis, causaret metum reueren-

reuerentialem, tenet Nauar. *lib. 2. consil. tit. de confessis. consilio unico num. 4.* Quamuis autem Sanchez *cit. disp. 6. cum aliis* 14. Doctoribus citatis dicat, solum metum reuerentialem non annullare professionem; nihilominus *cit. disp. 6. num. 17.* citat graues Doctores, qui dicunt annullare. Ultra quos id tenet expresse Brunorus *in locis, commun. ver. Matrimonium num. 4.* & citat vnam gloss Iasonem, & Decium, & Marfylum. Fauet Lessio *lib. 2. de iust. cap. 17. num. 35. versic. 13. & num. 46. §. Respondeo, & nu. 48.* Tenet idem Riccius, & Sayro citati à Barbosa *in Remission. ad Tridentinum fol. 146. pag. 2. nu. 4.* & Valero Cartuxano *in lib. de different. vtriusque fori fol. 193. col. 1. & 2.* cum multis, quos citat. Et super hæc omnia, in libro Declarationum Cardinalium Farinacij *ad sess. 25. cap. 11. de Regular. §. Omnimoda libertas*, citatur quædam decisio Rotæ sub iudice Oradino anno 1586. per quam iudicatum fuit in causa cuiusdam scæminæ nobilis, metum solum reuerentialem annullasse professionem. Quæ omnia volui recensere pro casibus quotidianis, non tamen vt in hoc de metu solo reuerentiali iudicium meum interponam: qui voluerint, videant citatos hic à me Doctores.

7 Et quoniam casus quotidianus est, hoc in particulari aduerto ex Sanchez *tom. 1. Decalog. cap. 3. num. 13.* vbi ait metum grauem annullare professionem, etiam si mouens per tale votum habuit animum se obligandi; nam Ecclesia illum consensum irritat, & insufficientem reddit, vt ex illo obligatio non oriatur, aliàs nihil peculiare concederetur metui. Et citat Sanchez ad hoc, Sotum, Aragon. Rodrig. Philarcum, & Nauar. *in cap. Statuimus num. 75. 19. quest. 3.* & per hæc satis puto responsum pro nullitate istius professionis ex parte metus incussi.



8 Nequid vero omittamus ex illis quæ quæsitæ sunt: ad illud in particulari quod in 2. quæsito quærebat, an videlicet ista professio fuerit nulla ex eo solum quod Ordinarius prohibuerit ne fieret, & facta sit contra illius expressum mandatum? Respondeo ex illo tantum capite, non fuisse nullam. Nam iuxta commune dictum Iuristarum, multa fieri prohibentur, quæ tamen facta valent. Probo hoc imprimis à simili in matrimonio carnali. Tenet, ac probat efficaciter Sanchez lib. 3. de *Matrim. disput.* 32. quod si Episcopus rigoroso mandato præcipiat Parocho ne certos sponso matrimonio iungat in facie Ecclesiæ; & nihilominus Parochus inobediens, illos ad matrimonium admittat, quidquid sit de peccato Parochi, matrimonium erit validum, si tamen sponsi nullum habebant impedimentum dirimens matrimonium. Et inter alia *num.* 2. *ad finem*, id probat doctrina Adriani, dantis exemplum in Religioso, cui Prælati per obedientiam prohibuit ne confessiones audiret: & ille tamen audiuit: tales confessiones erunt validæ, quidquid sit de peccato illius: nam Religiosus aliàs erat approbatus &c. Id ipsum ego probo ex *Concilio Trident. sess.* 25. *cap.* 17. *de Regul.* vbi prohibetur Abbatissam dare professionem Nouitiæ, antequam moneat Episcopum pro faciendo examine libertatis: & tamen, si Abbatissa omiſſa monitione, & examine Episcopi, Nouitiæ det professionem, erit valida, si aliàs non fuit impedimentum dirimens professionem. Colligitur clarè ex eodem capite, quia ibi non dicitur professionem aliàs fore irritam: sed Prælatam puniendam ab Episcopo.

9 Quod attinet ad vltimum quæsitum? Respondeo taliter professam non obstante coacta illa professione, extrahi posse, ac debere, & reponendam esse in loco tuto,

co tuto, ac libero, vt possit liberè respondere ad quæstiones matrimonij, ac professionis. Facit imprimis ad hoc casus similis in *cap. cum locum, de sponsal.* vbi Papa iubet, quod, vt certa fœmina responderet super consensu, & causa matrimoniali, eam iuberet iudex deponi in domo aliqua, vel loco securo, in quo puella dicere non timeret. Et ita obseruatur in praxi pro matrimonio: quod maiori iure fieri debet pro matrimonio spirituali, quod est professio, cum requirat maiorem libertatem. Et ita gloss. super dictum caput *cum locum. ver.* Nihil eam timere, ait spectare ad iudicem partes reponere in loco tuto, & securo, & citat plures textus. Id ipsum habetur ex declaratione Cardinalium apud Marcillam ad *Jess. 25. cap. 17. de Regul.* vbi ait, sic declarasse Congregationem illam. *Si Monialis, aut Nouitia neget se esse professam, Ordinarius audire potest illam extra monasterium.* Quo nil clarius potest desiderari. Eandem declarationem citat Farinac. citato suo libro *Declarationum ad Jess. 25. cap. 17. de Regular.* Id ipsum docuit, & consuluit Nauar. *lib. 2. consiliorum tit. de confessis*, vbi respondit quandam Monialem professam, de cuius professionis valore dubitabatur, extrahendam fore à monasterio, & reponendam in loco securo. Casus vero ibi à Nauarro positus nostro similis, fuit sic. Quidam pater filiam adduxit ad Monasterium, non quidem eo animo, vt profiteretur, sed vt postea illam è Monasterio extraheret, ac nuptui daret. Moniales interim illam sollicitarunt vt fieret Monialis, idque persuaferunt, & facta est Monialis, professa, non sponte, sed coacte ob importunas preces Monialium. Pater indignatus, obtinuit à Vicario Generali vt post professionem ad crates inquireret ab illa, an libere esset professa: illa de intus respondit absolute, se esse

se esse professam. Institit iterum pater, vt puella extraheretur à Conuentu, & in loco libero rogaretur de consensu professionis. Illa extra Conuentum posita in loco libero, exhibito iuramento à Commissario causæ, respondit se numquam habuisse animum faciendi professionem. Quo viso, ait ibi Nauarrus non esse standum priori dicto quod dixit intra Conuentum, ob metum Monialium reuerentialem: sed standum fuisse dicto, seu confessioni secundæ factæ in loco libero. Et sic videtur dicendum in isto casu, in quo iste sponsus ante professionem protestatus est de nullitate ipsius: & hodie instat vt extrahatur à monasterio ad locum tutum. Vt autem extrahatur non est necessaria licentia Sedis Apostolicæ, ne violet clausuram, quam vult iuxta Tridentinum: Sic enim exiens non incurret pœnas impositas violanti clausuram: cum illæ ponantur contra professas verè, de quarum professione non dubitatur: quod in ista non concurrit, cum illius professio, vel nulla sit, vel saltem nimis dubia. Adde quod sic exiens, iam exit cum licentia Sedis Apostolicæ, eo quod Cardinales nomine Papæ declararunt posse extra Conuentum interrogari, vt proxime diximus.

10 Adhuc pro maiori euidencia nullitatis in ista professione repertæ, considero, quod licet Sanchez *citata disput. 6. lib. 4. de Matrim.* neget solum metum reuerentialem annullare professionem, concedit tamen quod si cum illo concurrant, & iungantur minæ, tunc annullabunt. In hoc vero casu factæ sunt minæ mortis, & exhæredationis, vt vidimus. Noto vltimo quod Molina *tom. 3. de instit. 1. p. disp. 579. num. 29. §. vtrum autem*, ait, quod renunciatio facta à filiis circa suas legitimas coram patre, ob metum reuerentialem, etiam si iuramento firmetur, esse nullam, & *tom. 2. disput. 267.*

*num. 4.* ait metum reuerentialem, si efficiat promissionem mixte inuoluntariam, annullare Quæ omnia faciunt pro nullitate istius professionis. Vide Sotum 6, *de iustit. quest. 2. art. 1.*

---

## C A S V S X.

*De alia professione Nouitiæ dubia ex defectu suffragiorum.*

**I**N quodam Conuetu Monialium, Prælata conuocauit capitulariter Moniales ad recipienda vltima suffragia pro Nouitiæ professione. Et iuxta statutum, & consuetudinem illius Ordinis ponitur urna in loco publico plena fabis albis, & nigris mixtim, ex qua singulæ suffragium daturæ extrahunt fabam, vel albam pro Nouitiæ approbatione, vel nigram pro illius reprobatione: & has fabas albam, vel nigram adducunt secrete coram Prælata, & iniiciunt in aliam urnam; unde extractæ omnes fabæ examinantur pro Nouitiæ approbatione, vel eiectione. Contigit, vt quædam Monialis accedens ad primam urnam, cum esset nimis scrupulosa, nec se resolveret pro Nouitiâ recipienda, vel eiicienda, clausis oculis, se Deo commendans, tulit urnam fabam, non videns an alba esset vel nigra, & iniexit in urnam coram Prælata. Sed post diuulgatum scrutinium, ex votis datis, & negatis, & ex numero Monialium suffragantium, intellexit se fabam nigram, & reprobatiuam iniexisse. Alia Monialis vetula, & cæca corporeis oculis, accedens ad primam urnam, cum nec posset dignoscere de albo, & nigro, & ibi prope urnam

nam esset quædam Monialis, quæ repugnabat professioni Nouitiæ, hæc Monialis posuit in manu cæcæ fabam nigram, dicens illam esse fabam, quam debebat in urnam mittere: cum tamen hæc cæca non haberet animum negandi suffragium, ut ipsa statim dixit publicato scrutinio fabarum, dicens se talem animum non habuisse: Publicato scrutinio fabarum, media pars Monialium omnium sic suffragantium suffragata est pro Nouitia, videlicet 14. & alia media pars 14. negauit suffragia, ita ut maneret absque ullo excessu suffragiorum. Prælata intendens consulere Prouincialem quid in hoc faciendum sibi esset, post decem, vel duodecim dies informata de duabus illis Monialibus, seu de modo quo suffragium dederunt cæca, & alia scrupulosa, conuocauit secundo Moniales ad capitulum, illisque proposuit in priori electione interuenisse errores graues, propter quos electio fuit nulla, & proinde iterum darent suffragia libere, & sine errore circa Nouitiæ receptionem, vel eiectionem. Hoc audito, aliquæ Moniales, quæ professioni resistebant, exierunt à capitulo, dicentes quod appellabant à secunda suffragiorum receptione, dicentes Nouitiam expellendam, eo quod in prima electione non habuerit excessum suffragiorum supra dimidiam partem Conuentus. Prælata nihilominus recepit vota aliarum quæ remanserunt, quæ erat maior pars Conuentus, & hæc dederunt pro Nouitia duo suffragia ultra dimidiam partem Conuentus, etiam computatis illis quæ abentes suffragari noluerunt. Et declaratur quod istæ quæ nunc secundo suffragari noluerunt, iam ante ingressum illius in Conuentum, illius ingressui restiterunt. Denique ad tollendos omnes scrupulos Prouincialis absens, & consultus, suum suffragium per scriptum de-

dit illi Nouitiæ, & cum suffragio Prouincialis habuit Nouitia vnum suffragium excessus stante etiam priori electione, in qua Nouitia habuit 14. suffragia pro se, & 14. contra se, & cum suffragio Prouincialis habuit 15. pro se, & 14. contra se, & sic ex mandato Prouincialis admissa est ad professionem. His positis quærentur multa,

Primo, an prima suffragiorum receptio fuerit nulla propter duo illa suffragia cæcæ, & scrupulosæ clausis oculis suffragantis?

Secundo, an Præ'ata post duodecim dies cognito errore, ac dolo suffragiorum, potuerit secunda vice pro Nouitia suffragia totius Conuentus recipere?

Tertio, an secunda electio (sic voco, licet suffragium dare pro Nouitio non sit eligere.) An inquam secunda electio, vel suffragiorum receptio valida fuerit non ob. stante quod aliquæ exeuntes noluerunt suffragari, imo appellationem interposuerint.

Quarto, vtrum appellatio facta ab illis valida fuerit, an vero friuola iudicanda sit?

Quinto, an Prouincialis absens possit suffragium dare pro Nouitiæ professione, sicut dant cæteræ singulæ Moniales.

**I** Ad primum quæsitum respondeo primo, prædictam electionem fuisse nullam, & merito rescindendam, propter duo illa suffragia cæcæ, & scrupulosæ tali modo suffragantium. Probo imprimis, quia ignorans, vel errans non consentit per multos textus citatos à glossa in *Clementina* 1. de *procuratoribus*, in *verbo* *Scienter*. vt habetur *cap. Quamuis. dist. 38.* & *cap. Si de beneficio, de præbend.* At illa Monialis clausis oculis sumens fabam, ignorauit quale daret suffragium, vt patet: ergo non consensit, & proinde non elegit. Item de illa

illa cæca dicendum, quod cum errauerit, dando fabam nigram pro Nouitia, quam aliàs volebat recipere ad Ordinem, vt ipsa postea declarauit, taliter suffragando errauit contra intentionem suam, vt patet: ergo non consensit Secundo, de illa quæ clausis oculis extraxit fabam, constat quod non dedit suffragium per electionem, sed per sortes, patet, quia eligere per sortes est, quando non nititur quis arte, verbo, vel ratione discernente merita, sed res committitur fortunæ, casui, vel diuinæ prouidentiae: & sic fecit ista dans suffragium clausis oculis, rem committens diuinæ prouidentiae. At in iure non permittitur electio per sortes, vbi requiritur discretio meritorum circa eligendum, sicut requiritur pro discernendis meritis Nouitij, ne recipiatur inhabilis ad Ordinem: ergo suffragium istius fuit nullum. Quod autem electio per sortes sit prohibita in iure, constat ex cap. *Ecclesia. de sortilegijs*. Tertio, fuit etiam hoc suffragium nullum, quia fuit incertum, & obscurum, vt patet: at suffragium incertum est, nullum in iure, habetur in cap. 2. *de elect. in 6.* & ibi glossa, *ver.* Incerta, quæ hanc causam assignat: nam suffragium incertum non exprimit consensum sicut oportet: sequitur Couar. 2. *variartum, cap. 16. num. 2.* & Rodriguez *tom. 2. quest. q. 51. art. 4.* vbi ait suffragium debere esse clarum, certum, & non conditionatum, &c. Confirmatur ex cap. *Cum clamor. de testibus*. vbi dicitur quod dictum obscurum habetur pro non dicto: at votum suffragantis oculis clausis, ex se fuit satis obscurum, vt patet: ergo fuit nullum. Idem habetur cap. *in nostra de probat.* Quarto hinc colligo rationem Theologam, quæ est huiusmodi. Doctores cum D. Thom. 1 2 *quest. 13.* dicunt quod electio voluntatis internæ fit, quando prius intento fine, & cognito per intellectum, voluntas ex

multis oblatis mediis ad assequendum talem finem, post consultationem mediorum eligit, & adhæret vni medio relictis aliis: & tunc per actum externum tendit ad illud medium, & finem intentum. In hoc vero casu dans suffragium clausis oculis nihil horum fecit; non cogitauit de fine, non habuit consultationem de mediis, nullum elegit finem, vel medium in particulari, vt patet: ergo illius electio externa non fuit electio Theologica, cum non processerit ab actu electionis internæ, sed fuit sortibus se committere, quod est prohibitum in iure. Quinto, in particulari de suffragio dato à cæca, cui alia Monialis non bene affecta Nouitiæ, dedit fabam nigram, & cæca volebat dare albam; constat hoc votum fuisse nullum, quia fuit inuoluntarium, & proinde non liberum: at suffragium inuoluntarium & non liberum est nullum in iure, *cap. Vbi periculum. §. Cæterum. de elect. in 6.* illis verbis. *Cessat electio dum libertas adimitur eligendi.* Et dolo deceptus non dicitur consentire, iuxta l. *& eleganter. ff. de dolo.* vbi Bartholus, & Iuristæ communiter, dicentes quod consensus dolo extortus, non est consensus, de quo optime multos citans videatur Sanchez, *lib. 1. de Matrim. disputatione 64. num. 3.*

2 Ad secundum dico, potuisse, ac debuisse Prælatam cognito errore duorum illorum suffragiorum, secunda vice Moniales conuocare ad nouam suffragiorum receptionem. Probat, quia quando prima electio fuit nulla ob aliquem defectum substantialem, bene potest Præses electionis procedere ad secundam electionem. Habetur expresse in *cap. cum terra de elect. & tenet Innoc. in cap. considerauimus. eodem tit.* Butrius *cap. Auditis. num. 2. vers. concludendo.* Abbas in *cap. publicato. num. 9. de elect. Rodrig. citat. quest. 51. art. 7. & alij communiter.*



muniter. Dixi, quod debuit, ac tenebatur Prælata facere secundam electionem detecto errore prioris, quia Prælatus ex officio tenetur providere ne quis lædatur iniuste: At in prima electione Nouitia fuit læsa iniuste, cum duo suffragia sibi sunt negata iniuste, vnum per dolum in cæca: aliud per temeritatem in scrupulosa claudente oculos, quæ postea in secunda electione pro Nouitia suffragata est. Vide *Repertorium Inquisitorum* ver. Testes, §. item nota fol. 472. vbi asserit cum Doctoribus ibi citatis, ex textu, quod cum testis deposuit confuse, potest, ac debet iudex iterum testes recipere; vel illum confuse testificantem, interrogare secunda vice: quod facit ad præsens intentum. Imo ex superabundanti, dico, quod si constaret iuridice, in prima electione illam cæcam iniecisse fabam nigram per dolum contra suam voluntatem: Si constaret etiam illam quæ clausis oculis abstraxit fabam, abstraxisse, & iniecisse nigram; dico quod in tali casu prima electio valida fuit, & non fuit necessaria secunda. Probo ex supradictis, nam cum saltem illud suffragium datum clausis oculis fuerit incertum, & proinde nullum in iure, tale suffragium non fuit numerandum inter alia: ac proinde mansit Nouitia cum 14. suffragijs pro se, & cum 13. tantum contra se, ideoque habuit maiorem partem communitatis. Si item suffragium à cæca datum per dolum fuit nullum, quia non liberum iuxta prædicta, habuit Nouitia quatuordecim suffragia pro se, & 12. contra se, & proinde non fuit necessaria secunda electio, sed ex vi primæ poterat profiteri.

3 Ad tertium dico rem esse certissimam, quod secunda electio, seu suffragiorum receptio valida fuerit non obstante quod aliquæ exeuntes noluerint dare suffragium, & appellauerint. Nam quod attinet ad pri-

num, quod illæ noluerint suffragium dare, id non annullauit electionem factam ab illis quæ remanserunt, quæ erat maior pars communis legitime congregatæ: & illæ exeuntes iam fuerant vocatæ, & iussæ a Prælata vt secundo darent suffragium: suo vero discessu, renunciarunt iuri quod habebant ad suffragandum, quæ renunciatio non nocet electioni ab aliis legitime celebratæ. Habetur expresse *in cap. cum nobis de elect.* vbi de quibusdam vocatis ad electionem, & exeuntibus, nec volentibus interesse, ait Papa, non esse curandum, neque per illorum exitum electionem factam à manentibus fuisse impeditam: *quia* (inquit textus) *ad electionem faciendam accedere noluerunt alienos se fecisse videntur, propter quod &c.* Idem colligitur ex cap. *Quod sicut de elect.* Et est communis Doctorum, maxime Abbatis ad dictum cap. *cum nobis num. 3.* Vide omnino Nauarrum *lib. 1. consil. iii. de elect. consil. 3. num. 1.*

4 Ad quartum dico quod appellatio interposita ab exeuntibus fuit friuola, & non recipienda, imo quod fuit nulla. Probat, quia fuit facta contra ius: Nam, vt supradiximus, Prælata iuxta Canones potuit facere secundam electionem: ergo appellatum fuit contra decretum iuris, & proinde illicitè. Præterea fuit appellatum ab illis, quæ ante ingressum Nouitiæ in Conuentum, iam illi suffragia denegauerunt, & proinde non bene affectæ videntur appellasse, & non animo zeli. Adde quod nec ipsæ appellantes fuerant læsæ in se, neque Conuentus manebat læsus in Nouitiæ receptione, vt supponitur, & proinde appellatio fuit friuola, frustratoria, & proinde non recipienda: vnde non potuit aliquid impedire. Colliguntur hæc omnia ex cap. *1. onæ. il primeiro. de elect.* & ex cap. *constitutis de appellat.* & o diz Butrio in cap. *Considerauimus de elect.*

Ad

Ad quintum dico potuisse Prouincialem in hoc casu stante suffragiorum æqualitate, dare suffragium pro illa, & cum solo excessu suffragij illius præcipere vt ad professionem valide admitteretur.

Sed quoniam in hoc etiam puncto dubium fuit exortum, & viri docti consulti responderunt per scriptum, non posse Prouincialem alicuius prouinciæ dare suffragium in professione Nouitiæ, sicut dant singulæ Moniales, ideo quo res clarior fiat, peculiarem de hoc sequentem moueo quæstionem.

---

### CASVS XI.

#### *De Prouinciali dante suffragium in professione Nouitiæ.*

**I**N materia casus proxime præcedentis, vir quidam doctus per scriptum consultus dixit, non posse Prouincialem vnius Prouinciæ in quouis Conuentu eiusdem prouinciæ, in quo repertus fuerit ferre suffragium pro Nouitij cuiuscumque professione: quod si verum esset, minus posset dare suffragium pro Nouitiæ professione, & in absentia, cum circa Nouitiani maior videatur difficultas iuxta dicenda.

**I** Hanc partem negatiuam probabat ex Nauarro in consilio iii. de Regul consilio 62. primæ impressionis. In quo refert, quod quidam Nouitius in Ordine Carmelitarum recurrit ad suum Generalem Romæ commorantem, ferens secum testimonium Conuentus à quo fuit expulsus, ex quo constabat quod media pars Conuentus pro illo fuerat suffragata, & altera media pars

Conuentus illi suffragia denegauerat : & stante hac æqualitate suffragiorum postulabat à Generali vt se professum faceret. Et respondet ibi Nauar. *n. 3. & 4.* Generalē non potuisse illum facere professum; quia iuxta Panor. ibi citatum Generalis non potest creare Monachum absque consensu Conuentus: idest absque consensu maioris partis Conuentus. Quibus verbis clare videtur Nauar. innuere non potuisse Generalem dare suffragiū pro Nouitio. Si enim id posset, facile foret dicere in illo casu, stante illa æqualitate suffragiorum: do illi meū suffragium, & cum illius excessu manebit cū maiori parte suffragiorum Conuentus. Quod ipsum videtur ibi clarius dicere Nauar. *n. 4.* vbi dicit, quod recipere ad professionem pertinet ad Conuentum, & ad Prælatum immediatū Conuentus, non vero ad Prælatum mediatum, & remotum ipsius Conuentus. Citat ad hoc Nauar. *capitulum ad Apostolicam de Regular.* cum ibi notatis. Et vis rationis illius est, quod solus Prælatus non est persona acceptans sine Conuentu, vt det professionem: sed Prælatus cum Conuentu simul sunt persona acceptans: Nouitius vero est persona acceptata. Et remittit se Nauar. ad id quod dixerat in *cap. flauimus de Regular.* Aliter arguebat ille Doctor consultus dicens, Ecclesiam ideo vnum annum probationis, seu Nouitiatus assignasse Nouitiis, vt fratres Conuentus, in quo Nouitius viuit, sufficiens haberent tempus ad dignoscendos, & expertos habendos mores Nouitij per annum. Cum vero Prouincialis non trahat moram in quouis Conuentu, non poterit Nouitij mores experiri, nec scire an ad Religionem aptus sit, & proinde non bene poterit pro illo ad professionem suffragium ferre. Et huius opinionis fuerunt alij duo viri docti cuiusdam grāuis Conuentus ob proxime da-

rationem. In extremam opinionem alij abierunt  
entes non solum Prouincialem dare posse suffra-  
gium in quouis Conuentu, sed etiam Secretarium  
ius Prouincialis de mandato ipsius Prouincialis, eo  
quod Secretarius sit officialis publicus prouinciæ.

Hoc non obstante ego dixi, & dico posse Prouin-  
cialem ferre suum suffragium in professione Nouitiæ  
assistentis in Conuentu sibi subiecto: quod si probaue-  
rimus de professione Nouitiæ, à fortiori probatum  
erit quod poterit dare suffragium in professione cu-  
iuscunque Nouitij suæ prouinciæ. Probo ergo quoad  
Nouitiam, ex regula in cap. *cui licet quod est plus, licet  
etiam quod est minus. de Regul. iur. in 6.* ubi glossa dat  
exempla. At Prouincialis potest recipere Nouitiam ad  
habitum quod est plusquam pro illa dare suffragium  
ad professionem, vt patet: Item Prouincialis potest da-  
re suffragium in electione Abbatisæ, vt suppono cer-  
tum, & probaui 1. tom. *Dubiorum Regul. ver.* Abbatisæ:  
Ergo poterit etiam dare suffragium in eo quod est mi-  
nus, videlicet in professione Nouitiæ. Quod vero  
maius sit dare suffragium in electione Abbatisæ; quam  
suffragari pro Nouitia: constat, quia electio Abbatisæ  
est canonica & secreta, facta per schedulas secretas:  
quæ ambo desunt in suffragio dādo pro Nouitia, cuius  
receptio per suffragia non est electio vera. Et præterea  
dignior persona est Abbatisa, & Conuentui magis  
necessaria quam sit Nouitia. Et confirmatur, quia hæc  
ambo maius, & minus sunt eiusdem ordinis, vtrumq;  
enim est dare suffragium tam pro Abbatisa, quam  
pro Nouitia. Et vtraque persona habet quodammodo  
ordinem inter se, Abbatisa videlicet ad professam, &  
professa ad Abbatisam: & vtraque ad bonum Con-  
uentus, cuius Prouincialis est caput, & Prælatus. Et sic  
hoc

hoc loco non habet locum regula iuris citata à Nauarro, quod scilicet à separatis non fit illatio: non enim sunt separata suffragari pro Nouitia, & suffragari pro Abbatissa, vt diximus, sed similia, & fere subordinata.

3 Imo hæc duo sunt connexa, dare suffragium, vel licentiam ad ingressum Religionis, & dare suffragium ad profitendum: de connexis vero, seu æquipolentibus idem est iudicium, *lex s. n. ff. mandat.* Vnde non potest nocere expositio regulæ supradictæ, *cui licet quod est plus*, dicens, intelligendum esse quando illa plus, & minus ordinantur ad idem, vel vnum ordinatur ad aliud, vel vnum includitur in alio: hæc enim tria reperiuntur in hoc quod est recipere Nouitiam ad ingressum Ordinis, quod est plus, & recipere illam ad professionem dando suffragium quod est minus: & Prouincialis potest facere illud maius, recipere ad ordinem: ergo poterit illud minus quod est per suffragium recipere ad professionem. Secundo probatur ex declaratione citatæ regulæ *cui licet* &c. tradita à glossa in cap. *visis* 16. *quest.* 2. vbi ait dictam Regulam explicari, vel confirmari per cap. *præcipimus* 12. *quest.* 1. & in hoc capite præcipitur quod Episcopus dispenset, & habeat pecuniam Ecclesiæ, & causam assignat. Nam si Episcopus gubernat animas, quod est plus, etiam gubernabit pecuniam Ecclesiæ, quod est minus. Tunc sic. Si Prouincialis dat suffragium in electione Abbatissæ, & recipit Nouitiam ad habitum, quæ sunt plus: etiam recipiet Nouitiam ad professionem per suum particulare suffragium, quod est minus. Tertio probatur ex ratione naturali: nam si singulæ Moniales dant suffragium in professione Nouitiæ, eo quod sunt membra istius Conuentus: ratio dicat vt idem possit facere Prouincialis, eo quod sit caput istius Conuentus, cum sit

fit Prælatus illius. Facit omnino quod tenet Panorm. cap. ad *Apostolicam*, citans multos text. & Doctores, videlicet, quod solus Prælatus per se absque Conuentu potest facere valide professionem nouitio absque suffragiis Religiosorum. Quod licet non sit receptum, neque ego approbo, facit tamen satis credibile dictum tanti Doctōris, & Bartoli, & aliorum, vt saltem possimus dicere quod poterit Prælatus per suum suffragium, Conuentusque suffragia recipere ad professionem nouitiam, quam ipse recepit ad habitum. Vltimo confirmatur, quia in Religione istius Nouitiæ (idem credo fit in aliis) quando Prouincialis vult pro maiori solemnitate, ipse per se facit professionem Nouitiæ, non Abbatissa, & Nouitia in manibus Prouincialis valide proficitur, admittitque Prouincialis ad ipsam professionem solemnem: cur ergo non poterit paulo ante dare suffragium ad istam professionem, sicut dant cæteræ Moniales?

Quod attinet ad id quod in oppositum adducitur ex Nauarro de Generali Carmelitarum, noto primo, quod Nauarrus non ait dictum Generalem dedisse suffragium pro Nouitio, neque id supponit Nauarrus, sed solum innuit, quod ex officio, quatenus solum iudex causæ, non dando suffragium, non poterat illum facere professum: secus forte dicturus Nauarrus, si ipse Generalis vellet suum ferre suffragium, iuxta supradicta à nobis. Quod vero spectat ad dictum Nauarri dicentis, ex cap. ad *Apostolicam de Regular.* colligi, dare professionem Nouitio pertinere ad solum Prælatum immediatum Conuentus, non ad Prælatum mediatum, Prouincialem scilicet, &c. superiores, dico imprimis nullum verbum in citato capitulo contineri, quod faueat dicto Nauar. nisi hoc: *Abbate per se vel per alium professionem*

*professionem recipiente Monasticam.* Hæc autem verba non probant quod vult Nauarrus: nam licet dicatur hîc, quod Abbas per se recipiat professionem illud *per se*, non excludit quod Generalis illius Conuentus si sit præsens, possit recipere illam professionem inuito Abbate conuentus, cum Generalis sit verus Prælatus illius Conuentus. Et in mea prouincia vidi Prouincialem recepisse ad professionem per se quædam Nouitium, non vero Goardianum, qui erat Prælatus immediatus conuentus, & erat ibi præsens, & nemo professionem accusauit vsquæ hodie. Explico ergo & citatum textum, & ipsum Nauarrum, dum dicunt dare professionem pertinere ad Prælatum immediatum Conuentus cum ipso conuentu, non vero pertinere ad Prælatum superiorem mediatum, hoc solum velle: quod vt professio sit valida debet consentire Prælatus Conuentus, & ipse Conuentus per sua suffragia, hoc vero non pertinere ad solum Prælatum mediatum, & generalem Conuentus, ita videlicet vt ipse solus Prælatus mediatum, & Generalis per se solum facere possit professum absque suffragiis Conuentus. Alludit enim textus, & Nauarrus ad morem fortasse antiquum, per quem solus Prælatus faciebat professum absque consensu Conuentus; & hoc solum negat Nauarrus posse facere Prælatum mediatum Conuentus; & hæc sola est mens Nauarri in toto illo consilio si bene attendatur. Non vero negat Nauarrus quin Prælatus mediatum, & Generalis Conuentus possit cum consensu, & suffragiis Conuentus dare per se professionem præsentem Prælato immediato Conuentus: nec proinde negaret posse eundem Prælatum mediatum, seu Prouincialem dare suffragium ad professionem Nouitij, quâdo recipiuntur suffragia à cæteris Religiosis Con-



sis Conuentus. Alia quæ obijciuntur ex Nauarro, difficultatem non habent, & ex supradictis facile soluuntur.

4 Ad aliam obiectionem, qua dicitur dari annum probationis, vt Religiosi possint experiri mores Nouitij, Prouincialem vero ordinarie absentem non posse illos experiri; dico non habere fundamentum; vt enim sufficienter pro Nouitio detur suffragium, non requiritur exacta, & quotidiana experientia Nouitij. Sufficit quod habeatur notitia per bonam informationem Fratrum. Probo multis exemplis. Primo, si antequam recipiantur suffragia ad professionem Nouitij triduo antea aliquis Religiosus denuo veniat ad habitandum in illo Conuentu assignatus per Prouincialem, iste vocem habens in Conuentu, valide suffragium feret pro Nouitij professione, vt patet; & tamen per solum triduum mores Nouitij non cognoscit. Secundo, quando fratres ex Portugallia vadunt ad capitulum generale Romæ. v.g. celebratum, ibi dant suffragium pro Generali, illi Religioso Italo, vel Gallo, quem numquam viderunt, & cuius mores numquam sunt experti: solumque ducuntur per informationem bonam ibi triduo acceptam. Plus vero est suffragari pro Generali, quam pro Nouitio. Tertio, efficacius probatur, quia Nouitius poterit efficere totum annum Nouitiatus validum, si cum habitu Ordinis existat extra Conuentum de licentia Prælati toto anno nouitiatus, vt tenet Sanchez *tom 2. Decal. lib. 5. cap. 4.* citans multos & graues Doctores, etiam recentiores id affirmantes: Inter quos est Nauarrus *consil. 42. de Regulari.* affirmans quendam Nouitium valide professum fuisse, qui solum per mensem & medium extitit intra Conuentum annq nouitiatus, reliquum vero tempus eiusdem anni nouitiatus extitisse

extitisse extra Conuentum in domo sæculari extra Cō-  
uentum. At de Nouitio sic toto fere anno existente  
extra Conuentum, non poterant Religiosi Conuentus  
sumere exactam, & quotidianam experientiam de vi-  
ta, & moribus, nisi per informationem. Et hanc etiam  
poterit habere Prouincialis absens à Conuentu No-  
uitij fere toto anno, per informationem iuridicam, &  
iuratam Religiosorum eiusdem Conuentus, qua in-  
formatione ductus possit secure, & sufficienter pro  
Nouitio vel Nouitia suffragium dare ad professionem.

5 Nec vero capitulum *statuimus. de regularitat.* ad  
quod se Nauarrus remittit, aliquid continet contra à  
nobis hîc dicta, imo agit de nimis diuersa materia.  
Quod vero alij dicebant è contra, Secretarium Pro-  
uincialis posse dare suffragium pro Nouitio in quouis  
Conuentu eiusdem prouinciæ, in quo repertus fue-  
rit, nullum habet fundamentum apparens. Non enim  
illud potest dare, eo quod solum sit Officialis pro-  
uinciæ: hoc enim non sufficit, cum non sit Prælatus,  
vel caput illius Conuentus, neque Conuentualis ha-  
bitator in illo, & proinde non habet vocem in Ca-  
pitulo illius Conuentus, sicut habet Prouincialis Præ-  
latus.

Et propter à me hætenus dicta, tres alij Doctores  
graues Olyssipone huic sententiæ subscripserunt  
dicentes in terminis, posse Prouincia-  
lem ferre suffragium pro Nouitiæ  
professione in Conuentu  
sibi subdito.



## CASVS XII.

*de quodam Conuentu Monialium, quem Prælatus  
illius dimisit regimini Ordinarij sæcu-  
laris, vel Episcopi.*

**I**N Ordine Minorum, & in vno capitulo Prouinciali cuiusdam prouinciæ, Commissarius Generalis præsidens in capitulo, cum Diffinitorio decreuerunt, quod certus Conuentus Monialium eiusdem prouinciæ ob certas causas molestas eximeretur ab obedientia, & regimine Prælatorum Ordinis, dimittereturque gubernationi Ordinarij sæcularis. Intimatum est hoc decretum Abbatissæ Conuentus, quæ libenter acceptauit, & Archiepiscopo Diocesano se subdit, qui Conuentus regimen acceptauit, & vt facilius acceptaret accesserunt epistolæ Regis Hispaniæ, suadentes etiam vt acceptaret. Tempore quo intimatum est prædictum decretum ordinis Abbatissæ, aliquæ graues Moniales appellarunt à dicto mandato, & decreto Commissarij generalis ad Generalem totius Ordinis, qui Romæ existens appellationem acceptauit, & habuit prædictam dimissionem tanquam nullam, & cassam. Eaque appellatione nonobstante, & admissione appellationis, Ordinarius sæcularis acceptauit prædicti Conuentus administrationem, & regimen in spiritualibus, & temporalibus, ac si foret Prælatus illius. Quo posito, quæsitæ sunt multa.

Primo, an dictus Commissarius generalis cum Diffinitorio capituli potuerit abdicare à se prædictum regimen talis Conuētus, illumque dimittere Ordinario.

Secundo, an dato quod potuerit dimittere illum, talis dimissio fuerit nulla, vel saltem suspensa propter appellationem interpositam ab illis Monialibus.

Tertio an Archiepiscopus potuerit valide, & iuste acceptare talis Conuentus regimen cum solo Regis mandato, absque speciali decreto Summi Pontificis? possitque tale regimen retinere?

Quarto, vtrum illæ paucae, vel plures Moniales potuerint valide appellare ad Patrem Generalem, ne fieret talis dimissio Conuentus ad Ordinarium.

I Et quidem pro parte affirmatiua, quod Commissarius generalis cum Diffinitorio potuerit valide dimittere prædictum Conuentum Ordinario, videtur sic probari: Nam Commissarius generalis Ordinis Minorum in sua familia potest omne illud quod potest Generalis in toto Ordine, vt constat ex Bulla vnionis Leonis X. & ex statutis generalibus Segouiensibus, titulo *de Commissario generali*. At Generalis Ordinis, cum sibi visum fuerit conueniens, potest dimittere & relinquere Ordinario vnum Conuentum fratrum, seu Monasterium, vt habetur expresse in *Compendio Mendicantium, ver. Edificare. §. 8.* Ergo & Commissarius generalis in sua familia poterit dimittere vnū Conuentum Monialium eidem Ordinario, maxime si ob causas iustas sibi cum Diffinitorio conueniēs videatur. Secundo, multi & graues Doctores etiam recentiores dicunt posse Prælatum exemptum, suum subditum exemptum subiicere Episcopo, vt Episcopus illum absoluat à casu reseruato, v. g. hæresi, (si hodie Episcopus potest) à quo casu ipse Prælatus Regularis non potest talem subditum absolvere, quos Doctores citat, & sequitur Sanchez *lib. 4. Decal. cap. 39. num. 32.* Ergo etiam poterit suas subditas vnus Conuentus subiicere eidem

tem Episcopo quo ad gubernationem extrinsecam, quæ videtur esse minor, quam subiectio quoad iurisdictionem animæ. Tertio, vnusquisque potest renunciare suo priuilegio, cum enim priuilegium sit beneficium Principis, beneficium non confertur inuito. At Prælati Regulares gubernant Moniales ex priuilegio Papæ, vt est notorium, & patebit ex dicēdis: Ergo Prælatus Regularis potest suas Moniales dimittere Episcopo, renunciando priuilegio quod habet vt illas gubernet. Quarto quod Ordinarius in isto casu potuerit acceptare regimen istius Conuentus eo deserto à Prælato regulari, illique assignare confessorum Clericum, probatur ex *declaratione Cardinalium* citata à Matzilla *ad sessionem 25. cap. 17. de Regul. in Tridentino*. Vbi ait sic declarasse illos Dominos Illustrissimos. *Episcopus potest dare confessorum Monialibus subiectis regularibus, quæ nulla ratione induci possunt, vt suis Regularibus confessoribus peccata confiteantur*. Sic ibi. Si ergo confessorum illis potest assignare, poterit vtique regimen Cōuentus assumere quando Prælati regulares eas dimittunt, & non est qui gubernet illas. Confirmo hoc dupliciter, primo, ex doctrina communi Theologorum in materia restitutionis, ac Iuristarum dicentium, rem desertam à proprio, ac vero Domino, posse apprehendi à quolibet primo occupante tanquam desertam: At in hoc casu verus Dominus Prælatus regularis diuinitens hunc conuentum habuit illum pro derelicto, vt patet: ergo potuit occupari, & apprehendi à quouis alio; non autem melius, nec iustius, quam ab ordinario Episcopo, qui est Prælatus omnium ouium suæ diocesis: & non erat congruum iuxta leges canonicas, vt aliqui fideles in vna diocesi carerent omnino Prælato, & superiore spirituali, ac temporali. Secundo, con-

firmatur ex eo quod tradit Nauarrus *lib. 5. consil. tit. de pœnitent. & remission. consilio 18.* in simili fere materia, vbi ait posse Regulares tempore Iubilei confiteri peccata sua confessori clerico sæculari. (vbi per Regulares intellige etiam Moniales.) Ait inquam posse hoc fieri, quia iuxta *cap. ab exordio 35. distinctione, & l. si vnus §. pactus ne peteret ff. de pactis*, res facile reuertitur ad suam pristinam, & antiquam naturam, & citat Iasonem, Felinum, & Federicum. Iam vero, ait, Regulares olim erant subditi Episcopis, & confitebantur clerico sæculari, vt patet; ergo cum Iubileus annuat, concedat, & faueat, facile credendum est Regulares redire pro eo tempore ad antiquam naturam, & morem, quo possint confiteri peccata Sacerdoti sæculari approbato. Quod ipsum facile applicabitur nostro casui: Nam Moniales olim, quo ad regimen fori interni, & externi erant subditæ Episcopis; & per priuilegia sunt exemptæ ab illorum regimine, vt patet in multis priuilegiis in compendio Mendicantium *verbo*, Exemptio, & *verbo* Moniales: ergo cum Prælatus regularis istius Conuentus suo priuilegio renunciens illum dimiserit Ordinario, facile per hanc dimissionem redibit res ad suam antiquam naturam, videlicet ad regimen internum, & externum Episcopi, sicut olim fieri solebat.

¶ Hoc non obstante pro solutione. Noto primo. In Ordine Minorum dari duas classes, vel duas regulas Monialium eidem Ordini subiectarum. Primæ dicuntur Damianæ, vulgo, discalciatæ, & dicuntur Moniales primæ Regulæ, quam scilicet Pater noster Franciscus fecit, ac dedit sanctæ Claræ, & viuunt sub rigidiori instituto. Secundæ dicuntur sanctæ Claræ Urbanistæ, eo quod Urbanus Papa priorem illam rigidissimam regulam moderauit, eiusque rigorem in aliquibus

us temperauit, & sic temperatam dedit obseruandam his secundis Monialibus Vrbanistis, de quarum numero est hic Conuentus, de quo fuit altercatio. Quod vero hæ ambæ classes Monialium sint subiectæ immediate regimini Prælatorum Ordinis Minorum, & primis Discalciatis, constat ex præmio Regulæ Prælatorum confirmatæ à Papa Innoc. 4. vbi sic habetur de cõta Clara. *Promisit obedientiam Beato Francisco, & successoribus suis: & alia sorores teneantur semper successoribus Beati Francisci canonice electis obedire.* Sic ibi cap. 10. De secundis vero Vrbanistis vltra alia priuilegia, sunt quoque particularia data ab Eugenio Quarto, quorum aliorum citat ad longum Rodriguez in suo Bullario fol. 41. aliud ponit in eodem Bullario fol. 239. per quæ prædictas Moniales subiicit immediate gubernationi Prælatorum Ordinis Minorum. Et in illo priori, exprimit Papa quod prædictas Moniales eximit ab omni iurisdictione Legatorum, Archiepiscoporum, Patriarcharum & Episcoporum &c. ita vt non possint in ipsas inferre aliquam censuram. Et in secundo priuilegio, loquens cum Prælatis Minorum circa Moniales, ait: *Per vos sanctiones Apostolicas, illas per vos decernimus gubernari, &c.* Et in ista secunda Bulla dicit etiam quod Abbatissæ quæ noluerint obedire, ac subiici regimini Prælatorum Ordinis Minorum, ipso facto sunt excommunicatæ. Omitto alias probationes pro ista exemptione, cum praxis ipsa sufficeret, & consuetudo præscripta ex spatium tot annorum.

Suppono secundo rem esse certissimam in iure, quod interposita appellatione, illaque pendente nihil est innouandum. Est textus expressus in capite *si à iudice. de appellation. in 6.* vbi glossa multa citat. Et praxis obseruat, estque receptissimum in vtroque iure ciuili,

& Canonico. Et apud Doctores: & probari etiam potest ex toto titulo, *vt lite pendente nihil innouetur.* Quod si pendente appellatione aliquid innouetur, irritum, & nullum iudicandum est, vt vtrumque ius decernit.

3 Suppono tertio in ordine Minorum Commissarium generalem esse subditum omnino Ministri generalis eiusdem Ordinis, ita vt ab ipso Generali accipiat suam iurisdictionem. Habetur clare in citata Bulla vnionis Leonis X. in qua instituit regimen Ordinis Minorum de Obseruantia, vbi decernit quod electo Generali in capitulo generali pro toto Ordine, etiam eligatur Commissarius Generalis pro alia familia: *Cui Minister generalis (ait Papa) super fratres ultramontanos vices suas committat.* Si ergo Commissarius generalis ab ipso Generali iurisdictionem suam recipit illius profecto subditus est: & ab ipso Commissario ad Generalem poterit appellari: iuxta diffinitionem appellationis, quæ sic definitur. Est prouocatio causæ à minore ad superiorem iudicem, &c. Et idem habetur in statutis generalibus Segouiens. eiusdem Religionis, quod scilicet Commissarius generalis est subditus Ministri generalis. His ita suppositis.

4 Ad primum quaesitum dico, non potuisse prædictum Commissarium generalem cum capitulo illo Prouinciali dimittere dictum Conuentum Ordinario quoad regimen. Probatur, quoniam illa dimissio in rigore, & substantialiter fuit renunciatio priuilegij, seu exemptionis illius Conuentus Monialium; quod erat beneficium datum à Sede Apostolica: At beneficium non potest renunciari, nisi coram superiori, à quo fuit receptum, & multo minus potest dari alteri ad libitum nisi de consensu superioris ad quem pertinet collatio



latio beneficij, qui est sum. Pontifex Habetur in ca. Admonet de Renunciat. & cap. Denique 6. quest. 3. & cap. Abbas 18. quest. 2. & alibi. Quod adeo verum est, debere beneficium renunciari coram superiore, vt etiam ipse Papa si officio debeat renunciare, & abdicare se à Papatu, licet in terris superiorem non habeat, debet tamen renunciare coram Cardinalibus, tanquam coram testibus, qui videant ipsum Deo ipsi renunciare: Ita tenet Comitulus lib. 1. 99. moralium quest. 100. num. 2. At Commissarius Generalis habet regimen Monialium de manu Papæ, vt patet ex supradictis: ergo coram ipso Papa solum poterat huic regimini renunciare, qui erat superior; non vero coram Archiepiscopo, qui nec erat superior renunciantis, nec ad ipsum Archiepiscopum pertinebat collatio talis regiminis. Et confirmatur ratione naturali, & à simili: Nam si ego habeo rem aliquam mihi commodatam ab alio, non possum ego rem istam alteri dare ad libitum, sed deo reddere Domino qui illam commodauit: At officium regendi Moniales istas datum, seu commodatum est Prælatis Minorum ab ipso Papa: ergo si resignandum est, in manibus solius Papæ debet resignari, qui ipsum dedit, non vero in manibus Ordinarij. Secundo videtur hoc expresse colligi ex cap. cum tempore. de arbitris; vbi Papa approbat quoddam compromissum inter Ecclesiam exemptam cum quodam Episcopo: & excipit, quæ contra Ecclesiæ illius exemptæ libertatem in eo compromisso continentur, reddens hanc rationem: Cum, & si sponte volueris, de iure tamen nequiescis sine licentia Romani Pontificis renunciare priuilegijs, vel indulgentiis libertatis, quæ monasterium illud indicant ad ius, & proprietatem Rom. Ecclesiæ pertinere. Sic ibi Papa: quod nihil clarius ad nostrum intentum potuit desi-

derari, est enim idem casus in terminis. Et iuuat caput cum olim li. 2. de priuilegiis, vbi Papa circa priuilegia, vel causam vnius Ecclesiæ priuilegiatæ, subdit hæc verba: *Nos igitur attendentes, quod eadem priuilegia non solummodo pro libertate Monasterij faciebant, sed etiam exprimebant ius nostrum, & Ecclesiæ Romane iustitiam tuebantur, &c.* Tertio, faciunt pro hac parte plusquam tredecim Doctores graues, quos citat Sanchez citato cap. 39. lib. 4. Decal. n. 29. qui omnes rationibus, & textibus neruose probant, non posse Prælatum regularem suū subditum subiicere Episcopo etiam in foro conscientie, vt absoluaatur ab illo in casu, à quo ipse Prælatus regularis non potest: & multo minus dicunt posse illū subiicere Episcopo quoad forum externum; quia inquirunt, non potest Prælatus regularis in hoc renunciare priuilegio exemptionis spiritualis, sibi concessio non personaliter, sed pro tota Religione. Et quamuis ipse Sancti. ibi num. 32. cum aliis Doctores teneat posse Prælatum in foro solo interno subiicere suum subditum Episcopo pro absolutione sacramentali: ait tamen cum Lapo, & Ancharano id non posse Prælatum regularem facere, subiiciendo illum Episcopo in foro externo, & contentioso, qui est noster casus. Quarto per illas duas Bullas Eugenij citatas, Summus Pontifex auferit ab omnibus Ordinariis in perpetuum omnem iurisdictionem gubernandi Moniales istas: iurisdictione vero semel extincta non amplius reuiuiscit nisi renouetur: ergo cum Ordinarius non habuerit renouatam iurisdictionem extinctam per Papam, nec ille potuit acceptare istum Conuentum, nec Commissarius generalis eum illi dimittere. Quinto facit omnino quod tradit Henriquez tom. 1. sum. lib. 7. de Indulgentiis. cap. 25. num. 1. vbi loquens de exemptione alicuius

Reli-

Religionis, dicit, quod quando Papa de aliqua Religione, vel loco dicit, *Immediate nobis subijcimus*: Tunc Papa constituit se immediatum superiorem, iudicemque ordinarium, quasi esset Episcopus Diocesanus, &c. Et paulo infra dicit: *Non licet Regularibus sine licentia Papæ renunciare privilegio dato in honorem status, &c.* At privilegium gubernandi Moniales datum est Prælati in honorem status Fræcisani, vt patet: & Moniales immediate subiectæ Sedi Apostolicæ, subiectæ fuerunt per Papam immediate Ordini Minorum, ergo non potest Prælatus Minorum, etiamsi sit ipse Generalis, eas tradere Ordinario. Et citat ibi Henriq. in *glossa littera C.* citatum à nobis supra capitulum *cum tempore. de arbitris*. Adhuc pro nullitate istius dimissionis, aduerto alium defectum: Nam, quando Commissarius generalis posset renunciare hoc regimen Ordinario, ista renunciatio facienda erat in manibus ipsius Ordinarij, intimando coram illo renunciationem, vt colligitur ex textibus citatis in primo nostro argumento huius *num. 4.* & colligitur ex traditis à Rodrig. *tom. 1. quæst. Regular. q. 23. art. 6.* At ista dimissio non est facta coram Ordinario, neque illi intimata: sed solum in dissinitorio decreta, propter inobedientiam Abbatissæ fuit illi intimata, vt se haberet pro dimissa ab Ordine ad Ordinarium, & proinde etiam ex hoc capite fuit nulla.

5 Ad secundum quæsitum dico, dato quod Commissarius generalis potuerit illam dimissionem facere, illam nihilominus fuisse suspensam, & proinde nullam propter appellationem interpositam. Constat clare ex dictis *num. 2.* nam appellatione interposita nihil potest innotari per multos textus ibi adductos, quod si aliquid innotetur irritum est. Quibus adde doctri-

nam Nauarri *lib. 2. Consiliorum, consil. de sentent. & re iudic. num. 6.* ubi loquens de effectu appellationis, sic ait; *Effectus enim appellationis, siue defensionis iuris naturalis qui in ea continetur, est rescissio actus à quo appellatur, & repositio appellantis in statum pristinum, secundum Bartolum, Panormitanum, Decium, & communem.* Sic ibi. Et dicta à Nauarro inseruiūt etiam ad casum præsentem.

6 Ad tertium quæsitum dico, non potuisse prædictum Archiepiscopum licite, ac valide acceptare regimen illi dimissum. Probat ex dictis *num. 1.* per Bullam enim primam Eugenij IV. ademptum fuit hoc regimen Monialium omnibus Ordinariis cuiuscumque qualitatibus illi sint: ergo post illud ademptum à Papa, non possunt iterum se intromittere in illud, absque particulari commissione Summi Pontificis. Tenet consequentia: nam si renuncians alicui rei, iuri, vel beneficio, non potest ad illud redire sine nouo titulo collato à Superiore, eo quod per renunciationem abdicauit à se omne ius, quod in tali beneficio habebat; minus poterit Ordinarius redire ad regimen Monialium, quod ille in speciali per Bullas prædictas amisit sine noua collatione illius regiminis. Consonant his, quæ tradit Nauarrus *tom. 3. suorum operum ad cap. si quando. de rescriptis. in fine.* in *Actuario prælectionis illius à num. 19. & seqq.* ubi loquens de regressu ad beneficium renunciatum *num. 23.* ait per renunciationem perdi titulum, & opus esse vt detur nouus titulus, iuxta capitulum *quam periculosum. 7. quæst. 1. & l. queritur. §. si venditor. ff. de edict.* & sine titulo beneficium Ecclesiasticum obtineri non potest. Ergo adempta iurisdictione circa Moniales regendas ab Episcopo per Papam in illis citatis priuilegiis, necessarius est nouus titulus, seu noua commissio Papæ, vt Episcopus possit assumere

re adem-

re ademptum regimen, & proinde non potuit illud licite, nec valide acceptare de manu solius Commissarij generalis dimittentis. Neque vero Epistola Regis nostri Catholici iubentis, vt Ordinarius acceptaret regimen dicti Conuentus, sufficiens fuit vt Ordinarius licite acceptaret: Nam Rex temporalis non habet, nec potest dare iurisdictionem super personas Religiosas, & Ecclesiasticas, quales sunt Moniales subiectæ immediate Sedi Apostolicæ; & hoc ita verum est, vt quamuis Rex aliàs esset patronus illius Conuentus, adhuc illam iurisdictionem super Moniales dare non posset sine licentia Papæ: sicut beneficia quæ Rex præsentat tanquam patronus, non profunt sine confirmatione Summi Pontificis.

7. Ad quartum quæsitum dico, potuisse valide prædictas Moniales appellare ad Patrem Generalem Ordinis à dicto Patre Commissario generali, ob factam dimissionem Ordinario; & hoc ex duobus capitibus. Primo, quia Commissarius generalis est inferior, & subditus Generali, vt diximus in tertio notabili: appellari autem potest ab inferiori ad superiorem. Adde quod Gregorius XIII. vt refert Capuccinus Sorbo in *Compendio. verb.* Appellare. assignans fratribus Minoribus formam, & ordinem quo debebant appellare, dixit, appellandum illis esse à Goardiano ad Prouincialem, à Prouinciali ad Generalem, &c. Et quamuis ibi non exprimat, à Commissario generali ad Generalem, res per se patens est, cum ab inferiori quocumque appellare liceat ad superiorem, sicut ab Episcopo ad Archiepiscopum. Secundo potuerunt appellare prædictæ Moniales, quia Conuentus & proinde ipsæ erant grauatae, & oppressæ, videlicet quia per talem dimissionem sibi adinebatur priuilegium exemptionis à iurisdic-

iurisdictione Ordinarij quo Conuentus fruebatur pacifice per tot annos: ademptio vero exemptionis istius erat notabile grauamen, & mutatio status earum, & Conuentus. Iam vero quilibet grauatus, & oppressus licite potest appellare. Habetur expresse in capite *omnis oppressus 2. quest. 6.* vbi sic habetur: *Omnis oppressus libere sacerdotum (si voluerit) appellet iudicium, & a nullo prohibeatur se ab his fulciatur, & liberetur:* Et habetur passim in titulo de *Appellationibus.* in Decretalibus, & in 6. vbi passim ponuntur casus appellantium à grauamine. Imo pro bono communi istius Conuentus poterant singulæ appellare; colligitur clare ex cap. *ut circa. de elect.* & ex cap. *qui contra, eod. titulo,* vbi permittitur cuicumque appellare, seque opponere electioni indigni, vel electioni indebitæ, idque ob bonum commune Ecclesiæ; & ob bonum particulare redundans in ipsum appellantem, cui conuenit habere bonum Prælatum. Facit etiam ad hoc, quod ex iure ciuili quilibet, etiam extraneus, potest appellare pro damnato ad mortem, vt tradit, *lex.* Non tantum ff. de *appellat.* Idque potest etiam facere consanguineus damnati non habens procuracionem illius. De quo Iulius Clarus in *pract. crim. quest. 94. num. 4.*

8 His positis, argumenta in contrarium adducta sic soluentur. Ad primum concessio antecedente, quod scilicet Generalis Ordinis possit dimittere Conuentum vnum ordinario concurrentibus circumstantiis dictis in illa concessione, neganda est consequentia, posse scilicet Commissarium Generalem dimittere Moniales istius Conuentus regimini Ordinarij. Ratio clarissima est: nam quando generalis dimittit illum Conuentum insalubrem, v. g. dimittit solum parietes, saxa, & situm, non vero dimittit, nec potest dimittere fratres

tres illius Conuentus Ordinario, quia non potest dare Ordinario iurisdictionem super fratres quam Generalis habet à solo Papa: At in casu nostro agitur & supponitur de Commissario generali dimittente Ordinario non parietes, & laxa, vel situm Conuentus, sed de illo dimittente Ordinario Moniales quoad regimen, quod nec ipse Generalis facere posset ob dicta efficaciter in præcedentibus ex Bullis summorum Pontificum, & ob textus canonicos. Ad secundum, dicendum est illud fundari in authoritate Doctorum, quæ est satis dubia, an videlicet possit Prælatus regularis subdere suum subditum Episcopo pro foro interno, & in vno, vel altero tantum casu, vt vidimus superius in responsione ad primum quæsitum ex Sanchez, *loc. citat.* quin potius Doctores id concedentes tenent non posse vilo modo prælatus regularem suum subditum subdere Episcopo, quo ad forum externum contentiosum: itaque antecedens illius argumenti secundi, est satis dubium, potestque negari cum tredecim Doctoribus citatis à Sanchez dicto cap. 39. num. 29. Respondeo secundo, ad idem argumentum secundum, dato antecedente, negando consequentiam. Nam quando Prælatus regularis subdit subditum Episcopo pro absolutione tantum fori interni, id facit non ad semper, sed vna, vel altera vice; & per hoc non abdicat à se iurisdictionem spirituales in totum, sed pro vna vice. At in nostro casu esset Commissarium generalem abdicare à se in perpetuum & in totum iurisdictionem externi fori, quod est difficilius. Differunt enim valde iurdictio externa, quæ dicitur contentiosa: & iurdictio voluntaria, quæ fere est fori interni. Nam Prælatus extra suum territorium non potest vt in subditum iurisdictione externa, & contentiosa; licet possit ibi vt

ibi vti cum illo iurisdictione voluntaria. Eodem modo, facilius Prælatus poterit cōcedere vt subditus subdatur Episcopo in foro interno pro iurisdictione voluntaria, & hoc vna vice: quam subdere illum Episcopo quoad iurisdictionem contentiosam in perpetuum. Potest tertio ad idem secundum argumentum responderi concessio antecedente, quod scilicet possit prælatus regularis subdere subditum Episcopo pro foro interno modo prædicto, quia dantur aliqua motiua, & rationes id persuadentes adductæ à Sanch. *citato num.* 32. Negando tamen consequentiam, quod scilicet etiam possit sic illum subiicere Episcopo, quoad forum externum per totam vitam, quia sunt multæ Bullæ Pontificiæ, Canones, & rationes hanc subiectionem prohibentes, vt patet ex supradictis.

9 Ad tertium patet solutio ex dictis supra in respō. ad primum quæsitum ex Henriquez & clarius id tradit Suarez *tom. de leg. lib. 8. cap. 33. à num. 2. & seqq.* videlicet non posse aliquem renunciare suo priuilegio, quando tale priuilegium non conceditur illi ratione sui, sed in honorem status: dat vterque exemplum in clerico, qui non potest renunciare priuilegio fori; tale enim priuilegium non fuit illi concessum immediate ratione sui, sed in honorem status clericalis. Eodem modo hoc priuilegium gubernandi Moniales non est datum Commissario generali ordinis ratione sui, sed in honorem Religionis fratrum, & Monialium, & ad melius regimen ipsarum: vt suppono me aliàs probasse, ac proinde non poterat Commissarius prædictus tali suo priuilegio renunciare. Respondetur secundo; potuisse Commissarium generalem illud priuilegium renunciare, sed id facere debuit coram Papa solum, non vero dando illud Ordinario,



nario, cui dare non poterat: & postquam remisisset renunciationem regiminis ad Papam, non debuit abstinere à regimine illarum donec sciret Papam Romæ acceptasse renunciationem, cum constet in iure & praxi, renunciationem non valere donec acceptetur à potente acceptare. Respondetur tertio, non potuisse dictum Commissarium facere dictam renunciationem, quia illud regimen Monialium, etiamsi aliquo modo sit priuilegium Papæ, tamen in rigore est mandatum Papæ, quo iussit has Moniales gubernari à Prælati Minorum: patet ex verbis secundæ Bullæ Eugenij IV. supra citatis in responsione ad primum quæsitum. Vel in primo notabili positus, videlicet: *Per has sanctiones Apostolicas per vos (id est Prælatos Minorum) decernimus gubernari.* Vbi verbum *Decernimus*, non significat priuilegium voluntati commissum: sed significat mandatum, vt Doctores communiter explicant hoc verbum, *Decerno*; cum ergo mandato Papæ non possit renunciari, non potuit dictus Commissarius renunciare huic mandato Papali.

10 Ad quartum argumentum, dato quod Illustrissimi Cardinales ita declarauerint, posse Episcopum in illa occasione dare confessorum Monialibus exemptis: non dixerunt pro foro externo posse Episcopum exemptarum Monialium regimen externum assumere pro semper, hoc enim valde diuersum est à confessione sacramentali audienda, vt patet, & non sequitur; potest assignare confessorum, ergo potest illas regere, & gubernare. Ad primam confirmationem, & exemplum rei dimissæ à Domino proprio, quam potest quisquis occupare pro derelicta: Dico id intelligi quando ille dominus rei, est vere dominus illius, & potest illam absolute dimittere: secus si illam habeat ex  
commo-

commodato, vel cum circumstantia prohibente alienationem, vel dimissionem, tunc enim si dimittat indebite, non poterit quilibet occupare. Quod applicans ad nostrum casum, dico, Commissarium generalem non habuisse hoc regimen tanquam Dominum absolutum, ita ut posset illud libere donare, & dimittere cui voluerit, sed ita ut per se solum administret: ac proinde si indebite illud dimisit, dando id cui non poterat, nullus poterat acceptare rem alienam, sed pro illius regiminis acceptatione, & occupatione recurrendum fuit ad verum Dominum, & collatorem illius, qui est solus Summus Pontifex. Ad secundam confirmationem ex Nauarro, dico primo, ad textum citatum facile vnamquamque rem, vel legem redire ad suam pristinam naturam, si tamen impedimentum non obstat: Exemplum, à qua facile descendit. Ita in hoc casu, facile regimen Monialium rediret ad statum antiquum, ut per suos Episcopos regerentur, si non obstarent tot Bullæ Pontificiæ illas extrahentes ab illorum regimine, & tot textus, & rationes positæ supra contra hanc dimissionem indebite factam: & proinde non potuit hic res, vel lex redire ad suam antiquam naturam, seu gubernationem Monialium per Episcopos. Addo quod Nauarrus non applicat illam legem, & textum, nisi solum ut probet, per Iubileum posse Monialem confiteri sacramentaliter, clerico sæculari, sicut dicebat proxime citata *Declaratio Cardinalium*. Nihil vero ibi Nauarrus loquitur de foro externo circa Moniales, vel Religiosos. Et quidem quoad casum Nauarri, ego etiam id concederem, posse Religiosum per Iubileum magnum eligere confessorem approbatum etiam sæcularem, quia verba Iubilei amplissima sunt, & ut plurimum nimis ad id inclinant: hoc tamen  
quod

quod est recurrere ad iurisdictionem externam, & contentiosam, quod nimis odiosum est immutare, dico necessariam esse particularem commissionem illam potentis concedere ob satis dicta in præcedentibus.

---

### CASVS XIII.

*De Abbâtissa inchoante annos quadraginta,  
non expletos.*

**C**oncilium Tridentinum *sess. 25. cap. 7. de Regul.* præcipit vt eligenda in Abbâtissam, vel Prælatam Monialium sit non minor annis quadraginta, cum aliis requisitis ibidem. Quæsitum fuit an quædam Monialis vnius Conuentus, quæ annum quadragesimum inchoauerat, sed non compleuerat, posset eligi in Abbâtissam, cum in eodem Conuentu non deessent alie maiores quadraginta annis cum cæteris qualitatibus requisitis?

**R.** Credo quod dicta Monialis potest eligi, & confirmari in Abbâtissam absque vlla dispensatione, & quod sufficiat annum quadragesimum inchoasse. Quam quæstionem licet apud nullum in particulari disputatam inuenerim, id colligo primo ex Azorio *tom. 1. sum. lib. 5. cap. 28. §* Dubiæ est, vbi dicit, quod quando in aliqua Bulla, vel lege dicitur, quod ad tale officium debeat persona habere certos annos, & lex vtitur ablatiuo, dicendo in tertio, quarto, vel simili anno; tunc lex non petit annos completos, sed sufficit quod sint inchoati. Et citat ad hoc quandam glossam, & Syluest.

At Tridentinum *citato cap.* loquens de ætate requisita in Abbatissa, utitur ablatiuo, dicens: *Quod non sit minor quadraginta annis*; ergo non requirit completos, sed inchoatos. Et statim post, utitur etiam ablatiuo dicens: *Quæ octo annis post professionem laudabiliter vixerit.* Secundo id probo ex Syluestro *verb.* tempus ( qui locus non citatur ab Azorio ) vbi Syluester citat Panormitanum in *cap. ad nostram. de Regular.* vbi ait, quod in dubio iuris an loquatur de annis completis, an inchoatis, quoad dignitates, in quibus fauor consideratur, quod annus incæptus habetur pro completo, secundum glossam ibi citatam à Panormit. Tertio, id probo ex eodem *cap. 7. Trident.* vbi ait, quod si defuerint Moniales quadraginta annorum, eligatur quæ annum trigessimum excesserit. In quibus verbis expressit quod trigessimus annus debet esse completus. Quod verbum, *Excesserit*, non apposuit Concilium quando dixit requiri annum quadragessimum in eligenda Abbatissa: sed solum simpliciter dixit, quod non sit minor annis quadraginta. Et potest satis colligi ex mente Concilij; nam si ibi deficiente Moniali quadraginta annorum, dicit quod habeat saltem triginta annos, dispensans in decem annis, satis creditur illud dispensare in decem, vel sex mensibus in illa quæ habet quadraginta annos minus aliquot mensibus. Et potest confirmari ex eo quod tradit Nauarrus *lib. 3. consiliorum tit. de Regular. consilio 75. §.* His non obstantibus, vbi citans legem quandam ait quod quando lex habet duos sensus per quos potest explicari; tunc benignus intellectus est accipiendus. Cum ergo citata lex *Trident.* patiatur duos sensus, de anno completo, vel incompleto, benignior sensus de inchoato solum poterit acceptari, quod concordat cum dicto Panorm. proxime citati à Sylue

Syluestro. Ultimo confirmo ex dicto communi Iuristarum dicentium vnam legem posse explicari per aliam legem, nam iura iuribus debent concordari. At constat in simili fere materia, quod in Clementina prima de statu Monach. agens ibi Papa de ætate, quam debet habere Religiosus, vt sit Prælatus alicuius Conuentus, & dicens debere esse viginti quinque annorum, ponit hæc verba. *Nisi annos vigesimum quintum attigerit.* Vbi nõ requirit annum viginti quinque completum, sed inchoatum. Quod pari modo in Abbatisa poterit explicari, vt iura iuribus consonent. Si enim attigisse annos vigesimum quintum sufficit in viro vt sit Prælatus; sufficiet in fœmina excessus quindecim annorum, vel quatuordecim attingendo quadragessimum, vt possit esse prælata vnus Conuentus.

2 Quæris. Monialis, nondum attingens quadraginta annos, bona fide, & ignoranter, imo putans se illos habere completos, fuit electa in Abbatisam: post electionem, cõstitit quod dictos quadraginta annos nondum attigerat.. An electio illa valida sit; an vero irritanda? Respondeo primo, Concilium ibi, licet prohibeat eligi minorem 40. annis, non tamen irritat professionem. At constat quod multa fieri prohibentur, quæ tamen facta valent, vt iam diximus in præcedentibus, ex eodem Concilio, quod eadem *sess. cap. 17.* prohibet ne Abbatisa ad professionem admittat Nouitiã antequam Episcopum moneat pro examine Nouitiæ faciendo: & tamen si Abbatisa secus faciat, professio erit valida, quia Concilium nõ annullat professionem secus factam. Et iuxta ius antiquum, etiam in materia professionis, aliquid prohibitum non annullatum à lege, valebat, vt patet ex cap. *ad Apostolicam de Regul.* vbi dicitur quod licet professio prohibeatur fieri infra

annum probationis; tamen si fieret, valida erat: quamvis in hodie correctum sit per Tridentinum eadem *sess. cap. 1 §. extra* vero illum casum, hodie per Tridentinum correctum, dicit ibi Papa Innocent III. in textu, quod inulta fieri prohibentur, quæ tamen facta obvi-  
 nent. Et ibi glossa *verobtenent*, *c. 1 u. cap.* Nos novimus *17. quest. 2. & cap. si vir. 27. dist. 1.* & alium textum. Si vero obijcias: quod factum contra legem pro infecto habetur, *l. non dubium, Cod. de legibus*: & regula iur. *s. 1 m. 6. de Regul. iuris R. 2. l. 64.* Quæ contra ius fiunt, debent utique pro infectis haberi. Respondet Sanchez *lib. 3. de matrim. disp. 5. num. 4* in alia simili materia Tridentini: factum contra legem haberi pro infecto, quando lex statuit formam substantialem actus: secus quando ex lege colligitur, solam formam, & modum, ut recte fiat, præscribi. In citato vero *cap. 7.* non videtur Tridentinum statuere formam substantialem electionis Abbatissæ: sed solum accidentalem, ut recte fiat, id est ut matura ætate, & commodior ad regimen eligatur. Nam substantialia, quæ spectant ad electionis formam, traduntur à glossa *in cap. quia propter de elect. verb. sanior.* Videlicet ut secrete suffragia recipiantur; ut sit libera, & electus habeat excessum suffragiorum, & alia ibidem: quæ tamen in Tridentino non recensentur pro electione Abbatissæ, sed ætatis tempus quod non videtur de substantia electionis. Et proinde videtur quod facta electio de qua agimus, quantumcumque prohibita, erit tamen valida. Addo quod ibi Tridentinum, non apponit verbum *Nullatenus*, aut verbum *Omnino*, quæ duo verba apposita in lege, annullant factum in contrarium, etiam si lex non apponit verbum annullans, aut irritans, ut probat Sanchez *lib. 1. de Matrim. disput. 32. num. 6. & lib. 6. disput. 32. num. 7.* sed simpliciter, &

ter, & nude ait Tridentinum: non eligatur minor annis quadraginta.

3 Ego casum apud nullum in particulari decisum inuenio Deducendo vero dubium ex doctrina communi Doctorum inuenio ad intentum, dictum Syluestri verb. *alienatio. num. 13* vbi dicit, quod quando lex aliquid aliàs iure naturæ licitum irritat propter defectum solemnitatis præscriptæ iure tantum positio; si ipsum fiat, validum esse in foro conscientiæ donec rescindatur in foro externo. Poni exemplum in electione, in qua si concurrant essentialia electionis, qualis est maior pars electorum consentientium, &c quæ de iure naturæ requiruntur ad electionem; si aliàs electio claudicer ex defectu alicuius solemnitatis præceptæ à iure positio, electus securus est in conscientia, nec tenetur renunciare, antequam electio irritetur in foro externo. Syluestrum sequitur Reginaldus *tom. 1. sim. lib. 13. cap. 18. num. 183*. At, sicut diximus, Tridentinum non annullat citato cap. 7. electionem Abbatissæ carentis 40. annis. Nec Reginald. citato *loc. num. 184.* in casibus quos ibi assignat, aliquid dicit, quod huic nostræ doctrinæ contradicat. Ego rem non diffinios sufficiat attigisse conducentia pro dubij resolutione. Dixi tamen, si talis electio fiat bona fide: nam si scienter Monialis minor 40. annis consentiat se eligi, vel Prælati illam confirmet scienter ad minus peccabunt mortaliter, cum legem communem Ecclesiæ violent, & in re grauissima.



## CASVS XIV.

*De electione Abbatissæ factâ voce tenus, non  
per schedulas secretas.*

**Q**uidam Prælatus regularis fecit electionem Abbatissæ ad crates ore tenus, non recipiendo suffragia Monialium in schedulis obsignatis. Dubitatum fuit an talis electio valida fuerit. Et videtur quod non: nam in cap. *quia propter electi*. vbi assignatur forma substantialis seruanda in electionibus, teste glossa *ibidem*, verb. *Sanior*, iubet Papa vt vota recipiantur per scriptum. Sic enim habetur in textu: *Assumantur tres de collegio, qui secrete, & sigillatim vota cunctorum diligenter exquirant, & in scriptis redacta mox publicent*. Quibus verbis videtur præcipi quod vota dentur in scriptis, id est, schedulis obsignatis. Cui textui forte inhærens Concilium Tridentinum *sess. cap. 6. de Regular.* præcipit, vt omnis electio Abbatum Generalium, & Abbatissarum, *Fiat per vota secreta, ita vt singulorum eligentium nomina nunquam publicentur*. Ex quibus duobus textibus, Ecclesiæ vsus obtinuit, vt omnes electiones Prælatorum, & Prælatorum fiant per schedulas scriptas, & obsignatas: quod cum non fuerit seruatum in ista electione, videtur firmitate caruisse.

**I** Dico nihilominus talem electionem fuisse validam, si aliâs cetera necessaria concurrerunt. Probo ex eodem Concilio Tridentino *e. id. sess. cap. 7.* vbi expresse dicit: *Posse Episcopum, siue alium Superiorem ante cancellorum fenestellam vota singularum audire, id est Monialium*. In quibus verbis duo considero, primum est verbum,



bum, *sive alius Superior*. Vbi id non solum concedit Episcopo, quoad Moniales sibi subiectas : sed etiam cuius alteri Superiori , qui non est alius nisi Prælatus regularis in Monialibus sibi subditis. Secundum verbum quod considero , est, *vota audiant*. Audire enim est per aures percipere , non scripto recipere : verba enim legis sunt accipienda in proprio, & vsitato sensu : si ergo Episcopus, vel quivis Superior potest per solum auditum vota Monialium ore tenus in electione Prælatæ recipere, valida fuit ista electio, de qua quæritur. Et ad tollendam omnem dubitationem, Marzilla *ad cunctum cap. 6. sess. 25. Trident.* citat Declarationem Cardinalium in hunc modum : *In electione Abbatissarum vota ore tenus accipi possunt à Superioribus cum duobus testibus*. Eandem Declarationem in terminis citat Farinacius *in libro Declarationum Cardinalium ad cit. cap. 6. Trident.*

2. Neque obstant citata ex capite *Quia propter*. de electione. nec citata ex cap. 6. eiusdem *Trid.* Nam citatum capitulum *Quia propter*, cum iubet suffragia electorum redigi in scripto , non vult quod electores suum suffragium dent per scriptum, vel schedulas obsignatas : sed solum vult quod tres illi de capitulo electi, vota secreta audita ab eligentibus in scripto redigant, & scribant, ut postea certo constet de numero suffragantium, nec possit de illo oriri confusio : & hæc votorum auditio, & scriptio vult quod fiat secrete; & patet ex verbis textus ibi : *Vota exquirant*. Id est, quærant ab electoribus, cui dent suffragium, & illud scribant. Talis enim voti exquisitio non requirit schedulas obsignatas , sed percontatione verbalem in secreto. Eodem modo intelligendum est Concilium Tridentinum priori loco citatum, videlicet *in cap. 6.* quando dicit electionem Generalium, & Abbatissarum faciendam esse per vota secreta. Impri-

nis enim non dicit quod fiat per schedulas obsignatas, sed per vota secreta. Vota autem vocaliter tantum data sine scripto coram tribus illis Notario, & testibus data, sunt secreta, & manent secreta: nam quod fit à tribus tantum vel quatuor, dicitur secretum, antequam diuulgetur & publicetur, vt tradit Nauar. *in summ. cap. 18. num. 5* 2. citans Diuum Thom. Scotum, & Caietan. & tenet Sanchez *lib. 2. de matrim. disp. 37. num. 11. in fin.* Mens ergo Tridentini præcipientis vt electio Superiorum, & Abbatissarum fiat per vota secreta, teste Nauarro *in consil. 4. de elect. num. 4.* solum fuit, statuere, vt capitula facerent electiones secreto, in hunc sensum; quod non permittant fieri aliquid ex quo publicari possint nomina eligentium, & si tale quid permiserint, electio non valeat. Sic Nauar. *citato consil.*

3 Dicis, si hoc ita est. Ergo si hodie fiat electio Provincialis v.g. sine schedulis obsignatis, valebit electio contra receptam consuetudinem? Respondeo, saluo meliori iudicio, fore electionem validam, si alias seruentur supradicta essentialia, vt scilicet vota secreto recipiantur à tribus assignatis, & scripto redigantur, & nomina eligentium non publicentur. Nam vt vidimus, neque capitulum, *quia propter*, nec Tridentinum petunt vt electores dent suffragia per schedulas obsignatas, & sic talis electio ex hoc capite non claudicaret: posset tamen talis electio argui, quod fieret contra consuetudinem sine schedulis, vel contra statutum præcipiens fieri per schedulas. Tale vero statutum non posset irritare electionem factam sine schedulis, cum illam Ecclesia non annullat in duobus citatis locis: & Religio non potest facere statutum annullans electionem, in qua concurrunt omnia requisita ex iure naturali, & quam Ecclesia non annullat.

4 Tota vero dubitatio est circa Ordinem Minorum, & electiones in illo faciendas. Nam Sixtus V. in *Bulla*, qua confirmauit statuta generalia Fratrum Minorum facta anno 1587. quæ habetur in *lib. statutorum* Rebolledi, fol. 184. pag. 2. post confirmationem dictorum statutorum, Papa ex se ibi duo addidit. Primum, *Quod Abbatissæ durent per solum triennium*. Secundum, *Quod electiones Superiorum, vel Officialium, quæ per fratres celebrari debent, fiant per schedulas obsignatas*. Et post hæc addit, irritum fore & inane quidquid per quamcumque personam in contrarium fuerit attentatum. Vbi vides pro Ordine Minorum præcipi, vt omnes electiones fiant per schedulas obsignatas, & non voce tenus.

5 Circa hanc Bullam, & mandatum, ego dico imprimis in Ordine Minorum electiones Fratrum, in quibus eligendi sunt Prælati Ordinis, vt Generalis, Prouincialis, &c. electiones faciendas esse per schedulas obsignatas, vt ibi Papa exprimit, & ita praxis obseruat; idque nonobstante quod supra dixi circa alias Religiones. Potuit vero, & voluit Papa in Ordine nostro restringere, vt electiones non solum fiant secreto, iuxta Tridentinum citatum, sed etiam fierent per schedulas obsignatas, idque ad maius secretum, & pacem conseruandam, ita vt nec tres illi testes, qui vota excipiunt, & examinant, sciant pro quo suffragium ferat quicumque Religiosus. Si vero in prædicto Ordine Minorum electio Prælatorum non fiat per schedulas obsignatas, electio erit nulla, propter clausulam annullatiuam statim postam à Papa. Aliæ Religiones viderint quid speciale circa hoc habeant, & sic obseruent.

6 Dico secundo. In eodem Ordine Minorum, hodie nonobstante illa Bulla Sixti V. electionem Abbatissæ factam ad crates ore tenus sine schedulis à Prouinciali

Minorita, fore validam. Probo clare ex verbis ipsius Bullæ, cum loquitur de electionibus: Primo enim ponit, *Superiorum*. Iam vero per Superiores non intelliguntur Abbatisſæ, ſed Prælati ſuperiores Fratrum. 2. conſidero verbum, *Officialium*, ibi poſitum, quod non poteſt ſignificare Officiales Monialium, Vicariam, Iannatricem, Magiſtram Nouitiarum, & ſimiles: hæ enim nullibi apud Moniales eliguntur per ſchedulas, imo neque per totam communitatem. Tertio, conſidero verbum poſitum ibi: In electionibus *per fratres faciendas*, id eſt, quæ per ſuffragia Fratrum debent fieri, vt Prælati eligantur. At quando Abbatiſſa eligitur, non fit per Fratres ſuffragia dantes, ſed per Prælatum aſſiſtentem, & præſidentem electioni, vt patet: ergo in illa clauſula de electionibus, *per ſchedulas faciendas*, non loquitur Papa de electionibus, per quas eligendæ ſunt Abbatiſſæ: ſed de illis, in quibus debent eligi Prælati Fratrum Minorum. Vltimo probo, quia Tridentinum, vt ſupra vidimus, clare, & expreſſe concedit *cap. 7.* vt ſuperiores poſſint eligere Abbatiſſam ad crates, ore tenus vota audiendo, & proinde ſine ſchedulis: At Sixtus Quintus non dicit ſe reuocare in hoc Concilium Tridentinum, cum oporteret id exprimere ſi reuocare intenderet; ergo reliquit Concilium Tridentinum quoad hoc in ſuo robore, & firmitate. Numquam enim ſum. Pontifices intelliguntur derogare in ſuis Bullis vlli Concilio generali per reuocatorias generales niſi illud exprimant. Imo idem Papa paulo ante in confirmatione dictorum ſtatutorum dicit ſe illa confirmare quatenus ſunt licita, & honeſta, & non contradicunt ſacris Canonibus, & decretis Concilij Tridentini.

CASVS

## CASVS XV.

*De quibusdam Monialibus translatis sine  
licentia Episcopi sui Prælati.*

**I**N vno oppido, vel loco Insulæ Angræ, quidam Cō-  
uentus Monialium sanctæ Claræ subditarum Epi-  
scopo Ordinario, per ruinam, ac terremotum corruit  
à fundamentis: Moniales habuerunt tempus commo-  
dum fugiendi, & ciuitatem adeuntes constitutæ sunt  
ab Episcopo suo Prælato in domibus quibusdam sæ-  
cularibus non bene commodis ad clausuram. Interim  
dum Monasterium antiquum reædificabatur, scientes  
quod Episcopus suus Prælatus nolebat eas redire ad  
antiquum Conuentum reædificatum, impetrarunt  
Bullam à summo Pontifice, vt vbi primum nouus  
Conuentus haberet ædificia, ac officinas commodas  
ad Monialium habitationem, statim illæ ad illud redi-  
rent: & huius Bullæ executionem commisit eidem  
Episcopo suo Prælato. Cum vero per tempus iam no-  
uus Conuentus haberet officinas commodas ad illa-  
rum habitationem, & Episcopus executionem differ-  
ret, ita suspitio esset, quod id impediret propter par-  
ticulare suum intentum: illæ Episcopum quasi recusa-  
runt, vt suspectum, & ipse Episcopus causam recusa-  
tionis Regi nostro Catholico remisit. Rex per suos  
Ministros iustitiæ sæcularis in insula mandauit vt Mo-  
niales deferrentur ad suum antiquum Monasterium  
reædificatum. Ex vi istius mandati solius, aliquæ, seu  
maior pars communitalis exiuit à clausura, in qua il-  
las Episcopus suus Prælatus posuerat: & exierunt clau-  
culum.

culum sine ipsius Episcopi licentia: & contradicente Prælata ipsarum ibidem existente; & regressæ sunt ad suum antiquum conuentum via recta, cum omni possibili decentia. Aliquæ remanserunt nolentes redire, quæ discedentes variis molestiis afficiebant eo quod abirent, imo persuadebant ne ad antiquum Conuentum redirent.

Quæsitum fuit an istæ sic redeuntes ad antiquum Conuentum incurrerint aliquam censuram, eo quod violauerint clausuram, & ab illa exierint absque licentia Episcopi sui Prælati? De hoc enim postea fuerunt redargutæ, & fere accusatæ coram Collectore Apostolico.

1 Antequam respondeam ad principale quæsitum, dico has Moniales potuisse reuere ad suum antiquum Conuentum reædificatum absque impetratione nouæ Bullæ, vel licentiæ sum. Pontificis; ad quod probandum, vltra illa quæ mox dicam ex Regula ipsarum, facit ipsamet Bulla denuò impetrata ad reuertendum. Nam in ipsius narratiua, ait Papa: *Eo quod ipsæ Moniales redire nolunt absque mandato nouo Sedis Apostolica.* Non ait Papa, quod non possent Moniales regredi absque nouo mandato: sed quod nollent. Sæpius enim Breuia Apostolica, & dispensationes Papales petuntur, non pro necessitate, sed pro securitate ad tollendos scrupulos. Et hanc licentiam redeundi impetrarunt per intercessionem Regis Catholici, quia forte timebant Episcopum suum Prælatum talem regressum impedire, vel dissuadere. Et confirmatur, nam Moniales alterius similis Conuentus qui cum eodem terremotu corruerat, & ad similes domos conductas se receperant, ubi primum illarum Conuentus reædificatus est, ad illum se receperunt nulla denuò impetrata Pontificis

Pontificis concessione. Et quod sæpius summi Pontifices Ballas concedant non pro necessitate, sed pro tollendis scrupulis, tradit Nauarr. *lib. 3. consil. tit. de Regit. num. 5* § ad posterius.

2 Secundo aduerto, Concilium Tridentinum, quando excommunicat Moniales exeuntes à clausura *sess. 25. cap. 5. de Regular.* illas solum excommunicat, quæ exeunt sine licentia superioris, & sine causa, vt videri potest ibi in textu Et Pius V. in suo motu proprio qui incipit *Decoris*, pro eodem fine, easdem conditiones requirit, vt ibidem videri poterit. Et præterea est concors Doctorum sententia quod excommunicatio non incurritur nisi ob peccatum mortale, & contumaciam.

3 Hoc posito resolute dico: prædictas Moniales sic exeuntes à clausura illis assignata per suum Episcopum, non incurrisse excommunicationem eo quod exierint sine licentia sui Prælati, imo illo contradicente. Probo hoc primo ex regula istorum Monialium, in cuius *cap. 2.* Urbanus IV. dicit, quod prædictæ Moniales poterunt exire à clausura occurrente inuitabili necessitate: (qualis antea his Monialibus contigit) & exeuntes recipiantur ad locum commodum, quæ usque eis de Monasterio sit prouisum. Nota ista verba: *Quæ usque*, quæ denotant limitatum tempus quo debent manere extra Conuentum priorem; videlicet, quoad usque illis sit prouisum de Monasterio. Restituito vero priore, vel alio æquivalente, clare innuit, quod debeant regredi ad illud. Et sic Papa non solum illis concedit, vt exeant stante necessitate inenitabili, sed etiam iubet, vt data commoditate Monasterij, regrediantur ad illud. In hoc vero casu iam hæc Moniales habebant Monasterium commodum ad quod regrederen-

grederentur: ergo non indigebant licentia Episcopi ad exeundum, cum haberent mandatum Papæ, vt ad iam paratum conuentum exirent. Et quod hæc licentia Regulæ ad redeundum ad antiquam clausuram, non sit reuocata per Tridentinum, nec per Bullam citatam Pij V. probat Miranda in expositione Regulæ prædictæ *ad cap. 2. § solo resta, fol. 8* & probari etiam potest ex traditis à Nauarro *citato consilio 98. num. 3.* Cum ergo exierint cum licentia Papæ, ac suæ Regulæ, nullam incurrerunt censuram. Confirmatur hoc exemplo temporum nostrorum. Nam tempore quo classis Anglicana tentauit Olyssiponem terra, marique obsidere, multæ Moniales Conuentuum extra muros ad partes transaganas confugerunt: quæ tamen cessante, & recedente obsidione vrbs ad suos antiquos Conuentus sunt regressæ nulla alia petita licentia suorum Prælatorum. Confirmatur adhuc exemplo quotidiano. Quando subditus alicuius Prælati de illius licentia exit à Conuentu cum tempore assignato ad extramaneandum; si subditus extramaneat aliquos dies extra tempus assignatum, peccat, & punitur, vt patet: Ergo cum hæc Moniales per suam Regulam habuerint licentiam in hoc casu exeundi à clausura, solum, & limitate, vsque dum haberent commodum Monasterium: constat, quod vbi primum illud commodum habuerunt, peccarent mortaliter, si non regrederentur.

4 2. principaliter illud probo exemplo à simili posito à Rodrig. *tom. 2. qq. quest. 62. art. 19.* vbi resoluit, quod si in vno populo Vicarius generalis impediatur ne habeatur prædicatio ad populum in diebus dominicis, vel solemnibus: & iudex sæcularis è contrario præcipiat, vt habeatur sermo ad populum, standum est mandato iudicis sæcularis, non autem Vicarij, quia tunc iudex



rex ſæcularis agit pro executione Concilij Tridentini præcipientis vt talibus diebus prædicetur ad populum. Hoc idem ſuo modo contingit in noſtro caſu. Epifcopus impediebat redire has Moniales ad ſuam antiquã clauſuram præceptam à ſua Regula, & Tridentino: Miniſter Regius, & prætor ciuitatis, Ordine ſibi dato à Rege illas eduxit ex domibus illis conductis ad clauſuram iam paratam: In hoc caſu non erat parendum Epifcopo, ſed prætori, ac Miniſtro Regis procurantis vt impleretur præceptum Tridentini circa Monialium clauſuram, & præceptum Papæ poſitum in Regula ipſarum de regressu ad antiquam clauſuram: Maximèque hoc poterat Regius Miniſter procurare, quando Concilium Trid. *citat. cap. 5. de Regular. ſeſſ. 25.* Regibus ac principibus ſæcularibus iniungit curam faciendi ſeruare clauſuram in Conuentibus Monialium. Cum ergo in hoc caſu Rex interuenerit primo procurando à Papa Bullam, pèr quam illæ regrederentur ad antiquum Monasterium: Secundo exequendo prædictum reditum per prætorem ſuum Regium, non temerè, nec illicitè fecerunt Moniales reuertendo ad antiquam clauſuram, concedente Papa, exequente Rege, etiamſi proprius Epifcopus contradiceret, vel ob ſuum proprium intereſſe, vel ſuam dilationem, & etiã contradicente Prælata ipſius Conuentus, prout fertur contradixiſſe. Confirmatur adhuc hoc ipſum ex multis textibus citatis à Rodrig. *in dicto art. 19.* ad marginem, quibus probatur teneri Reges executioni mandare Apoſtolica mandata tanquam Eccleſiæ deſenſores, iuxta cap. *Administratores 27. queſt. 5. & cap. Tributum queſt. 6. diſtinct.* & hoc ſpecialiter quando Prælati particulares negligentes fuerint in eiſdem mandatis Apoſtolicis exequendis: Nam tunc poterit Rex Prælatorum

torum negligentiam supplere, vt potest etiam clare videri in Decretalibus toto titulo de supplenda negligentia Prælatorum. Et in particulari Rex noster in hoc casu habebat mandatum à Concilio Tridentino procurandi vt Monialium clausura seruaretur, quæ in domibus conductis istarum Monialium periclitabatur, vt dicitur.

5. Tercio principaliter probatur à simili *ex cap. licet. de Regular.* vbi Papæ Innocent. III. ait, quod Religiosus, qui zelo melioris vitæ voluerit transferri de vna Religione laxiori ad aliam strictiorem, petat primo licentiam à suo superiore, cui superiori Papa commendat vt illam det. Et quando Prælatus denegauerit, concedit Papa vt Religiosus ad illam strictiorem Religionem se transferat etiam non obtenta tali licentia iam petita: quia in tali casu iam hoc facit de licentia Papæ: & causam ibi assignat summus Pontifex. Nam priuilegium meretur amittere, qui sibi concessa abutitur potestate. Quæ optime applicantur ad intentum. Nam hæ Moniales existentes in laxiori, & periculosa clausura, petierunt licentiam à suo Episcopo, & à sua Prælata eundi ad arctiorem, & securiorem suam clausuram iam paratam: Episcopus, & prælata denegarunt: ergo iam licite exierunt cum licentia Papæ, & regulæ suæ vt in præcedentibus manet explicatum. Et hoc maxime locum habet, quando in hoc casu Episcopus, vt fertur, iam viderat, & approbauerat ædificium, & officinas noui Conuentus, illas iudicans aptas ad clausuram: & proinde sine causa videtur negasse licentiam translationis.

6 Quarto, quia si hæ Moniales sic exeuntes incurrerunt excommunicationem, etiam illam incurrerunt prætor regius, Religiosi, & sæculares nobiles easdem  
tunc

tunc constantes: nam Bulla Pij V. hos omnes comitantes, & fauentes excommunicat. At Episcopus nullum horum pro tunc censuit excommunicatum: ergo nec Moniales exeuntes tali censura innodatae fuerunt. Facit etiam ad hunc exitum releuandum à culpa, id quod dicitur, has Moniales exeuntes multis vexationibus afflictae antea fuisse ob hanc causam ab aliis exire nolentibus: Nam vt ait Rodriguez *tom. 1. qq. Regul. quest. 30. art. 2.* Si Religiosus in aliquo Conuentu afficitur notabili grauamine iniuste, & ad vitandum tale grauamen, exit, & recurrit ad superiorem Prælatum, non peccat, & non est apostata, quia redimit suam vexationem: & est fere communis recentiorum opinio.

7 Quinto. Ad excusandas has Moniales à censura facit, quod illæ bona fide fecerunt, putantes se ad id teneri; & fecerunt ob mandatum Regis exequentis mandatum Papæ: & proinde non peccarunt mortaliter. Vbi vero non est peccatum mortale, nulla incurritur excommunicatio, vt communis Theologorum sententia testatur. Et ex superabundantia videri adhuc potest Sanch. 1. *tom. Decalogi lib. 1. cap. 10. num. 42. § 2.* vbi cum multis Doctoribus citatis, dicit quod in dubio facti non est censendus excommunicatus, qui aliquid fecit apparens contra legem. At in isto casu saltem est dubium facti; videlicet, an hoc factum, sic factum à Monialibus, fuerit factum contra legem clausuræ. Et nos probauimus non fuisse factum contra legem, imo factum fuisse secundum legem regulæ suæ, Tridentini, & Bullam Pij V.

8 Hinc sequitur prædictas Moniales sic exeuntes non fuisse absoluendas etiam nec ad cautelam: Nam absolutio ad cautelam non solet dari nisi quando est

grauis suspitio, quando censura fuerit incussa: In hoc vero casu non potest esse grauis suspitio quod incur-  
rerint. Quod etiam probatur ex praxi Tribunalis san-  
cti Officij, in quo teste Penha in suo directorio à fol.  
486. & seqq. non absoluuntur à censura hæresis qui  
sunt de illa suspecti, leuiter, vel vehementer solum:  
sed illi qui sunt de hæresi suspecti per præsumptio-  
nem violentam. In hoc vero casu non fuit violenta,  
nec vehemens præsumptio contra has Moniales, imo  
nec leuis suspitio quod censuram incurrerint ob tor  
probationes adductas: ergo non indiguerunt absolu-  
tione ad cautelam. Et confirmatur, quia violatio clau-  
stræ est exire à clausura ad non clausuram, vt patet:  
At istæ Moniales exierunt à non clausura, id est domi-  
bus secularibus, ad clausuram iam approbatam ab eo-  
dem suo Episcopo, qui officinas noui conuentus ap-  
probauerat: quod si ille licentiam petitam negauit, fa-  
cit optimè, & vltimo pro Monialibus excusandis casus  
in cap. 1. de supplenda negligentia Prælatorum, vbi  
Papa concedit Religiosis Cisterciensibus, quod si illi  
vocauerint Episcopum Diocesenum vt accedat ad il-  
lorum Ecclesiam consecrandam, & Episcopus ter ro-  
gatus, non venerit, tunc prior Conuentus Ecclesiam  
consecrare poterit, cum alias de iure non posset. Et no-  
tat ibi glossa *verb. aliam*, id Papam commisisse Priori in  
odium Episcoporum, ne propterea Monasteria pate-  
rentur detrimentum in spiritualibus, & in aliis. Quod  
etiam potest applicari ad nostrum casum, in quo Mo-  
niales ob petitam licentiam ab Episcopo reuertendi,  
& negatam, patiebantur periculum in spiritualibus,  
& temporalibus ob incommodas domus, à quibus  
emnerunt.

¶ Vnum tantum restat argumentum pro maiori cla-  
ritate,

ritate, quod est huiusmodi. Constat ex praxi, & Doctoribus recentioribus, quod quando Papa committit alicui Episcopo vt dispense in certa causa, v.g. in impedimento matrimonij, factio prius examine narrationis factæ coram summo Pontifice, persona quæ dispensationem petit, licet talem delegationem factam Episcopo impetrauerit, non manet secuta, nec dispensata, quoad vsque Episcopus causa cognita sententiã proferat, & concessionem Apostolicam executioni mandet. Nam, ante talem concessionem gratia Papalis nondum est facta, sed fienda. De quo inter alios vide Sanchez lib. 8. de Matrim. disput. 25. num. 8. sed in nostro casu, Papa per Bullam suam delegauit Episcopo regressum, & translationem harum Monialium ad antiquum Conuentum: & Episcopus executor Bullæ nondum sententiam tulerat, nec Bullam executioni dederat; imo negauerat licentiam: ergo non videntur Moniales secute fecisse transitum antequam Episcopus Bullæ executor, & delegatus Papæ licentiam concederet, & Bullam executioni mandaret. Ad hoc argumentum dico, disparem valde esse rationem in petente à Papa dispensationem in impedimento matrimonij, & in istis Monialibus quando petierunt à Papa licentiam reuertendi ad nouum Monasterium. Nam petens à Papa dispensationem impedimenti matrimonij, petit illud pro necessitate omnimoda, quia si talis dispensatio non interueniat, peccabit mortaliter contrahendo: & ideo si contrahat antequam Episcopus expediat litteras Apostolicas, & peccat, & nulliter facit, quia nondum habet licentiam ad contrahendum. At quando Moniales istæ petierunt nouam licentiam à Papa regrediendi non petierunt illam pro necessitate, sed pro tollendis scrupulis, vt supra diximus & vt per

Breue Apostolicum Episcopus suus renuens, moueretur ad talem licentiam concedendam. Quamuis ergo Episcopus nondum Bullam Apostolicam expedierit, nec executioni mandauerit, illæ reuertentes non fecerunt id absque licentia Papæ, iam enim hanc habebant ex Papa Urbano, qui vt diximus in *cap. 2. Regule*, illas obligat ad regressum ad antiquum Monasterium cessante necessitate ab quam exierant. Et Episcopo indebite negante regressum poterat Epicheia interpretari licitum esse regressum ob tot, ac tantas, & efficaces rationes pro Monialibus in præcedentibus adductas.

## CASVS XVI.

*De congregatione quorundam hominum sub forma Tertiariorum P. nostri Francisci.*

**I**N Insula Angræ, duo sacerdotes se receperunt ad quandam sacram ædiculam, siue oratorium in campo. Ibi existentes cæperunt sibi alios aggregare vsque ad numerum duodenarium, & cæperunt viuere sub titulo Tertiariorum Diui Francisci, cum habitu & veste distincto, non omnino religioso, sed honesto in colore fusco, qui Lusitane dicitur (pardo) non cum cucullo, nec cum mantello religioso, sed cum pallio sæculari, qui dicitur (ferragoilo) eiusdem coloris honesti. Hoc institutum dixerunt se incæpisse de licentia Prouincialis Tertiariorum, qui in Portugallia viuunt in congregatione ex approbatione Sedis Apostolicæ. Quo nonobstante in eadem Insula dederunt obedientiam

tiam Prælato ordinis Minorum, de Obseruantia, qui in illa Insula vocatur Custos Conuentuum Obseruantia, postea dederunt obedientiam Episcopo illius Insulae Sic continuantes recipiunt Nouitios cum anno nouitiatus: Quo finito admittunt illos ad tria vota solemnia, sicut fieri solet in omnibus aliis Religionibus. His suppositis, exorta sunt multa dubia, quorum resolutio, non solum iuuabit ad præsentem casum, sed alios similes viuentium in congregatione siue sint fœminæ, siue masculi.

I Et antequam per conclusiones respondeam: Suppono quod in Ordine Minorum tres sunt classes Tertiariarum. Primus est, quem instituit P. N. Franciscus, qui non emittunt tria vota essentialia, sed solum se obligant ad seruanda decem mandata Decalogi, manentes in domibus suis, siue sint vxorati, siue cælibes. Et hi proprie non sunt personæ Ecclesiasticæ exemptæ, sicut ait Collector priuilegiorum Mendicantium, & Rodrig. mox citandi. Secunda classis est illorum, qui viuunt in congregatione, & emittunt tria vota essentialia in manu Prælati, iuxta regulam illis præscriptam à Leone X. quorum multi Conuentus, & prouinciæ sunt in Hispania, & præcipuè in Portugallia, Olyssipone, Viennæ, Vimierio, &c. Hi autem sunt veri Religiosi, & personæ Ecclesiasticæ exemptæ, & gaudent priuilegiis concessis Fratribus Minorum de Obseruantia. Tertia Classis Tertiariarum est eorum qui viuunt in aliqua heremo, vel aliqua Ecclesia, sed non emittunt vota, nec professionem; sed receperunt habitum Tertiariarum de manu alicuius Religiosi Franciscani, vel illi per se illum assumpserunt. Et hi nullo modo sunt Tertiarij vere, sed fictitie. Hæc omnia traduntur in terminis à Collectore priuilegiorum Men-

dicantium, qui fuit vir doctissimus, in compendio *verbo* Tertiarij Fratres, statim post §. 25. & seqq. & Rodrig. tom. 3. 99. *Regular. quest.* 72. art. 1. Quo supposito. Elicio sequentes conclusiones.

2 Prima conclusio. Hi Tertiarij illicitè, & iniuste omnino fecerunt post datam obedientiam Prouinciali Tertiariorum Olyssipone, subiiciendo se secundo Prælato Minorum Observantiæ in Insula Custodi vocato: Imo & post datam obedientiam prædicto Custodi, iniquius fecerunt subiiciendo se Episcopo, constat clare: quia subditus vnus Prælati non potest se subtrahere ad libitum ab obedientia huius Prælati; id enim imprimis maximam in Ecclesia Dei causaret confusionem, & præterea speciem haberet furti, & grauaminis notabilis, quod fit illi Prælato à cuius obedientia subtrahitur, & in hoc casu potest habere locum dictam D. Gregorij in Epistola ad Venetium Monachum apostatam, in qua dicit illum per apostasiam, non subtraxisse numos pecuniarios, sed subtraxisse se Deo, & Ordini cui se deuouerat. Hinc colligitur non potuisse licitè Episcopum Angrensem horum obedientiam tertio acceptasse, si sciebat illos antea duobus Prælatis regularibus fuisse subiectos.

3 Secunda conclusio. Hi Tertiarij supposito quod viuunt hodie in congregatione cum tribus votis solemnibus, non possunt obedire Episcopo, sed tenentur obedire Generali, & Commissario generali Ordinis Minorum, & illi Prouinciali Tertiariorum Portugallicæ, qui illos primo recepit, vnde non possunt obedire Episcopo. Probatum clare ex Bulla Pij V. posita in Bullario Rodrig. fol. 671. in qua Papa prædictus primo facit subditos Generali, & Commissario generali Ordinis



nis Minorum omnes Tertiarios viuentes in congregatione cum tribus votis solemnibus: & statim post idem Summus Pontifex præcipit eisdem Tertiariis in virtute S. obedientiæ, vt obediunt prædictis Prælatiis Minorum de Obseruantia. Idem præceperat antea Sixtus IV. cuius verba refert Rodrig. *cit. quest. 72. art. 1. conclus. 3.* Cum ergo Summi Pontifices iubeant, vt Tertiarij viuentes in congregatione obediunt Prælatiis Ordinis Minorum, non possunt isti obedire Episcopo, à cuius iurisdictione Ecclesia illos eximit, & Prælatiis Minorum subdit. Constat idem ex Papa Leone X. qui statuit regulam pro Tertiariis viuentibus in congregatione cum votis solemnibus, quæ habetur in Capuccino *in fine Compend. fol. 43.* In cuius regulæ *cap. 5.* dicit Papa quod obediunt Prælatiis localibus Minorum. Ultra hæc vero trium Pontificum decreta, constat iam de possessione: nam vt dicitur in informatione, iam in principio Prælati Minorum possederunt obedientiam fundatorum duorum istius Conuentus: ac proinde ratione saltem contractus non potuerunt exire ab obedientia dictorum Prælatorum Prouincialis, & Custodis. Idem tenet Collector priuilegiorum & Rodrig. *cit. locis,* & Miranda *in Explicat. Regula Tertiariorum. cap. 7.* Ex quibus inferitur non potuisse Episcopum acceptare obedientiam, & regimen illorum, quos tres Summi Pontifices Prælatiis Minorum subiecerunt. Ex quibus Pius V. in citata Bulla constituit executorem illius, Cardinalem protectorem Ordinis Minorum, eidem iniungens, & concedens, vt per censuras procedat contra impedientes ne dicti Tertiarij obediunt prædictis Prælatiis Minorum.

4 Obijcis. Hi Tertiarij non portant habitum Tertiariorum viuentium in Portugallia, portantium habi-

tum cum caputio, siue cucullo, & mantello Religioso. imo hi portant habitum in forma ferè seculari, ac proinde non videntur comprehendi in illa Bulla Pij V. Secundo obiicis, quod in Portugallia sunt Conuentus Monialium Tertiariarum, quæ obediunt Episcopo, vt constat ex monasterio Saluatoris Eboræ constituto, & alio ædificato in oppido dō Torraño, quæ sunt Tertiariæ viuentes in cōgregatione cum tribus votis solemnibus, & tamen subduntur Archiepiscopo Eborensi: sic ergo poterunt isti, de quibus est quæstio, obedire Episcopo Angrensi. Non obstant: nam licet isti Tertiarij non portent habitum cum caputio, nec mantellum Religiosum, non ideo desinunt esse subditi Prælati Minorum. Nam illi tres summi Pontifices in tribus citatis Bullis, non specificant, neque assignant peculiarem formam habitus talium Tertiariorum, solum exprimunt si viuunt in congregatione cum tribus votis solemnibus: idque in particulari constat ex Regula facta à Leone X. pro his Tertiariis viuentibus in congregatione; nam *cap. 6.* eiusdem Regulæ loquens de vestitu illorum, ait: *Depositis cæteris vanis huius sæculi ornamentis, nullum ornamentum corporale portare debent, nisi solum humile, & necessarium ornamentum corporis sui.* Nihil aliud loquitur de illorum vestitu: & proinde illius forma relinquitur dispositioni Prælatorum, vel consuetudini prouinciæ. Itaque vt tales Tertiarij subdantur Prælati Minorum solum requiritur quod viuant in congregatione cum tribus votis solemnibus. Quod si adhuc velis hos Tertiarios, eo quod portent habitum distinctum à Tertiariis Ordinariis viuentibus in congregatione in Portugallia cum caputio & mantello religioso, non esse de istorum classe, vel de istorum ordine; habes contra te fortius argumentum; nam inde conuincitur

conuincitur hos Tertiarios non esse Tertiarios, nec posse manere in isto statu: quia non sunt Tertiarij ex aliqua classe illarum trium, quas diximus in principio *num. 1.* Non enim sunt ex prima classe, cum hi nec viuant in congregatione, nec emittant tria vota solemnia: nec sunt ex secunda classe, per te, quia licet viuant in congregatione cum tribus votis non portant habitum cum caputio, & mantello, vt ceteri in Portugallia viuentes in congregatione. Non sunt tertiæ classis, quia hi nullam professionem, aut votum emittunt: ergo cum nullius classis sint ex illis tribus, erit Religio noua, & proinde nullo modo licita, cum iuxta *cap. fin. de Religiosis domibus*, nulla noua Religio possit erigi absque particulari licentia Sedis Apostolicæ. Et idem habetur in *cap. unico eodem tit. in 6.* Imo per hoc 2. capitulum in 6. hi Tertiarij cum noua ista forma habitus videntur prohiberi: ibi enim non solum Papa prohibet erectionem nouæ Religionis absque speciali licentia Papæ, sed etiam ne habitum nouæ Religionis, quis assumat.

5 Ad secundam obiectionem de Monialibus Tertiariis subiectis Episcopo. Respondet Rodrig. *citat. quasi. 72. art. 1. concl. 3.* dicens hos conuentus Monialium Tertiariarum Episcopis subditarum, illis esse subiectos, quia fratres Minores illarum regimen à principio acceptare noluerunt In cuius probationem facit, quod semper à principio foundationis harum Tertiariarum impetratur licentia summi Pontificis vt illæ Episcopis subdantur. Et hoc saltem constat de Monasterio Tertiariarum Saluatoris Eborensis, quod olim fuit subiectum Prælati Minorum Conuentus Eborensis, vt constat, & ego vidi in libro antiquo manuscripto, in quo continentur aliquæ antiquitates il-

lius Conuentus Fratrum Minorum Eborensis. Vbi dicitur Sorores illas Tertiarias ante Tridentinum in suo Conuentu solitas venire ad capitulum culpam intra Conuentum Fratrum pro illis celebratum in singulis hebdomadis. Et proinde argumentum non concludit: diuersa enim ratio est Monialibus Tertiariis, & in Fratribus Tertiariis uiuentibus in congregatione cum tribus votis: nam Papa Pius V. exprimit Fratres hos Tertiarios vt sunt subditi Prælati Minorum: Nihil vero loquitur de Monialibus Tertiariis.

6. Quæ hæcenus dicta sunt de his Tertiariis emittentibus tria vota, intelligo de votis solemnibus; de his enim sic vouentibus solemniter intelliguntur prædictæ Bullæ Pontificum. Nam si in ista congregatione non emittunt vota solemnia, sed solum vouent seruare mandata Dei, sicut Tertiarij à P. N. Francisco instituti, tunc sibi contradicunt viuendo in congregatione, nam Pater noster Franciscus non instituit primos illos Tertiarios primæ classis vt uiuerent in congregatione, sed vt manerent in propriis domibus etiam vxorati, qualis fuit sanctus Ludouicus Rex Gallie, sanctus Elzearius Comes Ariani, & alij; ac proinde isti non possunt viuere in communitate si solum vouent eo modo quo Tertiarij primæ classis. Quod si vouent tria vota solemnia debent subiici Prælati generalibus Minorum iuxta tres Bullas Pontificias citatas. Addo, quod licet hi Tertiarij solum voueant, & faciant professionem illius voti, quod emittunt Tertiarij primæ classis instituti à N. P. Francisco, adhuc super illos Prælati Minorum habent superintendentiam, vt videlicet possint, & debeant illis consilia bona dare, illos dirigere, obiurgare &c. ob aliquas concessionem Papales, quas citat Miranda citato cap. 7. in expositione regulæ ipsorum.

ipforum, quam ſuperintendentiam ait non eſſe iuriſdictionem proprie dictam, cum non detur ad puniendum: ſed eſſe quandam ſuperintendentiam gubernatiuam, quam ibi dicit non poſſe illis auferri ab Episcopis ſecundum citatas ibi à ſe Bullas.

7 Secunda conſuſio. Si iſti Tertiarij, de quibus eſt quæſtio, ſolum faciunt profeſſionem communem aliorum Tertiariorum, primæ claffis ſine tribus votis ſolem nibus, non gaudent aliquo priuilegio conſeſſo à ſummis Pontificibus Ordinis Fratrum Minorum: nec liberantur à ſoluendis decimis, vel à ſoluendis tributis, ſicut tradit Collector priuilegiorum citato loco, & Miranda citato libro ſuper Regulam ipſorum *cap. 11.* & Cordoua ad citatum verbum Tertiarij in compendio, & alij.

8 Tertia conſuſio. Si conſtiterit quod ille qui eſt hodie Prælatus; & fundator iſtius noui Conuentus, non fecit profeſſionem iſtiusmet Regulæ in manu Prælati potentis illum admittere ad talem profeſſionem, profeſſiones cæterorum, quas admittit fuerunt nullæ, & irritæ. Probo, quia nullus poteſt ad profeſſionem aliquem admittere, niſi qui ſit Religioſus illius Regulæ, vel habeat iuriſdictionem delegatam ad id faciendum ab illo qui illam poſſit delegare: ſicut tradit Nauarr. in conſiliis titul. de Regul. conſil. 18. & in conſilio 62. vbi citat *cap. ad Apoſtolicam de Regul.* & clarius hoc habet Sanchez tom. 2. Decal. lib. 5. *cap. 4. num. 74.* vbi cum multis ibi citatis tenet, quod nec Episcopus poteſt valide ad profeſſionem aliquem admittere, ita vt profiteus obligatus maneat, niſi fuerit in Conuentu Monialium, cuius ipſe Episcopus eſt Prælatus. Vnde ſi Episcopus, de quo agitur, non erat Prælatus iſtorum Tertiariorum per ſupra allegata, nec poterat illos

illos ad professionem admittere: & præterea illi non habebant commissionem à Prælati Minorum ad recipiendos Nouitios, dandâque professionem; sequitur quod quidquid ab illis attentatum fuit in receptione, & professione fuit nullum. Et confirmatur, quia si primus Prouincialis Tertiariorum Olyssipone illos duos priores recepit ad habitum, idemque fecit postea cunctos Prælati obseruantia in insula, talis receptio ex vsu, & praxi solum continet, quod illos recipit ad habitum Tertiariorum primæ classis, quos instituit P.N. Franciscus, etiam coniugatos: non autem prædicti duo Prælati per illam receptionem ad habitum Tertiariorum illis commiserunt vt possent ædificare Conuentum, & Nouitios recipere ad viuendum in Congregatione cum tribus votis solemnibus: imo neque id poterant illis concedere; cumque neque id posset illis Episcopus concedere per supradicta, iudicandum est illos non valide fuisse professos, neque esse tutos in conscientia. Addit Sanchez proxime citato loco, non posse Episcopum aliquem ad professionem admittere, quia non est Prælati Religiosorum; nam omnes Religiosi hodie ferè exempti sunt.

9 Quarta conclusio. Aliud inauditum, & absurdum continet iste casus; quod scilicet iste Prælati localis noui Conuentus (imo non Prælati) recipiat Nouitios ad ordinem, & professionem, quod est contra praxim omnium Ordinum Mendicantium, maxime Minorum, in quibus Nouitiorum receptio interdicitur Prælati locali, & reseruatur Prouinciali. Pro quo facit optime casus positus à Rodriguez in suo Bullario fol. 1017. & seqq. vbi ponit Bullam quandam Greg XIII. in cuius tempore contigit casus omnino similis: Nam quidam Matheus secessit in eremum cum aliis sociis:

Ibi

Ibi fecerunt vnā formā Monasterij, in quo viuebant. Iste Matheus functus est officio Abbatis sine ordine Sedis Apostolicæ, vel alterius Prælati potentis illum creare Abbatem. Isto mortuo successit illi in officio alter Didacus, & admittebant alios ad professionem. Re cognita, & detecto errore, consultus Papa Gregorius XIII. suppleuit defectum; creauit legitimū Abbatem, iussit ratificari professiones, eosque subiecit Ordini Sancti Basilij, & assignans ibi Papā causā, ait: *Cum autem Eremita iisdem prædictam professionem in manibus eius, qui illam recipiendi facultatem non habebat emisserint, eademque professio nulla, & inualida reddatur, &c.* Vbi vides similem omnino casum isti nostro: ac proinde hunc casum iuxta illum esse restaurandum, ac prouidendum.

10 Ex his concludo, quod si isti Tertiarij emittunt tria vota solemnia, prout dicitur in informatione, non possunt obedire Episcopo iuxta tres Bullas Pontificias citatas. Si vero non emittunt tria vota solemnia, non possunt viuere in congregatione, propter aliam Bullam expressam Pij V. positam à Rodriguez in suo Bulario fol. 244 ubi expresse Sum. Pontifex prohibet ne in congregatione qualibet hodie congregentur viri nisi emisserint tria vota solemnia, quæ Bulla citato loco videri potest. Quod decretum non comprehendit fœminas viuentes in congregatione sine tribus votis solemnibus, quales sunt aliquæ Olyssipone, & alibi, quæ dicuntur Lusitanæ, *Recolhimentos*: quia in illis sic viuentibus non concurrunt inconuenientia, quæ dantur in viris viuentibus in congregationibus sine illis tribus votis solemnibus.

## CASVS XVII.

*De alienatione cuiusdam rei, Ecclesiæ Monialium  
relictæ, cum obligatione non alienandi.*

**Q**Uædam Regina Portugalliæ fundauit quendam Conuentum Monialium, cui donauit in vita, & in morte aliquas res preciosas mobiles, simulque impetrauit Bullam à Summo Pontifice tunc regentē Ecclesiam, per quam iubebat, ne Moniales præsentēs & futuræ dicti Conuentus, vnquam rem vllam ex illis sibi relictis alienarent, venderent, seu distrahereut. Inter res istas sic donatas & relictas, erat vna argentea magni pretij, *vulgo portapaz*, cum qua olim in Missa post Agnus Dei, dabatur pax Sacerdoti, & erat grandioris maiestatis, & quantitatis. Postea Conuentus fecit aliam minorem pro vsu quotidiano. Denique post caeremoniale Noui Missalis, prædictum instrumentum pacis dandæ, & caeremonia illa in Missa sublata est. Voluit Conuentus Monialium prædictam portapaz, vendere, & alienare, & ex pretio illius aliam rem mobilem comparare pro seruitio altaris, & veneratione sanctissimæ Eucharistiæ. Idque volebat, tum quod dicta portapaz iam non poterat seruire in ministerio Missæ propter illius vsum sublatum, tum quod Conuentus aliam iam commodiorem habebat: tum denique quia illa à Regina donata præ sua maiestate, & pretiositate Conuentui pauperum Monialium non congruebat. Et declaratur, quod prædicta Bulla Papalis à Regina impetrata, nullam censuram, aut pœnam spirituales imponere Monialibus, si alienarent, sed solum annullabat alienationem, vel distractionem rerum



rum prædictarum à Monialibus factam, vel attentatam.

I Quæsitum fuit, an hodie nonobstante prædicta Bulla prohibitiua, possent Moniales prædictum instrumentum pacis dandæ alienare, ac vendere, & ex pretio illius aliam rem fixam, & perpetuo mansuram pro obsequio eiusdem altaris, emere, vel fabricare: Respondi id potuisse Moniales facere, seruatis tamen aliis conditionibus in iure requisitis; vt scilicet fiat cum consensu prælati illius Conuentus, & cum consensu maioris partis Capituli Monialium. Et eiusdem meæ opinionis fuit alius vir satis Religiosus, & doctus, qui huic meæ opinioni subscripsit, propter rationes sequentes, Primo, cessante fine legis cessat lex: cap. *cum cessante, de appellat. & l. fin. ff. de hered. instit.* Nauarum *consil. tit. de sentent. excom. consil. 57.* Suarez *lib. 6. de legib. cap. 9. num. 11.* At in hoc casu cessauit finis Fundatricis, & finis Papæ, fundatrix enim intendit rem illam donare vt seruiret in altari, quæ hodie non potest seruire propter caeremoniam illam ab Ecclesiâ sublatam: ergo cessante illo fine Fundatricis; & Papæ, iam hodie voluntas illa Reginæ, & Papæ non videntur obligare, cum non sit congruum prædictas Moniales rem habere pro sola ostentatione, & aliâ inutilem. Secundo, quia pœna annullationis imposita in hac Bulla, non magis obligat, quam pœnæ suspensionis, & excommunicationis positæ in iure communi contra indebite alienantes bona Ecclesiæ, vt patet: imo pœnæ istius Bullæ videntur mitiores, quia sunt lex positua vnus tantum summi Pontificis, illæ vero positæ in iure communi, ex eo videntur grauiores, quia positæ in iure communi, & vt plurimum positæ per Concilia generalia siccelesiæ: At constat ex iure, & ex  
communi

communi Doctorum sententia posse alienari res Ecclesiæ, etiam immobiles concurrente debita solemnitate, si alienatio fiat in maiorem vtilitatem Conuentus, per multos textus ad hoc recitados à Rodriguez *tom. 1. quest. Regula. q. 27. art. 2.* quos citat ad marginem, & hæc alienatio fuit clarè in maiorem vtilitatem Cõuentus, vt constat: ergo licitè potuit fieri. Tertio, magis obligat votum simplex factum Deo, quam obliget lex positiua Papæ, cum votum obliget de iure naturali, lex autem Papæ obligat tantum de iure positiuo: At potest vnusquisque habens obligationem voti, per se solum illud commutare in rem euidenter meliorem absque alia dispensatione, vt tradunt communiter Doctores, maxime Sanchez *tom. 1. Decal. lib. 4. cap. 49. num. 4.* vbi pro eodem citat vltra viginti Doctores: ergo etiam Conuentus in hoc casu poterit hanc obligationem positam à Fundatrice de re ista conseruanda, commutare, vendendo illam, altari omnino inutilem, & emendo aliam euidenter vtilem pro seruitio eiusdem altaris.

2 Obijcis contra hoc argumentum, non valere similitudinem voti, & legis positiuæ obligantis. Nam si ego omitto facere rem iniunctam à lege, licet faciam tunc aliam rem meliorem, non impleo legem, sed peccatum committo omissionis, vt facile erit exemplis ostendere: ergo non valet exemplum per se commutantis votum in rem clare meliorem, cum id fundetur in benigna Dei voluntate, quæ sic præsumitur acceptare. Ad hoc argumentum dico, etiam in obligatione iustitiæ, ac restitutionis locum habere quod diximus, vt scilicet satisfiat obligationi restitutionis, si pro vna re debita reddam aliam diuersam meliorem, vel æquiualentem. Nam si abstuli vinum à Petro, impleo præceptum

ptum restitutionis reddendo pecuniam æquiualentem vel abundantiorē. Item si abstuli triticum, & reddo vinum, cum quo creditor conuentus est satisfacio dando rem diuersam. Cum ergo alienatio ista, de qua agitur, pertineat fere ad materiam iustitiæ, sequitur quod satisfiet præcepto posito à Regina de non alienando, dando, & substituendo rem aliam meliorem, quam Fundatrix & Papa certissime acceptarent, si viuerent, & id scirent: neque Fundatrici infertur damnum, sed commodum; quinimo nec Summo Pontifici contradici videtur, ille enim in illa prohibitione solum voluit se accommodare piæ, ac rectæ intentioni Reginæ, quæ non debuit velle Monialibus res inutiles relinquere, nec impedire vt commodiores res pro cultu diuino emerentur.

3 Quarto, id ipsum confirmo ex alia doctrina tradita à Doctoribus in materia de voto, maxime à Sanchez citato 4. lib. *Decal. cap. 2. num. 24.* qui dicunt, quod quando materia voti facta est inutilis, vel indifferens, cessat obligatio voti: sic ergo in casu præsentis, cum materia istius donationis facta à Fundatrice, & materia legis Pontificiæ sit facta inutilis, eo quod res ista non possit amplius ad aliquid seruire, sequitur quod cessabit obligatio posita à Papa, & à Fundatrice. Quinto, id probatur, quia hæc Moniales gaudent priuilegio concessio à Sixto IV. Fratribus Minoribus, qui sunt Prælati illarum, per quod priuilegium Papa concedit, vt legatum illis relictum pro vno vsu possunt de licentia Prælati conuertere in alium vsu, vt habetur in *Compend. Mendic. verb. Legatum. §. unico*, cum declaratione ibi posita. Ergo cum licentia sui Prælati poterunt facere hanc alienationem, dummodo pretium rei venditæ conuertatur in alium vsu rei permanentis, & altari

perpetuo deferuituræ. Sexto, facit priuilegium, quod ego cito in meo primo tomo *Dubiorum Regul. verb. Alienatio, num. 5.* vbi Benedictus XIII. concessit patribus D. Ieron. vt possint alienare res immobiles Conuentus cum conditionibus ibi positis, dummodo non sint datæ à Regibus pro fundatione Conuentus. Vbi concedit posse alienari res immobiles, excepto si sint immobiles datæ à Regibus, & pro fundatione Conuentus. Cum ergo res ista, de qua agitur non sit immobilis, nec data pro fundatione Conuentus, sequitur posse illam alienari in maiorem vtilitatem Conuentus: quod probatur ex communi maxima Iuristarum dicente, quod exceptio firmat Regulam; cum ergo illic Papa solum excipiat ne alienentur res immobiles datæ à Regibus, sequitur quod permittit alienari mobiles datas ab eisdem Regibus.

4 Ultimo probatur, quia Moniales sanctæ Claræ, (de quarum numero sunt hæ de quibus agitur) habent priuilegium, vt cum licentia Prælati, & consensu maioris partis Conuentus possint alienare bona immobilia in maiorem, & euidentem vtilitatem Monasterij, de quo Rodrig. *citato art. 2. §. Inferitur 2* Ergo bene poterunt hæ Moniales alienare hanc rem, de qua quæritur, cum sit mobilis, & proinde facilius possit distrahi secundum iura. Quod si dicatur in hac Bulla, de qua agimus, Papam hoc prohibuisse vtens clausula, ex certa scientia, quæ rigidior est, & magis reuocatoria: Respondeo hanc Bullam datam fuisse octoginta ab hinc annis: & ab illa ætate vsque ad hanc, multi summi Pontifices confirmarunt nostra priuilegia ex certa scientia; qui modus confirmandi priuilegia reualidat etiam priuilegia antiqua annullata, vt ego probo in meo primo tomo *Dubior. Regular. ver. priuilegij confirmatio,*

firmatio. Et vltra hoc, post illam Bullam multi sum Pontifices concesserunt priuilegia aliquibus Ordinibus, vt possent alienare res immobiles in maiore vtilitatem Conuentus: pro quo vide à me dicta citato primo tomo, & verbo alienatio per totum titulum. Et vide etiam Rodrig. tom. 1. qq. Reg. quest. 27. art. 2. de concessione postea facta Monialibus Ordinis sancti Augustini.

§ Vltra has probationes, adduco duo exempla in praxi. Nam, me petente, quidam Collector Apostolicus in hoc Regno declarauit, quod Moniales istiusmet Conuentus poterant vendere quandam Biblyothecam Latinorum librorum relictam ab eadem Regina Fundatrice eidem Conuentui: quæ quia inutilis omnino erat Conuentui, declarauit idem Collector quod venderetur, & pretium illius conuerteretur in rem fixam, & perpetuo duraturam in eodem Conuentu. Et sic factum est. Deinde post aliquot annos me etiam petente, alius Collector huius Regni declarauit posse Moniales alterius Conuentus de Sacauem prope Olyssiponem siti, vendere quosdam pannos preciosos, & æstimabiles, inseruientes pro ornatu patietum, qui dicto Conuentui pauperi, erant inutiles, & temporis longæuitate putrescebant, declarauit inquam illos posse vendi, dummodo pretium eorum conuerteretur in rem permanentem Conuentus. Et in hoc secundo casu fundator Conuentus obtinuerat aliam Bullam Papæ rigidiorē, prohibentem sub grauibus pœnis ne donata ab illo illi Conuentui distraherentur, vel alienarentur. Et iterum aduerto prædictos duos Collectores in illis duobus casibus non fuisse vfos dispensatione Apostolica: Nam mihi dixit Auditor prioris Collectoris, non posse Collectores huius Regni di-

spensare in Bullis Pontificiis. Fecerunt ergo illi prædicti Collectores declarando legem, & non dispensando.

6 Adhuc pro maiore firmitate primi argumenti positi in principio: quod cessante fine legis cessat lex, Monito ut videatur Suarez *citato cap. 9. num. 11. lib. 6. de legibus*, ubi dicitur, quod ut dicatur cessare finis, cessante causa, vnum ex duobus requiritur: vel quia bonum proxime intentum per illum actum definit esse commune ad commune bonum: vel quia ipsemet actus definit esse utilis ad commune commodum. Quæ duo concurrunt in isto nostro casu: Nam res de qua agitur, id est, *portapax*, & in se, & in suo usu definit esse utilis ad bonum commune, cum illius usus ab Ecclesia sit interdictus, cum aliis causis supra allegatis.

## CASVS XVIII.

*De quodam Prælo Conuentuali appellante à suo Prouinciali in visitatione sui Conuentus.*

Q Vidam Prouincialis visitauit ex officio quendam Conuentum suæ prouinciæ præsentem, & non reclamantem Prælo locali illius. Finita visitatione, & resultantibus culpis probatis contra Prælatus localem, illum vocauit: eidemque dedit copiam capitulorum culparum, ut pro se responderet, & pro sua defensione diceret quod habebat. Acceptauit capitula Prælatus localis dicens se responsurum: & paulo post receptionem capitulorum, rediit ad Prouincialem, petiit prorogationem temporis ad respondendum, ultra  
tempus

tempus assignatum in exhibitione capitulorum : & hoc concesso à Prouinciali , idem Prælatus rediens ad Prouincialem, dixit se appellare ab illo ad superiorem Regularem ipsius Prouincialis; quam appellationem, nec scripto fecit, neque vllam causam appellationis expressit; cum tamen Prouincialis instaret vt causam appellationis exprimeret. Paulo post idem Prælatus localis clanculum Conuentum exiuit insalutato Prouinciali præsente, & superiorem illum adiuit, ad quem appellauerat. Eidem vero superiori exposuit, dictum Prouinciale sibi fecisse grauamina, & iniustitias. Quo audito, prædictus superior, inaudito Prouinciali, nec visa copia processuum, neque informatione vlla, præter dictum ipsius appellantis, destinauit particularem visitatorem, vt iret ad visitandum prædictum Conuentum; & cognosceret de grauaminibus factis à Prouinciali, ipsi locali Prælato, eiusque defensioni intenderet. Accedens visitator ad prædictum Conuentum, inaudito Prouinciali, recepit nouiter testes pro defensione Prælati localis: qui aliquibus Religiosis opposuit exceptionem testium suspectorum; qui in visitatione Prouincialis fuerant testes, ipso Prælato locali vidente, & non excipiente. Et hi testes ab illo recusati ad testificandum non sunt vocati à visitatore, neque illorum testimonium receptum est. Quo posito quæruntur multa.

1 Primo, an potuerit appellare iste Prælatus localis à prouinciali, postquam illum admisit ad visitationem Conuentus, & postquam admisit capitula culparum exhibita à prouinciali, dicens se responsurum; imo iam incaperat respondere.

2 An prædicta appellatio sine scripto, & sine expressione causæ fuerit valida, an frivola iudicanda.

3 An fuerit apostata exiens à Conuentu sine licentia prouincialis præsens, eumque respondere iubentis.

4 An superior potuerit mandare visitatorem particularem pro reuiscitando Conuentu circa grauamina facta à prouinciali, idque nec audito, nec citato prouinciali, nec prolata sententia circa valorem, aut nullitatem appellationis; & iussit inquiri de grauaminibus & iniustitiis factis à prouinciali, eo non audito.

5 An prælatus localis in secunda visitatione posset recusare testes, vt suspectos, quos antea non recusauit in visitatione prouincialis.

6 An visitator, dato quod probaretur exceptio contra aliquos testes teneretur nihilominus recipere testimonium horum testium recusatorum.

1 Ad primum quæsitum, credo quod non potuerit appellare à Prouinciali, postquam admisit illum ad visitandum, & recepit capitula culparum obligans se respondurum, & petiit ab eodem Prouinciali prorogationem temporis ad respondendum: excepto si post hæc omnia noua causa appellandi, vel recusandi orta fuerit, vel aliqua causa appellandi, vel recusandi ante hæc omnia nata, & existens, sed incognita, post illa omnia denuo ad notitiam venerit appellantis. Prima pars huius responsionis colligitur clare ex capite *ad petitionem de accusat.* vbi Papa iussit quendam Legatum visitare vnum monasterium, petente id ipsum Abbate monasterij, & præsente ad visitationem Legati, nec Abbate reclamante. Facta visitatione, & resultantibus culpis contra Abbatem, Legatus obtulit Abbati capitula culparum, vt responderet pro sua defensione. Abbas appellauit ad Papam, dicens Legatum sibi esse suspectum, quo non obstante Legatus Abbatem priuauit officio.



officio. Post priuationem officij Abbas recurrit ad Papam per appellationem. Papa illo audito confirmauit sententiam Legati. Et addit Papa notanter tanquam conducens pro causa institutæ: *Quod dictus Legatus presente, nec reclamante Abbate, super statu monasterij capit inquirere diligenter.* Et licet postea Abbas appellauerit, & dixerit prædictum Legatum sibi esse suspectum, Papa nec detulit appellationi, nec recusationi. Secundo idem probatur ex Regula: Quod semel placuit, amplius displicere non potest, *de Regul. iuris in 6. Regula 21.* Iam vero huic Prælato locali non semel, sed bis placuit litigare coram isto Prouinciali primo acceptando, vt ille visitaret: Secundo acceptando ab illo capitula, & articulos culparum ad respondendum: imo tertio acceptauit illum in iudicem, cum post hæc ab eodem Prouinciali petiit prorogationem temporis ad respondendum: per hanc enim petitionem illum acceptauit, & recognouit in iudicem, vt patet: Ergo licet antea haberet causam appellandi, vel recusandi, sibi cognitam, non potuit postea appellare, vel recusare; quia tali causæ, vel appellationi renunciauit, eo quod Prouincialem in iudicem per tres actus acceptauit. Idem confirmatur à simili ex iure Regio Lusitano, in *Ordinatione istius Regni lib. 3. tit. 21. §. 1.* Vbi Rex decernit, non posse aliquem recusare iudicem illum coram quo fecit vllum actum acceptationis, per quem actum videatur in illum consensisse. Secunda vero pars responsionis, & simul prima probantur clare ex capite *vt circa, de elect. in 6.* vbi Papa decernit quoad obuiandum malitiis opponentium contra electos, ille qui contra aliquem electum aliquid opponere voluerit, causas in scripto reddat suæ oppositionis, vel appellationis: si vero post sic inscriptam appellationem ultra

voluerit opponere, quod non sit scriptum in causis propositæ iam appellationis, talis de nouo non audiat: *Nisi aliquid forsitan postea emerferit (ait Papa) vel super antiquis supervenerit: aut aliqua antiqua in opponendum notitiam denuo supervenerint, quæ appellantes appellationis emissa tempore ignorare potuerint, & etiam ignorauerint. Super huiusmodi autem ignorantia, & superveniente facultate probandi fidem per proprium præstandum corporaliter faciant iuramentum.* Sic ibi Papa Gregor. X. quo nihil clarius potuit desiderari ad intentum huius primi responsi. Nam, ut dicitur, hic Prælatus localis intra viginti horas, & acceptavit capitula culparum à Prouinciali, & cæpit respondere, & petiit ab illo prorogationem temporis ad respondendum, ut proinde moraliter loquendo impossibile videatur, quod illi in mentem non venerit causa præterita appellandi, si quæ erat, neque illius causæ recordatus fuerit toto tempore, quo Prouincialis visitauit: Sed post hæc omnia in appellationem eruperit, pressus fortasse pondere capitulorum exhibitorum, quibus diffidit se posse respondere, & confisus, ut dicitur, vel præsumitur, in fauore iudicis ad quem.

2 Ad secundum quæsitum dico rem esse notissimam in iure, quod appellatio quando fit à grauamine (qualis ista perhibetur) vel fit ab interlocutoria, debet fieri in scripto, & in scripto debent exprimi causæ appellationis, aliàs appellatio friuola, & nulla iudicanda est. Hoc imprimis habetur *proxime citato cap. ut circa. de electione.* ubi Papa ad appellandum dicit, id fieri debere in instrumento publico, & litteris appellationis confectis. Idem expressius habetur *cap. Cordi nobis est.* Vbi Papa Innocentius IV. describens formam seruandam ab appellantibus, dicit: *Sancimus, ut si quis in iudicio, vel*

*extra*

*extra super interlocutoria, vel grauamine aliquo ad nos duxerit appellandum, causam appellationis in scriptis assignare deproperet, petat Apostolos, &c.* Quo nihil clarius dici potuit. Vbi glossa *verb.* Ad nos. respondet aliquibus, qui dixerunt hanc formam appellandi in scripto cum expressione causarum, solum intelligi, quando appellatur ad Papam, propter illud verbum, *Ad nos appellandum duxerit*: sed tamen ibi glossa maior, cum glossa marginali oppositum innuit, & ibidem glossa *in verbo* in scriptis. Et quoad expressionem causarum appellandi, quod non valeat appellatio si non exprimat causa appellationis, quando appellatur à grauamine, vel interlocutoria tenet expresse glossa *in cap. Accedens*, vt lite non contestata, *in verb.* Appellauit. Et citat *cap. vt debitus. de appellat.* & *cap. Dilecto filio. de appellat.* & alia iura. Ita vt si causa appellationis non exprimat, ait appellationem non esse recipiendam. In *cap. vero Ut debitus. de appellat.* citato à glossa, dicit textus hæc verba: *Cum ex rationabili causa putaueris appellandum coram eodem iudice causa probabili appellationis exposita.* Et omnino habetur *cap. Quod ad consultationem. de sentent. & re iudic.* Quo nil clarius dici potuit: & præterea clare innuit papa ibidem, quod coram quouis iudice causa appellationis sit exponenda, etiamsi non appellatur ad papam. Et habetur idem in multis aliis textibus, & passim in Doctoribus, & idem colligitur ex *Ordinat. huius Regni Portugallia lib. 3. tit. 21. citato §. 4.* in simili, decernente quod quando aliquis iudicem recusare voluerit, statim causam recusationis coram illo declaret; quod si causam non declarauerit, iudex non habeatur pro suspecto, & in causa procedat. In hoc autem nostro casu, Prælati localis neque appellauit scripto, vt dicitur, neque vllam causam appellationis,

vel grauaminis exprefsit, petente Prouinciali, vt caufam appellationis afsignaret; & proinde iuxta citatos textus appellatio fuit nulla, & non recipienda. Et confirmatur, quia aliàs fi dicere nudum verbum, Appello, fine expreffione caufae fufficeret ad validandum appellationem, vtique poffet quilibet, & iudicem, & iudicium deludere, ac declinare, quod eft contra mentem Iurium citatorum. Addo quod aliàs fruſtra iura in tot locis concederent iudici, à quo, ius, & libertatem repellendi appellationes friuolas, vt concedunt paſſim: Nam fi appellans non obligatur exprimere caufam appellationis (per te) quomodo poterit iudex iudicare appellationem eſſe friuolam, vel validam, non audita, nec viſa caufa appellationis? ob hanc ergo caufam iubent iura exprimi caufam appellationis ab appellante, vt videat iudex fi friuole, fi maleuole, fi ſolo animo dilatandi appellet.

3 Ad tertium quaſitum. Ego non damnarem talem Prælatum localem vt apoſtatam diſcedentem à Conuentu ſine licentia Prouincialis. Probo primo, quia Prælatus iſte localis aliàs habebat ex officio licentiam exeundi à Conuentu abſque licentia Prouincialis, vt praxis obſeruat. Ac proinde abſque licentia Prouincialis poterat à Conuentu exire: Maxime enim Prouincialis per ſolam exhibitionem capitulorum, culparum illi non prohibuerit exitum. Secundo, quia, cum Prælatus localis videret Prouincialem nō acceptaſſe ſuam appellationem, potuit ſecundo appellare facto, id eſt arrepto itinere ad ſuperiorem Prouincialis, maxime cum bona fide crederet id ſibi licere. Quod autem facto ſine verbis, vt per arreptionem itineris ad ſuperiorem poſſit fieri appellatio, conſtat *ex cap. Dilecti 2. de appellation.* & tenet Nauarr. in lib. 2. *conſiliorum* titulo de ſententia,

*sententia, & re iudicata consilio vltimo num. 6. vbi citat Decium in casu fere simili. Cum ergo iste Prælatus localis, esset aliàs prælatus, non prohibitus exire, & vadens via recta ad superiorem via appellationis, vt credebatur, sibi licitæ, non credo illum incurrisse censuram apostasiæ, etiam in foro externo, cum hæc censura non incurratur nisi à contumaci, & faciente mala fide.*

4 Ad quartum dico, non potuisse, nec debuisse superiorem prouincialis, inaudito prouinciali, destinare Reuisitorem, qui inquireret de excessibus, grauaminibus, & iniuriis quas prælatus localis dixerat sibi intulisse prouincialem. Quod probo ex multis, & urgentibus causis sequentibus. Primo, quia sic appellans nõ detulit secum copiam processus facti à prouinciali, nec testimonium suæ appellationis quo non delato non potuit superior prouincialis aliquid decernere, maxime contra honorem prouincialis. Colligitur clare ex Concilio Tridentino *sess. 24. cap. 20. de reform.* Vbi Concilium loquens de appellatione facta ab Episcopo ad Archiepiscopum, decernit, ac dicit primo quod petet appellans à Notario copiam processus. Et confirmatur *ex cap. Dilectis filiis de appellat.* Vbi de quodam appellante, eiusque appellatione ait papa: *De qua (id est appellatione) sibi per officialis litteras innotuerat.* Vnde colligit glossa in cap. *Cordi nobis de appellat. in 6. in Addition.* citans Innoc. & alios, non sufficere ad hoc qualemcumque scripturam, sed debere esse publicam, & quæ fidem faciat, ne appellans possit postea variare. Quod si dicatur non detulisse scripturam suæ appellationis, quia prouincialis noluit illam acceptare, & proinde per arreptionem itineris ad superiorem coram illo denuo appellasse: Tunc insurgunt aliæ ob-

iectiones

iectiones contra istam appellationem: Nam superior prouincialis, antequam appellationem reciperet, & nouum visitatorem mitteret, debebat prius audire prouincialem. Colligitur clare ex Tridentino citato cap. 20. Vbi agens de appellatione, & de iudice ad quem appellatur, ait debere admonere Episcopum à quo appellatur. Et ponit hæc verba. *Eodem Episcopo prius admonito, & si quid ei pro causa instructione videbitur, possit iudici appellationis significare.* Et in hoc casu, superior iudex appellationis, neque pro appellationis causa, nec pro visitatore mittendo, prouincialem admonuit, cum talis visitatio denuo instituta cederet in dedecus prouincialis, cum de illo dictum esset fecisse grauamina, & iniustitias. Secundo id probatur manifeste, ex cap. *Venerabilibus de sentent. excommun. in 6.* Vbi quidam subditus excommunicatus ab vno Episcopo, appellauit ad Archiepiscopum: Respondet papa, circa absolutionem subditi; *Quod conueniendus est ipse sufraganeus (id est Episcopus) coram Archiepiscopo, quia ipsius interest defendere causam suam.* Quo nihil clarius dici potuit ad intentum. Debit ergo superior conuenire, seu vocare prouincialem pro ista appellatione, & pro visitatore mittendo, quia ipsius intererat defendere causam suam. Tertio erat hoc conforme Iuri ciuili, canonico, imo & naturali. Videmus enim quod quando Actor producturus est testes contra reum, prius citatur reus vt, videat iurare testes, quò possit illis exceptiones opponere, & vt aliis remediis defensionis: Cur ergo in hoc casu non debuit prouincialis citari, vel admoneri de visitatore nouo qui de iniustitiis sibi ab appellante impositis debebat excipere testimonium omnium fratrum vnius conuentus, vt posset prouincialis suæ defensionis remedia praeuenire?

5 præcedentia plus confirmantur, & ostenditur alia obligatio hîc omiffa: Videlicet, quod ad probandam appellationis causam, vtraque pars appellans & appellata, debent comparere coram iudice ad quem appellatur, vt possit vtraque se defendere, habetur passim in Iure canonico, maxime in titulo *de appellat.* & alibi, vbi passim refertur quod vtraque pars appellans per se vel per suos procuratores, comparebant coram summo Pontifice: si vero aliqua pars comparere volebat in termino assignato ad prosequendam appellationem, tunc illa absente, & pro contumaci reputata, poterat iudex appellationis procedere. Habetur hoc precipue in cap. *interposita de appellat.* toto capite maxime §. Sane parato. Et expresse habetur in lege Portugalliæ lib. 3. *Ordinat. titulo 68. §.* Vbi datur forma appellationis, & decernitur quod vtraque pars appellans, & appellata comparéant coram iudice appellationis, & quæuis pars habebit copiam rationum contra se allegatarum: Et suas probationes adducent contra appellationem, vel pro illa: Idque ratio naturalis dicitur; cum enim appellatio nocumentum semper alicui inferat, videlicet iudici à quo appellatur, vel parti contra quam appellatur, ratio æquitatis dicat, vt pars appellata audiatur, vel citetur pro sui deffensione. In hoc autem casu solus Prouincialis fuit pars appellata, idque cum nota iniustitiæ ab illo commissæ, ac proinde fuit audiendus secundum tot textus supra citatos, & iuxta Concil. Trident.

6 Ad quintum quæsitum, dico quod Prælatus iste localis in secunda visitatione potuit ponere exceptiones, & recusationes illis Religiosis, qui in prima visitatione generali Prouincialis, testimonium contra ipsum Prælatum localem tulerunt: Quamuis enim eos

tunc

tunc visitare , ac testimonium dicere tunc permiserit, non per hoc visusest in eos consensisse absolute, quia ignorabat an contra se forent dicturi testimonium: Ignorans autem non consentit valide. *lex.* Nec ignorans, *Cod. de Donat. & l. Mater decedens ff. de inoffic. testamento.* Ultra illà quæ in sequentibus dicemus de testibus receptis in visitatione generali.

7 Ad sextum quæsitum dico, visitatorem secundum destinatum à superiore , circa recusationem , & exceptionem testium positam à prælato locali , primo debuisse inquirere de causis exceptionis inimicitiae , videlicet , & similium. Et dato quod exceptio testium illorum probata fuerit , adhuc debebat testimonium illorum recipere, nam quando testimonium testis recusati , vel excepti coincidit cum alio teste omni exceptione maiori , tale testimonium testis recusati, coadiuuat, & vt minimum facit indicium probationis. Sic praxis obseruat , & tenet Penha in *Directorio Inquisitorum* 3. part. commento 28. §. Aliorum vero : & citat Panormit. Felinum, Campegium.

8 Quoniam vero ex prædictis videtur colligi appellationem interpositam ab isto Prælato locali fuisse friuolam, imo nullam, quia sine scripto, sine expressione causæ , & proinde Prouincialis poterat procedere ex officio vsque ad sententiam , quam tamen causam Superior fere è manibus eripuit : cum casus iste sæpius possit contingere in Religionibus , vbi aliqui Prælati fere causas auocant ab inferioribus, eosque in suo officio ordinario interturbant, placuit duo loca iuris adducere pro isto abusu tollendo. Primus locus sit ex Concilio Tridentino *cit. at. sess. 24. cap. 20.* vbi postquam omnino prohibet ne Prælati superiores aduocent ad se causas ex prima instantia : sic ait de Archiepiscopis,



piscopis, & similibus superioribus. *Episcopos in prædictis causis impedire, aut aliquo modo eorum iurisdictionem eis præripere, aut turbare non præsumant.* Et in hoc casu videtur superior præripuisse iurisdictionem Provincialis, quam habebat ad dandam sententiam, non obstante appellatione friuola, & reiecta; & postea locus manebat Prælato locali appellandi à sententiâ Provincialis ad eundem superiorem. Secundum quod cito ad hoc intentum, est pulchrum, & elegans dictum D. Gregorij Papæ positum in cap. *peruenit* 11. *quest.* 1. vbi Papa loquens de Prælatis superioribus, qui in officio turbant inferiores, sic ait: *Nam si sua unicuique Episcopo iurisdiclio non seruetur, quid aliud agitur, nisi ut per nos, per quos Ecclesiasticus custodiri debuit ordo, confundatur?* Quod autem, quando iudex non tenetur recipere appellationem friuolam, qualis hæc fuit, possit Prælatus procedere, & reum etiam appellansem friuole, possit excommunicare, tenet expressè Zerola in *secunda par. praxis, verb.* Appellare. §. 10. vbi citat caput *Solicitudinem. de appellat.* & cap. 1. & 2. *ut lite non contest.* Et citat etiam Franc. & eod. *verb.* Zerola §. Non quæritur. expressè tenet cum Innocen. & alijs, quoscitat, dicit quod ad Superiorem non deuoluitur iurisdiclio, nisi prius probata causa vera, & legitima appellationis, iuxta Innocentium in cap. *Per tuas. num. 4. de sentent. excomm.* vnde dicit ibidem malefacere Metropolitanos absoluentes appellansem, antequam inhibeant vt non procedatur, & transmittantur acta. Et citat Hostiensem in *summ. in tit. De officio delegati. §. & qualiter finiatur.*

## CASVS XIX.

*De punitione Religiosi delinquentis extra  
suam prouinciam & regnum.*

**Q**uidam Religiosus apostata fuit ab ordine. Existens in apostasia deposito habitu Religionis, & habitu clericali assumpto, commisit atrox delictum, in quo deprehensus in habitu clericali, ab Episcopo ciuitatis fuit carceri mancipatus, & de delicto conuictus fuit per sententiam Episcopi ad triremes damnatus. Ille à sententia appellauit, dicens se esse Religiosum professum, nec proinde potuisse ab Episcopo puniri. Episcopus cognita veritate quod esset Religiosus, illum remisit ad Superiorem suum, qui erat in alio Regno, simulque cum illo transmisit ad Prælatum copiam substantialem processus, & sententiæ latæ ab Episcopo de illius damnatione ad triremes.

Quæsitum est primo, an Prouincialis istius Religiosi potuerit illum punire pro crimine commisso extra prouinciam, & territorium istius prouincialis: nam delictum commissum est in alio regno, & in alia prouincia eiusdem Ordinis.

Quæsitum est secundo, an dato, quod illum punire possit, sufficiat testimonium publicum ipsius Episcopi de culpis à Religioso commissis, & probatis: an vero debeat Prouincialis facere nouum processum, & nouam ferre sententiam condemnationis.

**I** Quod attinet ad primum quæsitum, vidi in facti contingentia, aliquos dicentes, prouincialem non posse punire talem Religiosum ob delictum factum extra suam

suam prouinciā, quia crimina commissā in alio territorio non pertinent nisi ad iudicem illius territorij. Ego tunc partem affirmatiuā tenui, & in illa sententiā etiam nunc persisto. Pro cuius resolutione dico, casum istum resolui posse ex traditis, & citatis à Syluestro *verbo furtum. quest. 4.* licet ibi ponat casum cum alia circumstantia. Quærit enim, an committens furtum hoc loco, & transiens cum re furtiua ad alterum territorium, possit ibi iudex territorij illum punire, cum sit ibi extraneus, sed cum furto alibi factō ibi comprehenditur: & citatis duabus opinionibus, affirmante & negante, resoluit cum panormitano *cap. 1. de pœnis.* & Bartolo, quod si iste committens furtum in alio territorio, postea sortitus sit forum huius territorij mutatione domicilij, poterit hoc loco puniri pro delicto commissō olim in alio territorio. Quod a fortiori in hoc casu dicendum est: nam iste Religiosus, de quo agitur, est istius territorij & prouinciæ, neque illud territorium mutare potuit per apostasiam inuito Prælato: sicut seruus non potest mutare territorium, cum non habeat ius liberum eligendi territorium siue domicilium: ergo cum non amiserit territorium huius prouinciæ, poterit puniri à iudice istius prouinciæ ob delictum alibi commissum, iuxta illud dictum panormitani citati à Syluestro ubi proxime. Secundo confirmatur hoc praxi criminali tum ciuili, tum canonica, per quā rei delinquentes in alieno territorio, remittuntur à iudice territorij, ubi factum est delictum, ad iudicem territorij delinquentis. De quo multa tradit Zerola in *praxi Eccles. c. par. verb.* Remissio reorum, ubi multa dicit ad intentum. Et maxime §. ad sextum, fere ponens casum in terminis dicit, posse Episcopum repetere suum Clericum detentum ab alio Episcopo (videlicet ob

nam supradictam Concilij Tridentini, non solum poterit prouincialis ipsius, sed potius tenebitur illum punire: Nam Episcopus per illum processum culpam missum videtur instare, vt prouincialis illum puniat iuxta decretum Tridentini.

2 Maius dubium est quod ponitur in secundo quaesito: an scilicet prouincialis possit istum Religiosum sibi ab episcopo remissum, punire inspecto solo processu facto, & misso ab episcopo: An vero debeat prouincialis facere per se nouum processum contra istum Religiosum recipiendo testes, &c. Quæstionem apud nullum decisam in terminis reperi. Sub censura tamen doctiorum sentio, posse prouincialem istum Religiosum punire ex vi solius processus facti, & missi ab Episcopo, absque formatione noui processus à se confecti. Moueor primo, quia Marzilla in suis Declarationibus Cardinalium ad dictum cap. 14. *Tridentini*, citat ad hoc sequentem illorum declarationem. *Vi scilicet Regularis delinquens extra claustra, remittatur ab Episcopo ad superiorem cum processu, & probationibus factis ab Episcopo.* Si autem Concilium iubet vt cum Religioso delinquentem mittatur processus, clare innuit sufficere hunc processum ad puniendum talem Religiosum. Addo quod iste processus factus ab Episcopo est iam factus à iudice competente: licet enim Episcopus de ordinario non sit iudex competens Religiosi absolute; est tamen iudex competens illius secundum quid, id est si delinquat scandalose extra Conuentum: tunc enim ex commissione Concilij, & dicta declaratione Cardinalium, potest Episcopus Religiosum comprehendere, & processum contra illum formare. Et confirmatur quia iste processus factus ab Episcopo, est factus autoritate Papæ, vt patet ex citata

declaratione Cardinalium: ergo iam est factus à iudice competente, & proinde non claudicabit processus ex eo quod factus fuerit à iudice incompetente, cum Papa sit iudex competens omnium Christianorum. Adde quod *Trident. cap. 14.* non ait quod remisso sibi Religioso delinquente ab Episcopo inquirat, sumat informationem, vel quid simile, sed absolute ait, quod instante Episcopo, Prælatus regularis puniat, videlicet, ex vi solius processus formati ab Episcopo. Secundo principaliter probatur, quia non est res insolita ut iudex ferat sententiam per processum a se non formatum. Est imprimis exemplum in iudice sæculari, qui hæreticum sibi relaxatum ab Inquisitoribus, damnat ad mortem, solo inspecto processu Inquisitorum absque formatione noui processus, ut tenet praxis, & refert, ac probat *Penha in director. Inquisit. part. 3. quest. 36. Comment. 85.* & præterea iudices arbitri per solam authoritatem sibi datam à compromittentibus, ferunt sententiam super processu ab alijs confecto. Nam ut iudex valide ferat sententiam, videntur hæc requiri, ac sufficere; primo ut habeat iurisdictionem in reum. Secundo, ut reus sit citatus. Tertio, ut iudex habeat certam, ac iuridicam informationem vnde possit moueri ad ferendam sententiam. Quæ omnia in hoc casu concurrunt: Nam Prouincialis iste habet iurisdictionem ordinariam super isto Religioso, ut patet, cum sit verus illius Prælatus. Secundo, Religiosus iste iam fuit citatus à iudice competente, & auditus, videlicet ab Episcopo, qui ut dixi *num. 1.* erat iudex competens ad hoc: ex Tridentino. Tertio, Prælatus iste Prouincialis habet informationem iuridicam, per quam animum firmet ad veritatem discernendam, qui est processus iuridicus factus ab Episcopo: ergo poterit illum damnare.

nare. Credo tamen quod Prouincialis tenetur illum denno citare, & audire, vt pro se possit nouam defensionem adducere, antequam denuò condemnetur.

---

C A S V S XX.

*De uisitatione generali. Et an testes in ipsa denunciantes, sint postea ratificandi pro puniendo aliquo particulari.*

**I**N quodam Conuentu Religiosorum commissum est delictum graue per duos sæculares nocte ingresses. Fuit etiam præsumptio, quod duo Religiosi fuerint complices, vel coadiutores delicti. Prælatus fecit inquisitionem generalem de delinquentibus, nihil inquirendo de dictis Religiosis, imo nec nominando sæculares. Ex hac inquisitione sic facta per multos testes denunciante constitit duos sæculares commisisse illud delictum; & quod duo Religiosi fuerint fautores, vel consultores in eodem delicto. Et de sæcularibus existerat fama, non de Religiosis.

Quæritur, an possit Prælatus stante hoc solo processu, propter illos testes in illa generali inquisitione receptos, absque nouo processu citare illos Religiosos diffamatos, illisque exhibere capitula, siue articulos culparum, illosque sic auditos punire, absque eo quod testes priores ratificentur, vel alij denuò testes assumantur. Quæ quæstio quotidiana est, & valde necessaria, & quæ multos iam torfit. An videlicet testes in uisitatione generali denunciante contra aliquem, sint iterum vocandi, & ratificandi, antequam per illo-

rum dicta condemnetur ille, de quo denunciarunt.

1. Et quoniam res quotidiana est, & tam necessaria Prælati, antequam ad dubium primo positum respondeam, refero hac de re dictum sapientissimi Nauarri, qui in *tom. 3. suorum operum in Rubr. de indic. num. 79.* ait imprimis multos peccare in praxi Inquisitionis generalis: & inde usque ad *num. 91.* ponit aliqua aduertenda pro bene instituenda visitatione generali; quæ quia valdè conducunt ad intentum, & sunt dicta à tanto viro, sibi hic summarie referre.

2. Secundo ergo dicit. Inquisitionem generalem non fieri ad damnandum, nec ad decidendum, sed solum ad inueniendum, & præparandum, adeo quod per testes acceptos in illa nemo potest damnari, etiam postea in Inquisitione, nisi repetantur; & citat pro hoc dicto Baldum, & Aretinum, per quod dictum ex mente Nauarri satis constat, testes in generali visitatione receptos contra aliquem Religiosum, si damnandus sit, esse postea ratificandos. Hoc asserit Nauarrus *num. 85.*

3. Secundum dictum Nauarri, est quod Prælati in Inquisitione generali non potest interrogare de aliquo Religioso in particulari, nisi de illo sit infamia, vel indicia per quæ sit infamatus, quæ est communis opinio. & citat sanctum Thomam, & vnâ gloss. iuris, & locum ex *Act. Apostolorum ca. 25.* citatum à D. Thom. & ideo ait, *num. 88.* quod deberet Prælati in visitatione generali Monasterij prius protestari nolle se ab illis scire occulta, sed notoria, & facta, vel diffamata; & sic ait se fuisse protestatum in visitatione duorum Monasteriorum, quæ ipse visitauit ex commissione sibi facta.

4. Tertium dictum Nauarri *num. 91.* est, quod Inquireturus specialiter virtute infamie, vel alicuius ei equipollentis,

pollentis, debet imprimis super infamia testes suscipere, inquirendo scilicet an vere sit infamatus. & probata infamia, tunc poterit inquirere specialiter de illo, pro quo citat multos; quod adeo verum esse ait, ut ibidem dicat, non esse credendum iudici asserenti, præcessisse infamiam, sibi que de illa constituisse nisi ex processu id appareat. Et citat Fulgos. & Decium, & ait colligi ex cap. *quoniam contra. de probat.*

5 Quartum dictum Nauarri eodem *num. 5. Quinto*, est, non esse credendum Alciato ibi citato, ac dicenti, quod contra Regulares potest inquiri non præcedente infamia. Id enim falsum esse, multis ibi probat.

6 Quinto ait Nauarrus *num. 87. §. Non obstat. Quod* si testis bene, vel male, & peccans, occultum crimen denunciauerit, & crimen iam publicum factum sit, quia ex dicto illius alij iam sciunt communiter, tunc iudex tenetur punire crimen faciendo inquisitionem particularem: iam enim crimen non est secretum. Hæc sunt substantialia, à Nauarro ibi dicta circa inquisitionem generalem faciendam. Et ex mente illius, eiusque dicto primo supra relato in *num. 2.* constat quod testes recepti in inquisitione generali contra aliquem, sunt postea repetendi, & ratificandi: Idemque tenet Nauarrus in citata Rubr. *de iudiciis num. 91.* in fine, sic dicens: *Testes recepti super fama ante propositam Inquisitionem non citata parte, citata ea recepti debent, &c.* Ex quo videtur responsum ad casum in principio positum: & dicendum quod non possit Prælati hos Religiosos punire ex vi duorum illorum testium in generali inquisitione receptorum, sed quod debet illos iterum repetere, & ratificare. Et quidem quoad sæculares, & Ecclesiasticos cum quibus seruatur solemnitas iuris, sic omnino faciendum est, in quorum causis iuris solem-



nitas seruanda est. Sic enim disponit ius in cap. *Quoniam frequenter de liris constet*. Vbi dicitur quod: *Lire non contestata testes non recipiantur*. At per solam generalem inquisitionem lis non est contestata, quia nōdum reus citatus est, & testes iam sunt recepti in inquisitione generali contra illum.

7 Tota dubitatio est, vtrum in Religiosis, quorum causæ per priuilegium resoluuntur de plano, & summarie non seruatis apicibus iuris, seruanda sit eadem ratificatio testium receptorum in inquisitione generali? Huiusque responsio pendet clarius ex puncto alio, videlicet an ista ratificatio testium receptorum in generali inquisitione pertineat ad apices iuristarum, an ad illius substantiam. Ego calum resoluendo dico, quod ista ratificatio testium pertinet tantum ad apices iuris: ac proinde non obligare in Religionibus quæ eximuntur ab apicibus iuris per sua priuilegia: ac proinde si Prælati regulares puniant conuictum per testes antea receptos in generali inquisitione absque illorum postea ratificatione, non erunt accusandi: Et hinc respondetur ad quæsitum positum in principio huius casus vigesimi. Quod ergo ista ratificatio testium non sit de substantia iuris, sed pertineat ad apices, tenet expresse Pater Iosephus à S. Maria in suo tribusali Religiosorum *tract. 4. cap. 10. à fol. 307. licet consulat cap. 11. quod in negotio grauissimo Prælatus regularis etiam ratificet huiusmodi testes: citat ibi pro se Rodrig. tom. 2. qq. quest. 19. art. 3. qui Rodrig citat Innoc. & Baldum. Inclinat ad hoc Paulinus Bertus in sua praxi criminali, tit. 8. cap. 5. de forma Inquisitionis fol. 210. col. 2. in fine. Vbi ait, quod ex iudiciis repertis in inquisitione generali potest Prælatus procedere contra culpatum, nullo alio processu formato, iuxta stylum seruatum*

seruatum hac nostra tempestate. Hoc idem satis clare innuit Autor *Repertorij Inquisitorum*, vir doctissimus, *ver. Testis* §. Item nota fol. 74 §. col. 2. in fine. Idem collegit hic Author ex Panorm. qui super cap. *Ad petitionem de Accusat.* sic ait: *Nota ex textu, quod si in inquisitione generali aliquis reperitur culpabilis, potest contra eum procedi ad impositionem pœna ex illis probationibus in inquisitione generali receptis, nec est opus vt de nouo illa probationes specialiter recipiantur, sed satis est illum nominatum citare, vt veniat ad opponendum, &c.* Quo nihil clarius dici potuit ad intentum. Et subdit statim se hoc intelligere quando inquisitio erat formata contra certum genus personarum, nam tunc inquisitio videtur formata contra quemlibet. Secundo videtur hoc probari ex glossa ad citatū cap. *Ad petitionem de accusat. vbi glossa in ver. Non seruatum.* Ait citatum ordinem iuris circa inquisitiones faciendas traditum in illo capite, esse verum circa sæculares, secus circa regulares in quibus non vsquequaque seruatur. Et citat cap. *qualiter, & quando de accusat.* In quo traditur forma seruanda in inquisitione generali, & de audiendo reo, de exceptionibus opponendis, &c. Et in fine capitis addit papa sic. *Hunc tamen ordinem circa regulares personas non credimus vsquequaq. seruandum, &c.* Tertio probatur ratione, quia non videtur de substantia iuris, vt idem testis, qui prius deposuit in generali inquisitione, nunc secundo denuo interrogetur, & ratificetur. Iam enim in inquisitione generali deposuit vt verus testis. Nam fuit vocatus à Iudice potente vocare: fuit exhibitum iuramentum coram Notario, & Iudice, quæ sola videntur requiri ad substantiam testis: Testificari enim ante, vel post contestationem litis, videtur solum ad apices pertinere. Quod confirmo claro exemplo ex

iure: nam ius canonicum, & ciuile passim permittunt recipi testes ad futuram rei memoriam, quando videlicet timetur quod testes possint mori, & lis nondum est cæpta, nec contestata; & tamen testes sic recepti viginti annos ante litem contestatam valent postea, si iudicis autoritate recipiantur: habetur expressè in capite *Quoniam frequenter ut lite non contestata*. Quod satis probat non esse contra substantiam iuris testes recipere contra reum antequam citetur. Vltimo probatur ex eo quod tenet Rodrig. 2. tom. quest. 9. 12. art. 6. & tom. 4. sum. cap. 148. concl. 4. & in ordine iudiciario. cap. 7. Vbi ait primum denunciatores esse testes, & cum altero teste facere plenam probationem. Et in casu proposito de quo agimus, fuerunt multi denunciatores, non in forma Euangelica secreta, quæ requirit prius correctionem fraternam secretam; sed fuerunt denunciatores in forma iuridica, vocati, iurati, &c. & ab habente iurisdictionem ad vocandam, & iuramentum exhibitum circa crimen particulare, quod erat publicum fuisse commissum.

8 Hæc dicta sufficiant pro liberando Prælato regulari, qui testes receptos in visitatione generali non ratificauerit. Quibus non obstantibus, ego consulere Prælatos regulares, ut si quidem hodie, vel temporum malitia, vel culpatorum subterfugia, vel Prælatorum nimietas iam fere apices iuris in Religiones inuexit, curent Prælati in visitatione generali obseruare illa quinque monita Nauarri, posita in principio huius casus. Quod clarius & securius facient seruando regulam traditam ab eodem Nauarro, lib. 5. *Consiliorum in de Accus. Inquisit. & de iunc. consil. 3. num. 4.* loquente de visitatione vnius Conuentus. Vbi innuit faciendam esse duplicem visitationem, primam generalem,

de

de nullo specialiter inquirendo. Secundam specialem, quando videlicet resultante infamia, vel probatione contra aliquem in particulari, fit nouus processus contra illum, citato eodem, & repetitis testibus antiquis, & aliis testibus, quia denunciatoribus visitationis generalis sunt iudicati.

---

## CASVS XXI.

*De vno Conuentu recusante, ne Prouincialis  
visitaret, quando facienda erat  
quædam electio.*

**I**N vno Conuentu Monialium, tempore quo Prouincialis ex officio tenebatur visitare Conuentum, & facere electionem Abbatissæ, vel Officialium, quædã Moniales voluerunt recusare Prouincialem, vt suspectum, ne visitaret, neque electioni assisteret. Quæritur an potuerint illum impedire ne visitaret ex officio, & electioni præsideret? & idem potest quæri de Conuentu Fratrum, an possint recusare Prouincialem ne illum visitet?

1 Antequam respondeam, suppono primo, teneri Prouincialem singulis annis visitare Conuentus Monialium sibi subditarum; vt habetur expresse in Clementina *Attendentes. de statu Monach.* vbi Papa clare exprimit, *Singulis annis, & Moniales.* Concordat Trid. sess. 7. de reform. cap. 8.

2 Suppono secundum, esse consuetudinem Prouincialium in electione Abbatissarum, vel similium Prælatorum, eisdem, vel partibus opponentibus optionem dare,

dare, vt designent, quos Religiosos sibi velint adduci in testes scrutatores electionis, & ab illis designatos adducunt, quod est consonum iuri canonico in capite *Quia propter. de elect.* Et sic obseruat praxis in capitulis Fratrum: vbi assistentes scrutinij per vota particulare eliguntur. Quo supposito sit prima conclusio.

*Prima conclusio.*

3 **N**on possunt Moniales, nec Fratres vnus Conuentus recusare Prouincialem, eumque impedire (quantumcumque suspectus sit) ne visitet ex officio suum Conuentum visitatione generali, & ordinaria. Ultra probationes huius conclusionis mox adducendas, illam probo imprimis decreto Apostolico S. D.N. Pauli V. posito à Barboza in suis remissionibus ad Tridentinum super sess. 24. cap. 10. de reform. num. 4. Quod decretum prædictus Summus Pontifex anno 1610. transmisit ad Episcopum Portucalensem nostri Regni Portugallie: Tenor sic habet.

*Venerabilis frater, salutem, & Apostolicam benedictionem. Fraternitatis tua nomine nobis nuper expositum fuit, quod visitationes quæ in tua diœcesi in vim decretorum Concilij Tridentini, & alias legitime fiunt, impediuntur, eo quia visitati Prælatus, seu alium legitime visitantem suspectum allegant, in magnum diuini cultus præsertim, & fabrica Ecclesiarum præiudicium. Quamobrem nos huiusmodi abusum tollere volentes, supplicationibus super hoc tuo nomine humiliter porrectis inclinatis, de consilio venerabilium Fratrum nostrorum sacra Rom. Eccles. Cardinalium, sacri Concilij Tridentini interpretum, Apostolica auctoritate declaramus, Episcopum, vel alium cui id legitime competit, visitantem non posse vii suspectum recusari. Non obstantibus constitutionibus;*

nibus, & ordinationibus Apostol. caterisque contrarium facientibus quibuscunque. Datum Romæ, &c.

4 Circa hoc decretum primo aduerto, quod licet sit commissum ad vnum tantum Episcopum particularem, habet tamen vim in tota Ecclesia, vt per illud causæ resoluantur vbique in Ecclesia: Est enim epistola decretalis Papæ, sic enim totus liber Decretalium, & sextus compilati sunt ex Epistolis missis ad Episcopos, & personas particulares, & hodie vim habent in tota Ecclesia, eo quod sint responsa, rescripta, & resolutiones Summorum Pontificum pro Ecclesiæ instructione. Et hoc ipsum, quod hæc rescripta particularia Pontificum habeant vim legis in tota Ecclesia, tenet expresse Syluester *verb. Rescriptum. quest. 4.* Secundo noto in hoc decreto Papam, non solum id concessisse pro Episcopis visitantibus suas dioceses, sed etiam pro Prælatibus regularibus visitantibus suas prouincias. Constat clare ex illis verbis Decreti: *Episcopum, vel alium cui id legitime competit.* Quibus verbis clare id concedit, & Episcopis, & cuius alteri legitime visitanti; qualis est Prælati regularis, qui ex *Clementina supra citata*, attendentes, legitime visitat singulis annis, & tenetur visitare suos subditos ex mandato Concil. Trident. *sess. 25. cap. 1. de Regular.* prope finem. Et quamuis ex citatis verbis prædicti Decreti id non colligeretur tam clare sicut diximus: adhuc stando solum in doctrina, & regulis iuris, dicendum est illud Decretum Pauli V. prohibens recusari Episcopum in visitatione ordinaria, siue vlla extorsione, extendendum esse etiam ad Prælatos regulares, ne possint recusari in sua visitatione ordinaria. Probo clare, quia de æquipollentibus idem est iudicium. *l. fin. ff. mandat. & cap. si quando. de rescrip. & præterea* vbi est eadem ratio, est etiam eadem iuris dispositio.

positio, cap. *dudum. de elect. il. 2.* At Episcopus, & Prouincialis æquipollent in iurisdictione, vt mox dicam; præterea eadem est omnino ratio in visitatione Episcopi, & Prouincialis, vt patet: ergo in vtroque, erit eadem iuris dispositio, ita vt quod Papa decreuerit circa visitationem Episcopi non recusandam, idem quoque iudicandum sit de prouincialis in visitando recusatione. Quod autem eadem sit ratio in prouinciali, atque in Episcopo, constat ex communi Doctorum sententia, dicentium, quod prouincialis habet in suos subditos iurisdictionem quasi Episcopalem, vt inter alios tenet, ac probat Rodrig. *Addit. ad summ. tom. 4. verb. preladados, cap. 104. concl. 7.* citans vnam glossam, & Cardinalem, & Abbatem.

5 Vt autem appareat quanta cum ratione D. paulus V. illud decreuerit, vt in visitatione generali non possit Episcopus recusari (nec proinde prouincialis) offero has duas rationes pro illo decreto pontificio. prima est. Nam Episcopus, vel Prælatus in visitatione generali concernente bonum commune, non inquirunt, nec possunt inquirere de culpis alicuius in particulari: cūque illa visitatio in genere tendat ad bonum commune Conuentus, non potest subditus particularis impedire bonum commune Conuentus. Si vero dicas: ex illa visitatione generali posse resultare culpas contra Prælatum Conuentus, vel alios graues patres, quorum interfit Prouincialem suspectum non visitare. Respondet hoc non sufficere ad illum recusandum: nam vt ait Nauarr. *lib. 5. consil. tit. de accusat. Inquisit. consil. 3.* visitatio generalis neminem infamat, & per testes in illa receptos nemo potest condemnari: sed debet fieri particularis processus à Visitatore ex repertis in visitatione generali contra in illa culpatum; & in hoc secundo processu.

processu speciali, citato illo culpato in generali inquisitione poterit recusationes ponere contra Prouincialem. Secunda ratio illius decreti Papalis est: nam cum Prælati de ordinario ratione officij incurrant odium subditorum, eo quod reprehendunt, puniunt, appetitibus resistunt, &c. Nascuntur multi æmuli, & non bene affecti ad illum in Episcopatu, vel prouincia: & proinde multi ex ijs tædio affecti ad Prælatum, possent in quouis oppido, vel Conuentu recusare Episcopum, vel Prælatum visitare volentem, etiam ad libitum: & ita impediretur bonum commune visitationis, & Ecclesiæ, vt ait Papa in citato decreto. Colligitur hæc secunda ratio ex cap. *qualiter, & quando. de accusat.* vbi ait Papa, quod non facile admittatur accusatio Prælatorum. Et causam assignans Pontifex ait: *Nam Prælati sunt quasi signum positi ad sagittam, & multorum odia inturrit.* Sed hoc sicut dixi, non impedit quominus in visitatione, seu inquisitione particulari facta à Prælati, possit illos subditus recusare cum causa, & seruata forma iuris.

*Secunda conclusio.*

6 **N**Ec possunt particulares prætendentes validè recusare Prouincialem quin assistat electioni Prælatae, vel aliarum Officialium, si ipse Prouincialis adducat duos testes oblatos à prætendentibus, vel ad beneplacitum prætendentium adductos, vt assistant electioni tanquam scrutatores, & defensores iustitiæ recusare volentium. Primam partem huius conclusionis probō primo, & etiam probatur tota conclusio sequentibus multis rationibus. Nam cessante causa cessat effectus, vt dicitur in cap. *cum cessante. de appellat.* & est



est idem quod alibi tradunt Doctores, videlicet quod cessante fine legis cessat lex. At finis, & causa, ob quam iura concedunt posse iudicem recusari, est, quia ipse solus postea daturus sententiam, ex passione, & odio poterit nocere recusanti; & hæc ratio, & causa cessat omnino in Prouinciali, etiam aliàs suspecto, quando agitur de illius assistentia in electione Prælatæ: nam ille ibi nullam laturus est sententiam, vt patet: sed solum debet suffragia per Arithmeticam recensere, & promulgare; & ad hoc habet duos associatos pro parte contraria, in quorum præsentia est impossibile moraliter suffragia defraudare: Ergo in totum cessat causa suspicionis, quæ sibi possit opponi. Et magis declaratur, quia quando recusatur iudex laturus sententiam in causa, est quia ille debet recipere testes, debet solus considerare dicta testium, & merita causæ: quæ omnia cessant in sola, ac nuda assistentia electionis, vbi nihil horum concurrit, & habet occultatos testes contra se.

Secunda ratio deducitur ex cap. *Cum speciali. de appel.* vbi Papa iubet, quod si pars aliqua recusauerit iudicem ordinarium assignatis causis recusatationis, tunc pars recusans, & recusata eligant arbitros, qui iudicent causas recusatationis, cum cæteris ibidem. Ex quo loco colligo, permittere ius vt iudex recusatus eligat Arbitrum vnum, qui iudicet cum alio arbitro recusantis causam ipsius iudicis recusati. Si ergo ius permittit vt Prælati eligat vnum Arbitrum, qui iudicet causam suæ recusatationis: à fortiori permittet, quod Prælati recusatus offerat duos Arbitros scrutatores parti recusanti, qui assistant pro illa in electione, & faciant ratiocinium suffragiorum. Et cum ego essem Prouincialis oblato mihi hoc eodem casu, in quodam Conuentu Monia-

Monialium me recusare tentante in electione Abbatissæ, consului virum satis doctum in iure canonico qui hodie viuit in grauissimo tribunali Ecclesiastico huius Regni, qui mihi dixit hoc ipsum; videlicet non potuisse Conuentum me valide recusare, si ego illi offerrem, vt eligerent Arbitros sibi propitios, qui me in electione associarent: & ita factum est.

Tertio, id confirmo ex dicto Panor. cap. *super quest. de offic. & potest. iudic. deleg.* vbi postquam dixit cum comuni, quod iudex merus executor non potest recusari, iuxta cap. *Nouit. de appellat.* Ait quod si tali executori committatur vt testes examinet, vel iudicet expensas litis, poterit recusari; nam in scribendo, & callidè testes examinando poterit grauare partem, vel etiam in arbitrandis expensis. Si vero sit merus executor ab eo non potest appellari, nec recusari quia non potest notorie lædere partem quin notorie constet. Quæ omnia pulchre aptantur nostro casui argumento à contrario sensu Nam Prelatus assistens electioni tanquam præses, non examinat testes, vt patet, cum suffragantes, & votantes non sint testes Item, ibidem non iudicat aliquid ex suo arbitrio: Item habens ibi duos testes contra se (vt ita dicam) & procuratores partis læsæ, vel recusantis, non potest lædere quin notoriè constet: Ergo non potest recusari, neque ab eo appellari. Quod adhuc potest confirmari ex illa historia Daniel. 13. vbi illi duo senes, etiam mali iudices, ausi sunt tantum facinus intentare contra Suzanam castam, quia nemo illos videbat, dicentes, *Nemo nos videt.* Quasi à contrario, si scirent eos ab aliquo videri, tale non intentassent, quantumcumque mali. Si ergo præses electionis habeat duos testes assidentes pro parte recusante procuratores, quomodo poterit lædere & aliquid contra

electionis iustitiam intentare?

7 Quod spectat ad secundam partem conclusionis, quod scilicet non possit recusari Prouincialis, quando in visitatione Conuentus Monialium non fit electio Abbatissæ, sed solum fit electio cæterarum officialium vt ianitricis, & similium, quod inquam neque in hoc possit recusari Prouincialis, patet clarius ex supradictis, & mox dicendis. Nam imprimis non potest recusari ne visitet, propter clare, & efficaciter dicta in prima conclusione: Nec potest recusari quin eligat officiales prædictas, maxime si adhibeat duos illos testes ad petitionem partis recusantis: si enim id potest in electione Abbatissæ, quod est maius, & in qua concurrat forma electionis canonice per schedulas obsignatas; multo melius poterit id facere in electione harum officialium, quæ non est canonica, nec fit per schedulas secretas, sed ore tenus coram vno Notario, & duobus testibus, vt solet fieri in Monialium Monasteriis subditarum Ordini Minorum. Adductis enim duobus testibus ad petitionem partis querelantis, cessabit omnis suspicio damni inferendi, & tota ratio recusandi, sicut probatum est circa electionem Abbatissæ. Quod adhuc potest confirmari ex cap. *indemnitatibus de elect.* in 6. vbi præscribitur forma eligendi Prælatam Monialium, & datur licentia recusandi, & appellandi ab illa. Et tamen ibi vt constat, solum sermo est de electione Prælatæ. At officiales Monialium, quas diximus, nec sunt Prælatæ, nec fiunt à tota communitate, vt plurimum sed per solas discretas, ac seniores conuentus: & proinde, difficilius, seu multo minus poterit Prælatus recusari in visitando conuentu ex officio singulis annis profaciendis istis officialibus. Et quod citatum cap. *indemnitatibus* solum loquatur de elect. Abbatissæ,

batissæ, patet ex §. *sane ibidem*, vbi Papa dicit, quod si electio fuerit inuenta canonica, confirmetur: hæc vero electio officialium, vt diximus, non est canonica.

8 Probata sic conclusione quoad vtramque partem sigillatim. In communi probō, quod ista recusatio Prouincialis quoad visitationem, & præfidentiam in electione, facienda sit cum magna causa, & vt verius dicam, nunquam est facienda, maxime si Prouincialis offerat parti oppositæ, vt eligat testes ad libitum. Probo primo, quia (vt suppono certissimum) Prouincialis tanquam Prælatus habet votum in electione Abbatissæ, & officialium pro conuentu Monialium, vt alibi probaui, & praxis obseruat: cum ergo, si ille recusetur ab electione facienda, consecutiue priuetur suffragio quod ferre poterat in dicta electione; sequitur quod debet interuenire magna causa, & iuridicè probata, vt ille debeat pro recusato haberi, & pro priuato ad suffragandum in tali electione. Et hæc causa ad illum priuandum ne assistat in electione Monialium, non debet esse qualis qualis, vt tenet Nauar. *tom. 3. suorum operum*. in expositione capituli *cum coningat. in decimo casu nullitatis, numer. 2.* sed debet esse causa grauissima, & probatissima: maxime in causis Monialium, quæ cum sæminæ sint auidius appetunt, & vehementius instant, & hoc sæpe sine fundamento, vt experientia testatur. Vltimo id videtur probari, quoad vtramque partem, quod videlicet, si Prouincialis in electione associetur testibus non suspectis, & à parte querelante acceptatis, non possit tunc recusari, quia abstulit grauamen, & suspicionem. Probatur hoc inquam ex ip. supra citato *cum cessante. de appellatione*, cuius casus talis fuit. Quidam iudex, in processu sententiæ dixit certam quid, vel comminatus est se rem certam mandatu-

rum, de quo pars appellauit sentiens se grauata à futura comminatione. Iudex audita appellatione, dictum retractauit, & grauamen suspectum sustulit: Consultus Papa respondit, quod iudex in causa procederet, non obstante appellatione, quoniam iam iudex abstulerat impedimentum, propter quod fuerat ab illo appellatum. Idem omnino potest applicari in nostro casu recusationis ne Prælatus assistat in ista electione. Fuit recusatus eo quod timeretur, ne ille in electione laderet partem recusantem. Si Prælatus adducat duos testes beneuolos, & electos ab ipsa parte querelante, iam sustulit grauamen, & suspicionem, iuxta supradicta, & proinde poterit procedere, & præsidere in electione.

9 Adhuc instas. Prouincialis in ista electione de more, ante electionem prius visitat Conuentum: & in ista visitatione poterit subornare singulas Moniales ne dent, vel dent suffragium pro tali: & hæc læsio est iam notabilis, & irreparabilis; & proinde est causa recusationis. Respondeo primo, quidquid de hoc sit, Prouincialem non posse recusari quin visitet in communi, vt satis manet probatum in prima conclusione: per accedens vero est quod affert hæc instantia. Secundo dico quod quando hæc instantia valeret, tunc Prouincialis faciat electionem non præmissa visitatione, cum testibus non suspectis, & sic non poterit recusari ob hanc instantiam.

10 Quæris: an si non obstantibus tot, ac tam claris probationibus, obtineri non possit, vt Prouincialis recusatus assistat electioni Abbatissæ cum duobus testibus à parte recusante acceptatis: possit Prælatus recusatus delegare causam alteri cui voluerit, vt visitet, & assistat electioni: sanorum. super cap. cum speciali de appellat.

pellat. remittens se ad id quod iam dixerat in cap. *si quis* contra clericum de foro compet. tenet quod iudex ordinarius si recusetur poterit committere causam cui voluerit, etiam sine consensu recusatoris: cui fauet ius ciuile in Authentica, *si non contingit* Cod. de iud. & Bartol. in l. i. ff. apud eum à quo appellatur: vbi dicitur quod iudex recusatus non ex toto remouetur, sed illi datur adiunctus Hæc Panorm. & quidem quod attinet ad citatas leges, & Bartolum, libenter concedo pro nostro casu facere, quod scilicet Prouincialis recusatus non ex toto remouetur ab assistentia in electione, sed iuxta citatas leges illi dabitur adiunctus; quod coincidit cum iam dicto à nobis in præcedentibus. non posse scilicet Prouincialē recusari ab electione, si dicat parti recusanti, vt eligat pro se duos testes propitios: hoc enim est dari Prouinciali recusato adiunctum iuxta citatas leges. Quod verò attinet ad dictum Panormitani dicentis iudicem recusatum posse committere causam cui voluerit: De hoc multum dubito, & credo quod non possit. Nam si hoc posset, sequeretur posse illum causam committere alicui suo amicissimo, & sibi per omnia obsequuturo, quem proinde pars recusans maiori iure poterit recusare. Ac proinde dico quod si electionem alteri velit committere id debet facere de consensu partis recusantis, ne postea noua recusatio fiat circa delegatum, si ipse etiam displiceat recusanti. Huius opinionis est expresse glossa in dicto cap. cum speciali. in fine casus. Vbi sic dicit: *Iudex recusatus negotium committat personæ idoneæ de assensu recusatoris ne, illum valeat postea recusare.* Et est hæc doctrina conformis textui illius capituli: vbi vides quod iudex recusatus de assensu recusatoris potest causam alteri committere, qui laturus est sententiam per se, & solus: vt

videas quam merito supra dixerim non posse recusari Prouincialem in electione, in qua nec debet sententiam ferre, nec testes examinare, & debet habere duos testes contra se à parte recusante præsentatos,

## CASVS XXII.

*De quodam Prælato audiente reum solum  
verbo tenus: & de subdito appel-  
lante eadem de causa.*

**Q**uidam Prælatus certæ Religionis capit visitare Conuentum suæ prouinciæ (fuit hic casus alius à præcedente) prius ad id conuocatus fratribus capitulariter, illisque mandans sub censuris, vt visitarent. Prior dicti Conuentus tacuit, visitationi consensit: imo & ipse visitauit coram superiore, proponens quæ habebat. Post aliquot dies visitator vocato Priori Conuentus, illi verbaliter sine scripto proposuit certas culpas, iubens vt ad illas responderet. Prior respondit, ac petiit culpas sibi dari in scriptis, vt posset commode se defendere. Visitator recusauit dare in scripto. Prior hoc denegato, noluit respondere, & posuit recusationem ipsi Visitatori. Quam recusationem Visitator friuolam iudicans, ac reiciens, Priorem suspendit ab officio, nolens committere recusationem arbitris, qui illam iudicarent, sicut Prior petebat: & ab his omnibus dictus Prior appellauit. Et declaratur, quod in ista Religione obseruatur sequens statutum, seu mandatum sui Generalis. *Reus, atque delinquens adducens in suspensionem superiorem suum, coram duobus, vel tribus patribus*  
gratio-

*grauioribus rationes adducet, cur reuereatur iudicium suū superioris, & de prauo eius affectu suspicetur.* His positis.

Quæsitum est primo. Si potuit iste visitator recusari in materia visitationis ab ipso Priore?

Secundo, an dato quod recusari potuerit, fuerit recusatus in tempore debito postquam iam visitauerat?

1 Ad primum quæsitum dico, quod non potuit Visitator recusari vt suspectus ab ipso Priore in principio visitationis generalis, quando Visitator proposuit in capitulo se velle visitare ex officio in communi. Hæc probatur clare ex dictis in casu 21. præcedente, vbi probauimus ex decreto Apostolico, & aliis multis rationibus, non posse Prælatum recusari in visitatione generali, quam facit ex officio. Et quia Prælatus, de quo quæritur, siue Priori in hoc non excessit, sed paruit Prælato in communi visitanti, de hoc quæsito nil amplius dico.

2 Ad secundum quæsitum dico, hunc Priorem recusantem Visitatorem post generalem inquisitionem sibi exhibentem capitula culparum cum animo puniendi, potuisse licite, ac iuste tunc recusare Visitatorem, vel ab illo appellare, nonobstante quod tacuerit, & consenserit illum visitare. Probatur hoc responsum clare ex dictis in casu præcedente 21. à num. 5. vbi diximus Visitatorem in visitatione generali non posse inquirere de aliquo in particulari, nec per testes ibi receptos posse aliquem puniri, vt diximus in alio casu cum Nauar. in *Rybr. de iudiciis*: Cum ergo in visitatione generali, Visitator nihil agerèt in particulari contra Priorem, eius tunc taciturnitas, & consensus in visitatione generali, non potuit illi nocere, quin postea recusaret, vel appellaret valide in secunda visitatione speciali, quando Visitator in particulari illum vocauit, &



culparum capitula dedit vt responderet. Neque hæc nostra hic responsio pugnat cum dicto à nobis supra *casu* 18. *num.* 1. & *seqq.* vbi diximus Prælatum localem, de quo ibi, non potuisse appellare à Prouinciali postquam consensit illum visitare suum Conuentum. Causus enim ille valde fuit dissimilismam ibi Prælatus localis non solum consensit in visitatione generali, sed etiam illa transacta, cum Prælatus iam procederet in particulari contra illum Prælatum localem, dans illi capitula culparum, ille acceptauit: & deinde post capitula acceptata, idem Prælatus localis recurrit ad Prouincialem, petens tempus longius ad respondendum capitulis; per quæ duo posteriora clare consensit in Prouincialem specialiter inquirentem, vel agentem contra Prælatum localem, & per hæc duo Prælatus localis renunciavit clare causis recusationis modo à nobis ibi dicto. At in hoc nostro casu Prior iste, de quo agitur, post visitationem generalem, vbi primum sensit Visitatorem contra se agere in particulari, per exhibitionem articulorum culparum, reclamauit, & recusauit in tempore debito, si causam habebat iustam recusandi, de quo statim dico.

3 Et antequam vltius procedam, volo hoc semel supponere, & explicare, videlicet, potius hunc Priorem debuisse appellare iuxta informationem, quam recusare. Differt enim valde appellatio, & recusatio in rigore loquendo. Nam appellatio non fit nisi à grauamine iam illato à iudice in processu causæ, vel à grauamine comminato à iudice, vt communiter tradunt Iuristæ, & sic fundatur appellatio in læsione clara facta iam, vel comminata. Recusatio vero iudicis fundatur in præsumptione clara, quod iudex in processu poterit lædere, vel ob ininuitiam antiquam, vel ob consanguinita-

guinitatem, vel amicitiam quam habet cum meo aduersario, & similibus causis recusationis. Itaque valde differunt inter se appellatio, & recusatio iudicis, ad quam accedit exceptio posita contra testem. Quod applicando ad intentum, dico hunc Priorē, contra suum Visitatorem nolentem dare capitula culparum in scriptis, & nolentem iudicare causas recusationis iuxta Ordinis statutum, rectius facturum fuisse si appellaret à dicto Visitatore ob grauamen sibi de facto illatum, in non exhibendis culpis per scriptum, & in non seruando statutum Ordinis, quam dicendo, recuso Visitatorem: hæc enim recusatio supponit interuentionem inimicitiae antiquae, vel similes causas ante existentes ad recusandum: illa vero duo quæ diximus, nolle dare notitiam culparum per scriptum, & omittere formam sui statuti, erant grauamina actu illata, & proinde materia appellationis (si fuerunt sufficientia, de quo statim) & non erant proprie materia recusationis, si iuridice loquendum sit. Et per hæc satis responsum videbatur ad duo tantum quæ sita proposita in informatione. Quia tamen ex informatione multa alia dubia nascuntur, & quotidiana, quorum resolutio forte iuuabit aliquando: ex tenuitate mei ingenij, ex proposita informatione colligo, & dico sequentia.

4 Ex primo quod attinet ad capitula culparum exhibita Priori sine scripto, credo id valide potuisse facere Visitatorem, si alias Prior ore tenus se posset valide, & commode defendere Probo primam partem, (supponendo quod isti Religiosi non tenentur ad apices iuris) Nam exhibere reo, maxime Regulari, capitula culparum in scripto, non est de substantia iuris Probo ex capite *Qualiter & quando. de accusat. l. 2.* vbi Papa tradit formam citandi, & audiendi reum: non dicit quod illi

dentur culpæ, & nomina testium per scriptum, solum ait: *Quod hæc sint reo exponenda, & explicanda.* At exponere, & explicare, sufficienter fit ore tenus, sine scripto. Facit quod Papa addit in fine proxime citati capituli, videlicet quod forma ibi data pro audiendo reo, non sit vsquequaque seruanda in processu Religiosorum: vnde licet in prædicto capite implicite contineatur, quod culparum capitula danda essent reo per scriptum, adhuc Prælati Regulares videntur ab hac obligatione liberi, per id quod proxime diximus ex fine citati cap. *probo 2.* ex his quæ tradit glossa super caput *Cordi nobis est. de appellat. in 6. in fine casus*, vbi ait regulariter, scripturam non esse de substantia rei gestæ, nisi quando lex specificat vt res fiat per scriptum: nam scriptura non est inuenta nisi vt res de memoria non pereat. Citat glossa ad hoc *l. pactum. Cod. de pact. & l. contrahitur. ff. de pignor.* Cum ergo citato capite *qualiter, & quando*, vbi traditur forma audiendi reum, non dicatur vt audiatur per scripturam, & aliàs possit commodè audiri verbaliter: sequitur posse prælatum verbaliter tantum reum Religiosum audire. Dixi, si absque culpis datis in scripto possit se commodè defendere. Nam si capitula culparum essent multa, quæ facile memoriter retineri non possent, vel essent dubie proposita, vt posset prælatus postea arguere, responsionem non dari in forma: tunc teneretur prælatus per scriptum culparum capitula exhibere, quia hoc pertinet ex substantia ad commodam defensionem rei, cui (etiam Religioso) danda sunt omnia quæ pertinent ad substantiam propriæ defensionis, sicut dicitur lumen naturale: & denegata tunc culparum exhibitione per scriptum, posset à Visitatore appellari, quia grauamen fecit in re notabili pertinente ad commodam defensionem.

nem. Quod adhuc confirmo ex ijs quæ tradit glossa ad citatum cap. *Cordi nobis est*, vbi citat cap. *Saluberrimum*. 1. *quest.* 7. vbi dicitur scripturam in appellatione ideo fuisse inuentam, vt obuietur appellanti si postea variare velit. Idem ego applico in hoc casu: Si prælatus ore tenus tantum reo exhiberet multa capitula culparum, & aliqua confusa, necessaria omnino esset scriptura, ne prælatus, vel reus postea variarent. Secus, si vna tantum culpa, eaque clara exhiberetur: tunc enim credo ore tenus id posse fieri, iuxta prædicta in principio huius *num.* 4.

5 Quod attinet ad aliud in informatione propositum, videlicet quod Visitator reiecit appellationem, seu potius recusationem Prioris tanquam friuolam, eaque nonobstante, processerit, & ab officio suspende- rit: dico id facere potuisse, si recusatio erat friuola. Est communis Iuristarum, & recepta in praxi, & clare colligitur ex cap. *cum speciali. de appellat.* vbi papa solum iubet dari arbitros pro examinanda causa recusationis iudicis, quando causa est iusta; ibi in textu. *Causam iustæ suspicionis assignet.* Si ergo recusatio non fuerit iusta, sed iniusta, & friuola, seu nulla, non tenetur iudex illi deferre, nec arbitros eligere iuxta formam ibi traditam. Circa quod noto primo, ex margine paruo ibi posito ad latus glossæ communis *ver. iustæ*, quod si clare constat recusationem esse iniustam contra ius, vel friuolam, & inutilem, tunc iudicem posse illam per se rejicere non vocatis arbitris: probat ibi glossa ex cap. *cum olim. de causa posses.* & citat Innocentium, Hostiensem, & Ioan. Andr. Secundo noto, quod cum causa recusationis est dubia, an sit iusta, vel friuola; tunc iudex tenetur abstinere, & vocare arbitros, qui illam iudicent, iuxta formam traditam in citato cap. *cum speciali.* Statutum

tum vero istius Religionis citatum in informatione circa modum iudicandæ recusationis prælato porrectæ coram duobus ienibus, cum nihil novum contineat præter ius commune citatum. Eodem modo debet, ac debuit tunc exponi, sicut dixi proxime in hoc *num. 5.* de recusatione clare iusta, vel clare iniusta, vel friuola. Et pro maiori adhuc noticia istius rei quotidie contingentis, noto ex Rodrig. *tom. 1. quest. 8. art. 13.* in principio, illam appellationem dici friuolam, quæ ponitur sine iusta causa, videlicet quando recusans nōc st grauatius iniuste: vel quando est vana & inutilis, ita vt non possit sortiri effectum; quod licet ibi dicat de appellatione, potest tamen applicari ad recusationem, quod scilicet erit friuola, quando recusans sine vlllo fundamento timet processum iudicis, vel timet friuole, vel inaniter, vel iniuste; & proinde tunc iudex per se solum potest reijcere.

6 Potest etiam quæri, an de essentia recusationis sit, quod ponatur in scripto, vel quod exprimatur causa recusationis? Dico primo, non esse de essentia illius, vt recusans id faciat per scriptum: nam in citato capite *Cū speculi.* vbi traditur forma recusationis, non dicitur quod fiat per scriptum, solum dicitur, quod coram superiore assignet causas suspicionis, quod verbo tenus fieri potest: cumque ibi textus non requirat scripturam, neque nos debemus requirere. Addo tamen de substantia recusationis omnino esse, vt recusans corā iudice recusato assignet causas recusationis. Probo efficaciter, nam cum lex tradit formam substantialem seruandam in aliquo actu, si illa forma non seruetur, corrumpitur actus, vt tradunt communiter Doctores, maxime Suarez *lib. 5. de legibus. 1010 cap. 31.* citans multos: At in citato cap. cum traditur forma recusationis, & requiritur

quiritur expressio causæ, illa forma est essentialis siue substantialis. Probo ex Suarez *eod. cap. num. 3.* vbi tradens regulas ad cognoscendum an forma tradita à lege pro aliquo actu, sit substantialis, an accidentalis: ait, quod quando forma præscripta per legem continet naturalem æquitatem, sine qua actus non potest fieri valide; seu quando est de re necessaria vt actus fiat, tunc talis forma est substantialis, & eius ommissio viciat actum. Iam vero in recusatione Prælati, expressio causæ continet naturalem æquitatem, vt recusatio obliget: imo talis expressio causæ est omnino necessaria ad acceptandam recusationem, nam cum Prælatus iuxta citatum *cap. cum speciali.* & supradicta, non teneatur acceptare recusationem friuolam, & iniustam, sed solam recusationem iustam; vt hoc debite fiat, omnino necessarium est, vt recusans exprimat causam propter quam recusat, vt sciat iudex an teneatur recusationi deferre. Et hoc clare tenet glos. in *cap. Cordi nobis est*, supra citato, *in verb.* Interlocutoria, *in fin.* vbi ait etiam Papam iubere, vt appellās exprimat causam appellationis, vt sciat iudex an causa iusta sit, quæ illum obliget ad acceptandam appellationem: an vero friuola sit, quam possit ac debeat reijcere. Hinc vides quā friuole, & nulliter aliqui coram Prælato aliquando dicunt: Recuso te, vel: es mihi suspectus, vt probabo. Nihil enim faciunt, & nihil valet talis protestatio, & recusatio sine expressione causæ. Et per hæc respondebatur ad recusationem intentatam ab isto Priore, cuius forma hîc non declatur.

7 Potest vltimo dubitari de forma appellationis, qua Prior appellauit, an scilicet appellauerit in scripto, & expresserit proprie causas ob quas appellabat: vt enim iam diximus supra *in casu 18.* per multos textus constat,

constat, quod appellatio debet duo continere: primo, vt fiat in scripto, & 2. vt contineat causam appellationis: & hoc, vt ibi diximus, intelligitur, si appellatur à grauamine, vel ab interlocutoria: Nam si appellatur à sententia diffinitiva, nullum ex illis duobus requiritur. Quia tamen casus quotidianus est, & mores mutant leges: ego claritatis gratia, de vtroque sic iudico. Attento rigore iuris appellatio facienda est in scripto: Iura enim citata *dicto casu* 18. maxime capitulum, *Cor-di nobis est. de appellat. in* 6. ita clare loquitur, vt appelletur in scripto, vt nullæ dubitationi locum relinquat. Et probari potest secundo ex traditis à Sanchez *tom. 2. Decal. lib. 6. in simili materia, vbi num. 3* 1. citans *l. contractus* 16. *de fide instrum.* & glossam in cap. *in scriptis*. communiter receptam, dicit, quod vbi lege, vel partium conuentione contractus scriptura indiget, est irritus ea deficiente, quod affert ad probandum, quod si Prælatus alicui concedat licentiam vt intret clausuram Monialium, idque concedat sine scriptis, quantumcumque causa ingrediendi iusta sit, ait peccaturum ingredientem, & licentiam esse nullam, quia data fuit sine scripto, cum aliàs Concilium dicens vt detur in scriptis, & forma Tridentini non feruetur. Cum ergo tot leges loquentes de appellatione, requirant vt fiat in scripto, videtur pertinere ad substantiam appellationis, & substantiam iuris, vt fiat in scripto, ita vt si fiat voce tantum non sit valida. Sed video contra hoc duas exceptiones. Prima est, quando appellatio non fit verbo, sed factò per arreptionem itineris ad Superiorem, de qua supra citato casu 22. tunc enim neque appellatur scripto, neque causa exprimitur. Secunda exceptio traditur à Syluest. *verb. Appellatio. quest. 4.* vbi citans Panormitanum, ait, quod si appellans ab interlocutoria, appellet

appellet viua voce; & incontinenti, & causam exprimat, valebit appellatio. Huius rei causam contra tot textus nullam affert, nisi forte vsus contrarius ita iam obtinuerit, vt valeat appellatio à grauamine, vel interlocutoria absque scripto. Ego id non consulerem, maxime in re graui, etiam in Regularibus. Quod vero attinet ad secundam conditionem appellationis, vt scilicet semper exprimatur causa cur appelletur, omnino dicendum est, semper esse exprimendam, & esse de substantia illius; & probatur eisdem omnino rationibus, quibus *num. 6.* proxime præcedente ostendimus esse de substantia recusationis, vt in illa exprimatur causa recusandi. Nam cum iudex habeat ius in utroque iure, vt possit repellere appellationem friuolam, non poterit vti hoc suo iure; nisi appellans exprimat causam ob quam appellat, vt videre possit iudex an appellatio sit friuola vel iusta.

---

### CASVS XXIII.

*De quodam teste fatente veritatem in suo testimonio: & postea nolente subscribere ob scrupulum.*

**I**N quodam oppido vbi erat Conuentus Monialium, fama fuit publica noctu duos viros fuisse ingressos clausuram per murum; de hoc infamatus fuit in particulari, Petrus v.g. Quidam sæcularis Ioannes v. g. admonuit confessorem Monialium de hoc ingressu, dicens Petrum fuisse ingressum: & postea rumor fuit, quod secunda vice prædictus Petrus fuisset ingressus clausuram. Sparsa fama, Prælati regularis illius Conuentus



uentus ad punitionem sæcularis delinquentis per suū iudicem, vel ad Monialis culpæ supplicium, fecit inquisitionem generalem de persona delicti, nam corpus delicti erat notorium. Vocauit Prælatus testes etiam sæculares, qui se libenter dixerunt velle testificari. In inquisitione generali de nullo in particulari inquisiuit; licet ob paruitatem populi, & alia iudicia prædictus Petrus esset diffamatus de ingressu, ac de eiusdem Petri ingressu iam confessorem Monialium præmonuerat Ioannes. Inter alios testes ad hanc generalem inquisitionem vocatos, fuit etiam ille Ioannes, qui confessorem monuerat. Ille recepto iuramento coram Prælato, & secretario, dixit se tali nocte vidisse prædictum Petrum per murum Monialium ascendentem; vel descendentem dictisque aliis sufficientibus ad hoc suum dictum probandum, rogatus à iudice vt subscriberet suo dicto ac testimonio, substitit parumper, & quasi poenitens facti, dixit se non posse, nec velle testimonio subscribere, quia nolebat secretum naturale violare: & ita abiens non subscripsit; sed mansit scriptum, quod ille dixerat se vidisse propriis oculis.

I Quæsitum fuit: an dictum istius testis Ioannis aliquid valuerit ad faciendam fidem talis ingressus contra Petrum? Et videtur quod nullius fuerit momenti: Nam ipse retractauit suum dictum per illud, quod fecit: Testis autem potest retractare suum dictum, maxime si id faciat incontinenti, vt dicitur clare in capite 1. *de testibus cogendis*, & gloss. in *Authentic. de testibus*, § *Quia vero*. Cum ergo iste Ioannes videatur incontinenti se retractasse, imo & ante subscriptionem testimonij, videtur illius dictum nullum robur habere. Secundo, quia de obligatione testis est quod suum testimonium firmet subscriptione, vel per se, vel per aliū, petendo

petendo alicui, vt pro se subscribat, vt praxis obseruat. At Ioannes iste suo testimonio noluit subscribere; ergo erit, nullum, eo quod nolens subscribere videtur noluisse testificari.

2 His non obstantibus, ego credo ac ita, dixi, dictum testimonium Ioannis, fuisse verum testimonium, non obstante, quod subscribere recusauerit: ac proinde potuisse iudicem ex vi illius testimonij concurrentibus aliis quę cum illo facerent sufficientem probationem, procedere ad imponendam pœnam prædicto Petro antea diffamato.

3 Probo præcedens proxime dictum ex iis quę tradit Rodrig. *in ordine iudiciario cap. 7. concl. 11.* vbi citans Nauarr. & Medinam tenet, quod testis legitime interrogatus à iudice tenetur veritatem dicere, etiam si antea parti iurauerit se seruaturum secretum: & causam assignat, quia veritatem tacens lædit partem accusantem cuius iustitia pendet ex hoc testimonio. Et licet ibi videatur hoc solum dicere quando proceditur via accusationis: Nihilominus habet etiam locum in nostro casu, in quo processum est via inquisitionis generalis, & casus erat notorius in oppido paruo, & nimis scandalosus: & præterea ille Petrus erat iam infamatus, ac denique iste testis non iurauerat Petro seruare secretum, & licet iurasset, iam interrogatus iuridice de reo diffamato, tenebatur veritatem dicere, & aliàs eius taciturnitas præiudicaret bono communi, cui interest vt delicta puniantur; maxime quando sunt notoria, & nimis scandalosa, quale fuit istud. Secundo probatur ex Nauar. *in Rubr. de iudiciis num. 87. §.* Non obstat etiam, vbi tenet quod si testis bene, vel male per peccatum, detexit secretum coram iudice, poterit iudex punire: quia postquam delictum bene, vel male

deductum est in publicam iudicis notitiam, ille tenetur ad castigandum per inquisitionem particularem. Ergo cum iste testis iam bene, vel male hoc delictum iudici manifestauerit, poterit iudex ex hac notitia ductus procedere contra delinquentem. Addo quod videtur hunc testem non peccasse dicendo quod vidit de Ioanne, licet viderit in secreto: nam ut dicitur, iam iste Petrus erat de hoc delicto infamatus, & contra illum erant aliqua iudicia, & proinde videtur quod poterat reuelare iudice iuridice interrogante pro bono tam publico. Tenet hoc ipsum Less. lib. 2. de iust. cap. 29. dubitat. 15. num. 125. citans, & sequens Nauarrum proxime citato loco: & confirmat Less. hoc exemplo. Nam si priuatus quispiam extorsisset crimen alterius per iniuriam, & deduceret illud in publicum, vel in iudicium iudex deberet contra illum procedere: ergo pari modo procedere poterit iudex si aliquis priuatus per iniuriam detegat in iudicio. Idem tenet Valer. Cartusianus in lib. de differen. utriusque fori ver. Inquisitio. differentia 1. conclus. 3. ubi loquens de inquisitione generali, si agatur de bono communi, & crimine notorio, sic ait: Testes tenebuntur dicere, quæ scirent, & manifestare Authorem etiam occultum, & non diffamatum: & citat Innocent. & Iulium Clarum dicentes ita seruare totum mundum. Per hæc ergo patet quod testis, de quo agitur; potuit sine peccato denunciare de isto Petro iam diffamato, & indiciato, ac proinde, quod debuit sine scrupulo suo testimonio subscribere. Et in particulari, quod dictum istius testis, etiam recusantis subscribere, valeat pro teste: probo quia ut dicunt Iuristæ, confessio delicti facta à reo extra iudicium est semiplena probatio, si probetur per duos testes, ut tenet inter alios Iulius Clarus in praxi crimin. quest. 21.

num.

num. 31. & Rodrig. *Addit. ad sum. tom. 4. cap. 155.* sed in hoc casu, iste testis dixit veritatē coram duobus, videlicet coram iudice, & coram notario, quam ille non negat esse veritatem, vt mox dicam, & iudex, & Notarius de hoc testificantur: ergo dictum testis validum est, & facit probationem. Vltimo facit pro hoc optime capite *Ecce.* vigesimo quarto quæstione tertia, vbi dicitur quod crimina vnde cumque claruerint, debent curari.

4 Ad primum argumentum in principio dicendum est hunc testem non retractasse testimonium quoad substantiam veritatis, nec dixisse; dixi falsum; & hoc solum est retractare. At significauit à se tunc dictum, licet esset verum, nolle se illud subscribere, quia putabat ( licet falso ) se non potuisse dicere. Nolle autem subscribere ob hunc scrupulum, non est testimonium retractare vt patet. Textus autem citatus loquitur solum quando testis prius testificatus falsum, incontinenti retractat se, & dicit, se in primo testimonio non fuisse loquutum confiderate. Ad secundum argumentum dicendum est primo subscriptionem testis non esse de essentia testimonij, quamuis enim de consuetudine, & de solemnitate iuris semper testis subscribat, si scit scribere: tamen non inueni apud vllum doctorem, quod sit de essentia testis, vt testimonium subscribatur à teste: solum iura requirunt quod testis sit iuratus, & iste iurauit: Nō lego in criminalistis, quod sit de essentia testis vt subscribat, maxime quando proceditur de plano, & constat per iudicis, ac Notarij testimonium, quod iste testis post dictam veritatem, vel ob suam scrupulum, vel ob suam ignorantiam noluit subscribere. Facit quod dictum est *casu 22. præcedente* ex *Glos. fa. & l. ibi citata*, quod scilicet scriptura non est inueni.

ta ad valorem rei gestæ, sed ad rem conservandam in memoria. Et subscriptio, quam iste testis noluit facere, mansit clare in memoria iudicis. & Notarij, qui viderunt illum vere testificantem, licet viderent recusantem subscribere.

---

C A S V S XXIV.

*Si Prælatas Regularis teneatur indicare subditum  
reum secundum rigorem, vel decretum  
legis secularis sui regni.*

**C**ontigit in quadam Religione, Religiosos vnius conuentus commisisse aliqua delicta, & inobedientiam erga quendam Prælatum visitatorem illius conuentus missum autoritate Collectoris Apostolici illius regni. Ille Prælatus fuit iniuriatus à Religiosis aliquibus illius Conuentus, & statim assumpto Notario fecit inquisitionem generalem de delinquentibus; ex qua contra aliquos Religiosos resultauit probatio aliquorum delictorum. Et quia ista generalis inquisitio facta fuit ab ipsomet iudice læso, qui alias poterat videri suspectus: Collector Apostolicus commisit secundo visitationem illius Conuentus, & ratificationem primæ visitationis duobus Religiosis grauibz non suspectis, qui autoritate Apostolica visitarunt denuo eundem Conuentum. In hac secunda visitatione, pauci Religiosi aliquid de nouo addiderunt ad dictum in prima visitatione. Sed fere omnes se remiserunt ad id quod dixerant in prima visitatione: & fuit illis singulis lectum proprium testimonium quod dederant

derant in prima visitatione generali, post hæc omnia, Collector Apostol. commisit hanc causam iudicandam aliquibus Religiosis cum Auditore eiusdem Collectoris, contra Religiosos illos, qui culpati inuenti fuerant. Religiosi culpati hanc posuerunt exceptionem, & obiectionem: dicentes, illam secundam visitationem ratificatiuam primæ nullam fuisse, nam lex istius regni Portugalli *lib. 5. tit. 50. §. 10.* Dans licentiam iudici iniuriato ratione officij, vt faciat processum contra se iniuriantem in præsentia: ait quod iudex iniuriatus faciat processum in eodem die factæ iniuriæ: At Prælati iniuriatus de quo agitur, fecit processum multos post dies à commissa iniuria. Secundo quia citato loco iubet lex, & Rex, vt iudex iniuriatus non per se, sed per alium inquisitorem testes iniuriæ sibi factæ excipiat. At in prima visitatione Prælati iniuriatus per se ipsum omnes testes excepit, & quasi fuit iudex in causa propria: & proinde ex his duobus capitibus, seu defectibus prima inquisitio generalis fuit nulla. Tertio, eadem lex Portugalliæ *lib. 3. Ordin. tit. 62. §. 2.* dicit, quod quando facienda fuerit secunda inquisitio, vel processus in defectum prioris processus facti à iudice suspecto, tunc secundus iudex combusto primo processu, neque per illum interrogando, vadat ad locum, & testes interroget, non patiendū quod se remittant ad dicta priora, sed dicant de nouo quæcumque scierint, ne forte videntes testes priorem processum, timeant ne suum dictum in secundo contrarietur à se dicto in priori. At in isto processu, seu secunda inquisitione generali, duo reuisitatores non combusserunt priorem inquisitionem: sed illa in mensa ante oculos posita interrogabant quoscumque testes, qui vt plurimum remittebant se ad dictum in priori inquisitione,

quod illis denuo legebatur: quorum aliqui aliqua de nouo dicebant, aliqui dictum suum prioris visitationis declarabant: & proinde etiam hæc secunda visitatio generalis ratificatiua, fuit nulla, eo quod facta sit clare contra formam citatæ Ordinationis. Et confirmatur, quia testis debet ferre testimonium ex ore proprio, non scripto, non signis, & similibus. At hi testes in secunda visitatione remittentes se ad dictum in priori visitatione, iam non testificabantur ore proprio. Et ultimo potest confirmari ex eo quod tradit Rodrig. *tom. 2. qq. quæst. 21. art. 3.* vbi dicit quod Prælati Regularis in iudicando deficiente lege canonica, recurrat ad suam Regulam, & statuta: & his deficientebus, debent recurrere ad ius ciuile, præcipueque ad leges ciuiles regni in quo viuunt. At leges ciuiles regni istius annullant primum, ac secundum processum factum, vt supra vidimus: ergo Religiosi culpati in illis processibus non potuerunt iudicari, vel puniri iuxta illos.

1 Pro responsione quæstionis præmitto primo, rem esse certissimam quod Religiosi non tenentur seruare leges sæculares, maxime in pœnalibus: ad hoc enim habent priuilegium exemptionis, per quod omnino eximuntur ob omni iurisdictione sæculari: & vt illorum delicta puniantur habent ius canonicum, deinde suam Regulam, tertio statuta Religionis: nulla enim Religio est, quæ non habeat suas leges, ac statuta pro delinquentibus puniendis. Quod confirmo claro exemplo: nam, magis exempti sunt Religiosi à legibus ciuilibus, & pœnalibus sui Regis, & Regni, quam sunt Reges particulares à legibus iuris ciuilis communis Imperatorum, quia Imperator est caput Regum: & Rex istius regni nullam habet superioritatem ad condendam legem pœnalem, quæ obliget hanc Religionem,

nem, Et tamen videmus, quod Reges particulares in suis regnis non obligantur iudicare secundum leges Imperatoris: sed vnusquisque Rex propriam legem condit in aliquibus negotiis, per quam iubet casus sui regni iudicari omiſſa lege iuris ciuilis communis: ergo à fortiori id poterunt facere Religiones pro iudicandis cauſis Religioſorum, cum Religioſi Prælati magis exempti ſunt à iuriſdictione Regis, quam Rex exemptus ſi à iuriſdictione Imperatoris.

2. Præmitto ſecundo, omnes Religioſos hodie, ſaltem per communicationem priuilegiorum, habere priuilegium, vt in cauſis Religioſorum non ſeruentur apices iuris, ſed ſola iuris ſubſtantia, ſicut in particulari Bonifac. VIII. conceſſit Fratribus Minoribus, prout habetur in *Moniment. Ordinis. fol. 125.* & in particulari eodem fruuntur Religioſi Ordinis iſtius, de quo agitur, & Collectores Apoſtolici in hoc Regno conceſſionem habent à ſua Sanctitate, vt in cauſis decidendis poſſint etiam procedere de plano non ſeruatis apicibus iuris.

3. Præmitto tertio, quod leges ciuiles non obligant Clericos, nec proinde Religioſos, vt inter alios probat ſuſe, & efficaciter Azor *tom. 2. ſumm. lib. 10. cap. 7. queſt. 9.* vbi ait, quod tunc ſolum lex ciuilis obligabit Clericum, quando fuerit approbata per Eccleſiam, vel quando lex illa agit de re obligante ex iure naturali, vel diuino: & quod etiam in hoc caſu lex ciuilis non obligat Clericum ſicut lex ſæcularis, ſed obligabitur Clericus à lege Eccleſiæ approbantis legem ſæcularem, vel à lege diuina, vel naturali, obligantibus ad illud quod præcipit lex ſæcularis: Quæ omnia fundantur in omnimoda exemptione qua Clerici eximuntur à poteſtate ſæculari. Quod ſi lex ſæcularis non obligat Clericos



iuxta prædicta, multo minus obligabit Religiosos, qui habent plura priuilegia eximentia illos, non solum à potestate sæculari, sed etiam à iurisdictione Episcoporum, & cæterorum similium Prælatorum. Et confirmatur in particulari quod Religiosi in causis criminalibus non obligentur ad leges pœnales sæculares: nam lex pœnalis sæcularis sæpe imponit pœnas incompatibiles Religiosis, utpote exilium, pœnam pecuniariam, & mortem, quæ pœnæ non possunt Religiosis irrogari: Ergo sicut Religiosi in impositione pœnæ non obligantur ad legem sæcularem, sic etiam non obligabuntur ad alias dispositiones legum sæcularium circa causas decidendas, & processus faciendos, maxime si sint causæ criminales.

4 Hoc posito sit prima conclusio. Prima inquisitio generalis, de qua est quæstio, facta à patre iniuriato non fuit inualida, ex eo quod illam non fecerit, eodem statim die, quo fuit facta iniuria; neque item ex eo quod ipse per se testes exceperit, contra duo in oppositum à lege Portugalliæ præcepta. Probo 1. ex proxime dictis, nam Religiosi non tenentur seruare legem sæcularem eiusve dispositionem in suis causis formandis, ut satis probatur ex dictis in tribus numeris præcedentibus. Et in particulari confirmatur ex citata concessione Bonifacij VIII. in qua ponit hæc verba: *Ad correctiones, & punitiones infligendas procedere valeant secundum consuetudines approbatas, & secundum generalia statuta facta, vel facienda rimulis iuris, & apicibus postpositis.* Vbi clare iubet causas Religiosorum, iudicari secundum sua statuta, non secundum leges sæculares. Secundo, quia etiam si illa lex esset canonica, ut processus fieret in eodem die, in quo facta est iniuria, adhuc ad id non obligaretur Prælatus regularis exemptus à iuris apicibus:

apicibus: nam fieri processum hodie, vel cras, non potest pertinere ad substantiam iuris, vt patet: quid enim facit ad substantiam iuris si processus hodie fiat, vel cras, si aliàs seruentur substantialia illius? Et quod attinet ad secundum punctum, de assistentia Prælati excipiente prædictos testes in sua causa propria: dico non esse in hoc casu aliquid, contra substantiam iuris. Probo euidenter ex ipsa lege Portugalliæ citata: Nam ibi Rex in pœnam iniuriantis iudicem, concedit vt iudex iniuriatus ferat sententiam in sua causa propria, neque credit lex esse contra substantiam iuris ferre iudicem sententiam in causa suæ iniuriæ; at multo minus est, & minus periculosum excipere testes cum Notario, in cuius præsentia non potest iudex testes corrumpere, quam iudicem læsum ferre sententiam in suo casu: ac proinde si non est contra substantiam iuris, ferre sententiam in sua causa, etiam non erit contra substantiam iuris excipere testes cum Notario in sua causa: & proinde si illi conceditur illud primum quod est majus, potuit etiam concedi hoc secundum quod est minus, maxime per cap. *præterea super de offic. & potest. iudicis delegati*: vbi Papa dicit, quod eo ipso quod causa aliqua alicui committitur, super omnibus, quæ ad ipsam causam spectare noscuntur, plenariam recipit potestatem. Sic ibi. Tertio probatur euidenter non fuisse obligatum istum Prælatum regularem ad faciendum processum in eadem die, nec ad excipiendos testes per alium inquisitorem: nam si ad hoc præcise obligaretur per illam legem sæcularem, obligaretur pariter in sententia imponere pœnam taxatam ab eadem lege, exilij Affricani, v.g. pecuniæ, & similibus, quod nemo concedit. Ergo sicut ad impositionem pœnæ non tenetur, neque obligabitur ad dispositionem legis illius.

Ultimo probatur, quia hoc quod est Prælatus iniuriatum posse punire subditum iniurantem lata sententia, non est solum lex secularis Portugalliæ, sed etiam est lex Imperialis communis, l. *Senatusconsult. ff. de offic. presid.* per quam conceditur iudici iniuriato punire propriam iniuriam sibi factam; at in dicta lege, Doctores illam citantes, & explicantes, non dicunt quod iudex iniuriatus debeat eodem die facere processum, & per alium inquisitorem testes excipere. Vide Riccium 5. par. *Decisionum, decis.* 1977. & Iulium Clarum in *praxi crim. quest.* 35. num. 26. & eius commentatorem Bajardum ad citatam questionem, quorum nullus exprimit pro obligatione eiusdem legis debere iudicem lesum eodem die iniuriæ facere processum, & testes per alium excipere. Et in particulari Riccius citato loco ait posse iudicem offensum cognoscere causam, & esse iudicem in propria causa, & citat Cancer. Licet ergo lex Portugalliæ obliget ad illas duas clausulas, lex civilis ad illas non obligans poterat valide, ac licite observari ab illo primo visitatore prædictas illas duas clausulas omittente: cumque lex Imperialis illas omiserit, siquum est quod non sunt de substantia iuris.

5 Confirmantur hæc amplius per id quod tradit Aldrete lib. 2. de relig. *discip. cap.* 17. num. 15. videlicet quod Prælatus potest punire iniuriam sibi factam, si iniuria est notoria, & præterea si est pœna certa posita in lege: & ad hoc citat multos Doctores, nec requirit duas citatas condiciones, ut testes per alium excipiat, & eadem die; & addit Aldrete, quod si iniuria non fuerit notoria, nec habet pœnam certam taxatam, tunc inferior Prælatus causam remittat Prælati superiori, facta informatione, ut illam puniat: & ita asserunt multi textus ibi ab eodem citati. At in isto nostro casu iniuria

iuria fuit notoria, & est pœna taxata in multis textibus, & præterea Prælatus offensus fecit solum informationem, quam remisit ad superiorem, videlicet Apostolicum Collectorem.

6. Secunda conclusio. Secunda inquisitio generalis facta modo supra dicto à duobus visitatoribus delegatis, non combusta priori visitatione, sed excipiendo testes, qui se remittebant ad dicta in priori visitatione, non fuit nulla ex defectu, quod testes non dicebant testimonium per extensum, & ore tenus, sed se remittebant ad dictum in priori visitatione. Principale fundamentum istius conclusionis est, quod iam diximus, videlicet, Religiosos non obligari ad illam legem civilem, & præterea, quia testem dicere testimonium per extensum, non obligat de iure, quando idem testis iam idem testimonium dederat in alia inquisitione priori, etiam nulla, & ad illam se remittit in secundo examine testium. Habet hoc expresse Ric. 5. *par. suarum Decisionum, decis. 1791.* ubi ait, quod quando primum examen testium fuit nullum (vt pars opposita accusat fuisse hanc nostram primam visitationem) tunc, ait Riccius, licet primum examen testium non fuerit rite factum, poterit testis examinari super eisdem attestationibus, & poterit se remittere ad depositionem in primo examine factam. Et citat ad hoc Decisionem quandam Rotæ Rom. *num. 287.* & Guidonis Papæ. Idem tenet in terminis Miranda in *Ordine iudiciario, quest. 24. art. 6. concl. 2.* citans Paz in *sua praxi tom. 1. par. 5. cap. 3. §. 9.* & praxis obseruat, quod sæpius testes se remittunt ad suam antiquam depositionem in alio examine factam. Iam ergo apparet quod non sit contra substantiam iuris, quod, testis se remittat ad suum dictum in alio processu datum, & proinde non esse de substantia

substantia iuris, vt in secundo processu dicat omnia per extensum ore proprio: cumque hoc non sit de substantia, sed de apicibus iuris, ad id Religiosi non tenebuntur, ab eisdem apicibus exempti. Idque maiorem vim habebit, si tali testi in secunda visitatione lectum fuit primum dictum in priori visitatione, & ille ratificet, sicut dicitur in hoc nostro casu contigisse. Quod vero noua ratificatio actus antea inualidi, ratificet, & reualidet actum præteritum inualidum, res est notissima, & multis firmata exemplis. Nam professus nulliter, postea sublato impedimento, per se solum, & interne potest ratificare priorem professionem nullam, vt est communis opinio, & inter alios probat Sanchez *lib. 5. Decal. cap. 4. a num. 30. & seqq.* Item matrimoniū antea nullum, sublato impedimento potest reualidari postea per actum ratificatiuum, idq; sine noua solemnitate Parochi, &c. Confirmatur ex regula iuris in 6. in quo dicitur *reg. 10.* quod ratihabitio retrahitur, &c; & ibi ponuntur exempla quibus probatur ratihabitionem subsequentem confirmare, & reualidare actus nullos præteritos: & idem tenet Sarmiento 1. *part. de Reddit. Ecclesiast. cap. 3.* dicens id maxime locum habere, quando ista ratificatio fit solemniter, sicut facta est ista coram duobus visitatoribus delegatis, & Notario: & citat Sarmien. aliquos textus. Idem tenet Riccius 1. *par. Collect. 344.* dicens, quod ratificatio operatur validitatem actus, seu processus aliàs inualidi, & citat Doctorem vnum.

7 Confirmo hæc omnia clarissimo exemplo Theologo, quod ponunt Theologi in sacramento confessionis sacramentalis. Hæc enim ex doctrina Theolog. & præcepto Christi D. facienda est à pœnitente ore proprio, ac de singulis peccatis: quo non obstante dicunt  
Theol.

Theol. quod si ego heri feci tria, vel quatuor peccata coram meo Confessore, & hodie illi confiteor; sufficienter confitebor, dicendo, accuso me Pater de illis quæ heri vidisti me facere contra legem Dei: idque nihil exprimendo, sed remittendo se ad factum hesternum. 2. dicunt Theologi, quod si ego feci confessionem nullam alicui Confessori propter aliquem defectum annullantem confessionem, & post octo dies ablato obice, iterum eidem Confessori confiteor, tempore quo Confessor adhuc habet memoriam meorum peccatorum, licet non exactissimam, dicunt Theologi, quod erit confessio valida, si pœnitens in genere solum dicat, Accuso me de omnibus quæ tibi confessus sum octauo ab hinc die in præterita confessione, absque eo quod de præteritis peccatis aliquid exprimat, sed solum se remittat ad dicta in confessione præterita. Hæc duo exempla ponit Suarez *tom. de pœnitentia dispnt. 22. sect. 6. n. 5. & 6.* citans alios. Quæ omnia satis comprobant, vt debeant valere testimonia data per Religiosos (de quibus agitur) in secunda visitatione ista, licet in illa nihil dixerint denuo ore tenus, sed solum se remiserint ad prius testimonium datum in prima visitatione, illisque in secunda ista visitatione iterum lectum. Neque hoc secundum testimonium, lecto sibi priori, dicendum est testimonium datum per papyrus tantum (quod reprobatur in cap. *Relatum 5. quest. 2. & l. de Minoribus ff. de Minor. §. 2. de quo Rodrig. tom. 4. sum. cap. 153. numer. 6.*) Non inquam hoc testimonium est datum per papyrus tantum, sed ore proprio, cum testis sibi lecto priori testimonio, dicat ore proprio se ratificare illud omne sibi nunc lectum, & in priori dictum. Imo etiamsi non legeretur sibi nunc prius testimonium, sed solum diceret remitto me ad prius

prius testimonium, non diceretur secundum dari per papyrum tantum; nam sic dicendo, ratificat illud quod iam dixerat ex ore proprio.

8 Aliam exceptionem, siue excusationem opposuerunt Religiosi culpati dicti Conuentus, & fuit: quod cum dictus primus visitans primo publicauit litteras suæ commissionis ad visitandum, aliqui Religiosi opposuerunt prædictam commissionem Apostolicam non intelligi pro illo Conuentu, & sic dubium fuit de valore suæ commissionis: Quo dubio stante, Religiosi inobedientes, ac delinquentes non videntur puniendi tamquam resistentes Prælato, vel visitatori Apostolico: cum dubium esset an reuera talis esset. Ad hoc primo respondeo Collectorem Apostolicum, qui eidem visitatori commissionem dedit ad visitandum prædictum Conuentum, post illam seditionem, & inobedientiam consultum, respondisse, priores à se datas litteras commissionis pro illo Conuentu visitando veras, ac validas fuisse, & sine causa ab aliquibus male fuisse interpretatas. Quo posito dico secundo quod si iste prior visitator ostendit litteras suæ commissionis, quæ erant claræ, & per solam proteruiam poterant impediri, nec ipsi inobedientes fecerunt debitam diligentiam ad probandam illarum nullitatem, sed ex passione præcipue, id impediuerunt, non euadent pœnas inobedientibus constitutas. Declaratur exemplo occidentis clericum, qui reuera erat clericus, sed occidens nesciuit esse clericum, quia non fecit debitam diligentiam ad hoc sciendum: iste talis non liberatur ab excommunicatione, quia culpa sua ignorauit: quod posset applicari ad hoc intentum. Adde quod licet certo constaret litteras commissionis illius visitatoris primi esse nullas, non habebant licentiam Religiosi illi inobedien-

inobedientes ad illum repellendum iniuriis, verbo, vel facto exhibitis, de quarum punitione agitur: sed poterant illum à visitando repelli alii iuris remediis, vt appellando, vel coram illo non comparendo in visitatione, & similibus.

9 Ad primum argumentum in contrarium fundatum in violatione, seu non obseruatione legis sæcularis Portugalliæ, patet satis solutio ex dictis *num. 3. & 4.* vbi euidenter probauimus, Religiosos non teneri in suis causis obseruare leges sæculares. Ad confirmationem, patet solutio ex dictis in *num. 7. in fine*, vbi diximus testes secundæ visitationis remittentes se ad dictum in priori visitatione, dicendos esse ferre testimonium ex ore proprio, & non per papyrum, ob causam claram ibi datam, & propter exemplum confessionis sacramentalis eodẽ *num. 7.* adductum. Ad dictum Rodrig. qui dicit Religiosos in iudicando debere recurrere ad leges sui regni, dico primo, illum ad id non obligare: solum dicit, oportere ita fieri: & licet Rodrig. diceret ita omnino esse faciendum: illius solum dictum non sufficit vt obliget Religiosos seruare leges sæculares ob multa quibus in præcedentibus ostendimus Religiosos ad id non teneri. Et licet Rodrig. ibidem citet Baldum, Cumanum, & Decium, dicentes Religiosos in genere debere iudicare secundum leges iuris communis ciuilibus, hi tres authores sæculares non habent authoritatem vt Religiosos ad illum obligent, cum post illos multa priuilegia exemptionis sint concessa à summis Pontificibus, per quæ Religiosi eximuntur à legibus sæcularibus. Adde quod post illos tres Doctores, alij Doctores graues, & Recentiores vt Riccius, Guido Papa, Paz, & Miranda citati *num. 6.* dixerunt posse testem se remittere ad suum prius antiquum



quum testimonium datum etiam in processu nullo: & per hanc suam remissionem ad illud, mansurum prius testimonium revalidatum, de quo est principalis quaestio istius casus. Et addo quod aliqui viri satis docti in hac Olyssipone consulti, dixerunt, quod saltem secunda visitatio facta à duobus Reuicatoribus modo supradicto fuit valida, & firma.

---

### CASVS XXV.

*De quodam Religioso machinante mortem  
contra suum Prælatum, sed  
non secuto effectu.*

**I**N quadam Religione, quidam Religiosus machinatus est mortem suo Prælato, non locali, sed superiori, maiori, qui Episcopo correspondet. Ad hoc consuluit quandam mulierem, quam putabat veneficam, quæ illi dedit duo remedia per ipsum applicanda; dicēs vnum continere venenum, alterum esse veneficium: quæ duo si applicasset, esset assecuturus intētum. At mulier atrocitatem criminis horrēs, postea dixit in suo testimonio, quod illa remedia non fuerant venenosa, neque illa veneficium intenderit, sed id dixisse ac fecisse vt se ab illo liberaret. Ille tamen illa duo media, vel remedia adhibuit animo consequendi effectū, vt creditur ex indiciis. Diffamato sic Religioso, factaq; contra illum inquisitione, probata est illi talis machinatio per testimoniū quinque scēminarum, quarū vna fuit illa à se credita venefica, tres aliæ vxoratae, sed honeste vitæ, & alia vidua, quæ testificatae sunt illum remedia

media illa petentem, & machinationem intentantem. Ultra illarum testimonium, probata sunt alia indicia non leuia pro eadem machinatione. Ex quo casu multæ sunt quæstiones exortæ, quarum resolutio potest iuuare ad alios casus quotidianos.

Prima quæstio est: An mulieres possint admitti ad testimonium iuridicum, maxime contra Clericum, vel Religiosum? & quando sunt complices, vt hæc fuit vna.

Secunda. An ista machinatio fuerit conatus ad crimen, quem leges dicunt esse etiam puniendum; maxime cum media applicata non fuerint in se venenosa, neque venefica, sed solum putatiue.

Tertio. Quæ pœna danda sit machinanti mortem contra Prælatum.

Quarto. Quæ pœna imponatur à iure consulenti veneficos.

Quinta. An Religioso in crimine grauissimo, quale hoc fuit, danda sint nomina testium, & dandus sit Aduocatus sæcularis, si illum petierit.

I. Antequam ad quæstiones respondeam, pro claritate criminis, præmitto istam machinationem, has omnes circumstantias inuoluere. Primo, homicidij, vt patet. Secundo, sacrilegij. Tertio, læsæ Majestatis. Nam machinari mortem contra Episcopum, vel æquiualentem Prælatum, reputatur læsa Majestas, teste Baiardo, *comment. ad Iulium Clarum. ver. Læsa Majestas. num. 12.* & innuit Iulius Clarus *eod. verb. Læsa Majestas.* & Bernard. Dias *in sua praxi. crim. cap. 119.* Quarto, fuit crimen ex illis quæ iura vocant crimen exceptum. Quinto fuit crimen proditiõis per venenum factum in occulto, quod proinde requirit minorem probationem. Consonat quod dicit Vmbertus *in præl. Inquisitorum.*

*ver.* Crimina. vbi recensens crimina excepta, numerat etiam crimen perduellionis: perduellis vero est, qui est inimicus Reipublice, vel Principis, teste Calepino, *verbo* Perduellis.

*Ad primam questionem.*

2 **Q**Uod attinet ad primam questionem, videtur primo quod femina non possit esse testis in iudicio, etiam neque contra secularem, maxime in criminalibus. Habetur expresse in cap. *Mulierem* 33. *qu.* 5. vbi de illa dicitur, quod nec docere potest, nec testis esse. Et glossa ibi *verb.* Nec testis, exprimit in terminis, quod in criminalibus non potest esse testis contra clericum. Et in particulari, quod non potuerit esse testis illa quæ dedit illa duo remedia putata venefica, constat ob duo impedimenta: tum quia si venefica erant, non poterat esse testis, quia erat infamis: tum quia erat iam socia criminis per data remedia, & complices criminis non sunt testes in iurē: tum denique quia illa mulier allegauit turpitudinem suam, id est, suum maleficiū putatum dando illa duo remedia; constat vero ex cap. *inter dilectos. de donat.* quod allegans turpitudinem suam (id est peccatum) non auditur. 1. principaliter probatur in genere, nam secularis non potest accusare Clericum, vt habetur expresse in cap. *Ipsi Apostoli* 2. *quest.* 7. & ibidem dicitur, quod neque contra Clericum ferre potest testimonium, qui non est Clericus: vbi glossa *ver.* Ordinis, explicat quod præcipue in criminalibus non possunt seculares esse testes contra Clericum. Multo ergo minus potuerunt esse testes feminae seculares contra Clericum & Religiosum. Et idem habetur citata causa, & quæst cap. *testes.* mox sequenti,

quenti, vbi dicitur quod saculares non possunt esse testes contra Clericum.

3 His nonobstantibus dico, quod fœmina potest esse testis in causa criminali, maxime si crimen sit atrocissimum, & desint alij testes. Hæc deducitur clare ex multistextibus vtriusque iuris. Et imprimis probatur clare ex cap. *quoniam aliqua. de test. & arrest.* vbi Papa iubet recipi testimonium quarundam mulierum contra quendam Clericum, de quo dicebatur, quod cum illis peccauerit. Vbi glossa multa dicit, maxime *verbo* Mulieres. vbi citat alios textus. Idem habetur in cap. *tam litteris. eodem tit.* vbi fœmina admittitur testis contra personam Ecclesiasticam. Et quod in crimine graui & excepto, quale fuit istud, admittatur testis etiam fœmina malæ famæ, habetur in cap. *Tanta. de simonia*: licet enim ibi solum dicatur de admissione in accusatione, idem iudicium est de testificatione, sicut Doctores dicunt cum textu supra citato *ipsi Apostoli 2. quest. 7.* Idem habetur in decreto cap. *ex eo.* vbi etiam admittuntur in testes mulieres malæ famæ in crimine excepto, quale fuit istud. Idem habetur ex cap. *si testes 4. quest. 3. §. Lege Iulia.* vbi dicitur quod mulieres malæ vitæ, & meretrices non possunt esse testes: ergo à contrario sensu, & cum exceptio firmet regulam, & ibi excipiantur à testimonio solum meretrices, & quæ sunt malæ vitæ: illæ quæ tales non fuerint poterunt esse testes, Ultra prædictos textus extat praxis recepta, qua passim fœminæ recipiuntur testes in causis criminalibus. Et ideo hanc sententiam tenet Antonius Gomez *tom. 3. variar. Resolut. cap. 12.* & Iulius Clarus *in præct. crimin. quest. 27.* Et Salzedo *in præct. crimin. cap. 128. per totum.* Et clarius tenet Rodrig. *tomo 4. sum. cap. 150. num. 3. ver. testigos*: quamuis ibi dicat testimonium duarum fœ-

minarum contestium non sufficere ad plenam probationem, sicut sufficiunt duo viri, præter hos, quod fœminæ etiam in criminalibus possint esse testes, tenet Farinac. *tom. de consiliis crim.* 3. *fel.* 144. *col.* 2. & licet consilium sit alterius Doctoris, approbatur tamen à Farinacio: & citat ibi vnam legem, & Gomez, & Michaelen Crass. & Iulium Clar. Vltimo accedit Martinus Delrio in suis disquisit. *Magiæ. lib.* 5. *quest.* 13. vbi expresse ait fœminas in criminalibus posse admitti in testes; & idem tenet Delrius eodem *lib. quest.* 40. magis fauens, licet ibi §. Ad condemnationem, dicat testimonium duarum fœminarum non sufficere ad condemnationem, nisi alia concurrant adminicula, & indicia. Et in hoc casu concurrerunt quatuor fœminæ, & alia non leuia indicia. Probatur etiam ratione, quod mulier possit esse testis in criminalibus: Nam alias multa crimina manerent impunita, contra mentem legum, & contra bonum commune declaratur, vt si v. gratia, inter solas Moniales delictum atrox fieret: vel etiam inter solas mulieres sæculares crimen committeretur, tale crimen impunitum maneret, si mulieres non possent esse testes in criminalibus; quod non est admittendum. Et iterum aduerto ex Delrio proxime citato, nam licet ille dicat citata *quest.* 13. testimonium dyarum mulierum non facere plenam probationem, nisi concurrant alia adminicula, tamen *quest.* 40. eiusdem *lib.* 5. impugnat dictum Binsfeldij dicentis, trium, vel quatuor mulierum testimonium exigi pro testimonio vnus viri: & remittit se ad dictum in citata *quest.* 13.

4 Quoad id vero quod tangit eadem quæstio prima. an illa mulier quæ fuit cōsulta de veneno, vel veneficio, & proinde socia criminis, possit esse testis: Respondeo,

spondeo, quod testimonium socij criminis recipiendum est, maxime quando crimen est atrox, siue exceptum, quale hoc fuit. Ita expresse tenet Iulius Clarus in praxi criminali *quest. 21. num. 8. & seqq.* licet ibi dicat non esse vnum socium plenum testem, imo neque duos socios facere vnum testem: iuuant tamen quasi iudicium. Et in cap. *venerabilis frater de test. cogendis*. Iubet Papa vt cogantur testimonium ferre quidam complices cuiusdam coniurationis, qui iurauerant se non publicaturos coniurationem contra Episcopum, & iubet Papa, vt absoluantur à iuramento, & postea recipiantur in testes licet complices fuerint. Facit præterea in hoc casu mortis per venenum, ac veneficium intentatæ, quod in illo potuerit esse testis mulier sociæ criminis, & alias infamis, nam istud crimen fuit atrox, vt patet, & fuit crimen prodicionis, factum in occulto infcio innocente, & subditi contra Prælatum vt patet. At lex Lusitana *lib. 5. Ordin. tit. 37. §. 3.* concedit quod in simili delicto prodicionis possint recipi testes alias inhabiles. Denique quod socij criminis sint recipiendi in testes, quamuis illorum testimonium non sit plenum, sed aliquid coadiuuat, tenet Penha *Inquisitorum 3. part. comment. 61. alias 90. in fine* in Appendice ad Eimericum; & alij multi. Vide etiam illum *fol. 603. in fine, & fol. 604.*

5 His positis ad primum argumentum in oppositum dicendum est, textum illius capituli, *mulierem*, citatum, non facere legem Ecclesiæ, quia non est dictum, vel decretum alicuius Papæ, sed est dictum D. Augustini ibi insertum à Gratiano compilatore decreti: dicta vero D. Augustini non faciunt legem obligantem in Ecclesia: Idque præcipue, quia post D. Augustinum exstant multi textus canonici, praxis, & Doctores citati in

*rum.* 3. per quæ constat feminas posse esse testes. Ad confirmationem patet etiam ex dictis feminam illam potuisse recipi in testem, quamuis esset socia criminis, vt patet præcipue ex capitulo citato *quoniam aliquo. de test.* & ex citatis in *num.* 4. proxime præcedente: & licet fuerit infamis etiam illius dictum coadiunuat cum hoc crimen sit atrox, & exceptum, in quo proinde possent recipi testes infames, vt patet ex lege Lusitana proxime citata *lib. 5. tit. 37.* & tenet *Reperi. Inquisitum ver testis.* Infamis non potest esse testis: vbi excipit, ac dicit posse infamem esse testem in criminibus exceptis, quale hoc fuit, videlicet sacrilegij intentati, & perduellionis, & citat *Speculatorem*, & *Bartolum*: & idem habetur expresse in cap. *Non debet. de test. & arrestat.* Ad secundum argumentum, dicendum est omnes illos textus citatos dicentes non posse sæcularem testificari contra Clericum, esse antiquatos per contrarium vsum, imo per multos alios textus tum supra citatos, tum contentos in decretalibus, per quos praxis obseruat in causis criminalibus recipi testes sæculares contra Clericos. Nam Episcopi in suis visitationibus ordinariis, ex testimonio sæcularium puniunt Clericos culpatos in variis delictis. Et in particulari, quod Prælati regulares in causis Religiosorum, etiam criminalibus possint recipere testes sæculares, tenet, ac probat expresse *Rodrig. tom. 2. qu. 9. 28. art. 3. in fine*: alias crimina facta à Religiosis extra Conuentum coram solis sæcularibus, manerent impunita, cum solos sæculares testes habeant; quod non est dicendum, cum talia crimina Religiosorum extra Conuentum commissa magis scandalosa sint, & proinde magis punienda.

*Ad secundam questionem.*

6 **Q**Uod attinet ad secundum quæsitum, an scilicet ista machinatio facta modo exposito in informatione, fuerit culpabilis, & punienda? & quod non fuerit culpabilis, nec punienda videtur probari, quia quando iura dicunt puniendum esse conatum ad crimen, etiam non secuto effectu, id intelligunt, quando vsi sunt aliquo medio instrumento vere apto ad causandum effectum, & tale instrumentum adhibuerunt effectu per accidens non secuto. At in hoc casu, media adhibita ad mortis machinationem non erant venenata, nec venefica voluit occidere, vt dicitur in informatione: ergo non fuit conatus culpabilis de quo Doctores loquuntur esse puniendum. Exemplum sumi potest ex Ordinationibus huius Regni Portugallie, lib. 5. tit. 35. §. 1. & 3. & 4. vbi loquens de hoc conatu, ponit exemplum, si quis venenum exhibuit, & ex sumpto veneno mors secuta non fuit. Item si quis emisit sagittam, vel scopletum ad occidendum, etiam si non occidat, damnetur vt ibi, vbi requirit verum venenum, & veram sagittam, quorum neutrum in hoc casu interuenit.

7 Pro solutione, claritatis gratia suppono primo, quod ex duobus mediis à venefica adhibitis, vnum clare, sicut illa dixit, non erat venenosum; sed illa dixit esse, & fore venenosum, & reus illud adhibuit in loco, in quo illa dixit fore apponendum. Absurdum remedium à venefica inculcatum, & per reum istum operandum, fuit clare veneficum, id est superstitiosum, quale veneficæ solent adhibere ad similes veneficos effectus: & ille fecit ex se quod venefica dixit: sed illa postea penitens facti, dixit noluisse tale instrumentum applicare.



ad effectum: sed per illum non stetit, quin sequeretur effectus. Præmitto secundo opinionem esse inter Doctores, an conatus ad crimen, siue affectus ad crimen, effectu non secuto, sit puniendus pœna ordinaria, ac si effectus sequeretur, quâdo delinquens ex se fecit omnia ordinaria ad talem finem, per accidens non secutum. Et breuitatis gratia, dico rem esse sub opinione: alij enim dicunt plectendum esse pœna ordinaria: alij vero mitius loquentes, id negant: sed dicunt plectendum esse pœna arbitraria. Casum resoluit Iulius Clarus in *praxi crim. quæst.* 92. dicens quod in delictis atrocissimis (quale est hoc) conatus ad crimen, non secuto effectu, quando per delinquentem non stetit, puniri pœna ordinaria: & ponit exempla quæ contigerunt in facti contingencia in Italia circa porrectionem veneni effectu non secuto. Sed illis casibus non obstantibus ipse ait non esse puniendum talem conatum pœna ordinaria: quidquid aliqui Doctores oppositum dicant: sed pœna arbitraria, idque dummodo delinquens deuenierit ad actum proximum maleficio: & de hoc est quæstio in nostro casu an iste reus per hæc media adhibita de se inutilia ad mortem, sed talia putata ex sua estimatione, deuenierit ad actum proximum maleficii, illiusque conatus puniendus sit tanquam culpabilis, & legibus contrarius. Quarto præmitto cum Theologis maxime D. Thom. *quodlib.* 8. *art.* 15. & ex Gersonem quem citat, & sequitur Nauar. ad cap. *si quis autem num.* 56. Reginald. *tom.* 1. *lib.* 13. *num.* 70. & 85. & aliis, quod peccatum externum, seu actus externus malus sumit totam suam malitiam ab actu interno, & malitia interna. Et præterea, quod id quod aliquis facit cum conscientia erronea est eiusdemmet speciei cum illo peccato quod ipse intendebat facere. Exempli gratia; pu-

tauit

tauit quis hanc mulierem, ad quam accedit esse coniugatam, cum reuera non esset: iste talis fecit peccatum adulterij, quod intentabat. Secundo, percussi hunc hominem quem putabam clericum, cum reuera non esset; feci peccatum sacrilegij mentalis, licet excommunicationem non incurrerim. Nam licet à parte rei opus quod facio non sit talis speciei in se: animus quo illud facio ponit illud in tali specie à me intentata, & cogitata, & sic est peccatum illius speciei à me intentæ & cogitæ.

8 Hoc posito, censeo prædictum conatum, etiam cum talibus mediis de se nullis, esse culpabilem, & proinde punibilem. Pendet probatio istius conclusionis ex illo puncto, an pœna imposita à lege alicui actui incurratur per actum nullum ex se factum contra illam legem: exempla statim hoc declarabunt. Tractant hoc punctum Suarez *tom. de legib. lib. 5. cap. 34. & lib. 6. cap. 4.* & Sanchez *lib. 3. de Matrim. disput. 2. à num. 2.* & in particulari Suarez citato loco priori, & *cap. 34. num. 2.* ponit hæc verba: *Et ratio est, quia lex de se prohibet illum actum externum ut procedentem à tali animo agendi contra legem: & hoc totum ibi inuenitur: ergo pœna legis comprehendit etiam sic operantem.* Et infra *num. 6.* agens de illo qui putabat se vendere rem prohibitam, vel facere venditionem nullam, cum tamen à parte rei non faceret: tractans si pœnam incurrit contra male vendentes ponit hæc verba: *Si dicas ex nihilo nihil fit: Non obstat, quia actus nullus non est omnino nihil: Nam licet in ratione venditionis, v.g. sit nullus, est tamen venditio intentata ex prauo animo profecta, ideoque merito puniri potest, & de facto punitur per talem legem.* Sic ibi Suarez, & consonant dicta à Sanchez citata *disput. 2.* pro prima opinione cum multis pro illa citatis, licet ipse aliam ibi se-

quatur, quæ in rigore non enacuat hanc nostram fundatam in tam claris exemplis, & iuribus.

9 Quod ergo Religiosus de quo agitur, per istum actum externum machinationis, de se alias nullum, incurrerit pœnam lēgis arbitrariam contra machinatores, eiusque conatus per talem actum nullum, fuerit punibilis, pater in primis ex proxime dictis à Suarez in exemplo venditionis. Deinde probo clare exemplis, & textibus sequentibus, Sit ergo primum exemplum, seu probatio, id quod tradit *gloss. in cap. plerumque de donat.* inter virum, & uxorem, *verb.* repetere, ubi quærit: si mulier nupta viro in facie Ecclesiæ commisit adulterium, & maritus illam accusans per sententiam, dotem ipsius obtinuit. Postea clare constitit, quod matrimonium inter utrumque contractum fuerat nullum propter impedimentum affinitatis dirimens: an in tali casu posset mulier dotem repetere, eo quod matrimonium inter illos præcedens fuerit nullum? Respondet glossa quod eonon obstante dotem amisit, quia illius intentio fuit adulterium committere: & ait glossa ibidem, quod *crimina secundum intentionem indicantur, & ex corde procedunt*, & ad hoc citat 15. *quest. 6. §. 1. & 35. quest. 2. cap. lectum, & ff. de furt. qui iniuria, &c.* Quæ omnia faciunt ad nostrum casum cum aliis ibi dictis à glossa: Nam in hoc casu reus iste intendit mortem Prelati, & de se facit quod potuit, & proinde secundum suam intentionem iudicandus est. Secundum exemplum habetur in cap. *a nobis. de bigamia*, ubi Papa mandat, & declarat, quod quidam Subdiaconus, qui matrimoniū contraxit cum quadam vidua incurrat in pœnam bigamiæ, ne posset vltiores ordines recipere, vel in suscepto ministrare: idque non obstante quod illius matrimonium fuerit nullum propter impedimentum di-

rimens

rimens ordinis sacri: itaque incurrit pœnam bigamiæ etiam per actum nullum, siue annullatum. Et ait Papa quod cum illo non dispensetur ad ordines: *Non propter Sacramenti defectum* (id est matrimonij) *sed propter affectum intentionis cum opere subsequuto.* Sic Papa clare ad nostrum casum. Tertium exemplum sit ex nostra lege Lusitana, quæ sumpta videtur ex duobus textibus præcedentibus Hęc lib. 5. *Ordinat. tit. 26. §. 1.* decernit, quod vir qui dormierit cum fœmina habita pro coniugata in facie Ecclesiæ, & pro tali reputata, licet post talem concubitum, constiterit clare quod talis mulier non erāt vere coniux alicuius; nihilominus talis vir qui cū illa rem habuit, dum putabatur vxor alterius, morte plectatur vt verus adulter: *Nam* (ait lex) *in hoc casu attendunt iura ad intentionem, quam ille habuit committendi adulterium cum fœmina vxorata.* Sic ibi. Vbi vides tres leges punientes pœna ordinaria delinquentem per actū nullum, & ex se inefficacem ad inducendam pœnam illam; idque solum ob prauam affectionem peccantis cum intentione faciendi actum illū lege prohibitum. 10 Adde quod in hoc casu, vt minimum constat, quod iste Religiosus parauit insidias suo Prælato per illa duo media applicata, quorum alterum, vt diximus, ex se erat superstitiosum, & vānum, eoq̃ue vti solent veneficæ ad similes effectus; quamuis ista applicare efficaciter noluerit. Iam ergo per ipsum Religiosum non stetit quin sequeretur effectus, & vt diximus, iam per hæc clare parauit insidias suo Prælato maiori: At constat clare, quod sola paratio insidiarum est punibilis valde in iure. Habetur in cap. *si quis Sacerdotum* 11. *quest. 1.* vbi sic dicit Papa: *Si quis Sacerdotum suo Episcopo inobediens fuerit, aut insidias ei parauerit, &c. mox depositus curiæ tradatur, & recipiat quod inique egit.* Vide rigorosam pœnam

pœnam pro sola paratione insidiarum contra Prælatum. Quæ omnia aptari possunt, imo debent, cum Prælatus regularis, maxime Prouincialis æquipolleat Episcopo, & habeat potestatem quasi Episcopalem in suos subditos, vt tenet communis sententia. Et idem fere decernitur *ead. 1. 1. quest. 1. cap. si qui clerici*, & duobus sequentibus capitibus, maxime *cap. sequenti si clerici*, vbi præcipitur quod clericus, qui Episcopis calumniam machinatus fuerit, à proprio gradu deijciatur.

11 Adhuc vero pro confirmatione, ac detestatione huius machinationis, considerata est alia circumstantia in ea reperta: nam Religiosus de quo agitur, consuluit veneficam, quæ consultatio per se tantum est punienda in iure, *cap. si quis Episcopum 26. quest. 5.* vbi dicitur, quod consulens veneficos, si sit clericus, suspensus priuetur honore dignitatis suæ, & recludatur in monasterio ad agendam pœnitentiam. Addo, quod vltra prædicta in præcedentibus, dictum fuit quod iste Religiosus dedit veneficæ petenti, frustulum petræ aræ sacræ ad idem intentum, in quo cooperatus est veneficio, quantum ex se fuit, quod prohibitum est citato *cap. si quis Episcopus. & in hoc Regno libr. 5. Ordinationum, tit.* Tertio punitur pœna mortis, quæ pœna licet non sit in vsu, arguit tamen grandem malitiam delicti, videlicet sacrilegij, in profanatione rei sacræ, & ad occidendam personam sacram. Videndus est pro hac re *Rodrig. tom. 2. quest. 9. art. 4.* vbi agit qua pœna puniendus sit Clericus. Vbi dicit primo cum Couarr. quod si quis emit venenum, vt cum illo occideret, sed non propinauit, quia forte pœnituit, aut fuit impeditus, tunc pœna extraordinaria plectendus est iudicis arbitrio. Secundum quod dicit, est: regulam illam, quod conatus ad effectum non productus non puni-

tur;

tur, intelligendum esse de conatu remoto, ut is non puniatur pœna ordinaria, sed extraordinaria: quale videtur exemplum proxime positum, de illo qui emit venenum ad propinandum, sed paratum non propinauit, vel fuit impeditus. Et ex consequenti videtur dicturus Rodriguez, quod conatus proximus non secuto effectu, sit puniendus pœna ordinaria. At in hoc casu, ob tot circumstantias supra memoratas, conatus de quo agitur non videtur remotus, sed valde proximus, non solum ex intentione delinquentis, sed etiam à parte rei, consideratis aliquibus mediis ex illis quæ dicuntur adhibita. Adhuc videri potest pro isto conatu Salzedo *in pract. crimin. cap. 95.* ubi agit de Clerico venefico, cum commentario ibi in casu 1. & 2.

12 Ad argumentum in contrarium, positum pro hac secunda quæstione, & ad exempla adducta ex lege Portugalliæ, dicendum primo, iuxta tria exempla à nobis adducta *num. 9.* non requiri quod media adhibita ad assequendum effectum malum finem, sint efficacia ex se ad illum finem: sed sufficere ut sint efficacia ex intentione delinquentis illa adhibentis, ut patet in tribus exemplis à nobis adductis, quia iura ibi citata non attendunt ad efficaciam mediorum applicatorum, sed ad pravam intentionem delinquentis. Secundo respondetur, quod duo saltem media adhibita fructuli aræ sacre, & alterius quod tetigimus, erant media efficacia non naturaliter, sed moraliter, in opinione. & praxi veneficarum, quæ sola illa media requirunt, & applicant: ac proinde per talia media ab illo exhibita dici potuit, quod conatus devenit ad actum proximum.

Ad

*Ad tertiam, & quartam questionem.*

13 **H**Æc tertia quæstio, de pœna quæ danda sit machinanti mortem contra Prælatum, facile expeditur: Nam ius antiquum citato cap. *si quis sacerdotum.* & cap. citato *si qui Clerici.* imponunt pœnam relaxationis curiæ sæculari, vel deiectionis ab honore clericali: quæ tamen pœnæ non sunt in usu, arguunt tamen mentem esse Ecclesiæ, vt talis machinatio seuerè puniatur. Secundo dico, in hoc casu standum esse statuto cuiusvis Religionis: & hoc deficiente, standum erit legibus sæcularibus punientibus similes conatus: Idque considerando prius an iste conatus peruenerit ad actum proximum, an ad remotum. Videndi sunt præterea Doctores à nobis supra citati de ista materia agentes, videlicet Iulius Clarus, Rodriguez, Salzedo, & alij Considerandæ sunt etiam circumstantiæ à nobis supra relatæ. Item considerandum, quod hoc crimen est exceptum, & factum in occulto, quod requirit de sua natura minorem probationem, cum aliis considerationibus quæ supra tactæ sunt: Ego enim non intendo decernere pœnam imponendam, sed solum casus difficultatem, & circumstantias indicare. Et per hæc etiam patet responsio ad quartam quæstionem, quæ pœna danda sit consulenti veneficos, iam enim respondi num. 10. ex cap. *si quis Episcopus.* ibi citato, & ex libro *Ordinat. Portugallia.* Et talis delicti grauitas, ac pœna conijci etiam potest ex 4. Reg. 1. vbi Deus per Heliam morte puniuit Ochosiam Regem, & quinquaginta milites, eo quod consuluerunt Belzeub; & alia quæ congerit Deltio de *Magic. disquis. in Anacephalaesi, monitione 3.*

*Ad quintam questionem.*

14 **A**D primam partem quintæ quæstionis, an reo Religioso sint publicanda nomina testium, punctus est quotidianus in causis regularium exortus, pro quo primo dico, seruanda esse statuta cuiusvis Religionis, quæ semper suppono fundata esse in lumine naturali, & canonico. Secundo dico, quod dare reo nomina testium non est de substantia iuris. Tenet imprimis Hostiensis citatus à Rodrig. *tom. 2. qq. quæst. 3. art. 1. prope finem.* Et fauet idem Rodrig. *tom. 4. Addit. sum. cap. 179. concl. 4.* Probatum primo, ex praxi rectissimi Tribunalis sancti Officij, in quo substantia iuris obseruatur, vt patet; Et tamen in illo non reuelantur nomina testium, idque ex dispensatione Sedis Apostolicæ. At Prælati Religionum fere omnes, gaudent priuilegio Apostolico, vt in causis regularium seruata substantia iuris, non seruent apices, & solemnitatem illius. Habetur expresse in *cap. vlt. de statu Monach.* cum glossa ibidem, & ab illa citatis *ver.* Absque iudiciorum strepitu. De quo Miranda in *Ordine iudiciario fol. 352. in fine.* Secundo probatur ex *cap. qualiter, & quando. de accusat. il. 2.* vbi traditur forma procedendi cum reo, & dicit, quod illi reuelanda sint dicta, & nomina testium vt se defendat; & nihilominus in fine eiusdem capituli, ait Papa, prædictam formam procedendi cum reo in causis Regularium non esse vsquequaque seruandam, & loquitur ibi de reo etiam Clerico. Fauet etiam capitulum, *Ea qua. de stat. Monach.* vbi Papa ait, Abbatem culpatum esse amouendum ab officio absque iudiciorum strepitu: At dare reo nomina testium, est strepitus iudiciorum: & clarum periculum perturbande pacis inter Religiosos, qui sciuerint testes contra se testificatos:



catos: cum maxime interfit quies, & concordia Religioforum, iuxta illum *Pfal.* 132. Ecce quam bonum, & quam iucundum habitare fratres in vnum. Vide glossam proximi capitis *ea quæ. in ver.* Absque iudiciorum strepitu. Hoc vero maxime locum habebit, si in ista Religione sit statutum ne dentur reo nomina testium pro pace Religionis conseruanda. Nam in tali euentu, cum tota Religio in tali statuto consentiat, vt suppono, etiam si aliquis particularis Religiosus reus læsionem aliquam paruam pateretur, non reuelatis sibi testium nominibus, id non obstaret, quia parue huic læsioni videtur renunciaſſe per tale statutum: & in hoc casu magis præponderat bonum commune pacis totius ordinis, quam parua læsio ipsius in non agnoscendo teste sibi contrario, cui parue læsioni renunciauit per tale statutum. Maius enim est quod faciunt Patres Cartuziani, qui per statutum generale abſtinent à carnibus etiam in hora, & periculo mortis, quia pro bono communi totius Religionis renunciarunt bono proprio vitæ conseruandæ per esum carnis in bonum commune Religionis. Est etiam clarissimum exemplum quod tradit Sanchez *tom. 2. Decal. lib. 6. cap. 18. num. 43. & seqq.* vbi probat licitum esse in aliqua Religione statutum, vt crimen secretum in certa materia reueletur Prælato (maxime quando Prælatus est grauis, pius, & prudens) idque non præmissa correctione fraterna: quia inquit tota Religio, & quilibet Religiosus renunciauit iuri suo, vt prius de crimine occulto corrigetur per fraternam correctionem. Et probat exemplo proxime citato Cartuzianorum, & citat Banhez, Valentiam, Petrum Lædesm. & Ribadaneiram. Si ergo hoc licet Cartuzianis, & aliis in denunciatione delicti secreti modo prædicto ex vi statuti facti in sua Religione:

gione : à fortiore licitum erit si talis Religio statutum habeat ne testium nomina pro pace reuelentur: In hoc enim minus periculum imminere videtur , quam in duobus proxime datis exemplis. Facit pro hoc quod dicit Rodrig. *citata quest. 3. art. 1.* citans Hostiensem. Et Paulinus Bertus in sua praxi criminali impressionis folij magni addita super opera Rodriguez *fol. 185. col. 1.* in fine , & *col. 2.* & hoc propter pacem , & bonum commune, de quo ibi vide.

15 Quod attinet ad secundam partem eiusdem questionis quintæ , constat primo , de iure naturali teneri Prælatum Regularem dare reo Aduocatatum sufficientem, qui illum deffendat: Aduocati enim patrociniuni pertinet ad deffensionem naturalem. Ita Aldrete *lib. 1. disciplina Relig. cap. 2. num. 3.* & patet ex cap. *ex litteris de officio iudicis*, & glossa ibidem, *ver. implorando*: vnde si in Religione nullus esset omnino sufficiens Religiosus qui in re grauissima reum deffenderet, credo teneri Prælatum Regularem illi dare Aduocatatum sæcularem, maxime hodie , cum iam fere apices iuris in Religionibus sunt introducti. Dixi in re grauissima, quia in causis leuibus, & ordinariis id non concederem. Habeo imprimis authorem Paulinum Bertum Ordinis sancti Augustini in citata *praxi crimin. fol. 272.* vbi dicit in sua Religione nunquam fuisse datum Aduocatatum sæcularem alicui Religioso , nisi semel tantum in vna causa in qua agebatur de condemnatione cum periculo vitæ : & in tali causa Aduocatatum sæcularem reclusum fuisse cum reo in vna domo secreta, ne Ordinis fama, & secretum periclitarentur. Idem dicit Rodrig. *tom. 2. qq. 9. 19. art. 4.* dicens non esse consuetudinem in Religionibus dari Aduocatatum sæcularem : maxime quando hodie tam multi sunt Religiosi docti , imo , & in

praxi criminali sufficienter versati. Facit quod tradit idem Rodriguez eodem *tom. 2. quest. 3. §.* Pro cuius, & §. sequenti, ubi dicit, ideo in Religionibus non seruari apices iuris, ne teneantur consulere legis peritos seculares. Cum Rodriguez concordat Miranda in ordine iudiciali *quest. 14. art. 7. conclus. 3. in fine.* Non enim decet secreta Religionis sciri ab aduocatis secularibus. Et potest adhuc probari, quia in causis in quibus proceditur de plano sine iuris apicibus, non est obligatio dari Aducatum: vt habetur in Clementina *sape contingit de verb. signific.* ubi dicitur, quod quando committitur causa cum clausula, vt procedatur de plano; ait Papa, & absint; *Partium, Aduocatorum, & Procuratorum contentiones.* At Prælati Religionum habent priuilegium vt in causis Religiosorum procedant de plano, non seruatis iuris apicibus.

16 Ultimo pro contentis in isto casu, quæ sunt difficilis probationis, maxime propinatio veneni, & similes, quænam probatio requiratur ad illum, cum de ordinatio tales delinquentes fugiant lucem, & faciant in occulto, vide Farinacium in tomo *praxis Theorica criminalis* ubi agit de reo confesso, & conuicto *fol. 100, & seqq. num. 29. & 35.* ubi tradit quæ sint crimina difficilis probationis, & inter illa numerat venenationem, & conspirationem. Vide etiam eundem Farinacium *tom. de Inquisitione, & delictis quest. 1. num. 12. fol. 10. pag. 2.* ubi ait in delictis occultis sufficere præsumptiuam, & coniecturatam probationem. Et citat multos Doctores,

## CASVS XXVI.

*De quodam reo Religioso , quem confessum  
delictum modo non iuridico , Præ-  
latus voluit punire.*

**Q**uidam Religiosus , cum prius inter ipsum , & suum Prælatum verba molesta præcessissent , formauit propositum apud se percutiendi Prælatum suum cultro paruo ordinario. Post hoc propositum , cum interesset cuidam sermoni cuiusdam concionatoris , aliqua audiens in sermone contra illos qui odium habent in pectore contra proximum suum , contritus resipuit , odium statim deposuit , mox Prælatum adiit , portans scuticas in manu ( vulgo *disciplinas dos frades* ) illique dixit. Pater peccaui in te , formans propositum percutiendi te cultro , iam dolco : peto veniam , si vero veniæ petitio non sufficit , his scuticis me verbera , & castiga. Respondit Prælatus : vis hanc veniam petere , & confessionem facere coram duobus Religiosis ? Recusauit subditus dicens , se illam confessionem coram solo Deo , & ipso Prælato facere velle , & ab ipso solo Prælato veniam postulare. Respondit Prælatus se illi veniam dare : & ambo flentes dexteras dederunt , & se inuicem amplexi sunt. Post tres dies idem Prælatus adhibens prope se in loco abscondito duos Religiosos , qui possent rem gestam audire , vocauit prædictum Religiosum non videntem testes absconditos , illique dixit : Narra mihi iterum illud propositum , quod contra me formasti. Religiosus iterum animo simplici narrauit quæ fecerat : & dixit se illud

intentasse propter iniurias, & molestias sibi, & amicis suis à Prælato adhibitas. Audierunt hanc confessionem occultati testes.

Quæsitum fuit an dictus Prælatus per hanc confessionem probatam postea à duobus testibus absconditis, potuerit contra istum Religiosum procedere, illumque punire?

1 Ante responsionem dico, non posse depingi maiorem Prælati malitiam, quam ista fuerit, quæ subditum veniam petentem de peccato occulto, & soli Deo reservato, sic voluerit publicare, illumque punire: In quo degeneravit satis ab illo patre filij prodigi, qui filium prodigum, & publicum peccatorem, veniam petentem brachiis extensis excepit, & super delicta publica silentium imposuit. Lucae 15.

2 Dico, istum Religiosum veniam petentem fere imprudenter egisse, vel saltem non indigni petitione talis veniæ. Dico quod imprudenter fere egit, attempta natura mali Prælati, & abutentis bona subditi submissione: Nam opus subditi bonum fuit ex se, & natum ex nimio dolore cordis, & submissione animi: At quod non esset obligatus talem satisfactionem dare Prælato, nec ab illo talem veniam postulare probatur, quia veniæ petitio, vel satisfactio non fit, neque iniungitur nisi quando parti læsæ damnum de facto illatum est in rebus fortunæ, honoris, vel vitæ, ut omnes Doctores dicunt in materia restitutionis: Hic vero subditus per solum propositum percutiendi Prælatum apud se in occulto conceptum, nullo modo læsit Prælatum de facto in aliquo ex tribus illis bonis: ergo non obligabatur ad veniam petendam, nec satisfactionem exhibendam. Et confirmatur exemplo clarissimo, quia nemo hucusque dixit, pœnitenti confitenti se habuisse

buisse propositum furandi rem alienam, iniungendam esse aliquam restitutionem, vel satisfactionem faciendam Domino rei illius quam voluit furari.

3 Dico tertio, hunc Prælatum peccasse mortaliter abscondendo illos duos testes modo supra exposito. Probatur clare: Nam in hoc publicauit secretum subditi in re grauissima, idque subdito nolente vt aliquis sciret nisi Prælatus: prius enim protestatus est subditus se nolle illud coram aliis confiteri, neque ad talem confessionem tenebatur iure diuino, vel humano. Constat autem apud omnes Doctores maxime Summistas *in verbo* secretum, quod reuelare secretum proximi in re graui, & inuito proximo est peccatum mortale. Vide inter alios Nauarrum *in sum. cap. 18. à num. 52. & seqq.*

4 Dico quarto, Nonobstantibus duobus testibus, qui confessionem audierunt, istum Prælatum non potuisse procedere, neque inquirere, neque punire istum Religiosum: quod probo clariis, & multis rationibus. Primo, quia Prælatus non potest inquirere de crimine occulto, neque illud punire, quandiu reus non est diffamatus: est communis, & tenet Nauar. *Commentar. in Rubr. de iudic. num. 79.* citans multa vsque ad *num. 81.* At crimen istius Religiosi etiam auditum ab illis duobus occultis testibus, adhuc erat occultum, vt patet: ergo Prælatus non potuit de illo inquirere, nec punire, cum talis Religiosus non esset diffamatus. Quod autem crimen à duobus, vel tribus tantum scitum, & non diffamatum, dicendum sit occultum, tenet ac probat Nauarrus *in summ. cap. 27. num. 250. §. 10.* quod in hac materia. & *seqq.* vnde statuta generalia Ordinis Minorum *in tis. de correct. §.* Et tamen si quis. præcipit, vt licet crimen sit probatum per tres, vel quatuor testes, si

tamen crimen est occultum, & reus non est diffamatus, non puniatur pœna publicâ: quod statutum fundatum in iure communi, supponit posse dici crimen occultum quod sciunt quatuor testes. Secundo, quia licet ista confessio facta à Religioso coram iudice fuerit facta, & coram duobus testibus, non tamen fuit iuridica, nec sufficiens ad condemnandum: Primo, quia fuit dolo, ac fraude extorta, ut constat: sicut autem confessio rei facta per metum ante, vel in tortura, non valet propter metum, ut communis Iuristarum praxis obseruat, nisi postea in libertate ratificetur: à fortiori ista confessio facta coram illis duobus testibus, & extorta per fraudem, & dolum, non valebit. Facit quod dicit glossa super cap. *Ex parte Abbatis de confessis. in explicat. casus.* ubi dicit, quod ut confessio noceat reo debet esse spontanea, non coacta; hæc vero secunda confessio non fuit spontanea, quia ubi fraus, & dolus interuenit, non datur spontaneus consensus. Et citat ibi glossa duos textus iuris canonici, & vnum legis ciuiliſ. In quorum primo, videlicet 15. *quæst. 6. cap. 10.* sic dicitur: *Pessimum est de extorta confessione quemquam iudicare.* Facit etiam omnino glossa in cap. *Petitio vestra. de iur. iurand. in ver Extorsit,* ubi dicit, quod iuramentum dolo, vel metu extortum, non est seruandum: & citat ibi duos textus. Tertio, quia, ut ait Iulius Clarus *quæst. 31. in praxi crim. num. 35.* confessio facta à reo coram iudice non sedente pro tribunali, sed illi facta tanquam priuato, non nocet reo ad condemnationem, pro quo ibi citat multos. Hæc autem secunda confessio non fuit facta iudici sedenti pro tribunali, sed tanquam priuato, & amico. Quarto, quia, ut ait idem Iulius Clarus *quæst. 55. num. 10.* etiam si reus coram iudice confiteatur delictum, si tamen non constat ei, re aliis de delicto,

lieto, talis confessio non sufficit ad condemnationem, quia aliquando contigit reum fateri delictum quod non fecit: In hoc vero casu licet Religiosus iste sit confessus delictum, de eius tamen delicto nullo modo constitit, neque de illo fuerat diffamatus. Idem tenet Baiardus commentator Iulij Clari ad eandem quaest. 5. num. 15. citans Mascardum Crauet. Gramaticum, & Boetium. Tertio principaliter probó, quia licet in ista confessione non concurrerent tot nullitates proxime relatae, & iudex aliunde sciret hunc animum, & propositum malum istius Religiosi, non posset illum punire. Nam tale propositum percutiendi non fuit conatus proximus, nec etiam remotus ad crimen, nec peruenit ad actum proximum, imo nec ad remotum, ut patet ex dictis in casu praecedente 25. sed solum fuit peccatum mentale: ergo non poterit puniri à Prælato, nisi forte dicas Prælatum posse punire peccata solum mentalia, quae non prodierunt ad actum externum. Quarto probó, quia licet D. Thom. 2. 2. quaest. 108. art. 1. & Iulius Clarus in praxi crim. quaest. 35. num. 26. & Ordinationes istius regni concedant posse iudicem punire offensam sibi factam: hoc locum habet iuxta citatos Doctores, quando iudici sit offensa in propria praesentia, & ratione officij: At in hoc casu nulla iniuria facta est isti Prælato in praesentia, imo neque absentia, quae prodiret in actum externum: neque fuit facta ratione officij, sed alia ex causa. Et sic voluit esse iudex in causa propria extra casum sibi commissum. Vide glossam in capite *Ad audientiam nostram. de appellat. verb. Cognitione.*

5 Ultimo adhuc dico, quod Prælatus iste malefecit; & alia via peccauit intentando punitionem, postquam prima vice dixit se veniam dare, & cum isto Religioso



reconciliatus est. Probo primo, quia illa concessio veniæ fuit quasi promissio simplex, & acceptata, quæ in graui obligat, iuxta omnes Doctores agentes de promissione simplici. Et confirmatur ex Regula iuris, quæ dicit: Quod semel placuit amplius displicere non potest. Facit etiam quod tenet glossa capituli *cum venisset. de test. & attest. in ver* Renunciatum. vbi ait duos textus dicentes, quod is qui semel remisit suas actiones, non potest amplius ad illas redire, nec illas prosequi: at iste Prælati per concessionem veniæ remisit actionem quam posset habere ad hunc subditum puniendum: ergo non potuit postea illius punitioni intendere,

## CASVS XXVII.

*De quadam Abbatissa admittente virum intra clausuram, absque necessitate, sed bona fide.*

**I**N quodam Conuentu Monialium fuit consuetudo antiqua, vt in Sabbato sancto Æconomus, seu procurator Conuentus clausuram intraret pro facienda certa distributione inter Moniales, quæ attento rigore Bullarum Pontificalium, & cōsuetudine aliarum Monialium, non erat necessaria causa, neque sufficiens ad ingressum clausuræ. Abbatissa id fecit bona fide, & propter consuetudinem. Accusata fuit, quod incurreret excommunicationem, & priuationem officij. Quæsitum est an fuerit priuanda officio.

**I** Si hæc Abbatissa fecit bona fide, non credens se peccasse, nec vllam pœnam incurrere, non fuit priuanda

da officio, quia pœnas Bullarum Papalium non incurrit. Probat, quia quando lex imponit pœnam illis qui secus facere præsumunt, qui in tali casu violat legem cum ignorantia, non putans quod peccat, non incurrit pœnam legis illius. Est opinio communis, maxime Nauarri *lib. 5. consil. tit. de sent. excom. consil. 54. num. 4.* pro quo citat Cardin. in *Clementina 1. de priuil.* & citat se ipsum in *commento de restit. spoliat.* Idem tenet Sanch. *lib. 9. de matrim. disp. 32. num. 38.* vbi citat Antonin. Rozellam, Gaet. Angelum, Tabienam, Nauarrum. At constat Bullas Pij V. & Gregor. XIII. quæ puniunt Abbatissas excommunicatione, & priuatione officiorum, ponunt hæc verba: *Si secus facere præsumpserint.* Vide has Bullas, & prædicta verba in *Addit. Rodriguez ad Crueci. n.* vbi explicat citatas Bullas clausuræ Monialium fol. mihi 392. & 394. in fine dictarum Bullarum. Cum ergo hæc Abbatissa fecerit ignoranter, seu bona fide, vt dicitur, nec proinde præsumpserit, sequitur prædictas pœnas euasisse. Nam præsumptio supponit scientiam, & malitiam, vt citati Doctores docent. Confirmo exemplo mihi fideliter narrato, quod contigit Conimbricæ in quodam Conuentu virorum: In quo quidam Prælati non idiota, sed bene doctus instituit quandam processionem insolitam per claustrum, vt possent certæ fœminæ ornatum claustri videre: accusatus de transgressione dictarum Bullarum, dixit se non incurrisse quia prædictam processionem instituerat bona fide, credens sibi licere, neque putans se per dictam processionem Bullas violasse. Consulti sunt meliores tunc Doctores iuris canonici professores, qui dixerunt non incurrisse, si bona fide illum fecisse constaret, sicut constitit per iuramentum eidem Prælato exhibitum.

2 Hoc à fortiori seruandum est cum Abbatissa, quæ

eo quod mulier est, magis ignorans est, illiusque ignorantia magis deferre oportet: sicut in alio casu tenet Riccius 4. par. *suarum Decisionum collect.* 1082. ubi dicit, quod licet iuxta leges communes, is qui semel aliquē acceptauit in iudicem, non possit illum amplius recusare: ait tamen ab hac lege excipi fœminam, & rusticum, qui possunt illum postea recusare: habent enim quasi priuilegium ignorantia.

3 Pro maiori vero istius casus notitia, & aliorum similium quotidie contingentium, in quibus violantur Bullæ Pontificiæ, punientes illos, qui contra facere præsumperint; quomodo credendum sit transgressori dicenti se fecisse bona fide, & quomodo probanda sit in illis bona fides. Respondeo imprimis, quod si agatur solum de foro conscientia, credendum est omnino asserenti se fecisse bona fide, nec cogitasse ibi interuenisse culpam, vel pœnam: si enim id crederet, non fecisset. Et huic tali persuadendum est, ut omnino quietus sit, nec se credat incurrisse. Imo addo, quod licet lex violata non poneret hoc verbum, *præsumperit*: Si tamen contrafaciens excusatus fuit à peccato, vel ob inaduertentiam, vel ob iustam ignorantiam, non incurrit pœnam aliquam alicuius legis, iuxta communem Doctorem; & patet certissime, quia ubi non est peccatum, seu culpa, non datur pœna. Vide quæ dixi in secundo tomo *Dubiorum regul. ver.* Ignorantia. maxime *num. 11. 12. & seqq.* Si vero agatur de foro externo, quomodo probanda sit bona fides, siue ignorantia. Dico primo, id posse colligi ex præsumptione: si enim persona delinquens sit bonæ famæ, & idiota, & in materia non nimis clara, & vulgata, magna præsumptio est quod peccauerit, seu potius legem violauerit bona fide, & ignoranter: sic iudex poterit acquiescere huic bonæ

bonæ fidei ad non imponendam pœnam. Ad maiorem vero securitatem, probari potest bona fides, & ignorantia per iuramentum parti exhibitum, stante enim dubio, stabitur iuramento illius: sic tenet Nauar. citato consilio, & num. & probat ex illa Regula iuris in 6. quæ dicit: *Ignorantia præsumitur, ubi scientia non probatur.* Si vero obiiciatur in hoc casu, quod contra istam Abbatissam datur præsumptio iuris, quia ius contra illam præsumit, quod sciuerit, quæ tenebatur scire pertinentia ad suum officium. Respondeo, quod etiam præsumptio iuris eliditur per iuramentum in contrarium, ut habetur in cap. *Cum in tua. de eo qui matr. accus. potest.* & glossa *ibid. in fine casus.* Hunc eundem modum probandi bonam fidem per iuramentum tradit Nauar. lib. 1. *consiliorum. titulo de constitutionibus. consil. 1. quest. 2. num. 6. & 7.* præter alios duos modos quos ibi assignat ad probandam ignorantiam. Vide adhuc eundem Nauarum *eod. lib. 1. consiliorum. tit. de summi. Trinit. & fide catholica. consil. 3.*

4 Ultimo probatur hic casus ex *Regula iuris in 6.* quæ dicit: Ignorantia facti non iuris excusat: omiſſa enim secunda parte illius regulæ de ignorantia iuris, vel legis non excusante, sicut ibi. Prima pars Regulæ dicit, quod ignorantia facti excusat etiam in foro externo, tunc vero datur ignorantia facti, quando ego nescio hoc meum factum, siue hoc opus quod facio, contradicere legi, imo credo non contradicere, tunc enim ignoro factum, id est, ignoro hoc factum esse prohibitum. Exemplum clarum est de percutiente Clericum, quem non credit esse Clericum, cum reuera sit: iste enim non ignorat legem Ecclesiæ excommunicantem percussorem Clerici, sed ignorat hoc factum esse percussorem Clerici: iste talis excusatur à pœna per-

percuſſoris Clerici, quia habuit ignorantiam facti. Eodem modo iſta Abbatiffa bene ſciebat legem Eccleſiæ prohibentem ingreſſum virorum in clauſuram ſine iuſta licentia, & neceſſitate : ignorauit tamen hoc factum, ſeu ingreſſum eſſe contrarium prædictæ legi; cum eſſet conſuetudo antiqua, vt talis Procurator eo die intraret, & aliqualis neceſſitas intrandi interueniebat. Maius eſt quod ego dico citato *tom. 2. Dubior. Regular. cit. ver. Ignorantia. num. 25.* ex Sanchez ibi citato, quod videlicet, ignorantia vincibilis, ſiue facti; ſiue iuris imponentis cenſuras, & alias pœnas ſpirituales, ſiue factum illud fuerit peccatum mortale, ſi tamen non fuerit ignorantia craſſa, & ſupina, excuſat ab omnibus illis pœnis, quod ibi probo ex Sanchez euidenter: vi de etiam eundem Sanchez *lib. 1. Decalog. cap. 10. num. 56.* vbi ait ſtante dubio iuris, aut dubio facti neminem cenſendum eſſe excommunicatum: quod ibi probat efficaciter, contra aliquos Doctores, quos citauerat *num. 54. & 55.* præcedentibus.

Adhuc pro iſto, ac ſimilibus caſibus aduerto, quod ſi in aliqua Bulla, vel lege ponuntur hæc verba: *Si quis auſus fuerit:* aut *Nē quis audeat.* Hæc verba æquivalent illi verbo in principio explicato, *praſumpſerit.* Et ſic omnia notata circa verbum, *praſumpſerint*, applicabuntur ad verbum, *auſus fuerit*, Ita dicunt communiter Doctores: vide quæ dixi ex Sanch. hac de re citato

2. *tomo*, & verbo ignorantia *num. 6.*



## CASVS XXVIII.

*De quodam Religioso Dubitante de suo Baptismo.*

**Q**uidam Religiosus cuiusdam Religionis hodie sacerdos, quando natus est, fuit baptizatus à quodam Clerico de Iudæis descendente, vulgo, *da Naçon, christaon nouo* Huius Clerici, fratres, & nepotes ex fratribus (id est sobrinhos) declarati sunt hæretici confessi in actu publico fidei sanctæ Inquisitionis: & quædam soror ipsius Clerici, pro negatiua combusta fuit in eodem actu publico. Clericus baptizans, videns in principio carceratos fratres, & filios illorum, fugit: & fiscus regius Clerici fugientis res mobiles, & immobiles confiscavit. Stante hac graui præsumptione contra Clericum, quod esset hæreticus, & proinde sacramenta Ecclesiæ cum debita intentione non ministrauerit: Iste Religiosus ab illo quondam baptizatus, scrupulo cæpit agitari circa valorem sui baptismi. Consuluit viros doctos, quorum alij dixerunt non teneri ad rebaptizationem sub cautella: alij dixerunt posse rebaptizari: & ille ad securitatem elegit rebaptismum sub cautela. Et declaratur quod Clericus primo baptizans erat Theologus, & protulit veram formam baptismi, qua vtitur Ecclesia.

Quæsitum fuit an de necessitate, talis Religiosus fuit rebaptizandus: an vero potuerit acquiescere consulentibus ne rebaptizaretur.

Et ex istius primæ quæstionis resolutione pendent sequentia dubia: primum, an dato quod rebaptizare-

tur, esset iterum recepturus omnes ordines sacros, quos constat non conferri homini non baptizato, cum baptismus sit ianua Sacramentorum? Secundum dubium est an illius professio in Religione valida fuerit, an vero ratificanda? Tertium, an Religio teneatur ad supplendas missas dictas ab illo non vero sacerdote. Quartum, quid dicendum sit de confessionibus sacramentalibus, quas audiuit iam factus confessor.

1 Ante responsionem tanti dubij suppono primo cum Suarez *tom. 3. de Sacramento Baptismi, dispnt. 22. sect. 2. §.* Est autem, quod in collatione istius Sacramenti Baptismi, potest concurrere duplex dubium, alterum iuris, alterum facti. Dubium iuris erit, quando in collatione sacramenti applicata est forma dubia, vel non conformis formæ à Christo D. institutæ: vel non applicata vera materia à Christo D. instituta: sed applicata est forma, vel materia dubia. Dubium facti tunc erit, quando est incertum, aut dubium, an reuera Baptismus fuerit collatus, quia non constat de certo vtrum à parte rei Baptismus fuerit collatus, vel aliquis baptizauerit. Et hoc dubium facti potest esse duplex; aliud omnino negatiuum, quando scilicet nulla sunt indicia ad credendum quod homo sit baptizatus. Aliud est, dubium facti quasi positium, quando videlicet sunt aliqua indicia dati Baptismi, sed non ita sufficientia, quia dantur etiam alia indicia probabilia ad credendum non fuisse collatum, vt si infans exponatur in platea, cum cartula dicente quod est baptizatus. Illa enim cartula non obstante, potest credi, quod facta fuerit à hæretico, vel pagano in odium istius Sacramenti, vel quod baptizauerit fœmina ignorans formam Baptismi.

2 Constat ergo, & supponitur vt verum, quod Baptismus,

ptissimus, de quo agimus datus ab hoc clerico, datus est cum vera forma, & vera materia à Christo D. institutis; & quod vere, & ritè formam protulit, erat enim Theologus, & eo quod esset Christianus nouus, & illam proferens in Ecclesia coram multis astantibus debuit expeditius pronunciare, propter suspicionem de se vitandā: ac proinde non interuenit hīc dubium iuris: neque item est dubium facti, quia constat à parte rei Sacramentum Baptismi in re fuisse collatum.

3 Totum dubium est, an Baptismus fuerit nullus ex defectu intentionis baptizandi in baptizante Clerico ob tot indicia probabilia, ex quibus potest colligi illum fuisse hæreticum, & inimicum nominis Christi, & Sacramentorum Ecclesiæ, vt sæpe iam constitit ex confessione publica Clericorum illius sanguinis, & nationis. Secundo, id potest colligi, non dedisse scilicet Baptismum cum intentione, ex fuga, qua fugit videns consanguineos carceratos in carcere S. Officij: forte enim timuit, suas culpas fore iam delatas ad prædictum tribunal. Tertio colligi potest ex confiscatione bonorum ipsius Clerici: talis enim confiscatio cum sit pœna grauissima, & externa non solet fieri nisi probatis culpis. Hoc posito sit.

*Prima conclusio.*

4 **N**on peccaret Religiosus, qui stante tali dubio, & urgente magno scrupulo se faceret rebaptizari ad cautelam. Et hoc probant vt minimum rationes tactæ proxime in numero tertio. Quamuis enim in re Baptismus collatus sit cum vera forma, & materia, præsumptio tamen vehemens est ad credendum Clericum sic suspectum non habuisse intentionem baptizan-



baptizandi propter dicta in *num.* 3. quæ præsumptio parit dubium sufficiens ad rebaptizandum ad cautelam. Si tamen ille fuerit sic rebaptizatus sub conditione, manebit obligatus ad supplenda illa de quibus dicetur in tertia conclusione.

*Secunda conclusio.*

**T**alis Religiosus de quo est quæstio, non tenetur rebaptizari sub conditione, sed poterit esse securus de salute animæ, & abstinendo à secundo baptismo cum securitate animæ, euadet multas, & graues difficultates, de quibus in tertia conclusione. Hæc conclusio probatur multis, claris, ac validis rationibus. Primo, ex cap. à *quodam Iudæo, de consecrat. dist. 4.* ubi Papa Nicolaus ad consulta Bulgarorum, sic respondet quæstioni à Bulgaris sibi propolitæ. *A quodam Iudæo, nescitis virum Christiano, an Pagano, multos in patria vestra baptizatos asseritis, & quid de ijs sit agendum consultiis. Hi. profecto si in nomine sanctæ Trinitatis, vel tantum Christi nomine baptizati sunt, constat eos non esse denuo baptizandos.* Hæc omnia sunt verba textus: In quibus clare dicit baptizatum à Iudæo, de quo ignotum erat an esset Christianus, vel paganus, non debere rebaptizari, eo quod seruauerit, & protulerit formam baptismi, & satis poterat vehementer præsumi de illo Iudæo de quo ibi, quod non haberet intentionem baptizandi, cum Iudæus esset ex sanguine, & nedum constaret an esset Christianus baptizatus. Et in nostro casu, constat quod iste Clericus formam protulit sacramenti, & erat Christianus baptizatus: Ergo illius baptismus non est iterandus, neque ego video quomodo prædicta verba Papæ possint pro alia opinione exponi. Secundo proba

ex

ex cap. *si nulla. eadem dist. 4. de consecrat.* vbi Papa Leo I. dicit, quod si nullum fuerit signum, vel indicium in vici-  
 niis, vel inter parentes, vel clericos, quod aliquis ho-  
 mo fuerit baptizatus, in tali casu detur illi baptismus  
 absque conditione: verba textus sunt hæc: *Si nulla ex-  
 tant indicia inter propinquos, aut familiares, nulla inter cle-  
 ricos, aut vicinos, quibus hi de quibus queritur, baptizati  
 fuisse doceantur, agendum est, ut renascantur, &c.* Et assi-  
 gnans Papa causam, cur in tali casu non sit timenda re-  
 baptizatio, ait: *Quod non ostenditur gestum, ratio non sine  
 ut videatur iteratum.* Hoc posito, arguo à contrario sen-  
 su. Papa dicit citato loco, ut repetatur baptismus quan-  
 do nullum est signum, vel indicium quod fuerit colla-  
 tus: Ergo si constiterit illum datum esse, quemadmo-  
 dum in isto casu constat, non poterit licite conferri.  
 Quantum vero valeat argumentum à contrario sen-  
 su, & quantum sit in usu, vide cap. *ex eo 15. quest. 3.* cum  
 glossa ibidem, & 25. *dist. in 1. cap. qualis.* & 23. *quest. 4.*  
*cap. questum:* Quæ glossa capitis *ex eo*, citat alios textus,  
 & ait esse argumentum fortissimum factum à contra-  
 rio sensu.

6 Tercio facit ad hoc intentum cap. *si qui apud illos,*  
*ead. dist. 4. de consecrat.* Vbi dicitur quod baptismus da-  
 tus per hæreticos, qui in sanctæ Trinitatis confessione  
 baptizant, validum esse reputandum: At Clericus de  
 quo agitur, baptizauit in nomine sanctissimæ Tri-  
 nitatis, neque in foro saltem externo, contra illum pro-  
 batum erat esse hæreticum. Facit etiam cap. *hi de qui-  
 bus ead. dist. vbi consultus fuit Papa, quod, licet consta-  
 ret aliquos homines fuisse baptizatos, non tamen con-  
 stabat cuius fidei fuerint Baptizatores: Respondet Pa-  
 pa non esse rebaptizandos, quolibet modo Baptismi  
 formam acceperint.* Facit, & Canon. 8. in 6. Synodo ge-

nerali, vbi dicitur rebaptizandos esse iterum sub conditione. *Quoties non inueniuntur firmi testes, qui eos absque ulla dubitatione baptizatos esse dicant.* Ergo cum in hoc casu sint firmi testes qui dicunt fuisse baptizatum: nec possint dari firmi testes qui absque dubitatione asserant baptismum fuisse nullum ob defectum intentionis occultæ, sequitur quod non debuit, imo non potuit baptizari iste Religiosus secundo baptismo. Hactenus probaui conclusionem positam ab Ecclesiæ autoritate in iure canonico contenta: Nunc ipsam probo ratione.

7 Prima ergo ratio sit, contra præsumptionem insurgentem contra hunc Clericum, quod baptizauerit sine intentione, eo quod consanguinei carcerati, & combusti erant ob crimen fidei: Non inquam ista præsumptio probat Clericum baptizasse sine intentione: Nam imprimis, sicut extra informationem accepi, intercurrerunt anni triginta à die dati baptismi, vsque ad carcerationem consanguineorum: Et potuit fieri vt tempore baptismi Clericus neque esset hæreticus, neque esset conscius de crimine consanguineorum. Secundo quia iam sæpius visum est, inter multos fratres idololatrias, & gentiles alium ex illis eo vitio non esse maculatum. Facit quod tradit *lib. 5. consiliorum Nauarrus titulo de sentent. excomm. consilio 3. num. 2.* Vbi ait quod crimen commissum ab vno fratre, non sequitur quod alius approbauerit, vel simul commiserit. Et facit etiam quod dicitur in cap. *quamuis regulariter. de sentent. & re iudic.* vbi dicitur quod res iudicata inter duos, non nocet alteri de quo est iudicata. Quod autem fuga istius Clerici non arguat ipsum fuisse culpam de hæresi, probari potest ex iis quæ doctores tradunt circa fugam rei, in particulari Iulius Clarus *quest.*

21. in *praxi crimin.* & illius commentator eadem quaestione, qui dicunt aliquando fugam rei nullum facere indicium de culpa illius; poterat enim fugere, vel timore dedecoris, vel timore falli testimonij, vel coniurationis, & similia: & quod ut plurimum, fuga facit solum indicium: Non autem decet ut in hoc casu propter solam fugam, quæ potuit esse inculcata, ut proxime diximus, suspicemur tantum malum, & credamus illum non habuisse intentionem baptizandi in baptismo collato ante annos triginta, in quo potuit non esse hæreticus. Quod vero iam alij Clerici istius sanguinis & nationis in actu publico sancti Officij conuicti fuerint de ministratione Sacramentorum absque intentione; hoc non est argumentum efficax ad probandam rem tam magnam, qualis est rebaptizationem esse faciendam circa omnes baptizatos à Clericis istius nationis, & sanguinis. Neque item confiscatio bonorum facta huic Clerico viget ad faciendam rebaptizationem: potest enim Fiscus illam facere confiscationem, vel consuetudinem, vel per cautelam, & securitatem bonorum, sicut facere solet in carceratione cuiusvis Iudæi; statim namque omnia illius bona fiscus in albo, vel indice conscribit ad cautelam; multotiesque contingit sic carceratum publicari innocentem, illique bona sua restituntur. Et constat præterea apud omnes quod hæreticus ante sententiam publicam non priuatur bonis quæ possidet.

8 Secunda ratio principalis sit, circa præsumptionem, quod iste Clericus non baptizauerit cum intentione; nam bene præsumendum est de proximo quoadiu non probatur esse malus, cap. *Dudum de præsumpt.* ubi glossa in *verb.* præsumatur, citat multos textus utriusque iuris. Sed contra istum baptizantem non-

dum est probatum quod fuerit malus; ergo non potest de illo male præsumi. Secundo intentio baptizantis est actus pure internus: at Ecclesia non iudicat de actu interno, nec proinde quisquam potest de illo iudicare, cap. *consuluiti* 2. *quæst.* 5. vbi ait Papa Stephanus, quod occulta, & incognita illi sunt relinquenda, qui solus nouit corda filiorum hominum: & quod præsumendum sit bene de proximo, vide inter alios Abbatem citato cap. *Dudum de præsimp.*

9 Tertia ratio principalis sit: nam admissa opinione quod iste sit rebaptizandus poterit oriri scrupulus, & similis quæstio inter Catholicos illos qui fuerant baptizati ab aliquo clerico istius nationis, & sanguinis, quorum ab illis baptizatorum non paruus est numerus: quod tamen dicere, erit multorum conturbatio, & inquietatio. Quarto principaliter probo ex cap. *ueniens de præbytero non baptizato*, in cuius fine ait Papa, esse violentam præsumptionem ad probandum quod aliquis sit baptizatus, si constet natum esse de parentibus catholicis, & quod fuerit semper conuersatus cum Catholicis, licet de hoc nullus alius sit testis. Et in hoc casu, iste Religiosus est de parentibus catholicis, & vixit inter catholicos, imo inter Religiosos, & constat de illius baptismo externo, qui fuit inscriptus in libro publico baptismi in parochia seruato. Ex quibus verbis Papæ dicentis esse violentam præsumptionem quod quis sit baptizatus, natum esse de parentibus catholicis, & inter illos catholicos conuersatum esse: Formo tale argumentum. Carceratio, & combustio consanguineorum istius Clerici, & fuga illius, licet faciant vehementem præsumptionem, quod baptizauerit sine intentione, non tamen faciunt violentam præsumptionem ob multa obstantia, & reuerentia quæ

quæ diximus in *num. 7.* est enim vehemens præsumptio multo minor quam violenta: at iuxta citatum proxiime cap. *veniens*, de isto Religioso, est violenta præsumptio quod fuerit baptizatus, cum natus sit de parentibus catholicis, & inter catholicos conuersatus; imo datur euentia quod fuerit baptizatus ex libro baptismi: ergo ista violenta præsumptio quod sit baptizatus, præualebit contra illam vehementem præsumptionem, quod caruerit intentione Clericus ille in collatione baptismi. Valet consequentia ex dictis in *ca. litteras vestras. cum gloss. ibid. in ver. vehementem*, ubi dicitur quod quando concurrunt duæ præsumptiones illæ, quæ est præsumptio maior elidit, & excludit illam suspicionem, quæ est minor, & confirmatur ex eodem cap. *litteras vestras*, & ex praxi tribunalis sancti Officij, in quo ille qui solum est suspectus de hæresi suspicionem vehementi, non absoluitur ab hæresi, seu ab excommunicatione ad cautelam, sed solum ille qui est suspectus de violenta præsumptione, vt inter alios tenet Penha in *suo Directorio Inquisit. fol. mihi 486. & sequentibus* & Vmbert. in *pract. Inquisit. verbo suspicio* Ergo à simili in hoc casu, in quo est vehemens præsumptio de isto religioso quod non sit baptizatus ex defectu intentionis in baptizando, præualebit præsumptio vehemens; & maior quod ille sit baptizatus; nata ex eo quod constat ex libro baptismi, applicatam esse formam, & materiam Sacramenti, & illum natum esse ex parentibus Catholicis, & inter catholicos conuersatum.

10 Quinto principaliter, non obstat cap. *veniens. de presbyter. non baptizato*, supra citatum, in quo Papa iussit baptizari Clericum, qui à Papa remedium postulauerat, vt obliget ibi præceptum in hoc casu: Nam

casus illius capitis nimis diuersus est ab isto. Nam in illo casu constitit Pontifici illum Clericum numquam fuisse baptizatum vlllo modo; & ideo iussit illum baptizari absolute, absque conditione, vt patet ex verbis textus: & in hoc casu constat ex libro baptismi hunc Religiosum fuisse baptizatum vere baptismo externo in forma Ecclesiæ. Si autem Papa sciret in illo casu collatum fuisse aliquo modo baptismum, non forte iuberet, quod iussit.

¶ Sexto facit multo ad sequendam hanc opinionem, quod illam tenendo euaduntur multæ, & magnæ difficultates emergentes ex rebaptizatione: de quibus mox dicemus. Et quod euasio maximarum difficultatum in quibus remedium est valde difficile, sit causa sufficiens, vt teneatur opinio etiam minus probabilis, tenet Soto, Nauarrus, & Sanchez illos citans, & sequens lib. 2. de murim disp. 36. conclus. 4. num. 8. vbi citat Sotum dicentem hæc verba nimis laudata à Nauarro. *Licet quis habeat opinionem alicuius partis, & alterius formidinem, non tenetur sequi opinionem si inde magnum imminet, ut alicui periculum, & formido alterius apparentem habeat probabilitatem: quia periculum graue facit vt in moralibus formido præponderet opinioni.* Sic ille. Quamuis ergo probabilior esset opinio quod hic Religiosus foret rebaptizandus, cum tamen ex illa magnæ emergant difficultates, & fere pericula, videlicet ordinum sacrorum iterum recipiendorum, Missarum dictarum, & confessionum quas audiuit supplendarum, & aliorum quæ infra dicemus; euasio harum magnarum difficultatum, seu periculorum sufficeret, vt ista opinio de non admittenda rebaptizatione esset tenenda: Maxime quando ista opinio de rebaptizatione cauenda, tot textibus, ac rationibus munita, sit multo probabilior quam

quam opposita rebaptizationem suadens.

12 Neque vero, si iste Religiosus non rebaptizetur, reponitur in periculo saluationis æternæ: vt enim bene, ac docte ait Comitulus *lib. 1. respons. Moralium num. 5.* In alio casu simili, dicens non esse rebaptizandum infantem expositum ad valuas Ecclesiæ, cum cartula, dicente tantum, ( est Baptizatus ) asserens illam cartulam solum sufficere vt non rebaptizetur: Respondensque obiectioni, quod per hoc possit periclitari salus talis expositi: dicit per hoc non poni saluationem illius in dubio: Nam omnis nostra gratia, & iustificatio quoad certitudinem actuale, & personalem, pendet sub fide, confidentia, & opinione, & ( vt ita dicam ) in pia credulitate: quis enim certo scit se esse baptizatum, cum pendeat ab intentione baptizantis? Quis certo scit se esse verum Sacerdotem, cum pendeat ab intentione ordinantis? Quis certo scit se esse vere confessum, cum id pendeat ex contritionis valore, & Sacerdotis absoluentis intentione, & vero ipsius caractere? Viuimus enim sub hac pia probabilitate de certitudine personali nostræ gratiæ: & cum hoc stat, quod ista dubietas non facit nos esse in periculo saluationis, sic ille optime ad nostrum intentum. Nam licet iste Religiosus absteineat à secundo baptismo stante opinione tot textibus, & rationibus firmata, quod non debeat rebaptizari, non exponitur periculo saluationis viuens in ista pia credulitate, quod sit vere baptizatus. Et clarius hoc diffinitur in cap. ad Apostolicam de præbytero non baptizato, vbi Papa expresse dicit, quod omissio baptismi non nocet credenti probabiliter se esse baptizatum: idque probat ibi Papa Innoc. III. cum exemplis: Iste autem Religiosus satis probabiliter potest credere se esse baptizatum, ob tot rationes, & tex-



tus citatos. Addi potest aliud exemplum circa piam credulitatem nostræ salutis spiritualis. Quis enim certo scit hanc hostiam consecratam ab hoc particulari sacerdote esse vere consecratam, cum id pendeat primo ab illius intentione non cognita: Secundo an sit verus sacerdos: Tercio an sit vere baptizatus? Et nihilominus depositis his dubiis illam adoramus, & sumimus credentes nos verum sumere, & adorare sacramentum, quod ad intentum potest optime adaptari, pro tollendo dubio de periculo saluationis, si omittatur in isto casu secundus baptismus.

13 Facit adhuc ad probationem istius conclusionis quod tradit Sanchez *lib. 3. de matrim. disp. 35. num. 19*: videlicet quod quando dubitatur de valore actus, in dubio est accipienda præsumptio, vt actus valeat potius quam vt pereat: & citat ad hoc duas leges ciuiles, Alciatum, & Menochium. Cum ergo in hoc casu sit dubium de valore istius baptismi, tenenda est potius præsumptio de illius valore, quam de illius nullitate.

14 Doctores pro ista opinione hætenus non citauimus, quia cum casus fuerit tam particularis, & nouus, nullus de illo scripsit in terminis. Ex ijs vero quæ illi dixerunt in simili fere materia, & indirecte dixerunt, potest primo citari Comitulus loco supra citato *num. 12. in princip.* vbi probat non esse rebaptizandum infan-  
tulum expositum in platea cum cartula dicente illum esse baptizatum: licet illa cartula patietur multa dubia, de quibus iam diximus, & ait Comitulus hoc consilium placuisse multis Theologis in quadam consultatione congregatis Venetiis in facti contingetia: quod nimis inseruit pro casu præsentis. Et concludit ibi Comitulus in septima ratione, quod sacramentum baptismi, quando constat de facto, nec potest sciri fuisse irri-

tum(quemodo in hoc casu sciri non potest , sed scitur esse collatum) ait Comitulus, quod si constet de facto, non debet iterari sub conditione : & citat pro se D. Thom. Sotum, Antonin. Pallud. Scotum , Angelum, Tabienam. Coincidit fere cum Comitolo Suarez supra citatus in *princip.num.* 1. Si vero aliqui textus, vel Doctores dixerint baptismum in dubio esse iterandum sub conditione , intelligi debent , quando est dubium facti, vt dixi in *num.* 1. cum Suarez , & satis colligitur ex præcedentibus : & in hoc baptismo de quo agimus, nullum est dubium facti, vt etiam probatum manet in præcedentibus. In particulari citari potest in oppositum Vasquez, qui 2. *tom. ad 3. partem D. Thom. disp.* 146. *cap.* 4. dicit, quod infans expositus cum cartula dicente quod sit baptizatus, sed creditur expositus à Sarracenis, & Iudæis qui execrantur baptismum, hunc talem ait fore rebaptizandum. At in nostro casu Clericus baptizans non fuit Sarracenus, neque est adhuc damnatus de iudaismo. Et capitulum *de quibus.* de baptismo, & eius effectu, quod aliqui citant, in quo dicitur, quod in dubio an aliquis baptizatus fuerit , rebaptizetur sub conditione : hoc capitulum potest intelligi quando est dubium facti, iuxta dicta *num.* 1. cum Suarez , & iuxta Comitolum citatum in *princip. huius num.* 14.

15 Ex dictis in hac secunda conclusione, vt vides, sequitur, quod si Religiosus iste acquiescat huic opinioni tot rationibus confirmatæ , & absteineat à secundo baptismo, euadet multas, & maximas difficultates, videlicet de professione iteranda: de ordinibus sacris iterum recipiendis: de confessionibus sacramentalibus quas audiuit , emendandis : ac denique de supplendis Missis quas dixit, si nō erat sacerdos, pro quibus emissas Conuentus pitancias recepit. Et has difficultates vi-

17 Posito vero hoc fundamento, quod sine baptismo nullum valet Sacramentum susceptum, bene inferitur secundum, & tertium dictum de obligatione suppleandarum Missarum, & confessionum sacramentalium quas audiuit, eo modo quo diximus. Constat evidenter, nam si non est baptizatus, non est sacerdos, ut patet: Si non est Sacerdos, non potuit vlllo modo Missam validam dicere, cum consecratio in Missa facienda pendeat essentialiter ex charactere in Sacramento Ordinis impresso. Denique si non est Sacerdos non potest valide confessiones audire, cum iurisdictio ad absolvendum conferri non valeat, nisi Sacerdoti habenti characterem, quia character est fundamentum iurisdictionis ad absolvendum. Quæ omnia, quia clarissima sunt, & à nullo Catholico possunt negari, amplius non curo probare. Et quod attinet in particulari ad confessiones nullas, quas audiuit, dico quod licet in illis faciendis data fuerit bona fide pœnitentis confitentis, & illius absolventis, hæc bona fides non sufficit, ut essent confessiones validæ; neque ad id iuvat lex *Barbarius. ff. de officio Prætoris.* quia caruit charactere sacerdotali, quod est fundamentum essentialiale ad absolvendum. Pro quo videri potest Sanchez *lib. 3. de matrim. disput. 22. à num. 4. & seqq. & lib. 8. de matrim. disput. 4. à num. 11. & seqq.* & multo clarius vide Valerum Cartusianum *lib. de differentiis viriusque fori. verb. Nullitas. different. 2. num. 3.* ubi refert casum cuiusdam sæcularis, qui cum non esset clericus, se tamen talem fingens, in Regno Aragoniæ per 33. annos Parrochus fuit in vna parrochia, & quod ibi tenet Cartusianus de iterandis Sacramentis ab illo ministratis.

18 Sed in particulari de professione istius Religiosi supposita nullitate prioris baptismi, potest esse dubiū.

Et

Et potest utcumque probari quod fuerit valida : nam professio facta ab excommunicato nominatim, est valida, iuxta Doctores communiter, maxime Rodrig. *tom. 3. qq. 9. 17. art. 14.* imo & professio hæretici occulti est valida, ut probō in 1. *Dubior. Regul. verb.* Professio. *num. 24.* ex Nauar. & Sanchez, qui vltimus dicit matrimonium Catholici cum publico hæretico validum esse etiam ex parte hæretici. Si autem hæreticus qui non est Catholicus potest contrahere verum matrimonium: etiam homo non baptizatus, licet non sit Catholicus poterit professionem validam emittere, quæ est quoddam matrimonium spirituale: & licet iste Religiosus non baptizatus, non esset Catholicus in numero ob defectum characteris baptismalis, erat tamē Catholicus in intentione, & poterat habere veram fidem, ac meritum per veram contritionem, qui est baptizatus flaminis, & proinde poterat ut catholicus valide profiteri. Facit utcumque id quod dicit Papa citato cap. *veniens. de pœsbeitero non baptizato*, quod scilicet fuerit opinio aliquorum, quod non baptizatus, credens tamen se baptizatum, propter fidem Sacramenti potuisset valide recipere Sacramentum ordinis, licet id Papa ibi non recipiat. Si ergo iuxta illam opinionem, non baptizatus vere poterat ordines sacros recipere, posset à fortiori validam professionem emittere, cum professio non sit Sacramentum. Et confirmatur, quia professio est quidam contractus inter profitemem, & inter religionem acceptantem: at homo Catholicus baptizatus potest facere validum contractum cum homine non baptizato scienter, videlicet cum Sarraceno. Per quæ videtur hæc opinio utcumque probabilis, quam ego apud nullum reperi discussam in terminis proprie, & clare.

19 Hoc non obstante, dico imprimis in Ordine Minorum, credo quod talis professio non baptizati fuisset nulla. Probo ex Regula nostra, ac statutis generalibus, quæ ambo circa profitentem petunt vt conditionem, quod sit catholicus. In primo cap. Regulæ ait P. N. Franciscus, quod Prouincialis examinet Nouitium de fide Catholica: & statuta generalia iubent, vt Nouitio ante professionem legantur, & proponantur certæ conditiones cum protestatione, quod professio erit nulla, deficiente aliqua conditione ex illis ibi propositis: Ex illis vero conditionibus prima est, quod sit fidelis catholicus. Iam vero homo non baptizatus non dicitur catholicus in communi modo loquendi: ac proinde professio istius in Ordine Minorum valida non fuisset ex defectu illius conditionis. Secundo, quia etiã si posset fieri quod non baptizatus, posset esse catholicus in merito, si cum fide, ac desiderio baptismi habeat veram contritionem, id non sufficit, quia illa contritio est difficilis, & nulli potest constare an iste non baptizatus habuerit veram contritionem ob quam dicatur catholicus merito.

20 Credo secundo quod iste talis non baptizatus, in nulla Religione valide professionem emitteret ex defectu Baptismi. Probo, quia credendum omnino est quod ex parte Conuentus & Religionis admittentis ad professionem, defuit consensus in illo recipiendo. Probo à simili, ex Nauar. lib. 3. consiliorum tit. de Regul. consilio 50. & Rodrig. tom. 3. qq. quæst. 17. art. 9. qui dicunt, quod si in aliqua Religione sit statum, quod non recipiantur illi qui vulgo dicuntur, *da naçon*, Christiani notii; & aliquis talis recipiatur occulte per ignorantiam; istius professio erit nulla, non ex vi statuti, sed quia defuit consensus ex parte Conuentus, quia si sci-

ret Conuentus eum esse talem non reciperet ad professionem, neque consentiret. Quod magis militat in isto casu: Si enim quilibet Conuentus sciret hunc non esse baptizatum nullo modo consentiret. Et dicunt Nauar. & Rodrig. *citatis locis*, quod cognito defectu illo christiani noui, poterit post professionem eiici ab ordine, ob defectum consensus, qui defuit in professione ex parte ordinis. Si vero huius professio non baptizati fuit nulla, etiam annus nouitiatus fuit nullus, & proinde debet iterum anno integro esse Nouitius, nec valebit professio præterita ratificata vna die post secundum baptismum.

21 Hæc quæ dixi. *num. 19. & 20. de nullitate professionis hominis non baptizati*, satis videntur colligi ex illis quæ ibidem dixi, & citari. Quo non obstante, scio Marzillam in *lib. suarum Decisionum, ac Declarationum Cardinalium*, ann. 613. *lib. 1. tit. 12. c. 18.* citare hanc Declarationem Cardinalium. *Monialis dubitans an esset baptizata, quæ ad camclam se iterum fecit baptizari, si antea professionem emiserat, professio tenet, ita ut exire non possit: sed tamen debet iterum nouitium facere anno integro, & postea profiteri.* Quæ quidem declaratio, si vere facta fuit ab Illustriss. illis Dominis, tollit omne dubium, & probat professionem hominis non baptizati valere. Et si illi ita declararunt, ego cedo manus, & dico professionem istam non esse ratificandam, neque in Ordine Minorum, neque in aliquo alio Ordine. Sed quoniam Cardinalium declarationes sæpe falso citantur, & non obligant vt lex, nisi modo, quo ego dixi 1. *tom. Dubior. Regul. ver.* Declarationes Cardinalium ex Rodrig. ibi citato. Ego proxime dictam declarationem à Marzilla citatam non inrpuans, tamen circa illam sic dubito: Nam alter Marzilla, Petrus videlicet Marzilla, anno

618. qui quasi priorem impressionem correxit, ad citatum cap. 18. Tridentini, hanc declarationem Cardinalium non posuit. Secundo, quia si ista professio Monialis dubitantis de suo baptismo, valida fuit, ut non possit exire, ad quid ergo postea obligatur facere novum, & integrum annum novitiatus? Nam vere professus non indiget nouo novitiatu, neque noua professione: Si dicas illam professionem priorem non valuisse ut solemnem, sed habuisse vim voti simplicis tantum, & ratione voti simplicis teneri postea profiteri: dicam quod dicta declaratio dicit, *Quod prima professio tenuit*: hæc vero verba sic dicta videntur innuere, quod tenuit tanquam solemnis, non tanquam votum simplex. Et potest hæc mea dubitatio iuuari ex cap. 15. *Concil. Trident. de Regular.* ubi dicitur, quod professio facta ante annum 16. completum, vel non transacto anno integro novitiatus, non solum sit nulla, sed etiam quod nullum effectum obligationis inducat, videlicet quod nec obliget ut votum simplex. Et id posset aptari ad istum casum, ut Professio non baptizati, siquidem iubetur ratificari postea cum altero anno novitiatus, videatur quod neque prius professio obligauerit ut votum simplex. Quidquid sit, ego subiicio me censuræ Ecclesiæ, & Doctorum: solum sufficiat ostendisse quid pro utraque parte dici potuerit de valore professionis hominis non baptizati. Et ideo non solum argumenta adducta *num.* 18. pro valore istius professionis, quia illa consonant cum citata Declaratione Cardinalium. Quando vero constaret prædictam declarationem esse apochrifam, facile soluentur eadem argumenta pro nullitate eiusdem professionis, ex dictis a nobis *num.* 19. & 20. Et in fauorem adhuc prædictæ declarationis Cardinalium, & quod iste professus non baptizatus sit cogendus

cogendus iterum profiteri, facit omnino casus adductus à Symanchas *de cathol. instit. titu. 31. num. 5.* & Cast. *de inst. hereticorum punit. lib. 1. cap. 8.* qui dicunt, quod si homo fuit baptizatus sed male, & postea detecta est nullitas baptismi, iste talis cogendus est postea iterumve rebaptizari, & seruare fidem catholicam: quod exemplum multum fauet ad probandum, quod iste nulliter professus ob defectum baptismi, sit postea cogendus vt iterum professionem emittat, est enim vtrobique eadem ratio. Facit etiam quod tenet Suarez *tom. 1. de Relig. lib. 3. de voto cap. 2. num. 9.* quod scilicet cathecumenus non baptizatus potest valide emitte-  
re votum simplex.

22 Et quamuis ad hæc omnia possem respondere facile pro nullitate dictæ professionis, id non facio, tum vt deferam prædictæ declarationi Cardinalium, tum breuitatis gratia, tum quia ob proxime dictum à Suarez, illa prima professio facta à non baptizato, censi potuit, quod vt minimum fuit votum simplex emissum à cathecumeno: erat enim iste Religiosus saltem cathecumenus, & proinde illius votum simplex Religionis primo emissum obligabit illum vt postea veram, ac secundam professionem emittat.

*Due alie difficultates de isto professo,  
& rebaptizato.*

23 **C**Asus valde difficilis multas parit difficultates; & ita contigit in isto casu. Nam Religiosus de quo agitur, pressus scrupulo in materia solius baptismi, fecit iterum se rebaptizari sub conditione. Sed tamen non recepit Ordines sacros denuo, sed Missam celebrauit vt antea, nec professionem ratificauit cum nouo



nouo nouitiatu. Mota est contra illum duplex quæstio. Prima, quod cum per rebaptizationem se crederet non baptizatum, & proinde non erat Sacerdos, iuxta prædicta *num.* 16. & 17. sequitur quod celebrauit Missam cum non esset sacerdos, & incurrit pœnas motus proprii Clementis VIII iubentis tradi brachio sæculari celebrantem Missam illum qui non est sacerdos. Secunda quæstio fuit, quod saltem incurrit irregularitatem impositam illi, qui ministrat in Ordine, quo caret: & iste supposito quod non erat baptizatus, nec sacerdos, ministravit in Ordine presbyteratus quo caret, & proinde videtur incurrisse irregularitatem positam contra ministrantes in Ordine, quo carent. Ex quibus satis vides quanto iure supra dixerim debuisse hunc Religiosum acquiescere, & abstinere à secundo baptismo propter tam difficiles difficultates inde emergentes.

24 Et imprimis quod attinet ad priorem quæstionem de repetitione ordinum sacrorum, dica imprimis istum Religiosum. rectius, ac securius facturum repetendo Ordines sacros, supposito quod repetiit baptismum; imprimis enim fecit contra expressum textum capituli *veniens. de presbyter. non baptizato.* Vbi Papa de presbytero non baptizato loquens, ait ad finem capituli: *Mandamus quatenus ipsum per singulos ordines usque ad sacerdotium promouere procures.* Et præterea maior obligatio erat vt iste iterans Baptismum, Ordines iteraret, quam vt iteraret Baptismum. Nam ad iterandos Ordines iterato Baptismo vrget ille textus clarissimus proxime citatus, & conclusio Theologorum, quod Baptismus sit ianua Sacramentorum: Ad non iterandum vero Baptismum, excusabant illum tot textus, ac rationes citatæ in secunda conclusione.

25 Quæris, an sic celebrans, & sacrorum Ordinum iterationem omittens, peccauerit, & incurrerit pœnas de quibus *num. 23*? Hic occurrit responsio illa dicentium in aliquibus casibus dubiis, videlicet: ante factum non consulerem, post factum non condemnarem. Sic ego dico in hoc casu: Ante factum consulerem omnino iterationem Ordinum, supposita iteratione baptismi propter clarum citatum proxime textum. Sed post factum non audeo illum condemnare de peccato, vel de pœnis. Ducor rationibus sequentibus. Primo, quia ipsemet Papa doctissimus Innocentius III. citato cap. *veniens*, præmittens primo opiniones esse inter Doctores, quod ordines sacri non essent iterandi à presbytero non baptizato, qui aliis vixerat ut fidelis cum fide Christi, & tanquam fidelis, cum haberet fidem infusam per contritionem: imprimis, opinionem quæ dicebat non teneri hunc ad iterandum Sacramentum Ordinis, posuit secundo loco, & ultimo: quod aliqui Doctores dicunt esse signum opinionis reputatæ ut melioris, quæ scilicet ponitur ultimo loco. Deinde decernens, ut talis presbyter non baptizatus iterum ordines suscipiat, antequam id præcipiat, ait se id mandare tanquam tutius: ait enim: *In hoc dubitabili casu, quod tuius est sequentes, mandamus, &c.* Constat autem quod licet una opinio sit tutior, ac securior, is qui sequitur minus tutam, si tamen illa probabilis est, non peccat, ut latè, & efficaciter probat Sanchez *lib. 1. De cal. cap. 9. à num. 13.* citans multos Recentiores. Secundo, quia Doctor potest hodie consulere secundum istam opinionem probabilem, & cras consulere secundam opinionem contrariam si sit etiam probabilis, ut eodem loco tenet Sanchez & clarius docet Sayro in *Clau. Regia lib. 1. cap. 6.* Si autem sic potest Doctor

confu-

confulere secundum varias opiniones, sic pœnitens poterit agere diuersis temporibus secundum contrarias opiniones: & ita iste Religiosus videtur quod potuit sine peccato, primo vti opinione dicentium, quod rebaptizaretur sub conditione: & hoc nõ obstante potuit postea vti opinione dicent iuxta nostram 2. concl. non indigniſſe nouo baptiſmo ſed poſſe quietari cum primo, & ſic excuſauit Ordinum ſacrorum repetitionem, quia operatus eſt ſecurè diuerſis temporibus iuxta diuerſas opiniones in eadem materia. Confirmatur hoc amplius per id quod tradit Sanchez citato *cap. 9. num. 3.* vbi multos citans probat licitum eſſe etiam in adminiſtratione Sacramentorum vti opinione minus probabili, relicta probabiliori, ac tutiori, non obſtante periculo irritandi Sacramenti: quod ibi probat adducens rationes, quorum vna hæc eſt: Quia non eſt irreuerentia Sacramenti illud miniſtrare cum periculo vt ſit irritum ſequendo opinionem probabilem.

26 Quod vero iſte Religioſus ſic celebrans ſine noua ordinum receptione, non incurrit pœnas motus proprij Clement. VIII. contra celebrantes qui non ſunt ſacerdotes, conſtat ex tenore ipſius Bullæ incipientis, & ſi aliaſ. Dat. Rom. anno 1601. in qua illud factum, ſeu celebrationem, ſemel appellat audaciam, ſemel temeritatem: At iam in præcedentibus diximus, quod quando Bullæ Pontificum vtuntur ſimilibus verbis audaciæ, & temeritatis, ſi quis contra faciat bona fide, non incurrit illas pœnas. Religioſus vero iſte celebrauit bona fide credens id ſibi licere: vide quæ diximus in caſu 27. circa Abbatiffam admittentem intra clauſuram viros indebite, ſed bona fide. Secundo probò, quia id ſolum fit temere, quod fit ſine fundamento, & cum præcipatione, vt explicat Calepinus verbo

Temere: At iste Religiosus non celebrauit sine fundamento, imo habuit fundamentum, & opinionem Doctorum sibi dicentium non indigere iteratione Ordinum sacrorum, quia per primum baptismum fuerat vere baptizatus, & proinde postea vere ordinatus: Ergo cum non celebrauerit temere, non incurrit poenas dicti motus proprii punientis temere celebrantes. Et in cap. 2. de clerico non ordinario ministrante, de Diacono Missam dicente, dicitur: *usurpare præsumpserint*. Hic autem ob supra dicta non præsumpsit, cum celebrauerit bona fide, & cum opinione probabili, quod id facere poterat. Ad id quod dictus motus proprius Clementis punit illos, qui celebrant, cum nullo modo antea ordinem sacerdotis receperint: hic autem vere recepit omnes sacros ordines, ac proinde de illo non intelligitur dictus motus proprius.

27 Idem dico de secundo, quæsito, videlicet quod iste sic celebrans non incurrit irregularitatem positam contra ministrantem in Ordine, quo caret, probatur eisdem fere rationibus proxime positis in *num. 26*. Probatur denique primo ex Nauar. in cap. *Accepta. de reslit. spoliis. ad oppositionem 81. num. 34. & in sum. cap. 27. num. 252*. ubi citans Panormitanum, Dominicum, Felipum, docet irregularitatem positam in poenam delicti non incurri nisi interueniat dolus, aut contemptus, etiam si alias interuenerit peccatum mortale: At constat, quod ista irregularitas de qua quæritur, est imposita ob delictum: & item constat quod iste Religiosus non celebrauit cum dolo, neque cum contemptu. Secundo probo ex eodem Nauar. in *sum. cap. 27 num. 155*. ubi ait, quod si quis suscepit ordines sacros putans bona fide se esse legitimum, cum non esset, non incurrit suspensionem ab ordinibus propter bonam fidem, quam

quam habuit, & iste Religiosus habuit bonam fidem, cum consuluerit Doctores, sibi dicentes sic facere potuisse. Confirmatur *ex cap. 20. de constit. in 6.* vbi dicitur, Ignorantiam, dummodo non sit crassa, & supina, excusare ab omnibus sententiis: hic autem ignorauit, & non crasse, quod per talem celebrationem irregularitatem aliquam incurrerit.

28 Adhuc pro quiete istius Religiosi, quod per ratificationem solius Baptismi, & omissionem iterationis sacrorum Ordinum, non possit accusari de aliquo delicto: pono istud exemplum: Fuit quis excommunicatus publice, sed tamen ille credit, & defendit se non esse excommunicatum: & nihilominus ad securitatem petit à iudice absolutionem à censura. Per hanc petitionem absolutionis non fatetur se esse excommunicatum, nec desistit à probanda sua innocentia. Ita tenet in terminis glossa parua marginalis ad cap. *ad presentiam nostram de appellat. ad ver.* Absolui, & alij Doctor. Eodem etiam modo, licet iste Religiosus se fecerit iterum baptizari ad cautelam, non per hoc confessus est se non esse sacerdotem, nec desistit, vel renunciauit iuri quod haberet ad celebrandum secundum opinionem probabilem, qua sibi dictum erat non indigere nouo baptismo: sed per iterationem baptismi voluit securus esse in re, quæ magis necessaria est ad salutem, quam sit Sacramentum Ordinis, non interim amittens opinionem, quod esset vere sacerdos.

Vltimo aduerto quod sex graues Doctores in ista Olyssipone de eodem casu consulti, dixerunt istum Religiosum non indiguisse nouo, seu secundo baptismo. Et ex illis duo expresserunt, quod licet baptismum iterauerit sub conditione, non indigebat iteratione sacrorum Ordinum.

## CASVS XXIX.

*De electione cuiusdam Monialis ad certum officium, à qua fuit appellatum.*

**I**N quodam Conuentu Monialium eligenda erat officialis quædam, quam illæ vocant Discretam. Electio facienda erat per solas seniores, quæ in illo Ordine vocantur Discretæ. Hæ electrices erant vndecim, & omnes vocatæ ad electionem venerunt. In primo scrutinio ore tenus recepto, sex ex illis vndecim dederunt suffragium cuidam v g. Francisca: quinque aliæ suffragatæ sunt pro Antonia. Prouincialis videns diuisionem, dedit suum suffragium Antoniæ, quæ habebat quinque suffragia, & sic cum voto Prouincialis manserunt æquales in voto. Est vero in hoc ordine statutum autoritate Apostolica confirmatum, quo statuitur, vt si electores per multa scrutinia intra viginti quatuor horas non elegerint, nec concordauerint, transacto illo die naturali præses electionis solus eligat, & nomet quem voluerit. Prouincialis videns discordiam in primo scrutinio, surrexit, & post horas viginti quatuor rediit ad continuandam prædictam electionem. Et conuocatis vndecim electricibus, illæ sex quæ suffragium dederant Francisca, noluerunt venire, nec suffragium dare: venerunt solæ illæ quinque quæ antea suffragium dederant Antoniæ. Quo viso Prouincialis cum illis quinque iterum eligens, & attento statuto Ordinis proxime dicto, elegit per vota, & nominauit Discretam Antoniam. Qua electione publicata, sex illæ Moniales quæ venire noluerunt, appellauit.

pellauerunt ab electione. Et in secundo scrutinio iterum pro Antonia suffragium dederunt illæ quinque, & Prouincialis.

I Quæsitum fuit an ista electio Antonia valida fuerit, & an potuerit ab illa appellari: Et quod electio fuerit nulla, videtur probari primo, quia in omni electione requiritur vt electus habeat maiorem partem suffragiorum, vt praxis & iura obseruant: At Antonia neque cum suffragio Prouincialis habuit excessum suffragiorum, sed mansit æqualis: ergo non fuit vera electa. Secundo, quod Prouincialis ex vi statuti non potuerit Antoniam nominare, patet, quia prædictum statutum desumptum est ex Clementina *Exini. de verbor. signific.* vbi Papa concessit Minoritis id quod citatum est supra ex dicto statuto. At Papa in citato capitulo, ponit hæc verba: *Si electiones plures in discordia celebrari contingat*: Prouincialis vero in hoc casu intra viginti quatuor horas solas duas electiones celebrauit, vnde non videtur seruasse formam dicti capitis: debuit enim vt solet fieri, sex, vel septem scrutinia in discordia facere, vt posset vti illo priuilegio. Tertiò, quia ille textus, & concessio loquitur tantum de electione Prouincialis: in cuius electione dicit, quod si electores non concordent intra viginti quatuor horas, præses electionis nominet Prouincialem: cum ergo ibi loquatur tantum de electione Prouincialis, & materia sit odiosa, vtpote contra ius commune, est proinde restringenda, nec debet applicari, vt id possit Prouincialis facere in electione Abbatissæ, vel officialium Monialium. Quarto probatur, quia in hoc casu Prouincialis videtur grauamen, & iniuriam intulisse Francisce, quæ in primo scrutinio habuit sex vota, quæ erat pars maior vndecim suffragantium: & tamen noluit con-

firmare illam habentem excessum suffragiorum cum vno insuper suffragio, cum quo videtur mansisse vera electa: & proinde videtur quod bene, ac iuste sex illæ potuerint appellare ab isto illato grauamine: tenetur enim præses electionis confirmare electum habentem excessum suffragiorum. Quinto probatur, quia sex illæ quæ noluerint venire ad secundum scrutinium, per Nuntium missum appellarunt ab electione antequam Prouincialis faceret secundam electionem, & nominaret electam: Electio vero facta post legitimam appellationem interpositam, est nulla, vt patet ex multis textibus iuris canonici, & pendente appellatione nihil est innouandum.

2 Hoc nonobstante dico, quod electio Antoniaë fuit valida, & quod ab illa non potuerit valide appellari. Antequam vero ista conclusio confirmetur, suppono primo, quod Superior ad quem appellatum fuit, antequam super negotio intenderet, debebat citare Prouincialem, à quo fuit appellatum, vt redderet causam sui facti. Constat clare ex cap. *Venerabilibus. de sentent. excommunic. in 6* vbi cum quis appellasset à suo Episcopo ad Archiepiscopum, dicit Papa, quod Episcopus, à quo appellatum est, debet citari coram Archiepiscopo: *Quia ipsius interest (id est Episcopi) defendere causam suam.* Sunt verba ipsius Papæ.

3 Suppono quod Prouinciales, maxime istius Ordinis, habent votum electiuum in omnibus electionibus Monialium, etiam si sit electio Abbatissæ. Probatur primo ex praxi prouinciæ, in illa enim sunt hodie tres Patres qui fuerunt Prouinciales, & dederunt suffragium in electione Monialium. Idem obseruat praxis Episcoporum, qui in electione Abbatissarum sibi subditarum dant suffragium actiue. Imo de Episcopo

Insultæ



Infulæ Angrensis, res est certa quod in electione Abbatissæ sibi subditæ dat duo suffragia. Neque obstat quod Prouincialis sit dissimilis sexus, & diuersi Ordinis: distinctio enim sexus valde per accidens est ad intentum, nec obstat, quod sit alterius regulæ, & Ordinis: Nam Generalis Ordinis Minorum habet suffragium actiuum in omnibus electionibus Fratrum tertij Ordinis sibi subditorum, eo quod Prælatus illorum sit, cum tamen illi sint Fratres Ordinis diuersi ab Ordine ipsius P. Generalis. Et ratio naturalis dicat: Nam si quæuis Monialis istius Conuentus habet suffragium in omnibus electionibus Conuentus, eo quod sit pars, & membrum istius Conuentus: cur id denegabitur Prouinciali, qui est caput istius Conuentus, & interest scilicet illum dare suffragium in illorum electionibus pro bona directione Conuentus, vide omnino dicenda postmodum *in casu 3. ad hoc intentum.*

4 Tertio suppono, quod si præses alicuius electionis per internuntium, vel campanæ pulsationem vocauerit electores, vt veniant ad eligendum, & illi venire recusauerint, poterit præses electionis electionem facere cum illis solum qui venerunt, etiamsi hi qui venerunt sit minor pars eligentium omnium. Constat hoc expresse ex cap. *Cum nobis. de appellat.* in quo Papa ponit hæc verba. *Quoniam ad electionem faciendam accedere noluerunt, alienos se fecisse videntur.* Idem colligitur ex cap. *Prudentiam. de offic. & potest. iudic. deleg. §.* Adijcimus. Idem tenet glossa in Clementina *quod circa de electione*, dicens, absurdum esse in numero computare illos qui vocati venire noluerunt. Et Panorm. in cap. *In causis. de elect. num. 9.* ponit hoc exemplum. Rector cuiusdam castelli iussit voce Præconis publicari, vt omnes habitatores castelli, qui erant centum, audita voce can-

panæ venirent ad certum negotium decidendum per suffragia publica, pulsata est campana, & ex centum venerunt solum triginta, qui soli suffragia dederunt. Ait Panorm. illos solos triginta valide elegisse. a tanto quod septuaginta vocati, venire noluerunt. Et cum maiori clauitate, & plurium textuum citatione id ipsum tenet idem Panorm. super capit. proxime citatum *cum nobis*, vbi inter alia dicit, quod vocati, qui venire noluerunt, habentur, ac si non essent de capitulo, faciunt enim se alienos, &c.

§ Suppono quarto quod Electio harum officialium Monialium, quam facit Prouincialis singulis annis, non est electio Canonica: Nam electio Canonica præcepta in cap. *in idem mitibus. de Elect. in 6.* & cap. *quia propter de Elect.* modificata hodie per Concil. Trid. *sess. 25. cap. 6. de regular.* fieri debet per schedulas secretas, & obsignatas, ita vt nomen electoris numquam publicetur. Electio vero officialium Monialium nõ Prælatuam, sic ore tenus, cum notario tamen, & duobus testibus, absq; schedulis obsignatis: & in ordine vbi casus contigit, non vocantur testes sed vocantur electricibus simul iunctis, singulae coram aliis dicunt, do suffragium fullanæ, vel fullanæ; quia non est Electio Canonica: Et sic non obligat seruari formam capituli *quia propter de elect.* vbi præcipitur quod fiat scrutinium secretum: Neque item obligat forma tradita citato cap. 6. Concilij Tridentini, quod solum loquitur de electione superiorum Prælatorum, & proinde harum officialium electio requirit minores apices, & minorem sollemnitatem.

6 Suppono quinto, rem notoriam esse in iure, quod iudex non tenetur deferre appellationi friuolæ, imo quod tenetur illam reicere, & quod potest punire triuple

friuole appellantem. Hæc est commissæ doctorum, sufficiat videre Rodriguez *tom. 2. qq. Regul. quest. 53. art. 10.* paulo post principium, vbi citat varios tex. iuris Canonici, cum Ioan. Andr. Innocent. Geminiano, & Hostiense, qui sunt grauissimi inter Doctores Canonistas. Quæ vero sit appellatio friuola, diffinit ibi Rodrig. ex doctoribus esse illam, quæ ponitur sine causa, vt cum quis appellat non grauatus iniuste: vel esse illam, quæ est vana, & inanis, vel quæ non potest sortiri vllum legis effectum. Addo ad hoc intentum, quod à statuto generali Ordinis, cum sit lex, non potest appellari, vt clare tenet Panorm. *super cap. final. de constit.* Et quod à lege non possit appellari, tenet vt probat Miranda in Ordine iudiciario *quest. 30. art. 9. concl. 3.* citans vnum textum iuris canonici, & alium iuris ciuilis. Ratio huius est, quia nemo potest appellare nisi à grauamine sibi illato, vel comminato: lex autem, vel statutum neminem grauât per suam dispositionem. Tertiò noto adhuc præ ista appellatione extraiudiciali à grauamine (qualis ista fuit) quod illa debet fieri in scriptis; & debet exprimi causa obquam appellatur, vt clare habetur in cap. *Cordi nobis est, de appellat. in 6.* & tenet cum aliis Panormit. *super cap. considerauimus. de elect. num. 4.* & alij communiter.

7 His positis iam clare, & efficaciter deducitur probatio positæ conclusionis, quod scilicet electio de qua agitur fuerit valida, & quod ab illa non potuerit appellari, probo hoc vnico argumento fundato in præmissis Notationibus. Nam in ista electione interuenerunt omnes conditiones requisitæ ad substantiam talis electionis: primo enim vocatæ sunt omnes electrices; secundo illa quæ fuit electa habuit plura suffragia, imò omnia suffragia illarum, quæ venerunt; cæteræ enim

enim vocatæ ad eligendum, & nolentes venire, non sunt computandæ inter electrices, vt constat clare ex dictis *num.* 3. Terrio Prouincialis seruauit formam statuti generalis fundati in citata clementina: imo seruauit formam aliorum capitulorum iuris Canon. dicentium quod electio fiat cum illis qui venire voluerint: Quarto non est electa persona inhabilis; sed satis habilis, nobilis, exemplaris, & utilis in choro; præterea non interuenit metus, siue coactio facta circa electrices: Ergo electio valida fuit; Nam ultra hæc respondebitur cum claritate, & sufficientia ad obiecta in contrarium. Et hæc probatio, seu vnicum generale argumentum clarius, & efficacius apparebit ex solutione quinque argumentorum in principio pro parte contraria adductorum.

8 Ad primum igitur argumentum dico, hanc electam habuisse plura suffragia, quam Francisca in secundo scrutinio: Nam Francisca in primo scrutinio habuit solum sex suffragia, & Antonia cum suffragio Prouincialis, alia sex: Et sic propter æqualitatem suffragiorum nulla tunc fuit electa in primo scrutinio. In secundo vero scrutinio, Antonia habuit omnia vota suffragantium, quæ venerunt; sex autem illæ quæ vocatæ venire noluerunt, non sunt omnino computandæ inter electrices, vt constat clare ex dictis *num.* 3.

9 Ad secundum argumentum dico, quod licet Prouincialis intra 24. horas solas duas fecerit electiones, per has duas tantum seruauit formam dictæ Clementinæ, petentis vt intra viginti quatuor horas fiant plures electiones in discordia. Nam vbi sunt duo actus, simpliciter plures esse dicuntur: vt clare dicitur in regula iuris in sexto, quæ dicit; *pluralis locutio duorum numero contenta est*: Id est vbi dantur duo, dantur plures. Cum  
ergo

ergo Prouincialis fecerit duo scrutinia, fecit plura, & sic non est violata forma prædictæ Clementinæ. Secundo dico, quod si Prouincialis plura scrutinia non fecit, quam duo, culpa fuit eligentium, quæ venire noluerunt. non ipsius Prouincialis, qui paratus erat plura facere. Tertio & clarius respondetur, quod Prouincialis in secundo scrutinio nominans electam Antoniam cum quinque suffragiis eligentium, & cum suo suffragio, non est vsus dicto statuto, neque Clementina, neque illis indiguit; sed vsus est forma communi cap. *quia propter*. & cæterorum textuum dicentium, vt fiat electio cum suffragiis eligentium, qui interfuerint electioni, non computatis illis, qui vocati venire recusarunt: At in nostro casu ad secundum scrutinium sex illæ vocatæ, noluerunt venire: & proinde Prouincialis confirmauit electam concorditer ab illis, quæ venerunt; & proinde non elegit, nec nominauit Antoniam ex vi prædicti statuti, vel Clementinæ, sed ex forma communi seruari solita in electionibus.

10 Ad tertium argumentum, respondetur primo, ex proxime dicto, concedendo videlicet quod dicta Clementina solum loquatur de electione Prouincialis: transeat sed dicimus Prouincialem hic non nominasse Antoniam ex motu proprio, neque ex vi citati statuti, vel Clementinæ, sed ex vi iuris communis confirmando illam, quæ habuit plura vota, imo omnia vota venientium, & volentium eligere, vt dictum est proxime in solutione tertia secundi argumenti. Respondetur secundo, prædictum statutum, & Clementinam etiam extendi ad alias electiones, quæ non sunt Prouincialis, vt praxis Hispaniæ obseruat. Et constat clare ex statuto dictæ Religionis *rit. de electione*. Vbi postquam dicit, quod non concordantibus electoribus

in vno die naturali; dicit quod præses electionis nominet quæ voluerit: Tunc subdit hæc verba. *Si vero electio sit Ministri Prouincialis &c.* Quæ verba clare innuunt quod in præcedentibus verbis loquitur de aliis electionibus, quæ non sunt electiones Prouincialis: & hic etiam habet locum, quod exceptio firmat regulam. Et facit etiam ad hoc quod ista electio, de qua quæritur, non est electio Prælatæ, sed inferioris nimis gradus, quæ tantam solemnitatem non requirit: & in qua facilius credi potest, quod Religio committat Prouinciali, vt electricibus non concordantibus possit pro pace nominare vnā officialem quam voluerit. Et quod prædictum statutum debeat intelligi etiam de aliis electionibus, quæ non sunt Prouincialis, vltra probationem adductam probatur, quia statutum loquitur absolute, & generaliter, lex vero generaliter loquens, generaliter est intelligenda, vt habetur in *l. de prætio ff. de public. in re action.* & præterea quia quando lex non distinguit, neque nos debemus distinguere, vt habetur *2. quæst. 5. in cap. consulisti.*

11 Ad quartum argumentum negandum est Prouincialem aliquod grauamen intulisse Franciscæ non confirmando illam cum primū in primo scrutinio habuit sex vota ex illis vndecim. Probatur clare, quia non tenebatur illam confirmare donec omnes electores darent suum suffragium: ipse autem Prouincialis erat vnus ex his qui habebant suffragium in ista electione, iuxta dicta in *numer. 3.* Voluitque suum suffragium dare: ac proinde antequam ille suffragium daret, electio non erat perfecta, & ex consequenti non tenebatur Franciscā confirmare ante suum suffragium: neque item tenebatur illam confirmare post latum à se suffragium, quia tunc Antonia habebat æqualia

æqualia suffragia Quod autem debeat præses electionis expectare vt omnes electores dent suffragium, & post illa omnia data, facere examen scrutinij, patet ex cap. *quia propter. de elect.* vbi traditur forma seruanda in electionibus, vbi ait textus: *quod scrutatores vota cunctorum diligenter exquirant.* Cum ergo Prouincialis in hoc casu haberet suffragium, vt patet ex supradictis, illius votum erat exquirendum, & expectandum antequam confirmaret Franciscam. Et adhuc efficacius, & clariùs probò, quod Prouincialis non grauauit Franciscam, nolens illam confirmare cum sex votis primo illi datis in primo scrutinio, antequam ille suum daret suffragium, cui noluit renunciare: Probo inquam, quia vtēs iure suo nulli facit iniuriam, vt habetur in l. *Nullus. ff. de regul. iuris.* & cap. *Cum Ecclesia. de electio.* & tenet Nauarrus alia citans in tom. 3. *suorum operum*, ad cap. *cum contingat. in 7. causa nullitatis. num. 8.* At Prouincialis est vsus iure suo dando suffragium, sicut poterat in primo scrutinio, per quod Antonia mansit æqualis in votis: Ergo nullum fecit grauamen Franciscæ nolens illam confirmare antequam daret suum suffragium.

12 Adhuc pro clariore solutione istius argumenti quarti, in quo basis negotij nititur, adduco duo exempla. Primum ponitur a Rodrig. tom. 2. *qq. q. 53. art. 10.* quod contigit in vna prouincia istius Ordinis & Regni, & fuit hoc. In quodam diffinitorio erant sex Diffinitores compromissarij cum Præsidente, ad eligendum certum Patrem pro certo officio. Tres ex his electoribus dederunt votum vni ex illis sex ad prædictū officium. Iste qui habuit pro se tria vota, dixit se renunciare suo suffragio, & nolle votum dare, sicut de facto noluit; quia se renunciante suffragio, & non votante, manebant solum quinque electores, & ille habebat tria suffragia

fragia, quæ erat maior pars quinque electorum, & ita iam erat electus. Præles diffinitorij obligauit prædictum patrem vt daret suffragium: ille repugnans appellauit ad Superiorem, dicens se esse vere electum. Respondet Rodriguez quod talis electio fuit nulla, & quod appellauit iniuste. Præcipuum fundamentum quod adducit, est; quoniam prædictus pater non poterat renunciare suo suffragio in præiudicium communitatis: & potuit addi, quod non poterat renunciare cum præiudicio tertij, quia poterat hic pater dare suffragium alteri qui cum voto istius patris maneret cum illo in votis æqualis. Si ergo iste pater tenebatur dare suffragium, nec illi poterat renunciare propter bonum communitatis. etiam in nostro casu pro bono communitatis non debuit suo suffragio Prouincialis renunciare, potuit enim Antonia, quæ in primo scrutinio quinque tantum vota habuit, esse dignior, & sic pro bono communitatis æquum fuit vt Prouincialis suo suffragio non renunciaret. Secundum exemplum cernitur quotidie in Diffinitoriis, vbi sunt sex Diffinitores, seu electores, & incipientes dare suffragia pro vno Goardiano, contingit vt Petrus v. g. habeat iam pro se tria suffragia vt sit Goardianus: quo non obstante cæteri tres Diffinitores dant libere suum suffragium, quia potest contingere vt tres posteriores dent suffragium pro Ioanne, & sic Petrus, & Ioannes maneant æquales in votis. Quæ omnia facile erit casui præcedenti applicare.

13 Neque obstat capitulum *cum in iure. de elect.* vbi Papa dicit, quod si de septem electoribus compromissariis, tres ex illis dederint votum vni ex illis septem, & ille consenserit, maneat electus, licet habeat solum tria suffragia ex illis septem, quæ est adhuc minor pars

ex



ex septem, & in hoc casu ex vndecim electricibus compromissariis Francisca in primo scrutinio habuit sex vota ex vndecim, quæ erat maior pars suffragantium, & Francisca consensit, ac proinde mansit electa, iuxta citatum caput. Non inquam obstat, propter diuersas rationes. Prima est, quia in illo casu supponit Papa omnes septem electores suffragium dedisse: & in hoc nostro casu quando sex in primo scrutinio dederunt suffragia Francisca, nondum Prouincialis suffragium intulerat, qui erat vnus de numero eligentium, & cum suo voto mäsérunt æquales: & in illo casu Papæ cum illo qui habuit tria suffragia, nullus mansit æqualis. Secunda ratio est, quia in citato capite *cum in iure*. elector compromissarius qui habuit tria suffragia consensit expressse in sua electione, & cum suo consensu compleuit pro se quatuor suffragia, & suus consensus valuit pro voto, quia septem electores sic antea concordarunt, & consenserunt, & Papa approbat: & sic explicat Panorm. *tom. 8. in consilio 23.* idem affirmans. Sed in isto casu Francisca quæ primo habuit sex suffragia ex vndecim, non erat de numero eligentium compromissariorum, vt patet, quia nondum erat discrete eligens, neque interfuit electioni, neque inter vndecim illas electrices prius pactum fuerat, vt quæ de illis vndecim haberet tot suffragia, esset electa; imo illæ vndecim non poterant eligere vnā de gremio vndecim, sed de foris fuit assumenda, vt patet: ac proinde casus est nimis diuersus. Et probatur hoc clare ex eo quod ait glossa super citatum capitulum, *ver. Ex se, vel aliis.* Vbi ait, quod ille ex septem electoribus dāns suffragium pro se, fuit validum, & mansit cum quatuor votis, quæ erat maior pars de septem. Et addit gloss. ibi *ver.* Consentiat, quod illud valuit propter formā cō-

promissi factam à capitulo, quod consensit, vt talis maneret electus cum suo voto, & consensu. At in nostro casu vndecim electrices non fecerunt antea tale compromissum: nec Francisca electa consentiens habuit plura vota, numerato voto Prouincialis, quod erat expectandum. Vide Rodrig. cit. art. 10. quasi. 5. 3. tem. 2. vbi copiosius respondet ad citatum capitulum *Cum in iure de elect.*

14 Ad quintum argumentum dico, quod appellatio facta in hoc casu fuit friuola, & nulla, quæ proinde debuit reijci à Prouinciali, illaque non obstante potuit procedere ad electionem. Textus enim qui dicunt appellationem omnia suspendere, & facta post illam interpositam esse inualida, intelliguntur clare quando appellatio iusta est, & valida, secus quando est nulla & friuola, vt Doctores communiter explicant, & practican. Quod vero hæc appellatio fuerit friuola, & nulla, constat ex dictis supra num. 5. ex Rodrig. citante textus, & Doctores. Vbi inter alia dicit illum appellare friuole, qui sine causa conqueritur se esse grauatum. At in hoc casu, quod quæso grauamen Prouincialis fecit appellantibus? Non grauauit primo, dando suffragium pro Antonia in primo scrutinio: quia vt supra diximus, vtens iure suo nulli fecit iniuriam. Non item grauauit nolens confirmare Franciscam cum sex votis, vt etiam supra ostendimus, quia expectandum fuit suffragium ipsius Prouincialis, cui suffragio noluit renunciare: & cum per illud suffragium Prouincialis Antonia maneret æqualis in votis, nullo modo grauauit Franciscam nolens illam confirmare, quia non habebat excessum in suffragiis. Tertio non grauauit Prouincialis appellantes, conuocando illas ad capitulum secunda vice, vt prosequeretur electionem: imo in hoc

hoc illis beneficium contulit, vocando illas, vt suo iure vterentur, & suffragium darent, quod illæ fere contumaces facere recularunt: cum ergo in nullo grauauerit, sequitur illarum appellationem fuisse friuolam, & proinde nullam. Vnde in rigore videtur quod appellauerint à lege, & statuto, concedentibus vt Prouincialis det suum suffragium, & non confirmet non habentem excessum in suffragiis, & sic appellatio clare fuit friuola & reiicienda. Addo, quod sicut audiui, nec appellationem fecerunt in scriptis, neque expresse-  
runt causam appellationis, cum tamen hæc duo sint de ratione appellationis, sicut in casibus præcedentibus manet explicatum. Neque Prouincialis potuit recusari vt suspectus, eo quod dederit suffragium Antonia in primo scrutinio, vt præcise ex ipso, vel eo ipso possent illum recusare vt suspectum, & proinde noluerint venire ad secundam electionem. Non inquam sufficit, vel non obstat: nam dare suffragium isti, non est fauere illi fauore suspecto, quia possum dare illi suffragium obligatus ex debito iustitiæ, quia video illum esse magis idoneum; id vero quod fit ex debito iustitiæ nulli potest nocere, neque ingerere suspicionem, vt propter id solum recusetur à suo munere obeundo. Secundo, quia si dare suffragium tali, vel tali esset fauor causans suspensionem sufficientem ad recusandum, omnes fere electores possent recusari, quia de omnibus fere moraliter constat, pro quo sint suffragaturi, imo & id aliquando ante electionem publicant: & tamen nemo illos recusat, quin alias officio suo fungantur.

Adhuc facit pro nostro casu, quod tradit Panormit. ad cap. *Cum Ecclesia, de elect.* vbi dicit, quod si electores non eligunt in tempore assignato, transfundunt pote-

statem eligendi in Superiorem: & loquitur ibi de electione in communi, etiamsi sit eligendus Prælati. Cum maiori ergo iure, & fundamento potuit Religio hoc committere Prouinciali in electione vnius Discretæ, vel Ianitricis Monialium, maxime nolentibus venire ad electionem sex illis vocatis, & Prouinciali eligente cum quinque ad electionem venientibus.

## CASVS XXX.

*An Prouincialis, maxime in Ordine Minorum  
habeat suffragium in electione  
Monialium.*

1 QVONIAM dixi in casu præcedente Prouincialem habere suffragium electiuum in omnibus electionibus Monialium sibi subditarum, & audiui aliquos de hoc dubitasse, visum fuit id amplius confirmare, maxime pro Ordine Minorum, & hinc dicta iuuabunt etiam pro Prouincialibus aliorum Ordinum.

2 Suppositis ergo etiam illis rationibus, quas adduxi casu præcedenti 29. in num. 2. Idipsum primo sic confirmo. Nam Papa Urbanus in confirmatione secundæ regulæ sanctæ Claræ in fine, ait, quod Moniales sanctæ Clare sint subiectæ Cardinali, qui fuerit protector illarum. Et ait Papa quod talis protector poterit præcipere, visitare, &c. & quod hoc poterit facere instituendo, destituendo, statuendo, &c. Notandum est verbum, *Instituendo, & destituendo*, quæ in praxi canonum significant Prælatos creare, vel priuare. Et statutum generale Salamanticæ in Ordine Minorum apud Rebolledo fol.

do fol. 98. pag. i. post medium, declarat, quod instituere est dare suffragium in institutione, & electione Guardianorum: Cum ergo Cardinalis protector Monialium sanctæ Claræ habuerit potestatem instituendi, id est dandi suffragium in electionibus Monialium sanctæ Claræ, sequitur quod idem poterunt Prouinciales Minorum in electionibus earundem Monialium sanctæ Claræ. Consequentia hæc probatur euidenter, quoniam Iulius II. in compendio Mendicantium *ver. Moniales*, §. 20. concessit, vt Prouinciales Minorum in gubernatione Monialium habeant omnem Iurisdictionem, quam olim habebat circa illas Cardinalis protector. Secundo hoc ipsum probo per id quod tradit Sanchez *lib. 6. Decal. cap. 11. tom. 2. num. 5.* vbi citat *l. Si vt proponis* in fine *C. de nupt.* videlicet, quod eadem potestas requiritur in actu dissoluendo, quæ requiritur in ipso constituendo, quasi dicat: quod non potest dissolvere actum, nisi ille, qui potest actum constituere. At Prouincialis potest Abbatisam priuare ob culpas, quod est actum dissolvere: ergo potest hunc actum constituere à principio, dando scilicet suffragium per quod constituatur Abbatisa. Si autem potest dare suffragium in electione Abbatisæ, à fortiori poterit suffragari in aliis electionibus Monialium, in quibus non creantur Abbatisæ sed officiales conuentus. Neque obstat quod in compendio Mendicantium *ver. Abbatisa* §. 1. dicitur, quod electio Abbatisæ pertinet ad conuentum; per quæ verba videtur excludi Prouincialis à suffragio dando in electione eiusdem Abbatisæ. Non obstat, quia pertinere electionem Abbatisæ ad conuentum, non impedit quin possit Prælatus, qui est caput Conuentus in eadem ferre suffragium. Et confirmatur ex praxi: Nam in Ordine B. Dominici, v. g. & in alijs

Religionibus vbi Prælati locales fiunt per electionem Conuētus, non tollit quin Prouincialis possit dare suffragium in electione Prælati localis illius Conuentus. Illa ergo verba. Electio Abbatissæ pertinet ad Cōuentum, solum volunt, quod Abbatissa non fiat per solum arbitrium Prouincialis, nec per diffinitorium sicut sūt Goardiani Conuentuales in Ordine Minorum, sed fiat per Conuentum, id est per vota Monialium, nō excluso suffragio Prouincialis, & in particulari de Prouincia Algarbiorū in Portugallia, scio quod tres Prouinciales in electionibus Monialium suffragium dederint in diuersis occasionibus; & hoc sufficit ad inducendam cōsuetudinem validam, vt Prouinciales habeant suffragium electiuum in illarum electionibus. Quod probatur clare ex c. *cum Ecclesia Sutrinia de causa possessionis*: vbi Papa iudicauit quod certis Clericis cōpetebat ius dādi suffragij in electione Episcopi, eo quod probauerunt se iam antea in electione trium Episcoporum illius diocesis interfuisse, & tribus vicibus suffragiū dedisse pro tribus Episcopis. Idem colligitur ex c. *venerabilem de elect.* vbi gloss. *ver. ex successione*, ait, quod binus, vel trinus actus inducit cōsuetudinem in materia ferè simili, qualis est electio. Facit ad intentum, quod ait Rodr. 10. 2. qq. 9. § 1. art. 13. cū aliis quos citat, vbi agēs de materia electionis, ait quod consuetudo decem annorum si sit præter ius commune, potest inducere cōsuetudinem in electione. Et ista consuetudo quod Prouinciales dent suffragium in electionibus Monialium in prædicta Prouincia viget fere triginta ab hinc annis, & non est consuetudo contra ius commune, imo est consonum valde eidem iuri communi, vt patet ex dictis: & fortasse quod in aliis Religionibus erit consuetudo antiquissima.



SECUNDA PARŒ  
RESPONSIONVM  
AD CASVS RE-  
GVLARIVM.

CASVS I.

*De suffragio dando in capitulo per procuratorem missum.*



IN quadam Religione viget statutum sic disponens. Non liceat absenti, vel præsenti votum cuiumque committere, prout in sacra Synodo tantum est. Et videtur supponere statutum, quod illud iubet eo quod sit à Concilio Trid. sic dispositum. Quæsitum fuit an Concilium Trident. id prohibuerit: & vtrum hodie sit licitum illo statuto non obstante in aliqua Religione capitularem impossibilitatem veniendi ad capitulum, suum suffragium per procuratorem mittere?

I Dico primo, Concilium Tridentinum non pro-

hibuisse dari suffragium per procuratorem missum. Probo euidenter ex loco Tridentini vbi de hac materia loquitur, videlicet *in sess. 25. cap. 6. de Regul.* in quo nullum verbum ponit circa commissionem suffragij factam absenti, vel per procuratorem. Solum ibi prohibet Regularibus, ne ad dandum suffragium eligantur, vel designentur noui titulares, vt Abbates, & similes: & præterea ne vota absentium suppleantur: quod fieret, si v. g. talis Prælatus localis absens esset, nec valens interesse capitulo legitime impeditus, nec assignans procuratorem pro illo ad suffragandum, tunc præses capituli ad libitum diceret alicui fratri non capitulari, tu da suffragium pro tali absente, tu vero pro alio absente: hoc enim proprie est supplere vota absentium, & ibi merito in Tridentino prohibitum, quia talis suppletio redundaret aliquando in præiudicium boni communis, vt patet. Hoc idem clare confirmo quod scilicet Tridentinum ibi non prohibuerit Regularibus absentibus dare suffragium per procuratorem: nam Marzil. *in suo lib. Declarationum Cardinalium* ad prædictum *cap. 6. sess. 25. de Regular.* in fine capitis ponit hanc declarationem Cardinalium. *Procuratores vero legitime constituti cum generali mandato ad eligendum, non excluduntur, dummodo non habeant mandatum de certa persona eligenda, tunc enim votum non esset secretum.* Vbi vides clare Cardinales declarasse per Concilium Trident. non prohiberi Religiosos committere suum suffragium procuratori absenti. Et prædictam declarationem assertit Marzilla ad verba citati *cap. 6.* quæ dicunt: *alios quoscumque Titulares.* Idem forte alludens ad citatam declarationem Cardinalium tenet expresse Azor *tom. 1. sim. lib. 13. cap. 10. quæst. 2.* vbi ait quod post Tridentinum in *cap. 6.* citat. potest absens suum suffragium



fragium, aut vocem scripto mittere, vel constituere procuratorem secundum constitutiones suæ Religionis, vt congregatio Cardinalium censuit. Sic ille. Et citatibi Azor *compendium patrum Minorum ver. Concilium*. Idem tenet Rodrig. *tom. 2. qq. quæst. 51. art. 6.* citans Parassellum in compendio Minorum.

2 Quod dare suffragium per procuratorem sit practicum aliquo modo in Religionibus, probatur ex praxi; nam in aliquibus Religionibus, maxime Franciscana, quando Prouincialis est impeditus ne possit ire ad capitulum generale, eligit Religiosum, qui suo nomine vadit ad capitulum generale, & in illo dat suffragium in omnibus electionibus sicut daret Prouincialis, quod in rigore est dare absentem suffragium per procuratorem. Facit etiam, quod statuta generalia Franciscana Salmanticæ facta titul. *de commissariis particularibus* §. 1. in fine, dicunt quod Prælati generales poterunt committere commissariis visitantibus Prouincias, vt pro se dent suffragia in omnibus electionibus Prælatorum localium; quod ego bis vidi positum in praxi, & hoc nihil aliud est, quam Prælatum generalem constituere Procuratorem, per quem dat suffragium in absentia.

3 Videtur adhuc, quod non potest aliqua Religio valide facere statutum per quod prohibeat dare votum per procuratorem. Probo, quia cum illud permissum sit à Concilio Tridentino, vt proxime vidimus in citata declaratione, & statim patebit amplius ex iure communi canonico, videtur quod Religio non potest oppositum præcipere, cum inferior non possit abrogare legem superioris. Clementina *Ne Romani. de elect.* Quod autem ex iure canonico liceat votum dare per procuratorem in absentia, habetur expresse in cap. *si*

*quis iusto. de elect. in 6. vbi Papa ponit hæc verba: Si quis iusto impedimento detentus in electionis negotio nequeat cōmode interesse, potest, (necum uni prout dicitur in Concilio generali,) sed etiam pluribus vices suas cōmittere. &c.* Et in margine textus istius dicitur, quod hoc Concilium generale, de quo loquitur textus, est Concilium generale Lateranense sub Innocentio III. cap. 24. Idem habetur in cap. *quia propter. de elect.* in fine capituli. Et cap. *scriptum. de elect.* Imo addo in confirmationem, quod de iure canonico in rigore loquendo, si absens committat alicui, qui est de corpore capituli, vt pro se det votum in illo capitulo, iste talis poterit in capitulo duo ferre suffragia, vnum quod habet ratione sui officij, alterum quod habet ex commissione absentis: non enim ex commissione absentis amittet propriū suffragium quod habet ratione sui officij: Colligitur hoc clare ex cap. *congregato. de elect.* in principio: vbi Papa dicit quod computata sunt duodecim suffragia ex vna parte, computato procuratore cuiusdam absentis. Colligitur etiā ex cap. *quia propter. eod. tit.* in fine, vbi Papa dicit posse absentem committere votum vni de capitulo. Qui de capitulo (ait ibi glossa *ver. venire*) habebit duplicem vocem. Et huius causa duplicis suffragij est quam paulo proxime assignauimus, & citat ibi glossa in fauorem huius, caput. *cum olim. de re iudic.* & caput. *scriptum. de elect.* Neque hoc est supplere vota absentum, vt supra diximus, sed est dare votum per procuratorem, quod Tridentinum non reprobatur, vt supra diximus, *num. 1.*

4 Scio hoc non esse receptum de ordinario in Religionibus aliquibus. Volui tamen hæc semel explicare, vt si forte alicubi fuerit intentatum, non iudicetur absurdum, vel extraneum, sed videatur quod sit ius commune.

mune. Quo posito addo, à iure veteri antiquo non esse recedendum, nisi in quantum illud inuenimus correctum & emendatum per ius nouum. Probatur ex l. *Sancimus. Cod. de testam. Authent. de noui alienan. aut permutand. rebus Eccles. § fin. traditque Reper. Inquisit. ver. Episcopus. §. an propter commissionem: & ver. cognoscere. §. sed an facultas: & alij, maxime Rodriguez 1. tom. qq. Regul. q. 20. art. 10. Sed illa duo capitula iuris antiqui dicentia posse dari votum per procuratorem ab absente, non sunt reuocata per ius nouum Concilij Tridentini, vt supra diximus, imo per illud sunt confirmata, iuxta declarationem Cardinalium adductam, & Marzilla, & Azor: ergo ab illo iure antiquo non licet recedere per statutum alicuius Religionis particularis.*

§ Ultimo circa illud quod in particulari citauimus ex Azorio dicente, posse quem suum suffragium scripto mittere obsignato, vt dixi *num. 1.* poterit quis dubitare an sit contra ius commune suffragium dari ab absente per scriptum? Credo id non esse contra iuris substantiam, & si alicubi intentaretur valeret. Nam tale votum missum ab habente votum, & absente, datum per scriptum, habet omnia requisita veri suffragij, si constet vere mitti ab illo absente, qui habet ius dandi suffragium. Probo primo, quia votum dari in scripto non contradicit iuri: imo est consonum iuri, videlicet Tridentini, iubentis vt vota dentur secreto, id est, per schedulas scriptas, & obsignatas. Secundo hoc ipsum seruatur in praxi in Congregatione Sancti Ioannis Euangelistæ in Portugallia. In qua laudabiliter omnes, ac singuli Religiosi cuiusque Conuentus, tempore capituli mittunt singuli ad capitulum sua suffragia obsignata pro eligendo Generali eiusdem Congregationis: & sic absentes mittunt sua vota per scriptum ad capitu-

capitulum, & valide hoc faciunt, quia non est contra ius, nec præter ius, sed iuri consonum. Tertiò adhuc datur huius rei vestigium in Ordine Minorum, in quo practicatur, quod tempore quo recipienda sunt vota ad Nouitij professionem, si aliquis Religiosus ante votorum receptionem foras exit, per multos dies extra Conuentum moraturus, suum suffragium pro Nouitio recipiendo, vel excludendo relinquit scriptum, & obsignatum, & sic dat suffragium per scriptum in absentia. Et licet hoc non sit vere dare suffragium in electione, quia Nouitium recipere per vota non est electio, nec eligere Canonice: habet tamen multam similitudinem cum electione. Et hæc omnia licet non sint in vsu vbique, poterunt tamen prodesse alicubi.

## C A S V S II.

*De quodam legato relicto cuidam puero sub  
conditione si foret Clericus, & ille  
factus est Religiosus.*

**Q**Uædam mulier vidua fuit in baptismo suscep-  
trix, seu mater spiritualis cuiusdam pueri no-  
mine Bartholomei. Hæc erga puerum bene affecta,  
per mortem fecit testamentum in quo disposuit, vt ex  
bonis suis separarentur quingenta scuta, ex quibus  
emeretur proprietas immobilis, quæ daretur dicto  
puero Bartholomeo pro dote ad ordines sacros assu-  
mendos, & diceret primam Missam nouam pro ipsa  
testatrice Matre spirituali. Addidit in testamento,  
quod si puer moreretur, antequam Missam nouam di-  
ceret,

ceret, prædictum legatum caperet quædam illius soror pro dote matrimonij. Prædictus puer Bartholomeus antequam sacros ordines reciperet, ingressus est certam Religionem approbatam, & in illa professus est pro statu sacerdotum illius ordinis, ita vt absque dubio futurus sit sacerdos: & in ista Religione est consuetudo recepta, quod Religiosus celebrans primam Missam semper scientibus Prælatis, & tacentibus illâ applicat pro quocumq; vult, viuo, vel mortuo. Ante professionem prædictus Bartholomeus testamentum fecit, in quo prædictum legatum relictum sibi à matre spiritali, legauit, ac reliquit matri carnali ipsius profitentis, non faciens mentionem sororis, quam testatrix substituerat in testamento si ipse clericus non foret: imo sororem substitutam à testatrice exclusit.

Quæsitum fuit an prædictum testamentum validum fuerit, non impleta conditione, quod ipse clericus sæcularis non fuerit; & viso quod sororem substitutam à testatrice excluferit.

I Pro parte negatiua, quod testamentum fuerit nullum, nec potuerit legatum matri relinquere, arguitur primo: Quia conditio testatricis in testamento apposita non fuit impleta, videlicet vt sit clericus: hic vero iam non est Clericus, nec potest esse Clericus in significatione propria, & communi, qua Clericum solum dicimus Clericum sæcularem: verba autem testatoris sunt accipienda in significatione propria, & vsitata, non translatis, vt Doctores communiter dicunt: aliàs darentur mille inconuenientia; constat autem intentionem testatricis fuisse vt puer esset Clericus sæcularis, non Religiosus, nam legatum illi reliquit pro patrimonio ad ordines recipiendos: Iam vero Religiosi non indigent patrimonio ad ordines recipiendos, vt constat.

constat. Non impleta vero conditione, & intentione testatoris, legatarius non assequitur legatum, vt patet ex. l. *in condition. ff. de contri. & demonstrat.* Et cap. *cum esses. de testam.* Secundo probatur, quia iste professus numquam habuit possessionem istius legati, cum esset filiusfamilias: ergo non poterat dare per testamentum illud quod non possederat. Et confirmatur quia hoc legatum huic puero factum est peculium aduentitium vt patet: At filiusfamilias non potest testari de peculio aduentitio, vt doctores communiter docent, Syluest. *ver. peculium 1. quæst. 3. & Lessius tom. de Inst. lib. 2. cap. 4. dubio 3. num. 11.* probatur tertio, quod non potuerit de illo testari: nam testatrix Mater spiritualis substituit illi sororem suam tamquam legatariam, vt legatum caperet in casu, quod ille Clericus non esset, & ideo cum ille Clericus non fuerit, nec esse possit non potest priuare sororem substitutam in testamento contra expressam voluntatem testatricis. Quarto probatur, quia dato quod esset verus Clericus secularis non poterat donare, vel alienare prædictum legatum sibi relictum pro dote, & patrimonio ad ordines recipiendos, prohibente hoc expresse Concil. Trident. *sess. 21. cap. 2. de reform.*

2 His non obstantibus credo prædictum Bartholomeum per ingressum, & professionem Religionis non amisisse legatum prædictum, ac proinde de illo potuisse disponere per testamentum. Pro cuius confirmatione, suppono huiusmodi legatum factum huic puero Bartholomeo, non fuisse conditionale pure loquendo, nec relictum sub conditione: quia in illo testatrix non fuit vsa verbo sonante conditionem, quale esset si diceret in legato: relinquo sub conditione, vel relinquo dummodo sit Clericus, & similia: sed fuit legatum modale:

dale:relictum sub hoc verbo, *ut*, videlicet *ut* sit Clericus, vel *ut* ordines recipiat. Et hoc modo explicant omnes Doctores legatum conditionale, vel modale: maxime Syluest. *ver. conditio quest. 2.* Et Reginald. *tom. 2. sua sum. lib. 25. num. 55. & 56.* & iuxta Syluest. & Reginaldum citatis locis, modus adiectus contractui non suspendit contractum, etiamsi modus non impleatur: sed statim res donata sub modo debetur, statimque peti potest. Idem tenet Vega. *Minimus in sum. Morali maioris impressionis, verbo Mandas, casu 5.* pro quo citat ibi vnam legem iuris ciuilis, Medinam, Armillam, Syluestr. Tabienam, & dicit esse communem Doctorum. Quod non habet legatum conditionale, quia non acquiritur si conditio non impletur. Sed pro hoc vide amplius in *conf. 3. sequenti, num. 3. & seq.*

3 Secundo suppono esse communem opinionem Iuristarum vtriusque iuris, quod legatum relictum certæ personæ sub conditione si nupserit, si liberos suscepit, & similibus, quæ se non compatiuntur cum ingressu Religionis, habentur pro non adiectis, & illis conditionibus non obstantibus, legatarius ingrediens, & profitens Religionem acquirit tale legatum, sicut disponit textus expressus in Authēt. *de sanctis Episcopis col. 9.* vltra alios textus, qui conditi sunt quoad hoc, in fauorem Religionis. Videat ad hoc qui voluerit, inter alios fufe, & clare Rodrig. *tom. 2. qq. quest. 127. art. 1.* cum multis ibi citatis, & Ludouicum de Beja in *Respons. Moral. casu 44. à fol. 34. & casu 66. à fol. 130. pag. 2. & seqq.* Quod adeo verum est: *ut* licet testator in suo testamento dixerit: lego Ioanni mille aureos dummodo Religionem vllam non ingrediatur: Tali conditione non obstante, Ioannes intrans Religionem acquirit legatum: quia iuxta citatam Authenticam talis conditio

ditio reiicitur in fauorem Religionis, eo quod impediat homines à prosequendo maiori bono. Tractat hoc punctum, & probat late Comitulus in  *suis Respons. moral. lib. 7. q. 7. à num. 5.* & pro se citat Bartolum, Baldum, Ostiens. Ioan. Andr. Abbatem, Aretinum, Felinum, qui sunt præcipui Doctores vtriusque iuris, & multos alios.

4 Tertio suppono vt certum, quod Nouitius etiam si habeat patrem, possit condere testamentum de bonis castrensis, vel quasi castrensis, vel de legitima patris defuncti, vel matris defunctæ, sicut experientia quotidiana docet in Religionibus vbi professi etiam viuentis patre, vel matre condunt validum testamentum de proxime dictis bonis, vel de similibus modo in sequentibus explicando.

5 Hoc posito probatur conclusio supraposita, quod scilicet iste professus legatum non amiserit, & quod de illo testari potuerit: nam legatum istud fuit modale, vt supra ostendimus, & statim vt mater spiritualis est mortua, debebatur puero, illiusque statim dominium acquisiuit, cumque illius haberet dominium & proprietatem tempore professionis, potuit de illo testari de licentia patris, vt clarius dicam in solutione secundi argumenti: Nec amisit legatum eo quod factus sit Monachus, vt patet ex dictis in  *num. 3.* & clarius constabit ex solutione primi argumenti. Et quoniam principalis probatio conclusionis pendet ex dicendis in propositis argumentis soluendis, ideo propositam conclusionem non amplius confirmo.

6 Ad primum igitur argumentum respondeo primo, concesso antecedente, negando consequentiam: id est, concedo, vel suppono, quod professus faciens professionem, contradixit voluntati testatrix, vel illam



Iam non impleuit, dico quod hoc non obstante acquisiuit legatum, quia licet testatrix illud illi reliquisset cum clara conditione vt esset Clericus ( quod non fecit, sed sub modo vt diximus *num. 2.* ) proficiens Religionem, legatum non amisit: quia quamuis voluntas testatoris implenda sit, non tamen est implenda quando legi contradicit, sed per legem debet regulari, vt patet in praxi quotidiana; quia lex potest in certis casibus coarctare, & assignare modum testandi. Cum igitur illa lex Authentica citata, & alia leges disponant quod legatum relictum certae personae acquiratur ab illa etiam si Religionem ingrediatur, & etiam si legatum non se compatiatur cum statu Religioso, sequitur, quod licet voluntas testatricis alia fuerit ( sed non fuit vt dicam ) adhuc iste professus legatum acquireret ex mandato, & dispositione legis: & quod possit lex, seu legislator hoc facere, arctare scilicet, vel limitare voluntatem testatoris pro bono communi, patet ex praxi, & in mille exemplis legum, disponentium, quod testamentum taliter, vel taliter factum, non valeat, idque pro bono communi, vt diximus. In hoc vero casu id cernitur: nam dicta lex decernens vt legatum repugnans Religioso statui, non perdat per ingressum Religionis, attendit ad bonum commune, videlicet ne homines deterreantur, & reuocentur à vita religiosa, quod est maius bonum, quam vita saecularis: & proinde illa voluntas testatricis, si illam haberet, non est implenda, cum contrarietur praedictae legi. Sic soluunt hoc argumentum Rodriguez, Comitulus, Beja, locis citatis. Addit Rodriguez, quod licet in hoc voluntas testatoris non impleatur, non sit illi iniuria, quia bonum commune praeponderat bono particulari: fauor autem Religionis quem dicta lex intendit, praeponde-

rat voluntati particulari illius testatricis, vt esset clericus sæcularis, cum melius sit esse clericum Religiosum, quam esse clericum sæcularem.

7 Obiicitamen contra hanc primam solutionem hoc modo. Illa lex facta est in fauorem Religionum vt videlicet Religiones possent habere hæreditates, & legata, & vt hæc bona non amitteret propter testamentaria disponentia contrariū, seu per modum quo homines deterrentur ab ingressu Religionis: sed iste professus fuit in Ordine Fratrum Minorum, qui est incapax cuiuscumque hæreditatis, vt patet: ergo in istius ingressu seu professione, non habet locum Authentica citata. Ad hanc obiectionem respondeo, prædictam legem Authenticæ non fuisse factam ad illum fauorem, vt Religiones non amitterent bona ingredientium, seu vt Religiones possent habere hæreditates, & legata, qui finis terrestris est, & tam pia lege indignus. Finis ergo prædictæ legis altior fuit, & ad bonum spirituale directus, vt videlicet homines non impedirentur à prosequendo statu animæ perfectiori, qualis est Religiosus status: vnde directe est fauor personarum ingredi volentium Religionem pro saluatione animarum, ne onerentur per legatum conditionale impediens talem ingressum. Timor enim amittendi tale legatum habens conditionem impeditiuam Religionis intrandæ, deterreret legatarium à tali ingressu: & proinde lex illa ad bonum commune volentium intrare Religionem, annullauit omnes conditiones similes appositas, & impeditiuas. Sic soluunt argumentum supra citati Doctores, maxime Comitulus *cit. quest. num. 7.* Adde quod ingressus iste in Ordinem Minorum non obstat, licet Ordo ipse sit incapax hæreditatis adeundæ: posset enim iste professus illa incapacitate non obstante.

obstante, facere testamentum, & illud legatum sibi relictum, per testamentum etiam relinquere ipsi Conuentui Fratrum Minorum per modum eleemosinæ, cum talis eleemosinæ non sit incapax, vt satis patet ex cap. *Exijt. de verbor. signif. in 6.*

8 Secundo soluitur idem primum argumentum, dicendo, quod per professionem monasticam illius professi, non fuit frustrata, vel impugnata intentio testatrix, vt iste esset clericus, & pro ipsius anima diceret primam missam: cum enim intentio testatrix fuerit, vt pro ipsius anima diceret primam missam, hanc intentionem potest implere iste professus in ista Religione in qua debet esse sacerdos, & in qua omnes sacerdotes primam missam dicunt pro quocunque voluerint, vt est res certissima: & præterea prædictam primam missam dicet pro testatrice, in meliori statu ceteris paribus, videlicet in statu Religioso, qui ceteris paribus est status perfectior, quam status sacerdotij secularis. Et potest tunc fieri argumentum à contrario sensu. Est axioma commune, quod cessante fine legis cessat lex, vt habetur in *l. adigere. ff. de iur. par.* Ergo à contrario sensu impleto fine legis impletur lex: at finis istius testatrix fuit, vt Bartholomeus cui reliquit legatum, primam missam pro ipsa celebraret: & hanc intentionem; seu finem potest etiam hodie implere in statu Religioso, vt patet: ergo per professionem monasticam non contradixit intentioni testatrix, nec proinde ipsius legatum amisit. Et confirmatur, quia existens Religiosus, & sacerdos in rigore loquendo factus est Clericus, etiam in vsu istius vocabuli *Clericus* ex vi regulæ S. P. N. Francisci, qui cap. 3. *sec. Res.* Religiosos choro inservientes, vocat Clericos absolute. Et in suo testamento, Clerici faciant *diuinum* officium. Et in suo te-

stamento P. N. Franciscus loquens de suo socio fratre Sacerdote, ait: Semper volo habere Clericum, qui mihi faciat officium. Et Concil. Tridentinum *sess. 25. cap. 16. de Regul.* patres Religionis societatis Iesu, vocat Clericos societatis Iesu. Et adhuc confirmatur ex Panorm. super cap. 1. *ne Clerici, vel Monachi* num. 7. ubi dicit, quod nomine Clerici intelliguntur etiam Monachi in fauorabilibus, non vero in odiosis. Vide etiam eundem Panorm. in cap. *de Monialibus de sentent. ex com. num. 2.* & materia istius legati est fauor, vt patet; ergo per Clericum potest, ac debet intelligi etiam Religiosus sacerdos. Confirmatur etiam quod mens testatricis volentis primam Missam pro se dici, non sit defraudata per professionem istius qui primam Missam pro illa potest celebrare: confirmatur hoc inquam ex cap. *intelligentia. de verb. signifi.* ubi dicitur: *Quod intelligentia dictorum ex causis est assumenda dicendi: quia non sermoni res, sed rei est sermo subiectus.* Sic ibi. Vbi vides quod intelligentia cuiusque dicti est coniicienda ex causis, ob quas illud fuit dictum: cum ergo istud legatum, vel verba quibus relictum fuit, fuerint dicta, & apposita ob hanc causam, vt testatrix habet pro anima sua primam Missam istius sacerdotis, & hæc causa possit hodie impleri, & effectum sortiri, dicendum omnino videtur, quod mens testatricis per istam professionem fuit impleta, non vero fraudata. Videantur etiam ad hoc, quæ dicit glossa ad citatum cap. *intelligentia. verb. ex causis.*

Ad secundum argumentum dico quod licet iste ~~testator~~ <sup>testator</sup> nondum haberet actu dominium istius legati, ~~vel~~ <sup>nam</sup> ~~realem~~ <sup>realem</sup> possessionem illius eo quod esset filiusfamilias, adhuc tamen poterat de illo testari, quia potest quis testari de re ad quam habet ius proximum,

&c

& clarum, licet illius non habeat dominium, vt praxis quotidiana obseruat. Et tenet in terminis Lessius *tom. de iust. lib. 2. dubio 2. num. 11.* & praxis obseruat: multi enim testantur, & tanquam legatum relinquunt id quod Rex illis debet pro seruitiis Regi factis in navigationibus, bellis, & similibus obsequiis: & illa quæ Rex pro seruitiis daturus est nondum habent in dominio, vel possessione, sed solum habent ius ad illa, & de hoc iure testantur quotidie. Et filius moriens si habet ætatem requisitam potest testari de legitima sibi relicta à matre defuncta, cuius tamen legitimæ non habebat dominium, vel possessionem, eo quod esset filiusfamilias. Et confirmatur exemplo in electionibus. Nam electus ad aliquod officium, vel beneficium, antequam confirmetur non habet possessionem illius vt patet: sed solum habet ius ad rem, vt possit confirmationem petere, & pro illo litigare. Et tamen potest renunciare iuri quod habet ad tale beneficium, quæ renunciatio est quædam donatio. Secundo respondetur ad idem secundum argumentum, negando quod iste professus non habuerit dominium istius legati aduentitij, imo dico quod statim à morte testatricis habuit dominium istius legati, licet pater haberet vsumfructum, eo quod ille esset filiusfamilias. Et quod filiusfamilias statim acquirat dominium legati aduentitij viuente patre tenent Syluester *citato ver. periculum quest. 3.* & Azor *tom. 2. lib. 2. ca. 22. §. in peculio col. 194.* & alij ab his citati, & est opinio communis.

10 Ad confirmationem istius secundi argumenti qua dicitur filiumfamilias non posse testari de peculio aduentitio, quale hoc fuit, ommissis aliis solutionibus: Respondeo id intelligi, non posse de illo testari patre iuxta, seu absque patris licentia: poterit autem si pater

licentiam concedat. At in hoc casu pater dedit licentiam, imo suavit filio ut sic testaretur in fauorem vxoris propriæ, & matris ipsius profitentis. Potuit autem pater dare hanc licentiam filio renunciâs iuri quod habebat ad vsumfructum, vel dominium talis legati. Vidi ego meis oculis huius rei exemplum in quadam Moniali meæ Prouinciæ, quæ ante professionem carens patre & matre, habensque multa bona temporalia de quibus posset testari, habebat tamen quandam Auiam in Germania, quæ de iure futura erat hæres Nouitiæ, scripsit Nouitia ad Auiam petens licentiam libere testandi. Auia misit illi renunciationem hæreditatis, & liberam licentiam testandi sigillo Imperatoris munitam; testata est Nouitia, & omnia bona sua monasterio suo reliquit. Secundo respondetur ad eandem confirmationem, quod filius non potest testari de peculio aduentitio, quandiu est sub potestate patris, ut ait Lessius citatus in eodem argumento, & lib. eodem cap. 4. dubio 3. num. 9. & 10. at filius per ingressum Religionis, & per professionem liberatur à patria potestate, ut est communis Doctorum sententia, pro quo citat multa, & multos Sanchez 2. tom. Decalog. lib. 5. cap. 5. num. 29.

II Ad tertium argumentum dico, potuisse hunc professum testari de isto legato, non obstante quod testatrix substituit illi sororem, ut legatum caperet in casu quod non esset Clericus. Ad clausulam enim Clerici iam respondimus, non esse causam amittendi legatum. Quod vero attinet in particulari ad substitutionem factam in sorore: dico talem substitutionem non impedire. Probo primo ex verbis ipsius testatricis, quæ in testamento sic sororem substituit: *Si Bartholomeus mortuus fuerit antequam Missam dicat, capiti hoc legatum soror*

*foror illius.* At constat quod iste Bartholomeus nondum est mortuus, & adhuc debet missam dicere : ergo illius soror non habet ius ad tale legatum. Secundo dico; quod illa substitutio sororis euauit; & extincta est per ingressum Religionis, & professionem fratris sui Bartholomei. Est auctor istius doctrinæ Nauarrus *lib. 3. consilior. ait. de testam. consil. 9.* ubi ait, quod quidam iuuenis, quem quidam consanguineus hæredem instituit, & per illius mortem eidem substituit certas puellas, & prædictus iuuenis intrauit Religionem, & bona sua in professione tradidit Religioni : ait Nauarrus, quod per istam professionem, & donationem exclusit puellas substitutas. Et licet iste professus hoc legatum non dederit Religioni, dedit illud per testamentum validum, & pro causa pia : sicut enim si daret Religioni excluderet sororem substitutam; ita videtur quod illam potuerit excludere dans illud propriæ matri, quæ est causa valde pia, maxime cum etiam in extinctione huius substitutionis per professum in Religione interueniat etiam fauor Religionis. Facit etiam omnino ad hoc quod tradit Rodriguez *tom. 2. qq. Reg. quest. 77. art. 4.* in cuius articuli titulo inquirens an certa substitutio euanescat per ingressum Religionis, respondet *codem art. 4. §.* aut non constat, dicens : quod si non constat de expressâ mente testatoris, quod voluerit excludere monasterium, tunc euanescit substitutio : & ait cum Bartolo, quod leges videntur velle extinguere hanc substitutionem in fauorem Religionis, id est in fauorem intrantium Religionis, ne scilicet deterriti eo quod viderent eorum bona deuentura ad substitutum si ipsi fierent Religiosi, desisterent ab ingressu Religionis, & impedirentur a vita contemplatiua, quæ est melior quam sæcularis actiua. Id vero quod ait Rodrig:

cit. §. Aut non constat, satis habet locum in hoc nostro casu: non enim constat de expressa mente testatrix, quod voluerit excludere Bartholomeum à capiendò legato, & disponendo de illo per professionem cum qua futurus erat Clericus, & sacerdos primam missam pro ipsa celebraturus in statu perfectiori, quàm sit Clericus secularis. Facit denique quod Frater Ludouicus de Beja *part. 1. Respons. Moral. casu 36. quest.* Vtrum dos, seu legatum relictum alicui si nupserit, &c. à fol. 130. *part. 2. & seqq. absolute, & sine distinctione*, ait substitutiones omnes, seu conditiones omnes, quæ præbent impedimentum maioris boni, vel retrahunt à vita contemplatiua eligenda, reprobari, & pro non adiectis haberi. Sic ille habet *cui. loco fol. 131. concl. 1. in princip.* Vbi citat l. *Titia si nupserit. de condit. & demonst. appositis.* vbi legatum si non nupserit, habetur pro non adiecta conditione, & acquiritur legatum ab ingrediente Religionem, in fauorem Religionis; & multa alia congerit vsque ad fol. 132. ad hoc intentum. Inter quæ adducit l. *sunt persona. ff. de Relig. & sump. funer. & cap. fin. de sentent. & re iud.* vbi dicitur, quod in dubio fauendum est Religioni; & omnia quæ ibi dicit vsque ad finem illius quæstionis, citans multa, inferuiunt ad præsens intentum.

12 Ad quartum argumentum dico, quod licet hoc legatum relictum fuerit ad ordines sacros suscipiendos, hoc tamen intentum non est sortitum effectum, quia non debet ordinari ad titulum illius patrimonij, sed ad titulum Religionis: & sic istud legatum est solutum ab illo vinculo nè possit alienari, maxime quia Bartholomeus effectus Religiosus sacerdos habet aliunde vnde viuatur, idest ex titulo Religionis. Adde, quod si iste Bartholomeus esset Clericus secularis sine ingres-

su



su Religionis, & aliàs haberet bona temporalia vnde commodè sustentaretur, posset alienare prædictum legatum ad cuius titulum fuit ordinatus. Probat hoc Barboza in suis remissionibus ad Tridentinum citato cap. 2. de reform. num. 21. Et ratio clara ita dicitur. Nam Tridentinum ea de causa prohibuit Clericis alienare patrimonium ad cuius titulum sunt ordinati, ne postea cogantur mendicare, vel misere viuere non habentes vnde viuant: ergo si habuerint sufficienter vnde viuant poterunt alienare, quia cessante fine legis, cessat lex cap. cum cessante. de appellat.

---

CASVS III.

*De quadam donatione facta uni Conuentui de  
certa possessione immobili.*

**Q**uidam vir, & vxor nobilissimi habentes hortum paruulum, & certas domos humiles ad latus cuiusdam Conuentus D. P. Francisci, cum essent illius deuotissimi, & filios non haberent, & viderent in Conuentu non esse commodum locum pro curandis infirmis, moti pietate, ac deuotione, vterque simul vnanimè in capitulo eiusdem Conuentus ( erat enim ante Concilium Trident. ) præsentibus omnibus fratribus, Notario publico, & licentia Regis, fecerunt ambo sequentem donationem Conuentui de prædicto horto, & domibus positis ad latus Conuentus: In qua donatione postquam dixerunt se hortum, & domos donare in perpetuum post ipsorum mortem: manente vsufructu in vita apud donatores, subduntur hæc verba in

donatione à Rege confirmata: *Et hoc cum tali intellectu & intentione, quod ubi primum ille donator mortuus fuerit, clauderetur porta domorum patentes ad plateam publicam, & fiet in dictis domibus valetudinarium pro curandis Fratribus (vulgo enfermaria) ad consolationem Fratrum, eo quod valetudinarium quod modo habent, sit angustum; & ut evitentur hospitalitates secularium in dictis domibus Conventui vicinis.* Hactenus sunt verba donationis, cum aliis quæ forte postea citabuntur. Mortuis ambobus donatoribus, Fratres sumpta possessione, portas domus versus plateam clauferunt, horto, ac domibus vsi sunt habentes possessionem horti, & domorum cum porta communi è Conuentu ad illum hortum, ac domos, sicut hodie extat manifestum vestigium. Transacto aliquo tempore, Fratres non ædificaverunt valetudinarium in prædictis domibus, vel propter penuriam pecuniæ, vel maioris observantiæ causa, & fecerunt valetudinarium in alio loco. Conventus antiqui remotiore à platea. Hæredes donatorum litem moverunt Conventui, dicentes donatas domos amisisse, eo quod conditionem non impleverint à donatore appositam, ut videlicet ibi ædificaretur valetudinarium. Sententia lata est per iudicem sæcularem contra fratres, illisque ademptus est hortus, ac domus donatæ. Conventus semper gemit, sed præ inopia causam statim non est prosecutus. Post annos tandem fere sexaginta voluit recuperare hortum, ac domos sibi donatas.

Quærentur potissimum duo. Primo: an prædicti Fratres hortum, & domus amiserint eo quod valetudinarium in illis domibus non ædificaverint. Secundo an post sexaginta annos à lata contra se sententia possint litem movere pro restitutione in integrum sibi facienda. Et quoniam dicenda pro isto calu possunt iu-

uare

uare ad alia multa dubia quotidiana soluenda pro legatis, ac donationibus quæ fiunt Religiosis, non piguit laborem præsentem assumere.

1 Antequam respondeam ad principalia quæ sita, præmitto, quod errauit iste Conuentus, & illius Fratres, si pro hac lite responderunt coram iudice sæculari, (sicut suspicor mihi dictum fuisse) si enim coram illo responderunt, errauerunt, quia in causa possessionis Conuentus, neque illi, neque Syndicus Conuentus Minorum poterat respondere nisi coram suo conseruatore. Est expressa concessio Clementis VII. facta Fratribus Minoribus *in compendio*, verbo procurator, seu Syndicus Minorum. §. ultimo, ubi Papa sic concedit Syndico: *Non nisi coram iudicibus conseruatoribus domorum illarum, quarum ipsi Syndici, & Procuratores fuerint, de iniuria respondere teneantur.* Sic ibi. Idem postea concessit amplius Gregorius XIII. Patribus Societatis Iesu in Bulla illis concessa circa creationem conseruatoris, qui illos deffendat, quam transcribit Rodrig. in suo Bullario à fol. 1148. & seqq. ubi multa illis circa hoc concedit, vt possint illos tueri in rebus possessis, iuribus, & similibus. Et præterea praxis est antiqua in omni tribunali, quod Actor sequi debet forum rei. Cum ergo Fratres in hac lite fuerint rei, & possessione spoliati, hæredes litem mouentes super possessorio, litem debebant mouere coram conseruatore Ordinis, qui est iudex Apostolicus prædictorum Fratrum; non vero coram iudice sæculari. Quin addo, quod si coram iudice sæculari lis fuit agitata (sicut credo) erit causa principalis ad annullandam sententiam quouis tempore: quia sententia data à iudice incompetenti, nulla est: vt potest videri in toto titulo de foro competentis.

2 Quamuis ergo in casu præcedente aliqua dixerim

mus spectantia ad donationem conditionalem , vel modalem, ibi tamen in rigore agebatur de legato relicto per mortem , hic vero proprie agitur de donatione, quæ fuit fundamentum totum istius litigij. Et ideo paulo fufius declarandum est quod fit donatio modalis, & conditionalis. Et id quod dicam desumpfi præcipue ex Syluest. *ver. conditio quæst.* 3. & Molina 2. *tract. de iust. disput.* 208. Sanchez *lib.* 3. *de Matrim. disput.* 33. Reginaldo *tom.* 2. *lib.* 25. *num.* 57. & seqq. & aliis.

3 Suppono ergo primo ex citatis Doctoribus, quod contrahentes in suis contractibus, vel donationibus ad maiorem firmitatem, vel claritatem vtuntur præcipue duobus verbis, vel clausulis, vna vocatur conditio , & alia vocatur modus. Prima, quæ est conditio , in latino idiomate, solet communiter exprimi per hæc verba: *Si dummodo, sub conditione, vel per aliam æquivalentem vocem: v. g. Cum, ubi primum, quandocunque.* Quod in nostra lingua Lusitana fiet *cum quis dixerit. Dou, ou deixo à Pedro tal causa, se fizer tal: ou, com tanto que faça tal, ou com condiçaon que faça tal, ou quando fizer tal, ou, tanto que fizer tal, ou, como fizer tal.* Et ista conditio appositæ donationi, vel contractui de ordinario taliter obligat, vt si conditio non interuenerit, non valet donatio, legatum, vel contractus. Dixi de ordinario, quia aliquando conditio non obligat, si videlicet est turpis, vel impossibilis, vt disputatur in materia de Matrimonio. Hinc iam bene aduerte, quod in donatione supraposita in principio, de qua est quæstio nullum omnino verbum ponitur, quod sonet cõditionem aliquam. Secunda clausula, seu particula, quæ solet apponi in donationibus, legatis, vel contractibus, dicitur, *Modus*, qui non est conditio contractus, sed est modus quo debet fieri, vel ad quem debet fieri: & solet in latino

tino sermone explicari per hanc particulam, *Vt, Dummodo, Pro nam.* Quod Lusitanè sic explicabitur, *Don, ou deixo isto à Pedro para o dar aos pobres, para os pobres, porque o dê aos pobres, ou darà aos pobres.* Et sic iste modus appositus contractui, vel donationi, non habet tantam vim sicut conditio apposita, de qua supra, neque ex illius defectu contractus, vel donatio annullatur. Et licet aliquando modus sumatur pro conditione, id fit rarissime: & communiter standum est distinctioni traditæ proxime in hoc *num. 3.* & hæc omnia tradunt fufius Doctores supra citati.

4 Secundo præmitto ex Molina citat. diff. §. vt autè, & ex Reginaldo citato loco, quod tribus modis potest donator, vel testator in donatione, vel in testamento, apponere clausulam, vel particulam, quæ dicitur Modus. Primus est dando consilium, & inuitando: veluti si diceret; dono tibi librum, vt illum legas; hanc do pecuniam, vt bona opera cum illa facias, &c. In quibus duobus modis dat illi consilium, vel motiuum, sed non imponit obligationem. Secundus modus vtendi hac clausula, est, quâdo cum modo isto assignato, non solum illi dat consilium, sed imponit illi obligationem vt faciat cum consilio: sed non imponit illi pœnam, quod deficiente illo modo erit donatio nulla: ad hoc enim pœnam non imponit, nec verba æquivalentia pœnæ, quibus innuat velle se vt aliàs donatio, vel legatum non valeant. Tertius modus est, quando testator, vel donator, vtuntur verbo sonante pœnam, vel imponunt onus tali modo, vt tali modo non interueniente, velit donationem, vel legatum non valere. Veluti si diceret: do centum Petro, vt ille det Francisco, cui illa centum debeo. Tunc enim tenetur Petrus dare Francisco, aliàs legatum, vel donatio non valerent: ita  
vt si

vt si non reddat Francisco, illa debeat in conscientia: nam ex verbis donantis clare colligitur, voluisse, quod aliter donatio non valeret. Et sic dicunt Doctores, quod ex verbis, & intentione dantis, vel testatoris, debet colligi quando modus obliget, vel vt consilium tantum, vel vt onus tantum, sed non ita vt perdatur legatum, vel donatio: vel denique si ita obliget modus, vt eo deficiente sit legatum, vel donatio nulla. Et omnes dicunt, quod modus 1. & 2. modo explicatis, si non feruetur, non perditur legatum, vel res donata: sed solum quando est Modus tertio modo explicatus. Hoc supposito.

*Sit prima conclusio.*

**I**N donatione supra posita, de qua agitur, non interuenit conditio vlla apposita, hæc patet clare ex dictis in num. 3. verba enim ibi posita. *Cum intellectu, & intentione*, nullam conditionem apponunt, sed solam intentionem declarant, quæ intentio non obligat: nec item vitur aliquo verbo, per quod conditio solet apponi in contractibus, vel donationibus. Non enim dicit, cum conditione, dummodo: si fiat valetudinarium: vel vbi primum fuerit factum: vel quando fuerit factum, quæ sunt verba quibus solet exprimi, vel apponi conditio in contractibus. Neque item ibi posuit pecnam Conuentui secus facienti, sicut viri prudentes facere solent (sicut iste donator erat Præses supremi Tribunalis Iustitiæ Olyssiponensis,) qui in legatis, & donationibus, quas faciunt ex deuotione, vt iste fecit, circumstantias omnes explicant ad validitatem necessarias. Et probatur clare, nam in legibus, & contractibus verba sunt accipienda in significatione propria, vltata &

& communi, vt dicunt omnes Iuristæ, maxime glossa in cap. *Nonnulli. ver. ultra. de rescript.* citans multos textus: & tradit Sanch. lib. 6. de matrim. disp. 23. num. 3. Cum ergo donator in donatione dicat suum intellectum, & intentionem esse, vt fiat valetudinarium; per verba, *intellectum, & intentionem*, non apposuit conditionem, sed solum declarauit intentionem. Nam verbum, *intellectus, & intentio*, non significant proprie, & communiter conditionem,

*Secunda conclusio.*

6 **I**N toto rigore, verba prædictæ donationis solum continent Modum, non conditionem donationis. Hæc clare colligitur ex illis verbis eiusdem donationis: *Cum intentione, quod ubi primum ille mortuus fuerit, fiat valetudinarium pro fratribus.* Nam ista intentio declarata per illa verba, videtur tantum esse modus donationis, & velle se donare, vt fiat valetudinarium. Est enim modus de illis quos supra num. 4. diximus fieri 1. & 2. modo, qui vel monent, vel consulunt vt fiat aliquid, & non imponunt onus, vel obligationem vt res fiat sub pœna annulationis legati, vel rei donatæ. Pro quo notat optime Molina citata disput. 6. Habemus igitur, & Reginaldus, quod quando testator, donator, vel legislator non bene explicarunt clare suam mentem in imponendo modo, id debet colligi ex aliis verbis donationis ad arbitrium boni viri. Et hoc supposito, dico primo satis clare colligi non fuisse mentem donatoris istius imponere conditionem annullatiuam in illa donatione, siquidem in illa nihil aliud prætendit nisi obsequium Dei, & Fratrum consolationem. Constat clare ex principio, cum incipit facere dona-

donationem, ait enim: *Quod id faciat amore Dei, & propter fructum spiritualem, qui acquiritur donando servis Dei, propter Deum.* Et infra in eadem donatione ait, vt fiat valetudinarium in suis domibus, eo quod sint maiores, & capaciores pro consolatione Fratrum, & vt post mortem ipsius ibi non habitent sæculares, qui inquietent Conuentum. Vbi clare vides principale suū intentum fuisse diuinum obsequium, animę suę vtilitatem, & Fratrum consolationem. Et qui hoc solum intentum habebat, nullo modo potest credi, quod in tali donatione voluerit clausulam apponere, qua non impleta Fratres amitterent rem tam læto, deuoto, ac liberali animo donatam. Nedum etiam videtur habuisse intentionem imponendi obligationem Fratribus secundo modo ex tribus supradictis, eo quod tam deuotus erat Fratrum, & illorum consolationem prætendebat, misertus illorum inopiæ: nec vsus fuit verbis obligatoriis. Facit pro isto dicto Mol. cap. *intelligentia. de verb. signific.* vbi dicitur quod intelligentia dictorum debet colligi ex causis. Et ibidem glossa *ver. ex causis*, dicit, quod debemus recurrere ad intentionem loquentis, &c. & in ista donatione intentio donantis fuit deuota, liberalis, sancta, non oneratiua, sed consolatiua, vt patet: ergo ad illius intentionem recurrendum esset, quando verba illius forent dubia.

7 Contra istam conclusionem obiicis ex verbis donationis istius proxime citatis in num. 6. præcedenti. Ibi enim donator circa domos donatas dixit in idiomate Lusitano, *Tanto que elle morrer.* Quod latine sonat, *vbi primum.* At nos in num. 3. diximus, inter verba significantia conditionem in donationibus, hoc esse vnum, videlicet. *Vbi primum.* Ergo hæc donatio fuit conditionalis, & non modalis. Respondeo hoc non ob-  
stare.



stare, quia illa particula, *ubi primum*, non respicit rem donatam, vel onus donationis: sed solum per illa verba voluit dicere, quod donatio non fortiretur effectum quandiu ipse viueret: nolebat enim carere illis domibus in vita propter consolationem, ac deuotionem Fratrum, sed dixit suam mentem esse, vt donatio non fortiretur effectum nisi per mortem ipsius. Confirmatur, & declaratur, nam donatio ista fuit donatio causa mortis, non inter viuos, vt patet ex citatis verbis donationis facientibus mentionē mortis. Cum ergo donatio domorū fuerit donatio causa mortis, verba illa: *Dono domum istam cum intentione quod ubi primum mortuus fuero fiat valetudinarium*. Verba inquam ista hoc solum volunt: Dono istam domum ubi primum mortuus fuero. Non vero in illis verbis imposuit onus, conditionem, vel obligationem, vt fieret valetudinarium, vt satis constat ex iam dictis à num. 3. 4. 5. 6. & amplius patebit ex multis statim adducendis. Potest hoc amplius confirmari eleganti doctrina quam tradit Sarmiento. lib. 2. *Selectarum cap. 3. num. 5.* ubi dicit hæc verba posita in lege. *Ea conditione vt*, Non facere conditionem, sed modum. Probat ex lege *quoniam*. Cod. de *rerum permut.* & ait quod eundem sensum faciunt, ac verbum hoc, *Dummodo*: quod non facit conditionem sed modum. Regulariter loquendo Sarmientum sequitur Sanch. lib. 3. de *Matrim. disp. 33. num. 2.* & citat Rebus. Tiraquel. Mol. de *primogen.* optime dicit, quod supra tetigimus, videlicet, quod omissio Modi non vitiat actum, sed omissio conditionis. Si ergo hi tam graues Doctores, dicunt ea verba *ea conditione vt*, non importare conditionem; à fortiori dicendum erit, quod in ista donatione, verba illa, *Ubi primum mortuus fuero fiat, &c.* non importabit conditionem, sed modum, vel

solam declarationem temporis mortis quo incipiat actus valere, siue donatio.

8 Reuertit. Ad nunc ad probationem eiusdem conclusionis, & explicationem eorundem verborum, probō quod in proxime citatis verbis: *Cum intellectu & intentione*. Non est appolita conditio obligans, & annullans. Probo, quia ex illis duobus verbis, verbum, *intentione*, in significatione propria, solum significat intentionem, & desiderium, non vero obligationem, nec conditionem: cum ergo solum sit dubium de alio verbo adiuncto. *Cum intellectu*. Hoc verbum dubium explicandum est per aliud verbum clarum, videlicet *intentione*: Sic docet Nauarrus lib. 5. *consiliorum tit. de apostasia consil. unico num. 11*. vbi docet quod quando vna copulatiua habet duo verba, vnum dubium, aliud clarum, tunc verbum dubium copulatiuæ est explicandum per aliud verbum clarum eiusdem. Et citat l. 1. ff. *de rebus dub.* & dat ibidem exemplum. Cum ergo copulatiua istius donationis; *dono cum intellectu, & intentione*, contineat verbum dubium, *cum intellectu*. Et verbum clarum, *& intentione*. Et istud verbum secundum non importet conditionem obligantem, sed solam intentionem, & desiderium: eodem modo explicandum erit aliud verbum dubium eiusdem copulatiuæ, vt non importet conditionem obligantem, sed modum non obligantem. Viso ergo quod donator solum habuerit intentionem, vt fieret valetudinarium, sola hæc intentio non obligat donatarium, vt si implere omitat intentionem donantis, perdat legatum, vel rem donatam. Colligitur clare ex ea. *Quod præcipitur 14. quæst. 1.* Et tenet Merez citatus à Sanchez lib. 1. *de Matrimon. disput. 33. num. 28*. Quod confirmatur exemplo obedientiæ subditi erga Prælatum: quantumcumq; enim subditus

subditus sciat intentionem Prælati esse vt talis res fiat: non tenetur subditus illam facere, donec Prælatus illum obliget præcepto iniuncto vt faciat, vt Doctores docent communiter. Et potest aliis multis exemplis comprobari: maxime illo quod Theologi docēt, quod finis præcepti non cadit sub præcepto vt tradunt in particulari quando tractant de obseruatione festorum & in similibus exemplis, quæ omitto breuitatis gratia.

9 Et quamuis ex hætenus dictis satis videatur probatum istam donationem non fuisse conditionalem, sed modalem, & proinde fratres non amisisse rem donatam propter omissionem modi, pro maiori dictorum confirmatione adduco sequentia ex Molina *citata disput. 208.* qui fuit ex grauioribus Scriptoribus huius temporis in re Theologica morali; citata ergo disputatione ad nostrum intentum dicit sequentia. Primum est, quod si testator, vel donator disponat de re aliqua, & dicat quod detur Petro, & postquam donata fuerit, imponit obligationem, vt certum quid faciat: In tali casu, licet apponantur verba quæ sonent conditionem ibi non datur conditio sed Modus. Et ratio est quia conditio suspendit dispositionem, Modus vero illam non suspendit: & ait Molina hanc esse communioem opinionem. At donator in ista donatione præcipit, vt statim post mortem suam, hortus, & domus tradantur Fratribus; & postea dicit, quod fiat valetudinarium, & sic non interuenit conditio sed modus, adueniens, vel appositus post iam factam traditionē. Cum quo coincidit Sanchez *citata disput. 33. lib. 3. num. 2.* dicens, illa quæ apponuntur actui iam perfecto importare modum, non conditionem. Proximè dictum tradit Molina *citata disp. §. iuxta discrimen, & seqq.*

10 Secundum dictum Molina *citata disp. §. quando*

autem, & duobus sequentibus ad nostrum intentum, est: quod legans, aut donans absque conditione, sed cum modo, si non apponit clausulam quod legatarius, vel donatarius contraueniens amittat rem donatam, in tali casu, licet donatarius non impleat promissum, non amittitur res donata. Et hoc clarius dicit §. Ad hunc etiam, & in speciali quando donatio est facta alicui Ecclesiæ: & ad hoc citat capit. *verum de conditionibus apposit.* At in hoc casu facta est donatio Ecclesiæ Minorum, & donator non expressit irritam fore donationem deficiente modo in illa appposito: Ergo licet defuerit modus, non est amissa res donata. Et hinc obiter soluitur alia obiectio, quæ posset fieri ex verbis istius donationis positus in fine: ubi post donationem factam, subiicit. *Et placuit Fratribus fieri valetudinarium in assignatis domibus.* Quæ verba videntur sonare quod præcesserit conditio petita ex parte donatoris, & promissionem ex parte Fratrum, fuisse acceptantium. Respondetur primo ex verbis Molinæ proxime citatis, cum dicit, etiam si non impleatur promissum, non perdi rem donatam, si non apponatur conditio protestatiua, quod alias res donata amittatur. Addo illam promissionem ex parte Fratrum non indicare quod præcesserit conditio petita, & protestatiua: quia sine tali conditione sæpe homines promittunt, & pacta faciunt. Et hæc promissio, si fuit promissio, non fuit obligans, sed solum polytica, per quam fratres significarunt se acceptare libenter donationem, & rem donatam sibi esse valde gratam: quod fieri potuit sine conditione præcedente.

II Tertium dictum Molinæ in §. Quando tamen, est, quod quando Modus appositus in donatione solum respicit vtilitatem donatarij, tunc non est petenda cautio

cautio à donatario vel satisfactio, quod implebit modum: quia attendenda est pia affectio donantis ad donarium. At constat ex citatis verbis in donatione positis, quod donator principaliter intendit obsequium Dei, & utilitatem, & consolationem Fratrum, ergo licet ibi verba essent dubia (quod non sunt) intentio donatoris de consolatione, & utilitate Fratrum solum est attendenda; nec credendum est interuenisse conditionem irritantem. Addit Mol. quod inuenta negligentia ex parte donatarij circa impletionem Modi, poterit iudex obligare donarium, vt impleat modum. Non vero dicit quod poterit iudex priuare donarium re donata, quia scilicet donator, stante tali defectu donarium non priuauit. In huius rei confirmationem facit omnino quod tradit Syluest. *ver. alienatio, quest. 20.* vbi optime ad totum hunc casum, tria dicit. Primum est, idem quod proxime dixi ex Molina, videlicet quod deficiente modo in donatione poterit iudex obligare ad obseruantiam modi: non vero reuocare. Secundo dicit, quod quando modus adiectus non fuit causa finalis contractus, non potest agi ad reuocationem, nisi sit dictum vt possit reuocare. Quo nihil clarius dici potuit ad nostrum intentum. Nam modus adiectus huic donationi, vt fieret valetudinarium, non fuit causa finalis donationis: sed causa finalis fuit amor Dei, & utilitas animæ donantis, vt clare patet ex verbis donationis relatis *supra in num. 6.* præterea donator non apposuit clausulam, vt deficiente modo, posset fieri reuocatio: ergo nullo modo potuit iudex prædictos Fratres priuare, seu spoliare re donata per istam donationem. Tertium quod ait Syluest. est, quod semper debet presumi quod modus non sit causa finalis contractus: quia secundum Panorm. ibi citatum, donans Ecclesiæ sub

modo, videtur principaliter donasse propter Deum, & pro remedio suorum peccatorum: quo nihil clarius, & efficacius dici potuit ad intentum. Donator enim in hoc casu dedit expresse, & Ecclesiæ, & propter Deum, & pro salute animæ suæ vt patet ex dictis *num. 6.* quæ tria dicta probat ibi Syluest. ex multis legibus iuris ciuilibus, quas ibi poteris videre.

12. Quantum quod dicit Molina *cit. disp. §. ult. est:* quod licet donator in donatione dicat, quod illud quod donat Ecclesiæ, si non impleatur modus, & finis ibi expressus, amittatur res donata; si tamen Ecclesia iam habuit possessionem talis rei acquisitam, & postea per negligentiam Prælati talis Ecclesiæ, modus à donatore designatus non fuit impletus, in tali casu Ecclesia non amittit rem donatam. Et ratio est, quia illa res donata iam erat acquisita Ecclesiæ: Prælatus autem, licet sua negligentia possit nocere Ecclesiæ in rebus acquirendis de futuro, non tamen potest illi nocere in rebus iam acquisitis, vt tenet glossa communiter recepta in *cap. ult. i 6. quest. 6.* & ait Molina esse opinionem communem. At in hoc casu constat, quod iste Conuentus iam per aliquod tempus acquisierat possessionem horti ac domorum: nam hætenus hodie porta apparet clausa, per quam è Conuentu fratres intrabāt, & exhibant ad dictum hortum, & domos donatas: ergo quamuis per negligentiam Prælatorum ibi valetudinarium factum non fuerit, non debuit Conuentus spoliari re donata Ecclesiæ, quam iam possederat; maxime cum donatio non dicat, quod fratres priuentur horto, & domibus non facto valetudinario. Et pro hoc etiam seruit priuilegium Ioan. XXII. concessum fratribus montis Oliueti, quod citabimus infra *num. 17.* per quod concedit, quod res Conuentuum male alienatæ

nata possint, repeti per restitutionem in integrum.

13 Adhuc cum Molina volo coniungere dictum doctissimi Patris Lessij, qui *lib. 2. de inst. cap. 18. dubitat. 16. num. 127.* ait, quod licet in donatione finis secundarius non impleatur, si tamen subest finis principalis ob quem donatio est facta, non est irrita donatio, nisi ex circumstantiis constet aliam fuisse mentem donatoris. Et nos iam supra ostendimus ex dictis *num. 6.* finem principalem istius donatoris fuisse amorem Dei, & salutem animæ: valetudinarium vero fuisse secundarium finem, seu modum: nec ex circumstantiis ullis colligi, fuisse mentem donatoris rem donatam auferri à fratribus modo illo non impleto. Tunc subdit Lessius hoc exemplum, dicens; vt si des monasterio centum aureos sub aliquo onere, est valida donatio, etiam si monasterium onus non præstiterit; quia non censetur ille principalis finis donationis, sed salus animæ, ob quam monasterio videtur absolute donatum, etsi cum onere: imo nec reuocari potest, nisi id additum sit in donatione, vel aliunde constet illam fuisse mentem donatoris. Hactenus ille. Idem tenet Ioannes Medina *Cod. de restit. quest. 24.* & dicit Lessius colligi ex cap. *verum. de condit. appositis.* Et per hæc manet conclusio probatissima ex rationibus, & auctoritate Doctorum Theologorum.

14 Vltimo adduco vnum tantum exemplum ex iure canonico positum à glossa in cap. *Non potest. de praben. & dignit. in 6.* vbi glossa in *ver.* Retinere, ponit hunc casum. Dispensauit Papa cum quodam Clerico, vt haberet duo beneficia, & in concessione Papæ dicebatur: *Dimmodo in beneficio, in quo non residet, faciat canonicè deservire* (id est per Clericum à se substitutum.) Querit glossa, si Clericus dispensatus, non posuit sub-

stitutum in illo beneficio, in quo non residet, an amiserit beneficium ob non impletam conditionem? Respondet glossa quod non amisit beneficium, & citat Innocentium, Hostiensem, Guillel. & Compostellanum: & in margine glossæ citatur Ioann. Andr. pro eadem opinione. Causam assignat glossa, quia illic verbum, *Dummodo*, licet de ordinario æquipolleat verbo, *Si*, & significet conditionem, hîc in materia fauorabili non significat conditionem, sed significat admonitionem, vt faciat, vel comminationem tantum. Et citat ibi vnum textum ciuilem, & alium iuris canonici. Quæ ambo quadrant optime casui nostro, in quo, imprimis materia donationis fuit fauorabilis, & satis pia. Et præterea donator non apposuit donationi particulam, *Dummodo*.

15 Quinimo adhuc pro confirmatione prædictorum facit quod dictus donator in prædicta donatione iubet vt sui successores singulis annis soluant Conuentui certam mensuram, vel pondus saccari pro infirmis eiusdem valetudinarij fabricandi, & prædictum saccarum, hodieque soluitur prædicto Conuentui: cum tamen saccarum relictum esset accessorium primæ donationi domorum pro valetudinario, & tamen iudex destruxit principale non destructo accessorio. Et hodie solutio illius saccari pro valetudinario non facta, videtur protestari, quod non fuit obligatio fabricandi valetudinarij, sub pœna amissionis rei donatæ: aliàs amissa re donata, amitteretur accessorium solutionis saccari.



*Due dubitationes resultantes ex suprapositi  
casus resolutione.*

16 **S**Vpposito, quod in conscientia prædicta dona-  
tio, seu res donata non fuerit amissa, & proinde  
sententia lata contra Conuentum fuerit nulla, seu in-  
iusta, & Conuentus non appellauit, & hæredes dona-  
toris sexaginta quinque ab hinc annis possident præ-  
dictum hortum, ac domos; quæri potest, an prædictus  
Conuentus possit hodie post tot annos petere restitu-  
tionem rei, quæ transiit in rem iudicatam? Et impri-  
mis, quod hodie non possit ista Religio repetere præ-  
dictum hortum, ac domos, licet habeat priuilegium,  
quod contra ipsam non præscribatur nisi spatio cen-  
tum annorum (de quo statim dicitur) qui centum anni  
nondum præterierint; probari videtur clare ex capit.  
*suborta. de sentent. & re iudic.* Vbi Papa decernit valere  
sententiam latam contra priuilegium ostensum, vel  
non ostensum, si ab ea non fuit appellatum, vel suppli-  
catum: sed ab hac sententia non fuit appellatum, vt  
dicitur: ergo quantumcumque Religio habeat priui-  
legium, non poterit hodie petere, vt sententia retra-  
ctetur. Secundo probatur ex capit. *inter monasterium.*  
proxime antècedente, eodem tit. Vbi Papa dicit, quod  
non debent lites instaurari propter noua instrumenta,  
& quod sibi imputent illa non ostendentes.

17 His non obstantibus, credo posse prædictum  
Conuentum hodie post dictos annos petere restitutio-  
nem, & retractationem prædictæ sententiæ. Ante pro-  
bationem suppono primo, istum Conuentum esse Or-  
dinis Minorum, qui gaudent sequentibus priuilegiis.  
Primum est concessum ab Eugenio IV. patribus D.  
Pauli extra muros Romæ, per quod illis conceditur ne

contra Allos, vel bona ipsorum possit præscribi, nisi per spatium centum annorum : citat Rodrig. *tom. 3. qq. regul. quest. 35. art. 2.* Secundum priuilegium est, quod concessit Ioannes XXII. Congregationi montis Oliueti, de quo Rodrig. *cod. tom. 3. quest. 56. art. 2.* dicens esse positum in compendio Cisterciensium, per quod Papa illis Religiosis concessit: *Quod si qua lasio in bonis, & vsibus monasteriorum ordinis, per quamuis cuiuscumque status, gradus, habitus, seu conditionis Ecclesiastica, seu secularis, mundana, vel regularis personam, etiamsi culpa Monachorum, vel Prelatorum facta fuerit, ipso iure rescinditur, neque opus est aliquam in integrum restitutionem à quocquam super eo impetrare: & hoc ius trahitur ad præterita nondum decisa, presentia, & futura.* Hactenus Papa. Tertium priuilegium est, quod bona omnia mobilia, & immobilia, domus Conuentus, ornamenta, libri, & similia existentia in Conuentibus fratrum Minorum, sunt immediate bona sedis Apostolicæ, & Papæ iurisdictioni, ac possessioni subiecta, vt patet expresse ex cap. *Exiit. de verb. signific. in 6. §.* Ad hæc cum fratres. Et constat ex Compendio Mendicantium, *ver. Bona. §. 9. & seq.* Neque obstat quod Ioannes XXII. abiecerit aliquo tempore à Sede Apostolica dominium immediatum supra bona Conuentuum fratrum Minorum: nam post ipsum Ioannem XXII. Alexander VI. in eodem Compendio, *ver. Bona. §. 9.* confirmauit quod decretum erat citato cap. *Exiit.* & reassumpsit sub immediato dominio Sedis Apostolicæ omnia bona fratrum Minorum, dicens, illa ad dominium Sedis Apostolicæ pertinere. Quin & ipse Ioannes XXII. ante mortem, dictum suum retractauit, vt testatur Collector compendij ad citat. *§. 9.* Sunt itaque omnia bona Conuentuum fratrum Minorum ipsius Sedis Apostolicæ, illique quoad

quoad dominium immediate subiecta.

18 Quo posito probō, nonobstante lata sententiā contra Conuentum, & post tot annos, haberē Conuentum restitutionem: probō primo, quia quoad prescriptionem, non fluxerunt centum anni, vt patet, & iuxta primum priuilegium Eugenij IV. citatum *num.* 17. necessarium est spatium centum annorum, vt contra prædictum Conuentum præscribatur. Et quod non obstat lata sententia, colligitur clare ex capitulo *cum venissent. de in integrum restitutione.* vbi Papa iussit restitutionem fieri Ecclesiæ læsæ propter negligentiam procuratoris, qui non allegauit, monasterium illud per priuilegium pertinere ad ius, & proprietatem Sedis Apostolicæ. At per tertium priuilegium proxime citatum, Conuentus iste pertinet quoad sua bona immediate ad proprietatem, & dominium Sedis Apostolicæ: ergo habebit restitutionem, non obstante lata sententia. Secundo idem probatur ex cap. *Auditis.* proxime sequenti eod. tit. vbi dicitur, quod si Ecclesia læsa defecit in probationibus, potest petere restitutionem in integrum, non obstante termino iuris exclusiuo. Idem habetur etiam ex toto fere illo titulo *de in integrum restitutione.* maxime cap. *ex litteris.* & cap. *coram Fœ. licis.* Et denique ex capitulo ibi vltimo, vbi Papa dicit, quod propter nouas defensiones potest Ecclesiæ læsæ concedi beneficium restitutionis: quod autem monasterium, seu Ecclesia gaudeat priuilegio Minoris ad petendum beneficium restitutionis, habetur expresse in citato capitulo *Auditis. de in integrum restituit.* paulo antè finem.

19 Ad primum argumentum in oppositum adductum ex cap. *suborita.* dicendum est, quod licet ibi Papa dicat valere sententiam datam cōtra priuilegium non ostensum

ostensum, tamen cum hoc stat, quod poterit habere remedium per restitutionem in integrum, sicut ibi dicit glossa parua in margine, citans Gofr. & vnum textum iuris ciuilis, & alium iuris canonici. Quamuis ergo iste Conuentus per priuilegium non haberet restitutionem, habet tamen illam per tot citata capita ex titulo *De restitutione in integrum*, quo beneficio restitutionis gaudet monasterium, vt supra diximus. Ad secundum ex cap. *Inter monasterium*, dicendum similiter, quod licet non posset Conuentus litem mouere ob noua instrumenta priuilegiorum; adhuc posset litem mouere ob læsionem claram datam petendo restitutionem in integrum per tot capitula citata: & quando hæc non sufficerent, facile esset impetrare nouum Rescriptum Papæ ad litem mouendam, allegando claram læsionem illatam bonis Conuentus, quæ sunt immediate subiecta ipsi Sedi Apostolicæ, vt iam superius dictum est.

## C A S V S IV.

*De electione cuiusdam Prouincialis, quem  
Præses noluit confirmare.*

**I**N quadam Religione congregato capitulo Prouinciali pro eligendo Prouinciali, antequam inciperent tractare de electione, præses capituli, iuxta legem dictæ Religionis, separauit, & assumpsit tres scrutatores. illosque iuramento exhibitò obligauit, vt seruarent fidelitatem in votis numerandis, ac distribuendis, & vt seruarent secretum. Ingressi electionem, in primo scrutinio,

scrutinio, fuit electus quidam pater per maiorem partem capituli, cum suffragiis sufficientibus, ut posset confirmari. Præses capituli, noluit publicare scrutinium, nec electum confirmare, ductus respectu, quem ille solus nouit. Imò dixit sine publicatione scrutinij, ut procederent ad secundum scrutinium. Facto secundo scrutinio data sunt suffragia alteri differenti à primo, de quo non constat quis fuerit, & an suffragia sufficientia habuerit. Denique præcepit præses ut ad tertium scrutinium procederetur, quo facto suffragata est maior pars capituli alteri Religioso diuerso à primo, & istum ultimo electum confirmauit præses: & est hodie in possessione officij Ille pater, qui primo fuerat vere electus, rem secreto cognoscens, statim appellauit ab electione, & grauamine sibi facto: & obtento recurſu à superiore qui poterat appellationem acceptare, & dare licentiam ad prosequendam litem; mouit litem super iure quod habebat ad primam electionem: & erat res posita in tela iudicij, quando mihi proposita sunt dubia sequentia.

Primum, an illi tres patres, qui fuerunt scrutatores, si fuerint vocati ad dandum testimonium iuridice, possint iurare veritatem rei, sicut gesta fuit, non obstante quod prius iurauerint seruatuſos se esse secretum.

Secundum. An dictus præses capituli posset secundum iura tacere suffragia primi, & secundi scrutinij, non publicando ipsum scrutinium, in quo primus saltem pater erat electus,

Tertium, an pater electus in primo scrutinio, & exclusus, hodie ius habeat ad prosequendam suam electionem, & petendam confirmationem officij ad quod ius acquisierat per primam electionem.

Quartum, si vltima electio, & confirmatio Prouincialis

cialis hodie possidentis fuit valida excluso primo vere electo.

Quintum, si non obstante possessione ultimo electi, eiusque confirmatione, possit amoueri ab officio, & debeat confirmari primus vere electus. Casus est valde difficilis, ut vides, maxime post possessionem adeptam. Pro tenuitate tamē ingenij mei, dicam quod sentio. Si vero dicta à me pro isto casu non inseruierint, poterunt prodesse ad alios similes casus electionum, quotidie in Religionibus contingentes.

*Ad primum quesitum.*

**A**D primum igitur quesitum absque dubio dicendum est quod si tres illi scrutatores producti fuerint in testes, ut deponant de re gesta, possunt, ac debent iurare absque periurio quot suffragia data fuerint illi patri excluso in primo scrutinio: Imo si necessarium fuerit, debent exprimere qualitates illorum, qui suffragati sunt; si ita necessarium fuerit ad bonum, & iustitiam supplicantis exclusi, ut quia conueniat sciri, an pro illo pars sanior fuerit suffragata. Probo primo ex capit. *cum dilectus de electione*, ubi Papa circa querelam sibi factam de quodam Archidiacono electo in Episcopum, dicentibus electoribus se nescire quinam illi suffragia sufficientia dederint ad Episcopatum, iussit ut tres scrutatores scrutinij producantur in testes: & quod, si omnes tres, vel saltem duo iurassent electum habuisse suffragia sufficientia, maneret confirmatus in Episcopatu. Vnde patet posse ac teneri scrutatores iurare de numero suffragantium pro quo suffragia data fuerint, idque non obstante secreto: iā enim in illo capite seruabatur forma capituli

capitis quia propter. de elect. in quo præcipitur vt tres scrutatores seruent secretum. Secundo probatur ex communi Doctorum opinione dicentium, quod iuramentum de seruando secreto non obligat cum præiudicio Tertij. Sic tenet Sanch. 1. *tomo Decalog. lib. 3. cap. 17.* ad finem, vbi citat Godofr. Hostiensem, Ioannem Andr. Syluest. Idem tenet Azor *tom. 1. lib. 1. ca. 8. quest. 6.* dicens esse communem, & ponit aliqua exempla. Sic etiam tenet Sá in *Aphor. ver. Iuramentum num. 23.* at constat, quod in isto iuramento, de quo agitur, seruare secretum vergit in præiudicium Tertij, videlicet illius patris primo electi, & exclusi: seruato enim ibi secreto amittet ius ad rem, quod iam habet: ergo non tenentur ibi tres scrutatores seruare secretum: idque maxime verum est cum pro se non habeat alios testes nisi tres illos scrutatores. Tertio, quia sic est diffinitum in cap. *sicut nostris, de iure iuran.* vbi Papa decernit quod iuramentum in præiudicium communitatis, non valet: nec opus est vt sit in præiudicium semper communitatis, sed sufficit quod sit in præiudicium alicuius tertij particularis, sicut ait Azor citato loco, & Reginald. *tom. 2. lib. 18. num. 51.* & ad hoc intentum citatur etiam cap. *quanto de iur. iurand.* Quarto probó, quia hi tres scrutatores non iurarunt se tacituros circa numerum suffragantium in isto casu quando agebatur præiudicium Tertij, imo ratio dictabat hunc casum esse excipiendum: quod confirmo ex forma iuramenti illis exhibita à præside ante primum scrutinium, obligauit enim illos ad seruandam fidelitatem quoad numeranda, & distribuenda suffragia: hoc ergo ad quod faciendum illos obligauit, hoc licite iurare possunt. Secretum enim quod proprie iurarunt se seruaturos fuit, vt non dicerent fullanus dedit votum fullano: ex hoc enim

enim scandala oriri solent , sed non iurarunt se non dicturos quot suffragia data sunt fullano : imo iurarunt oppositum , videlicet se dicturos fideliter quot cuique patri data sint suffragia in quouis scrutinio : & hoc ipsum est quod ab illis hodie petitur , vt testificentur , quot suffragia data sint primo electo in primo scrutinio. Denique pro hoc videndus est Rodriguez *in ordine iudiciario cap. 7. conclus. 11.* vbi citans multos , ait , quod si iudex iuridice testem interroget de aliquo iam diffamato , tenetur iste testis dicere veritatem contra illum diffamatum , etiamsi ille antea iurauerit se illi semper fore secretum seruaturum : quia tunc seruando secretum lædit partem accusantem , quæ amittit ius suum per illam taciturnitatem. Idem tenet Delrio *lib. 5. Magia sess. 5. fol. 318.* ergo cum in hoc casu præses iā sit diffamatus de exclusionem primi illius electi , & talis electus agat de sua læsione , tenentur tres scrutatores veritatem dicere , etiam si iurassent præfidi , se nunquam dicturos quot suffragia data fuerint huic primo electo : quod tamen illi non iurarunt : imo ex vi iuramenti tenebantur primum scrutinium publicare , & dicere quot suffragia illi in eodem primo scrutinio data fuerint.

2 Circa id tamen quod dixi in principio istius numeri , debere etiam tres scrutatores , si opus fuerit , exprimere qualitates illorum , qui pro primo electo suffragia dederunt ; obiciis Concilium Tridentinum *sess. 25. cap. 6. de Regul.* vbi dicit , quod in Regularium electionibus dentur vota secreto , ita vt singulorum eligentium nomina nunquam publicentur : ergo hi tres scrutatores non possunt reuelare qualitates eligentium in primo scrutinio. Respondeo primo , me non dixisse posse reuelari nomina eligentium , sed qualitates : & hæ



hæ qualitates poterunt reuelari in communi dicendo, Sanior pars suffragata fuit pro illo, nomina interim reticendo. Secundo dico, quod si necessitas postulet, possent in hoc casu nomina eligentium reuelari, sine eo quod Concilio contradiceretur, & salua validitate electionis, Probo, quia Tridentinum ibi, eo fine iubet non publicari nomina eligentium: *quo omnia recte, & sine fraude fiant*: ergo cum hic finis Tridentini cesset in hoc casu, in quo electio prima ob fraudem non fuit publicata, & ibi non sit recte factum, iuxta Canones, cessante hoc fine Tridentini, cessat illius dispositio, vt nomina non publicentur: imo oportet vt publicentur, quo omnia recte, & sine fraude fiant: quia publicando nomina, lites, & discordiæ inter Religiosos ortæ cessabunt. Et dispositio Concilij intelligitur quando electio pacifice fit, & sine fraude. Et in consequentia noto, quod licet Præses capituli, post factum primum scrutinium, iuberet ne tres illi scrutatores vnquam reuelarent, quot suffragia data fuerint illi primo patri excluso, adhuc prædicti scrutatores non tenerentur seruare secretum, sed tenerentur dicere veritatem, quia vrgent omnia dicta in num. i. videlicet quia est præiudicium tertij, cum omnibus ibidem dictis.

*Ad secundum quæsitum.*

3 **A**D secundum quæsitum dico, prædictum Præsidem non potuisse tacere suffragia data in primo scrutinio prædicto patri in illo electo: nec poterat procedere ad aliqd scrutinium, vel electionem, sed tenebatur scrutinium, & electionem publicare, & prædictum sic electum confirmare, si alias non erat indignus. Constat hoc clare ex cap. *quia propter. de elect.*

ubi datur forma essentialis procedendi in electione, ubi Papa iubet, vt scrutatores recipientes vota, *Illa in scriptis redacta mox publicent in communi*, & ibidem glos. verb. Mox ait, *Incontinenti nullo actu contrario intermedio*. Et ibidem glossa, verbo, Sanior, ait, quod publicari statim scrutinium est de essentia electionis. Cum ergo sit hoc ius commune, & nullibi reuocatum, prædictus Præses violauit clare ius commune, non publicando statim primum scrutinium, imo interponendo actum contrarium, videlicet secundum, & tertium scrutiniū, per quæ contrariauit primæ electioni. Secundo, si Præses non publicauit primum scrutinium, ex eo quia credidit electum in illo esse indignum, & proinde electio non valeret: dato quod esset indignus, non potuit Præses illum non auditum excludere in silentio: sed debebat scrutinium publicare, & tunc contra electum formare processum, inquirens iuridice de culpis illius, ob quas illum excludebat, & reputabat indignum. Probat, quia est de iure naturali diuino, & humano, vt nemo condemnetur nisi prius audiat, & conuincatur: At excludere aliquem ab officio ad quod est electus, est illum condemnare in re grauissima: ergo non poterit ab illo excludi, nisi prius culpæ probentur, & audiat. Et citatum capitulum *quia propter*, quando iubet vt scrutinium statim publicetur, non excipit, nec distinguit, dummodo per illud scrutinium dignus eligatur: sed absolute, & sine distinctione iubet, vt scrutinium statim publicetur; quando vero lex non distinguit, neque nos debemus distinguere, vt habetur in l. *Non distinguemus ff. de Recept. qui arbit. & 2. quest. 5. cap. Consultuisti*. Si vero in electione contingat eligi indignum, tunc prouidit Ecclesia vt Præses antequam confirmet electum, faciat summariam inquisitionem de

de vita, & sufficientia electi vt constet, si est indignus, vel dignus, in quo Ecclesia satis innuit quod nullus electus possit excludi ab officio in silentio antequam iuridicè probetur indignus. Textus ergo principalis qui iubet, vt præses ante confirmationem faciat inquisitionem de vita, & sufficientia electi est capitulum, *nihil est. de elect.* cum aliis textibus ibidem citatis à glosa verbo, examinet, per quod satis constat velle Papam vt electio statim publicetur siue eligatur dignus, siue indignus: illaque publicata præses examinet an electus sit indignus: non vero vt excludat illum in secreto, illum non audiendo vt se defendat: alias daretur occasio, vt nullus præses confirmaret nisi illum amicum quem vellet: nam electis aliis non amicis, posset dicere scrutatoribus: iste electus non est dignus: non publicemus scrutinium, procedatur ad aliud: quod esset maximum inconueniens & boni communis detrimentum. Tertio facio contra hunc præsidem hoc argumentum. Si excludit illum patrem in silentio eo quod esset indignus: ergo non potuit facere vltimam tertiam electionem istius qui nunc possidet cum istis eisdem electoribus qui elegerant indignum in primo scrutinio: nam ipso facto quod elegerunt indignum in primo scrutinio, iam manserunt priuati iure eligendi pro illa vice, vt expresse definitur in cap. *cum Vintonien. de elect.* vbi eligentes indignum priuantur iure eligendi pro illa vice, & proinde electio vltima facta per hos eosdem electores priuatòs iure eligendi fuit nulla, vt potè facta ab electoribus inhabilibus. Adde quod non est credibile quod primus pater electus in primo scrutinio, fuerit notorie indignus, si quidem fuit electus à maiore parte capituli in concordia: & cum non esset notorie indignus, necesse habuit præses pro-

bare summarie suam indignitatem, vt capitulo satisfaceret, & faceret quod Canones supra citati præcipiunt. Quarto, si iste pater primo electus erat quidem dignus, sed minus dignus alio, qui ibidem dabatur dignior; neque tunc præses poterat illum excludere eo quod esset minus dignus, nam præses electionis tenebatur confirmare electum, quem scit esse minus dignum aliis, dummodò aliàs non sit indignus, sed dignus. Tenebatur expresse Couar. in *Regula* peccatum & Azor *tom. 2. cap. 15. quest. 2.* dicens esse communem, & citans Immol. Francum, qui addunt quid particulare pro hac opinione, quod omitto breuitatis gratia. Et confirmo, quia si præses posset excludere, & non confirmare aliàs dignum electum, sed minus dignum; pateret porta infinitis litibus, ac discordiis in probationibus quis esset magis dignus, vel minus dignus, quas probationes, & lites praxis electionum non admittit.

4 Probatur quinto quod id non potuerit facere præses istius electionis, nam Episcopus tenetur admittere præsentatum sibi à patrono habentem ius præsentandi, nisi Episcopus sciat, & probet, præsentatum esse indignum: & in hoc casu patroni non sufficit quod Episcopus dicat illum esse indignum, sed debet id probare, maxime si patronus instet vt admittat: habetur hoc cap. *Artaldus 8. quest. 3. & 9. quest. 3. cap. Nunc vero.* Quod à fortiori locum habebit in nostro casu, vbi totum capitulum præsentauit præsidi patrem primo electum tanquam dignum, quod capitulum tantorum patrum præsumitur rectius, & sanctius eligere, & præsentare, quam præsentet vnus tantum patronus sæcularis: Ergo prædictus præses non potuit suo tantum arbitrio reiicere hunc patrem in primo scrutinio electum, & præsentatum credens quod esset indignus, vel minus

nus

nus dignus: sed id prius debuit probare, & publicare. Ultimo, vltra alias probationes, quæ possent adduci, videantur Rodriguez *10m. 2. qq. Reg. quest. § 1. art. 12.* per totum, vbi cum multis Doctoribus, & textibus, & rationibus probat efficaciter, quod præses vnius electionis, licet habeat mandatum Regis, non potest iubere in publico ne dent suffragia pro fullano, vel fullano, nisi prius prædicti fullani exclusi fuerint vocatis, auditi, & conuicti de culpis sufficientibus ob quas mereantur priuari voce passiuâ, quam habent in illa electione. Ad quod intentum tria dicit. Primum est, quod vocandi sunt prius illi exclusi, vt respondeant, culpis propter quas illos excludunt. Secundum est, quod capitulares non tenentur obedire censuris positâs à præside contra ordinem iuris proxime positum, de citando prius illo, qui debet excludi. Tertium est, quod electio facta non prius auditis patribus exclusis, est electio nulla, vel saltem esse annullandam tamquam inualidam, si hoc petatur ab interesse habentibus. Vltimo per consequens dicit, quod si capitulares (cessante scandalo) neglecto illo mandato sic indebite excludente prædictos patres, legitime congregati eligant vnum ex illis exclusis absque ordine posito, erit electio valida: Iam enim vocati sunt Canonice, & habent ius eligendi, & eligunt alias secundum formam iuris, illa vero prohibitio, eligatur fullanus, est contra formam iuris. Addit Rodriguez, quod etiam si commissio Papalis huic præsidi concederet, vt suo arbitrio priuaret Religiosos, quos iudicaret priuandos, talis commissio intelligi debet seruato ordine iuris, id est citatis, & audita parte. Pro quo citat l. *si quando Cod. de offic. testam.* & alia. Ex quibus omnibus clare constat prædictum præsidem non potuisse excludere prædictum

patrem in primo scrutinio electum, antequam illum citaret, & audiret ad obiecta respondentem.

*Ad tertium.*

5 **A**D tertium dico, quod iste pater in primo scrutinio electus, sed exclusus, si habuit pro se, ut dicitur maiorem partem suffragiorum habet ius ad proseguendam suam electionem, & petendam collationem officij sibi adempti. Probo, quia electus canonice ante suam confirmationem ex vi solius electionis habet ius ad rem; ut patet: at ius ad rem dat actionem, & ius petendi in iudicio id quod sibi debetur ratione iuris ad rem. Plenus est titulus de electione, & in decretalibus, & in 6. mille exemplis ibi positis multorum prosequentium appellationum ad Papam eo quod dicebant habere se ius ad tale officium propter suffragia sibi in electionibus collata, vel in materia beneficiorum circa quæ dicebant se ius habere: & quia res notissima est, & quotidie practicata, unam vel alteram tantum probationem adducam. Quod ergo electus ante confirmationem ex vi solius electionis habeat ius ad rem, & ad petendam collationem officij, probatur per extrauagantem communem quæ incipit *Sedes Apostolica*, ubi ait Papa, quod qui expectat beneficium, habet ius ad rem: & hoc ergo à fortiori dicendum erit de illo, qui est canonice electus ad beneficium. Est etiam communis opinio doctorum, maxime Azorij tom. 2. lib. 6. cap. 14. Et probatur ex definitione Actionis: Nam secundum doctores communiter teste Comitolo tract. de contract. in genere 2. parte cap. 27. num. 7. Actio est potestas obtinendi ab altero quod de iure debet, quocumque iure illud debeatur: & sic actio,

actio, seu ius agendi in iudicio, fundatur in obligatione, quam alius habet, vt mihi aliquid det. Electus ergo ante confirmationem habet actionem in iure, siue potestatem petendi in iudicio, quod sibi debetur ex titulo electionis canonicæ, quia ibi iam datur obligatio ex parte præsidis, vt illum confirmet alias idoneum, ex vi iustitiæ distributiua. Et confirmatur, quia ius canonicum aliquando concedit electo, vt ante confirmationem administret aliquas res Ecclesiæ, vt patet in cap. *indemnitasibus de elect. in 6. §. verum si: & cap. Nihil est de elect.* quod bene probat electum ante confirmationem habere iam ius ad rem, si quidem illi conceditur administratio aliqua quasi possessori.

*Ad quartum.*

6 **A**D quartum dubium dico, quod vltima electio vltimi patris, qui hodie est in possessione officij Prouincialatus, fuit electio nulla ipso facto, vel saltem annullanda per iudicem superiorem, si constiterit quod electus in primo scrutinio, & exclusus habuit maiorem partem capituli pro se suffragantis. Probo primo, quia in vltima electione non est seruata forma capituli, quia *propter. de elect.* in quo assignatur forma essentialis seruanda in electionibus. Quod vero in vltima hac electione non fuerit seruata forma in illo cap. tradita, patet primo, quia non fuit publicatum primum scrutinium, sicut ibi textus mandat; imo processum fuit ad actum contrarium, id est ad secundam, & tertiam electionem contrarias primæ. Secundo, quia vltima electio fuit facta non cassata prima electione, id est, non iudicata prima pro nulla, cuius oppositum ibi Papa decernit. Tertio, quia ibi Papa postquam di-

xit quod mox publicentur vota, subiungit: vt illi, qui fecus fecerint priuentur ea vice potestate eligendi. Vnde colligitur, quod vbi primum scrutinium non fuit publicatum, contra illum textum, electores, vel saltem scrutatores isti erant priuati, vel priuandi suffragio pro illa vice, & sic vltima electio videtur nulla, vel annullanda. Adde quod post primam electionem canonice factam, non potuit procedi ad aliam, nisi prius prima electio declararetur nulla, vt statim dicam. Et præterea Suarez in *tom. de Legibus. lib. 5. c. 31. & 32.* tenet cum opinione communi, quod quando in actu non seruatur forma essentialis à iure assignata, actus non valet, vt multis ibidem probat: at forma tradita in illo capite *quia propter*, & in hoc casu non seruata, est forma essentialis electionum, vt in citato capite ait glossa *verb. sanior*: ergo ista vltima electio fuit nulla ob tot defectus contra citatam formam essentialem electionum in dicto cap. *quia propter*. Secundo principaliter probo nullitatem vltimæ electionis, argumento iam supra tacto: nam si Præses istum patrem primo electum exclusit tanquam indignum, iam isti electores erant inhabiles ad eligendum in vltima electione, eo quod eligentes indignum in prima, priuati sunt suffragio, iuxta citatum capitulum *cum Vintoniensis*. & proinde vltima electio facta est per inhabiles ad eligendum, & ex consequenti est nulla, vel annullanda. Tertio, quia in vltima electione in qua fuit electus pater, qui hodie est in possessione, defuit consensus liber electorum: At electio sine consensu libero electorum, est nulla, vt patet, ergo vltima electio fuit nulla. Minor, & consequentia patent. Probatur maior, quod scilicet in tertia electione defuerit consensus liber electorum, idque ex duobus principiis.

Primum



Primum est, quoniam in tertia electione interuenit dolus vt patet, & simul interuenit error: Dolus quidē ex parte Præsidi, qui non publicando primum scrutinium voluit intelligi non esse factam electionem, in quo datus est dolus ipsius, & scrutatorum: Interuenit etiam error ex parte electorum, qui crediderunt non esse factam validam, vt mox dicam. Et prius probare interuenisse dolum, quia dolus definitur esse executionem solertiæ, dicendo, vel faciendo aliquid, vt aliquis decipiatur. Sic definit Reginaldus ex Doctoribus communiter, *tom. 2. lib. 25. num. 117.* quod in isto casu contigit: nam Præsides, & scrutatores facto primo scrutinio, eoque non publicato, significarunt electionem non esse factam, quo electores possent procedere ad secundam electionem, & proinde dolo decepti sunt. Quod vero consensus dolo extortus nullus sit, est communis sententia Doctorum, maxime D. Thomæ 1. 2. *quest. 6. art. 8.* de quo Sanchez 1. *lib. de matrim. disput. 64. num. 9.* citans multos textus, & Doctores. Dolus autem in hoc casu fuit antecedens, & dedit causam vltimæ electioni: nam si electores scirent esse iam factam validam electionem in primo scrutinio, nullo modo procederent ad tertium: ergo in vltima electione interuenit dolus tollens liberum consensum, & proinde fuit nulla. Quod vero etiam intercesserit error in tertia electione, probō, quia error datur quando quis putat vnum pro alio, vt habetur in Extrauag. *quia quorundam.* Ioann. XXII. *de verb. significat. paulo post initium,* cum glossa ibidem, *verb. Errauisse.* Hi autem electores in vltima electione cogitauerunt vnum pro alio, videlicet putauerunt non esse factam validam electionem in primo scrutinio, cum tamen valide facta esset, & aliter se habebat quam quod illi putabant: er-

go interuenit error ex parte electorum causatus à Pre-  
fide, & scrutatoribus: & Doctores communiter dicunt,  
quod error causatur à dolo. Quod autem error tollat  
consensum liberum, quando dolus, & error est antece-  
dens, & dat causam actui, est communis opinio, quam  
recitat Sanchez *lib. 7. de matrim. disp. 18. num. 4.* & alio-  
rum, qui agunt de impedimento erroris dirimente  
matrimonium. Et probatur, quia errans non consentit,  
*ff. de iudiciis. l. Consensisse. Et de iurisdict. omnium iud. l. si*  
*per errorem, & per alia quæ citat glossa in Extrauag.*  
*quia nonnunquam. de verb. signific. Ioan XXII. & in dict. l.*  
Si per errorem, dicitur, quod habens errorem, non ha-  
bet potestatem liberam, ut libere dicatur agere. At ele-  
ctores isti in vltima electione nesciebant bene esse  
electum hunc patrem in primo scrutinio, ergo non  
habuerunt liberam potestatem ut libere agerent, vel  
ut libere eligerent. Vide etiam glossam in cap. *statutum*  
*de prebend. & dignit. in 6. ver. Numerandum*, ubi ad hoc  
congrue loquitur. Adde exemplum communiter re-  
ceptum, quod faciens professionem cum impedimen-  
to annullatiuo professionis, si impedimentum ignorat,  
& postea illud sciens non profitetur denuo, non valet  
professio, ut omnes fatentur, idque ex defectu con-  
sensus liberi nati ab errore. Et possent alia exempla  
tradi.

7 Probatur tertio principaliter, quod vltima electio  
fuerit nulla: nam vltima electio fuit facta post primam,  
non cassata eadem prima electione, sed talis electio in  
iure non valet, debet enim prius iudicari de prima,  
quam procedatur ad secundam, debetque cassari pri-  
ma per iudicem cum prolatione sententiæ, cap. *cum*  
*Vintoniensis, de elect. & gloss. in Extrauag. commun. de*  
*offic. delegati, cap. Sedes Apostolica. ver. Executores, in me-*  
*dio*

*dio gloss.* vbi dicitur, quod quando prima electio fuit nulla, & causa nullitatis est notoria, tunc posset fieri secunda electio non cassata prima, videlicet per sententiam. Et citat ad hoc cap. *Auditio. de elect.* Ergo à contrario sensu, cum iste pater primo electus, & exclusus, non esset notorie indignus, illius electio non erat notorie nulla, ac proinde illius electione non cassata per sententiam, non potuit procedi ad aliam electionem, quia electores non poterant recedere à primo electo sine iusta causa, quæ hic data non fuit. Facit pro hoc etiam cap. *in causis. de elect.* & cap. *inter canonicos.* & alia quæ citat gloss. in cap. *cum non ignores. de prebend. & dignit. ver.* consenserint. & *ver.* Cum res esset integra: vbi dicit quod capitulum non poterat reuocare consensum datum in vna electione: & citat ad hoc *Regul. iuris in 6.* dicentem: quod semel placuit, amplius displicere non potest. Cum ergo prima electio de patre excluso non fuerit nulla, vt supponimus, neque cassata per sententiam, sequitur, quod vltima electio facta post primam non valuit: & hoc maxime cum iste pater exclusus statim appellauerit cognito errore, & ante confirmationem vltimi. Nam electio facta post appellationem non valet, vt passim dicitur in iure: tum quia impedito, qualis est ignorans, non currit tempus, & iuxta textus supra citatos, is qui nescit, non habet potestatem liberam agendi, vt inter alios tradit Sanchez *lib. 7. de Matrim. disp. 37. à num. 19.* cum multis aliis quæ ibi citat, & tradit ad præsens intentum.

8 Secunda pars istius conclusionis, quod scilicet si ista electio non est ipso iure nulla, est saltem annullanda per iudicem, est de mente Rodrig. *supra citat. art. 1 2.*  
9. Ad tertium. vbi ait quod electio facta exclusi illo modo

modo à nobis supra explicato, est annullanda à iudice, & in hoc casu currit eadem omnino ratio. Secundo probo à simili: nam si vnus elector contemptus, & non vocatus ad electionem, potest illam facere annullari, ex eo tantum, quia sine culpa priuatus est voce actiua, vt habetur cap. *In Genesi. de elect. ad fin.* & glossa cap. *quia propter. de elect.* à fortiori poterit hic pater primo electus, & exclusus, & contemptus agere, vt electio vltima annulletur, cum sibi sit ademptum ius ad rem ex suffragiis sibi datis à maiori parte capituli, & sit priuatus hoc iure sine aliqua culpa sibi obiecta: maius enim ius habuit iste pater ad officium sibi iniuste denegatum, quam habet simplex elector, vt vocetur ad electionem. Et probatur adhuc ex cap. *Dilectus de electione*, vbi quidam electus iam confirmatus, iubetur ab officio deiici si inueniatur defectum intercessisse in electione: & iubetur electio annullari inuento tali defectu, quod scilicet non habuerit suffragia sufficientia in electione: at multo maior videtur ratio, vt electio ista vltima irriteretur, si constet quod primo electus habuit suffragia sufficientia, & quod datus sit dolus, & error in vltima electione: & quod non sit publicatum primum scrutinium, quæ sunt nullitates claræ contra tot textus supra citatos.

*Ad quintum dubium.*

- 9 **A**D quintum dubium, dico, quod officium Prouincialatus debet restitui illi patri qui primo fuit electus, & exclusus, si habuit pro se in primo scrutinio suffragia maioris partis capituli. Hæc satis probata manet supradictis: si enim in vltima electione non est seruatus ordo iuris: si item defuit consensus

sensus electorum propter dolum, & errorem; si factum præiudicium patri primo electo, & excluso habenti ius ad rem, & ille appellauit, & denuo instat prosequendo ius suum, vrgent hæc omnia, vt ostensa nullitate vltimæ electionis restituatur primo electo id quod sibi contra ius ademptum est. Neq; obstat quod vltimus electus habeat iam possessionem, vt illa non debeat spoliari: non obstat, quia iniusta possessio non est possessio, vt habetur 14. *quest. 5. cap. quid dicam*. Vbi in fine dicitur. *Omne quod male possidetur alienum est*. At vero pater vltimo electus male possidet, ob tot prædicta, ac proinde possidet alienum, & proinde restituendum. Adde quod ista possessio non fuit pacifica, si quidem statim appellatum fuit ante illam, vel statim post illam. Vide quod Doctores tradunt de possessore malæ fidei, quæ applicari possunt ad hunc casum. Secundo principaliter probatur ex multis exemplis cõtentis in iure canonico, titulo *de electione in decretalibus*, & in 6. vbi Papa iubet aliquos deici ab officio iam obtento per confirmationem superioris, idque ob defectum præcedentem in asscutione illius officij. Sufficiat tria capitula iuris ad hoc citare. Primum est capitulum *quod sicut de elect.* Vbi Papa iubet auferri officium à iam confirmato per superiorem, si præcessit defectus. Secundum sit, capitulum *cum dilectus de elect. citatum num. 8.* proxime præcedente. Tertium sit capitulum *cum inter canonicos. de elect.* in quibus omnibus electio iam confirmata retractari præcipitur, cum confirmati iam essent in quasi possessione, dummodo probaretur quod præcesserit causa nullitatis sufficiens ad illam annullandam. Cum ergo in hoc casu tot causæ nullitatem inducentes visæ, & probatæ sint, videtur quod possit, ac debeat vltima electio declarari nulla: eaque  
 sic

sic declarata, & iniusto possessore amoto, restituendus sit primo electus, cui iniuste officium debitum fuit ademptum.

## C A S U S V.

*De quadam præcedentia inter duos  
graues Religiosos.*

**A**Ntequam hunc casum proponam, & propter alios similes de eadem materia infra proponendos pro sæcularium hæc forte legentium monitione præmitto, non debere sæculares scandalizari, si videant Religiosos agere lites super præcedentijs quoad locum, honorem, & similia. Non enim hoc est signum vel nota ambitionis, si recte, ac debite prætendatur, cum omnes Religiones pro remuneratione obsequiorum, senectutis, litteraturæ, & similibus assignare soleant certis patribus certa loca, præminentias, & honores. Habent in hoc fundamentum sumptum ex D. Paulo, qui ad Rom. 12. consulit. *Honore inuicem præuenientes.* Et Ecclesia Catholica in celebratione Conciliorum habet designata loca, & assignatum ordinem, iuxta quem Cardinales, Episcopi, & Abbates sedere debent iuxta suas qualitates, & antiquitates, ut in particulari deciditur in *Capitul. vlt. 17. distinct. & cap. Episcoporum. 74. dist. & plura Zerola 1. par. sue praxis Eccl. ver. Concilium. §. Ad quartum. & 2. par. eiusd. praxis. ver. Sedere.* Et alij Doctores multa dicunt collecta ex iure: & praxis Ecclesiæ obseruat quod in pictura Cœnæ Domini Nostri Iesu Christi ab vno latere immediate

diate Christi ponitur D. Petrus, ab altero D. Ioannes Euangelista, vt digniores. Deinde alij suo ordine, vltimo Iudas.

Hoc posito, in quadam Religione in celebratione Capituli, quidam Religiosus grauis habens merita vt posset esse Prouincialis ( vocemus hunc claritatis gratia Petrum) certo respectu ductus, cessit iuri quod habebat, vt pro illo in illo Capitulo suffragia darentur, vnde resultauit magna pax, & quies Capituli. Præsides Capituli renunciationem, vel cessionem talem nimium æstimans, & gratificare volens, huic Petro statim concessit certum priuilegium, quod vocatur in illo Ordine, Patris prouinciæ, quod priuilegium habet præcedentiam quoad locum, & alia: & istud priuilegium habent etiam in illo Ordine patres illi, qui fuerunt Prouinciales: hac lege, vt illi Patres prouinciæ inter se ipsos seruent etiam, & habeant hanc præcedentiam iuxta suam antiquitatem à die qua fuerunt electi in Prouinciales. In eodem Capitulo Prouinciali electus est Ioannes in Prouincialem, quo officio expleto post tres annos, mansit cum priuilegio Patris prouinciæ, sicut cæteri. Petrus qui fuerat factus Pater prouinciæ ex priuilegio, confirmauit illud per Collectorem Apostolicum istius Regni, per quod illi concessit, vt prædicto priuilegio gauderet in omnibus, & per omnia sicut cæteri Patres qui fuerunt veri Prouinciales. Expleto triennio prouincialatus Ioannis, Petrus allegauit quod deberet in loco, & cæteris præ eminentiis præcedere Ioannem, eo quod Pater prouinciæ factus, & declaratus fuerit de consensu Capituli antequam Ioannes eligeretur in Prouincialem, & sic esset Pater prouinciæ antiquior Ioanne.

1. Quæsitum fuit an prædictus Petrus factus Pater prouin-

prouinciæ per priuilegium Prælati Ordinis, & postea confirmatum per Collectorem Apostolicum Regni, ac denique confirmatum postea per Romanum Pontificem, debeat præcedere in loco, & cæteris ipsi Ioanni, qui fuit reuera Prouincialis, & prouincialatu expleto, manet Pater prouinciæ. Et declaratur, quod licet prædictus Petrus fuerit nominatus, & acceptatus ut Pater prouinciæ tempore quo cessit prætentioni prouincialatus, nihilominus non statim ibi fuit confirmatus in hoc priuilegio, sed fuit confirmatus in illo aliquot post dies, postquam Ioannes est electus, & confirmatus in officio Prouincialis.

2 Pro responsione præmitto primo, necessarium fuisse mihi ostendi formam confirmationis Nuncij, & Papæ, quæ illi Petro confirmarunt priuilegium datum à Prælato Ordinis ut esset Pater prouinciæ; quæ quoniam mihi ostensa non est, dicam quod sentio ex confirmatione communi & ordinaria, & habendo respectum ad legem Pontificiam unde manauit priuilegium Patris prouinciæ in eadem Religione.

3 Præmitto secundo, quod Dominus Papa Paulus V. per Bullam propriam citatam in statutis generalibus Ordinis Minorum conditis in Capitulo generali Tolletano anno 1606. concessit Papa, ut patres, qui in Ordine P. N. Francisci sancti fuerunt officio Prouincialis, essent perpetui Diffinitores, & haberent votum decisiuum, & consultiuum in omnibus Capitulis, & congregationibus suæ prouinciæ. Excipit tamen Papa in illa Bulla quod patres qui per Prælatos Ordinis haberent priuilegium ut essent Patres prouinciæ, non haberent tale votum in diffinitorio sicut Diffinitores, sed solum illis valeret dictum priuilegium quoad locum, & præcedentiam. Secundo excipit ibi Papa, quod  
qui



qui fuerint Prouinciales in alia prouincia aliena , & finito officio redierint ad suam prouinciam, ibi non habeant votum in diffinitorio , nec sint Diffinitores , sed solum habeant locum quoad præcedentiam , & habeant vltimum locum inter illos qui fuerunt Prouinciales in eadem prouincia. Et antequam hoc dicat de patribus , qui fuerunt Prouinciales in alia prouincia, dicit Papa: *Et hoc ipsum, quod scilicet facti Patres prouinciae per priuilegium, solum habeant precedentiae priuilegium, &c.* Et declaratur, quod quando Nuncius & Papa confirmarunt Petro priuilegium Patris prouinciæ , addiderunt vt tali priuilegio gauderet , non solum quoad locum, & honoré sed etiam quoad dandum suffragium in diffinitorio , ac si verus antea fuisset Prouincialis.

4 His positis, videtur quod Ioannes finito officio Prouincialis, in priuilegio patris prouinciæ, debet præcedere Petrum. Primo, quia est antiquior, nam in hoc Ordine, vt dictum est, Patres prouinciæ se inuicem præcedunt, habito respectu ad diem suæ electionis in Prouincialem, ita vt qui prior fuit Prouincialis, præcedat alium Patrem prouinciæ, qui postea functus est eodem officio: & hoc est consonum decreto capituli vltimi citati 17. dist. vbi dicitur quod conciliares sedeat secundum tempus ordinationis suæ: At Ioannes prius fuit electus Prouincialis, quam Petrus: imo Petrus nunquam fuit Prouincialis: ergo non debet præcedere Ioannem antiquiorem in prouincialatu. Neque obstat quod Petrus prius fuerit nominatus, & acceptatus Pater prouinciæ à Capitulo, quam Ioannes eligere:ur Prouincialis: Nam confirmatio Ioannis in illo priuilegio per Papam, vt haberet etiam suffragium, ac si fuisset Prouincialis; hæc inquam confirmatio facta est multo tempore postquam Ioannes fuit

electus Prouincialis: priuilegium vero illud Petri non obtinuit robur nisi à die quo fuit confirmatum, & ad-  
auctum à Summ. Pontifice: Ad eum modum, quo ele-  
ctus ad aliquod officium, vel beneficium, non gaudet  
priuilegio præcedentiæ illi officio annexæ, quoad vs-  
que in illo confirmetur, & illud possideat. Secundo,  
quia mens Papæ confirmantis debet explicari, & apta-  
ri intentioni Papæ Pauli V. qui primo concessit hoc  
priuilegium isti Ordini: At Paulus V. in citata Bulla  
dicit, quod patres qui per priuilegium Superiorum fa-  
cti fuerunt Patres prouinciæ solum id habent quoad  
honorem; & secundum morem prouinciæ hi nun-  
quam præcesserunt illos qui fuerunt veri Prouincia-  
les: & præterea ibidem Papa iubet, vt qui vere fuit  
Prouincialis in alia prouincia, rediens ad suam sedeat  
in vltimo loco Patrum prouinciæ: ergo non erit mens  
Papæ confirmantis, quod Petrus qui nunquam fuit  
Prouincialis præcedat in loco Ioannem, qui prius ve-  
re fuit Prouincialis, quam ille foret confirmatus pa-  
ter prouinciæ. Et quod priuilegium non valeat quoad  
præcedentiam nisi à die confirmationis priuilegij, pro-  
batur exemplo Ordinis Minorum, & Prædicatorum:  
constat enim quod pater noster Franciscus prius adi-  
nit Papam pro Ordine suo approbando, priusque ap-  
probationem Ordinis obtinuit ore tenus quam B. pa-  
ter Dominicus: & tamen Ordo prædicatorum in loco  
præcedit Ordinem Minorum, quia B. Dominicus prius  
obtinuit scripto confirmationem sui Ordinis, quam  
pater Franciscus obtineret confirmationem sui: & sic  
inter illos duos Ordines computatur antiquitas à die  
confirmationis, non à die approbationis, vel accepta-  
tionis; & hoc quod dixi de his duobus Ordinibus con-  
stat ex historiis veris, & ab omnibus receptis.

§ Nihil

5 Nihilominus sentio Petrum debere præcedere Ioannem, & Petrum anteponendum illi. Totum fundamentum meum est, quia in materia patris prouinciæ Petrus est antiquior Ioanne: quamuis enim Ioannes prius fuerit electus Prouincialis, quam Petrus esset confirmatus pater prouinciæ, non valet consequentia: ergo Ioannes est antiquior pater prouinciæ: aliud enim est esse Prouincialem, aliud esse patrem prouinciæ. Nam Prouincialis dum est Prouincialis, non est pater prouinciæ. Vis ergo istius argumenti in eo posita est, quod Petrus non gaudet priuilegio patris prouinciæ ex eo quod fuerit Prouincialis, sed ex priuilegio Papæ, quod vocatur priuilegium adinstar, per quod Papa illi concessit priuilegium patris prouinciæ adinstar prouincialium præteritorum: quod priuilegium adinstar continet omnem fauorem, & gratiam formaliter contentam in priuilegio exemplari, vt ego dixi *1. tom. Dubior. regul. ver. priuilegium. num. 15*. Vnde concluditur clare, quod istud priuilegium Petri non est computandum à die quo fuit electus in prouincialem, ( cum talis non fuerit ) sed est computandum à die quo Papa confirmauit, & dedit illi priuilegium adinstar prouincialium. At constat quod Papa dedit illi hoc priuilegium adinstar, antequam Ioannes esset pater prouinciæ: non enim fuit Ioannes pater prouinciæ nisi finito prouincialatu, & ante finitum prouincialatum iam Petrus erat pater prouinciæ per priuilegium adinstar, & ex consequenti Petrus est antiquior in priuilegio patris prouinciæ quam Ioannes. Et confirmatur, seu declaratur: nam si Petrus esset computandus pater prouinciæ à die quo fuisset electus prouincialis, seu quod antiquitas illius priuilegij esset computanda à die quo fuit electus prouincialis, cum is talis nun-

quam fuerit, sequeretur quod nunquam is posset per illud priuilegium præcedere alios patres prouinciæ futuros, ac proinde illius priuilegium foret fere inutile, quod non est admittendum. Hoc ergo est quod illi concessit Papa per priuilegium ad instar, vt à die confirmationis sui priuilegij, per quod gaudet honore, præcedentia, & suffragio, sit numeranda antiquitas sui priuilegij, cum tale priuilegium ortum sit à Papa, independenter ab officio prouincialis præteriti.

6 Et per hæc non solum confirmatur nostra opinio, sed etiam soluuntur argumenta in contrarium adducta. Primum enim fundatur in praxi prouinciæ, vel ordinis, per quam praxim patres prouinciæ se præcedunt adinuicem, habito respectu à die, quo fuerunt electi prouinciales: Ad hoc autem iam respondimus, antiquitatem priuilegij Petri non esse computandam à die qua fuit prouincialis, sed à die confirmationis prædicti priuilegij: potuit enim Papa hoc facere, & se ita velle facere tacto declarauit. Et per hoc soluitur duplex probatio, seu exemplum in oppositum, quo dicebatur priuilegium præcedentiæ non valere nisi à die confirmationis: Respondemus enim, quod illud sic factum est in hoc casu: nam Petrus prius obtinuit confirmationem sui priuilegij patris prouinciæ, quam Ioannes fuerit pater prouinciæ: licet enim Ioannes prius fuerit prouincialis, non tamen fuit prius pater prouinciæ quam Petrus, vt clare ostendimus. Ad secundum argumentum dicendum est, Papam confirmatorem huius priuilegij Petri, satis declarasse mentem suam cum dixit se concedere vt haberet priuilegium quoad honorem, præcedentiam, & suffragium, sicut si esset, ac fuerit prouincialis illius prouinciæ. Cumque Papa id posset, (non enim ligatur Papa posterior legibus antecessoris)

cessoris) id Papa posterior declarauerit, & voluerit, cessat omnis coniectura posita in secundo argumento.

7 Obiicis Nauarrum *in tom. de consiliis lib 1. sit. de maioris. & obediens. consil. unico.* dicere, & probare, quod inter dignitates eiusdem Ordinis præcedit illa quæ est maioris loci: ponit exemplum Nauar. quia Cardinalis presbyter præcedit Cardinalem diaconum. Facit etiam quod tradit Riccius in suis *collectionibus Decisionum. tomo 2. decis. 1446.* vbi dicit ac probat, quod maioritas dignitatis præfertur prioritati temporis: & addit, quod constitutus in maiori dignitate etiam si fuerit tempore posterior, præfertur primo. Cum ergo dignitates hæ patris prouinciæ in Petro, & Ioanne sint eiusdem ordinis, vt patet; sequitur quod præferenda est ista dignitas in Ioanne, qui habuit maiorem locum. id est, officium prouincialis, quod Petrus non habuit, quantumcumque Petrus prius fuerit confirmatus pater prouinciæ quam Ioannes. Respondeo nihil facere contra nos dictum Nauarri, & Riccij: nam ambo innuunt clare, inter duos habentes dignitatem eiusdem ordinis, præferendum esse illum qui actu, & in præsentis habet maiorem locum ratione alterius dignitatis actu annexæ. Quod clare patet in exemplo Nauarri: nam Cardinalis presbyter actu, & in præsentis habet presbyteratum, qui est altior, & maioris loci quam diaconatus alterius Cardinalis. Idem dicit Riccius, cum ait constitutum in maiori dignitate actu, & de præsentis, præferendum esse illi, qui est prior tempore: at in nostro casu, Ioannes licet olim fuerit prouincialis, & maioris loci, hodie tamen actu, ac de præsentis nihil habet maius, nihilve maioris loci, vel dignitatis habet quam Petrus: si enim est pater prouinciæ cum honore, præcedentia, & suffragio, idem omnino habet Petrus, &

æqualiter, per priuilegium adinstar; cumque quoad hoc sint æquales, & alias Petrus sit antiquior in priuilegio patris prouinciæ, præferendus erit Ioanni non habenti vltra Petrum aliquem maiorem locum de facto,

## C A S V S VI.

### *De alia præcedentia inter duos Religiosos.*

**I**N ordine Patris nostri Francisci, maxime in prouinciis Hispaniæ, datur officium cuidam Religioso, qui dicitur Commissarius curiæ, cui incumbit in Curia Regia v g. Olyssipone agere negotia quæ Religio, vel sua prouincia habet à Rege pendentia: dantur huic Religioso aliqua priuilegia in gratificationem sui laboris Et præcipue in curia Regia Madriti, vbi residet Rex, assistit principaliter Commissarius illius curiæ, pro cuius officio, & priuilegiis extat particulare statutum, de Commissario in curia Regia residente, de quo statim dicam. Dantur etiam in aliis Hispaniæ prouinciis lectores Theologi primarij, qui suis gaudent priuilegiis: sed ille Commissarius principalis curiæ, vbi residet persona Regis, gaudet maioribus priuilegiis, quam lectores Theologi primarij. Et prædictus Commissarius in curia Regis expedit & tractat omnia negotia ordinis ad Regem pertinentia: cæteri vero Commissarij curiæ nationales, vt sic dicam, solum tractant negotia suæ prouinciæ à Rege pendentia, vt Olyssiponis, Hispalis, & similia.

2 Hoc posito, datur statutum apud Minoritas, sub hoc

hōc titulo. *De Commissario in curia Regis Catholici residente* Et huic Commissario, de quo tractat ille titulus; multa disponens statutum sub eodem titulo, ad finem; sic illi Commissario concēdit: *Ut dum actum munus suum exequuntur in suis provinciis ad capitulum voce actiua; & passiua gaudeant; habeantque confessum etiam in aliis provinciis, immediate post eos qui diffinitores fuerunt.* In quibus verbis eos præfert etiam lectoribus iubilatis, quia in sua provincia habent locum sessionis post diffinitores. Quo supposito, commissarij curiæ particulares; Olyssiponenses, vel similes; vbi residet tribunal Regium, & forma pallatij, prætendunt se proximè posito priuilegio gaudere, & sic in certa provincia debere se præcedere lectores Theologiæ primarios. Quæritur an ita fieri debeat?

3 Et pro parte affirmatiua probatur; quod isti Commissarij curiæ particulares, & nationales gaudeant illo priuilegio; & proinde præcedere debeant lectores primarios Theologiæ. Probatur primo, quia in citatis proximè verbis statutum loquitur verbis generalibus; dicens, *conceditur Commissariis curia*, in plurali scilicet. Cum ergo lex non distinguat; & verba sint generalia; & Commissarij curiæ particulares, vt Olyssiponenses; dicantur Commissarij curiæ simpliciter, & absolute; & communiter; prædictum statutum complectitur etiam hos Commissarios curiæ nationales, & particulares, & proinde præcedunt lectores Theologos suæ provincie; sicut ibidem illis conceditur. Et confirmatur, quia Reuerendissimus pater Generalis in quodam Capitulo provinciali, rogatus in suo cubiculo, vbinam sedere deberet Commissarius Curie particularis, & Olyssiponensis, respondit quod immediate post lectores iubilatos; qui locus per eadem statuta assignatus est lecto-

ri primario : & sic pater Generalis suo responſo dixit præferendum eſſe Commiſſarium curiæ nationalem lectori Theologo primario, & ſic pro tunc factum eſt. At declaratio legis facta à ſupremo Principe habet vim legis, quia Principis eſt ſuam legem declarare, *l. olim, Cod. de leg.* Cum ergo per iſtam declarationem Commiſſarius iſte curiæ locum habeat poſt lectores iubilatos immediate, clare præfertur lectori primario, de quo eſt quæſtio, qui per ſtatutum locum habet poſt lectores iubilatos. Secundo probatur per conſuetudinem, quæ facit legem : nam in aliquibus, vel aliqua prouincia, iſte Commiſſarius curiæ ſedet priori loco, quam lector primarius, vt ſuppono fieri in facto in prouincia principali huius Regni : & ex conſequenti ſic debet fieri in aliis prouinciis minoribus eiſdem Regni. Et confirmatur, quia in hac eadem prouincia, in qua eſt mota iſta quæſtio, oſtenditur conſeſſio ſcripta cuiuſdam iubilati lectoris, in qua fidem facit, quod cum eſſet lector primarius Theologiæ, Commiſſarius curiæ ſibi præferebatur, quoad locum per ſex annos. Idem affirmant per aliud ſcriptum duo Commiſſarii curiæ præteriti immediate ante, qui affirmant ſe quoad locum præceſſiſſe lectores primarios Theologiæ in eodem Conuentu. Quæ omnia videntur facere conſuetudinem præſcriptam, vt Commiſſarius curiæ præcedat lectorem primarium Theologiæ. Tertio probatur hoc ipſum, quia Commiſſarius curiæ in hac prouincia habet votum in capitulo, quod non habet lector primarius Theologiæ : quod ſignum clarum eſt velle ordinem, vel prouinciam anteponeſe Commiſſarium cuius quoad locum lectori Theologo primario : ac prout Commiſſarius prædictus, ſicut præcedit lectorem primarium Theologum in dando ſuffragio, ſic illum præcedet



præcedet in loci sessione, & aliis præeminentiis.

4 His omnibus non obstantibus, dico Commissarium curiæ nationalem. & particularem in hoc regno, & prouincia, non esse præferendum in loco lectori primario non iubilato. Probo imprimis hoc argumento à partium enumeratione : nam per quinque titulos poterat Commissarius curiæ præcedere lectorem primum. Primo per statutum generale citatum. Secundo per aliquod statutum particulare prouinciæ. Tertio, per consuetudinem prouinciæ. Quarto, per concessionem patentem alicuius prælati Generalis. Quinto, per aliquem textum iuris canonici ; neque vlla potest alia cogitari causa, vel titulus vnde possideat : sed ex nullo titulo horum quinque illi competit, vt præcedat lectorem primum Theologiæ : ergo illi non debet præponi. Probo conclusionem per singulas partes, ex quo manebit sufficienter impugnata contraria opinio.

5 Et imprimis quod ista præcedentia illi non competat per aliquod statutum generale : probo, quia statutum generale supra citatum *num. 2.* (neque est aliud ad rem clarius) non concedit prædictam præcedentiā nisi Commissario principali curiæ, qui residet Madriti, vbi residet persona Regis, non vero aliis Commissariis nationalibus. Probo hoc euidenter : primo ex titulo præfixo illi statuto, qui dicit sic. *De Commissario curiæ in curia Regis Catholici residente.* Et sub hoc titulo procedit statutum loquens in singulari de illo qui residet in curia Regis Madriti : maxime §. 1. 2. & 3. Ergo de hoc tantum Commissario curiæ vbi residet persona Regis debet intelligi statutum quod habeat votum in capitulo, & præcedentiam loci ante lectores etiam iubilatos. Probo consequentiam, quia vt ostendunt Iurista, contenta in vno textu, vel capitulo, intelligenda;

& regulanda sunt iuxta titulum, vel rubricam affixam illi capitulo; sic docet & probat Sanch. *lib. 7. de matrim. disp. 13. maxime num. 4.* ubi docet, quod ubi textus est dubius, rubrica, seu titulus probat qualiter sit intelligendus, & citat Euerardum, qui citat multa. At titulus istius statuti loquitur tantum in singulari de Commissario curiæ residente in curia ubi residet persona Regis; ergo contenta in hoc statuto solum competunt illi Commissario, qui residet in curia Regis, & proinde non possunt applicari cæteris commissariis curiæ particularibus residentibus in aliis tribunalibus ubi non residet persona Regis. Secundo probo euidenter, quia in eodem statuto §. penultimo conceditur prædicto Commissario residenti in curia Regis, ut possit socios duos habere, & sic de facto habet: & in §. ultimo illis conceditur quod habeant prædictam præcedentiam quoad locum ante electores iubilatos, tamen sua prouincia, quam in alienis prouinciis dum ibi fuerint commorati; hæc autem duo, ut habeant duos socios, & ut in alienis etiam prouinciis ipsi præcedant electores iubilatos nunquam concessum est, neque practicum in commissariis curiæ particularibus, & nationalibus: quod signum euidentissimum est, prædictum statutum non loqui de Commissariis curiæ particularibus residentibus extra curiam Madritti. Et quando daretur aliud statutum generale Ordinis circa hanc materiam, est reuocatum per eadem statuta generalia Segouientia, ut patet ex eisdem Segouientibus in fine *tit. de constitut. §.* atque adeo.

6 Dices, quod illud priuilegium concessum Commissario curiæ Madritti debet communicari, & extendi ad commissarios curiæ particulares & nationales, in quibus militat eadem ratio, & proinde in illis erit eadem

dem iuris dispositio, iuxta cap. *dudum*. 20. *de elect.* Respondeo, nullo modo esse licitum extendere hoc priuilegium ad alias personas propter similitudinem rationis: sic docet, & probat fuse Suar. *tom. de legibus. lib. 8. cap. 28. à num. 11.* vbi citat multos textus, & Doctores, dicens esse communem opinionem Iuristarum: Doctores vero ibi citati sunt Bartolus, Cardin. Bero. Bald. vbi alia dicit ad hoc spectantia, quod scilicet priuilegium non debet extendi ad similes personas propter identitatem rationis. Adde quod magna est diuersitas in commissario curiæ Madritti, & alios nationales: hi enim personæ Regis non assistunt, nec tot negotiis fatigantur, vt debeant in priuilegio æquari illi residenti in curia Regis. Adde quod ista extensio priuilegij illius primi commissarij ad alios commissarios curiæ particulares, esset extensio facta cum præiudicio tertij, idest lectorum iubilatorum, quos commissarij curiæ particulares per hanc extensionem debent antecedere, at extensio priuilegij cum præiudicio tertij non est permittenda, cum neque princeps concedere soleat priuilegium cum præiudicio tertij, vt communis opinio testatur. Imo priuilegium concessum cum præiudicio tertij est restringendum, vt Doctores affirmant, maxime Suarez *cit. cap. 28. num. 10.*

7 Prædictus commissarius curiæ istius prouinciæ non habet illam præcedentiam loci contra lectorem primarium, per aliquod statutum particulare prouinciæ, factum rite in capitulo prouinciali per discretorium capitularium congregatorum, & confirmatum in Diffinitorio. Quod si est, illud ostendant. Non ergo commissarius curiæ, de quo agitur, habet hanc præcedentiam contra primarium lectorem ex statuto, generali, vel Prouinciali.

8 Non habet hoc priuilegium ex consuetudine prouinciæ præscripta: Nam vt infra dicetur in solutione secundi argumenti contrarij, instrumenta, quæ pro parte contraria præsentat non probant dari de hoc consuetudinem præscriptam, sed solum dant testimonium à tempore paruo, & moderno, quod non sufficit ad faciendam consuetudinem præscriptam, vt infra latius probatur. Imo probatur clare consuetudo prouinciæ, vt lectores primarij Theologi præcedant in loco, & honore huiusmodi commissarios curiæ, probatur hæc consuetudo per scripturam firmatam a patre Prouinciali istius prouinciæ pro tunc existente, & duobus patribus, qui fuerunt Prouinciales, & tunc diffinitores erant: & quatuor diffinitoribus, qui omnes testimonium perhibent in hac prouincia fuisse semper consuetudinem, vt electores Theologi præcederent commissarium curiæ: Nullum verò testimonium, circa consuetudinem prouinciæ potest desiderari quod sit validius isto, in quo testificantur prælatus actualis, & duo prælati præteriti, & seniores, videlicet diffinitores prouinciæ. Testimonium vero quod in oppositum offertur, præterquam quod testificatur à paruo tempore versus hoc nostrum, est testimonium vnius, vel alterius tantum, non iuratum, non iuridicum, cui proinde standum non est, contradicente altero testimonio grauium Doëtorum patrum.

9 Quarto, non habet prædictus commissarius curiæ hanc præcedentiam contra lectorem primarium ex aliqua concessione patenti alicuius prælati generalis: quod si habet, exhibeat, & respondebitur illi. Imò in prouincia est quidam pater, qui cum esset prouincialis, scripto per epistolam consuluit Reuerend. P. Generalem de hac materia circa præcedentiam inter com-  
missa-

missarium istum curiæ, & primum lectorem Theologum. Cui Reuerendissimus respondit, vt in hac materia seruaretur consuetudo prouinciæ: neque aliud per scriptum voluit respondere.

10 Probo quinto, quod neque ius canonicum, neque ciuile faueant isti præcedentiæ commissarij curiæ contra lectorem primum: imo ostendo quod vtrunque ius, saltem indirecte illi resistat. Et imprimis probo cõsonantius esse iuri communi, quod lector Theologiæ primum præcedat commissarium curiæ, (non existente lege in oppositum, sicut non existit.) Probo inquam primo, quia in cap. *cum dilectus. de elect.* innuente Papa quod digniores in Ecclesia debent præferri, glossa super verbo digniores, ait, quod dignioribus dignior locus debetur; citat cap. *illud 8. quest. 1.* & explicans glossa, *qui sint digniores*, citat l. *Cod. de offic. Mag. l.* *Nemo*, in qua dicitur: *Quod is gradus ceteros antecedit, quem labor prolixior, vel stipendia meliora fecerint antecire.* Hæc sunt quæ decernit ius canonicum, & ciuile. Nunc videatur, & examinetur, quis in prouincia maiorem laborem sustineat, & meliora stipendia, seu obsequia Ordini exhibeat? an commissarius curiæ, qui nullum laborem molestum patitur, vt experientia docet, & alijs quibus emolumentis corporalibus fulcitur, vt experientia testatur: an vero lector Theologus, qui nocte & die lectioni, ac molesto studio incumbit, & caret omnibus illis commodis, quibus commissarius curiæ abundat? Et quod attinet ad obsequia meliora præstita ab vtroque ratione materiæ, seu operis cui vterque incumbit, lector Theologus tractat, & versat quotidie, & singulis horis sacram scripturam, Sanctorum Patrum lectionem, & similia, commissarius curiæ occupatur in rerum temporalium negotiatione, quæ

quamuis

quamuis etiam sint necessariae pro sustentatione corporum, excedit tamen officium lectoris ratione occupationis, fere sicut officium Mariæ fuit antepositum officio Marthæ. Certe Pater noster Beatus Frācis-  
cus in suo testamento de Theologis sic mandauit. Et omnes Theologos, & qui ministrant nobis sanctissima verba diuina debemus honorare, & venerari, sicut eos qui ministrant nobis spiritum & vitam. Sic ille. Si autem ille hanc venerationem exhibendam censuit Theologis ordinariis, maiorem vtique censeret, exhibendam Magistris Theologorum. Si vero idem Pater noster Franciscus rogaretur de officio commissarij curiæ, non dubito fuisse responsurum nolle se vt tale esset in ordine officium, prout sua erat rerum temporarium abdicatio, & contemptus.

10 Ex duobus textibus hucusque explicatis colligitur, causam præcipuam ob quam principes possint ac debeant priuilegium aliquibus personis concedere, esse, si multum laborauerint, & Reipublicæ obsequia præstiterint; quæ causa mouit multos Summos Pontifices ad concedenda multa priuilegia Religionibus: qualis inter alios fuit Pius V. in ea sua Bulla, quæ incipit: *Et si mendicantium*, in cuius præmio præmittens causam ob quam ordinibus Mendicantibus multa ibi priuilegia illis concedit, hanc esse ait, *Sedulum in Ecclesia Dei quotidie non cessant exhibere famulatum*. Cum ergo lector Theologus in Ecclesia Dei maiorem, ac meliorem famulatum exhibeat, videtur quod maiori priuilegio decorandus sit. Aliud motiuum adhuc occurrit vt lector Theologus magis honorandus sit, videlicet quia in Religione antiquius officiū est lectoris Theologi, quam Commissarij curiæ; probatur hoc ex cap. *cum in tua. de consuetudine in 6.* vbi Papa ait in textu, quod

quod vacante aliqua præbenda, possint antiquiores Canonici illam eligere & acceptare: vbi glossa *verbo* Antiquiores, ait quod isti antiquiores sunt non ætate, sed tempore quo in Ecclesia militauerint, & citat ibi glossa ad hoc alios textus. At constat quod in Religione antiquius officium est lector Theologus, quam Commissarius curiæ. Nam lectores Theologi à principio Ordinis cæperunt, vtpote Sanctus Antonius de Padua, D Bonauentura, & ceteri semper subsequentes: officium vero commissarij curiæ nuper incæpit. Itaque iuxta ius canonicum, & ciuile, lector Theologus habet pro se tria ista motiua, propter quæ præferri debeat, videlicet: habere officium magis honorabile, & plus laboriosum, & antiquius quam sit officium commissarij curiæ.

II Ultimo probo quod etiam per nostra statuta generalia lector Theologus præcedere debeat Commissarium curiæ quoad consessum, seu locum. Et primo videatur statutum generale Segouienſe, in titulo *De precedentia*, vbi assignantur loca sessionis, quæ quisque Religiosus habere debet in sua prouincia. Vbi postquam assignat locum Prouincialibus actualibus, & illis qui fuerunt Prouinciales, ac Diffinitores in §. *Deinde sedebit*. ait, quod post lectores iubilatos, sedebit primus lector sacre Theologiæ, alij autem lectores, &c. Itaque iubet, vt post Diffinitores sedeant statim lectores iubilati, & hos proxime sequatur lector primarius Theologiæ: De Commissario aytem curiæ, nec verbum facit, neque illi locum assignat in toto illo titulo *De precedentia*: & bene non erat capitulum generale esse multos Commissarios curiæ nationales in prouincijs Hispaniæ, & nulli eorum locum sessionis assignat. Quod si dicas eis in quauis prouincia locum non assignasse,

gnasse, eo quod iam assignauerat in alio titulo particulari, *De commissario curiæ residente*, &c. de quo iam supra egimus. Dico iam supra manere hoc punctum abunde discussum, & probatum quod in illo statuto, non comprehenduntur Commissarij curiæ particulares, sed solus ille principalis qui residet in curia in qua residet persona Regis.

12 Pro solutione argumentorum in principio adductorum pro parte contraria, suppono primo ex Suar. *tom. de legibus lib. 6. cap. 1.* quod triplex est declaratio alicuius legis. Prima authentica: secunda vsualis: tertia doctrinalis. Authentica est quæ fit ab ipso legislatore, qui condidit legem, ut dicitur in l. vltima, *C. de leg. vbi ait Imperator*, quod declarare legem pertinet tantum ad conditorem legis: & hæc prima declaratio dicitur authentica, quia facta per ipsum legislatorem, habet vim legis pro futuro tempore, quod non habet secunda, neque tertia declaratio, de quibus statim dico. Secunda declaratio legis dicitur vsualis, & est illa, quam vsus & consuetudo introducit in obseruatione legis, iuxta cap. *cum dilectis. de consuetudine.* & iuxta dictum commune, quod consuetudo est optima legum interpretres. Tertia declaratio legis dicitur doctrinalis, & est illa, quam varij Doctores afferunt in suis libris pro intelligenda aliqua lege iuxta proprium intellectum ipsius explicantis.

13 Secundo suppono, quod circa vim, quam habet consuetudo ad faciendam legem, dicunt textus & Doctores multa & varia: ex quibus selectiora in summa colligens, dico sequentia, quæ magis faciunt ad intentum. primum est, quod vt consuetudo obliget, & habeat vim legis, debet habere ad minus decem annos sine interruptione. Suarez *tom. de legibus lib. 7. cap. 1. §. a nem.*



à num. 4. citans Mol. & alios, & vt isti decem anni dicantur sine interruptione, tenet idem Suarez eodem lib. cap. 11. num. 4. in medio. Debet etiam hæc consuetudo esse præscripta, teste Suarez loco proxime citato, & Lessio lib. 2. de iust. cap. 6. dub. 14. §. Nec obstat. Vbi ait, quod vt consuetudo sit præscripta, requiritur vt detur bona fides in subditis: & ad hanc bonam fidem requiritur possessio pacifica sine lite: sic enim petit ratio præscriptionis, vt Doctores tradunt communiter. Secundum est, quod per legem vniuersalem latam pro tota Ecclesia non derogantur consuetudines particulares prouinciarum, nisi lex illud exprimat. Suarez lib. 7. de leg. cap. 10. à num. 9. & communis Doctorum; & habetur in cap. 1. de constit. Tertium, licet vna consuetudo antiqua possit derogari per aliam consuetudinem contrariam posteriorem, ad hoc tamen requiritur, vt subsequens consuetudo contraria sit præscripta modo proxime exposito in prima conditione: & præterea non sufficiunt vnus, vel plures actus contrarij, sed requiritur quod sit præscripta, vel sufficiens ad reuocandam legem: glossa 2. in l. Nemo 166. ff. Regul. iur. Hostiens. & Rochus, quos citat, & sequitur Suarez citato cap. 20. num. 20. Quartum est, quod licet aliqua consuetudo nõ sit præscripta tempore debito, si tamen est consuetudo rationabilis, non tollitur per legem generalem publicatam si non exprimat derogationem consuetudinum. Suarez citato cap. 20. à num. 11. maxime num. 12. in fine; & assignat rationem, quia populus habet quoddam ius, vt non cogatur mutare talem consuetudinem; cui non videtur derogare princeps, nisi illud exprimat: & hoc colligitur ex cap. 1. de constit.

*Solutio argumentorum, quæ posita sunt  
in principio.*

14 **A**D primum igitur argumentum in opposi-  
tum, quatenus ait statutum generale Segor-  
niense citatum, dare commissariis curiæ particulari-  
bus, & nationalibus præcedentiam illam, de qua agit  
prædictum statutum, negandum est hoc illis ibidem  
concedi ut satis clare, & efficaciter probatum manet  
in præcedentibus: sed solum illa præcedentia conce-  
ditur commissario curiæ Regiæ, in qua residet perso-  
na Regis. Quatenus vero secunda pars argumenti ait  
sic declarasse R. P. Generalem intelligendum esse præ-  
dictum statutum. Respondeo per sequentes solutio-  
nes. Prima est, quod illa sua declaratio non fuit au-  
thentica, ut faciat legem iuxta dicta *num. 12*. Nam de-  
claratio quæ debet habere vim legis debet fieri ab  
ipso conditore legis, ut ibi diximus: at solus P. Ge-  
neralis non fuit conditor illius statuti, sed totum capitu-  
lum generale cum ipso P. Generali, solus enim P. Ge-  
neralis non potest condere statutum, sed poterit fa-  
cere mandatum suo tantum tempore duraturum: Opor-  
tuit ergo si prædicta declaratio habitura esset vim le-  
gis, ut fieret à capitulo generali cum ipso Patre Gene-  
rali, quia ex capitulo generali cum ipso Patre Genera-  
li conflatur vnus legislator, qui possit condere legem,  
& illam declarare authenticè. Secunda solutio est,  
quod quando prædictus R. P. Generalis declarauit  
prædictum statutum dans præcedentiam allegatam à  
commissario curiæ, R. P. Generalis nesciebat quod in  
prouincia esset contraria consuetudo, sicut de facto  
fuisse ostenditur per testificationem tantorum patrum  
Prouincialium, ac Diffinitorum prouinciæ, de quo su-  
pra.

pra. Quam consuetudinem si R. P. sciret, omnino talem præcedentiam non concederet, vt credendum est de sua rectitudine, & integritate, maxime cum idem R. P. Generalis, ante, vel postea scripserit ad Prouincialem de eadem materia consulentem, vt in hoc, prouinciæ consuetudo seruaretur, vt supra dictum fuit. Tertia solutio est, quod quando R. P. Generalis locum illum concessit dicto commissario curiæ, id fecit ore tenus in suo cubiculo, & poterat non aduertere quod statutum generale Segouiæ titulo *de præcedentia* supra citato assignat locum lectori primario Theologiæ statim post lectores iubilatos: si enim hoc aduerteret, non daret talem locum commissario curiæ, cum idem numero locus dari non possit duobus: neque credendum sit voluisse P. Generalem locum auferre lectori primario, eidem per generale statutum assignatum, nisi illud vellet facere de potentia absoluta, quod non fecit, neque expressit: & ex consequenti secundum statutum, quod lector primarius sedeat mox post lectores iubilatos, manet in suo vigore, & illæsum. Et quod potuerit P. R. Generalis id non aduertere, non est culpa, vel defectus in illo, nam in cap. *præterea dist.* 23. innōta ibi glossa, dicitur quod Papa Nicolaus dixit, non se recordari, quod aliquis Papa antecessor aliquid decreuerit super certa re, de qua ibi: & tamen glossa ibidem verbo, *Fallat*, dicit quod Papa Leo illius antecessor illud decreuerat: Et non aduertit Pap. Nicol. in lege facta. Et multo minus mirandum est quod R. P. Generalis non aduerterit in statuto secundo facto, de quo agimus; nam si aduerteret non concederet. Quarta solutio est, quod si P. Generalis sciret de consuetudine prouinciæ supra citata, per quam lector primarius præcedit commissarium curiæ, non faceret talem

concessionem, vel declarationem contra consuetudinem præscriptam, & in præiudicium lectoris primarij. Nam vt dixi in præcedentibus neque princeps concedit priuilegiũ cum præiudicio tertij, qui ius iam quæsitum habebat: neque lex vniuersalis promulgata tollit consuetudines, & hic P. R. Generalis, neque promulgauit legem dando pro tũc locum illum commissario, neque expressit se velle derogare consuetudini.

15 Ad secundum argumentum negandum est quod pro commissario curiæ in hac materia sit consuetudo fauorabilis, imo est consuetudo in contrarium, vt patet ex illo testimonio prouincialium, ac diffinitorum prouinciæ, cui potius standum est, quam vni, vel alteri particulari testimonio priuatorum. Præterea vide quæ supra diximus *num.* 13. quot debeant concurrere vt vna consuetudo sit præscripta, & possit aliam consuetudinem tollere: Testimonium enim illud prouincialium, ac diffinitorum testificatur de tempore antiquiore, & de semper quasi: & illa consuetudo, vt lector primarius præferatur commissario curiæ est magis rationabilis, quam opposita, vt probauimus, vnde consuetudo noua tam paucorum aunorum, & minus rationabilis pro commissario curiæ non potest derogare alteri antiquiori, & magis rationabili pro lectore primario. Ad id quod allegatur eodẽ 2. argum. quod in prouincia antiquiore istius regni est consuetudo quod semper commissarius præcessit lectorem primarium quoad locum. Respondeo, transeat; sed illud non concludit ita seruandum esse in ista, & in aliis prouinciis in quibus viget consuetudo contraria. Non enim est obligatio vt consuetudines particulares vnius prouinciæ seruentur in alia, quando de talibus consuetudinibus non datur lex vniuersalis: de quo mille possunt afferri

ferri exempla in variis prouinciis ordinis P. N. Francisci; quarum multæ particulares habent certas consuetudines quæ non seruantur in aliis. Quod confirmatur exemplo Ecclesiæ catholicæ: nam in diuersis reñnis, & prouinciis multæ Ecclesiæ particulares seruæc suas consuetudines, quæ tamen non obligant in aliis Ecclesiis. Et pater R. Generalis vt supra vidimus hac de re consultus respondit vt seruaretur consuetudo istius prouinciæ. Et hoc confirmo ex cap. *scit sancta*, & cap. *Nonit dist.* 12. vbi Papa iubet quod seruetur consuetudo cuiusque Ecclesiæ; & quod non obligat vt consuetudo seruata Romæ obliget in aliis Ecclesiis.

16 Ad tertium argumentum, quidquid sit de antecedente, neganda est consequentia: non enim valet: habet votum in capitulo: ergo præcedit in loco. Non valet, quia vt dicunt Iuristæ, à separatis non fit illatio: sunt autem valde separata, dare suffragium in capitulo, & præcedere in loco. probo euidenter duobus exemplis in eodem Ordine Minorum. Primum est, patres qui fuerunt olim prouinciales non habent hodie votum in capitulo, & tamen quoad locum præcedunt, & præferuntur omnibus, etiam diffinitoribus prouinciæ. Secundum exemplum; Visitatores prouinciarum missi à Prælatiis generalibus, non habent votum in capitulo prouinciali, & tamẽ quoad locum præferuntur omnibus fratribus illius prouinciæ. Sic ergo, licet lector priuatus non habeat votum in capitulo, tamen extra capitulum poterit quoad locum præcedere commissarium curiæ habentem votum in capitulo. Tertium adhuc exemplum sit: quando quis in ordine priuatur voce actiua, & passiuæ manet priuatus voto, vt patet, & tamen non priuatur præcedentiâ loci, vt patet: ac proinde sunt valde separata habere votum in capitulo, &

1 Et quidem, quod oporteat nouum incipere Nouitiatum, tria possunt persuadere: primum est, quia statutum Ordinis Minorum Segouienſe in Latinis *ut. de Nouitiis*, ibi dicit quod annus nouitiatus sit continuus: ait quod si Nouitius ex aliqua causa exeat à Conuentu cum habitu, vel sine illo, non computetur ei tempus nouitiatus; sed illum postea denuo incipiat. Secundo; quia iste Nouitius dimittens habitum Religionis videtur renunciaſſe iuri quod habebat ad nouitiatum, & professionem: fecit enim actum contrarium; & per ſolum factum poſteſt aliquis renunciare, vt omnes Iuristæ admittunt. Tertio, quia Concilium Trid. *ſeſſ. 25. cap. 16. de Regular.* præcipit, vt expleto anno nouitiatus, Nouitij aut admittantur ad professionem, ſi habiles inuenti fuerint, aut expellantur: iſte vero poſt expletum annum cum dimidio quo ſtetit in probatione; non eſt inuentus habilis per informationes: ergo debuit expelli. Si vero fuit expulſus, non poſteſt admitti ad professionem abſque nouo nouitiatu. Et quamuis papa Clemens VIII. teſte Quaranta, *in ſuo Bullario. ver. Monasterium. in ſine ſtatutorum Clement. VIII.* diſpenſauit quod exiſtente cauſa, vel impedimento, poſſent prælati dilatare professionem Nouitij ſex meſes ultra annum nouitiatus, vſque dum ceſſaret impedimentum; iſte Nouitius iam exceſſit ſex meſes ultra annum, & index inferior non poſteſt diſpenſare in termino temporis præfixo à Superiore.

2 His non obſtantibus, ſub cenſura dixi potuiſſe talem Nouitium ſtatim in Portugallia emittere validam professionem ſine nouo anno nouitiatus. Et antequam rationes pro iſta concluſione adducam, do exemplum vnum, quod de facto in præſenti exiſtit in hoc Regno in quodam Conuentu Monialium ſanctæ Clare, in

tum, imo illum continuum peregit, & sex menses ultra continuos. Vnde statutum specificat de Nouitio exeunte in anno nouitiatus, iste autem non exiuit in anno nouitiatus, sed post annum ac dimidium expletum, & continuum, illum nolentem exuerunt habitu Religioso. Neque item obstant verba eiusdem statuti dicentia, quod Nouitius statim finito anno probationis, vel admittatur, vel expellatur: hæc enim sunt verba Concilij Tridentini, & patiuntur suas declarationes, vt iam cepimus dicere *num. 2.* & amplius dicemus in solutione ad tertium argumentum in contrarium.

4 Ad secundum argumentum dico, hunc Nouitium per dimissionem habitus Religiosi factam modo prædicto non renunciaſſe iuri quod habebat ad professionem: non enim habitum dimisit sponte, & voluntarie, neque cum animo renunciandi, sed fecit inuitus ex præcepto prælati, vt patet; vt autem renunciatio valida sit, requiritur omnino quod sit voluntaria, non coacta. Sufficiat vnum capitulum iuris, quod est cap. *super hoc. de renunciat.* vbi papa iubet, quod si inueniatur quendam, de quo ibi, renunciaſſe non sponte, restituatur. Et addit Papa hanc rationem prudentissimam: quia scilicet difficile credi potest aliquem voluntarie renunciare beneficio pingui, anxie acquisito, & vnde pendebat ipsius sustentatio. Quod in hoc Nouitio habet locum: non enim de illo credendum est renunciaſſe voluntarie professioni propter quam seruiuit in nouitiatu integro anno cum dimidio, tolerando labores nouitiatus, & vnde pendebat remedium suæ vitæ spiritualis, & corporalis. Vide gloss. supra citat. proxime cap. vbi multa dicit de renunciatione spontanea, *verb. Resignationis.* Secundo probo exemplo omnino simili: nam quando Clericus per dimissionem habi-

tus clericaliſ, illum ſpontanee dimittit, debent ad hoc  
 duæ conditiones concurrere: prima, quod præcedat  
 trina monitio prælati, ne dimittat, & habitum clerica-  
 lem reſumat, & Clericus non reſumit, vt habetur cap.  
*contingit 2. de ſenien. excomm.* & tenent Doctores com-  
 munitè, maxime Sylu *Excommunicatio 6. num. 6. caſu 3.*  
 Secunda eſt, quod in eo caſu, in quo Clericus amiſit  
 priuilegium clericale ob diſmiſſionem illius, poſtea ſi  
 ſponte ſua habitum clericalem aſſumat, recuperat pri-  
 uilegium clericale ſine noua diſpenſatione. Quæ om-  
 nia licet in diſſimili materia ſint diſpoſita, multum ta-  
 men iuuant ad caſum iſtius Nouitij, qui non ſponte  
 habitum Ordinis dimiſit, nec prælato monenti vt re-  
 aſſumeret, repugnauit, imo inuitus ſuſtinuit quando  
 habitu Nouitij ſpoliatus fuit. Vltimo quod per iſtam  
 diſmiſſionem habitus inuolūtariam, Nouitiuſ iſte non  
 renūciauerit iuri quod habebat ad profeſſionem, fa-  
 ciunt quæ tradit Sanchez *lib. 8. de matrim. diſp. 32. num.*  
*5. & 6.* ubi ait duo præcipua. Primum eſt, quod ille qui  
 primo diſpenſationem aliquam obtinuit, & poſt diſ-  
 penſationis Bullam, ſeu litteras lacerauit cum animo  
 illis non vtendi: non per hoc renunciauit valide diſ-  
 penſationi, & hoc non obſtante illa poſtea vti poterit,  
 ſi voluerit ( excipit ibi materiam voti, vel iuramenti )  
 Secundo dicit Sanchez, quod ſi vir, & fœmina conſan-  
 guinei inter ſe, obtinuerunt diſpenſationem vt matri-  
 monium adinuicem poſſent contrahere, & poſtea qui-  
 uis illorum contraxerunt cum aliis non conſanguineis  
 non vtentes conceſſa diſpenſatione; ſi poſtea cum am-  
 bo hi vidui facti ſunt, voluerint inter ſe contrahere,  
 poterunt id facere vtendo antiqua diſpenſatione, quia  
 per matrimonium priuſ contractum non fecerunt va-  
 lidam renunciationem circa priorem diſpenſationem  
 obten-



obtentam. Quæ etiam valde faciunt pro casu istius nouitij ad probandum non renunciaſſe profeſſioni per diſmiſſionem habitus, maxime inuoluntariam.

§ Nec videtur obſtare ratio adducta in cōtrariū, quia ſcilicet iſte nouitius poſt annum probationis exceſſit ſpatium ſex mēſium, quem terminum temporis Clemens VIII. dicitur aſſignaſſe, vt vltra illum non poſſet profeſſio dilatari: nam imprimis iudex poteſt aliquando prolongare tempus præfixum à lege: maxime quando nulla pœna apponitur tranſgredienti prædictum tempus, vt tenet Bartolus l. 2. num. 4. ff. de ſenten. & re iudicata, teſte Molina lib. 2. de primog. cap. 14. num. 19. & citat Sanch. lib. 2. de matrim. diſp. 24. num. 11. & patet exemplo omnino ſimili. Nam licet cap. Ex publico. de conuerſione coniugat. aſſignet duos meſes, in quibus cōiuges non obligentur conſummare matrimonium, vt in his duobus mēſibus poſſint deliberare de ingreſſu Religionis, nihilominus ille terminus duorum mēſium à papa præfixus, poteſt prolongari à iudice inferiori ex cauſa iuſta, & illis tempus longius dare, vt tradit Sanch. citata diſp. 24. num. 12. citans multos. Eodem ergo modo, licet Papa Clemens VIII. aſſignaue- rit ſolos ſex meſes ad dilatandam profeſſionem poſt annum nouitiatus expleum; hoc non obſtante præ- latus inferior ex iuſta cauſa, & ex tam clara Epicheia, qualis in hoc caſu interuenit, poterat hoc ſpatium ſex mēſium prolongare, quoadvſque ceſſet impedimen- tum informationum in hoc caſu deficientium, attento quod antea fieri non potuerunt, & quod Nouitius an- no integro cum diuidio laudabiliter Ordini inſerui- uit, ſemper aſpirans ad profeſſionem. Secundo probo, quia vt dicunt Iuriſtæ, tempus non currit ignorantibus, vel impeditis, l. 1. in fine. Cod. de annali excep. & tenet

con-

communis, maxime Couarruijas. *in regula possessor. 3. parte. numer. 3. & alij.* At iste Nouitius erat legitime impeditus nec moraliter solum impedimentum informationum tolli poterat via humana ob distantiam regnorum, & viæ maritimæ, difficilisque navigationis: ergo illi sic impedito non currebat spatium sex mensium à Clement. VIII. assignatorum. Et hoc quod legitime impedito non currat tempus præfixum à lege, habetur expresse in iure canonico in casu omnino simili. Habetur casus in cap. *quia diuersitatem. de concess. preb.* in quo decernit papa, quod quidam Archiepiscopus qui existens suspensus ab officio ob culpas, & non prouidit certa beneficia vacantia intra sex menses, si- cut iubet prouideri Concilium Lateranen. ibi citatum, sub pœna quod non prouidens intra sex menses amittat ius illa amplius prouidendi. Respondet papa, quod prædicti sex menses à Concil. Lateranen. assignati non habebant locum in hoc Archiepiscopo, quia cum esset suspensus, erat legitime impeditus ad prouidenda beneficia illa; & sic finito tempore suspensionis poterat illa prouidere, & conferre. In quo capitulo gloss. *verb.* Suspensionis. dicit quod tempus non currit legitime impedito, nisi quando fuerit negligens: & citat textus & ponit exempla. Si ergo ille Archiepiscopus cum esset propter culpas suspensus, erat legitime impeditus, & sex menses assignati à iure illi non nocuerunt quin postea sublato impedimento suspensionis posset recuperare quod suum erat; isti Nouitio impedito ad profitendum, non nocebunt sex menses assignati à Clemente VIII. quin ablato impedimento informationum, possit postea uti iure quod habet ad profitendum. Probat hoc ipsum, quia in multis aliis textibus, & exemplis, si citatus, ut compareat, in tali die non comparuit;

ruit , & post elapsum terminum comparendi, compara-  
ret, & probat se legitime fuisse impeditum, auditur, &  
restituitur , vt inter alia tenet lex *fin. ff. de requirend.  
reis*. Vltimo probatur ex eo quod tradit D. Thom. 1. 2.  
*quæst. 84. & 95. art. 1. ad 3.* & habetur in l. *Pomponius ff.  
de leg. videlicet* , quod lex non datur pro casibus parti-  
cularibus raris, & raro contingentibus, sed pro contin-  
gentibus de ordinario. At iste casus fuit de raro , &  
præter opinionem contingentibus in materia profes-  
sionum, vt patet: ergo in illo non est stādum legi com-  
muni professionum: ac proinde magis in illo standum  
est Epicheiæ, & Æquitati, quam legi, cum causa pia sit  
fauere Nouitio, qui videlicet seruiuit per annum cum  
dimidio , & ad Religionem aspirat : maxime cum ista  
Epicheia fundetur in tot textibus, & rationibus supra  
adductis. Et potest ad hoc videri Naua. *conf. 42. de Reg.*  
vbi refert , quendam Prælatum certæ Religionis mi-  
sisse Nouitium, qui sex tantum mēses probationis ha-  
bebat , vt iret extra conuentum ad certum negotium  
peragendū , cumq; negotij executio dilaretur com-  
moratus est Nouitius extra conuentum per sex men-  
ses cum habitu tamen Religionis: & quia negotium  
non erat conclusum , & Nouitius nollebat illud in-  
completum relinquere , & alias timebat transire an-  
num Nouitiatus , misit procuratorem ad conuentum,  
in quo solum per sex menses fuerat in Nouitiatu , vt  
nomine suo professionem emitteret: & responder Nau-  
arrus fuisse declaratum per congregationem Cardi-  
nalianum prædictum Nouitiatum, & professionem fuis-  
se validam , vt testatur Nauarrus in fine dicti consilij:  
Dixi hunc casum fuisse difficiliorem : Nam ille Noui-  
tius de quo Nauar. fecit professionem in absentia per  
procuratorem , & per sex menses nouitiatus absens  
fuit

fuit à conuentu per quod tēpus non potuit conuentus experiri mores Nouitij; quæ in hoc nostro casu non concurrerunt. Et proinde credo quod idem declaraturi essent Cardinales in hoc nostro casu, si res ad eos delata fuisset.

6 Denique vt nullus hac de re maneat scrupulus, & vt consulatur casibus futuris, videndus est omnino doctissimus Sanchez *tom. 2. Decal. lib. 5. cap. 4.* vbi multa disputat ad hoc spectantia. Duo tantum ibi fufius posita refero. Primum est Nouitiatum ex triplici capite posse esse nullum, & irritum: primo quia non fuit habitus in legitima atate. Secundo, quia fuit factus extra Monasterium, & sine habitu Religionis. Tertio, si non fuit continuus: & ibi simul explicat dubia occurrentia circa hæc tria capita. In hoc vero casu nullus defectus ex illis tribus repertus est, & proinde fuit validus. Secundum quod ait Sanchez *ibidem num. 34.* notatu dignum, est, quod si Nouitius finito anno veri Nouitiatus, exiit ab ordine absque licentia, & paulo post rediens iterum admitteretur à Conuentu, sufficeret præteritus Nouitiatus ad profitendum, dummodo non tanta interpolatio præcesserit vt moraliter loquendo iam conditio personæ, vel status ordinis sit mutatus. Quod similiter in isto casu non interuenit, quia Nouitius nec sponte exiuit, nec mora extra conuentum facta mutauit conditionem personæ, neque statum ordinis.

7 Aduerto vltimo quod quando tot à nobis adductæ probationes non sufficerent, vt talis Nouitius admitteretur ad professionem absque nouo Nouitiatu: saltem sufficient ad probandum euidenter quod Prælati Religionis qui illum habitu priuauit, obligabitur in conscientia illum iterum recipere ad ordinem, &  
nouum

nouum Nouitium, vt eo finito, admittatur ad professionem factis informationibus. Datur enim inter Nouitium, & Conuentum fere contractus, per quem resultat obligatio, vt si finito anno probationis Nouitius reperiatur inculpatus, Conuentus se obligat ad illum non expellendum. Ex parte item Prælati, qui istum Nouitium exclusit fuit non parua culpa, quia in Brasilia poterat informationes facere cum testibus possibilibus ibi repertis, absque eo quod illas facere iuberet in regno Portugalliæ remotissimo: sicut idem Sixt. V. disposuit in sua secunda Bulla circa Nouitios oriundos ex terris longinquis: & hodie in Portugallia recipiuntur Nouitij Angliæ, & Flandriæ, de quibus fiunt informationes solum in Portugallia modo possibili. & non expectatur vt veniant ex Anglia, vel Flandria: cum minus distent à Portugallia, Anglia, & Flandria, quam Brasilia. Culpa etiam fuit eiusdem Prælati Nouitium exuere habitu Religionis, licite enim, & secure poterat illum secum adducere vestitum habitu Religionis, vt patet ex casu supracitato Nauarri.

---

C A S V S VIII.

*De quodam Nouitio recepto ad chorum, seu clericatum: & in professione, est professus ad laicatum, inuitus.*

**I**N ordine quodam in India Orientali, quidam Nouitius recepit habitum cum declaratione, quod futurus erat ad chorum siue clericatum, Toto anno proba-

probationis in hoc statu, & intentione permanſit faciēſ cæremonias cum cæteris Nouitiis receptis ad chorū. Tempore profeſſionis, Goardianus cauſatus quod ille eſſet illiteratus, & inſufficiens ad chorū, dixit illi, quod ſi vellet profiteri ad laicorū ſtatum, illum recipere vellet: ad chorū vero, nolle. Nouitiuſ reclamauit dicens nolle ſe profiteri ad laicatum: & ſtatim veſtes ſuas ſæculares petiit. Volens exire ab ordine: veſtes illi denegatæ ſunt. Tandem metu reuerentiali, & moleſtia preſſuſ, vt Præſlato ſatiſfaceret profeſſionem emiſit, declarante Goardiano quod eſſet futuruſ laicuſ. Ille vero, ante reclamauit, & proteſtatuſ eſt ſe ſuū proſecuturuū. Facta profeſſione, per modū appellationis adiuit prouincialem Indiæ, qui cum diſſinitorio protulit ſententiā quod talis erat profeſſuſ ad ſtatum laicorū. Appellauit ille ad P. Commiſſarium Generalem Hiſpaniæ veniens in Portugalliam, adduxit ſecum teſtimonium quinque fratrum, qui illum examinarunt ante profeſſionem, & iurarunt illum eſſe ſufficientem ad chorū, ſiue ſtatum clericalem, petitionem præſentauit prædicto commiſſario P. Generali, dicens ſe fuiſſe in India profeſſum ad ſtatum laicorū &c. prædictuſ R. P. commiſit caſum prouinciali prouinciæ Portugalliæ, qui in diſſinitorio ſententiā protulit dicens, ſe illum examinaſſe, & inſufficientem reperiſſe ad chorū. Appellauit profeſſuſ, & adiuit R. P. tunc Generalem, qui cauſam commiſit duobuſ aliis Prouincialibuſ Portugalliæ: & in commiſſione ambobuſ facta, dicit ſe illiſ cauſam committere eo quod nondum eſſet deciſa per patrem Commiſſarium Generalem, de cuiuſ foro erat iſte profeſſuſ. Exprefſit etiam dictuſ pater R. Generaliſ in ſua commiſſione, quod ſi conſtaret ex teſtimonio factō, & ſcripto  
in die

in die sue professionis apud Conuentum, quod professus sit ad chorum, ipsi duo prouinciales illum ad statum clericatus restituant &c.

Quæsitum fuit primo, an hi duo vltimi prouinciales, possint de causa cognoscere, supposita falsa narratiua facta P. Generali, in qua dixit P. Generalis attento quod casus decisis non erat per P. commissarium Generalem, cum alias constaret ex commissione illius fuisse iam casum decisum per commissarium prædictum. Secundo quæsitum fuit an prædictus professus receptus prius ad chorum, & postea prædicto modo professus ad laicatum, habeat ius, vt restituiatur ad statum clericatus.

1 Primo, quod duo patres Prouinciales vltimi non possint cognoscere de causa, probatur, quia P. Generalis in sua commissione dicit, ideo se illis causam committere quod nondum esset decisa per P. commissarium Generalem Hispaniæ. Quæ narratio fuit falsa; iam enim casus decisis fuerat à Ministro prouinciali prouinciæ Portugalliæ, ex particulari commissione P. commissarij generalis Hispaniæ: & sic rescriptum P. Generalis datum Romæ, continet narratiuam falsam: & omnis expressio falsi in narratiua vitiat rescriptum, vt communiter Doctores dicunt, de quo multa Sanc. lib. 8. de Matrim. disp. 21. num. 31. Secundo facit contra professum, quod P. Generalis in sua commissione dicit, quod si constiterit ex testimonio sue professionis, quod fuerit professus ad clericatum, restituiatur ad statum clerici, & ex suo processu constat fol. 1. pag. 1. quod ille confessus est se fuisse professum ad laicatum: ergo debet declarari laicus ex vi huius rescripti P. Generalis. Tertio, quia licet inter istum professum, & prouincialem recipientem illum ad chorum præcesserit, qua-

si contractus, ut esset futurus de statu clericorum ordinis, cum tamen ille postea consenserit profiteri ad laicatum, renuntiavit iuri quod habebat ad clericatus statum, & sic non potest conqueri, cum *per regulam iur. in 6.* scienti, & consentienti non fiat iniuria. Quarto quod hodie prædicti duo ultimi patres provinciales non possint cognoscere de causa ex vi illius commissionis P. Generalis videtur probari, quia Prouincialis Indiæ, qui iudicauit illius professionem fuisse ad statum laicorum, debet hodie audiri, quia sua interest defendere causam suam, & assignare causam suæ sententiæ. Quinto facit contra professum, quod prouincialis Indiæ in processu *fol. 6. pag. 2.* vocat illum fratrem laicum, quod clare supponit nouisse prædictum prouincialem illum professum fuisse ad laicatum, & quod eum sua licentia mutatus est de statu chori ad statum laicalem. Sexto facit quod minister prouinciæ Portugalliæ in sua sententia testimonium perhibet, quod ipse illum examinauerit, & ad statum clericalem insufficientem inuenerit. Quamuis ergo in prima receptione ad habitum quasi pactum fuerit, quod futurus esset ad chorum, reperta tamen postea insufficientia, ac defectu illius, potuit Prælatus emendare errorem reddendo illum ad statum laicorum: sicut quando post factum contractum reperitur error, quo antea cognito contrahentes non consentirent: possunt contrahentes recedere à contractu, ut tenet communis opinio in materia de contract. Vltimo confirmatur, quia ut tenet Sanch. *tom. 2. decalogi lib. 6. cap. 7. num. 8.* cum Soto, Azor. Petro Lædes. & Azor ibi citatis, potest Prælatus professum ad chorum mutare ad statum laicalem, si iusta causa interueniat: satis autem iusta causa esse videtur in isto casu insufficientia istius professi ad cho-

rum



rum ratione illiteraturæ, sicut dicitur.

2 Pro resolutione præmitto, quod sicut inter profitentem, & Conuentum acceptantem datur quidam contractus quo se adinuicem obligant professus & conuentus: Ita Nouitium recipi ad chorum, vel ad laicatum, est circumstantia, & fere conditio appositæ prædictæ receptioni, vel professioni, qua non extante receptio ad habitum non fieret. Est autem hæc conditio, vel circumstantia ut sit ad clericatum, vel laicatum, res æstimabilis, & ponderabilis: quod probo ex illis quæ tradidi in meo *tom. 2. dubior. regul. ver. Votum. num. 40.* ex Soto, & Rodrig. ibi citatis, qui dicunt, quod si ego feci votum intrandi Religionem, cum animo expresso, quod essem recipiendus ad chorum, & prælati nolunt me recipere ad chorum nisi ad laicatum, non teneor intrare Religionem. Secundo dicunt ibi citati Doctores, quod si feci votum intrandi Religionem, non exprimens animo an ad chorum, an ad laicatum, & nihilominus scio linguam latinam sufficienter ut possim recipi ad chorum, & tamen prælati nolunt me recipere ad chorum, nisi ad laicatum, non teneor ad votum. Tanti æstimatur circumstantia essendi ad chorum, vel laicatum in receptione ad habitum, vel professionem. Præmitto secundo rem esse certissimam in iure, quod renunciatio facta metu, vel inuoluntaria est nulla, & irrita: omissis multis textibus sufficiat cap. *super hoc. de renunciat.* ubi Papa clare dicit esse nullam renunciationem illam, quæ fit non solum per metum, & vim, sed etiam illam quæ fit præcedente aliqua molestia, & oppressione: & in ista professione de qua agimus ultra metum reuerentialem, præcessit oppressio facta Nouitio, per quam illi innouatum, & immutatum fuit, quod in receptione ad habitum fuit promissum.

furn, quod futurus erat ad chorum; & illi aliàs volenti exire, vestes suæ sæculares denegatæ sunt: quæ satis indicant metum reuerentialem, & oppressionem, molestiamque præcedentem ante professionem.

3 Hoc posito dico: & quod prædictus professus sit restituendus ad statum clericalem, & quod Prouinciales duo vltimi potuerunt de causa cognoscere. Secunda pars istius conclusionis, amplius probabitur ex solutione argumentorum. Prima, quod scilicet debeat restitui ad statum clericalem, probatur ex fundamentis proxime positis *num. 2.* nam ille suscepit habitum cum pacto, & conditione expressa quod esset futurus ad clericatum: Conditio vero appositæ, & acceptata in contractu obligat contrahentes in conscientia, quando conditio non est turpis, neque impossibilis; & præterea, ex parte professi non est inuenta insufficiencia ob quam excludatur à statu clericali, vt dicemus in solutione argumentorum: ergo tenentur prælati ordinis illum restituere ad statum clericalem, ad quem sub pacto expresso receptus fuit. Secundum argumentum, seu fundamentum istius conclusionis est, quod non obstat illum in professione cōsensisse profiteri ad statum laicalem: hic enim consensus fuit coactus, inuoluntarius, & proinde nullus. Primo quia præcessit oppressio, qua illum mutabant de statu clericali ad laicalem. Secundo, quia ob talem molestiam, & oppressionem petiit vestes sæculares, vt rediret ad sæculum, illique denegatæ sunt: quæ clara & manifesta oppressio fuit, imo & violentia. Quæ tria manifeste indicant inuoluntarium consensum, imo & coactum, quo consensit profiteri ad statum laicalem, & proinde talis renunciatio fuit inuoluntaria, coacta, & nulla. Quod maxime confirmatur, quia vt dicitur, ille protestatus fuit, quod  
ius

ius sibi ademptum prosequi debebat, sicut fecit de facto. Tertio potest probari quia iste professus in toto anno probationis fuit quasi in possessione status clericalis, semper enim in choro assistit cum cæteris Nouitiis destinatis ad chorum, & omnes illorum cæremonias, & obsequia præstitit anno integro. Et præterea finito anno probationis quinque Religiosi designati à prælato, illum examinarunt de officio diuino, & de sufficientia ad chorum, & sub iuramento testati sunt illum esse sufficientem ad chorum: quæ omnia constant ex processu per instrumenta fide digna: neque in ordine Minorum fit alia maior diligentia quam ista. Nam paulo ante professionem destinantur à prælato duo Religiosi, qui Nouitium examinent an sciat recitare diuinum officium. Si vero ambo examinatores dicunt esse sufficientem, admittitur statim ad professionem: In hoc vero examinando testificati sunt pro illo quatuor, vel quinque Religiosi iurati, quod esset sufficient. De peritia vero in lingua latina isti examinatores non examinant, quia id facit prius Prouincialis in prima receptione ad habitum. Et Prouincialis in prima receptione ad habitum, de latinitate illum examinans, acquieuit, illumque admisit: unde non potest illum iam ea de causa repellere, ultra alia quæ infra ad hoc intentum dicemus. Adde quod Goardianus, qui admisit professionem, non poterat motu proprio mutare ad laicatum illum quem Prouincialis receperat ad chorum. Non enim potest inferior mutare legem, seu dispositionem superioris, maxime cum præiudicio tertij, ut patet ex cap. *quod super iis. de maior. & obed.* & ex Regula 33. *de reg. iur. in 6.* ubi dicitur, quod nemo potest mutare consilium in detrimentum alterius.

4 Neque obstat, quod patres Prouinciæ Portugalliæ

dixerunt in sua sententia, instrumenta adducta ex India à professò erant magis de mero fauore, quam de iustitia: sunt enim de mera iustitia, & non de fauore. Sunt enim testes iurati, & ratificati cum iuramento coram Prouinciali Indiæ, coram quo testificantes sub iuramento, dixerunt vera esse quæ antea dixerant. Imo testimonium illorum quinque fratrum de examine testificantium, validius est quam testimonium Prouincialis prouinciæ Portugalliæ, dicentis in sententia quod ipse illum examinauerit, & insufficientem reperit: nam illi sunt quinque testes, & Prouincialis vnus testis, & non iuratus: & præterea in rigore iuris testimonium prædicti patris Prouincialis nihil valebat, quia cum esset iudex non poterat esse testis, vt habetur expresse 4. *quæst.* 4. *cap. Nullus.* Neque item obstat quod dicit eadem lata sententia, videlicet ex processu & instrumentis Indiæ constare quod ille professus fuerit ad laicatum. Nam ex scripto professionis posito in libro Conuentus, ad quem solum librum pater Generalis se remittit, non constat quod professus fuerit ad laicatum: sed solum refert quod fuerit professus indistincte. Si vero illi patres id collegerunt ex confessione, quam fecit professus in sua petitione prius coram patre Commissario Generali, talis confessio illi non præiudicat, non enim fuit confessus quod esset professus ad laicatum spontanee & voluntarie, sed narrauit factum sicut gestum fuit. Et ideo dicens in petitione quod fuerit professus ad statum laicalem, intellexit sicut factum fuerat, videlicet inuoluntarie, & præcedente oppressione, & molestia, de quibus supra; & præcedente protestatione de suo iure prosequendo, & quæ omnia clare indicant, confessionem illam positam in petitione, non esse confessionem approbati-

uam,

itam, sed solum narratiuam, & querelantem, quæ proinde illi non nocuit, imò profuit: & hæc patebunt magis ex solutione argumentorum.

§ Ad primum igitur argumentum initio positum dico, potuisse duos ultimos patres Prouinciales cognoscere de causa, non obstante quod in commissione illis facta pater Generalis dixerit. Attento quod patet Commissarius Generalis casum nondum decidit, cuius oppositum iam euenerat, & proinde narratiua fuit falsa. Moueor, quia non omnis narratio falsi vitiat rescriptum, ut tenet Sanchez citata disput. 21. num. 32: cum multis & grauib. Doctoribus, quos citat, & sequitur, qui dicunt, quod tunc solum narratio falsi vitiat rescriptum, quando falsitas pertinet ad causam finalem, non vero si falsitas solum spectat ad causam impulsiuam. Et ex traditis à Sanchez *e ad. disp. num. 8*: hæc clausula, quod non fuerit iudicatum à patre Commissario Generali, fuit causa impulsiva tantum, non vero finalis. Quamuis enim pater Generalis sciret esse iam casum decisum à patre Commissario Generali, non omitteret concedere, licet concederet difficilius; quod est tantum causa impulsiva. Et dico quod patet Generalis non negaret id quod petebatur, etiamsi sciret iudicatum iam à patre Commissario Generali, quia imprimis tenebatur pater Generalis id concedere, cum iste professus ad illum recurreret, quasi per viam appellationis: & tenebatur deferre appellationi iustæ sibi interpositæ à parte appellante à iudicibus deputatis per patrem Commissarium Generali inferiorum. Secundo, pro eadem etiam causa impulsiva, quod scilicet pater Generalis, licet sciret iam rem iudicatum, adhuc tamen concederet recursum, licet difficilius; colligo, seu probo, quia non est credendum de patre

Generali supremo prælato, quod talem recursum negaret venienti ad se subdito per modum appellationis ex tot mille leucis Indiæ Orientalis, & querelam proponenti de oppressione iniusta sibi facta in re graui:& sic falsitas narratiuæ de non esse iudicatum, pertinet ad causam impulsiuam tantū, & non vitiauit rescriptum. Facit etiam ad solutionem argumenti quod tradit Sanchez *cit. disp. num. 42.* quod scilicet quando in scripto numerantur copulatiue multæ causæ concessionis, licet aliquæ sint falsæ, non vitiant concessionem, dummodo sit vera causa illa principalis cui innititur rescriptum, & in ista commissione facta à patre Generali duobus Prouincialibus, causa principalis cui innititur est vera, videlicet iniustitia, & grauamen isti professo exhibitum, & proinde licet aliæ causæ minores fuerint falsæ, vt quod causa nondum fuerit iudicata, non vitiarunt rescriptum, maxime quod in casu, quo causa foret iudicata per Commissarium Generalem poterat professus appellare semper ad Generalem, tanquam ad superiorem, sicut de facto appellauit, si non verbo, saltem facto per arreptionem itineris ad ipsum Generalem, quod est appellare facto, vt suppono esse notum in iure.

6 Ad secundum argumentum dico, quod pater Generalis in sua commissione dicit tantum, quod si constiterit ex libro Conuentus vbi professio scripta fuit, quod fuerit professus ad chorum, restituatur, &c. confessio vero quam fecit professus in sua petitione quod fuerit professus ad laicatum, non est liber scriptus professionis in Conuentu, ad quem pater Generalis se remittit, de qua confessione sibi non præiudicante vide supra *num. 4.* instrumentum ergo, siue testimonium factæ professionis est in processu *fol. 7. par. 1. in fine*, nec expri-

exprimit quod professus fuerit, vel ad chorum, vel ad clericatum: sed solum dicit, quod emisit professionē: quem modum scribendi professionem in libro Conuentus aduerto continere mysterium; cum enim in libro Conuentus soleat exprimi, quod fullanus professus sit ad chorum, vel ad laicatum; de hoc professio in dicto libro professionum nihil est expressum ad quem statum profiteretur, quia nempe viderunt professum antea reclamantem, & protestantem: & proinde cum res esset litigiosa, noluerunt scribentes in libro professionum exprimere ad quem statum professus fuerit: sed rem postea iudicandam reliquerunt. Et quamuis pater Generalis dixerit, quod si constaret professum esse ad chorum ex libro professionum, restitueretur, idque liber professionum non exprimat, id non nocuit professio, cum liber professionum, si non exprimit professum esse ad chorum, saltem non exprimit professum esse ad laicatum: & aliunde constat professum esse ad laicatum inuoluntarie, & coactum, quod ius non intendit tollere pater Generalis.

7 Ad tertium argumentum dico, quod iste professus consentiens profiteri ad laicatum eo modo quo consensit inuitus, & protestatus, non renunciauit iuri quod habebat ad statum clericatus sibi promissum in receptione ad habitum, & per integrum annum nouitiatus acquisitum: nam consensus coactus, non est consensus, & renunciatio inuoluntaria, non est renunciatio, vt patet ex dictis *num. 2.* quibus addo, quod ibi saltem interuenit metus reuerentialis Nouitij erga Prælatum molestantem, & alio modo professionem dare nolentem. Si autem metus solus reuerentialis iuxta multos Doct. potest annullare ipsam professionem, multo magis potuit annullare hanc circumstantiam

professionis ad laicatum scilicet, vel præsbyteratum. Quod autem solus metus reuerentialis possit annullare professionem, dicunt graues Doctores recentiores à me citati in 1. tom. *Dubior. Reg. ver.* professio nulla, toto *num.* 12. & præter illos ibi citatos idem tenent Aloizius Riccius, & doctissimus Sayro citati à Barboza in *Remission. ad Tridentinum* fol. 146. pag. 2. in fine; quibus adde Brunorium in suis locis commun. *verb.* Matrimonium *num.* 4. cum aliis à se ibi citatis. Quod vero adducit idem tertium argumentum ex Regula iuris, quod scienti, & consentienti non fit iniuria, intelligendum est de consentiente liberè, & spontanee non vero de consentiente coactè, & inuoluntariè, ut patet ex dictis *num.* 2. & iste professus, ut constat ex dictis consentit in professione ad laicatum coactus, & inuitus, & proinde eius consensus fuit nullus.

8 Ad quartum dico, quod prouincialis Indiæ iam fuit citatus sufficientissimè: si enim ille iam de causa cognouit, & sententiam tulit, quæ maior citatio necessaria est? Iam enim iste professus coram Prouinciali Indiæ litem mouit, & ipse cum diffinitorio sententiam tulit: & vidit processum, & nihil nouum in contrarium addidit, vel allegauit.

9 Ad quintum argumentum dico, quod non nocet huic professo, quod Prouincialis Indiæ vocet hunc professum fratrem laicum: id enim fecit secutus informationem Goardiani, qui suo arbitrio immutauit statum professi nolens illum admittere ad clericatum eidem professo promissum in prima receptione ad habitum, quæ immutatio non potuit præiudicare professo inuito protestanti, & appellanti: Addo quod dictus prouincialis Indiæ, indebitè vocauit istum professum fratrem laicum, cum ex libro professionis non constet



constet quod fuerit professus ad laicatum, vt dictum est in solutione ad secundum. Et proinde ista vocatio laici posita à prouinciali non præiudicat professio: quia id prouincialis dixit narratiue ex informatione Goardiani sibi exhibita, in quo falli potuit prouincialis. Nam etiam Papa referens factum alienum potest falli, vt constat ex cap. 1. de renunciatione, cum dictis ibidem à Doctoribus: licet non possit falli narrando factum suum proprium, & in hoc semper illi credendum sit. Vide Doctores ad citatum proxime capitulum.

10. Ad sextum dico, non præiudicare isti professo, quod prouincialis Portugalliæ dixerit se illum examinasse, & insufficientem ad chorum reperisse, vide supra dicta *num.* 3. post medium, & *num.* 4. ante medium vbi copiose ad hoc manet responsum. Quibus adde quod examen quinque fratrum circa hunc professum, factum fuit à fratribus conuentus vbi facta est professio: in quos quinque fratres sicut in arbitros compromisit, à sententia vero arbitrorum non potest appellari vt tenet communis sententia: Addo vltimo quod in sufficientia ad chorum datur latitudo maioris, & minoris, nec requiritur quod sit nimis litteratus: pro quo vide Henric. *tom.* 2. *lib.* 10. *cap.* 16. in fine, vbi ait posse Episcopum dare ordines sacros Religioso, qui bene legit latine, & cantat, quamuis sit minus litteratus, & citat alios Doctores in glossa littera V. Et examinatores illi quinque iurant istum habere sufficientiam ad chorum sicut habent aliqui Religiosi in India: In quo verum dicitur. Nam in India sæpius ad habitum recipiuntur grandæui milites, qui pertæsi militiam ad Deum conuertuntur, qui linguam latinam nesciunt, & vix illam bene legunt, quorum ego vidi vnum: &  
tamen

tamen isti recipiuntur ad chorum, vel statum clericalem.

11 Ad vltimum argumentum ex Sanchez dico, quod illius dictum imprimis non facit legem. Secundo exemplum præcipuum quod adducit, est quando professus ad chorum suæ consolationis gratia, libere petit, vt statu clericatus mutetur ad statum laici, quod in hoc casu non concurrit, imo iste professus repugnavit, & reclamauit, vt constat. Secundo, dicit Sanchez id fieri posse ob culpas professi, ob quas potest puniri cum hac mutatione status. Sed neque in hoc nostro casu interuenit culpa professi istius imo neque insufficientia iuxta prædictos quinque testes iuratos. Adde quod Nauarrus ibi citatus à Sanch. tenet id non posse facere Prælatum. Et quidem in ordine P.N. Francisci id nunquam vidi fieri, vt professus ad chorum, etiam ob culpas mutetur ad statum laici, etiam si ille careat omnibus sacris ordinibus. Nam iste, etiam sine Ordine sacro tenetur ex vi regulæ dicere horas canonicas per Breuiarium, & in præcepto Regulæ non potest Prælatum dispensare, ac proinde non poterit de professo ad chorum facere professum laicum deobligatum à dicendo diuino officio per Breuiarium.

In aliis Religionibus consulantur illarum Regulæ, & statuta.

## CASVS IX.

*De quibusdam secularibus, qui Religiosos duas  
ligauerunt, & carcerarunt ex man-  
dato sui gubernatoris  
secularis.*

**G**ubernator cuiusdam Regni vltimarini longe distantis à Portugallia, relidens in quadam vrbe, associatus quibusdam lociis, & Ministris intrauit conuentum quemdam Religiosum: socij ignorabant ad quid ingrederetur. Gubernator sibi obuium Prælatum illius conuentus manu apprehendit, & alium Religiosum, eosque misit deduci ad quandam nauem, ibique sub custodia quasi carceratos custodiri: & declaratur, quod gubernator erat natura sua iracundus, & habebat potestatem condemnandi ad mortem.

Quæsitum fuit primo an isti, qui gubernatorem associarunt, ignorantes illius intentionem, incurrerint aliquam censuram excommunicationis? Et declaratur quod isti primi non concurrerunt actiuo influxu ad illam comprehensionem.

Quæritur de illis, qui iubente gubernatore manus iniecerunt in Religiosos, eosque ad nauem duxerunt, timentes sibi aliàs punitionem à gubernatore infligendam, incurrerint aliquam censuram?

Tertio, an illâ incurrerint illi qui in naui illos quasi carceratos custodiebant quasi in vinculis, qui erant milites subditi gubernatoris?

I Ad primum quæsitum dico primo, illos qui gubernatorem associarunt euntem, & intrantem conuentum

uentum, ignorantes illius propositum, non incurrent aliquam censuram. Constat ex *Regula* 13. de *Reg. iur. in* 6. dicente: ignorantia facti, non iuris excusat. Hi vero associantes ignorantes propositum illius gubernatoris habuerunt ignorantiam facti, ut constat: ergo excusantur a pœna excommunicationis ibi impositæ: & alias comitabantur suum superiorem in re quæ non erat declarata illicita. Maius dubium est, an hi iidem, postquam viderunt gubernatorem apprehendentem, & ligantem Religiosos, publiceque carcerantem, & proinde incurrisse in canonem *Si quis suadente*, tanquam publicum clerici percussorem notorium, an inquam hi post hoc factum notorium incurrerint excommunicationem minorem ob communicationem cum notorio clerici percussore? Credo quod neque hanc incurrerint ob duas causas. Prima est, quia illi associantes, vel erant domestici domus, vel familiares gubernatoris, vel saltem illius subditi eo quod ille in temporalibus erat velut prorox illius regni, ac proinde ratione obedientiæ, & subiectionis poterant cum illo communicare absque incurso censuræ, ut omnes communiter Summistæ docent in materia excommunicationis, quando explicant causas excusantes illos qui communicant cum excommunicato notorio: dum explicant illa priora verba. *Utile, lex, humile*. Secunda causa illos excusans à censura esse potuit timor mali grauis sibi probabiliter euenturi si suum gubernatorem iracundum, & potentem in communicatione vitarent.

2 Ob causam secundam proxime dictam, credo etiam quod illi qui de mandato gubernatoris manus iniecerunt in Religiosos, eosque ad nauim duxerunt; si probabiliter, & vehementer timerent graue damnum

num sibi inde euenturum si non facerent, credo quod non incurrerunt censuram aliquam. Moueor ad hoc credendum, quia censura posita ab Ecclesia est lex positiua, vt patet: qui autem violat legem pure positiuam ob metum cadentem in virum constantem, non peccat, neque incurrit censuram: ergo isti non incurrerunt. Maior & Minor sunt claræ. Consequentia bene deducitur, & supponit quod isti sic ligantes Religiosos ex mandato Gubernatoris habuerint metum cadentem in virum constantem, quod sic probō: nam sciebant Gubernatorem esse iracundum natura sua, videbant etiam illum carcerare Religiosos non subditos: & à fortiori probabiliter timere potuerunt idem facturum Gubernatorem circa sui ipsius subditos, si mandatis illius non paterent, & quod illos carceri manciparet si non obedirent. Quod autem metus carceris sit metus cadens in virum constantem, si immineat à viro potenti, & iracundo: est communis Doctorum, dum explicant causas sufficientes ad incutiendum metum cadentem in virum constantem; quod ex illis colligo, & ex traditis à Sanchez *lib. 4. de matrim. disp. 6. maxime nu. 13.* vbi citans Baldum. Dec. Bero. Sigismundum Bertachinum, dicit, quod licet vir potens, & iracundus non faciat minas, si tamen aliquid præcipit vultu terribili, sufficit ad causandum metum cadentem in virum constantem: multo magis vero præponderat timor carceris, & in Gubernatore iracundo, qui hanc comprehensionem Religiosorum probabiliter debuit præcipere vultu terribili, & iracundo. Et rem compendio resoluens dico, quod metus cadens in virum constantem relinquitur iudicandus iudicis, vel prudentis arbitrio, vt tradit Sanchez *eod. lib. 4. disp. 5. ad initium.* citans multos. Et quod in particulari metus carceris (quem isti

isti timere poterant) sit sufficiens ad cauſandum metum cadentem in virum conſtanti, tenet Sanchez *cit. diſp. 5. num. 9.* citans ad hoc multas leges, & Doctores, quando carcer eſt diuturnus, & atrox: & ſatis timere poterant talem carcerem, & iacturam aliorum bonorum, ſubditi in hoc non parentes Gubernatori iracundo, & carceranti Religioſos non ſubditos.

3 Obiicis contra prædictam Clericus, & perſona Eccleſiaſtica de iure diuino, & naturali eſt exempta à iuriſdictione ſæculari, vt tenet Sotus in *4. diſt. 23. queſt. 2. art. 2. concl. 5.* & probat Comitulus *lib. 1. Reſponſ. Moral. queſt. 93.* citans multos, & multas rationes adducens. Ergo iſti ſæculares ſubditi Gubernatoris, non poterant illi obedire in re, quæ eſt contra ius diuinum naturale, abſque peccato mortali, & proinde abſque incurſione cenſuræ; & id quantumcunque incuteretur metus cadens in virum conſtanti: nam propter euitandum talem metum non licet violare legem naturalem etiam cum peccato veniali, quale eſt mendacium.

4 Ad hanc obiectionem multæ ſunt reſponſiones. Prima eſt Soti, dicentis *cit. loc.* non conſtare expreſſe an Clerici ſint exempti à poteſtate ſæculari, de iure diuino naturali licet ſit ad illud valde conforme. Et Bellarm. *lib. 1. de Clericis. ca. 28. propoſ. 2.* ſolum ait eſſe de iure diuino, quod Clerici ſint exempti à poteſtate ſæculari in cauſis quæ ſunt mere Eccleſiaſticæ, vt ſunt illæ, quæ pendent ex Euangelio, quales ſunt cauſæ Sacramentorum, & ſimiles: innuens quod in aliis non ſunt de iure diuino naturali exempti, & Rodrig. *tom. 3. ſumm. verb. Inmunidad. de la Igleſia. cap. 203. num. 1.* dicit, quod non eſt proprie de iure diuino immunitas Eccleſiæ in teſtamento nouo, & loquitur de Eccleſia

mate-

materiali pro refugio reorum: si vero Ecclesia materialis non sic est de iure diuino exempta, neque erit Clericus de iure diuino naturali exemptus, cum Clericus propter ipsius Ecclesiæ ministerium sit exemptus. Hoc dico de iure diuino proprie loquendo, seu primario: & dato quod sit Clericus exemptus à dicta potestate de iure diuino erit de iure diuino remoto, & non claro, in quo isti vincientes Religiosos ob metum cadentem in virum constantem potuerunt habere ignorantiam, vel excusationem. Addo quod poterant excusari credentes Gubernatorem habere aliquam concessionem Papæ, vel iuris, vt tales Religiosos ob aliqua delicta vinctos mitteret ad suos prælatos superiores. Quod posse facere iudicem secularem, constat exemplo Clerici reperti de nocte, in aliquo delicto, quem iudex sæcularis potest vinctum ducere ad suum Prælatum: & stante dubio an subditus principi teneatur obedire, tenetur obedire, vt omnes communiter dicunt. Secunda solutio est huius obiectionis, quod licet demus personam Clerici de iure diuino naturali esse exemptam à potestate sæculari, in tali casu peccarent isti vincientes Religiosos contra ius illud naturale, sed non incurrerent censuram excommunicationis ab Ecclesia positæ; quia hæc excommunicatio non est de iure naturali, sed de iure positivo Ecclesiæ, quæ non obligat cum tanto periculo, qualis est metus cadens in virum constantem: & sunt diuersæ valde res præceptum diuinum naturale de clerici exemptione, & præceptum Ecclesiæ positum excommunicantis percutientem Clericum. Neque est res noua, vel impossibilis, quod aliquis peccet contra aliquod præceptum naturale, & tamen non incurrat censuram annexam illi peccato per Ecclesiam. Sic docet in terminis Suarez.

*tom. de censuris. disp. 4. sect. 8. num. 19.* dicens, quod si unus actus est prohibitus lege diuina naturali, & simul est prohibitus per Ecclesiam sub excommunicatione; in tali casu ille qui scit casum prohiberi per ius naturale, sed ignorat prohibitionem Ecclesiæ sub censura, si violet tale præceptum, peccabit mortaliter, sed non erit excommunicatus, ob claras rationes quas ibi adducit. Quod exemplum euidenter probat hanc nostram secundam responsionem: quia non minorem vim habet metus cadens in virum constantem ad excusandum à censura Ecclesiæ (qualem metum suppono hos habuisse) quam habeat ignorantia ad excusandum ab eadem censura Ecclesiæ.

§ Ex his patet responsio ad tertium; dico enim neque illos, qui in naui custodierunt Religiosos vinctos, incutisse censuram canonis, propter eundem metum cadentem in virum constantem: Imo addo hos custodes nauis cum maiori probabilitate potuisse sibi timere malum inferendum ab iracundo Governatore, quam alij præcedentes, videlicet manus iniicientes in Religiosos: nam à simili, maior pœna imponitur custodi carceris, qui soluit vinctum positum in carcere per ministros iustitiæ, quam minister iustitiæ, qui non apprehendit delinquentem: ille enim punitur pœna mortis per leges regni, non vero iste secundus. Cum ergo custodes in naui essent sicut custos carceris, maiorem indignationem Governoris iure timere potuerant, si Religiosos soluerent, quam priores qui vinctos illos ad nauem deduxerunt.

§ Post responsiones datas ad singula dubia proposita: nunc pro maiori corroboratione dictorum adduco unum, vel alterum exemplum, & sit primum exemplum Nauarri qui lib. 5. consiliorum tit. de sententia ex-

commu-



*communicationis consilio* 31. dicit Christianos captiuos apud Turcas, qui ibidem Turcarum iussu Triremes fabricant, vel in illis remigant, scientes quod in illis triremibus Turcæ inuadunt, & spoliant, & occidunt Christianos, nihilominus Christianos illa duo facientes non peccare mortaliter, neque incurrere censuram Bullæ cænæ positam contra iuuantes Turcas contra fideles, quia id faciunt propter metum verberum, vel mortis à Turcis inferendorum. Ratio præcipua Nauatri est, quia fabricatio Triremium, vel remigatio in illis non sunt actus intrinsece mali cum possint licite fieri, & cohonestari sine licito: & captiui illa duo facientes faciunt illa ad bonum finem, idest ad euadendam mortem, vel durissima verbera. Non enim tenetur captiuus fabricare, vel remigare ad finem intentum per Turcas. Idem videtur posse applicari ad nostrum casum. Nam apprehendere Religiosos, vel illos custodire in naui non sunt actus intrinsece mali: possent enim aliàs licite fieri, si ex iussu superioris prælati aliquis illos apprehenderet vel custodiret, vt prælati superior ob culpas puniret: Cum ergo hi actus vincendi, & custodiendi Religiosos non sit actus intrinsece malus potuit fieri à prædictis gubernatoris subditis ob finem licitum, & bonum, videlicet ad euadendum malum carceris, & bonorum temporalium iacturam inferendam à gubernatore iracundo illa duo præcipiente: & citat Nauatr. pro se D. Thomam, Innocent. Adrianum. Secundum exemplum sit Cordubæ citati a Sanc.tom. Decal. lib. 1. cap. 7. num. 18. Neque dissentit ibi Sanch. Exemplum vero Cordubæ est in sum. q. 137. dubio 2. vbi dicit Naucleu Cymba transfuchentem duos qui vadunt ad duellum perpetrandum, vel alium tertium interficiendum, non

peccare M. si graue damnum subiturus sit non transuehendo: & potest etiam dari tertium exemplum positum à Sà in *Aphorism.* verbo *peccatum nunt.* 9. non reprobatur à Sanchez citato loco. Exemplum Sà, est; fas esse adinuere scalam furari volenti, dare ensen paranti alium occidere, vel ostendere vbi occidendus existit, quando iusta causa vrget, dummodo causa vrgens sit proportionata his damnis: & alia ibi dicit Sanc. citato *III.* 18. & 19. quæ iuuant ad responsiones datas à nobis. Et in eodem *n.* 18. in medio citat Sanch multos, & graues Doct. Recentiores, qui dicunt, id quod primo diximus ex Nauar. non peccare scilicet Christianos captiuos illa duo supradicta facientes: & licet ibi Sanc. citet Nauarrum pro opinione contraria in *sum. tamen in lib. consiliorum* à me citato in loco, asserit quod ego supra ex illo dixi in primo exemplo.

## C A S V S X.

*De quodam Religioso translato de vno ordine ad alium strictiorem.*

**Q**uidam Religiosus professus in certa Religione approbata petiit licentiam à suo Prælato transseundi ad aliam Religionem clare strictiorem & perfectiorem, sed illam non obtinuit. Ille denegata licentia intrauit ordinem strictiorem, habitumque Nouitatus recepit, ac de præsentis est Nouitius. Prælatus ordinis relictæ accusat, & allegat ad ipsum reuocandum quod sua Religio relictæ gaudet priuilegio cuiusdam tertiæ Religionis, cui tertiæ conceditur ne Religiosi illius

illius possint transire ad aliam Religionem etiam strictiorem nisi prius petita, & obtenta licentia sui Prælati: quo privilegio gaudet illa Religio vnde iste exiuit, per communicationem privilegiorum: & ex consequenti per dictum privilegium voluit illum reuocare, quia licet petierit licentiam, tamen non obtinuit.

Quæsitum est primo, an dictum privilegium concessum illi tertiæ Religioni ad non exeundum nisi prædicto modo, faueat huic Religioni vnde prædictus exiuit sine licentia obtenta, vt possit proinde Religio relicta illum reuocare?

Quæritur, an si, non obstante tali litigio, Nouitius professionem emittat in illa Religionem strictiori, professio teneat ita vt non possit reuocari à prima Religione?

I Ad primum dubium dico, quod Religio illa, quæ communicat in privilegiis cum alia, virtute alicuius privilegij, quod participat, potest agere, ac lites mouere, vel se defendere contra quancunque aliam Religionem. Declaro sic. Concessit Papa privilegium Ordini D. Augustini ad certam materiam: Ordo sancti Francisci per privilegium communicationis participat illud privilegium Ordinis Augustinorum; potest Ordo D. Francisci illo privilegio uti, & virtute illius agere, vel se defendere contra omnes alios Religiosos. Ratio principalis est, quia privilegium quod per communicationem conceditur Religioni D. Francisci, v.g. ita est factum proprium Religionis D. Francisci, ac si eidem primo, & immediatè fuisset concessum. Constat hoc clare ex compendio Mendicantium in *verb.* communicatio privilegiorum §. 12. & 22. & 30. in quibus tres sum. Pontifices concedentes tribus Religionibus, de quibus ibidem, vt communicarent, vel

participarent aliarum Religionum privilegia; subdūt, vt illis priuilegiis vtantur, *ac si ipsis specialiter concessa fuissent*: vel hoc modo: *Velut si prædicto Ordini nominatim concessa fuissent*. Sic etiam sentit Cordub. *Addit. ad compendium* citato verbo pro vt citat Capucin. citato verbo. Tenet idem Rodrig. *tom. 1. qq. 9. § 5. art. 21*. Ratio Cordubæ est fere illa ducta ex compendio: nam Religio habens hoc priuilegium participatum, iam habet illud factum proprium, & ex æquo illud habet ac Religio cui primo fuit concessum: ergo per illud agere poterit contra quancumque aliam Religionem, etiam si sit illa cui primo fuit concessum. Neque hoc est priuilegiatum agere contra pariter priuilegiatum, vt Rodriguez explicat citato *art. & clarius eodem tom. quæst. 10. art. 11.* explicans quid sit priuilegiatum agere contra pariter priuilegiatum. Ex hoc patet responsio clara ad primum quæsitum, ac dicendum quod ista Religio vnde exiit iste pater per priuilegium participatum tertiæ Religionis posse agere contra Religionem quæ illum recipit: & hoc verius erit si prædictum priuilegium ne Religiosus exeat nisi obtenta licentia, imponat censuram aliquam aliàs exeunti, vel Religioni aliàs illum recipienti: vel annullet professionem in ordine ad quem transiuit, dicens quod derogat iuri communi in cap. *licet de Regul.* mox citando. Ac proinde tenor priuilegij inspiciendus est.

2 Tota dubitatio est circa secundum dubium, an videlicet, si iste pater sic translatus non obtenta licentia, durante lite, vel non mota lite professus fuerit in ordine ad quem se transfudit, professio & translatio validæ sint. Ad quod primo respondeo, quod si tenor priuilegij dicat, translati aliàs professionem non obtenta licentia fore nullam: tunc dubium non esse, fore professionem

fessionem nullā, quia Papa potest derogare iuri communi capituli *licet. de Regular.* Et facere ne translatus inhabilem ad profitendum in secunda Religione. Dico 2. quod si Papa in priuilegio imponat censuram transeunti non obtenta licentia, absque dubio illam incurreret transiens non obtenta licentia. Tota dubitatio est, an si priuilegium non annullat professionem transeuntis sine obtenta licentia, sed solum prohibeat sub censura, & nihilominus aliquis transeat non obtenta licentia, & profiteatur in secunda Religione professio, & translatio validæ sint.

3 Nauarrus *tom. de consiliis, tit. de regular. consi. 59. prima impressionis, & 52. impressionis secunda, num. 3.* ad tertiam quaestionem innuit clare, quod prædictus Religiosus si petiit licentiam, etiamsi non obtinuerit, non obstante simili priuilegio in contrarium, posse proficere in ordine ad quem transiit. Idem clarius tenet Azor *tom. 1. lib. 12. cap. 14. quest. 4.* Et rationem assignat, quia tale priuilegium solum conceditur ut constet, quod transitus non fiat temere, vel leuiter. aut cum cœnobij, & ordinis prioris incommodo: Si ergo nihil ex his duobus interueniat, procul dubio translatio erit valida, & proinde professio in secundo ordine valebit. Habet hæc opinio magnum fundamentum in iure: nam in capitulo *licet. de regular.* videtur id definitum, ubi resoluit Papa, quod licet quædam Religiones, de quibus ibi, priuilegium habuerint à Sede Apostolica, ne professus in sua Religione possit transire ad aliam etiam strictiorem, & nihilominus aliquis Religiosus licentiam petierit transeundi ad aliam clare arctiorem, non obstante quod Prælatus licentiam deneget, poterit licite transire. Vbi Papa in medio capituli ponit hæc verba. *Quocirca nōuerim vniuersi, quibus huiusmodi priuile-*

gium est concessum, se ad concedendam licentiam transeundi taliter postulanti-  
bus de iure teneri. Vbi vides non solum esse hoc fundatum in iure, sed de iure teneri prælatos dare petitam licentiam, non obstante tali priuilegio. Quod autem si quis transeat ad alium ordinem strictiorem, petita & non obtenta licentia, & ibi profiteatur, sit professio valida, si priuilegium sui ordinis reli-  
cti non annulet expresse professionem, & derogat expresse prædicto iuri communi, probatur clare: quia Summi Pontifices in suis Bullis quantumcunque rigorosis, & quibuscumque reuocatoriis munitis, nunquam censentur derogare iuri communi nisi id exprimat. Nam correctio iuris odiosa est, & nullo modo admittenda nisi exprimatur, vt Doctores communiter dicunt, & colligi potest à simili ex iis quæ tradit Sanchez lib. 3. de matr. disp. 26. num. 7. Et præterea quia multa fieri prohibentur, quæ tamen facta valent, vt habetur cap. dilectus. o. 2. de præbend. & dignit. de quo patent multa exempla, hoc sufficiat: Præcipit Concilium Tridentinum ne Parochus matrimonio aliquos iungat, nisi præcedentibus denunciationibus; si tamen absque illis ad matrimonium admittat, tenet factum contra prohibitionem Ecclesiæ, vt tenet Sanchez lib. 3. de matrim. disp. 5. maximeque ibi videndus in solutione 4. argumenti, licet aliàs Parochus peccet, & puniendus sit. Ergo à simili, licet vna Religio habeat priuilegium prohibens sub césura ne Religiosus illius exeat ad aliam: si tamen tale priuilegium non annulet professionem factam in ea strictiore ad quam transiit, iurique communi derogat, quidquid sit de peccato, & censura, factum tamen tenebit. Dato autem, quod priuilegium prædictum excommunicet aliàs, seu alio modo transeuntem, si aliàs non annulet, tenebit professio

sessio excommunicati: nam professio excommunicati, etiam declarati, valida est, vt tenet, ac probat copiose Sanchez *tom. 2. Decal. lib. 5. cap. 4.* Quod autem iuris correctio vitanda sit, vt paulo supra dixi, adeo verum est, vt dicat Sanchez *lib. 1. de matrim. disp. 17. num. 6.* cum quinque, vel sex grauissimis Canonistis ibi citatis, quod recedendum sit à propria verborum significatione, ne detur iuris correctio. Propter hæc omnia, hæc opinio Azorij, & Nauarri est satis probabilis, neque ego condemnarem illum qui illam sequeretur in praxi.

4 Verum disputandi gratia, & vt omnia referamus ad hoc spectantia, contrariam opinionem tenet Rodr. *tom. 3. qq. quest. 52. art. 20.* Relicto Nauarro quem citat, & ibidem citat Rodrig. priuilegium Eugenij IV. concessum Patribus Benedictinis in Hispania, per quod prohibet ne fratres illius Ordinis possint transire ad alium Ordinem sine licentia Reformatoris, vel Abbatibus Conuentus: & declarat quod licentia debet esse petita, & obtenta. Iuxta quod priuilegium ait ibi Rodrig. quod in nostro casu non valet translatio Religiosi ad alium Ordinem petita solum, & non obtenta licentia, vt olim licebat per cap. *licet. de regular.* supra citatum. Et ponit ibi Papa excommunicationem reseruatam illis Religiosis qui aliter exierint, & Prælatibus alterius Ordinis, qui illos receperint. Addit Papa quod prædictam censuram incurrant detentores talis Religiosi indebite translati, si requisiti à patribus Benedictinis intra triiduum illum detentum non reddiderint. Ex quibus vltimis verbis colligo, mentem Papæ esse professionem talis in ordine ad quem transijt, non valere: cum enim iubeat vt Religio detinens illum statim reddat Benedictinis, nec distinguat de statu quem

iam habeat, nec si diuturno tēpore, vel paruo sit apud illos Religiosos detētores, videtur velle, quod in quocunque statu sit, siue professus secundo, siue non professus, possit repeti, quia cum lex non distinguit, neque nos debemus distinguere: ac proinde professio emissā non valet facta contra modum assignatum in Religione ad quam transit. Secundo potest probari ex iis quæ tradit Sanchez citato *lib. 3. de Mairim. diff. 5.* In solutione ad quartum, ubi ait illud commune dictum Iuristarum, quod multa facta contra legem valent, esse limitandum quod non valeat factum contra legem, quando in tali lege assignatur forma essentialis seruanda in actu: si enim tunc fiat contra legem, factum non tenet. At illa priuilegia particularia concedentia ne Religiosi transeant ad alium ordinem nisi petita, & obtenta licentia, assignant formam essentialē seruandam in translatione Religiosi ad alium ordinem vt patet: ergo non seruata hac forma translatio, & professio non valent. Tertio probō, quia de ratione priuilegij est, vt aliquid speciale concedat, vt Iuristæ communiter dicunt, aliās non esset priuilegium: sed si istud priuilegium Patrum Benedictinorum non concederet vt esset nulla translatio Religiosi non obtenta licentia, nihil noui concederet: ergo non est dicendum oppositum. Probo minorem, quod nihil noui concederet si non annullaret translationem, & professionem: nam ius commune in dicto cap. *licet*, id concedit Religiosis vt si licentiam petierint, etiam si non obtineant licentia, & valide transeant: ergo aliquid ultra debet dictum priuilegium operari, vt scilicet non obtenta licentia, translatio nec liceat, nec valeat. Quarto efficaciter probō: quia quando duæ leges sunt oppositæ secunda reuocat priorem, vel illam corrigit, vt fufe, & effica-



efficaciter probat Suarez *tom. de legib lib. 6. cap. 27. à num. 10.* cum multis citatis: sed hæ duæ leges sunt oppositæ, prima scilicet contenta in ca. *licet*, dicens quod potest transire Religiosus petita, licet non obtenta. Secunda vero lex contenta in illo priuilegio dicit non posse transire nisi obtenta licentia: ergo cum sint oppositæ, secunda posterior contenta in priuilegio, reuocat, vel restringit illam priorem contentam in cap. *licet. de Regular.* potuit enim Papa subsequens derogare iuri communi capituli *licet*: cum Papa successor possit abrogare legem prioris. Neque opus est vt Papa derogans iuri communi se illud dicat de facto derogare, si per factam legem contrariam, & incompatibilem illi facto ipso derogat, quia cum princeps sit, præsumitur omnia iura habere in pectore: & proinde scire cuius iuri derogat, aut velit derogare sua lege opposita iuri cõmuni. Vltimo facit ad hoc intetum quod tradit Rodrig. *tom. 1. qq. 9. art. 3.* vbi citans vnã gloss. iur. dicit esse communem opinionem iuris peritorum, valere priuilegium, etiam si non faciat mentionem iuris, cui contradicit; ergo hoc priuilegium concessum Religioni ne suus subditus transeat ad aliam nisi obtenta licentia, erit validum etiam si non faciat mentionem citati capituli *licet. de Regular.* per quod conceditur transitus petita, licet non obtenta licentia.

5 Ad maiorem adhuc materiæ explicationem aduerto, quod vltra priuilegium, *num. 4.* præcedente citatum concessum patribus Benedictinis ne sui Religiosi transferantur nisi petita, & obtenta licentia, idem priuilegium concessit Paulus Quintus patribus Carmelitis Discalciatis, pro vt refert Sanchez *tom. 2. de calogi lib. 6. cap. 7.* qui ibidem refert, idem priuilegium Carmelitarum concessisse Gregor XIII. Patribus Societatis Iesu,

tis Iesu, cum clausula ne alij Religiosi communicantes in priuilegiis cum eisdem patribus Societatis prædictæ, possent in hoc priuilegio communicare. Vide tamen quod ego dixi in Epitome eiusdem Sanchez *ad citatum cap. 7.* vbi aduerto, quod licet prædictus summus Pontifex prohibuerit ne cæteri Religiosi communicarent in hoc priuilegio prout concessio Patribus eiusdem Societatis cum clausulis ibi positis à Sanchez, non per hoc videtur prohibuisse, quin cæteri Religiosi possint communicare in eodem priuilegio quatenus concessum fuit patribus D. Benedicti, & Patribus Carmelitis Discalceatis. Vide in *cit. Epitome.*

## CASVS XI.

*De duobus Religiosis citatis, quibus non est datum tempus sufficiens, nec locus commodus ad respondendum.*

**P**Ræsentem casum mihi oblatum, volui breuiter hic apponere ad tollendum certum abusum in aliqua Religione inueteratum.

Primus est. Quidam Prælatus Prouincialis quendam Religiosum post visitationem culpatum inueniens coram se vocauit, & illi capitula culparum non leuium obtulit in scriptis, per obedientiam iniungens vt intra spatium 24. horarum ad illa capitula responderet. Quæritur an subditus queri possit de paruo tempore sibi assignato ad respondendum: & possit proinde ob hanc causam à Prouinciali appellare?

Secun-

Secundus casus fuit. Visitauit Prouincialis quendam conuentum: finita visitatione Prælatus conuentus timens se in visitatione de aliquibus defectibus à fratribus delatum, petijt à Prouinciali vt sibi copiam faceret de capitulis culparum suarum, vt ad illa responderet. Prouincialis dixit nihil contra illum in visitatione resultasse, illumque proinde iussit esse quietum, exiit Prouincialis à conuentu: & post quatuor menses existens Prouincialis in alia vrbe longe distante vocauit ad se prædictum Prælatum localem, & illi exhibuit capitula grauium culparum, præcipiens illi vt ad obiecta responderet intra spatium 24. horarum, negata illi licentia exeundi à conuentu pro consilio capiendo. Respondit ille ad obiecta prout potuit: protestatus vt certi testes à se allegati reciperentur in sui defensionem, qui testes erant absentes, videlicet in illo oppido sui conuentus, Prouincialis citatos testes non vocauit, & contra illum sententiam tulit priuationis officij sui. Appellauit subditus: superior iudex appellationis, iussit vt Prouincialis ad se mitteret processum. Prouincialis confusus, processum nō misit, sed vocauit ad se subditum appellantem in secreto, & verbis importunis, ac molestis fere, obtinuit vel coegit vt subditus renunciaret appellationi factæ & de facto renunciavit. Queritur an Prouincialis in aliquibus errauerit, & an subditus ille prosequi possit appellationem positam, non obstante quod illi renunciauerit modo prædicto.

Ad primum quæsitum respondeo abusum esse intolerabilem ab aliquibus Prælati intrusum, qui subditis culpatis in re graui culparum capitula exhibentes, eisdem præcipiunt vt respondeant intra spatium 24. horarum. Probo hoc esse intolerabile primo ratione na-

ne naturali: nam licet Religiosi, maxime Minoritæ, priuilegium habeant à Bonifacio VIII. concessum, ne obligati sint ad seruandos apices iuris in suis processibus: In eodem tamen priuilegio mandat Papa, vt teneantur seruare substantiam iuris canonici, & naturalis: at de substantia iuris est dare Reo tempus sufficiens ad se defendendum, sicut est pro se citare testes, consulere doctos, quærere scripturas sibi necessarias, & multa alia concernentia ad suam defensionem, quæ non possunt aduerti, neque considerari in tam breui spatio, quale est 24. horarum. Cum igitur assignato tam breui spatio defensionis denegetur illi copia commodæ naturalis defensionis, sequitur, quod Prælatus tale spatium 24. horarum tantum assignans, non seruat substantiam iuris. Confirmatur exemplo sæcularium, quorum causæ aliquando durant per annum, & hoc in rebus quæ non sunt tanti momenti, quanti sunt aliquando illæ pro quibus aliqui Prælati iubent subdito respondere intra horas 24. Nunc probo hoc esse abusum iniustum, ex iure canonico. Et imprimis habetur clare in cap. 1. *de dilationibus*, vbi Papa decernit merito quosdam Religiosos appellasse à duobus iudicibus delegatis sedis Apostolicæ, qui citatis Religiosis vt responderent in certa causa: (sunt verba Papæ) *Terminum sibi nimis breuem peremptorium statuerunt*. vbi glos. *ver.* peremptorium citat alios multos textus, ex quibus ostenditur dandum esse Reo tempus commodum ad respondendum. Idem habetur in cap. *legitima de appell.* vbi glossa *ver.* competens, dicit quod erit locus appellationis si tempus competens non assignetur. Idem habetur in cap. *Hortamur 3. quæst. 9.* vbi Papa Pelagius instruens iudices in modo procedendi, ait. Et competentem legibus, & veritati terminum detis. Quod si obiiicias

obiicias aliquando iudices Ecclesiasticos sub censura excommunicationis mandare vt scientes de tali materia vadant denunciare intra spatium 24. horarum, vel quid simile: Respondetur de ordinario non id præcipere nisi intra spatium trium dierum, assignando vnum diem pro quavis monitione prærequiritæ: Quod si aliquis iudex aliquando iubeat denunciare intra 24. horas poterit id facere si negotium periclitetur propter moram: At denunciare est nimis diuersa res à defensione: nam vt aliquis denuntiet non indiget tempore magno, cum solum debeat dicere coram iudice id quod scit, & ad hoc non indiget consultore, scripturis, testibus, & similibus, & proinde minus tempus illi necessarium est. Qui vero se debet defendere in iudicio indiget illis omnibus proxime dictis, & multis aliis & proinde longius illi tempus, & commodum concedendum est.

2 Circa secundum quæsitum multi veniunt defectus annotandi ex parte iudicis, quos refero, & aduerto summarie. Primus est, quod fuerit vsus dolo, tum dicendo primo prælato locali post visitationem nullam de illo se querelam habere: tum secundo vocando illum post quatuor menses ad locum distantem, vbi commodam defensionem non habebat. Quomodo autem à iudice possit committi hic dolus, & quomodo propter dolum possit ab officio amoueri, vide Rodrig. *l. 2. qq. Regul. quæst. 29. art. 3. §.* At pro explicatione. vbi inter varios modos doli qui possunt concurrere in iudice, dicit. Illum iudicem dolum committere, qui callide tacet nolens respondere querelis, aut in aliquibus mendacio, aut arte verborum dissimulat.

3 Secundus defectus substantialis istius prælati fuit, præcipere reo vt intra 24. horas responderet capitulis culpa-

culparum grauium, absque tempore commodo se defendendi, de quo dixi sufficienter supra *num. 1.*

4 Tertius defectus fuit, citare reum ad locum remotum, & distantem, in quo reus non habebat commodam defensionem, & testium productionem. Et quod commoditas loci sit necessaria ad defensionem naturalem, probatur ex eo quod dicitur in iure, reum non teneri comparere si citetur ad locum non tutum, vt habetur in cap. *Ex parte 10. de appellat.* cum glossa verb. *Periculosum.* & cap. *Siue de coniug. 33. quest. 2.* locus enim in quo reus caret testibus quos habet in loco vbi habitat, non est locus tutus.

5 Quartus defectus hic interuenit, quod prælatus iste non vocauit testes illos distantes, quos reus allegauit in sui defensionem. In hoc enim errauit prælatus iste contra substantiam iuris denegans reo principalem partem suæ defensionis: constat enim ex tela iudicij in titulo *De testibus*, & tit. *De probationibus*, quod præcipua defensio rei consistit in productione testium: cum ergo iste prælatus oblatos testes à reo vocare noluerit, processit contra substantiam iuris, & ob hanc solam causam, & grauamen potuit reus ab illo appellare, illiusque sententia fuit nulla.

6 Quintus defectus fuit ex parte iudicis, quod post latam sententiam, induxit, & sollicitauit reum precibus importunis, vt desisteret ab appellatione. Hoc enim in rigore fuit vim facere suo modo ne subditus vteretur iure suo clato quod habebat ad appellandum, & se defendendum. Vnde ista desistentia, siue renūciatio appellationis iam factæ fuit renunciatio nulla, eo quod fuit clare inuoluntaria: pro quo vide quæ supra dixi in hac secunda parte casu 8. de Nouitio, qui receptus ad statum clericatus, postea inuitus consensit profi-

profiteri ad statum laicalem: circa quod ostendimus renunciationem inuoluntariam non valere. Et pro hoc casu in super addo, quod cum iste Religiosus sic renunciatus maneret læsus in fama, potuit non obstante sua renunciatione petere restitutionem, & iudex tenetur illum admittere ad appellationem prosequendam, ob nullitatem renunciationis. Pro quo facit, quod nemo potest renunciare iuri ad se defendendum; si vero illi renunciet in causa criminali, qualis est ista, potest reuocare, vt tenet clare Bajardus in *Addit. ad Iul. Clar. q. 49. num. 62.* & citat Angelum, Marsil. & Franc. cum vna glossa iuris ciuilis. Idem tenet Vmbertus in *pract. Inquisitor. verb. Defensiones §. Nota etiam quod.* addens, quod si reus faciat talem reuocationem, non poterit iudex procedere ad executionem: & citat Angelum in l. *patet inter hered. ff. de patris.* Adde quod sicut mihi dictum est, quando iste Religiosus fecit renunciationem prædictam coram Prouinciali, iam superior ipsius Prouincialis acceptauerat appellationem, eaque sic acceptata ab illo, iam non poterat illi renunciare in scio eodem superiore. Probatur ex cap. *quamuis constituto. de elect. in 6.* vbi dicitur quod partes non.

possunt desistere ab appellatione, postquam fuit Papæ præsentata: & iste

Religiosus iam habebat epistolam superioris acceptantis, & petentis processum.

## C A S V S XII.

*De quibusdam Clericis obligantibus hæredes defun-  
cti, & sepulti apud Religiosos, ut faciant tot  
officia, & legata, apud se, quos  
fiunt apud Religiosos.*

**I**N Insulis Tertiariis fuit intrusa consuetudo, quod si aliquis eligit sepulturam apud conuentum Religiosorum, clerici obligant hæredes, vel executorem testamenti ut tot officia, & legata iubeant fieri in Ecclesia sua parochiali, quot facta sunt in conuentu, in quo fuit sepultus. In quo conuentus valde damnificantur, quia multi ea de causa sæculares non eligunt sepeliri apud Religiosos, ob grauamen inferendum suis hæredibus: est etiam grauamen hæredum, qui coguntur duplicare officia, legata, oblationes, & similia.

Quæritur an possint vicarij, parochi, vel clerici obligare hæredes defuncti sepulti apud Religiosos ad supra dicta.

Primo. Respondeo omnino, quod non possunt, & contra facientes inferunt violentiam claram, & committunt iniustitiam. Probo primo, quia cum ista obligatione imposita deterrent homines clare à sepultura libere eligenda vbicumque voluerint: ius enim sepulturæ liberum est, ut patet ex toto titulo de sepulturis in iure: quod autem per impositionem huius obligationis deterreantur, & fere priuentur homines libertate sepulturæ, constat ex claro grauamine dandi Ecclesiæ parrochi, illa omnia supradicta, quæ defunctus non legauit, imo dare noluit. Redundat etiam in claram,



ram, & magnam læsionem conuentuum pauperum, maxime Franciscanorum, qui ob talem obligationem impositam à clericis, amittūt eleemosinas sepeliendorum apud se, ex quibus sustentantur. Quæ causa siue molestia sufficiens fuit vt D. Papa Clemens VIII. concesserit priuilegium, feceritque decretum huic nostro casui valde fauorabile, quod habetur apud Rodrig. in suo Bullario fol. 1225. quod sic habet. Informatus Papa quod Rectores, & parrochi in India occidentali petebant maiores eleemosinas propter fideles sepultos apud conuentus D. Francisci, quam petebant pro defunctis apud Ecclesias parrochiales: mandat Papa prædictis parrochis sub pœna excommunicationis ne talem exactionem eleemosinæ faciant: & assignat Papa hanc rationem, vel illā illi oblatam à petentibus, assignat pro causa sui mandati. *Plerique (ait Papa) Christi fideles ob difficultatem ius adeo onerosum persoluedi &c.* & paulò post subdit hæc verba. *Quo fit, vt Ecclesia huiusmodi mortuorum sepulturis, & consequenter elemosinis in dies fieri consuetis propemodum priuentur, &c.* Quo nihil clarius ad nostrum casum dici potuit. Vnde ego sic argumētor: Fratres omnes Minoritæ, & proinde commorantes in insulis supradictis gaudent hoc priuilegio, prout est notorium: & dato quod illud non sit priuilegium, sed nuda iuris papalis dispositio: constat quod vbi est eadem ratio, est eadem iuris dispositio, cap. *dudum*, o. 2. de elect. & cap. *cum dilecta* de confirm. vtili, vel inutili, & l. *illud*. ff. ad l. *Aquil.* de quo late, & optime Sanchez lib. 3. de *Maurim.* disp. 42. num. 4. ergo cum exactio clericorum in Insulis citatis quoad prædicta, habeat omnimodam rationem, & similitudinem cum exactione parrochorum apud Indiam Occidentalem circa sepultos apud Franciscanos, erit vtroque

eadem legis dispositio Clementis VIII. & proinde  
mandatum D. Papæ Clementis VII. proxime citatum.  
practicandum est circa clericos, & parrochos Insula-  
rum Tertiariarum. Secundo principaliter probatur,  
quia legatum, & oblationes debent esse voluntariæ:  
patet ex diffinitione legati, qua definitur esse donatio.  
facta per mortem defuncti, at de intrinseca ratione  
donationis est vt sit voluntaria, est etiam de intrinseca  
ratione eleemosinæ vt sit voluntaria, vt patet: Idem est  
in oblatione, cuius intrinseca ratio, imo & ethimolo-  
gia petit vt sit voluntaria: ex his constat quod non pos-  
sunt clerici Insulani petere hæc duplicata officia in sua  
Ecclesia fieri, quia nec ratione legati, nec ratione elee-  
mosinæ, nec ratione oblationis illa possunt exigere,  
cum defunctus ea non legauerit, neque hæres ea dare  
velit voluntarie, & repugnat naturæ illorum trium vt  
exigantur coacte. Tercio, ista consuetudo exigendi vt  
in parrochia fiant duplicata legata vel officia, saltem  
indirecte impedit libertatem ne fideles libere eligant  
sepulturam vbi voluerint, propter onerosum grauamen  
hæredum vt supra tetigimus: ergo propter hanc  
solam causam non est rationabilis, nec proinde tole-  
randa: probatur consequentia per illa; quæ optimè, &  
apposite tradit Panorm. in cap. *dudum de elect.* vbi citat  
vnam glossam dicentem, quod prohibitus directe ali-  
quid facere, prohibetur etiam indirecte illud facere.  
Quarto probatur ex praxi generali Ecclesiæ, saltem in  
isto Regno Portugalliæ, in quo nunquam practicata  
est talis consuetudo, de qua est præsens quæstio: con-  
suetudo vero regni, vniuersalis, & rationabilis præua-  
lere debet, potius quam illa particularis, & irrationa-  
bilis, & læsiva proximi in Insulis intrusa. Quinto ad-  
duci potest pro hoc casu, ille alius casus adductus à  
Syluest.

Syluest. *verb. immunitas Ecclesie 3. quest. 9* & *verb. simonia quest. 11. in fine*, vbi ait, quod si capitulum, vel collegium faceret statutum, quo decerneretur, ne aliquis parrochianus vocaret Religiosos ad sepeliendum suū defunctum, nisi etiam vocauerit ipsum capitulum, pro eodem defuncto associando, vt eidem capitulo aliqua eleemosina inde donaretur, dicit Syluest. quod tale statutum esset cōtra libertatem Ecclesiasticam, & proinde iniustum: quia priuat Religiosos illa assistentia, & commodo associandi funeralia. Et addit Syluest. quod tale statutum esset simonia negatiua: id est, quia non vult concedere ius illud quod habent Religiosi in re spiritali, videlicet sepeliendi mortuos, nisi ipsis clericis aliquid temporale concedatur, vt illud ius Religiosis permittant. Quæ omnia facile, & suauiter applicātur ad nostrum casum. Nam cum ista obligatione quam parrochi Insulani imponunt hæredibus defuncti, impediunt saltem facto, & indirecte ne Religiosi sepeliant defunctos in suis monasteriis, ad quod habent priuilegium, & libertatem: & præterea impediūt ne Religiosi vtantur iure suo spiritali in sepeliendis defunctis, nisi ipsis clericis detur aliqua eleemosina quæ non est eleemosina, cum sit coacta vt diximus. Vltimo potest hoc confirmari per id quod dicit D. Gregor. Papa in cap. *uendentes 1. quest. 3.* vbi loquens de simoniacis, quorum alij vēdunt spiritalia, alij vero illa emūt: ait sanctus Papa, quod est simoniacus ille qui non vult soluere proximo quod iustum est, & rem iure debitam facere contemnit absque pretio dato: At de iure debito est vt quisque libere, & sine pretio dato eligat sepulturam vbi voluerit & proinde non potest obligari ad aliquid propter hoc soluendum.

2 Neque obstat contra hoc, Clericorum ratio, qua

dicunt se prædictam obligationem defuncti hæredibus imponere propter laborem quem passi sunt Clerici in vita pascendo illum defunctum suum parochianum pastu spirituali, sacramenta administrando, docendo, & prædicando, quia dignus est operarius sua mercede iuxta Evangelium. Non obstat, quia prædictus labor parrochi in pascendo suo parochiano sepulto apud Religiosos, ex decreto Ecclesiæ, & ex iudicio Ecclesiæ sufficienter compensatur per solutionem quartæ funeralis, quam iubet Ecclesia solui parrocho ex delatis cum defuncto suo parochiano sepulto apud Religiosos: ut constat ex multis textibus iuris; & in particulari habetur in cap. 2. *de sepult. in 6.* ubi Papa dicit, quod defunctus sepultus extra suam parochiam, *Solvat canonicam portionem illi Ecclesiæ, in qua consuevit audire divina, & Ecclesiastica recipere sacramenta.* Sic ibi. Quasi dicat, quod prædicta quarta canonica soluitur Ecclesiæ parochiali propter laborem parrochi in prædicto pastu spirituali perpeßum. Si ergo Ecclesia taxavit solutionem laboris Clerici parrochi cum dicta quarta funerali, quo iure potest parochus ultra istam Ecclesiæ taxam, pro suo labore petere, & exigere, ut tot officia, & legata fiant in sua Ecclesia parochiali, quot defunctus fieri iussit in monasterio suæ sepulture. Iam vero ex praxi Ecclesiæ, & ex mox citandis, quarta pars funeralis non debetur ex officiis, vel missis, vel candelis, quæ defunctus reliquit monasterio in quo sepelitur, ut expresse docet Rodriguez *tom. 1. qq. 9. 39. art. 2.* & Miranda *tom. 2. Manual. quest. 48. art. 7.* ubi dicunt, quod quarta funeralis nec de officiis, neque de missis relictis Ecclesiæ sepulti debet solui parrocho, sicut praxis, & generalis consuetudo observat, sed solum de illis quæ cum corpore defuncti deferuntur,

tur,

tur, quale est vinum, triticum, oleum, & similia: at vero officia, & missæ non deferuntur cum corpore defuncti. Et confirmatur amplius, seu declaratur: nam dato, & non concessò, quod de officiis, & missis relictis Conuentui soluenda esset quarta funeralis non esset soluenda in æquali portione, vt isti parrochi prætendunt. Declaro sic. Reliquit defunctus vnum officium defunctorum dicendum pro anima sua in Conuentu fratrum, & viginti missas: Demus per te, quod istæ missæ, & officium debeant quartam funeralem parrocho (quod citati Doctores negant) demus tamen ita esse: eo dato, non debetur parrochiæ nisi quarta pars illius officij, & quarta pars illarum missarum. Vos autem ô parrochi petitis aliud integrum officium, & alias viginti missas, quod non est quarta funeralis, sed tantumdem quantum relictum est Ecclesiæ Regulari vbi est sepultus defunctus: & addit Rodrig. cit. loco, quod sic declarauit Pius V. non deberi quartam funeralem nisi de illis quæ portantur cum corpore defuncti, non vero de missis, officiis, & similibus. Et quamuis Clemens V. in Clement. *dudum. de sepul.* dicat, quod Religiosi soluant quartam funeralem, *de obuentionibus omnibus, tam funeralibus, quam quibuscumque, & quomodocumque relictis.* Tamen consuetudo tot postea annorum introduxit licite ne soluatur quarta de officiis, & missis, accedente declaratione Pij V. & autoritate doctorum: & fauet Concil. Trid. *sess. 25 cap. 13. de reform.* vbi in soluenda quarta funerali, vel non soluenda dicit standum esse consuetudini quadraginta annorum: & ista consuetudo de non soluenda quarta de missis, & officiis durat in praxi Ecclesiæ plusquam prædictum spatium annorum.

3 Et adhuc ad hoc intentum inferuire potest caput

unicum *de plus petitionibus*. in quo Papa Gregorius IX. ait, quod puniatur ille qui petit quod sibi non debetur; & constat ex omnibus supradictis, quod isti parrochi Insulani petunt quod sibi non debetur. Neque fauebit his parrochis, si dicant esse pro illis consuetudinem quadraginta annorum, vel præscriptam, ut sic obligent hæredes defuncti ad prædicta: Nam consuetudo contra bonum proximi non potest præscribi, quia est irrationabilis, ut inter alios tenet & probat Suarez *tom. de leg. lib. 7. cap. 4. num. 4. & seqq.* at ista consuetudo, seu corruptela parrochorum, est clare contra bonum proximi, videlicet hæredum defuncti, & Religiosorum, quibus grauamen clarum infertur, iuxta prædicta: ac proinde non potest præscribi; & pro maiori confirmatione refero mihi dictum esse, quod in eadem insula bis iam iudicatum est in tribunali Episcopi iuxta hanc nostram opinionem. Vide infra in hac 2: parte casum 26. pendentem ab isto 12.

Vltimo pro isto casu aduerto, nouissime declaratum fuisse ab Illustriss. DD. Cardinalibus Romæ, non teneri hæredes defuncti sepulti apud Regulares, facere celebrari tot missas, vel officia in Ecclesia parrochiali Clericorum, quot celebrata sunt in Ecclesia Regulari ubi defunctus sepultus est. Ita habetur in *Decla-*

*rationibus Cardinal. & Rota*, impressis

Madridi anno 1627. de mandato

Nuntij Apostolici Hispaniæ

fol. 44. pag. 2. §. 7

que los here-

deros.

## CASVS XIII.

*De quadam Bulla Domini Papæ Gregor. XV. in qua  
aliquam Superintendentiam concessit Episcopis  
super Moniales subditas  
Regularibus.*

**D**ominus Papa Gregor. XV. per particularem Bullam concessit, ac decreuit, quod Episcopi in aliquibus rebus possent, ac deberent se immittere circa regimen Monialium subditarum Prælati regularibus. Inter alia, præcipua hæc fuerunt. Primum, ne prælati regulares possent assignare Monialibus confessorum ordinarium, vel extraordinarium (id est allenaiador) nisi prius prædicti confessores fuerint approbati per Episcopum, approbatione particulari, excepta priori approbatione, qua approbantur generaliter ad confessiones sæcularium audiendas. Secundum fuit, ut procuratores Conuentuum Monialium, siue sint fratres, siue sæculares, teneantur quotannis ratiocinium reddere coram Episcopo de redditibus singulis, & expensis Conuentus. Tertium, ut existente causa, possit Episcopus monere prælatum Regularem, ut ab officio amoueat confessorum, vel procuratorem Conuentus Monialium: idque prælato non exequente, possit illos Episcopus amouere. Quartum, ut Episcopi possent assistere in electionibus Abbatissarum, & Prælatarum subditarum Regularium, & in illis præsideat. Quod ferre moraliter nunquam per seipsos facere possent: sed deberent ad hoc deputare Clericos delegatos.

Prælati Religionum habentes sub se Conuentus

Monialium, tanquam experti in hac materia, attēdentes inconuenientia, & incommoda resultantia ex prædictis concessionibus & decretis, omnes vnanimiter Olyssipone congregati, tractare ceperunt de supplicatione facienda summo Pontifici pro impedienda executione prædictæ Bullæ, vnicuique Religioni commendatum est vt particulares rationes excogitaret Pontifici maximo offerendas pro dicta supplicatione impetranda. Mihi iniunctum fuit à Prælato, vt de meo tenui ingenio proferrem quæ sentirem : & vt prælato parerem dixi sequentia. Quæ forte poterunt in posterum pro similibus casibus deferuire.

*Rationes communes ob quas non conuenit obseruari prædicta decreta.*

I      **A**Ntequam primam rationem in genere assignem, ob quam non expediat supradicta decreta obseruari, suppono vt certum in iure naturali, neminem deiiciendum esse à gradu, & statu honorifico, quem habet, nisi prius audiatur. Sufficiat pro hoc totus titulus *de restitut. spoliat.* maxime ibi cap. *in luteris.* vbi Papa dicit quod secundum leges ciuiles, etiam latro est prius restituendus, & audiendus, quam re possessa spoliandus. Cum igitur regimen Monialium à tot Pontificibus tot Religionibus concessum, sit officium honorificum quod possident, conueniens videbatur, vt ante hæc decreta per quæ prælatis Religiosis prædictum regimen vel adimitur, vel restringitur, fere cum illorum infamia, prius monerentur, vel audirentur, vt de suo regimine redderent rationem. Priuilegia enim quæ principes sæculares concedunt subditis, illa eisdem non auferunt nisi ob culpas, eosque prius audiendo.



do. Secundo constat etiam ex cap. *si quando. de rescript.* quod si aliquando Papa iubet alicui, v.g. Episcopo, vt aliquid faciat, si ex illo quod Papa præcipit resultat aliquod scandalum, vel inconueniens, quamuis id Papa iubeat sub censura excommunicationis, potest nihilominus is cui mandatur, non implere, & ad papam rescribere, assignando rationes, ob quas non expediat tale mandatum executioni mandare; quod vocant Doctores supplicare, vel facere supplicationem Papæ. De qua supplicatione, quomodo sit facienda summo pontifici, tractat Suarez *lib. 4. de legib. cap. 16. à num. 5.* Tertio, & suppono posse contingere, vt Papa licet aliàs non possit errare in illis quæ Doctores Catholici docent: tamen potest aliquando aliquid concedere propter nimiam importunitatem precum, vel propter falsam sibi porrectam informationem. Et quod attinet ad concessa per importunitatem, habetur expresse in cap. *quia per ambitiosam. de rescript. in 6.* vbi Papa ponit hæc verba: *Per ambitiosam importunitatem petentium tam nos, quam nonnulli prædecessor nostri indulgentias perpetuas multis concessimus, &c.* & paulo inferius ponit hæc verba: *Nos volentes emendare præterita, &c.* vbi glossa verb. *Importunitatem.* multa citat ad intentum, quæ ibi videas. Quod potuit contingere in hoc nostro casu, vt videlicet aliqui à summo pontifice prædictam Bullam impetrarent, tum ob importunitatem, tum ob falsam informationem propositam summo pontifici, vt sæpe fieri solet: sed ille tandem emendat præteritum, vt in hoc casu emendauit, non procedendo ad executionem, propter exhibitam supplicationem. Quo vero sciatur fundamentum supplicationis tunc exhibitæ, & appareat bona fama regiminis Regularium circa Moniales sibi creditas, & prouideatur calibus futuris, accedo ad rationes

rationes communes pro Bullæ prædictæ executione impedienda per supplicationem.

2 Primo. Prælati Regulares per priuilegia pontificia sunt in possessione honorifica gubernandi Moniales suas absque illis restrictionibus, & delegationibus factis Episcopis: & prætendunt probare quod in illarum regimine non commiserint culpas, ob quas sibi nunc imponi debeant prædictæ restrictiones, & assignari Episcopos assistentes, siue superintendentes in regimine: ergo, cum neque princeps sæcularis priuet suos subditos concessio priuilegio nisi ob culpas, & demerita, congruum est, vt summus Pontifex omnium benignissimus non priuet Prælatos regulares priuilegio illo honorifico gubernandi Moniales sine illa assistentia, & superintendentia Episcoporum absque culpis probatis, illisque prius auditis. Et confirmatur hoc argumentum: Nam si, quando Papa dat aliquod rescriptum gratiæ, vel iustitiæ, solet apponere clausulam. *Si preces veritate nituntur*, & hoc quando agitur de comodo, vel præiudicio vnius tantum: A fortiori hoc debet in hoc casu intelligi, quando talis Bulla à Domino Papa impetrata est (fortasse per illos qui Religiosis non sunt bene affecti) & debuit intelligi clausula, si preces, vel informationes, veritate nitantur, vbi concurrat fama, & honor tot Religionum. Secundo, quia iuxta Regulam 16. *de Regul. iuris in 6.* priuilegium principis debet esse mansurum: & hoc priuilegium gubernandi Moniales absolute, absque his restrictionibus tot ab hinc annis Religiosis Prælati concessum, & heri in Concilio Tridentino *sess. 25. de Regul.* per tot capita confirmatum, hodie sic illis restringitur, vt in parte laudabilius illis foret in totum ab illarum regimine abstinere, quam cum tot restrictionibus, & subiectionibus

nibus ad Episcopos acceptare. Tèrtio, intentio principalis præsumpta istius Bullæ, ac restrictionum, cognoscitur esse quod Dominus Papa fuit informatus Prælatos Regulares male procedere in regimine spirituali, ac temporali Monialium, ideoque eosdem subdit Episcopis in certis rebus hic designatis, innuens melius, ac vigilantius Episcopos super illis fore prouisuros, & maiori cum zelo Monialium negotia prospecturos: Nos autem probare intendimus non sic esse: sed aliquando oppositum euenire. Sufficiat nobis ad hoc, vnum exemplum in Monialibus sanctæ Claræ. Hæ in prima sua fundatione erant subiectæ gubernationi vnius Cardinalis, qui per se raro, & per visitatores delegatos illas visitabat, & electiones faciebat. Currente vero tempore constitit, quod illud regimen Monialibus non conueniebat; & quod melius illis erat gubernari per Generalem, & Prouinciales Ordinis Minorum. Quibus de causis motus Eugenius Quartus prædictarum Monialium regimen abstulit à dicto Cardinali, & illud commisit Prouincialibus Ordinis Minorum, eorumque Generali. Sic refert Rodriguez *tom. 1. qq. Regul. quest. 13. art. 8.* citans librum monumenta Ordinum & addit. ibidem quod fuit hoc confirmatum per quandam reuelationem factam super eodem casu, quæ ibi videri potest. Ego hoc ipsum confirmo duobus motiuis claris. Si Euangelium Christi Domini, & tot Concilia obligant, vt Prælatus cognoscat ex vultu oues proprias, & obligat Concilium Tridentinum ea de causa, vt Episcopi per se singulis annis visitent proprias oues; melius ad vnguem hoc exequuntur Prouinciales Minorum, qui singulis annis visitant per se ipsos conuentus Monialium, & per se ipsos assistunt illarum electionibus, quæ duo Episcopi per se ipsos.

nunquam

nunquam faciunt, cum nunquam assistant electioni conuentuum longe distantium, neque illos per se visitent, sed per clericos delegatos, de quibus non est spectandus tantus zelus, quantus de Prouinciali, qui ob similitudinem habitus, & fraternitatis maiori compassione Monialium defectus debet emendare. Secundum motiuum est. Prouinciales Regulares finito tricenno expectant Syndicantem rigorosum, qui totam prouinciam visitat inquirens defectus Prouincialis ad illos puniendos: Ideoque ex timore reddendæ rationis magis student, ac scrutantur Bullas Apostolicas, & motus proprios sum. Pontificum circa Monialium regimen præcipue explicatos à Doctõribus, ac Scriptoribus Religiosis istius temporis, quam super hoc inuigilent Episcopi, neque ipsorum officiales in aliis negotiis toti occupati, maxime non timentes Syndicantem, qui de illorum defectibus in regimine veniat inquirere. Ac proinde commodius regimen sperari poterit cæteris paribus à Prælati Regularibus circa moniales sui Ordinis, quam ab Episcopis exteris, vt ita dicam. Ad cuius confirmationem facit optime, quod, Urbanus III. Autor secundæ Regulæ sanctæ Claræ, in illius confirmatione dicit se illarum regimen committere Cardinali protectori Ordinis minorum, qui easdem moniales visitabat per fratres minores de ordinario: & assignans Papa causam, quare huic potius Cardinali protectori fratrum minorum illam curam demandaret, subdit: ne moniales essent differentes in diuersis modis viuendi, videlicet, si gubernentur ab alio nesciente mores, & vitam Fratrum minorum, quos fundauit idem Pater Franciscus, qui fundauit Ordinem sanctæ Claræ. Quod adhuc clarius exprefsit Bonif. VIII. in Bulla per quam concessit monialibus sanctæ

sanctæ Claræ Urbanistis, priuilegia fratrum Minorum apud Bullarium Rodrig. fol. 110. col. 2. vbi ibidem Bonifacius fauens, & concedens illis dicta priuilegia, & citans prædicta verba Urbani I V. proxime citata, inquit Bonifacius cum dicto Urbano, se prædictis monialibus illa ibi concedere: *Ne sub diuersorum magisterio, viuendi modos incurrere valeatis differentes.* Id est ne gubernatæ ab Episcopis, quasi diuersis Magistris, discerent mores diuersos ab illis, quos fratres obseruant fundati ab eodem P. N. Francisco: est enim diuersum magisterium traditum ab Episcopo, & à Prouinciali eiusdem Ordinis.

3 Quarta ratio principalis in communi est. Nam Papa in ista Bulla circa multa, subiectos facit Episcopis Prælatos Regulares, vt mox videbimus, & proinde eosdem subdit vicario Generali Episcopi, & aliis clericis, quorum ministerio Episcopus vti debet in causis sibi in hac Bulla commissis: iam vero ista subiectio Regularium, ac dependentia ab Episcopis, & clericis, est clarum fomentum, ac seminarium discordiarum, ac litium quæ inter Clericos, Episcoposque quotidie nasci debent circa Prælatos Regulares. Satis hoc potest probari, ac sperari, attento cap. *nimis inique*, & cap. *Nimis praua*, de excessibus Prælatorum, vbi Papa Gregorius IX. quadringentis ab hinc annis refert plustquam viginti grauamina grauia, quæ Episcopi Religiosis inferebāt super materia iurisdictionis; & hoc in materia super quā Episcopi non poterant se ingerere, ob quæ grauamina Ecclesia motuam accepit eximedi Religiosos à iurisdictione Episcoporum, sicut de facto exemit. Si ergo iā tunc Episcopi sic grauabāt Religiosos in materiis in quibus non poterant: Quid sperandū est eos facturos per commissionem illis concessam in hac

hac Bulla, per quam in tribus, vel quatuor rebus graui-  
 bus possunt se ingerere super regimine prælatorū Re-  
 gulariū? Poteſt etiam hoc colligi ex motu proprio Pij  
 V. qui incipit *Eſi mendicantiū*. in quo concedens multa  
 priuilegia ordinibus Mendicantibus, reddens cauſam,  
 quare illis tot exemptiones concederet, ait: *quia Episco-*  
*pi, & Archiepiſcopi decretis Concilij Tridentini in prauum*  
*ſenſum diſtortis, Religioſos variis incommodis afficere, &*  
*perturbationibus conantur, eorumque priuilegiis non modi-*  
*cum aſſerre grauamen.* Sunt verba tanti Pontificis. Si er-  
 go Episcopi male intelligentes decreta Tridentini Cō-  
 cilij ſic Religioſos grauant, & moleſtant; quid ſpe-  
 randum eſt de illis per hanc Bullam factis ſuperinten-  
 dentibus prælatorum Regularium? Non loquor inui-  
 dioſe, nec calumnians, neque dico rem nouam, ſed di-  
 ctis iam quadringentis abhinc annis à Doctore tam  
 pio, ſancto, & pacifico, qualis fuit D. Bonauentura, hīc  
 tractans quod de ordinario Clerici ſæculares non ſunt  
 bene affecti erga Religioſos, in tract. *Apologetico contra*  
*impugnatores fratrum Minorum*, in reſp. ad 10. quæſt. di-  
 cit: *Quod ex voluntate clericorum, vix vnquam in Eccleſia*  
*poſſent fratres Minores diu morari, dum aut per ſe, aut inci-*  
*tati per alios, eiſcerent nos de parrochiis ſuis pluſquam hære-*  
*ricos, vel Iudeos: idem repetit in reſponſ. ad quæſt. 22. §. quā-*  
*uis autem.* Hæc eſt opinio D. Bonauenturæ tanti, ac tam  
 pij Doctoris circa animum, quem vt plurimum gerunt  
 Clerici erga Religioſos: vnde non videri poteſt teme-  
 rarium, timere quod ex conceſſis per iſtam Bullam ti-  
 meri poſſint ſcandala, lites & iurgia inter Clericos, ac  
 Religioſos, propter citatas rationes, & alias ab aliis aſ-  
 ſignandas: cum *medecina inuenta ſit non ad ſauciandum*  
*ſed ad ſanandum*, teſte D. Bonauentura tract. *cur Fratres*  
*Minores prædicent.* tom. 7. ſuorum operum: & præterea  
 ibidem

ibidem addit, quod *Medicina non sicut expedit porrecta agrotis, ledit potius quam sanat.* Sequitur quod medicina istius Bullæ sanctiss. D. Gregor. XV. non expediat, cum potius læsionem, quam remedium allaturam esse possimus timere. Sub censura eiusdem sanctiss. D. & Matris Ecclesiæ.

*Responsiones particulares ad particularia  
decreta Bullæ.*

4 **N**Vnc in particulari rationes adduco circa particularia decreta Bullæ: non considerando omnia, sed præcipua illa quatuor supra in principio proposita. Quod attinet ad primum, ne prælati Regulares possint assignare Monialibus confessorem ordinarium, vel extraordinarium sine assensu, & particulari approbatione Episcopi: dico primo, ex hoc decreto oriri graues molestias, & inconuenientia. Imprimis enim valde molestum est, quod cum iuxta Tridentinum teneatur prouincialis assignare Monialibus confessorem extraordinarium in singulis quatuor, vel sex mensibus, quem vocamus Alleviatorem, idque facere debeat in sexdecim Conuentibus Monialium istius prouinciæ valde distantibus, valde inquam molestum esset, & intolerabile, quod singulis vicibus, & fere quotidie hi confessores extraordinarij, cum multis expensis deberent adire Episcopos pro impetranda licentia ad Monialium confessiones excipiendas. Et dico faciendas fore multas expensas, quia Prouinciales propter expensas vitandas designant hos Alleviatores ex Conuentu fratrum propinquiori monasterio Monialium. Si vero isti adire deberent prius Episcopum, aliquando deberent conficere iter viginti leucarum, cum

expensis, & labore non paruis. Secunda ratio est, quia prælati Regulares communiter, saltem in nostra religione, per statuta generalia, non assignant monialibus confessores, nisi illos Religiosos qui per Episcopos approbati sunt ad audiendas confessiones sæcularium, etiam virorum. Cum ergo prælati dent Monialibus pro confessoribus illos tantum qui iam sunt approbati ab Episcopo, & possunt audire confessiones virorum, qui ut plurimum grauiora habent, ac difficiliora peccata, satis sufficienter & abunde prouidere videntur Monialibus circa confessores assignandos, cum illæ ut plurimum fœminæ, & sanctæ confessore doctiore non indigeant. Tertio cum Episcopus ut plurimum notitiam non habeat, neque dum ex vultu, & auditu cognoscat hos confessores crebro mittendos à Prouincialibus quarto quouis mense, quid opus est, ut hi Episcopi nouam approbationem expectent? nisi forte velis, ut Episcopi quarto quouis mense de illorum sufficientiâ, vita, & moribus inquirant? quod esset onus intolerabile. Confirmatur ex communi Episcoporum praxi, & Doctorum opinione dicentium minorem sufficientiam, ac litteraturam requiri in confessore ad audiendas confessiones fœminarum, & rusticorum, quam mercatorum, & similium, qui grauioribus negotiis implicantur. Iam vero de moribus, & vita confessoris mittendi ad Moniales melius testificari poterit Prouincialis, qui noscit ex vultu oues proprias, quam Episcopus, qui illos confessores fortassis non vidit aliquando, imo nec de ipsis audiuit. In quorum etiam probationem facit, quod hodie in mea prouincia quando hæc scribo, in tribus Conuentibus Monialium sunt assignati tres Patres pro confessoribus, qui fuerunt lectores Theologi iubilati: ut hinc colligi liceat quantum



tum prælati Regulares inuigilent circa sufficientiam confessorum Monialium.

5 Quod attinet ad secundum, de ratiocinio reddendo Episcopis ab Æconomo Monialium, vel illi cui Episcopus delegauerit tale ratiocinium: in hoc particulari hoc inconueniens aduerto: Nam iste deputatus ab Episcopo pro excipiendo ratiocinio, poterit plerumque annuere procuratori Monialium ad dissimulandos defectus, poterit etiam esse homo modici zeli, qui lucro, vel spe lucri ductus aliquid dissimulet, vel expectet. Præterea isti deputato ab Episcopo tempore quo ratiocinia excipit, semper sunt cibaria ministranda, & in fine præmium aliquod exhibendum, quod redundet in dispendium, & expensas Monialium. Præterea semper prælati Regulares ab æconomo Monialium ratiocinium petunt per alium Religiosum expertum, sine expensis, vel per aliquem sæcularē boni zeli. Si vero dicas inter Prouinciales deputatos ad ratiocinia sumenda, & procuratorem Monialium pactum, vel fraudem posse intercedere: quis dubitat, quin eadem fraus & pactum possit intercedere inter ratiocinatorem deputatum ab Episcopo, & inter procuratorem Monialium? Quod si obiecias, sanctiss. D. Papam hoc remedium assignasse, quia sciuit per informationem, vt plurimum Conuentus Monialium, qui amplos habent redditus ad nimiam paupertatem esse reductos. Dico imprimis hoc non esse mirandum, cum id videamus vt plurimum in domibus sæcularium multorum, qui cum redditus habeant opulentos, viuunt hodie in maiori paupertate quam sui progenitores, cum tamen illi æconomos habeant suæ rei familiaris vigilantissimos, & ipsi Domini super æconomos seduli inuigilent. Cuius causa vniuersalis reddi potest, quoniam rerum

pretia excreuerunt; Monialium etiam numerus adau-  
ctus est, & possessiones illarum immobiles, vt pluri-  
mum sunt in tritico annuali, vino, & oleo, quorum si  
est abundantia in hoc anno, pretium vilescit: Si est pe-  
nuria, ac sterilitas, coguntur aliquando eadem emere  
magno pretio pro Conuentus sustentatione, sicut ego  
ex certa scientia scio de aliquibus Conuentibus Mo-  
nialium meæ prouinciæ.

6 Quod attinet ad tertium, posse videlicet Episco-  
pum existente causa monere Prouincialem, vt con-  
fessorem, vel procuratorem Monialium ab officiis  
amoueat, sin minus ipse Episcopus id facere possit: hic  
militant particularia, & graua pericula, & inconue-  
nientia. Sepe enim continget Episcopum informari ab  
aliqua persona, maleuola, trata, & non bene affecta ad  
confessorem, vel procuratorem, idque sine fundamen-  
to, sed ex appetitu, & vindicta, cuius informatione du-  
ctus Episcopus ex abrupto monebit Prelatum, vt con-  
fessorem amoueat cum magna infamia. Quod maxi-  
me timeri potest in Monialium informationibus, quæ  
cum fœminæ sint natura sua inconstantes, vindictiue  
& à confessoribus aliquando merito reprehensæ pro  
salute animarum suarum, solent sæpe infimiles quere-  
las contra illos insurgere: idque vel per se ipsas faciunt,  
vel per consanguineos indiscreto fauore illis fauentes:  
eandemque falsam informationem aliquando facere  
solent sæculares contra confessores Monialium eo  
quod dicti confessores sæcularium amicitias cum Mo-  
nialibus prohibeant: testis sum ego oculatus: qui cum  
essem prouincialis accepi epistolam cuiusdam sæcula-  
ris subscriptam mentito proprio nomine, in quo pro-  
testabatur vt certus confessor Monialium amoueretur  
ab officio, alioqui graue illi damnum euenturum. Mo-  
nui

nui ego per epistolam secretam confessorem vt sibi cerneret, & vitam emendaret, si quid emendandum haberet; post aliquos menses ad illam ciuitatem accessi, & facta inquisitione in genere, neque contra confessorem aliquod delictum resultauit, neque aliquis accusator apparuit. Aliam similem epistolam epi scriptam contra vnum procuratorem Monialium. Et denique scio Moniales faciles esse ad huiusmodi querelas, & informationes formandas. Quot ergo iurgia, quot pericula infamandi nascerentur si Episcopus his informationibus particularibus, & auricularibus mulierum, & inuidorum ductus possit adigere Prouincialem, vt confessorem positum in officio honorifico sine forma iudicij priuaret officio cum infamia? Certe in Religione, vt confessor Monialium extra tempus ab officio amoneatur, prius citatur, culparum capitula illi exhibentur, vt respondeat: dantur etiam alia deffensiones, quia dedecus illi magnum foret si priuaretur officio sine culpis, & sine citatione. At quis non videat fore præter ordinem iuris vt ad solius Episcopi dictum, vel monitionem confessor Monialium priuetur: maxime cum ex illius amotione sic facta resultare possit etiam infamia Monialium, aliquibus iudiciis quod fortè ob culpam aliquam intra conuentum illarum commissam à dicto officio expellebatur. Adde quod dato quod talis confessor haberet aliquod delictum, si tamen est secretum, & non diffamatum tolerandus est, & non puniendus in publico, vt omnia iura proclamant. Vide etiam ad probationem istius, inconuenientia adducenda in §. seq. ad 4 decretum istius Bullæ maxime ex Henriquez ibi citando.

7 Quod attinet ad 4. quod possit, ac debeat Episcopus assistere vt præses in electionibus Prelatarum, que

subduntur regularibus, simul cum Prælati illarum; multo maiora hinc emergent pericula discordiæ, & inconuenientia, quam ex omnibus præcedentibus decretis: probo euidenter multis exemplis, & rationibus. Primo imminet periculum schismatum, & seditionum, seu diuisionum inter Moniales: Episcopus enim, vel clericus eius nomine præsidens electioni inclinatus ad vnā partem, vel propter amicitiam, vel propter consanguinitatem, turbare poterit Moniales aliā quietas, & vel promissionibus, vel precibus validioribus illas inclinare ad eligendam, quam voluerit. Probatur hoc casu relato in cap. *nimis praua de excess. Prælatorum in fin.* vbi Papa inter grauamina quæ Episcopi Religiosis intulerant, ait hoc vñum particulare fuisse; quod scilicet Episcopi in electionibus fratrum Minorum, volebant illis præficere Ministros, & custodes pro suæ voluntatis arbitrio, vt fratres subderent suæ ditioni. Si vero tunc Episcopi non habentes iurisdictionem in fratrum electionibus, volebant creare prouinciales & custodes ad suum arbitrium: quid sperari poterit de illis in electionibus monialium fragilium, in quibus illis per hanc Bullam conceditur iurisdictiono, maxime cum possit sæpe contingere quod in illo conuentu sit aliqua monialis Episcopi consanguinea, quæ officium Prælatæ prætendat? Secunda ratio est. Nam Episcopus non cognoscit Moniales, neque potest diiudicare quæ sit digna, & indigna, neque clericus loco Episcopi præsidens electioni, id potest discernere sicut prouincialis qui illas visitat: & proinde Episcopus, vel eius clericus poterunt decipi circa hoc, vel ex defectu notitiæ, vel ex appetitu particulari. Probatur ex Henrici. *tom. 1. serm. lib. 7. cap. 24. num. 7.* in glossa littera X. vbi referens aliquas causas ob quæ as decuit Religiosos exi-

mi

mi à iurisdictione Episcoporum , inter alias hanc assignat. Quia scilicet Episcopus inexpertus instituti Regularis , turbabat pacem , quietemque Prælatorum, quos officiis, aut ministerio priuabat sine causa, & auctoritate. Aliud illud grauamen refert Henriquez citato loco ab Episcopis Religiosis illatum, quod , scilicet ex clericorum, & laicorum inuidia, & calumnia se ingerebant in Regularium causas. Quod multo magis de illis timeri poterit in præsentī occasione , ex prædicta commissione Episcopis , & proinde illorum clericis concessa circa electiones Monialium. Vide n. 108 Doctores, quos citat Henriquez citata littera X. & V. ad hoc intentum. Vltima ratio circa suspensionem huius quarti decreti est , quod cum sæpe contingat ex visitatione præcedente electionem , resultare culpas contra aliquam Monialem, ob quas mereatur priuari voce actiua , & passiua in illa electione , sequetur quod secretarius Episcopi , vel clerici illius delegati, cognoscent defectus , & culpas Religiosarum , quod non congruit decoro statui Monialium , maxime cum ille secretarius possit aliquando esse persona secularis, qualis est aliquando Notarius Apostolicus. Quod si contingat Monialem aliquam appellare ab electione, vt iam contigit , inextricabile aliud dubium emerget, ad quem debeat appellare, an ad Episcopum , vel eius superiorem Archiepiscopum , an ad superiorem Prouincialis, cuius illæ sunt subditæ? Adde molestiam expensarum , quas Conuentus Monialium necessario moraliter facere debet durante tempore electionis in oibo, & potu illi ministrando , & forte postea donariando ob gratificationem collatæ prælaturæ: quæ omnia magna sunt inconuenientia , & sufficientia ad Bullæ suspensionem , & sanctissimum D. Papam per sup.

plicationem informandum.

§ Adhuc pro maiori confirmatione dictorum ad secundum, & quartum, in quibus conceditur Episcopo per se, vel clericum deputatum assistere ratiociniis, & electionibus simul cum Prælato regulari, noto aliud clarum periculum discordiarum, quæ inde possunt oriri. Nam cum Prælati sunt differentes, ac diuersi, Ordinarius, & Regularis, & in materia iurisdictionis, clarum periculum est discordandi adinuicem, cum sint diuersæ Religionis, id est professionis. Considerauit hoc Papa Leo X. qui in Bulla vniuersis circa statum fratrum Minorum, causam cur fratres obseruantes separauit à conuentualibus assignans in dicta Bulla, ponit hæc verba: *Compertum habemus Prælatorum diuersitatem, huiusmodi litibus, & diuisionibus causam tribuisse.* Vide quid faciat diuersitas Prælatorum: magis vero diuersi Prælati sunt Episcopus, & prouincialis, quam illi Prælati, de quibus sermo est in illa Bulla Leonis X. & potest ad hoc applicari suo modo, id quod Deus prohibebat Deuter. 22. Non arabis in boue, & asino simul; quia scilicet diuersa illa animalia iungi, & vniri perfecte non poterant ad sulcum conuenientem in terra protrahendum Sic etiam de Episcopo, & prouinciali timeri potest in electionibus; nam Moniales illæ quæ in Prouinciali fauorem non inuenerint, ab Episcopo debent illum procurare; & ecce dissidium, ecce materia schismatum, vt possit inter Moniales oriri sermo ille à D. Paulo reprehensus: ego sum Pauli, ego autem Cephræ: ego sum Episcopi, ego autem Prouincialis. 1. ad Corinth. 1. vltim. pro confirmatione pono exemplum viuum Monialium sanctæ Claræ de Santarem, id est oppidi Scalabitani, ad quam miseriam, & inquietudinem redactæ sint per duos, vel tres annos, regnante in illo

illo conuentu schismate circa iurisdictionem Prouincialis, vel Episcopi, aliis acclamantibus vnum, aliis alium inuocantibus, cum damno notabili conuentus; quod quia notorium est omni regno, quando hæc scribo, non possum redargui ex eo quod illud hic inseruerim. Hæc omnia dicta esse volo sub correctione sanctæ Matris Ecclesiæ à cuius decretis, ac doctrina nusquam volo declinare.

---

CASVS XIV.

*An Moniales D. Clarae subditæ Episcopo gaudeant  
privilegiis fratrum Minorum: & alius  
casus circa vnum conuentum  
illarum.*

**Q**uidam Conuentus Monialium sanctæ Clarae, quæ solitæ erant gubernari per Prælatos ordinis Minorum, ex certa occasione per Bullam Papæ traditus est regimini, ac gubernationi Episcopi ordinarij, Utendo his verbis. Committo vos gubernationi Episcopi Angrensis. Mortuus est ille Episcopus, post iam assumptum illarum regimen.

Quæsitum fuit primo, an post mortem Episcopi prædicti Conuētus regimen transeat plene ad capitulum sede vacante, ita vt possit etiam recipere Nouitias? Secundo dubitatum fuit, an iste Conuentus sic modo existens sub regimine Episcopi, gaudeat privilegiis & indulgentiis concessis à Sede Apostolica Monialibus sanctæ Clarae, quæ gubernantur per Prælatos Ordinis Minorum.

1 Quod attinet ad primum, clara, & facilis est responsio: dicendum est enim ad capitulum sede vacante transire totum regimen, & plene, sicut antea Episcopo concessum fuerat. Probatur ex cap. *cum olim. de maiorib. & obed. & cap. Ecclesia. de supplend. neglig. Pralat. in 6. & ex Concilio Trident. sess. 25. cap. 6. de reform.* Ex quibus constat quod capitulum sede vacante habet plenam administrationem in spiritualibus, & temporalibus, sicut habebat Episcopus: cum ergo gubernatio Monialium sit, administratio iurisdictionis, plene utique pertinebit ad capitulum sede vacante: & hoc confirmatur, quia Papa in commissione istius regiminis facta Episcopo, non commisit illam personæ designatæ, & electæ ipsius Episcopi, sed id commisit sedi Episcopali, vel officio Episcopali quod non moritur: dixit enim in commissione, Episcopi Angrensis. Non dixit, loquens cum solo Episcopo, committo tibi, vel, confidens de tua industria; per quæ verba eligitur industria personæ, & non officium: sed dixit Episcopi Angrensis: in quo clare elegit officium, non personam. Communis vero sententia est Doctorum, quod quando aliquid committitur officio alicuius Episcopi, non vero personæ, ista commissio durat mortuo Episcopo, & manet in ipsa sede Episcopali. Pro quo videndus est Sanchez *lib. 8. de matrim. diff. 23. à num. 2. & seqq.* ubi late probat quod commissio facta officio, vel dignitati, non expirat mortuo illo cui facta fuit, sed ad successorem transit. Confirmatur amplius ex traditis ab eodem Sanch. *lib. 8. de matrim. disput. 4. num. 10.* ubi probat quod potestas illa absoluendi, ac dispensandi quam Concilium Tridentinum committit Episcopis pro casibus occultis, mortuo Episcopo transit etiam ad capitulum sede vacante. Maius autem quid est posse capitulum



capitulum sede vacante vti illa plenissima potestate ad absoluendum mortuo Episcopo, quam gubernare prædictum Conuentum Monialium, cuius regimen non est commissum particulari personæ Episcopi mortui, sed dignitati, & officio Episcopali.

2 Difficilius est quod tangitur in secundo quæsito. Nam istæ Moniales antea subditæ prælatis Minorum, gaudebant priuilegiis, & indulgentiis concessis eisdem Fratribus per multas concessiones in Compend. ver. *Moniales.* & ver. *Communicatio priuilegiorum.* At per contenta in eodem Compendio duobus citatis locis, Moniales sanctæ Claræ subditæ Episcopis, non gaudent priuilegiis, & indulgentiis concessis Fratribus Minoribus. Primus locus est in eodem Compendio ver. *communicatio priuilegiorum.* §. 5. vbi Sixtus IV. sic concessit: Quod sorores sanctæ Claræ sub obedientia fratrum Minorum obseruant. existentes, gaudeant omnibus priuilegiis, & gratiis, &c. & sic citat, & explicat Rodr. tom. 3. qq. Reg. q. 6. art. 4. *prope fin.* Idem concessit Leo X. in Compendio, dicens eod. verb. *communicatio priuilegiorum.* §. 14 & fauet coniectura, nam cum de ordinario hæc priuilegia pro Monialibus sanctæ Claræ postulata sint à Papa per fratres Minores pro Monialibus sanctæ Claræ, valde credibile est non illa postulasse nisi pro Monialibus suæ obedientiæ subiectis: Confirmatur alio exemplo à simili, apud Rodr. tom. 3. q. 73. art. 1. §. colligitur *denique.* vbi ait quod Moniales Tertiariæ licet viuant in congregatione non gaudent priuilegiis fratrum Minorum, nisi viuant sub cura illorum, vel nisi ad id habeant aliquam particularem Bullam Pontificiam, quam oportet exhibere: & quidem hæc omnia valde vrgent, vt credam prædictas Moniales sanctæ Claræ subditas Episcopo, non gaude-

re pri-

re priuilegiis, & indulgentiis fratrum Minorum, nisi ad id particularem Bullam extensionis priuilegiorum ostendant. Indulgentiæ enim, & priuilegia sunt stricti iuris. & proinde potius restringenda sunt, quam extendenda: duo vero Pontifices supracitati, concedentes Monialibus priuilegia Fratrum, limitant & restringunt, dummodo uiuant sub cura, & obedientia fratrum Minorum: vnde illorum cura non viuentes, non poterunt illis gaudere.

3 Pro parte tamen affirmatiua, quod scilicet etiam Moniales sanctæ Claræ subditæ Episcopis gaudeant priuilegiis fratrum Minorum, inuenio quod Bonifacius VIII. in *Bullario Rodrig fol. 110.* concessit Monialibus sanctæ Claræ, etiam antequam essent sub cura, & regimine fratrum Minorum, vt gauderent omnibus priuilegiis, & indulgentiis concessis Fratribus Minoribus. Sic habetur in illa Bulla paulo ante finem: & exprimit ibi Papa, quod vtantur priuilegiis, & indulgentiis Fratrum, non solum concessis, sed etiam in posterum concedendis. Quod vero tempore huius concessionis Bonifacij VIII. nondum Moniales sanctæ Claræ essent subditæ Generali & Prouincialibus ordinis Minorum, constat clare ex eodem Bullario Rodrig. fol. 238. vbi Eugenius IV. multo post Bonifacium VIII. curam Monialium S. Claræ transtulit à Cardinale protectore ad Generalem, & Prouinciales fratrum Minorum, sicut modo sunt. Cum ergo constet quod Moniales S. Claræ antequam subderentur Minoritis, gaudebant priuilegiis Fratribus concessis & concedendis, videtur quod hodie, etiamsi aliquæ Claristæ non sint illis subditæ, non amittent priuilegium concessionis illius Bonifacij VIII. Secundo facit ad hoc quod idem Sixtus IV. citato verbo *communicatio priuilegiorum. §. 2.* conce-

concedens Monialibus S. Claræ, & S. Dominici priuilegia eorundem Fratrum, non distinguit si uiuant sub cura, & regimine eorundem Fratrum, sed concedit absolute Monialibus S. Dominici, & S. Frācis, idemque potest colligi ex Bulla Clementis VII. qua confirmauit priuilegia Fratrum Minorum posita à Rodrig. ad finem *sue Cruciatæ*, ubi concedens prædictis Monialibus priuilegia Fratrum, non distinguit de uiuentibus sub cura Fratrum Minorum. Quamuis autem duo Pontifices supracitati concedentes priuilegia Fratrum Monialibus, declarauerint, si uiuant sub cura Minorum Fratrum: hæc limitatio non videtur excludere Moniales Claristas subditas Episcopis, quæ per priuilegium Bonifacij VIII. antecedentis gaudent priuilegiis fratrum concessis, & concedendis Nec Sixtus IV. nec Leo X. per illam suam limitationem videntur derogasse dicto priuilegio Bonifacij VIII. Nam ut priuilegium, & ut indulgentiæ reuocentur, non sufficiunt quæcunque verba, sed necessaria est clara, & expressa reuocatio, ut fecit nuper Paulus V. reuocans indulgentias Religiosorum, quod fecit per Bullam publicam: & Commissarius Generalis Cruciatæ in fine Bullæ dicit expresse se reuocare priuilegia, indulgentias, &c Et possunt adhuc exponi Sixtus IV. & Leo X. quando limitant se concedere dicta priuilegia Monialibus S. Claræ subditis Fratribus Minoribus, possunt intelligi quod ea specialiter concedant illis Monialibus; cum quo stat quod alias subiectas Episcopis non excludant, maxime cum habeant citatum priuilegium Bonifacij VIII.

4 Hæc mihi occurrerunt in re tam difficili quibus non obstantibus unusquisque eligat quod securius fuerit. Nam ego in priorem partem magis inclino, quod

quod scilicet non gaudeant dictæ Moniales Episcopis subditæ dictis Fratrum priuilegiis.

## CASVS XV.

*An possit Goardianus in Ordine Minorum esse  
Goardianus ultra tres annos.*

**I**N Ordine Minorum est Bulla Pauli IV. posita à Rodriguez in Bullario, per quam Papa iubet quod Goardianus in Ordine Minorum sub pœna excommunicationis non duret ultra triennium, eandemque censuram imponit subditis illi obedientibus. Quidam ante capitulum per mortem vnus, electus fuit Goardianus ante octo menses proxime sequentis capituli. In proxime sequenti capitulo fuit confirmatus in officio. Postea in congregatione quæ fit post capitulum anno ac dimidio transacto, dubitatum fuit vtrum in illa congregatione posset continuari in officio Goardiani vsque ad futurum capitulum, ex quo sequeretur quod debebat esse Goardianus per tres annos & octo menses: & videtur quod id posset fieri, nam Clemens VIII. postea concessit Ordini Minorum, vt licet per decreta Apostolica Prouinciales, & Goardiani non possint extendi ultra triennium; si tamen Prælati Generales ob aliquam causam iustam celebrationem capituli prouincialis dilatarent ultra triennium per sex menses, possent Prouinciales & Goardiani durare ultra triennium per illos sex menses. Cum ergo iste de quo agimus, si eligeretur adhuc in congregatione vsque ad capitulum, excedere deberet triennium per octo

o<sup>cto</sup> menses tantum, videtur quod potuerit tolerari, iuxta declarationem, vel concessionem Clementis VIII. duo enim menses tantum inter terminum assignatum à Clemente VIII. videtur paruitas materiæ.

1. Hoc non obstante respondi non potuisse cōtinuari in officio in dicta congregatione. Quia cum tali continuatione, & prorogatione futurus erat Goardianus per tres annos, & o<sup>cto</sup> menses contra Bullam priorem Pauli IV. Nec obstat secunda Bulla Clementis VIII. dispensantis modo supradicto, vt possint Goardiani ob causam ibi assignatam prolongari per sex menses. Nam cum ibi taxauerit tempus prolongationis solum ad sex menses, & dispensatio sit stricti iuris, ac restringenda, non poterit eadem dispensatio extendi ad o<sup>cto</sup> menses: hac enim data extensione ad duos ultra menses admittes extensionem ad quatuor ultra, vel o<sup>cto</sup> menses. Secundo probo, quia Clemens VIII. locutus est solū de Goardianis electis via ordinaria, cum quibus solum dispensauit ad illos sex menses, quia videlicet in capitulo eliguntur, & in capitulo vacāt, vt patet ex tenore ipsius Bullæ: non vero de electis extra capitulum, & extra congregationem, vt fuit iste, de quo agitur. Tertio facilius Papa dispensat in re dubia, quā in re clara: (vt patet in irregularitate homicidij voluntarij, si enim dubia est facilius dispensat quam quando est clara.) Dubia vero res est, & non semper eueniens quod capitula dilatentur, & proinde sub hoc dubio facilius Papa dispensat cum illis, qui ratione capituli dilatati fortassis excedant triennium, quam in casu præsentis vbi certo constat, quod si iste de quo agitur confirmetur in officio modo supra explicato, debet excedere triennium per o<sup>cto</sup> menses, vel duodecim, si capitulum sequens dilatetur per quatuor menses. Vi-  
de

de Rodriguez tom. 2. qq. Regul. quæst. 52. art. 1. ad finem ubi agit quomodo petita sit licentia à summo Pontifice ad prolongationem temporis, quò durat officium Generalis, & Commissarij Generalis in quadam occasione. Quarto in dubio tutior pars est eligenda ne quis exponatur peccato, vt tenent communiter Doctores: at in hoc casu est res dubia, & imminet periculū violandæ Bullæ Pontificiæ, ergo ab ista electione est abstinendum. Vltimo, quia si iste Goardianus posset confirmari in officio modo supradictò, dabitur casus nunquam visus, videlicet, quod vnus Goardianus sit ter electus ad idem officium; nam iste fuit primo electus ante capitulum Secundo in capitulo proxime sequenti. Tercio in congregatione proxime futura sicut prætenditur, ergo ter electus erit pro suo triennio, quod est res inaudita.

## CASVS XVI.

*Dubia quedam circa materiam electionum suborita.*

Circa materiam electionum, quæsitæ sunt dubia sequentia. Primum, an possit præses capituli post vota recepta, quando iam cum tribus scrutatoribus in secreto videt Petrum v. g. iam habere pro se maiorem partem suffragiorum, cuius electio sibi displicet, possit inquam non finito scrutinio, neque publicato scrutinio, prædictum Petrum alias benemeritum, excludere, ac iubere vt electores procedant ad aliam electionem?

Secun-

Secundum. An possit præses capituli dicere in communi ante electionem, ne dent suffragia certo Religioso, quia non debet illum confirmare: & hoc non vocato, nec conuiccto tali Religioso de aliqua culpa.

Tertium. An pro certo officio possit arctare electores, ne dent suffragia nisi vni ex tribus vel quatuor à se designatis, protestans, quod nullum extra illos esset confirmaturus.

Quartum. An si in aliqua electione præses vtatur precibus importunis, simul cum promissionibus, & verbis asperis, significans, vt eligatur Petrus, quem electores elegerunt ea tantum de causa, aliàs non electuri: an talis electio sit dicenda quod facta fuerit per metum, & proinde in conscientia nulla?

Quintum. An absque peccato possit præses electionis pacisci cum electoribus, quod si elegerint Petrum v.g. quem præses prætendit eligere; ipse præses condonabit, & non puniet culpas certorum electorum, qui ante electionem, vel post illam ob culpas debebant sententiar?

Vltimo. An si ego scio secreto, & certo, Petrum v.g. in quadam electione fuisse nulliter electum ob impedimentum substantiale iuris non seruati, possim ego subditus huic prælato non obedire in publico, vel in secreto?

*Ad primum quesitum.*

**A**D primum respondeo, prædictum præsidem peccasse mortaliter cum obligatione restituendi, ac ius canonicum violasse. Probo imprimis ex casu simili posito à Nauarro *lib. 1. consiliorum. tit. de elect. consilio 5.* vbi refert quendam Prælatum in electione

cuiusdam Abbatisſæ, cum quadam eſſet electa per ſuffragia ſufficientia, noluiſſe eam confirmare, ſed proceſſiſſe ad alia, & alia ſcrutinia, ſperans quod aliqua electrices mutarent propoſitum, & ſuffragia darent alteri Moniali, quam præſes intendebat eligere: & minatus eſt ſe allaturum Abbatisſam de foris extra conuentum: propter quæ fatigatæ ſunt Moniales, & illa quæ plura habuerat ſuffragia, renunciauit iuri quod habebat acquiſitum. In quo caſu primo ait Nauar. præſidem peccaſſe mortaliter non confirmando electam habentem maiorem partem ſuffragiorum. Secundo dicit, quod Prælatuſ, & ſecunda electa poſt renunciationem prioris, quæ habuerat ſuffragia, non deberent eſſe tuti, nec ſecuri in conſcientia de validitate ſecundæ electionis: & hoc non obſtante, quod prior electa renunciauit, quia renunciauit in vita. Quæ omnia maiorem locum habent in iſto caſu, in quo iſte Petruſ exclusuſ habebat maiorem partem ſuffragiorum, & præterea non renunciauit iuri quod iam habebat acquiſitum, quod dicitur iuſ ad rem. Secundo probatur, quia Petruſ, qui iam habebat ſuffragia, & fuit exclusuſ, læſuſ fuit notabiliter in re notabili ad quam iuſ habebat, & proinde interuenit peccatum mortale cum onere reſtituendi vt inter alioſ docet Rabello *tom. de obligat iuſt. 1. p. lib. 3. quaſt. 2.* Tertio prædictuſ præſes clare violauit iuſ commune, maxime in cap. *Quia propter. de electione.* vbi iubet Papa, vt factuſ, & examinatuſ ſcrutiniuſ publicentur vota, & ſubdit hæc verba loquens de ſcrutatoribuſ, ſiue examinatoreſ ſcrutiniij. *Vota cunctorum diligenter exquirant, & in ſcriptis redacta mox publicent, vt iſ collatione habita eligatur, in quem omneſ, vel maior pars capituli conſentit.* Iſte autem præſes noluit publicare ſcrutiniuſ, nec publicare illuſ



re illum in quem maior pars capituli consenserat. Et ne idem bis repetam vide omnino circa hoc alias multas, & claras probationes huius rei in alio casu simili quas adduxi hac 2. p. casu 4. à num. 3. & sequent. ubi probaui cum Rodrig. non posse Prælatum, etiam si habeat commissionem Papalem, excludere aliquem ab electione passiuâ, nisi prius illum citauerit, & audierit, & culpas obiiciat ob quas illum excludat, & talis citatus se purget, & defendat: quod cum isto Petro electo obseruatum non est: cum nulla ipsius culpa fuerit publicata. Neque obstat si dicatur, in illa Religione vigere consuetudinem, vt præsides in electionibus habeat exclusiuam liberam, vel potestatem excludendi ab electione passiuâ illum quem voluerit; dicendo, nolo quod fullanus eligatur in hac electione: Non obstat quia talis consuetudo corruptela est, & contra ius naturale: essetque potius potestas infamandi homines, & priuandi illos iure quod habent in voce passiuâ, idque illis non citatis, nec de culpis conuictis ob multa quæ ad hæc congerit Rodrig. supra à me citatus in illo 4. casu.

2 Hinc patet responsio ad secundum quaesitum; dicendum est enim non posse præsidem capituli dicere ante electionem, ne dentur suffragia certo fullano, quia non debet illum confirmare: Non inquam potest nisi prius dictum fullanum, citet, vocet, & de culpis auditum, illum excludat, iuxta illa quæ cum Rodrig. dixi citato casu 4.

3 Ad tertium dubium dico, non posse præsidem electionem arctare dicendo ne dent suffragia nisi vni ex tribus per ipsum designatis. Tenet expresse Rodrig. tom. 2. qq. Reg. quest. 51. art. 11. dicens quod si electores ex illis tantum tribus designatis elegerunt, electio est

nulla, quia per talem arctationem impeditur libertas electorum. Et addit quod si ista electio sic coarctata contigerit in Ordine Minorum, præses electionis manet priuatus officio, si electio fuerit Prouincialis. Addit ibidem Rodriguez se vidisse propriis oculis in Ordine declarari, vt nullas, & repeti tres electiones Guardianorum, eo quod illorum electiones coarctatæ fuerint ad tres, vel quatuor designatos quando vnusquisque fuit electus. Et citat pro se, Couar. Decium, Fortunium, & Bartolum, Philipp. Hoc scio quod in nostra Religione Franciscana statuta generalia Segouiensia titulo *de elect.* §. *Nulla dicunt*, quod nulla electio potest coarctari sine speciali licentia Papæ. Et fundat Rodrig. rationem in iure canonico dicente, quod electio debet esse libera omnino, id vero quod ad tria coarctatur liberum omnino non est.

4 Ad quartum dico, quod preces importunæ maxime personæ grauis, & superioris causant metum, & faciunt inuoluntarium, vt latè probat Sanchez *lib. 4. de Matrim. disp. 10. num. 2.* cum multis ibi citatis. Et idem Sanch. eodem *lib. disput. 7. num. 5. 6. & seqq.* addit quod preces importunæ vna cum metu reuerentiali, si videlicet fiant à persona cui debetur reuerentia, tales preces incutiunt metum cadentem in virum constantem, qui metus annullat electionem, professionem, &c. contractus: & hæc omnia videntur hic concurrisse. Datæ sunt enim preces importunæ, vt dicitur, & metus reuerentialis Prælati: promissiones, & verba aspera ob quæ valde potest timeri quod interuenerit metus cadens in virum constantem iuxta dicta à Sanchez, ac proinde talis electio facta ob illum metum fuerit nulla. Et quod preces importunæ factæ à viris grauibz causent metum cadentem in virum constantem, probat

bat inter alia Sanchez. 2. loco citato ex cap. *cum inter R. de elect.* vbi Papa Innocentius III. dicit de Cœlestino Papa suo prædecessore, quod precibus importunis compulsus sit certum quid concedere; sunt vero hæc verba textus. *Celestinus prædecessor noster ad componendum coegit inuitum.* Vbi Innocentius explicat dicens: *Inuitum quia deuictum instantia precum.* Hic locum habet quod dixit ille: Poeta in illo versu: *Est orare, Ducum species violenta iubendi*: quod scilicet preces grandium sunt violentia. Notat tamen Sanchez, quod vt preces dicantur importunæ, non satis est quod fiant bis, vel ter: sed opus esse vt fiant pluries; & tandem addit quod probatio metus cadentis in virum constantem, probandus relinquitur arbitrio prudentis viri, qui debet considerare omnes circumstantias occurrentes. Nam si alia via, vltra preces, è contrario concurrunt minæ carceris, & Prælati iracundi qui solent minas exequi, non dubium est quin causent metum cadentem in virum constantem, & satis patet ex traditis à Sanchez citato *lib. 4. disp. 5. num. 9.* vbi abunde loquitur de præsentī materia. Et ego addo quod carcer Religiosorum est pœna maior, magisque timenda, quam carcer sæcularium: tum quia rigorosior sit carcer Religionis, vt experientia patet: tum quia infamiam causat, quam non patit carcer sæcularium.

§ Quod autem non solum metus cadens in virum constantem, sed etiam metus minor annullet electionem, probō ex duobus motiuis. Primum est ex cap. *Bona, il. 1. de elect.* vbi gloss. in ver. *metuebant*, ab omnibus recepta, dicit. *Solus timor inferenda violentia, licet illata non sit, violat electionem.* Et intentio Papæ in illo capitulo, id ipsum comprobatur: nam cum certi electores vocati essent ad eligendum Episcopum in ciuitate

Maguntia, scientes illi quod in dicta ciuitate non essent habituri libertatem ad eligendum & quod ibidem vis illis inferenda fuisset, appellarunt ab electione, & fuit appellatio acceptata: vnde infert glossa, quod non solum violentia actu illata violat libertatem eligendi, sed etiam solus timor probabilistalis violentia inferenda, & ibidem glossa parua marginalis citat alios textus ad hoc intentum. Quae omnia possunt ad hoc intentum praesentis casus applicari. Secundum quod dico ad hoc intentum est, quod libertas in electione facile impeditur, ac violatur: facit ad hoc quod tradit Nauarrus citato *consilio 5. de elect. in respons. ad 1.* vbi asserit quod electio facta per solum metum reuerentialem est nulla. Et dico hoc ibi velle Nauarrum, nam, vt ille probet fuisse nullam electionem quandam de qua ibi agit: dicit: quod si professio annullatur per metum reuerentialem, etiam electio annullabitur per eundem metum reuerentialem. Vbi videtur argumentari à maiori ad minus: quasi dicat: si metus reuerentialis annullat professionem quod est maius: à fortiori annullabit electionem, quod est minus. Et quod solus metus reuerentialis annullat professionem iam in praecedentibus dixi, & facit quod pro hoc tradit Valerus Cartuxanus in *lib. de different. vtriusque fori fol. 193. pag. 1. col. 1. & 2.* cum multis quos citat. Denique quod metus, & defectus libertatis annullat electionem, nihil validius afferri potest, & clarius, quam capitulum *vbi periculum. de electione in 6. §.* ceterum vbi Papa Gregorius X. in Concilio Lugdun. loquens de libertate requisita in electionibus sic inquit. *Ceterum (quia cum arbitrium, vel inordinatus captiuat affectum, vel ad certum aliquem obligationis cuiusque necessitas adigit, cessat electio dum libertas adimitur eligendi) &c.* Notentur

tentur hæc verba, quia multum inferuiunt ad casum præsentem. Duo enim dicit principalia: vnum quod adimitur libertas eligendi, cum captiuatur affectus ad certum aliquid: alterum quod eadem adimitur, quando necessitas adigit ad aliquam obligationem.

6 Ad quintum dico, Præsidem illum commisisse peccatum simoniæ in illo pacto faciendo, si pactum impleuit, & culpas electorum non puniuit virtute præcedentis pacti. Probatur ratione clara. Nam in hoc pacto data est res pretio æstimabilis pro re spirituali, quod est clara simonia. Probo & declaro simul: ex parte præsidis data est remissio, & condonatio culparum, & poenarum debitarum, quæ condonatio poenæ est res pretio æstimabilis, vt patet: quotidie enim relegati ad Affricam, vel triremes pecunia emunt à Rege liberationem illius exilij, siue poenæ, & proinde est res æstimabilis pecunia sola condonatio poenæ. In hoc autem casu non solum condonatae sunt poenæ, sed etiam culpæ. Deinde ista condonatio culpæ, & poenæ præcedente pacto data fuit pro re spirituali, id est pro suffragio dando, & officio Ecclesiastico obtinendo: ac proinde fuit clara simonia. Et quod istud pactum de remittenda poena pro obtinenda re spirituali sit simonia, tenet expresse Suarez *tom. 1. de Relig. lib. 4. cap. 37. fol. 530. & seq.* maxime *num. 16. & 19.* & citat pro se Victoriam. Idem tenet Lessius *tom. de iustitia. lib. 2. cap. 35. dub. 21. num. 19.* citans Sotum, & Victoriam. Et addit Suarez citato *num. 19.* quod licet poenæ remittendæ essent iuste infligendæ, etiam tunc esset simonia illas remittere sub pacto: nam sicut dictum est, datur res pretio æstimabilis pro assequenda prælatura, quæ est res spiritualis. Secundo adhuc potest probari ex alio capite, quod huc interuenierit simonia: nam ex parte præsidis

petita est res spiritualis, pro re etiam quasi spirituali: nam petiuit vt darent suffragia Petro, quod est spirituale, idque pro eo quod illis præses concessit (vt mihi dictum est) quod si Petro darent suffragia, permetteret vt electores in aliis electionibus libere eligerent: in quo libertatem eligendi libere, quæ est res spiritualis, dedit sub pretio ob suffragia danda Petro: cum teneretur ex iure permittere electoribus sine pacto vt in aliis omnibus libere eligerent. Quod vero hoc sit simonia, videlicet vendere actum virtutis, & iustitiæ, qui debet permitti gratis, tenet Nauar. *tom. 3. suorum operum. comment. de datis, & acceptis pro iustitia, vel gratia obtinendis. in princip. à num. 4.* multa adducens, & præcipuum quod citat est capit. *videntes. 1. quest. 5.* vbi Papa Gregor. ponit hæc verba, loquens de simonia: *Vendentes in templo sunt, qui hoc quod quibusdam iure competit, ad premium largiuntur.* & cætera ibi ad intentum: at eligere libere competit de iure electoribus, vt patet: & iste præses concessit hoc electoribus in præmium, & in pretium suffragiorum, quæ erant Petro daturi, & citat Nauar. etiam cap. *Non licet eadem causa & quasi.* & alia multa fufe, ac docte congerit Nauar. citato loco ad hoc intentum spectantia. Supposito vero quod ista electio facta fuerit per simoniam, constat ex alio capite, quod officium, vel beneficium Ecclesiasticum obtentum per simoniam est ipso iure nullum, vt constat ex Extravag. Pauli II. in tit. *De simonia.* inter communes Extravag. & ex Bulla Pij V. publicata ad hoc intentum, quas pro hoc casu citant communiter Doctores, maxime Suarez cit. *lib. 4. de Relig. cap. 57. num. 22.* Et Reginaldus *tom. 2. summ. lib. 23. cap. 12 sect. 2.* & alij. Et præterea is qui per simoniam beneficium obtinuit, incurrit excommunicationem, suspensionem, & inhabilitatem

tem ad officia, sicut citatæ Bullæ, & Doctores tradunt. Et vltra hæc, ille qui scit se per simoniam ad officium fuisse promotum, etiam si ille ad actum simoniacum non concurrerit, vbi id sciuerit, tenetur officium renunciare, vt definitur in cap. *Nobis.* & cap. *Sicut tuis. de simon.* & docent Doctores communiter in materia de simonia, maxime Nauar. lib. 5. *consiliorum conf.* 65. tit. de *simonia. num.* 3. & alij communiter.

7 Ex resolutione data in responsione proxima ad quintum, ortus est scrupulus tactus in dubio 6. an scilicet ego quia scio certo Petrum electum esse per simoniam, vel per aliud impedimentum clare annullans electionem, possim illi non obedire? ad quod breuiter dico sequentia. Primo quod in publico propter scandalum obediendum est, maxime cum iste talis habeat possessionem officij, neque sit illo priuatus per sententiam, & præcipue quia habet titulum, putatum saltem & publice collatum. Neque peccatum vllum veniale timeri potest in obedientia illi exhibita: sed potius peccabitur si illi non obediant subditi propter scandalum. An vero facta ab illo, sic nulliter electo, sint valida in vtroque foro, pendent ab illa doctrina quam Doctores communiter tradunt explicantes leg. *Barbarius. ff. de offic. Prætor.* quorum resolutio est, quod si talis nulliter electus habet alias titulum putatiuum, vt habet iste, & est error communis in populo, videlicet quod omnes credunt non fuisse datum aliquem errorem in electione illius: gesta per illum sunt valida in vtroque foro, etiam si sit prælatus Ecclesiasticus. De quo multa Sanchez lib. 3. de *matrim. disp.* 22. à num. 5. & maxime num. 13. Dico secundo, quod ille subditus qui certo sciret taliter electum fuisse electum nulliter, & electionem illius fuisse inuvalidam ob impedimentum

canonicum, poterit in secreto illius mandatis non obedire si cesset scandalum. Hæc duo responsa de foro externo & interno, siue de obediendo in publico, & de licentia non obediendi in secreto, ponit Valero Cartuxano *lib. de different. utriusque fori. verb. nullitas. differ. 4. vbi in num. 2. vt probet quod in hoc casu subditus in occulto possit non obedire prælato, quem scit nulliter electum* citat D. Antonin. Syluest. & Nauar. locus Antonini est *3. part. tit. 15. cap. 1. §. 2. Syluest. id tenet, ver. beneficium 3. post princip* Et citat ibi Cartuxanus glossant quandam dicentem, quod si prælatus meus est occulte hæreticus, non teneor in occulto abstinere à celebratione, licet me excommunicauerit, nisi tantum in publico: & dicit eandem opinionem tenere Felinum, Innocent. & Panorm.

## C A S V S XVII.

*De quodam iure patronatus in Conuentu  
Monialium.*

**Q**uidam homo nobilis litem mouit contra Conuentum Monialium, dicens sibi competere ius patronatus ipsius, ita vt neque vllam Nouitiam ipso inconsulto deberent recipere. Præcipuum quod allegauit fuit primo, quod pater suus fuerit in possessione illius iuris patronatus, idque per scripturam publicam, qua Moniales illum acceptarunt loco patroni. Secundo ostendebat epistolam cuiusdam Abbatisæ ad se missam, in qua ipsum vocat patronum Conuentus. Addebat quod pater ipse adificauerat murum totius clausuræ



clausuræ Conuentus:& quod Conuentus habebat terras, ac possessiones, quæ fuerunt progenitorum suorum.

Non habebat Bullam aliquam Papæ, nec scripturam factam in principio ædificationis Conuentus auctoritate Episcopi, vel Prælati firmatam. Et quod attinet ad murum Conuentus ædificatum à patre, constitit quod id fecit pro dote duarum filiarum receptarum à Conuentu vt essent Moniales. Possessiones vero alias, ac terras acquisiuit Conuentus per hæreditatem vnus consanguineæ patris ipsius, quæ illic fuerat Monialis Mota lite coram Collectore Apostolico: quæsitum fuit, an dictus nobilis præfens haberet ius ad ius patronatus Conuentus, quod pater suus possederat per scripturam publicam &c.

Respondetur ius patronatus sibi nullo modo competere, idque ob rationes sequentes, claras, & urgentes.

I Prima ratio sit, quia cum ius patronatus Ecclesiæ sit res Ecclesiastica, & ius Ecclesiasticum, non potest sæcularis persona illud acquirere, nisi sibi detur à superiore aliquo Ecclesiæ, qualis non est Abbatissa, nec Moniales, vt ex dicendis patebit; ac proinde oportet, vel detur à Papa per Bullam particularem, quam iste non ostendit, vel saltem detur ab Episcopo in prima fundatione Conuentus, idque interuenientibus conditionibus de quibus statim, vt scilicet ipse patronus fundauerit, vel quid simile. Quod vero ad hoc requiratur vt præcedat consensus Episcopi, si Moniales sunt subiectæ Episcopo, vel Prouincialis Regularis, si illius regimini subduntur, constat clare ex cap. *Nobis fuit, de iure patroni*, vbi Papa loquens de titulo ius patronatus, quomodo sit dandus, ait: *Signis Ecclesiæ cum assensu*

*assensu Diocesani construxit, &c.* Et idem habetur in cap. proxime antecedente eodem titulo. Quod vero si sine Moniales subditæ Prælato Regulari, requiratur consensus illius ad dandum ius patronatus, habetur expresse ex Clement. I. de rebus Ecclesiæ non alien. vbi glossa in *ver. proprij*, dicens non posse alienari rem Ecclesiæ, sine licentia proprij Prælati, ait glossa cum multis quos citat, quod in Ecclesia exempta qualis est conuentus debet interuenire licentia Prælati exempti. Iam vero quod dare ius patronatus sit alienare res Ecclesiæ, tenet expresse Rodriguez *Addit. ad sum. tom. 4.* verbo ius patronatus *concl. 5.* vbi ait quod Prouincialis cum Diffinitoribus in ordine Minorum non possunt dare ius patronatus suæ Ecclesiæ, quia non possunt alienare bona Ordinis, quæ sunt bona Papæ, quæ proinde solus Syndicus Papæ potest alienare: & confirmatur, quod dare ius patronatus sit alienare, nam patronus habet dominium in aliquibus iuribus, & vñibus Ecclesiæ, seu Conuentus, quod dominium conuentus transfert in patronum, vt quod possit præsentare beneficia, & similia: Iam vero transferre dominium à se circa tales vsus est alienare vt constat. Cum ergo dare ius patronatus sit alienare, & Conuentus Monialium non possit alienare sine licentia Prælati iuxta citatam Clementinam, sequitur quod non potuerunt hæc Moniales dare hoc ius patronatus sine licentia Episcopi, vel Prouincialis. Et per hæc manet satis responsum ad principale fundamentum quo nititur iste pretensor allegans iam patrem suum per scripturam publicam fuisse constitutum, & acceptatum patronum à Conuentu Monialium. Respondetur enim id non obitare, & scripturam nihil valere: cum Moniales sine Prouinciali id non potuerint facere;

cum

cum illud fuerit alienare bona, & iura Ecclesiæ, quod sine Prælato facere non potuerunt. Idem tenet Rodriguez eodem *tom. 4. verb. procurator cap. 106. in fine*, vbi ad hoc intentum ait Syndicum Conuentus D. Francisci, qui alias habet facultatem Papæ alienandi bona Ordinis non posse dare ius patronatus vnius capellæ fratrum sine consensu Prouincialis: & à fortiori Conuentus Monialium non poterat dare ius patronatus patri istius filij sine consensu Prouincialis sui Prælati, vel Episcopi, si suus erat Prælatus.

2 Pro eodem intento adhuc aduerto, quod dato, quod iste prætenfor, & pater ipsius haberent verum, ius patronatus de consensu Prælati adhuc non poterant eo vti addentes aliquid quod non esset expressum in concessione iuris patronatus: vnde si in tali concessione non esset expressum, quod Nouitiæ reciperentur de patroni consensu (quod neque Regibus conuentuum patronis conceditur) non poterat hic prætenfor prohibere Monialibus ne Nouitiam reciperent illo inconsulto: constat hoc ex cap. citato *Præterea quoniam. de iure patrona.* vbi Papa præcipit sub pœna excommunicationis vt patroni cessent à grauaminibus Ecclesiarum, nihilque in ipsis præter antiquos, & moderatos redditus à locorum Episcopis constitutos exigere, &c. At non recipere Nouitias sine consensu patroni Conuentus Monialium, est grauamen notabile, nec habetur in illa scriptura nulliter concessa patri istius prætenforis. Imo, vt proxime dixi, Reges, & multi alij qui hodie sunt veri patroni Conuentus Monialium, & non sibi reseruauit, neque vsurparunt hoc ius, vt Nouitiæ Monialium debeant recipi cum suo assensu, sicut experientia docet in hoc regno Portugalliæ, in multis conuëctibus à Regibus fundatis, quorum proinde sunt veri

veri patroni, & alij Domini in aliis à se fundatis, quorum etiam sunt patroni, & tamen Prouinciales recipiunt Nouitias in illis Conuentibus non petito consensu Regis, vel cæterorum patronorum, & sunt in mea Prouincia octo Conuentus Monialium istius generis.

3 Præterea vt ius patronatus alicui debitus sit, vna ex tribus rebus necessario debet interuenire, iuxta ius commune, & communem Doctorum sententiam. Prima est, vt det solum, seu terram ad ædificium. Secunda, si saltem ædificet, vel reædificet totam Ecclesiam. Tertia, si dotem assignet Ecclesiæ. De his tribus vide Rodrig. tom. 2. qq. Regul. quæst. 49. art. 7. paulo post init. vbi cum multis Canonistis citat ad hoc versum illum, qui dicit: *Patronum faciunt dos, edificatio, fundus*. At iste prætenso, & pater ipsius nihil horum fecerunt Conuentui, vt patet, murum enim quem fecerunt, & possessiones quas donarunt, fuerunt omnia acquisita ex debito oneroso, vel ex iure hæreditario, quæ non sufficiunt ad dandum ius patronatus: probatur clare, quia illa quæ dantur Ecclesiæ pro acquirendo iure patronatus, debent esse donationes gratuita, & liberales, quales non fuerunt prædictæ. Quod inquam vt ius patronatus acquiratur, debeat præcedere donatio liberalis, inter alios textus probat cap. *Piæ mentis* 16. quæst. 16. vbi loquens de patrono ait, quod amplectenda est deuotio, &c. Ille vero qui dedit ob dotem filiarum, vel propter hæreditatem, non dedit ex deuotione, sed ex obligatione. Idem habetur eadem causa, & quæst. cap. *quicumque*. vbi dicitur: Quicumque fidelium deuotione propria de facultatibus suis aliquid Ecclesiæ contulerit, &c. At faciens contractum cum Monialibus pro dote filiarum, vel dans illud quod ob hæreditatem debetur

betur, non dat ex deuotione, sed ex obligatione. Secundo principaliter, licet iste qui ædificauit murum Conuentus, non id faceret ob dotem filiarum receptarum, sed mere liberaliter, hoc opus & ædificium tam paruum non erat sufficiens, vt propter illud ius patronatus assequeretur. Sic tenet glossa in cap. *quicumque*. citato, & ibi citat cap. *Nemo. distinct.* 1. de consecrat. & tenet Riccius 2. par. *Decisionum collect.* 1680. adducens vnam decisionem Rotæ, & alios: qui enim fecit tantum murum Conuentus, non dicitur ædificare Conuentum: & in cap. *Nemo*. citato, dicitur quod patronus debet ostendere donationem; Ille vero non probat donationem factam à se, vel à patre, sed probat solutionem.

4 Ad id quod assertur in probationem, iam patrem istius prætenforis fuisse in possessione istius iuspatronatus, primo dico, iam fuisse responsum supra, Moniales id non potuisse concedere absque licentia Prouincialis, iuxta Clementinam, & ideo eius possessio non fuit possessio, sed intrusio. Dico secundo, quod tam paruum tempus patris sui non potuit inducere præscriptionem contra Moniales S. Claræ, quæ gaudent priuilegiis Fratrum Minorum, quorum vnum est vt non possit contra illos præscribi nisi per spatium annorum centum, vt ego dixi in 1. tom. *dubior. regul.* verbo *prescribere*. citans priuilegium concessum Patribus D. Benedicti Romæ extra muros apud D. Paulum: & sic Ecclesia Monialium habet restitutionem. Ex alio etiã capite haberent hæ Moniales restitutionem, etiam contra possessorem; idque ex priuilegio amplo concessò à Ioanne XXII. Religiosis congregationis montis Oliueti, quod citat Rodrig. tom. 3. *qq. quest.* 57. art. 2. per quod illis concessit vt possint recuperare bona in quibus Conuentus est læsus, quamuis læsio facta esset culpa

culpa prælatorum, vel officialium Conuentus, vt ibi ample citat Rodrig. quem vide. At in hoc casu, et iam si Moniales darent ius patronatus patri prætenforis istius cum licentia Prouincialis, adhuc possent habere restitutionem contra ipsum per hoc priuilegium: quia læsus fuit Conuentus notabiliter culpa prælati dantis patronatum homini non danti solum pro Ecclesia, neque dotanti, neque edificanti, & cum tali onere, vt Nouitię non recipiantur sine illius consensu.

§ Omnino autem friuolum & ridiculum est quod allegat pro suo patronatu, videlicet quandam Abbatissam ipsum in epistola vocare suum patronum: nam si ille à parte rei antea non habebat verum ius patronatus, vt abunde manet in præcedentibus probatum, quid validitatis habet ad idem ius illi tribuendum sola epistola Abbatissę, quę per se sola id dare non poterat, imo nec totus Conuentus absque licentia Prouincialis? Vocauit ergo Abbatissa illum patronum ex vi falsi tituli antiqui, qui non poterat reualidari cum sola epistola missiua, sed per totum Conuentum cum Prouinciali; confirmatur hoc à simili: quia quando ipse Papa confirmat aliquod statutum confirmatione ordinaria (non dicens ex certa scientia) illa confirmatio nullum robur nouum addit rei confirmatę, sed relinquit eam in suo robore antiquo, vt est communis opinio Canonistarum, de quo optime Syluest. verb. *confirmatio*. in princip. vbi citat ad hoc quatuor capita iuris canonici, maxime cap. *dilecta*. de *confirmatione utili & inutili*. Si ergo Papa confirmans statutum via communi nullum illi dat robur, sed relinquit illud in robore antiquo: à fortiori epistola missiua vocans patronum hunc prætenforem, nullum nouum ius illi tribuit ad patronatũ, sed relinquit illud in suo robore antiquo quod erat nullũ.

CASVS

## CASVS XVIII.

*An aliqua Religio possit condere statutum contrarium alicui præcepto, siue decreto  
sue Regulae.*

I SUPpono primo tria vota essentialia cuiusque Religionis nunquam posse præscribi per tempus quantumcumque longissimum, quia tria vota essentialia sunt de iure naturali diuino, contra quod non datur præscriptio, & hæc tria vota semper obligant ad mortale in quacumque Regula. Suppono secundò aliquas Regulas aliquarum Religionum non obligare ad peccatum mortale, nec veniale, præter tria vota essentialia, sit exemplum in Regula Beati Patris Domini, cuius decreta præter tria vota essentialia, non obligant ad mortale, neque ad veniale, ut inter alios refert Sanchez tom. 2. Decalogi, libr. 6. cap. 4. ex D. Thoma. Aliæ Regulæ præter tria vota essentialia habent etiam aliqua præcepta obligantia ad peccatum mortale ex declaratione Sedis Apostolicæ, qualis est inter alias, Regula Fratrum Minorum, quæ ultra tria vota essentialia habet plurima præcepta obligantia ad mortale, quæ vocantur obseruantia Regulares. Suppono tertio ex Sanchez citato lib. 6. cap. 2. num. 26. quod obseruantia Regulares, id est præcepta Regulæ extra tria vota possunt præscribi per consuetudinem longam in contrarium, licet alias ex declaratione Papæ obligent ad mortale. Probat Sanchez, quia cum hæc præcepta extra tria vota, non sint in se vota, sed solum præcepta positiua, quamuis à Sede Apostolica consi-

mata, possunt præscribi longo tempore, sicut multa alia præcepta Ecclesiæ longo tempore præscripta sunt in iure. Suppono hæc tria supradicta etiam habere locum in Regulis Monialium, quæ quoad quatuor vota essentialia obligant ad mortale, & quoad hæc non possunt præscribi. Sed ultra tria vota essentialia habent multa decreta, & præcepta quæ ut plurimum non obligant ad peccatum etiam veniale, sicut ipsæ viderint.

2. Tota ergo quæstio est, an Religio tota in capitulo generali, vel Generalis Ordinis possint condere aliquod statutum, vel facere decretum contrarium alicui præcepto, vel decreto contento in sua Regula, vel in Regula Monialium suarum, per quod statutum, vel decretum præceptum Regulæ annulletur, vel immutetur. Et suppono quod tale præceptum Regulæ quod immutatur per hoc statutum, non obligat ex vi Regulæ, neque ad veniale. Quod ergo possit Religio, vel Generalis istius facere prædictum decretum, vel statutum, probatur primo, quia subditus non peccat venialiter omittendo hoc præceptum Regulæ, vel operando contra illud ut supposui: ergo nec Religio, vel Generalis peccabunt contra illud præceptum Regulæ aliquid addendo, vel contrarium præcipiendo, quia per hoc contrarium statutum nõ faciunt peccare subditum, nec venialiter. Secundo, ut diximus ex Sanchez *num. 1.* consuetudo in contrarium potest facere ut aliqua obseruantia regularis, seu præceptum Regulæ extra tria vota obligans ad mortale, abrogetur, & desinat obligare propter consuetudinem contrariam; si hoc ergo potest consuetudo præscripta tollendo illud præceptum, idem poterit facere tota Religio, vel Generalis ipsius habens supremam potestatem circa regimen Religiosorum. Tertio quia magis obligat vo-  
tum



tum simplex factum à quocumque, quam obliget illud præceptum regulæ, de quo agimus, cum nec obliget ad veniale: at iuxta Doctores communiter in materia de voto, si post votum materia voti sit mutata, ita vt reddita sit inutilis, vel nociua, votum cessat, ac desinit obligare: ergo si in Religione materia alicuius præcepti contenti in regula sit mutata per longitudinem temporis, vel reddita inutilis, vel nociua, ita vt Prælati, & ordo iudicent fructuosius fore oppositum illius præcepti, poterunt illud statuere, & mandare ad commodius regimen ipsius Religionis.

3 His non obstantibus, resolute credo, quod neque capitulum generale cum ipso Generali, neque ipsum Generalem per se posse facere statutum, vel decretum contrarium alicui præcepto posito in regula etiam si tale præceptum non obliget ad veniale, idque siue sit in regula seruata à fratribus, siue in regula Monialium eisdem fratribus subditarum, dummodo illa regula sit confirmata à sede Apostolica, quales sunt hodie omnes regulæ Fratrum, & Monialium. Hæc conclusio probatur validissimis, & clavis argumentis.

1 Primum sit. Papa in confirmatione cuiusque Regulæ Religiosorum in fine, apponit hæc verba: *Nullo ergo omnino liceat hanc paginam nostre confirmationis infringere, vel ei ausu temerario contrariare. Si quis autem hoc attentare presumpserit, indignationem omnipotentis Dei se noverit incursurum.* Quæ verba sic rigorosa satis indicant mentem esse Papæ obligare sub mortali, ne aliquis contradicat regulæ sic confirmatæ: vt enim Doctores communiter dicunt, ex tenore verborum, quibus utitur legislator colligendum est an præcipiat sub mortali, vel veniali, vt si utatur verbis efficacibus, præceptiuis, nimirum prohibitiuis, & comminatiuis: at in prædictis

Papa utitur verbis similibus, ait enim : *Nullus omnino*, quæ sunt verba efficacissima, & valde prohibitiua : ait præterea contra facientem, *incursum esse indignationem Dei*, quod clare supponit velle Papam contradic-ctorem obligare ad peccatum, nam indignatio Dei non incurritur nisi ob peccatum. Cum ergo per hoc statutum factum contra regulam (si fiat) contradicatur regulæ, & proinde contradicatur confirmationi illius, per quam confirmantur omnia & singula contenta in regula, sequitur quod peccabunt fractores talis statuti vel decreti. Secundo colligitur hoc saltem ex regula P. N. Francisci cap. 10. regulæ, ubi loquens de Prouincialibus erga subditos gubernandos dicit : *Non præcipientes eis aliquid quod sit contra animam suam, & regulam*. Et aduerto quod citata proxime verba poni solita in confirmatione regulæ, *Nulli ergo omnino liceat*. Apposita sunt in confirmatione regulæ vtriusque Monialium S. Claræ, vt videre est in fine vtriusque regulæ. Et eodem cap. 10. citato, P. N. Franciscus dicit, quod fratres non tenentur obedire Prouinciali, si aliquid præcipiat contra regulam, illis verbis. *Obediant suis ministris in omnibus quæ promiserunt Domino observare, & non sunt contraria animæ suæ, & regula nostra*. Quod eodem modo intelligi debet de regulis Monialium erga obedientiæ prælatorum præcipientium aliquid contra regulam suam, cum utrobique sit eadem omnino ratio.

2 Secundo principaliter probo, quia inferior non potest immutare legem superioris, *Clement. Ne Roman. de elect.* ubi dicitur iuncta rubrica, quod inferior non potest immutare constitutionem totam superioris, nec partem illius : ubi gloss. verb. *Inferiorem*. dicit, quod nec Concilium generale potest abrogare statutum Papæ. Idem tenet Nauarrus *lib. 3. consilior. tit. de regular.*

gular conf. 5. citans cap. quod iis. de maior. & obed. & cap. Inferior. dist. 21. inno addunt Iuristæ, quod nec par in parēem habet potestatem. At capitulum generale simul cum Generali, & Generalis per se, sunt inferiores Papæ, vt patet: ergo non possunt abrogare legem confirmatam à Papa positam in regula approbata per Papam. Neque obstat si dicatur quod prælatus Generalis, vel Prouincialis dispensant in aliquibus præceptis regulæ, vt in ieiunio, & similibus, vnde poterunt facere statutum contra illa præcepta in quibus dispensant. Non obstat, quoniam valde diuersum est dispensare in vno præcepto; & facere statutum contra illud. Nam dispensatio non tollit præceptum in quo dispensatur; sed solum declarat, istum pro nunc non teneri ad præceptum & manet præceptum in suo robore quod ad alios. At facere statutum contra præceptum regulæ, est omnino tollere illud præceptum. Secundo, dico quod Prælati dispensantes in præcepto regulæ faciunt id ex commissione Papæ ad dispensandum: qui tamen committens vt dispensent Prælati, non censetur committere vt faciant statutum contra præceptum regulæ. Exemplum est clarum, in Prælato dispensante cum subdito non valente dicere horas canonicas iuxta concessionēs papales: talis enim Prælatus solum facit vt iste subditus pro nunc, non teneatur ad illas: at non facit statutum deobligans illum semper in futuro à recitandis prædictis horis. Quod etiam ex regula Fratrum Minorum potest confirmari. In illa enim dicitur quod nullus Fratrum exerceat officium prædicationis nisi fuerit examinatus, & approbatus à Ministro Generali: & sic seruabatur in principio Ordinis. Quia tamen postea Ordo excreuit; & valde onerosum erat, vt omnes prædicaturi confluerent ex tam remotis partibus

examinandi à Generali, commisit Papa Nicolaus in cap. *exiit de rec. signific.* vt Prouinciales possent facere prædictum examèn, & approbationem prædicatorũ. Vbi vides quod ad dispensandum in vno præcepto regulæ necessaria fuit commissio Papæ; & proinde si Prælati dispensant in regula, id faciunt ex commissione Papæ, quæ commissio ad dispensandum, non est commissio ad faciendum statutum contra Regulam, quia valde diuersa sunt, vt constat ex paulo supra dictis.

3 Tertio principaliter probatur hoc: quia si Generalis posset immutare, vel abrogare vnum præceptum suæ regulæ, eo quod non obliget ad peccatum mortale, vel v. posset id facere in multis præceptis simul eiusdem Regulæ: imo posset id facere in omnibus præceptis Regulæ, & proinde derogare toti regulæ: quod est plusquam absurdum. Tenet consequentia, quia non est maior ratio de vno præcepto, quam de alio, & de duobus, &c. Si autem id potest impune facere in vno, poterit in singulis, & in omnibus. Demus exemplum in regula, cuius nullum præceptum obligat ad peccatum, qualem supra diximus esse Regulam B. P. Dominici: Si ex eo quod nullum eius præceptum obligat ad peccatum posset Prouincialis vnum illius præceptum annullare, posset & singula, posset & omnia. Quod non credo ab illis tam Religiosis Patribus B. Dominici concedendum: imo puto illos de sua Regula dicturos id quod Christus D. de lege antiqua dixit non violanda ante Passionem suam. Iota vnum, aut vnus apex nõ præteribit à lege, &c. quod singulæ Religiones circa suas regulas satagunt custodire.

4 Quarto principaliter hoc probo ab autoritate: & imprimis, hoc probatur ex D. Bern. lib. 1. de dispens. & præcepto

*præcepto col. 4. vbi tractans quod Prælatus nihil possit præcipere contra regulam. Ponit hæc verba. Nihil mihi Prælatus prohibeat horum, quæ promissi, nec plus exigit quàm promissi. Idem tenet D. Tho. quod l. 10. art. 10. cap. 22. q. 104. art. 5. ad 3. & S. Antoninus 3. part. tit. 16. cap. 10. § 9. & Gaet. ad citatum art. 5. D. Thom. Facit etiam optime quod tradit D. Thomas 1. 2. quest. 97. art. 2. vbi eleganter probat nunquam esse utile recedere à consuetudine antiqua tradita à maioribus: Constat vero quod præceptum positum in regula est consuetudo antiqua tradita à maioribus fundatoribus Religionum & à Papa regulam confirmante. Verba autem D. Thomæ sunt hæc. *Habet legis mutatio quantum in se est detrimentum quoddam communis salutis: quia ad observationem legum plurimum valet consuetudo. & paulo post subdit: Unde dicitur à iurisperito, quod in novis rebus constituendis evidens debet esse utilitas, ut recte recedatur ab eo iure quod diu æquum visum est.* Sic ille optime sicut solet. Et ibidem citat textum ex 12. dist. In quo Papa Nicolaus sic inquit. *Ridiculum est, & satis abominabile dedecus, ut traditiones, quas antiquitus à patribus suscepimus infringi patiamur.* Idem tenet expresse Sylvester verbo Religio 3. quest. 2. ad finem, vbi dicit expresse quod Regula non potest mutari à Prælato. Et citat Ioannem Andræam sic expresse dicentem. Idem tenet in terminis Lessius lib. 2. de iust. cap. 41. dub. 9. num. 74. §. quod si superior, vbi dicit, Prælatum non esse dominum regulæ ut illam mutet, sed esse tantum custodem regulæ, ut illam faciat observare, & per illam subditos dirigat. Idem colligitur ex Sanchez lib. 6. decalogi cap. 3. num. 8. in principio.*

5 Circa prædicta insurgit dubitatio: an dato quod factum sit vnum statutum contra præceptum aliquod

regulæ, & hoc statutum per consuetudinem quadraginta annorum sit receptum in aliquibus prouinciis vnus Ordinis, v. g. in prouinciis Minorum quæ sunt in Portugallia, quæ consuetudo sufficiens est ad abrogandam legem Ecclesiasticam, & tamen hoc statutum non fuit practicum, nec receptum in aliis prouinciis eiusdem Ordinis, an prædictum statutum obliget in illis prouinciis vbi non fuit receptum, & an possit tolerari, & seruari in illis in quibus fuit receptum? Respondeo nullo modo obligare in illis prouinciis, in quibus nunquam fuit receptum: sed posse tolerari in illis prouinciis, in quibus per quadraginta annos est receptum. Prior pars constat, quia iuxta communem Doctorum sententiam lex non recepta in principio non obligat: & lex istius statuti non fuit recepta in illis prouinciis, vt dicitur, imo fuit reiecta, quia reclamabat lex opposita regulæ contra quam statutum factum est. Secunda pars probatur, quia consuetudo præscripta si est rationalis, & quadraginta annorum, potest abrogare legem Ecclesiasticam positiuam, non vero naturalem. Neque vero nouum est quod lex vna obliget in vno regno vbi fuit recepta, non vero obliget in alio vbi non fuit recepta. Constat clare ex Concilio Tridentino, quod obligat in tota Ecclesia vbi fuit receptum: Non vero obligat in Gallia vbi non fuit receptum in totum, sed quoad solas definitiones fidei, quas illi non possunt reiicere. Est etiam exemplum in motu proprio Pij V. *De censibus*, qui in aliquibus regnis non fuit receptus quoad omnes clausulas illius.

6 Pro solutione argumentorum præmitto quod consuetudo potest abrogare legem generalem etiam Ecclesiasticam, si sit consuetudo legitime præscripta, rationalis, &c. De quo multa tradit Suarez *tom. de legibus*  
bus

*bus lib. 7. cap. 18. à num. 2.* vbi citat multos Doctores, & textus: sed quando consuetudo sic abrogat legē Ecclesiæ, est quia Papa consentit, vt stante tali consuetudine lex non obliget, sicut aliàs ius canonicum habet definitum in aliquibus capitulis *in tit. De consuetudine*, & sic in tali casu Papa consentit explicite, vt talis consuetudo legem abroget. In quo casu aduerto, quod tunc nullus prælatus inferior Papa abrogat illam legem, neque Episcopus, nec Archiepiscopus: sed ipse Papa abrogat, vel consentit abrogari propter consuetudinem contrariam. Vnde maiorem vim habet consuetudo de consensu Papæ ad abrogandam legem Ecclesiæ, quam habeat Archiepiscopus, vel alius prælatus inferior Papa. Nam Archiepiscopus per se non potest abrogare legem Ecclesiæ generalē, quam tamen abrogare potest consuetudo modo prædicto, id est annuente Papa.

*Solutio argumentorum.*

7 **H**Oc posito, ad primum argumentum, concessio antecedente, videlicet non peccare subditum facientem contra præceptum regulæ quod non obligat ad peccatum, nego consequentiam, videlicet, quod ideo possit Prælatus sine peccato, facere statutum in contrarium. Do imprimis exemplum clarum. Ille qui facit contra consilia Euangelica, videlicet contra paupertatem, &c. nolens iste pauper, nolens seruare virginitatem, sed nubit vel quid simile, non peccat etiam venialiter vt omnes concedunt dicentes non esse peccatum veniale agere contra consilia Euangelica: & tamen Prælatus non posset in hoc cōtrariū præcipere, quod videlicet operarentur contra consilia

Euangelica, vel vt ab illis abstinerent: Iam enim præciperet contra consilia Euangelica. Secundo dico esse diuersam rationem: nam si vnus tantum vel alter Religiosus operantur contra tale præceptum regulæ non obligans ad peccatum, non proinde operatur tota Religio: At per statutum factum contra illud præceptum regulæ tota Religio operatur contra Regulam. Tertio facit optime quod tradit Sanchez *tom. 2. decalogi lib. 6. cap. 4. num. 18.* dicens quod in Religione, cuius regula non obligat ad peccatum, si aliquis Religiosus nollet vnquam seruare silentium, nec orare, nec modeste incedere, & ingrederetur omnium Religiosorum cubicula, & similia Religionis statuta transgrederetur, eo quod singula ad culpam per se non obligant: iste absq; dubio perturbaret totam Religionem, & se in eo statu constitueret, vt oporteret tanquam incorrigibilem eum ab ordine expelli, sic Sanchez: & per hæc satis responsum manet ad primum argumentum negando illius consequentiam.

8 Ad secundum argumentum similiter concesso antecedente neganda est consequentia. Patet ratio ex dictis proxime in *num. 6.* Nam potest consuetudo præscripta abrogare legem Papæ modo ibi exposito, & ob causam ibi assignatam, quia scilicet Papa consentit: hanc tamen legis abrogationem nõ potest facere Prælatus inferior Papa propria authoritate, quia ad abrogandam legem Ecclesiæ non habet Prælatus Papa inferior tantam potestatem, quantam habet consuetudo modo explicato eodem *num. 6.*

9 Ad tertium argumentum dicendum est, numquam aliquam materiam contentam in regula approbata per Papam posse reddi nociuam animæ quia cum sint omnia in illa contenta bona, & recta ex se nunquam possunt



possunt esse nociua, & iniqua communitati: Item numquam possunt esse inutilia bono communi, quia si talia esse possent numquam à Papa approbarentur, maxime cum per tot annos seruata numquam sint inuenta inutilia, nociua, &c. Item numquam materia contenta in Regula potest reddi impossibilis communitati, quæ iam à tot annis experta est omnia contenta in regula esse possibilia, licet aliàs sint difficilia, vt patet maxime in perpetua abstinentia à carnibus in Cartuzia, & in multis præceptis contentis in Regula B.P.N. Francisci, quæ licet difficilia sint, non tamen sunt impossibilia communitati. Quod si aliqua materia contenta in regula euaderet impossibilis alicui, vel aliquibus in particulari, tunc sufficeret cum istis dispensare per concessionem Pontificias: non vero statutum facere obligans ad non seruandam regulam etiam in vna particulari materia.

---

### CASVS XIX.

*Vbi sint dicenda missæ relicte à quodam defuncto, qui locum non declarauit.*

**Q**uidam defunctus elegit ante mortem sepulturam apud conuentum quendam Regularium. Iussit in testamento vt pro anima sua celebrarentur perpetuo centum missæ, sed non declarauit locum in quo essent dicendæ. Parochus clericus dicebat illas Missas ad se pertinere. Et allegauit quod viginti ab hinc annis in parochia sint dictæ. Prælatus Regularis Conuentus dicebat fore dicendas in Conuentu seu loco

loco sepulturæ electæ à defuncto.

Quæritur 1. vbi sint dicendæ Missæ. Secundo an parrocho profit quasipossessio viginti annorum, vt in parochiali Ecclesia sint dicendæ?

1 Quod attinet ad primum quæsitum, dico has Missas dicendas esse in Conuentu vbi sepultus est defunctus. Sic expresse tenet Rodriguez *Addit. ad summam tom. 4. ver. Missa. cap. 51. concl. 3.* assignat ibi exempla fundata in iure, & citat Bartolum, qui videri potest in loco ibi citato. Ego hoc probo ex hoc communi dicto Iuristarum, videlicet. Omnis actus præsumitur fieri eo modo quo est utilior ipsi agenti, quando agens non declarat intentionem: sed Missæ dictæ in loco vbi est sepultus defunctus, cæteris paribus, sunt utiliores defuncto, quam dictæ extra locum sepulturæ; ergo hæc Missæ sunt dicendæ in Conuentu vbi sepultus est defunctus.

Maiores asseritur à Sanchez *lib. 6. decalogi cap. 18. num. 48: tom. 2.* vbi citans Bartolum, Tiraquell. & Menochium, dicit quod actus præsumitur fieri ab agente eo modo quo sibi est utilior. Minor, quod scilicet Missæ pro defuncto magis illi profint dictæ in loco sepulturæ: asseritur primo ab Innocentio Doctissimo Canonista ad capitulum *Fraternitatem. de sepulturis*. Et licet non legerim rationem ad id ab Innocentio adductam, videtur posse hoc probari ex praxi Ecclesiæ, quæ in processione generali in die omnium defunctorum primam orationem dicit pro illis qui sepulti sunt in illa Ecclesia. Et potest adhuc probari per hoc simile. Nam Missa, vt dicunt Theologi, licet offeratur etiam pro omnibus fidelibus, magis tamen prodest illis qui sunt præsentibus Missæ, quam illis, qui sunt absentes: ita vt dicant Theologi quod tres portiones applicantur in Missa:

Missæ: una sacerdoti: altera toti Ecclesiæ: altera circumstantibus, & præsentibus missæ. Cum ergo sacerdos in secundo Memento Missæ oret in communi pro defunctis, cæteris paribus credi potest quod prius, & in particulari orabit pro defunctis præsentibus, id est sepultis in illa Ecclesia: sicut in Memento pro viuis specificat dicens, & omnium circumstantium. Et confirmatur, quia cum post Missam pro defuncto dicatur Responsorium pro defuncto cum aspersione aquæ benedictæ, illa aspersio facta super sepulturam magis illi profutura videtur, quam si fiat extra sepulturam. Probata igitur maiori, ac minori argumenti, bene inferitur consequentia, quod scilicet hæ Missæ sint dicendæ in loco sepulturæ. Secundo probatur hoc ex ratione quam innuit Rodrig. citato loco, videlicet quia locus sepulturæ est domicilium electum à defuncto, in quibus verbis innuitur hæc ratio, vel similitudo. Homo in vita debet recipere sacramenta in loco ubi eligit domicilium: præterea in loco sui domicilij debet citari, & iudicari, ut patet ex iure, & praxi: cum ergo sepultus in aliqua Ecclesia ibi elegerit domicilium, sequitur quod in eadem debet recipere suffragia defunctorum, quæ sunt Missæ: eodem fere modo, quo homo viuus omnia sua bona, & suppellectilia congregat ad locum sui domicilij. Tertio hoc ipsum probatur ex praxi Ecclesiæ, nam communiter omnes fideles iubent Missas celebrari pro se in Ecclesia, vel Capella suæ sepulturæ.

2 Quod attinet ad secundum quæsitum, dicendum est, cum constet de certo missas dicendas esse in Conuëtu ubi sepultus est defunctus, non posse ulterius illas dici in Ecclesia parochiali, non obstante possessione viginti annorum allegata. Probo hoc ex quodam dicto Nauarri, qui *tom. 2. suorum operum cap. 5. de oratione &*

*horis*

*horis canon notat. 5. num. 12. dicit, quendam Clericum residentem v. g. in Vniuersitate Conimbricensi studij causa, non posse Conimbricæ dicere missas, quas defunctus sepultus Eboræ v. g. iussit pro se celebrari Eboræ; & se remittit Nauarrus ad illa quæ fusiùs dixerat paulo supra num. 12. eiusd. notat. Et Zerola praxis 2. parte, vet. Missa. in princip. dicit imprimis, quod Missa defuncti plus illi prodest dicta in loco supulturæ, quam alibi cæteris paribus. Secundo, dicit Zerola, quendam Archiepiscopum Romæ à Gregorio XIII. petiisse licentiam vt posset missas, quæ iussæ sunt dici in vna Ecclesia, mandare celebrari in alia Ecclesia eiusdem Archiepiscopi, & dicit Zerola Papam noluisse concedere. Et confirmatur, quia si hæ missæ iussæ celebrari in loco sepulturæ testatoris, possent alio transferri, iam voluntas testatoris mutaretur in re notabili, quod non est admittendum. Scio, vel audio praxim esse in contrarium, quod videlicet missæ dicendæ in vno loco ad alium transferuntur: de quo modo non disputo, quia à me quæsitum non fuit. Sufficiat mihi ad probandum quod dixi adducere dicta à Nauar. & Zerola.*

3 Et quod adducitur in oppositum à parochio, suam parochiam esse in quasipossessione viginti abhinc annis dicendi prædictas missas. Dico Conuentum se posse tueri contra parochum, quod viginti anni possessionis non sufficiunt ad præscriptionem inducendam, vt patet ex multis capitulis iuris canonici, maxime cap. *De quarta. de prescript.* & aliis multis textibus, vbi dicitur quod contra Ecclesiam non præscribitur nisi spatium quadraginta annorum: & iste Conuentus Religiosorum est Ecclesia vt patet; ac proinde Ecclesia parochialis, de qua agitur, non potest præscribere contra istum Conuentum in spatium viginti annorum. Et præter

ter hoc ius commune, Religiosi communicantes in priuilegiis Patrum D. Benedicti, habent priuilegium prædictis Patribus D. Benedicti concessum, ne possit contra illos præscribi nisi in spatio centum annorum, sicut ego cito in meo 1. tom. *Dubior. Regul. ver. Præscribere*. Pro quo priuilegio vide etiam Rodrigu. tom. 3. 99. *quest. 35. art. 3.* vbi dicit, quod Mendicantes gaudent illo priuilegio per communicationem. Et ibi citat Rodrig. aliud priuilegium diuersum concessum Patribus D. Benedicti in Portugallia ad idem intentum, quod ibi poteris videre.

## C A S V S XX.

*De donatione cuiusdam sepultura, quæ fuerat alterius.*

**I**N Capella cuiusdam Ecclesiæ Monialium sepulta fuit quædam fœmina nobilissima, idque ante annos quinquaginta. Data est illi Capella pro sepultura, in qua nomen illius fuit inscriptum in saxo. Sed defuncta moriens nullos redditus reliquit olei, ceræ, vel misfarum, vel pro fabrica perpetua, & ornatu altaris; ita vt Moniales deberent ornare altare, & imagines putredine consumptas reficere. Voluerunt Moniales capellam hanc alteri fœminæ nobili donare, quæ se obligauit restaurare imagines, & redditus perpetuos Capellæ assignare pro illius fabrica, & ornatu cum missis perpetuis. Quæsitum fuit, vtrum dictam Capellam dare potuerint secunde, non obstante quod fuerit prius iam donata priori. Et præterea quæritur, an Moniales

vltro

ultra redditus perpetuos pro fabrica Capellę relin-  
quendos petere, & accipere potuerint aliquam sum-  
mam pecunię per modum venditionis ipsius Capellę,  
& sepulturę. Et omissis argumentis, quę pro parte  
contraria possent adduci, dico sequentia.

I Ad primum quęsitum dico posse Moniales dare  
istam Capellam secundę fœminę, non obstante quod  
fuerit prius donata primę, & haberet suum nomen in  
Capella inscriptum. Hanc conclusionem ponit Rodr.  
*tom. 4. Addit. ad summ. ver. Sepultura. concl. 14.* vbi citat  
Vuald. & dicit quod si sepultura donetur alicui modo  
prędicto, & omnes hęredes illius mortui fuerint, po-  
terit Pręlatus Ecclesię, vel Conuentus illam sepultu-  
ram alteri donare. Imo clare innuit quod poterit illam  
alteri donare, etiamsi primus defunctus aliquid reli-  
querit dicto loco pro fabrica, & ornatu Capellę, quia  
inquit cum Vuald. mortuis omnibus hęredibus primi  
defuncti, ius sepulturę redit ad proprietatem, & domi-  
nium Ecclesię, vel Conuentus. Hoc autem secundum  
dictum, quando primus defunctus aliquid reliquit  
perpetuum illi loco, ego non dicerem, quia video pra-  
xim in contrarium, & per illum redditum annualem,  
videtur defunctus cum Ecclesia pactum fecisse, vt  
nunquam alius ibidem sepeliatur. In hoc autem no-  
stro casu nulla est dubitatio, quando prima fœmina  
nihil Ecclesię, vel Capellę reliquit perpetuum, & om-  
nes illius hęredes mortui sunt: imo hęredes nullos ha-  
buit, quia non nupsit in vita. Ratio huius rei esse po-  
test, quia si per nudam donationem sepulturę factam  
alicui, prohiberetur conuentus, ne illam sepulturam  
alicui ulterius donare posset, intra paruum tempus  
non maneret in illa Ecclesia locus vbi possent alij fi-  
deles sepeliri, si ibi sepulturam elegissent. Et ego pro  
hoc

hoc casu informationem capi in Diœcesi Olyssiponensi, & mihi dictum fuit in illa sic practicari. Et puto idem fieri in aliis Diœcesibus. Hoc tamen in præsentī casu admonui, quod ossa prioris fœminæ sepultæ in illa Capella, non poterant exhumari, vel alio transferri, quia iam ibi sepulta sunt cum debita licentia, & foret scandalum viuētium, & iniuria facta defunctæ eadem denuò sine culpa sua exhumare. Aduertant insuper Moniales quod dictam Capellam, si est ius patronatus, dare non possunt nisi de consensu capituli Conuentus, & cum licentia sui Prælati, quia illa donatio continet alienationem bonorum Ecclesiæ: pro quo remitto lectorem ad illa quæ dixi in meo 2. tom. *Dubior. Regul.* verbo *Capella Fratrum*, pro quo videndus erit Rodriguez in loco ibi à me citato.

2 Secundum quæsitum maius habet dubium: propter multa quæ aliqui Doctores olim in confuso dixerunt, non posse vendi sepulturam eo quod sit locus sacer, & proinde res sacra, cuius venditio est simonia. Dico nihilominus, sepulturam vendi posse quatenus terra est, seu materiale sepulturæ, non vero id, quod illi inest sacrum, seu benedictum. Tenet expresse Suarez tom. 1. de *Religione lib. 4. de simonia cap. 14. num. 17.* ubi citat multos, & remittit se ad alia loca suæ doctrinæ, maxime adducta in eodem *cap. 14. à num. 6.* in quo dicit cum aliis posse vendi calicem consecratum ratione materiæ, & chrisma olei benedicti pro sacramētis Baptismi, & confirmationis ratione materiæ olei, dummodò vendantur alteri Ecclesiæ: Maiorem vero consecrationem habet calix, & oleum chrismais, quam habeat terra sepulturæ. Idem tenet Rodriguez in *conclusionē 14.* distinguens quod quando datur illi sepultura, non datur illi dominium illius loci sacri

nam secularis non potest habere dominium rei sacræ; sed solum illi datur ius, vel potius licentia, vt sepeliatur in tali loco sacro. Quod autem calix consecratus ratione materiæ auri, vel argenti vendi possit alteri Ecclesiæ, habet expresse D. Thomas in 4. distinet. 25. q. 3. art. 2. quasi iuncta 3. quod à fortiori concederet de sepultura, quæ minorem habet consecrationem quam calix.

## CASVS XXI.

*De quadam iurisdictione delegata à quodam superiore, suo inferiori pro certa causa.*

**Q**uidam Prælati inferior sententiam tulit in certa causa. Pars appellauit ad superiorem: Iudex à quo acceptauit appellationem, & scripsit ad superiorem vt delegaret alium iudicem. Superior, alium delegauit, Petrum, v. g. & in delegatione commissâ posuit hæc verba. Committo tibi Petro vt des executioni sententiam appellatam, quam tulit fullanus in causa fullani. Et in alia Epistola, quam misit iudici à quo, dixit iste superior: Ego mitto patentem, id est commissionem Petro, vt ille cognoscat de causa, & examinet datam sententiam: & det executioni puniens excessus rei, sicut viderit conuenire.

Hoc posito quæsitum fuit an Petrus per illam commissionem nudæ executionis, possit cognoscere de appellat. formando noutos processus? Et videtur quod non. Nam merus executor non potest cognoscere de causa,



causa, sed solum tenetur exequi sententiam, vt est communis Iuristarum opinio fundata in multis textibus: at Petro solum commissã est executio datæ sententiæ, vt constat ex citatis verbis suę commissionis: ergo cum sit merus executor, non potest cognoscere de causa faciendo nouum processum: & è contra nec potest exequi sententiam datam, quia cum fuerit appellatum, & appellatio suspendat omnia, non poterit dare executioni sententiam appellatam. Et cõfirmatur, quia cum commissio, seu delegatio iurisdictionis sit materia odiosa, talis commissio est stricte interpretanda, solum quantum verba sonant: per illa quæ late tradit Sanchez *lib. 8. de Matrim. disput. 1. à num. 3.* in simili materia: Cum ergo verba commissionis Petro solum concedant vt sit executor sententiæ, non poterunt intelligi vt sit iudex cum cognitione causę. Neque obstat Epistola missa superioris ad iudicem à quo, in qua dicit quod Petrus cognoscat de causa, & examinet sententiam; quia illa Epistola non est iuridica, nec facta pro tribunali, & maior fides adhibenda est patenti, seu litteris commissionis factæ Petro quam Epistolæ missiux.

In hoc casu negari non potest, quin superior egerit imprudenter ponens prædicta solum verba in delegatione facta Petro ob causam, & argumentum proximè positum quamuis autem iste casus raro poterit contingere: ex dictis tamen in illo poterunt alij similes resolui.

2 Dico igitur, non obstante perplexitate commissionis, potuisse Petrum per illam procedere tanquam verum iudicem non solum executionis, sed appellationis ad faciendum nouum processum. Probo primo ex Nauarr. *lib. 5. consiliorum tit. de hereticis consilio 18.*

vbi ait quod vna scriptura dubia, debet explicari, & probari per aliam scripturam claram. Et dat exemplum, quando verba testamenti sunt obscura, tunc possunt declarari per verba posita in Codicillo; & quod per verba ipsius testamenti possunt declarari intentiones habitæ in donationibus factis in vita. Citat ad hoc Bartolum, Sæuolam, Alexandrum, & citat tex. legum ciuiliū. Vnum tantum refero, qui est l. *heredes palam § si quis ff. de testamenti*, sub finem, quæ sic habet. *Interpretationem verborum, quæ in testamentis reperiuntur obscura, fieri posse ex vicinis scripturis; ex verbis enim prolatis in una scriptura sumitur interpretatio quid senserit quis in alia.* Et citat etiam ad hoc Diuum Augustinum, & alios in numeris antecedentibus. Ergo verba obscura posita in commissione facta Petro debent explicari, & interpretari per verba clara posita ab eodem iudice delegante in Epistola missa ad iudicem à quo: per quæ dicit se committere Petro iurisdictionem, vt iudicet, & cognoscat de causa, quod est facere illum delegatum ad omnia pertinentia ad causam. Nec obstat quod declaratio sit facta per epistolam missam ad aliū, cum enim sit missa pro eodē intento, satis declarat mentem iudicis, vt patet ex dictis. Secundo probo ex cap. *intelligentia de ver. sign.* vbi sic ait tex. *Intelligentia dictorum ex causis est assignanda dicendi, quia non sermoni res, sed rei est sermo subiectus.* Id est, explicatio verborū obscurorum sumenda est ex causa quæ interuenit ad verba dicenda: sed in hoc casu, verba posita in commissione Petri posita sunt vt deferret appellationi acceptatæ; cum ergo superior sciret, vt tenebatur scire, causam appellatam, seu à qua fuit appellatum, non posse dari executioni, voluit utique per verba commissionis factæ Petro illum constituere non executorem merum, sed iudicem

dicem cum cognitione causæ: & in hoc seruit etiam quod superior in hoc voluit se accommodare, & satisfacere litteris missis à iudice à quo appellationis, qui petebat vt faceret superior alium iudicem delegatum, qui plene cognosceret de appellatione, & de ipsius causæ meritis. Tertio probo argumento nouo, sed efficaci: Nam iurisdictionis potest committi ex coniecturis: vt tenet Sanchez *lib. 3. de Matrim. disput. 31. num. 7.* cum Nauar. ibi citato: vbi ait delegatum ab Ordinario, etiam non Principe, posse subdelegare, etiam si sibi non fuerit expresse commissæ potestas subdelegandi, si tamen aliàs ex coniecturis colligat, Ordinarium delegantem id ratum habere. Et tamen communis sententia docet, quod delegatus, si non fuerit à principe, non potest subdelegare: & in hoc casu ex coniecturis suprapositis satis colligitur quod mens, & intentio superioris fuerit Petro delegare iurisdictionem ad cognoscendum de causa, non vero solum, ad constituendum illum merum executorem sententiæ iudicis à quo, quæ non poterit executioni mandari cum ab illa fuerit appellatum, & appellatio acceptata.

2 Secundo principaliter probatur ex eo quod tradit Nauar. *in sum. cap. 27. num. 255.* vbi, licet dicat, quod quando Episcopus concedit alicui facultatem plenam audiendi confessiones alicuius, non ex eo videtur concedere facultatem absoluendi à casibus sibi à iure reservatis: Nihilominus, si constet probabiliter Episcopum etiam voluisse concedere facultatem absoluendi à reservatis, credendum est illam concessisse, & poterit talis confessor illa vti. Itaque ex coniecturis probatur iurisdictionis commissio, maxime in Prælato bene affecto. Tertio, quia curandum valde est vt actus valeat, quando est dubium, & non vt pereat, vt late pro-

bat Sanchez citans multos *lib. 3. de Matrim. diff. 35. num. 19.* At si ista delegatio secundi iudicis tantum committeret, vt esset Petrus purus executor, actus periret id est commissio nihil valeret: ergo curandum est, vt valeat, & explicanda, vt committat non meram executionem, sed etiam causæ cognitionem. Maior, & consequentia patent; Minor probatur ex dictis, quia ista causa appellata non indigebat mero executore, sed iudice causæ cognitore, & potente facere nouum processum. Et potest credi quod error istius commissionis ortus fuit ex inaduertentia, vel ignorantia secretarij superioris: & quod superior litteras commissionis non legit, sed solum scripto firmavit. Vltimo confirmo hoc ex traditis à Sanch. *lib. 3. de matr. disp. 37. concl. 2.* vbi supponit quod parochus assistens matrimonio coniugum vtitur quasi iurisdictione, vel habet exercitium iurisdictionis per illam assistentiam decretam à iure; eandemque habet quiuis sacerdos assistens matrimonio de licentia proprij parochi; & non valet assistentia cuiusuis sacerdotis sine licentia proprij parochi. Quo proposito, quærit ibi Sanchez, an sacerdos non parochus, possit, ac debeat credere, aliquibus sponis dicentibus se habere licentiâ proprij parochi vt talis sacerdos illos matrimonio iungat. Et respōdet citata *conc. 2.* quod si persona referens de commissione parochi, sit persona valde fide digna, poterit hic sacerdos illi credere, eosque matrimonio iungere, pro quo citat multos Doctores ibidem *num. 3.* & citauerat alios *num. 1.* vbi vides quod ex sola relatione personæ valde fide dignæ, possum ego credere me habere iurisdictionem ad aliquid faciendum, & illa vti. At in nostro casu quod iste iudex secundus habeat commissionem, & iurisdictionem ad cognoscendum de causa cum nouo pro

processu, cōstat nō ex relatione qualis qualis personæ, sed ex Epistola ipsius superioris scripta ad iudicem à quo, in qua mentem, & intentionem suam explicat: ergo secundus iudex delegatus credere debet se habere iurisdictionem non meri executoris, sed iudicis cognitoris causæ, & potentis processus novos instituere, & nouam sententiam proferre. Et per hoc vltimum dictum, simul cum dictis *num. 1.* præcedente soluentur facile argumenta initio adducta in contrarium.

## C A S V S XXII.

*De priuilegio cuiusdam Domini patroni cuiusdam  
Conuentus Monialium.*

**Q**Uidam Dominus patronus cuiusdam Conuentus Monialium, obtinuit à Summo Pontifice, vt in prædicto Conuentu ponerentur confessores ab eo designati: & è contra vt prælati eos amouerent ad petitionem eiusdem Domini. Idem Dominus, & antecessores illius tali priuilegio nunquam sunt vsi. Et præterea post illud priuilegium obtentum, officium illius confessoris valde immutatum est: nam ante priuilegium erat purus confessor Monialium, sed postea in capitulo factus est prælatus quatuor capellanorum ibi residentium, & habet votum in capitulo, quæ antea non habebat. Et præterea continebat priuilegium aliquas clausulas, quæ mox dicentur, quæ nunquam fuerunt positæ in executione. Proposita fuit quæstio in facti contingentia, an prædictum priuilegium hodie obligaret prælatos ad illius executionem. Ego respon-

di illud hodie non obligare, ob causas sequentes.

*Prima ratio, ex forma priuilegij nunquam seruata.*

**Q**Uod prædictum priuilegium non obliget, probatur primo, quia illius forma nunquam posita fuit in praxi. Nam inter alia quæ continet est hoc vnum, quod Generalis ordinis designabit vnum gubernatorem pro gubernandis septem, vel octo monasteriis Monialium eiusdem Domini, & quod dictus gubernator poterit amouere confessores illarum, quos ille Dominus petierit. Quæ forma à Papa assignata nunquam fuit practicata in illa prouincia, neque vnquam assignatus fuit talis gubernator pro illis tantum monasteriis Monialium, sed Prouincialis prælatus communis prouinciæ semper illas gubernauit sicut cæteras eiusdem prouinciæ, inter quas sunt multi Conuentus Monialium, quorum Rex Hispaniæ est verus patronus: Cum ergo forma priuilegij nunquam fuerit seruata in re notabili, priuilegium nullum est. Quod autem non seruata forma priuilegij amittatur priuilegium, est communis Doctorum sententia, quam tradit Suarez *tom. de legibus. lib. 8. cap. 13. à num. 2. vbi ait*, quod si forma assignata in priuilegio sit substantialis, illa quæ non seruetur, corrumpit priuilegium: Et se remittit Suarez ad id quod antea dixerat, *cod. tom. lib. 5. c. 31. videlicet* quod tunc intelligitur formam actus esse substantialē, quando ipsa lex instituit actum cum solemnitate ab ipsamet lege inuenta: in hoc vero priuilegio ipse Papa designat solemnitatem seruandam, vt scilicet assignetur particularis gubernator septem monasteriorum, &c. quæ forma nunquam seruata fuit: & fuit hæc forma

forma particularis inuēta à Papa, ita particularis, quod fuit exorbitans à iure communi: nam eximebat illa septem monasteria à iurisdictione ordinaria Prouincialis, & illa tradebat gubernatori, ac proinde fuit forma substantialis priuilegij, quæ non fuit seruata. Probat Suarez hoc multis exemplis, & rationibus, & ex vna Clementina. Facit etiam quod tradit idem Suarez *num. 9.* tunc formam actus esse substantialem, cuius omissio annullat actum, quando in concessione conceditur noua potestas ad aliquid faciendum, quæ potestas antea non dabatur. At constat quod in citato priuilegio dabatur noua potestas ad aliquid faciendum, quæ antea non dabatur: concedebatur enim quod assignaretur nouus ille gubernator, & præterea quod ille posset amouere confessores ad nutum illius Domini, quæ potestas, & noua erat, & nunquam antea concessa. Habentur hæc omnia expresse in cap. *cum dilecta. de rescriptis.* vbi Papa declarat irritum quendam processum, quia factus fuerat contra formam mandati Papalis sub his verbis: *Propter quod processum illorum contra nostri formam rescripti, ac iuris ordinem attentatum, irritum decernimus & inanem.* Idem habetur clare in cap. *Venerabili. de officio legati.* illis verbis. *Quia contra mandati nostri tenorem, &c. & cap. vlt. de restitut. spoliat.* Denique videatur Syluest. verb. *Mandatum, quest. 7.* vbi dicit, quod non seruans formam mandati, facit actum nullum, siue faciat contra mandatum, siue præter formam mandati: & citat ad hoc cap. *si cui. de elect.* iuncta glossa in 6. & Panormitanum in dicto cap. *si cui* in fine capituli expresse ait non valere actum omissa forma præscripta: vbi glossa verbo *præter.* ait citans aliquos textus: quod ista duo æquiparantur, præter, & contra. Si ergo hodie velint, iuxta citatum priuilegium, amouere ab

officio vnum confessorum, cum talis priuilegij forma nunquam fuerit seruata, facient & contra formam priuilegij, & prater formam illius.

*Secunda ratio nullitatis ob non vsum  
& contrarium vsum.*

2 **S**ECUNDA ratio principalis contra ostensum priuilegium, est quia per non vsum, vel contrarium vsum est iam amissum. Et imprimis dico esse amissum per non vsum. Nam cum illud habeat ab annis septuaginta, nunquam illo vsus fuit iste Dominus, nec ex vi illius aliquis confessor Monialium fuit positus in officio, vel amotus ab officio: & non deerant occasiones in quibus ille posset vti: & suppono esse notorium in prouincia, quod illo nunquam vsus fuit. Quod vero quando priuilegium est affirmatiuum, quale est istud, ad aliquid faciendum (maxime si ex illo redundet grauamen aliorum, vt ex isto resultat) amoueri scilicet ab officio ad nutum Domini, quod inquam hoc priuilegium affirmatiuum redundans in grauamen alicuius, possit præscribi per non vsum, & Prouincialis possit agere contra illud propter non vsum, probat efficaciter, & euidenter Suarez tom. de leg. lib. 8. cap. 34. maxime num. 16. cum præcedentibus. Vbi ponit exemplum in electoribus, qui videlicet per actus contrarios eligendi possunt præscribere contra priuilegium illius, qui habet ius eligendi, vel præsentandi, & omisit eligere vel præsentare. Quod in terminis contigit in hoc casu, vbi nec Generalis Ordinis designauit gubernatorem septem monasteriorum, nec prædictus Dominus vllum confessorum petiit poni, nec amoueri per annos 70. & è contrario Prouincialis cum diffinitorio est in posses-



possessione per annos 70. præsentandi, & amouendi confessores in vno monasterio propter quod præsens quæstio mota fuit. Et tenet Suarez citato loco, quod si ista opinio communis Iuristarum, quos citauerat in principio eiusdem capituli *num. 2.* videlicet Panormit. Decium. Innoc. Felin. Bald. & affert rationes claras, & validas, quæ possunt videri citato *num. 16.* & *num. 19.* ibidem ait cum communi opinione, quod ad præscribendum contra hoc priuilegium grauans alios, vel auferens iurisdictionem aliorum, sufficit tempus decem annorum: & in isto casu curreunt iam plusquam sexaginta anni. Probatum insuper amissio istius priuilegij propter non vsum, ex eo quod ait Alexan. III. in cap. *si de terra. de priuil.* vbi Papa contra quosdam Religiosos habentes priuilegium ad non soluendas decimas de quibusdam terris, quo priuilegio non obstante, dicti Religiosi sponte à triginta annis soluebant decimas quibusdam Canonicis, & post triginta annos allegarunt prædictum priuilegium; decernit Papa vt soluant decimas, eo quod dicto priuilegio vsi non fuerint per annos triginta. Verba textus sunt hæc. *De priuilegio tamen indulto tanto tempore vobis detrahere voluistis, cum liberum sit unicuique suo iuri renunciare, eoque modo non potestis vos in hac parte tueri.* Vide etiam ibidem glossam in ver. *Renunciare.* Idem habetur in cap. *Accedentibus. de priuil.* vbi Papa Innocent. III. contra quosdam habentes priuilegium ad non soluendas decimas, & tamen illas soluebant, ait Papa: *Cum enim tanto tempore contra indulta priuilegia decimas soluerint, eis renunciasse tacite præsumuntur.* Idem habetur in cap. *cum accessissent. de const. in fin.* vbi glossa ver. *contrauenerint.* vbi citat Doctores dicentes, quod qui impetrauit priuilegium ad aliquid agendum, & per decennium illo non vtitur, illud

lud amittit. Et citat alios Doctores dicentes, quod priuilegium amittitur per vnum actum contrarium. Vide etiam glossam in cap. *suggestum. de decimis.* in ver. *Priuilegia.* vbi aliqua citat ad intentum.

3 Et hi omnes textus, & Doctores fundantur in ratione adducta à Suarez ex eisdem, videlicet quod priuilegiatus qui non fuit vsus priuilegio cum potuit, videtur eidem priuilegio renunciaſſe; maxime cum à parte contraria accedat præscriptio per tot annos, præſentante, & amouente ſolo Prouinciali confeſſores prædicti Conuentus. Pro quo adhuc videri poteſt capitulum *ex ore.* de iis quæ fiunt à maiori parte capituli, cum gloſſa ibidem, in verb. *Renunciaſſe videtur.* Vltimo confirmatur hic punctus ex praxi Summ. Pontificum: quorum multi confirmantes priuilegia aliquarum Religionum (quæ ſunt firmiора quam priuilegia conceſſa Dominis ſæcularibus) vſi ſunt his verbis: *quatenus ſunt in vſu,* vel *quatenus ſunt in viridi obſeruantia,* vt habetur in Bullario Rodrig. fol. 826. col. 2. paulo poſt initium, cum Iulius III. confirmauit priuilegium Ordinis Minorum. Eandem limitationem, quatenus ſunt in vſu, expreſſit Gregorius XIII. in confirmatione priuilegiorum eiufdem Ordinis Minorum in eodem Bullario Rodrig. fol. 985. col. 2. poſt medium: & idem fecerunt alij Summi Pontifices innuentes nolle ſe confirmare priuilegia antiqua quæ non erant in vſu. Si ergo Sum. Pontifices nolunt valere priuilegia Religionum, quæ ſic inferuiunt Eccleſiæ die noctuque, quando non ſunt in vſu: quomodo credendum eſt velle Summum Pontificem vt valeant priuilegia conceſſa Dominis ſæcularibus, quæ non ſunt in vſu, maxime quando ex illis redundat grauamen aliquorum, ſicut reſultat ex iſto priuilegio, de quo agitur, cum per illud poſſint confeſſores

fores amoueri ad nutum Domini sæcularis, & Prouincialis priuetur iure præsentandi eisdem confessores?

*Tertia ratio nullitatis ex mutatione  
materia priuilegij.*

4 **T**ERTIA ratio, ob quam prædictum priuilegium hodie non valet, est quia materia priuilegij postea fuit mutata. Nam quando priuilegium fuit obtentum, confessores istius monasterij, de quo sermo est, erant solum confessores. Sed postea in capitulo confessores istius Conuentus creati sunt prælati cum voto in capitulo, quæ est magna mutatio: nam in iure communi, & in praxi Religionis maior respectus seruandus est cum prælato, quam cum illo, qui non est prælatus: & difficilius amouetur ab officio prælatus, quàm non prælatus; vnde in ordine minorum Prouincialis per statuta generalia non potest amouere ab officio alios Religiosos habentes culpam, si sunt Goardiani. Est ergo valde immutata materia istius priuilegij circa confessorem amouendum petente Domino sæculari: quod vero prælati non debeant amoueri ab officio nisi ob culpas, & per sententiam, habetur in cap. *Monachi. de statu Monachorum.* quod est desumptum ex Concilio Lateran. vbi sic dicitur; *Priores autem per electionem capitulorum suorum canonice instituti, nisi pro manifesta, & rationabili causa non mutantur.* & statim ibi Papa ponit exemplum causarum ob quas possint amoueri, vt *Videlicet si fuerint dilapidatores, si incontinenter vixerint, &c.* Ille vero confessor, de quo agitur, eligitur canonice in capitulo, & nullam commisit culpam, ergo non poterit amoueri virtute talis priuilegij, cum priuilegium

gium non deroget iuri communi, qualis est textus citati capituli. Propter quod capitulum motus Rodrigu. 3. qq. Reg. quæst. 29. art. 9. prope finem, dicit quod neque in ordine Minorum potest Prouincialis cum Diffinitoribus amouere ab officio Goardianum ante finitum triennium: & citat ad hoc Panormitanum, & Nauarr. & Pater Frater Thomas de Iesu Carmelita Discalciatus in suo tract. de statu Monachorum 4. part. cap. 1. fol. 116. dicit quod officia quæ in Ordine dantur per electionem, non possunt auferri ad nutum prælati; & idem tenet Sanchez tom. 2. Decal. lib. 7. cap. 29. pro quo citat Cardinalem, Cassador. Milif. & alios tres num. 118. Facta igitur tam notabili mutatione in officio cōfessoris istius Conuentus, priuilegium obtentum ab isto Domino ante istam mutationem non habet vires vllas. Quod autem priuilegium non valeat post factam notabilem mutationem materiæ, est textus expressus in cap. suggestum. de decimis. vbi rubrica sumpta de textu sic habet: *Renocatur priuilegiū si ex postfacto incipit enormiter nociuum esse.* Hoc vero priuilegium hodie est notabiliter nociuum, cum permittat auferri officium prælato sine culpis, & ad nutum Domini sæcularis, qui poterit ad libitum, vel ex passione animi procurare talis prælati amotionem cum notabili sua infamia. Et glossa in citato cap. ver. *Priuilegia.* dicit, *quod secundum diuersitatem temporum, & varietatem rerum priuilegia sunt varianda.* Pro quo citat ibi tres textus, quos omitto breuitatis gratia. Confirmo hoc amplius à simili. Nam omnes Doctores in materia voti, & iuramenti dicunt quod si post votum, & iuramentum, materia voti, vel iuramenti notabiliter mutata est, cessat, & non obligat votum, vel iuramentum, quando ita mutata est, vt si vouens, vel iurans, talem mutationem aduerteret, nec voue-

voue-

voueret, nec iuraret. De quo late Sanchez *1. tom. Decalogi lib. 4. cap. 2. à num. 20. & seqq.* Si ergo votum, & iuramentum, quæ obligant de iure diuino naturali, non obligant post factam mutationem notabilem materiæ, multo minus obligabit hoc priuilegium quod est lex Ecclesiastica, cum post illud sit valde mutata materia confessoris.

¶ Sed obiicis, ac dicis, quod non obstante ista mutatione materiæ, vel prælaturæ, & non obstante citato cap. *Monachi de stat. Monach.* præcipiente ne prælati electi in capitulo amoueantur sine culpis, dicis eo non obstante posse hodie P.R. Generalem prædictum confessorem amouere, quia illum non amouet propter culpas; sed cum autoritate Papæ, qui ad hoc concessit istud priuilegium. Papa vero est supra statuta Ordinis, & supra ius commune, vt patet. Respondeo objectionem non valere: quia quando hoc priuilegium impetratum est, materia illius non erat posita sub prohibitione Concilij generalis sicut modo est; & proinde modo subiacet prædicti capitis Monachi dispositioni: vt vero derogetur alicui legi positæ in Concilio generali Lateranensi, non sufficit derogatio generalis posita in isto priuilegio: sed necessaria est derogatio particularis, quæ dicit: Non obstante etiam constitutione Concilij generalis. Sic docet, & probat Rodrig. *tom. 3. qq. 9. 37. art. 4.* post medium vbi citat Archid. Baldum, Paulum de Castro, Iacobat. & alios. Idem tenet Sanch. *3. lib. de Matrim. disput. 26.* vbi citat multos alios dicentes nunquam papam censeri derogare Concilio generali per derogationem generalem, & ordinariam nisi illud exprimat. Rationes efficaces ibi afferunt duo proxime citati Doctores. Non ergo per hoc priuilegium derogatur illi capitulo *Monachi* desumpto à Concilio

cilio Lateran. Si enim cum Papa concessit hoc priuilegium, officium illius confessoris maneret mutatum in prælaturam, illud priuilegium non concederet, ne violaret illud ius commune Concilij Later. & ad hoc etiam omnino seruit illa *Regula iuris in 6.* In concessione generali, non veniunt illa, quæ quis non esset verisimiliter in specie concessurus. Si enim tunc Papa sciret, quod illud officium confessoris mutandum esset, vel coniungendum cum officio Prælati sicut modo est: omnino probabiliter credi debet quod Papa non esset concessurus vt vnus Prælatus ad petitionem domini temporalis amoueretur ab officio, cum infamia.

6 Soluta obiectione, redeo ad intentum, quod scilicet Prælatus ab officio amoueri non possit sine culpis. Pro quo adduco cap. *intentum est* 16. *quest.* 7. vbi dicitur quod sacerdos qui habuerit aliquam Ecclesiam: *Hanc non nisi graui culpa sua, & coram Episcopo canonica seueritate amittat.* Notentur verba omnia, quæ clare, & nimis probant nostrum casum: pro eodem intento citat ibi glossa in verbo, *grauis culpa*, citat multos textus qui poterunt ibi videri. Solum refero vnum textum ex ibi citatis, qui est in cap. *satis peruersum dist.* 36. qui est desumptus ex D. Gregorio Papa, qui lib. 10. *Epistol.* *Epistola* 8. ad Columbum Episcopum sic ait: *Satis peruersum est, & contra Ecclesiasticam probatur esse censuram, vt frustra & pro quorundam voluntatibus quis priuetur, quem sua culpa, & facinus ab officij quo fungitur gradu non deiecit.* Quo nihil clarius, & efficacius ad nostrum casum potest desiderari, in quo ad voluntatem domini temporalis volunt delicere à statu honorifico patrem benemeritum sine culpa, Facit etiam pro eodem intento quod tradit Rodriguez tom. 2. *qq. q.* 51. *art.* 12. paulo ante medium, vbi citans multos textus, dicit quod licet Pa-

pa commissione Papali committeret alicui vt priuaret voto actiuo , & passiuo illos quos iudicaret priuandos ad arbitrium suum: adhuc non posset talis Commissarius in vna electione aliquem priuare, nisi illum prius citatum, & auditum: quia similes Bullæ pontificiæ non tollunt illa, quæ sunt de lumine naturali: qualis est citatio partis &c. & præterea confirmatur, quia Papa non concedit priuilegium cum præiudicio tertij, vt fusc probat Suarez *tom. de legibus cap. 27 lib. 8. maxime num. 9.* At graue præiudicium est, quod Prælatus amoueatur ab officio sine culpa, & non auditus, nec citatus. Vltimo, in hoc priuilegio dicitur, quod Papa illud concessit, quia tunc in ista prouincia non reperiabantur Religiosi graues, & reformati, & ad hos dignos inueniendos, illi domino concedebatur illa electio, & potestas præsentandi: at hodie ista ratio cessauit in totum; plena est enim prouincia Religiosis in quibus prædictæ qualitates, & partes concurrunt: imo & abundat Religiosis doctis, & litteratis multis, qui tunc non reperiabantur in illa, cum eo tempore nullus cursus Theologiæ daretur in illa, hodie vero tres reperiuntur in tribus conuentibus: cum ergo penuria grauium Patrum fuerit causa illius concessionis, & ista causa cessauerit, sequitur quod ipsa concessio iam locum non habet, iuxta cap. *cum cessante, de appella.* vbi dicitur quod cessante causa cessat effectus.

7 Quoniam vero iste pater confessor, de quo agitur, appellauit ad Collectorem Apostolicum: & prædictus dominus Collector interlocutoriè mandauit, vt prædictus dominus sæcularis copiam dicti priuilegij exhiberet, quod ille exhibere recusabat; dico illum teneri ad exhibendum prædictum priuilegium, vt patet expresse in capitulo *accepimus de fide instrum.* vbi Papa

præcipit quibusdam Religiosis, vt exhibeant suum priuilegium, vel in claustrò, vel in alio loco securo: & in eodem tit. *de fide instrum.* cap. *G. perpetuus*, dicitur quod si pars copiam priuilegij petierit, & iudex denegauerit poterit ab eodem iudice appellare.

## CASVS XXIII.

*De confessore audiente confessiones contra prohibitionem prelati,*

**Q**uidam Religiosus erat approbatus confessor cum licentia Prouincialis, & approbatione Episcopi absolute sine vlla restrictione: postea alius Prouincialis successor iussit per prouinciam confessores, iterum examinari, declarans quod sine noua sua licentia nullus confessiones audiret. Iste de quo agitur fuit examinatus denuo: eique concessa fuit à Prouinciali licentia vt per vnum tantum annum confessiones audiret. Finito anno, iste non obtinens nouam licentiam Prouincialis, aliquas confessiones audiuit, fretus in antiqua licentia Ordinis, & in noua approbatione alterius Archiepiscopi, cui se præsentauit virtute prioris licentiæ Ordinis, & Ordinarij prioris.

Quæsitum fuit an prædictæ confessiones quas audiuit finito anno absque noua licentia Prouincialis fuerint validæ, an vero teneatur curare vt iterentur?

**R**espondi (quidquid sit de peccato illius, maxime si fecit mala fide) confessiones prædictas fuisse validas. Casum in terminis, licet obiter ponit Sanchez *lib. 3. de matri. disp. 32. nu. 2.* in fine, vbi citat Adrian. dicentem,  
prohi-



prohibitionem superioris ne Religiosus audiat confessiones, arguere Religiosum peccare audiendo, non tamen absolutionem esse irritam, si de Episcopi licentia confessiones excipiat. Ad idem intentum citat ibi Henriq. lib. 6. de pœnitent, cap. 6. num. 6. qui multos alios citat. Fundantur in hoc quod prohibitio simplex prælati non tollit iurisdictionem collatam ab Episcopo isti confessori erga oves ipsius Episcopi. Explicat Henriq. citatus, dummodo prælatus solum prohibeat, secus si expresse reprobet: quibus verbis videtur innuere, non valituras confessiones si prælatus priuet illum officio confessiones audiendi, quod in hoc casu non videtur euenisse, cum non fuerit priuatus per sententiam iuridice. Et hoc ipsum cum ista declaratione tenet Rodrig. in *Addit. ad Bullam Cruciat. ad §. 9. dubitat. 2. num. 7. §. Lo. 2. digo*, vbi dicit, quod si prælatus solum prohibeat prohibitionem simplici, ne subditus audiat confessiones, peccabit subditus audiendo: sed confessiones erunt validæ. At si prælatus per sententiam iuridicam priuauerit Religiosum officio confessoris, tunc si secus faciat, confessiones erunt nullæ: huius rei non assignat causam: ego puto hanc posse reddi. Nam illa prohibitio prior, & simplex facta à prælato, non est censura suspensionis, quæ auferat à subdito iurisdictionem quam habet ab ipso prælato, & ab Episcopo eommissam: At quando prælatus propter culpas per sententiam iuridicam priuat officio confessoris, est proprie censura Ecclesiastica suspensionis, quæ auferret suspenso iurisdictionem spiritualem.

2 Ego à doctrina proxime tradita non recedo cum tradita sit à tam grauib. Doctoribus. Sed solum disputandi gratia propono motiua quæ mihi occurrunt ad probandum, quod licet Prouincialis per senten-

tiam iuridicam ob culpas priuet Religiosum confessionibus per sententiam iuridicam, & ille nihilominus peccans illas confessiones secularium audiat, approbatus ab Episcopo, hac priuatione Prouincialis non obstante, tales confessiones erunt validæ in toto conscientia. Videtur hoc posse probari primo, à simili. Si Papa priuet subditum suum omnibus priuilegiis concessis à Sede Apostolica, non per hoc priuat illum à priuilegiis concessis à Principe seculari, si quæ habet: quia concessionem factæ sunt à diuersis Principibus, & vna non pendet ab alia, nec proinde vna impedit aliam. Aliud exemplum est. Si prælatus regularis priuet per sententiam suam Religiosum omnibus officiis ordinis: non per hoc dicitur quod priuet hunc Religiosum priuilegio, vel officio dato à Tribunali sancti Officij, si quod habet. Nam, sicut nemo potest dare quod non habet, ita videtur quod non possit auferre quod non dedit, neque est suum. Quæ applicando ad intentum, cum licentia data ab Episcopo ad confessiones secularium audiendas sit priuilegium suum distinctum à licentia data à Prouinciali circa easdem confessiones audiendas, videtur, quod reuocante Prouinciali suam licentiam quam dedit isti ad confessiones secularium audiendas, non reuocet licentiam, & priuilegium datum ab Episcopo ad easdem audiendas, cuius licentia in confessionibus secularium excipiendis est præcipua, & Prouincialis, est minus præcipua. Si vero mihi obijcias me dixisse in 1. tom. Dub. Regular. vers. confessoris approbatio num. 9. esse inualidas confessiones auditas à Religioso, cui Episcopus concessit licentiam audiendi confessiones secularium, cum Religiosus ille non haberet licentiam sui prælati vt se præsentaret Episcopo pro eisdem confessionibus audiendis,

diēdis, iuxta illa quæ ibi collegi ex Clemēтина *De dum de sepulchris*. Respondeo in hoc esse diuersam rationem. Nam ibi dixi quod vt Regularis fiat confessor, necessaria est omnino præcedens licentia sui prælati ante approbationem Episcopi; si vero nulla præcessit licētia prælati Regularis non valebit approbatio Episcopi, vt ibi dixi. In hoc autem casu, in quo iste confessor priuatur confessionibus per Prouincialem, iam iste confessor fuit approbatus ab Episcopo, cuius licētiā ad suas oues audiēdas in confessione videtur quod non possit tollere Prouincialis. Confirmo hoc dicto tradito à Sanchez *lib. 7. Decalogi cap. 13. num. 39.* vbi dicit, quod cessante causa cessat effectus: sed hoc dictum sic exponit: si effectus pendet à causa in fieri, & in conseruari, vt lux pendet à sole in fieri, & in conseruari, tunc cessante causa, & dēficiēte sole, cessat lux. At si effectus pendet à causa solum in fieri, & non in conseruari, quemadmodum calor productus in lapide ab igne, pēdet ab igne in fieri, sed non in cōseruari, tunc non cessat effectus cessante causa, vt patet. Quod ego applico ad id quod dixi citato *vers. confessor num. 9.* Nam licet confessor Regularis, quoad audiendas confessiones sæcularium pendeat in fieri à licentia prælati Regularis, iuxta Clementinam ibi citatam, non tamen pendet in conseruari quoad easdem sæcularium confessiones à licentia Prouincialis, qui non potest auferre quod non dedit iuxta proxime dicta.

3 Pro eodem intento dico sic. Supposito quod Episcopus ob culpas, vel causas aliquas priuet certum Religiosum ne confessiones sæcularium audiat in suo Episcopatu, quod illum posse facere suppono, nunquid per hanc reuocationem licentiæ à se datæ, reuocare potest licentiam quam habet à Prouinciali pro

audieridis confessionibus Religioſorum, qui ſunt ſub-  
 diti Prouincialis? Non proſecto, quia licentiæ hæ ſunt  
 diuerſæ, & vna non pendet ab alia ſaltem in conſerua-  
 ri, & ſic ablata vna non tollitur altera. Præterea Miran-  
 da tom. I. *Manual. queſt. 47. ar. 12.* citans vnã Bullam  
 Iulij III. dicit quod ſi Religioſus approbatus ab Epiſ-  
 copo ad confessiones ſæcularium audiendas, qui Reli-  
 gioſus non habet licentiam ſui prælati confessiones  
 ſæcularium audiat, & non ſit in ſua Religione statu-  
 tum annullans tales ſic factas confessiones, dicit con-  
 feſſiones iſtas validas fore: ſecus, ſi in Ordine ipſius ſit  
 tale ſtatutum eas annullans. Iam ergo ex mente illius  
 ſaltem habemus, quod in Religione vbi non fuerit ta-  
 le ſtatutum, erunt validæ confessiones factæ cum li-  
 centia Epiſcopi abſque vlla licentia prælati. Hoc au-  
 tem maius videtur, quam dicere poſſe audire confeſ-  
 ſiones ſæcularium Religioſum hunc, qui habet inte-  
 gram licentiam Epiſcopi, & iam prius factus eſt con-  
 feſſor cum licentia prælati licet modo illam reuocet:  
 cum iuxta prædicta videatur non poſſe reuocare licen-  
 tiam, & privilegium datum ab Epiſcopo. His non ob-  
 ſtantibus ego neminem ſuadeo vt hanc opinionem  
 ſequatur: ſed adhæreat dictis num. 1. à Sanchez, &  
 Rodr.

4 Hoc ego ſolum poſſem conſulere, ac reſoluere,  
 quod ſi iſte Religioſus de quo agitur, per ſententiam  
 priuatus confessionibus à Prouinciali, non ab Epiſco-  
 po, ſit ſecreſus, ita quod ſententia illius lata fuerit in  
 ſecreto, & ignoretur ab omni populo, & ille tali ſen-  
 tentia non obſtante audiat confessiones in alio oppi-  
 do vbi omnes illum habent pro idoneo confeſſore;  
 ignorato errore, ac defectu illius, credo quod tales  
 confessiones erunt validæ, per earum dicit Sanc. lib. 3.

*de matr. disp. 22. num. 13.* de parochio communiter putato vero parochio, cum à parte rei talis non sit, sed habet titulum putatiuum: cuius confessiones dicit esse validas propter legem *Barbarius ff. de officio pratoris*, quam ibi probat cum multis etiam habere locum in gestis quoad forum conscientie. Quod in hoc casu locum etiam habere videtur, si iste sic priuatus confessionibus non sit diuulgatus, & priuatio eius sit occulta, & confessiones audiat ubi pro vero confessore habetur. Nam in illo concurrunt requisita ut valeat lex *Barbar.* Habet enim titulum confessoris putatiuum, imo titulum verum datum ab Episcopo: error populi circa illius iurisdictionem ex parte praelati ablatam, est communis: habet etiam potestatem characteris, ut constat cum sit verus sacerdos: & præterea habebit pro se motiua adducta à nobis supra *num. 2. & 3.* quæ saltem hic coadiuuabunt. Vide etiam Valerum Cartuxanum in *lib. de different. viriusque fori. ver. Nullitas. diff. ferent. 1. à num. 2.*

## CASVS XXIV.

*Utrum Moniales S. Claræ primæ Regulæ possint habere pensionem vitalitiam pecuniæ.*

**M**oniales primæ Regulæ sanctæ Claræ vulgo dictæ Discalciatæ, seu Damianæ, viuunt in rigidiorie paupertate, ita ut nullos redditus habeant in communi: & illarum regula in quodam loco dicit: *Sorores non recipiant possessionem*, cap. 6. & paulo post dicitur: *Tenentur Abbatissa, & Sorores seruare paupertatem non re-*

*ciendo, seu habendo possessionem, vel proprietatem, seu aliquid quod rationabiliter proprietas dici possit.*

Hoc posito quæsitum fuit an Monialis ex his Dis-  
calciatis possit habere & acceptare peculium, seu  
pensionem pecuniariam constitutam illi, vel testa-  
mento legatam à consanguineis, illamque possit exi-  
gere si opus sit etiam in iudicio. Pars negatiua visa  
iam fuit vera aliquibus, recusantibus dare legatum an-  
nuum cuidam Moniali ex prædictis. Mouentur ex ci-  
tatis verbis suæ Regulæ. Et quidem Regula satis cla-  
re, ac rigore loquitur prohibens non solum commu-  
nitati, sed etiam particularibus Monialibus ne ha-  
beant possessiones, vel proprietatem, vel aliquid quod  
rationabiliter proprietas dici possit. At redditus an-  
nuus computatur possessio, seu res immobilis, vt ex-  
presse habetur in Clementina *Exini. de verb. signific.*  
*ver. cumque annui redditus.* Vbi annui redditus interd-  
cuntur Fratribus Minoribus, quia computantur inter  
bona immobilia. At pensio pecuniaria, de qua agitur,  
in hoc quæsito soluenda per totam vitam, est annuus  
redditus, vt constat: ergo non potest ab ista Moniali  
peti, nec acceptari, contradicente regula sua citatis  
verbis.

1 His non obstantibus dico prædictam Monialem  
posse acceptare prædictam annuam pensionem pecu-  
nariam ( vulgo tença ) ante probationem suppono ex  
Concilio Tridentino *sess. 25. cap. 3. de Regular.* omnes  
Religiones virorum, & mulierum posse habere bona  
immobilia, & redditus annuales ( exceptis Minoritis,  
& Capucinis, de quibus ibi. ) Quam concessionem ef-  
se extendendam ad Conuentus Monialium, quæ per  
suam Regulam prohibentur habere immobilia, con-  
stat ex Sanchez *tom. 2. Decal. lib. 6. cap. 18. & lib. 7. cap.*

12. num. 1. & ex Rodriguez tom. 3. qq. quest. 29. art. 14. & proinde cum hæ Moniales Discalciatæ sint per Tridentinum dispensatæ, vt possint habere bona immobilia in communi, sequitur quod in hoc æquiparantur cæteris Monialibus secundæ regulæ S. Claræ, quæ vocantur Urbanistæ, & cæteris Monialibus aliarum Religionum, quæ habent redditus in communi.

2 Hoc posito facile probatur conclusio. Nam Moniales istæ Discalciatæ, quoad paupertatem sunt sicut cæteræ Moniales habentes redditus in communi per dispositionem citatam Concilij Tridentini: ergo sicut aliæ Moniales Conuentuum possidentium redditus in communi, habent in particulari pensiones pecuniarias annuas, vt praxis Ecclesiastica, & regularis obseruat. Sic etiam istæ Moniales Discalciatæ in particulari poterunt habere prædictam pensionem pecuniariam annuam constitutam sibi à consanguineis in vita, vel per mortem: dummodo prædicta pensio sit dependens à voluntate prælatæ, & non expendatur sine scientia, & consensu illius. Neque obstat quod hæ Moniales post Concilium Tridentinum nunquam acceptarunt redditus in communi. Nam ista non acceptatio, non est renunciatio Tridentini: vt enim renunciatio Tridentini esset valida, debebat fieri in manibus Papæ, & ab illo acceptari, sicut Sanchez dicit lib. 7. Decal. patres suæ societatis renunciaſſe illi decreto Concilij Tridentini circa suas domos professas, ne possent habere bona immobilia, & Papam acceptasse: At hæ Moniales licet post Tridentinum non acceptauerint bona immobilia in communi, tamen non renunciauerunt illi decreto Tridentini coram Papa, & proinde possunt hodie habere illa bona immobilia in communi, si voluerint, & in cæteris procedere sicut cæteræ Moniales

in materia peculij pecuniarij annualis. Secundo principaliter, quia licet hæc Moniales profiteantur rigorosam illam paupertatem supra explicatã in sua regula, vsus tamen, & consuetudo explicauit, vt illam paupertatem non sic rigorose seruarent sicut Fratres Minores seruant. Nam illæ pecuniam recipiunt intra Conuentum manu contactam, & libere consumunt sine Syndico intermedio, tanquam veræ dominæ illius pecuniæ, & sic semper obseruant, quod signum est illas habere posse dominium in communi alicuius rei. Denique hæc opinio satis clare colligitur ex Sanchez *lib. 7. Decalogi cap. 26. num. 10.* vbi probat citans multos, quod Frater Minorum particularis est capax vt illi relinquatur legatum, quod probat efficacibus rationibus. Et ibidem *num. 40.* probat Conuentum Fratrum Minorum esse capacem recipiendi legatum annuum relictum dum vixerit talis frater particularis: quia hoc non est legatum, vel redditus annualis simpliciter perpetuus, id est respectu Religionis, licet sit perpetuus respectu fratris viuientis. Si ergo hoc licitum est in fratre Minori particulari, seruante maiorem, ac rigidiorẽ paupertatem: magis licebit isti Moniali seruanti minorem paupertatem, cuius Conuentus potest habere redditus annuales in communi perpetuos ex dispositione Concilij Tridentini. Neque hoc legatum relictum durante vita istius Monialis dici potest perpetuum, cum possit quotidie extinguì morte ipsius, vt notat Sanchez citato loco. Imo addit citato *cap. 26. num. 45. & seqq.* cum Doctoribus ibi citatis, quod est validum legatum relictum Fratri Minori particulari pro causa studij, & libris emendis: & à fortiori valebit ob prædicta relictum isti Moniali particulari ad suas necessitates subleuandas penderet à licentia, & scientia  
 Præ-



prælata, quæ superflua illius legati poterit insumere in necessitatibus Conuentus.

3 Ad argumentum in oppositum desumptum ex verbis Regulæ istarum Monialium respondetur primo, rigorem illorum verborum moderatum esse per Concilium Tridentinum, quod concedit prædictis Monialibus Discalciatis posse habere possessiones, & bona immobilia in communi. Secundo dicendum est hoc legatum annuum non esse redditum annualem perpetuum simpliciter, de quo ibi loquitur citata Clementina. Non est enim perpetuum simpliciter respectu Conuentus, vt patet, & hos solos redditus sic perpetuos respectu Conuentuum Fratrum Minorum ibi Papa prohibuit. Adde quod neque istud legatum est proprie perpetuum respectu ipsius Monialis particularis, vt dixi in fine *num. 3.* proxime præcedentis, quia videlicet quotidie potest extinguí per mortem illius: perpetuum vero non est, quod quotidie potest extinguí. Tertio respondetur per hoc legatum, istam Monialem non dici habere proprium, seu proprietatem: Nam ille tantum dicitur habere proprium, qui habet dominium alicuius rei independenter ab alio, vt Doctores communiter explicant: At ista Monialis non habet dominium absolutum, & independens: sed habet illud dependens à voluntate Prælatae, sine cuius licentia non potest illud insumere: imo ita illud habet dependenter à voluntate Prælatae, quod poterit Prælata illud totum insumere in necessitatibus Conuentus quando ita necessitas postulauerit: & declaratur adhuc, nam aliæ Moniales, imo & Religiosi non Minoritæ, omnes profitentur se non habituros propria in particulari, sic enim petit essentia voti paupertatis: & nihilominus de licentia Prælatorum habent hæc peculia,

culia, siue pensiones pecuniarias perpetuas in vita dependenter à Prælatiſ, nec per hoc exiſtimant ſe habere proprium.

## CASVS XXV.

*De quadam quarta parte funerali ſoluenda.*

**Q**uidam homo moriens iuſſit ſe ſepeliri in quodam Conuentu Religioſorum, in quo elegerat ſepulturam. Iuſſit vt pro anima ſua, fierent duo officia deſunctorum, vnum per Religioſos Conuentus aliud per clericos ſuæ parochiæ, & pro quolibet officio darentur viginti menſuræ tritici; facta ſunt ambo officia, & datæ ſunt Religioſis viginti menſuræ tritici. Clerici vero procurarunt ne ſuæ viginti menſuræ tritici ad Conuentum deſſerrentur in die officij, ſed extra Conuentum eas receperunt. Et in illa parochia non eſt conſuetudo vt hæ oblationes deſſerantur cum corpore deſuncti, ſed in die quo fit officiũ finito officio vtroque, clerici petunt à Religioſis quartâ partem funeralem illarum viginti menſurarum, ſeu modiorum tritici, qui rel'cti ſunt Religioſis pro officio, cum ipſi Clerici receperint ſuas viginti menſuras tritici integras pro ſuo officio facto in eodem Conuentu.

Quæritur an Clerici iure id petant? & videtur quod ſic, nam quarta funeralis debetur parochio pro labore tolerato paſcendi parochianum in vita paſtu ſpiritali ſacramentorum verbi Dei, & ſimilium, vt habetur in titulo *de ſepult.* in iure canonico, etiam ſi deſunctus in teſtamento talis quartæ mentionem non fecerit, vt  
praxis

praxis obseruat: sed hæ viginti mensuræ tritici relictæ sunt Religiosis tanquam oblatio integra funeralis, ergo de illis debent quartam funeralem Clericis. Neque obstat, si dicas iam clericos habere alias viginti mensuras tritici sicut Religiosi habuerunt, per quas clerici abunde satisfacti sunt de sua quarta funerali. Non obstat, quia has viginti mensuras tritici reliquit defunctus Clericis pro labore officij quod ipsi pariter cantauerunt in Conuentu separatim à fratribus. At duæ obligationes non possunt satisfieri cum vna solutione: Siquis enim debeat Petro viginti ob vnâ causam, & viginti ob aliam, non satisfacit his duabus obligationibus soluendo viginti, sed debet soluere quadraginta. Sic ergo à simili: Ille defunctus debebat quartam funeralem parochio propter pastum spirituale in vita sibi ministratum: & præterea debebat illi præmium officij defunctorum cantati pro illo à clericis in conuentu fratrum: ergo hæ duæ obligationes quartæ funeralis, & officij non debent satisfieri vnica solutione illorum viginti modiorum tritici Clericis relictorum, hi enim relictæ sunt pro labore cantandi officium vt dictum est.

**I** Hoc non obstante, credo quod isti Religiosi non debent Clericis quartam illarum viginti mensurarum tritici, quas reliquit defunctus pro officio à Fratribus cantando. Probo hoc imprimis ab autoritate Doctorum: Nam vt dixi in *1. tom. Dub. Reg. vet. canonica portio num. 7.* Septem Doctores graues citati à Rodrig. *tom. 1. qq 9. 39. art. 7.* dicunt absolute, quod quando defunctus reliquit parochiæ aliquod legatum æquiualens quartæ funerali, & sepultus est extra parochiam, Ecclesia vbi sepultus fuit non debet quartam funeralem parochiæ: idque ob rationem statim adducendam, ex Pannormit.

normit. qui fuit grauiſſimus doct̃or inter Canoniſtas, Ultra vero illos ſeptem Doct̃ores citatos à Rodrig. citat. art. 7. habet eandem opinionem Sylueſt. ver. *Canonica portio quaſt. 9. in caſu 12.* ſequens Panorm. Et quia audiui partem contrariam vim facere in verbo quod poſui citato loco *Dubior. Regul.* videlicet: *Si deſunctus reliquerit parochia aliquod legatum pium, tunc habituram locum opinionem citatorum ſeptem doct̃orum: at, inquit hoc legatum, de quo agimus, relictũ clericis viginti menſurarum tritici, non eſſe legatum pium: ergo hic locum non habet illa opinio: & probabunt forte non eſſe legatum pium, quia fuit relictum cum onere officij cantandi.* Dico imprimis illos 7. Doct̃ores cit. à Rodrig. non ſpecificare, nec requirere quod legatum relictum parochiæ ſit pium: ſolum dicunt in communi: ſiquid reliquerit parochiæ, vt exprimit Panorm. in cap. *de his de ſepult. num. 2.* idem facit Sylueſt. citato loco non exprimens legatum an debeat eſſe pium, vel non pium. Neque Rodrig. citato art. 7. ſpecificat quod ſit legatum pium: ego illud verbum, pium, appoſui attendens ad qualitatem legati. Secundo dico, quod iſtud legatum tritici relictum clericis pro officio fuit legatum pium: Sic tenet Panorm. in cap. *Relatum 1. de teſtam.* vbi ait, quod legata pia dicuntur omnia illa quæ relinquuntur pro anima, & citat vnã gloſſam, & Bartolum. Idem tenet Comitulus lib. 7. *Reſp. moral. quaſt. 4. num. 3.* citans Sylueſt. Angel. Tabien. Armill. vbi etiam addit quod legatum relictum pro male ablatis cum onere reſtituendi eſt legatum pium, quia relinquitur pro anima. At hoc triticum relictum clericis à deſuncto eſt relictum pro anima vt patet: ergo eſt legatum pium.

2 Nunc aſſigno duas rationes, ob quas Conuentus  
Regu-

Regularium non debeat quartam istam funeralem de tritico sibi relicto, quando parochia æqualem mensuram tritici recepit. Prima ratio est sumpta ex iure. Nam Ecclesia electa à defuncto pro sepultura debet præponi, & habere maiorem partem oblationum, quam habitura sit sua parochia relicta; Constat hoc ex iure in quo decernitur, quod ex oblationibus quarta tantum pars detur parochiæ relicte, & tres partes dentur Ecclesiæ ubi defunctus elegit sepulturam: & sic Ecclesia sepulturæ præponitur, & melioratur in oblationibus datis à defuncto. Habetur hoc expresse de quarta parte solum danda parochiæ in Clementina *Dudum de sepulturis*, §. *verum ne*. Ex quo si defunctus relinquit Ecclesiæ suæ sepulturæ octo mensuras tritici, solæ duæ debentur parochiæ. Et hæc eadem est etiam intentio, & praxis defunctorum qui communiter Ecclesiæ suæ sepulturæ maiores oblationes, & donaria, ac missas relinquunt, quam parochiæ relicte. Et ratio naturalis id dicat, nam cum ex duobus vnum eligitur, & aliud omittitur, plus æstimatur id quod eligitur, quam quod relinquitur: at defunctus eligens sepulturam in Conuentu Fratrum relinquit Ecclesiam parochialem: ergo plus æstimat Conuentum Fratrum, ubi sepelitur. Cum ergo constet quod ius canonicum velit Ecclesiam ubi defunctus eligit sepulturam meliorandam esse in maiori parte oblationum funeralis, quam habitura sit parochia, sequitur quod de isto tritico dato Fratribus pro officio non sit danda quarta funeralis quia tunc è contra, Ecclesia parochialis præponeretur, & melioraretur in oblationibus defuncti, quam Ecclesia sepulturæ. Probatum clarè, quia tam triticum relictum clericis quam relictum Fratribus, relictum fuit tanquam vna oblatio funeralis integra pro anima defuncti:

functi: si ergo ex viginti mensuris tritici deberentur clericis quinque pro quarta funerali, assignarentur clericis viginti quinque, & Religiosis solum quindecim, & sic Ecclesia parochialis maiorem petitionem haberet de funeralibus quam Ecclesia pro sepultura: quod est contra citatam Clementinam, & contra praxim Ecclesiæ, & defunctorum intentionem. Confirmatur, quia rescriptum Papæ in dubio explicandum est ut conformetur iuri communi, ut probat Nauarr. in *commentar. Rubr. de iudiciis num. 9.* citans glossam celebrem in cap. *paratus 22. quest. 1.* & alios: ergo à fortiori legatum relictum in dubio, est interpretandum ut conformet iuri communi decernenti quod Ecclesia electa pro sepultura melioretur in oblationibus funeralibus, illarumque maiorem partem obtineat quam Ecclesia parochialis relictæ à defuncto.

3 Secunda ratio principalis est, quam assignat Panorm. in cap. *officij de testamentis num. 4.* quæ talis est. Quando debitor relinquit aliquid suo creditori, videtur in dubio id relinquere animo compensandi suum debitum: citat ad hoc l. *si cum dote §. si pater ff. solut. Matrim.* sed defunctus est debitor quartæ funeralis suæ parochiæ tanquam creditori, parochia enim est quasi creditor cui hæc quarta debetur: ergo si defunctus alibi eligit sepulturam, & relinquit aliquid parochiæ, si nihil exprimat, censetur illud parochiæ relinquere pro solutione quartæ funeralis, quam illi debet. Et hæc ratio videtur euidens, præter alias ibi adductas à Panorm. *num. 5.* cum aliis exemplis, & tex. in cap. *de his de sepult. num. 2.* & hoc manebit amplius confirmatum ex mox dicendis in solutione argumenti positi in principio in oppositum.

4 Ad argumentum ergo initio positum, concedendum

dum est quod iste defunctus habebat duas obligationes soluendas parcho, vnam quartæ funeralis, alteram pro officio cantato à Clericis in Conuentu Fratrum: sed dico, quod etiam hæc duo debita soluit duabus solutionibus distinctis: vna fuit eleemosina pecuniaria illis data pro officio, sicut data est etiam Fratribus alia eleemosina pecuniaria pro suo officio. Secunda solutio facta clericis pro secunda obligatione quartæ funeralis fuit triticum illis relictum in mensura æquali, atque ipsis Fratribus, & sic clerici duas solutiones duorum debitorum receperunt: videlicet in pecunia, & in tritico. Imo addo, quod licet clericis pecunia pro officio soluta non fuerit, soli viginti modij tritici sufficiebant ad soluendas ambas obligationes, quartæ scilicet funeralis, & officij. Nam de viginti modijs tritici, soluendo quinque pro quarta funerali, manebant adhuc quindecim, qui quindecim modij tritici (vulgo alqueires) vt plurimum æstimantur pretio sufficienti ad soluendum pro officio defunctorum factò à Clericis: atque ita cum solo tritico soluit defunctus illa duo debita, quæ erant eiusdem generis. Quod fieri posse patet ex adducto exemplo in argumento: Nam bene potest quis vna solutione soluere duo debita eiusdem generis, quando id quod datur in vna solutione æquiparatur duobus illis debitis ex duplici titulo contractis. Potest adhuc hoc comprobari ex Clementina *Dudum de sepult.* citata: vbi Papa iubet ne à Religiosis B. B. Patrum Dominici, & Francisci ratione oblationis funeralis exigatur aliquid vltra quartam partem oblationis. Tota vero oblatio funeralis istius defuncti pro anima sua defuerunt duo officia defunctorum, & quadraginta modij tritici: ex hac vero tota oblatione funerali, Clerici assecuti sunt dimidiam partem, quod esset cō-

tra citatam clementinam, nisi defunctus id liberaliter donare voluisset, sicut de facto donauit. Cum ergo Clerici ex tota oblatione funerali dimidiam partem integram reportarint, non est quod conquerrantur.

---

## CASVS XXVI.

*De quodam Conseruatore creato ab uno Gouernatore  
pro quadam funerali non soluenda.*

**S**Vpra in hac secunda parte casu 12. retulimus casum, in quo certi clerici Insulani per Vicarium Generale obligarunt hæredem cuiusdam defuncti sepulti apud Fratres Minores, & Syndicum Conuentus, vt in sua parochia tot legata, & officia iuberent fieri, quot facta fuerant in Conuentu Minorum: & asserabant Clerici sic esse positum in consuetudine apud illas parochias Insulanas. Ego ibi ostendi, & probaui ad hoc non posse obligari hæredem defuncti: & vltra probationes ibi adductas præcipua erat, quod talis consuetudo erat grauamen notabile hæredis, vel executoris testamenti obligati ad faciendas tot expensas, quas testator non habuit in mente præcipere. Nunc denuò ad corroborandam illam meam opinionem & confirmandam adduco Iulium Clarum qui *l. b. 3. § Testamentum §. 9.* dicit quod in dubio testator censetur minus grauare hæredem, quo fieri possit, & citat *l. vnum ex familia §. Si rem. ff. de leg. 2.* & dicit cum Socin. esse communem regulam. Cum igitur testator, de quo in illo casu, non expresse rit quod tot legata fierent in parochia quot iussit fieri in conuentu suæ sepulturæ, clare colli-



colligitur non fuisse mentem suam ad grauandum hæredem talionere.

Nunc veniendo ad casum nouum resultantem ab illo duodecimo; hæres defuncti, & syndicus conuentus appellarunt à mandato Vicarij Generalis. Goardianus conuentus creauit conseruatorem. Priorem conuentus D. Augustini positi in eadem vrbe, qui illos ab illa vi defenderet & sua priuilegij V. & alia ibi citata conseruaret. Prior Conseruator electus citauit Clericos. Illi pro se tria responderunt, vel quatuor. Primo vt conuentus Minorum ostenderet Bullas, per quas posset creare conseruatorem; Conuentus noluit ostendere Bullas authenticas, quia forte illas non habebat sigillatas, & authenticas: solum citauit libros impressos modernos, referentes priuilegia; & Doctores dicentes posse prælatum Regularem eligi conseruatorem. Secundo allegarunt Clerici prædictum priorem non posse esse iudicem conseruatorem in illo casu, quia suspectus erat; eo quod statim post in suo conuentu sepeliendi erant aliqui sæculares, & ferre deberet sententiam, ne propter illorum sepulturam tenerentur hæredes ad simile de quo agebatur; & sic erat iudex habens interesse in simili causa. Tertio dicebant Clerici, se habere consuetudinem à multis annis vt hæres defuncti eadem fieri iuberet in parochia quæ fiebant in conuentu sepulturæ, & obtulerunt ad hoc aliqua testimonia, seu instrumenta parochorum non iuridica, nec iurata, qui testificabantur se ita vidisse, & practicare vidisse. Quarto dicebant Clerici, quod priuilegium principale citatum Pij V. de non soluendo aliquid quod deferebatur post corpus defuncti sepultum, erat derogatum à Greg. 13. qui illam, & alias concessiones Pij V. factas Mendicantibus, reuocauit, & re-

duxit ad terminos iuris communis in Bulla sua particulari, quæ incipit, in tanta negotiorum lata Rom. anno 1. sui Pontificatus. Et quæstio sic agitata delata est ad Collectorem Apostolicum.

*Responsiones ad obiecta.*

**I**N fauorem prædicti conuentus, & aliorum Religioforum, libertatisque sepulture eligendæ respondendum duxit ante responſionem ad primum ſuppono communem eſſe ſententiam Modernorū Theologorum, quod prælatus Regularis localis poteſt creari conſeruator eo quod habeat dignitatem Eccleſiaſticam: ita tenet expreſſe Rodrig. 1. tom. qq. q. 65. ar. 2. citans alios: & tenet Sanchez 2. tom. decalogi lib 6. cap. 13. num. 6. quo poſito.

2. Ad primam clericorum obiectionem, dico primo Goardianum oſtendiſſe id eſt citariſſe libros Recentiorum Authorum, qui citant priuilegia Pontificum, vt poſſint religioſi creare conſeruatores: & hoc videtur ſufficere: Nam ipſa originalia priuilegiorum non eſt poſſibile oſtendere: cum enim multa ſint oporteret læpius Romam adire, vel alias partes longinquas adire ad quærenda originalia. Praxis ergo Eccleſiæ in hac materia, & tribunalium innuit quod pro priuilegij oſtenſione ſufficiat citatos libros impreſſos citantes compendia ordinum & alios Doctores, qui dant teſtimonium, de tali priuilegio oſtendere. 2. dico, quod aliud eſt poſſe Religioſos. eligere conſeruatores: & aliud eſt poſſe eſſe conſeruatores prælatum regularem localem. Illud primum, quod poſſint Religioſi eligere conſeruatores, eſt notorium in praxi Eccleſiæ quotidiana: quod autem notorium eſt, probatione non indi-

indiget, iuxta Doctores communiter, & iuxta dicta in simili materia à Nau. *lib. 1. consiliorum, tit. de sentent. ex-com. consilio 25. num. 16.* & Rodrig. *tom. 2. qq. q. 18. ar. 1.* & habetur clare in cap. *de manifesta*, & cap. *sequenti 2. q. 1.* ubi dicit 1. cap. *de manifesta*, & nota pluribus causa non sunt quærendi testes, & alia ibid ex D. Ambr. ergo non fuit necessarium vt Goardianus ostenderet priuilegiũ authenticum ad probandum quod posset ille nominare conseruatorem. Quod attinet ad secundum posse scilicet hunc conseruatorem esse prælatum regularem conuentus, hoc non pendet à priuilegio, sed ab explicatione Doctorum, qui explicant posse prælatum regularem conuentualem eligi conseruatorem, eo quod habeat dignitatem Ecclesiasticam; illudque deducunt ex cap. *finali, de offic. delegati in 6.* ubi dicitur quod Abbas potest eligi iudex conseruator: & sic tenet opinio communis omnium Recentiorum. Cum ergo hoc, quod possit prælatus Regularis localis esse conseruator non exprimitur in aliquo particulari priuilegio, sed sit explicatio communis Doctorum id deducendum ex iure communi, non tenebatur Goardianus ostendere particulare priuilegium; vt posset hunc prælatum regularem localem eligere conseruatorem: sed sufficiebat illi citare opinionem communem, & Rodrig. *tom. 1. qq. q. 65. ar. 3.* & Sanchez. *2. tom. decalog. lib. 6. cap. 13. n. 79.* & alij ab his citati. Scio ego in anno præterito pro alia causa simili quemdã Goardianum in vna causa quartæ funeralis contra quosdam clericos nominasse conseruatorem quandam dignitatem Ecclesiasticam, quæ sententiam tulit pro Fratribus, non petitis exemplatibus priuilegiorum, sed solum inspectis libris modernorum, qui citant priuilegia ad nominandos conseruatores, & alia priuilegia circa solutionem quartæ

funeralis. Et quia clerici in principio recusaverunt obedire, illorum Ecclesiam supposuit interdicto donec paruerunt mandatis.

3 Ad secundam obiectionem clericorum dico non esse materiam recusandi illum priorem D. Augustini pro iudice conseruatore, eo quod de futuro posset aliquis sepeliri in suo conuentu, & ex tali sepultura posset dictus prior sperare lucrum, & interesse in causa propria. Non obstat responsio quia est hæc valde remota, & friuola causa ad recusandum iudicem. Nam textus citatus à parte contraria in cap. *causam qua. de iudicijs*, loquitur de iudice delegato, qui iam de facto habebat aliam causam similem illi, quæ sibi de facto commissæ est: & in hoc casu prior D. Augustini non habet de facto aliam causam similem sibi iam commissam. Multum vero interest inter hæc duo, habere iam similem causam, & posse habere similem causam. Constat ex textu ibidem. *Quia vero cum eundem Archidiaconum simili penè causa contingat*: Non ait, similis causa potest cōtingere. Facit etiam ratio à simili. Nam Episcopus potest esse iudex in causa suæ propriæ Ecclesiæ, ca. *si quis erga. 2. 2. q. 7.* iuncta gloss vlt. cōmuniter ibi recepta, de quo Nauar. in consilijs, tit. *de corp. vitia-tis. consilio unico num. 9.* citans Abbatem: At iudex iudicans pro sua Ecclesia potest sperare, & intendere indirecte lucrum proprium, & interesse aliquando euenturum: ergo, quod prior Conuentus D. Augustini possit aliquando sperare lucrum proprium indirecte, non impedit quod possit esse iudex conseruator: Nam de ijs, quæ possunt indirecte, & remote euenire lex non curat, nisi exprimat: & retorqueo argumentum ad ipsos patres Clericos. Nam illi ad probandum quod sit consuetudo in Insulis tot legata fieri in parochia, quot sunt

fiunt in Conuētū vbi parochianus sepultus est, exhibent testimonia Clericorum qui fuerunt parochi, & mane possunt adhuc esse parochi, & proinde habent interesse speratum de futuro, vel iam habuerunt de præterito: & tamen per hæc testimonia credunt se probare intentum: ergo à simili, in nostro casu non faciet recusabilem priorem Conuentus D. Augustini, quod aliquādo sua Ecclesia, ex sua sententia remote sit habitura interesse. Vltimo aduerto quod licet prior prædictus creatus conseruator sententiam ferret declarans quod hæres defuncti non tenetur ad faciendā tot officia in parochia, quot facta sunt in Conuentu sepulturæ: hæc sententia, & declaratio non redundat in interesse Conuentus D. Augustini, sed solum in interesse hæredis, vel executoris testamenti, qui lucrantur in hoc non facere tot expensas officiorum: Conuentus autem nihil inde acquirit vt patet. Nisi forte dicas Conuentum inde lucraturum, quod per talem sententiam manent sæculares cum maiori libertate vt sepeliantur in Conuentibus, quam ante illam sententiam non habebant: Si hoc dicis vanum dicis. Non enim est lucrum dicendum, id quod libere Ecclesia concedit omnibus fidelibus, videlicet libera electio sepulturæ, quam Clerici per illam inauditam exactionem impedire conantur.

4 Ad tertiam responsionem Clericorum, dico primo, testimonia, quæ exhibent parochorum, & Clericorum testificantium de sua consuetudine in contrarium, esse testimonia diminuta, & insufficientia ob duas causas. Prima est, quia sunt testimonia parochorum, qui sunt suspecti, & interesse habentes in causa modo supradicto. Secunda, quia non sunt testimonia iurata, nec data iuridice, & proinde non possunt fidem facere in iudicio. Secundo principaliter, quia licet con-

ſuetudo ſit antiqua in illis Inſulis, quod oblatio non  
 deferatur ad Eccleſiam cum corpore defuncti, ſed octo  
 poſt dies, non ſequitur quod ex illa oblatione delata  
 poſt defunctum ſepultum octauo ſequenti die, Reli-  
 gioſi Conuentus debeant quartam funeralem ex illa  
 ſic delata poſt octo dies ſepulturæ. Nam conſeſſio Pij  
 V. citata à Goardiano de non ſoluenda quarta funera-  
 li niſi de illis quæ deferuntur cum corpore defuncti,  
 loquitur clare, & ſine diſtinctione, (quam conſeſſio-  
 nem non eſſe derogatam à Gregorio XIII. ſtatim poſt  
 probabo) & præterea Rodrig. *tom. 1. qq. quaſt. 39. art. 2. in*  
*fine*, ait quod per dictam conſeſſionem Pij V. eſt con-  
 ſuetudo in Eccleſia non ſolui quartam funeralem niſi  
 de delatis cum corpore: & ad hoc citat ibi Panormi-  
 Cardinal. Conar. & Molinam. Qui Molina dicit, quod  
 Concilium Tridentinum ſolum fecit mentionem de  
 quarta funeralium; quaſi innuens quod hæc ſolum  
 ſoluitur de his quæ deferuntur in die funeris; & alia  
 ad intentum dicit Molina citato loco à Rodrigu. Ter-  
 tio dico quod in hac vrbe Olyſſiponenſi, quæ eſt Me-  
 tropolis Regni, multis abhinc annis cum corpore de-  
 functi non deferatur oblatio aliqua. Si autem poſt octo  
 dies hæredes defuncti dant aliquam oblationem Con-  
 uentui, vel Eccleſiæ ſepulturæ, Conuentus non ſoluit  
 parochiæ quartam partem de illa oblatione. Conſo-  
 nantius vero eſt vt ſeruetur conſuetudo Metropolis  
 Regni, quam noua conſuetudo Inſulæ intruſa contra  
 citatam conſeſſionem Pij V. Quarto dico, quod licet  
 in Inſula ſit talis conſuetudo ſoluendi quartam partem  
 de delatis poſt diem ſepulturæ modo expoſito, eſt con-  
 ſuetudo contra illam claram conſeſſionem Pij V. qui  
 in Bulla, in qua illa conſeſſio continetur, *num. 15.* di-  
 cens quod non ſoluatur quarta funeralis niſi de delatis  
 cum

eum corpore, dicit tanquam Legislator: *sicque intelligi Concilij decretum decernimus*. At ista declaratio facta à Legislatore ipso, non est priuilegium, sed lex cum sit facta ab ipso Legislatore: & proinde dato, & non concessio quod illa Bulla esset reuocata vt priuilegium, non esset reuocata quo ad hanc declarationem Authenticam factam à Papa, quia Papæ declaratio facit legem, vt tenet Suarez *tom. de legibus. cap. 1. à num. 1. & seqq. lib. 6.*

5 Quod vero attinet ad obiectionem clericorum dicentium, quod si prælati Regulares Conuentuum in Insulis non soluerent parochis quartam funeralem de oblatione defunctorum, quæ nunquam defertur cum corpore, sed octauo die: si ita esset, aiunt, sequeretur quod parochi perpetuo carerent quarta funerali, quæ illis debetur ex iure in præmium sui laboris pro sacramentis in vita parochiano ministratis, quod est clare contra intencionem, ac dispositionem iuris. Respondeo hanc sequelam, vel querelam esse per accidens, & lex non curat de illis quæ sunt per accidens. Et dico quod bene sciebat Papa posse esse varias consuetudines in diuersis Ecclesiis circa delationem oblationis funeralis cum corpore, vel post sepultum corpus: siquidem specificauit, *De illis solum quæ cum corpore deferuntur*. Et cum sciret dari posse has varias consuetudines in delatione oblationis, voluit quod quarta solueretur solum de oblatione delata cum corpore. Potuit enim Papa sciens priuare clericos quarta funerali de delatis post diem funeris, sicut multi Summi Pontifices scientes priuarunt Episcopos & clericos illis decimis, quæ soluendæ erant à Religiosis, sicut constat ex multis priuilegiis à Sede Apostolica concessis personis Religiosis ne soluerent decimas in præiudicium

clarum Episcoporum, & Clericorum.

6 Quod attinet ad quartam responſionem Clericorum dicentium Gregorium XIII. reuocasse illam concessionem Pij V. & reduxisse illam ad terminos iuris communis Dico primo, quod licet ita eſſet, tamen cū ille reduxerit illam ad terminos iuris communis, in hoc tamen puncto, de non soluenda quarta de delatis post diem ſepulturæ, tam eſt factum ius commune, & lex Eccleſiæ, & proinde non eſt reuocatus hic punctus Bullæ. Quod vero hic punctus Bullæ ſit factum ius commune, conſtat ex dictis proxime, num. 4. vbi diximus Pium V. declarasse ſic eſſe intelligendum Concilium Tridentinum loquens de quarta funerali: cum ergo Papa ibi fecerit declarationem authenticæ, tanquam legiſlator, iſta illius declaratio eſt lex, & ius commune iuxta Suarez ibi citatum, & proinde quoad hoc Gregor. XIII. non reuocauit prædictam Bullam, cum ſit iam ius commune, & non priuilegium. Secundo dico ad eandem obiectionem quod Gregor. XIII. non reuocauit prædictam Bullam Pij V. probo hoc teſtimonio Doctiſſimi Nauarri teſtis oculati, exiſtentis Romæ, qui in ſumma latina impreſſa Antuerpiæ anno 1584. in fine, quoniam in præcedentibus promiſerat allaturum ſe exemplar Bullæ Gregorij XIII. per quam dicebatur reuocasse prædictam Bullam Pij V. ſubdit Nauarrus hæc verba in fine ſummæ. *Quia promiſimus inferere Bullam Gregor. XIII. ſi exiret interea: qua quia non exiuit, &c.* In quibus verbis clare innuit prædictam Bullam Gregorij XIII. fuiſſe quidem propoſitam in mente, & propoſito Papæ, vel etiam ſcriptam, ſed non exiuit, id eſt non fuit promulgata: & ex conſequentia nullum obligat, cum ſit de eſſentia legis, vt promulgetur iuxta communem Doctorem ſententiam: Idem tenet



tenet Henriquez, quod scilicet talis Bulla Gregorij reuocans Bullam Pij V. non fuerit promulgata, tenet inquam Henriquez *tom. 1. summa lib. 3. de pœnitent. cap. 6. §. 6. in glossa littera R.* sequens Nauarrum. Cum ergo Nauarrus tantus Doctor, tam timoratus, Romæ existens tempore Gregor. XIII. imo qui suam summam latinam dedicauit Gregorio XIII. dicat prædictam Bullam Gregorij reuocatoriam Bullæ Pij V. (vt dicebatur, vel sperabatur) non exiuisse, id est non fuisse publicatam, non poterit condemnari hodie ille qui dixerit prædictam Bullam Pij Quinti, & priuilegia in eadem Religiosis concessa, non esse reuocata, sed in suo robore manentia.

7 Tertio dico, quod prædicta concessio Pij V. etiam si esset priuilegium, & non lex, vt proxime ostendimus: essetque reuocatum à Gregorio XIII. hodie tamen est reualidatum: quod sic probo. Communis sententia est Iuristarum, quod quando aliquis Papa confirmat priuilegia alicuius Religionis vtens in confirmatione his verbis. *Ex certa scientia, vel motu proprio, vel de plenitudine potestatis.* Tunc per illam confirmationem reualidantur etiam priuilegia illius Religionis, quæ antea erant nulla, & inualida: vt tenet Suarez cum communi *tomo de legib. libro 8. cap. 19. num. 12.* & Collector priuilegiorum Mendicantium ver. *priuilegia ad §. 14.* notat quod Salmanticæ per famulos Doctores responsum fuit, quod quandocumque aliqua priuilegia conceduntur de nouo cum ista clausula: *Non obstantibus reuocationibus Apostolicis,* intelliguntur viuificata, & denuò concessa illa quæ fuerant reuocata. At constat euidenter, quod priuilegia Ordinum Minorum post Gregorium XIII. fuerunt confirmata à Sixto V. *ex certa scientia*, vt patet ex Bullario Rodriguez *fol.*

1152. & à Clemente VIII. in eodem Bullario fol. 1224. qui Clemens VIII. addit clausulam: *Non obstantibus quibusvis clausulis irritatiuis, annullatiuis, etiam priuilegiorum reuocatiuis*. Ego, dato, & non concessio, quod dicta concessio Pij V. esset reuocata, per Gregorium XIII. iam hodie manet reualidata per illas duas confirmationes priuilegiorum Minorum factas à duobus postea sum. Pontificibus ex certa scientia, & cum illa clausula, quam dicunt Doctores Salmanticenses. Ad do quod Rodrig. in *explicatione Cruciatæ* §. 9. *dubio 1. num. 32.* dicit quod Greg. XIII. solum reuocauit Bullam Pij V. in iis quæ erant contra Concilium Tridentinum, & quod postea de nouo concessit illa quæ non erant contra Tridentinum. Illa vero concessio Pij V. de non soluenda quarta ex delatis post sepultum defunctum, non erat contra Tridentinum, sed ad mentem Concilij Tridentini, vt idem Pius V. declarauit, vt diximus supra *num. 4.* Ad do quod Zerola in praxi sua, 1. parte ver. *Funus corporis* fol. 164. §. *Nono quoties*, ait Cardinales Tridentini declarasse, quod officia sepulchrorum in Monasteriis, debent fieri in eisdem monasteriis vnde non habent clerici ius vt petant, quod pro sepulto in monasterio, fiant officia in sua parochia.

8 Post hæc vidi Molinam supra citatum à Rodriguez, qui Molina *tom. 1. de iust. tract. 2. disp. 215. §. Obseruant Panorm.* & in § *Quod ad parochialem*, ait in § 1. quod Sixtus IV. concessit Patribus B. Dominici, & B. Francisci. *Vt solum tenerentur soluere quartam funeralem de iis quæ funus concomitantur, hoc est de oblationibus diei funeris.* Et citat Molina Syluestrum id referentem in verbo Canonica in vltimis verbis. Ergo, dato, & non concessio, quod Gregorius XIII. reuocauit Bullam Pij V. saltem manet integra ista concessio Sixti IV. in eadem

dem materia, quam Bullam Sixti IV. Gregor. non reuocauit, & est confirmata ex certa scientia per Sixtum V. & Clement. VIII. Secundo ait Molina in 2. §. citato in hæc verba. *Aduerte vsum receptum esse vt Religiosi de solis oblationibus funeralibus diei funeris soluant paræcia defuncti quartam.* Tertio dicit Molina cit. §. *observant Panorm.* quod Concilium Tridentinum *sess. 25. cap. 13. de reform.* solum fecit mentionem de quarta funeralium, id est, vt constat ex eodem Molina iisdem locis, de delatis in die funeris: & proinde cum hæc sola fuerit mens Concilij Trid. non fuit hoc reuocatum à Gregor. XIII. qui, vt diximus ex Rodrig. in Cruciata, non reuocauit nisi illa, quæ erant contra Tridentinum. Sed in rei veritate si Nauarro credendum est, neque id fecit Gregorius XIII. cum illius Bulla non fuerit promulgata.

9 Obiicijs priuilegium citatum Sixti IV. saltem in Insulis est abrogatum per non vsum; quia concessum fuit illud priuilegium fere ducentis ab hinc annis, & in Insulis numquam fuit practicum: at priuilegia cum sint leges Ecclesiæ per quadraginta annos possunt præscribi. Respondeo primo, quod Rodrig. *tom. 1. qq. q. 61. art. 3.* ait quod vt præscribatur contra priuilegium ultra tempus ad præscriptionem requisitum, opus est vt priuilegiatus sciat se habere tale priuilegium, & præterea quod nolit eo vti. At constat quod Religiosi in Insulis numquam habuerunt notitiam talis priuilegij. Neque constat quod illi scientes, noluerint illo vti. Imo satis credendum est quod si de illo scirent, illud utique practicaret in materia sibi utili, & quotidie necessaria. Vide quæ dixi in 1. *tom. Dub. Regular.* verbo *priuilegij cessatio per non vsum* in §. circa priuilegium quod non est in vfu in vna prouincia vnius Religionis, sed

sed tamen est in usu in aliis prouinciis eiusdem Religionis. Vide etiam quæ dixi in 2. tom. *Dub. Regul.* verbo *Præuilegium* 2 fol. ; 20. col. 4. Respondeo secundo ad positam objectionem quod etiam si præuilegium Sixti IV. in Insulis esset præscriptum per non usum, non tamen ibidem potuit præscribi concessio Pij V. citata, quia ut contra præuilegia nostra præscribatur est necessarium tempus centum annorum, iuxta præuilegium Patrum B. Benedicti quod ego citauit in 1. tom. *Dubiorum Regul. ver. præscribere*. At concessio Pij V. de qua est quæstio non fuit concessa centum ab hinc annis. Sub censura Eccles. & Doctorum.

## CASVS XXVII.

*De quodam Abbate electo idiota.*

**I**N quadam Religione eliguntur Abbates locales qui habent iurisdictionem quasi Episcopalem, habentes Mythram cum Baculo, consecrantes calices &c. & conferunt ordines Minores: & habent Ecclesias, quibus præficiunt parochos: & has Ecclesias visitant per se, vel per alios, & ferunt sententias in casibus difficilibus sicut Episcopi. Quæritur utrum possit eligi in officium istius Abbatis religiosus, qui nunquam didiscit linguam Latinam, neque illam bene legit, imo neque bene scribit.

2 In eadem religione cum eligendus esset Generalis, cum præsideret in capitulo quidam Episcopus ex commissione Collectoris Apostolici, & de mandato regis, proposuit præses tres religiosos dicens quod de illis

illis tribus vnum eligerent, & non de alijs: Sic enim disposuisse regem & electores volebant alium eligere extra illos tres. Obligati vero ex mandato prædictis, elegerunt vnum ex illis tribus, qui erat idiota cum supradictis insufficientiis. Quæritur an fuerit vera electio. Et an iste Generalis p. sst prælidere in capitulo Generali futuro.

I Ad primum quæsitum dico, quod secundum ius commune, credo prædictum religiosum sic idiotam, vt proponitur non posse eligi in prædictam Abbatiam, vel in officium Generalis, qui præsidet his Abbatibus, & à quibus ad Generalem appellatur. Probo imprimis ex cap. ultimo *de atate, qualis. & ordin. præficiend.* vbi Papa Honorius III. post factam sibi querelam, siue informationem circa quendam electum ad Episcopatum Calinenſ. post examinatam causam, dicit Papa, quod sufficebat ad illum non confirmandum confessum fuisse electum taliter coram Papa. *Numquam se de grammatica didicisse, nec etiam legisse Donatum,* & subdit ibi Papa: *Quod si illum confirmaret, se facturum contra Deum, & contra Canonicas sanctiones tantum in Episcopo tolerando defectum.* Idem dicitur in cap. *cum in cunctis de elect.* vbi Alexander III. dicit, quod in cunctis officiis Ordinum sacrorum requiruntur grauitas morum, & literarum scientia. Si vero hæc in sacerdote requiruntur quocunque, à fortiore debent inueniri in Abbate cui iniuncta sunt illa munia, & officia de quibus supradictum est in informatione Idem dicitur in cap. *qualiter de elect.* vbi Papa delicit ab officio Episcopi, qui ante confirmationem, Episcopatus cathedram assumpsit, & assignat Papa etiam pro causa: præcipue quia nec donum scientiæ Episcopo conueniens, fuerat assecutus. Vbi glossa verbo *Conueniens*, notat quod licet in præ-

lato

lato non sit scientia eminens, requiritur tamen scientia conueniens, id est proportionata ad finem officij, & gubernationem animarum. Idem colligitur ex cap. *Illiteratos* 36. *distinct.* in quo ad officium Episcopi, vel quasi Episcopi, non solum requiritur scientia, sed etiam ad sacerdotium. Idem habetur in cap. *ignorantia* 38. *dist.* & denique vltra multos alios textus iuris canonici, & Conciliorum, sufficiat Concilium Tridentinum *sess.* 22. *cap.* 2. *de reform.* vbi decernit quod eligendus in Episcopum, sit graduatus in sacra Theologia, vel in sacris Canonibus, vel habeat testimonium alicuius Vniuersitatis testimonium dantis de illius sufficientia. Vel denique si sit Religiosus, quod illius superiores testimonium ferant de illius litteratura. Cum ergo praedictus Abbas habeat curam animarum in religiosis, & in saecularibus sicut habet Episcopus, sequitur quod omnino est inhabilis ad dictum officium religiosus de quo agitur, qui nec nouit linguam latinam imo nec bene scit legere: & hoc multo magis locum habet in his miseris temporibus, in quibus tot lites, tot casus intricatissimi quotidie emergunt, quorum resolutio pendet à iure canonico, & multarum Bullarum papalium continuo studio.

2 Probo insuper idipsum ex duabus gloss. iuris canon. Prima est in cap. *Congregato de elect.* vbi gloss. ver. *Lateran.* & verbo *litteratura*, dicit quod defectus scientiae facit aliquem ineligibilem, & praeterea quod deijcit iam promotum: & citat ad hoc multos textus. Secunda glossa est cap. 1. *de renunciat.* verbo *insufficietiam*, vbi idem dicit quod glossa prior proxime citata. Et quod etiam in electionibus religiosorum sint eligendi ex obligatione Tridentini *sess.* 24. *cap.* 1. *de reform.* sinteligendi digniores in moribus, & in scientia, tenet

Ra-

Rabello *tomo 1. de obligat. iust. lib. 3. q. 4. fol. 143. §. conclus. vero*, ubi dicit prædictum decretum Tridentini etiam obligare in electionibus religiosorum. Imo addit, quod magis obliget in religionibus, quam in electionibus aliorum Ecclesiasticorum. Denique confirmo ex ratione naturali: Nam conformiter ad ius naturale in Republica sæculari non permittuntur officiales mechanici sutores, fabri, &c. officium exercere nisi prius per annos artem didicerint, & prius de illa examinentur: quomodo ergo tolerandum est ut officium Episcopi, vel quasi Episcopi, de quo agitur cum regimine animarum, quod iuxta D. Gregorium est ars artium, committendum sit homini, qui nec bene legit linguam latinam? Neque est quod respondeas, in aliquibus religionibus aliquando eligi prælatos conventuales omnino illiteratos. Nam respondeo 1. me nunquam ullum talem vidisse qui ignoraret linguam latinam: maxime in his temporibus, in quibus recipiendi ad habitum examinantur exacte de lingua latina. Secundo dico esse diuersam rationem in illis prælatis localibus, qui non visitant, non ferunt sententias in litibus contra sæculares, non conferunt ordines, & sic de cæt. quæ omnia opus habet facere iste Abbas & sic maiori indiget litteratura quam illi prælati locales.

3 Quod attinet ad primam partem secundi quæsitæ, an præses illius electionis potuerit coarctare electionem ad illos tres tantum, dico non potuisse: & iam in præcedentibus in alio casu simili hoc dixi, ex Rodrig. sed quia in hoc casu aliqua circumstantia diuersa concurrat, ex eo quod electio facta est de commissione Collectoris Apost. sunt hic repetenda aliqua iam dicta in præcedentibus. Igitur Rodr. *tom. 2. qq. Regul. q. 51. art. 10. 11. & 12.* dicit quod talis designatio trium

est coarctare electionem quam ius canonicum clamat debere esse liberam: & idem nomen, electio, denotat libertatem: & in particulari illic Rodrig. *art. 11.* ponit hæc verba. Teneo quod electio Prouincialis, aut cuiuscumque alterius prælati restricta, non ad certum genus personarum, sed ad tres, vel quatuor personas particulares, minime canonica, & valida debet reputari. Sic ille, quo nil clarius dici potest. Quod verò dicit valere electionem si coarctetur ad certum genus personarum sit, quando viget statum vt de certis tantum nationibus eligatur, videlicet Italis, Gallis, Hispanis, Lusitanis: tunc inquam valet, quia non designantur certæ personæ, vt Petrus, Ioannes, Franciscus; sed designatur genus personarum, & sic non coarctatur libertas electorum. Et citat Rodr. graues Doctores, dicens se vidiſſe retractari, & annullari tres electiones Goardianorum, quia in electione cuiusque fuerunt designati tres vt ex illis tantum vnus eligeretur; & sic elegerunt: & fuit illorum electio nulla. Quod vero Rex non posset præcipere vt vnus ex tribus tantum designatis eligeretur, constat quia rex non potest dispensare in iure canonico, vel naturali, quæ requirunt vt electio sit libera. Quod vero attinet ad dominum Collectorem Apostolicum, ipse viderit an habuerit commissionem papalem ad dispensandum in iure canonico, sine qua in illo dispensare non potuit. Hoc vnum scio, quod non potuit dispensare vt eligeretur omnino idiota, quoniam iste etiam in lumine naturali est inhabilis, & in lumine naturali nec Papa potest dispensare; quod etiam constat ex eo quod supra diximus ex Papa Honorio dicente, quod confirmatio idiotæ istius esset contra Deum, id est, contra lumen naturale diuinum.



4 Ex his patet responsio ad secundam partem secunda-  
 di dubij, an scilicet iste idiota sic electus possit postea  
 præsidere in capitulo generali futuro: Dico enim im-  
 primis illi obediendum esse in publico tanquam præ-  
 lato, quia habet titulum putatiuum collatum à supe-  
 riore. Secundo, quia licet iura, & Doctores citati dicant  
 electionem coarctatam esse nullam, & dicant non  
 posse eligi omnino idiotam, non tamen dicunt, quod  
 electio istius sit ipso iure nulla: sed innuunt quod po-  
 terit annullari. Imo etiam si dicerent talem electio-  
 nem esse ipso facto nullam, necessaria erat noua sen-  
 tentia declaratoria nullitatis, vt omnes Doctores di-  
 cunt circa legem ponentem priuationem officij ipso  
 facto alicui delinquenti: nam etiam post delictum com-  
 missum vt priuetur, debet accedere sententia superio-  
 ris declaratoria delicti, de quo Rodr. 10. qq. q. 17. ar. 16.  
 & Henriq. 10m. 2. lib. 13. cap. 56. & proinde ad hunc sic  
 electum contra iuris prohibitionem priuandum ab  
 officio, necessaria erit sententia iudicis, quæ si non ac-  
 cedat tãquam prælatus toleratus poterit, ac debet præ-  
 sidere in capitulo. In hoc autem certus sum, quod iuxta  
 citatos textus, glossas, & Doctores poterit illi lis in-  
 tentari ab electoribus, vt ab officio amoueat pro-  
 pter duo impedimenta in illius electione concurren-  
 tia, videlicet illiteraturæ totalis, & coarctationis factæ  
 in electione illius, sicut Rodrig. supra citatus dicit se  
 vidisse fieri circa tres electiones Goardianorū sic ele-  
 ctorum. Et præterea quod adhuc post electionem pos-  
 sit priuari ob dicta impedimenta, probatur clare ex  
 glossa in ca. *veniam* 35. q. 9. in ver. *per rumorem*, vbi di-  
 citur quod si aliquis propter falsum rumorem est ele-  
 ctus qui credebatur peritus, postea cassatur eius ele-  
 ctio, & citat ad hoc textus.

## CASVS XXVIII.

*De quodam Prouinciali agroto, nec valente  
visitare prouinciā.*

**I**N quadam Religione est statutum, vt omnes prælati ducant vitam communem in mensa, vestitu, &c. si minus ait statutum, si infirmitatis causa id facere non possint, & infra quinque menses non fuerit spes sanitatis assequendæ, vt possint vitam communem ducere ab officio omnino arceantur.

Hoc posito in vna prouincia eiusdem Religionis, quidam Prouincialis per multos menses ita infirmus est ex variis, & antiquis infirmitatibus sine vlla spe sanitatis obtinendæ, vt prouinciā visitare non possit nisi per alium, & cum circumstantiis indebitis, & indecoris ad statum illius prouinciæ. Quæritur an possit ac debeat ab officio amoueri etiam inuitus.

**I** Respondeo casum nullam pati difficultatem: nam statutum, seu lex clarissime loquitur, & comprehendit clarè prædictum Prouincialem de sanitate desperatum. Breuiter idem potest ostendi à simili, ex eo quod habetur in cap. vnico de Clerico agrotante. vbi iubetur Episcopus assignare coadiutorem prælato inferiori infirmo, & de sanitate desperato, ne Ecclesia fraudetur debito seruitio Ministrorum. Addit textus: *Quod si Episcopus fueris senio, aut valetudine corporali gravatus, vel adeo impeditus perpetuo, vt officium suum nequeat exercere.* Tunc iubet vt capitulum cum Episcopo eligant duos coadiutores, qui Episcopatum gubernent. Quod præsentī casui debet omnino applicari, cum sit eadem omni-

omnino ratio. Cum vero prælato Regulari non debeant dari coadiutores, cum id sit præter consuetudinem, & Religioni non congruum, sequitur quod talis Prouincialis tenetur renunciare officio, idque si facere noluerit, ab eodem sit amouendus. Causa vero cur Episcopus, & parochus impeditus à regimine, non amoueantur ab officio, sed illis dentur coadiutores, inter alias est, quod cum habeant familiam sustentandam, non decuit illos priuari fructibus beneficiorum necessariis ad se, & ad suos sustentandos: quod non currit in prælato regulari. Probatur hoc etiam viuo exemplo Patris nostri Francisci, qui vbi primo se sensit langoribus, & infirmitatibus præpeditum ad discurrendum per vrbes, & oppida pro regimine Fratrum, seipsum ipsemet officio Generalis abdicauit, & creauit Vicarium Generalem Ordinis Fratrem Petrum Cataneum *lib. 2 Chron. cap. 31. 1. part.* Imo vero ipsemet Pater in *cap. 8. Regula*, innuit quod eadem de causa possit amoueri ab officio ipse Generalis Ordinis. Ait enim, quod si Religio viderit Ministrum Generalem non esse sufficientem ad seruitium, & communem vtilitatem fratrum, teneantur Ministri Prouinciales sub peccato mortali alium Generalem eligere. Quis autem non videat quod Prouincialis impeditus omnino ad visitandam Prouinciā sit insufficiens, & inutilis ad communem vtilitatem Fratrum? Cum enim non possit visitare, non implebit officium boni pastoris, qui iuxta Euangelium debet cognoscere oues proprias: ad quā cognitionem Concilium Tridentinum iniungit Episcopis, vt singulis annis visitent totam suam Diocesim. Quod idem P. N. Franciscus monet in *sua Regula cap. 10. de Prouincialibus*, dicens: *Visitent, & moneant fratres suos, &c.* Denique quantum sit necessarium ad

bonum regimen subditorum regularium, quod illorum prælatus vitam communem ducat in mensa, vestitu, & cæteris, sufficiat inter alia dictum D. Gregorij Nazianzeni in sententiis. *sentent. 4* ubi dicit, quod prælatus qui docet, & non facit, vna manu trahit subditos, alia impellit ad cadendum. At prælatus regularis impeditus omnino langoribus, licet posset manu linguæ docere, & subditos ad regulæ obseruationem trahere; E contra cum manu operis, vtendo videlicet cibus, ac vestibus delicatis, eosdem subditos ad relaxationem impellit, licet nolit. Vnde constat prædictum statutum istius Ordinis esse fundatum in iure canonico, imo & naturali, & prouincialem istum comprehendere.

## CASVS XXIX.

*De quibusdam confessoribus secularium  
certo modo electis.*

**I**N Ordine Minorum statuto generali decernitur, vt confessores secularium non fiant nisi in capitulo per Prouincialem cum Diffinitoribus in diffinitorio. Ad dantur alia duo in eodem statuto; primum vt singuli Goardiani ad prædictum Diffinitorium mittant examen fratrum suorum de moribus, & scientia, qui possint eligi pro confessoribus: & ex illis sic missis, & à Goardianis examinatis, Prouincialis cum Diffinitorio eligant digniores. Secundo addit idem statutum, quod Prouincialis extra diffinitorium non possit per se aliquem Religiosum instituere confessorem secularium, cuius diffinitorium id committat. Prouinciali in spe-

speciali. Hoc posito, in quodam capitulo non venerunt examina facta à Goardianis circa eligendos pro confessoribus, sicut statutum decernit. Diffinitorium forte videns necessarium esse creare confessores sæcularium pro bono animarum, commisit Prouinciali vt ipse prouinciam visitans examinaret Religiosos pro confessionibus audiendis, & quos idoneos iudicaret, confessores institueret: nam ipsi Diffinitores quoad hoc in ipsum Prouincialem compromittebant.

Ex vi prædictæ commissionis Prouincialis visitans prouinciam instituit aliquos confessores sæcularium, qui cum licentia Prouincialis Episcopo præsentati, & approbati, confessiones sæcularium audierunt. Quo posito quærentur duo.

Primum, an dicti confessores prædicto modo instituti à Prouinciali valide sint instituti? Secundum, an dato etiam quod non fuerint valide instituti, confessiones ab illis auditæ validæ fuerint? Et videtur quod vtrumque nullum fuerit: Primum, quia cum statutum generale denegat diffinitoribus vt possint compromissionem facere in prouincialem pro eligendis confessoribus extra capitulum, institutio talium confessorum sic facta à prouinciali, est facta sine iurisdictione, & non seruata forma mandati statuti generalis, vt patet. At constat quod non seruata forma mandati, seu commissionis, actus est nullus: imo in hoc casu, non solum non est seruata forma mandati, sed expresse contrauentum est formæ mandati. Ex probatione istius primi probari videtur secundum, videlicet confessiones auditas ab his confessoribus nulliter institutis, fuisse nullas: Nam confessor nulliter electus, caret iurisdictione, & carens iurisdictione facit actum nullum.

I Ante responsionem præmitto quod in Clementi-

na *Dudum. de sepult.* Clemens V. concessit, ac decreuit, quod pro confessoribus audituris confessiones sæcularium assumendis ex Ordine BB. PP. Dominici, & Francisci sufficeret Prouincialem vtriusque præsentare Episcopo nomina illorum Religiosorum, quos vellet, ac peteret eligi, seu approbari ab Episcopo in confessores sæcularium: quibus præsentatis, Episcopus debeat illos approbare modo ibi assignato, ad quem me remitto. Qui modus præsentandi est de iure communi, & positus in corpore iuris. Neque in illo exigit Papa consensum Diffinitorij pro institutione confessorum, sed solum consensum Prouincialis. Neque Concilium Tridentinum *sess. 23. cap. 15. de reform.* agens de approbatione confessorum Regularium, aliquid requirit, vel specificat circa modum quo confessor regularis ex parte sui Ordinis debeat præsentari Episcopo, pro confessionibus sæcularium audiendis.

2 Hoc posito respondi, me credere (quidquid Diffinitores illi errauerint) prædictos confessores à Prouinciali sic institutos, valide fuisse institutos in foro conscientiae, & proinde confessiones ab illis auditas, fuisse validas. Probo primum, fuisse scilicet valide institutos pro foro conscientiae. Probo primo, quia statutum Religionis non potest irritare actum subditi, qui aliàs sit conformiter ad ius canonicum, aliàs posset religio irritare ius canonicum: at præsentatio istorum confessorum facta est iuxta ius canonicum dictæ Clement. requirentis ad præsentationem confessorum solum consensum Prouincialis, non vero Diffinitorij: ergo dicta præsentatio valida fuit pro foro conscientiae. Minor & consequentia patent. Probo maiorem, quod scilicet statutum Religionis non possit annullare actum factum iuxta ius canonicum: primo quia inferior non potest

potest tollere legem superioris, Clementina *Ne Roman, de elect.* statutum vero Religionis est inferius iure canonico. Et hoc ipsum tenet expresse Nauar. *lib. 3. consilior. tit. de Regular. conf. 5.* dicens non valere statutum Ordinis annullantis professionem illius, qui in professione negauit se esse Christianum nouum, quia aliàs professio est facta iuxta ius canonicum, in quo non annullatur talis professio. Idem tenet Mirand. *tom. 1. Manual. quest. 22. art. 5. ad tertium.* dicens non posse Ordinem Franciscanum facere statutum annullans professionem Nouitij, qui in anno nouitiatus cum habitu & licentia prælati exiuit à Conuentu curandi morbi gratia, quia illa absentia sic facta est conformis iuri communi: quod maxime inseruit ad nostrum intentum de præsentī statuto eligendorum confessorum modo prædicto: licet enim Diffinitores errauerint in facienda illa compromissione Prouinciāli contra statutum: at tale statutum videtur quod non possit annullare institutionem prædicto modo factam à Prouinciāli de his confessoribus, cum illam fecerit iuxta ius commune cit. Clementinæ *Dudum*, quæ ad confessorum præsentationem solum consensum prouinciālis requirit. Secundo principaliter probo, quia prædictum statutum licet prohibeat ne Diffinitores compromittant in prouinciālem, vt instituat confessores extra capitulum, tamen non annullat secus factum à prouinciāli, vt patet: At multa fieri prohibentur, quæ tamen facta valent, vt patet multis exemplis quotidianis, & habetur expresse cap. *ad Apostolicam. de regul.* ergo sola simplex prohibitio statuti non annullans, non reddit nullam institutionem prædictam factam à Prouinciāli, maxime cum facta fuerit ex forma iuris canonici. Quod late & fuse traditur à Sanchez *lib. 3. de Matrim. dispnt. 5. num. 2. &*

4. & à Suarez *lib. 5. de legib. cap. 31. num. 13.* vbi dicunt, quod hoc verbum, *Aliter non fiat, vel nullus faciat*, vel quid simile posita in lege, si lex aliàs non annullat actum, non irritare secus factum: sed solum apponi ut actus debite & licite fiat. Et magis in speciali, id confirmo ex Miranda, qui *tom. 1. qq. Manual. quest. 47. art. 12.* dicit quod si aliquis Religiosus sine licentia sui prouincialis fuit præsentedus Episcopo, & ab illo approbatus ad audiendas confessiones sæcularium, confessiones ab eo auditæ erunt validæ, si in sua Religione non sit statutum annullans prædictas confessiones: At hoc citatum statutum licet prohibeat Diffinitoribus id compromittere in Prouincialem, non tamen annullat institutionem secus factam à Prouinciali, nec confessiones auditas à confessoribus ab illo sic institutis. Tertio principaliter probatur quia vnaquæque res facile redit ad suum primum principium, & facile lex, & res redit ad suam antiquam legem, ut probat Nauarr. in *lib. conslit. de pœnitent. & remiss. consilio 19 num. 4.* inde probans quod possit monialis tempore Iubilæi confiteri clerico sæculari approbato, quia facile res redit ad antiquam legem, & olim moniales nondum exemptæ, sed subditæ Episcopis, confitebantur clerico sæculari: ergo etiam in hoc casu, facilis erit reditus ad antiquam legem citatæ Clementinæ, quod confessor regularis instituatur sufficienter de solo consensu Prouincialis, non expectato consensu capituli.

3 Ex dictis patet responsio ad secundum quæsitum, & dico confessiones auditas ab his confessoribus fuisse validas propter multa dicta *num. 1. & 2.* & maxime quia sunt auditæ à confessore approbato de licentia Prouincialis iuxta formam Clement. *Dudum*: & quia dictum statutum licet prohibeat, non tamen annullat institu-



institutionem confessorum aliter factam, nec confessiones ab illis auditas, & tunc optime seruit citatum dictum Mirandæ tom. 1. *Man. quæst. 47. art. 12.*

4 Hinc etiam patet solutio argumenti positi in contrarium. Primo enim respondetur, quod licet in his confessoribus instituendis non sit seruata forma mandati, vel statuti, quod præcipit contrarium, id non ob stare, quia licet prohibeat, non tamen annullat, vt diximus ante finem *num. 2.* ex Sanchez, & Suarez. Secundo dicendum quod licet in institutione horum confessorum non sit seruata forma statuti, seruata est tamen forma iuris communis assignata in Clementina *Dudum*, citata, quæ pro confessoribus Ordinis nostri solius Prouincialis consensum requirit, non capituli; quæ forma præsentandi confessores non potest annullari à statuto Ordinis vt probaui *num. 2.* Et proinde sufficienter sunt prædicti confessores præsentati, & ex consequenti confessiones ab illis auditæ valide fuerunt: quidquid sit de errore diffinitorum in tali compromissione erga Prouincialem facta.

## CASVS XXX.

*De absolutione vnius excommunicationis impensa  
ab vno excommunicato.*

**D**Vo Religiosi rixati sunt adinuicem manus violentas sibi inuicem iniicientes, sed in secreto. Transacto delicto, pœnitentes, vnus petiit ab alio vt se absolueret ab excommunicatione tantum, non à peccato, idque extra sacramentum confessionis. Ille habens

2 Ante responſionem igitur ſuppono duo clariffima. Primum eſt, quod per extrauagantem Martini V. *ad euitanda*, non tenemur euitare excommunicatum in temporalibus, & ſpiritualibus niſi ſit vel declaratus, vel notorius clerici percuſſor vt communis opinio, & praxis obſeruat: & proinde ſi excommunicatus non declaratus, nec notorius clerici percuſſor ſacramenta miniſtrent, quidquid ſit de peccato ſuo, cui Papa nulum fauorem particularem concedit, tamen factum tenet; ſic enim ibi Papa diſponit propter bonum commune animarum. Secundo ſuppono hos duos Religioſos de quibus quaeritur eſſe quidem ambos excommunicatos, & percuſſores clerici: ſed non eſſe notorios clerici percuſſores quia in ſecreto fecerunt vt dicitur. Pro quo optime dicit Zerol. 1. *part. praxis dub. 5.* verbo *excommunicatio*. dicit quod vt quis dicatur notorius clerici percuſſor, neceſſaria eſt euidentia facti, ita vt percutiens taliter videatur ab aliis quod non poſſit vlla tergiverſatione celari. Et ſtatim *dubio 6.* citans Nauarum ait ad faciendum notorium requiri ad minus ſex teſtes, quam opinionem approbat Zerol. dicens ad faciendum percuſſorem clerici notorium, requiri ſex teſtes. Et eandem opinionem repetit Zerola in 2. *part. praxis ver. excommunicatio dub. 9.* quod adhuc magis extendit Farin. *tom. de Inquiſitione quaſt. 21.* maxime *num. 185. pag. 2.* vbi dicit quod ad faciendum notorium requiruntur decem teſtes, & pauciores nullo modo ſufficere.

3 Ad primum ergo quaſitum dico, quod ille qui petiit abſolutionem ab altero percuſſore, peccauit M. contra charitatem petendo ab illo abſolutionem, ſi habebat alterum à quo peteret, neque habebat tam urgentem neceſſitatem abſolutionis, neque iſ à quo petebat

uere à sola censura. Si ergo necessitas illis potuit tribuere ius ad absoluendum etiam à peccatis, à fortiori idem ius ad absoluendum valide ab ista censura habebit iste percussor Clerici occultus per citatam Extrauag. Martini V. quæ non priuat iurisdictione excommunicatum nisi sit declaratus, vel notorius clerici percussor.

§ Ad tertium quæsitum dico potuisse hunc talem percussorem clerici occultum valide hanc absolutionem à sola censura dare extra sacramentum confessionis, non audita confessione peccatorum. Regula enim communis est Theologorum, quod confessor potens absolvere ab aliqua censura, potest ab illa absolvere etiam non audita confessione sacramentali pœnitentis. Sic docet in terminis Rodriguez. *tom 1. qq. quæst. 61. art. 7.* citans Victoriam, Penham, Medinam, & Henriquez, qui citat alios: Additque id posse facere confessores virtute priuilegiorum, etiamsi in illis concedatur facultas absoluendi pœnitentes à censuris, auditis illorum confessionibus, ob causam ibi assignatam. Eandem doctrinam tradit Sanchez *lib. 8. de matr. disp. 34. num. 29.* ubi ait, quod concedente Papa per rescriptum alicui vt dispenset cum aliquo in aliquo impedimento matrimonij, iniungendo illi pœnitentiam salutarem, hac clausula non obstante poterit dispensare cum illo extra sacramentum pœnitentiæ. Et citat multos Doctores, & alia dicit huc spectantia. Et probatur ex praxi quotidiana Prælatorum: Nam inquisitores S. Officij absoluunt hæreticos in publico, non absoluentes ibi nisi ab excommunicatione incurta propter hæresim, sed non absoluunt sacramentaliter à peccato hæresis. Et Prælati Regulares absoluunt apostatas ab excommunicatione extra sacramentum non audita con-

feſſione ſacramentali apoſtata. Non enim abſolutio à cenſuris pendet ab abſolutione à peccatis: licet è contra abſolutio à peccatis pendeat ab abſolutione excommunicationis, eo quod excommunicato prohibita ſit receptio Sacramentorum.

6 Ad quartum quaſitum dico hunc excommunicatum abſoluentem ſolum à cenſura extra ſacramentum, peccaſſe quidem mortaliter, ſed non incurriſſe irregularitatem. Prima pars, quod peccauerit mortaliter, conſtat quia violauit præceptum Eccleſiæ in re graui, vtendo iuriſdictione ſibi prohibita in tali ſtatu. Excipe, niſi petens abſolutionem eſſet in graui neceſſitate illius: tunc enim videtur non peccaſſe ob grauem petentis neceſſitatem. Si enim Doctores communiter dicunt excommunicatum celebrantē ob grauem neceſſitatem vitandæ infamiæ propriæ, non incurrere irregularitatem: videtur à paritate rationis quod excommunicatus vtens iuriſdictione pro vrgente neceſſitate proximi, non peccabit: propter generalem regulam, quod neceſſitas non habet legem.

7 Secunda pars iſtius conſuſionis, in qua totum dubium conſiſtit, meo iudicio aſſeritur à Suarez *tom. de cenſur. diſput. 12. ſect. 2. num. 21.* vbi explicans quomodo Episcopuſ incurrat irregularitatem exercendo actum iuriſdictionis, explicat, quod ſi ille actus ſit actus ordinis ſacri, incurrit irregularitatem, vt ſi ſit actus confeſſionis ſacramentalis. Si autem ſit actus puræ iuriſdictionis, dicit propter illum non incurri irregularitatem: quia iſta irregularitas non eſt extendenda vltra id quod iura decernunt: At iura non imponunt irregularitatem excommunicato, niſi quando miniſtrat ſacramenta, vel actum iuriſdictionis annexum Ordini facto. Abſoluere autem ſolum ab excommuni-

municatione extra sacramentum, licet sit actus iurisdictionis, non est annexus Ordini sacro. Probo; quia Vicarius Generalis Episcopi potest esse ille qui nulum habet ordinem sacram, sed solam primam tonsuram: & tamen iste potest absolvere ab excommunicatione carens ordine sacro: ac proinde absolvere ab excommunicatione licet sit actus iurisdictionis, non tamen de se est annexus Ordini sacro. Idem videtur asserere Ludoicus Beia citato *casu* 6. §. *Tam quia excommunicatus*. Et quod nihilominus iste vtens iurisdictione etiam in actu non annexo Ordini sacro peccauerit M. tenet expresse Suar. *cod. tom. de censur. disput. 14. sect. 1. num. 3.* Quod autem Vicarius Generalis carens omni Ordine sacro, cum sola prima tonsura possit absolvere ab excommunicatione, inter alios tenet Henric. citans alios *tom. 2. summ. lib. 13. cap. 27. §. 4. in text. & glossa littera G.*

## CASVS XXXI.

*Dominus Papa Urbanus VIII. derogat priuilegijs  
particularibus Religiosorum à praelatis  
sanctum concessis.*

**D**ominus Papa Urbanus VIII. anno 626. die 30. Iulij, Bulla particulari in omnibus Religionibus annullauit priuilegia, & exemptiones omnes, quas aliqui Patres graues in Religionibus à praelatis habebat, vel ipsi per abusum vsurpauerant in præiudicium Religiosorum: ex quibus aliquas specificat in Bulla. Hanc Bullam impetrauit ab illo Rex Hispaniæ; qui Rex m-

gulis Prouincialibus istius Regni propriam epistolam misit cum eadem Bulla, monens vnumquemque prælatum vt illam executioni mandaret. Et quamuis illa nullam executionem vel effectum habuerit, multaque dubia orta sint circa illam, non putavi in vanum me laboraturum, si aliquas aduertentias circa illam ponerem, quæ licet in præsentem, locum non sint habituræ: poterunt tamen forte pro futuro deferuire; iuxta illud poetæ: *Forſan & hac olim meminiffe iuuabit.*

---

### A D V E R T E N T I A.

*Quanto cum zelo, & fundamento Bulla fuerit  
expedita, & impetrata.*

1 **Q**UOD summus Põtifex motiua multa habuerit ad expediendam prædictam Bullam ex zelo extirpandi à Religionibus aliquos abusus contra Religionum puritatem, & obſeruantiam Regularum intruſos: quodque Rex Catholicus eodem ſuo ſolito zelo ductus eandem cum magno fundamento impetrauerit, ostendo aliquibus rationibus, ante quas ſolum præmitto, notum eſſe quod ego potuerim frui in Ordine aliquibus exemptionibus in iſta Bulla prohibitis: quæ tamen non curo, nec curauì, ſciens quia amicus Plato, ſed magis amica veritas.

2 Quod igitur Bulla multo cum iure, imò & neceſſitate data fuerit. Probo primo exemplo à ſimili: nam Papa Paulus V. anno 1606. propria Bulla reuocauit omnes indulgentias conſeſſas variis Religionibus, exceptis paucis, quas ibi in dicta Bulla permiſit: & in Bulla dicit

Ia dicit iam Papam Clementem VIII. intentasse easdem indulgentias reuocare, licet negotiis impeditum id ad finem non perduxisse: & causam istius reuocationis ibi Papa assignans, ait esse: *Propter abusum & corruptelas, quæ in usu dictarum indulgentiarum fuerant ortæ.* Dico ergo: Si fuit necessarium reuocare indulgentias quæ sic profunt animæ, propter multitudinem, & propter abusum, & corruptelas circa indulgentias ortas: maiori iure videtur quod fuerit necessarium reuocare priuilegia particularia non concessa à Sede Apostolica, sed vel à prælatis concessa particularibus Religiosis, vel per abusum, & corruptellam intrusa cum præiudicio Religionum, imo & aliquando cum dispendio animarum ipsorum sic priuilegiatorum? Iam D. Bernardus hoc præsentiebat, imo & desiderabat: quando lib. 3. de considerat. ad Eugenium tribus folijs post initium, prædictum Papam monuit, vt parcus esset in dispensationibus concedendis, nisi cum adesset necessitas, vel utilitas boni communis, ait Sanctus. *Cum nihil horum est, non dispensatio, sed crudelis dissipatio est.* Constat autem quod in his exemptionibus in ista Bulla prohibitis (quæ sunt utique dispensationes) non interuenit necessitas, vel utilitas boni communis, sed illius dissipatio, vt Papa innuit in præmio istius Bullæ, & innox ostendam. Secundo principaliter probó, quia ex priuilegiis in hac Bulla reuocatis nascitur vt plurimum inquietudo, dolor, & murmuratio in aliis bonis Religiosis, & occasio faciendi similia sine priuilegiis illis: quando vident alios adolescentiores qui non laborauerunt in Religione talibus priuilegiis munitos; sibi senioribus anteferri, qui in Religione portarunt pondus diei, & ætus. Facit ad intentum querela illa operariorum vineæ, qui contra patrem familias Math. 20. inuenerunt.

rarunt, eo quod sibi fecerit pares in præmio illos qui vna hora tantum laborauerant, cum ipsi portauerint pondus diei, & æstus: & ex his priuilegiis non solum resultat fieri pares iuniores, sed etiam fieri maiores illis qui totam vitam in choro, & aliis Religionis obsequiis consumpserunt. Facit pro eodem intento querimonia illa fratrum Ioseph. qui ægre tulerunt fratrem iuniorem Ioseph sibi præferri à patre in maioribus amoris indiciis illi exhibitis à patre, & in tunica particulari polymita, quam illi soli pater concessit. Facit denique ille versus Psalmi 62. *In labore hominum non sunt* &c. ad quem locum Lorinus explicat, idest: *Communia Reipublicæ onera deuiant, & in aliorum humeros capitaque reijciunt.* Et subdit Psalmus: *Idcirco tenuit eos superbia* &c. Alia multa possent incommoda referri orta ex his exemptionibus, & priuilegiis, quæ omitto breuitatis gratia, quæ tamen prudentes, graues, ac zelantes Religiosi, & sciunt, & dolent.

## ADVERTENTIA II.

*Vtrum hæc Bulla obliget in Regno Portugallia.*

3 **N**ON defuerunt qui dicerent hanc Bullam non obligare Religiosos existentes in Portugallia ducti forte ex eo quod Papa in illa loquitur in communi de Religiosis prouinciæ Hispaniæ: Regnum vero Portugalliæ semper fuit habitum pro regno separato ab Hispania. Quod subterfugiū, seu motiuum puto omnino friuolum, & nullum. Probo imprimis quia Papa Bullam concedens concessit illam ad petitionem,



tionem, & intentionem Regis Catholici, eiusque intentioni Papa se accommodauit in illius concessione: At Rex Catholicus illam impetrans clare significat se illam impetrasse etiam pro Portugallia, cum scribat epistolas singulis prælatis Portugalliæ, vt illam exquantur: ergo obligat in Portugallia. Confirmatur clarissimo exemplo: Nam communis est opinio Theologorum, quod cum aliquis impetrat à iudice Ecclesiastico aliquam excommunicationem contra scientes, vel detinentes rem aliquam, iudex Ecclesiasticus ita se accommodat intentioni impetrantis excommunicationem, vt nolit per illam ligari nisi illos, quos impetrans ligati voluerit, vt tenet inter alios Henric. *tom. 2. sum. lib. 13. de excommun. cap. 10. num. 1.* citans multos; cum ergo Papa hanc Bullam cõcesserit ad petitionem Regis Catholici illius se intentioni accommodans. Et Rex per suam epistolam declaret se etiam pro Portugallia illam impetrasse: quæ dubitatio manere potest illam in Portugallia locum habere? Secundo lex generaliter loquens, generaliter est intelligenda, iuxta multos textus citatos à Nauar. *lib. 3. consiliorum tit. de regul. consilio 79. num. 1.* sed ista Bulla est lex generalis pro Hispania, & loquitur generaliter, illis verbis, *In Hispaniarum regnis*; & in aliis verbis postea videlicet: *in dictis regnis*, & Portugallia in Descriptione terrarum est regnum Hispaniæ, & subiectum regi Hispaniæ, ergo intelligenda est omnino etiam pro Portugallia. Tertio probatur omnino ex multis quæ doctè, & efficaciter tradit Penha *in director. Inquis. in fin. fol. 151.* in quodā titulo, quomodo probetur extrauagantium auctoritas 2. p. §. *Iam non obstat*: vbi probat quod Bulla Papæ directæ Inquisitoribus vnus ciuitatis extenditur etiam ad Inquisitores aliarum vrbiū, vbicumque eadem est

ratio dispositionis. Quamuis enim mandata iudicium particularium solum obligent in loco ad quem diriguntur, secus est de mandato Principis iurisdictionem habentis in omni loco sicut habet sum. Pontifex: & citat ad hoc Bartolomeum Spin. & optime declarat hoc exemplo. Nam fere omnes epistolæ decretales Pontificum positæ in Decretalibus, ex quibus compactum est ius canonicum, fuerunt decreta, & epistolæ particulares Pontificum missæ ad particulares Episcopos, vel personas, vel regna: & tamen illæ obligant in tota Ecclesia tanquam ius commune. Ergo licet in hac Bulla non exprimerentur omnia regna Hispaniæ in qua est regnum Portugalliæ, ad illam etiam deberet extendi cum in Portugallia sit eadem ratio, & eadem necessitas istius reformationis faciendæ. Citat etiam Penha *t. ultimam Cod. de legib.* ubi sententia principis lata in certa causa facit ius vniuersale, & omnes ligat: & citat alia pro eodem intento satis inferuentia.

4. Obiiciunt, quod hodie quando Papa concedit, & renouat Bullam Cruciatæ, ultra Bullam directam pro Hispania, expedit aliam particularem directam pro sola Portugallia, quod signum est, inquiunt, nolle Papam ut decreta sua directa pro Hispania obligent in Portugallia, nisi illud exprimat. Respondeo (si ita est de expeditione particularis Bullæ Cruciatæ pro Portugallia) id fieri ut seruetur mos antiquus, quando Portugallia non erat subdita regi Hispaniæ, & proinde indigebat Bulla particulari: secus hodie quando est subiecta eidem regi, & rex per epistolam declarat se pro Portugallia etiam impetrasse & in Portugallia iubet obseruari. Et præterea oportebat quod isti opposcentes ostenderent aliquam legem, qua disponderetur à Papa, se nolle ut Bullæ ipsius latæ pro tota Hispania non

non obligent in Portugallia subiecta, & inclusa in Hispania. In hac vero nostra Bulla, declarat omnia regna Hispaniæ, per illa verba, *In regnis Hispaniarum*, quæ cum sit propositio indefinita, æquipollet vniuersali apud Iuristas, vt expresse tenet glossa in Clementina prima *de præbendis, & dignitatibus*, in verbo, *quanti*, colligiturque ibi clare ex textu.

### ADVERTENTIA III.

*Quæ priuilegia, & exemptiones Bulla reuocet?*

5 **Q** Vatuor reuocantur in ista Bulla: videlicet, priuilegia, prærogatiuæ immunitates, exemptiones. Quæ quatuor, licet in communi modo loquendi, & in substantia videantur esse idem, singula tamen habent aliquam differentiam, & habent propriam definitionem. Priuilegium est lex priuata aliquid speciale concedens. Videlicet quando conceditur vt fiat aliquid contra legem, vel præter legem. Exemptiones, secundum Syluest. ver. *exemptio*, sunt libertates, seu educationes ab aliqua subiectione, seu seruitute, per quas quis liberatur ab aliqua lege, vel ab aliquo inferiori prælato, & fit immediatus superiori prælato. Immunitas, teste eodem Syluest. ver. *immunitas*, importat negationem munium, seu munerum idest officiorum: & est idem quod esse liberum ab officiis communibus, vilibus, & sordidis. Prærogatiua, iuxta declarationem Calepini verbo *prærogatiua*, est præstantia, vel eminentia qua quis alteri præfertur, aut præferri debet. Hæc sunt quæ in genere Papa reuocat in ista Bulla.

6 Descendit præterea Papa ad particularia aliqua,

illaque specificat. Primum est ne exeant à conuentu ad libitum cum socio destinato sibi proprio absque licentia Prælati localis. Secundo reuocat licentiam datam, vt sæculares possint ad sua cubicula ire quoties voluerint, ita vt Prælatus localis id non possit prohibere. Tertio prohibet, ne ex vno conuentu se transferant ad alium absque licentia superioris. Quarto reuocat licentias datas, quibus conceditur ne sint astricti interesse choro, refectorio, & aliis spiritualibus, & Religiosis exercitiis.

7 Declarat Papa se hæc omnia reuocare licet concessa fuerint à Prælati Religionis, siue etiam concessa fuerint à Nunciis Sedis Apostolicæ qui resident in regnis Hispaniæ, vel etiam si concessa fuerint ab ipsa Sede Apostolica. Et post reuocationem illorum quatuor in particulari, dicit. *Et quacumque eiusmodi priuilegia, quomodolibet concessa. Et addit quod illa reuocat perpetuo, ita quod nulli de cætero suffragentur, neque possint alicui concedi de cætero absque licentia Papa, vel Sedis Apostolicæ.*

8 Antequam vero alia dubia declarem istius Bullæ duo præmitto circa duas principales prohibitiones in ista Bulla contentas. Primum est de non exeundo à Conuentu cum proprio socio absque vlla licentia Prælati localis. Adduco solum in exemplum patrem N. Franciscum, qui in suo testamento loquens de obedientia exhibenda Goardiano Prælato locali, cum ipse esset Generalis, ordinis fundator, & talis Sanctus, loquens de Goardiano sic ait: *Ita volo esse captus in manibus suis vt non possim ire, vel facere contra voluntatem suam quia Dominus meus est.* Nota bene singula verba. Videatur etiam D. Bernard. lib. 2. citato ad Eugenium: vbi sic optime dicit. *Murmur loquer, & querimoniam Ecclesiarum*

*fiarum. Truncari se clamant, ac demembrari: subit abhincur Abbates Episcopis: Archiepiscopi Patriarchis siue Primatibus: Bona ne spes hac? Facitis hoc quia potestis, sed utrum ut debeatis, questio est. Facilitando probatis vos habere plenitudinem potestatis, sed iustitie forte non ita. Sic ille, & addit alia contra dantes exemptionem ne obediatur Prælati, & inter alia, considerans, quod in Angelis, minores obediunt maioribus: Inter homines vero aliqui procurant dispensationes ut alteri non subdantur, ait Sanctus: Quod hoc molitur ambitio impatiens subiectionis. Videatur Nauarr. tom. 1. suorum operum, Commentario 4. de Regul. quest. 9. num. 36. §. Quarto dico. ubi ait, quod non possunt videri iustæ facultates generales, quæ dantur alicubi Religiosis exeundi quoties voluerint, & alia quæ ibi ad intentum adducit. Et hoc dicit hic Papa, quod est fere eximere subditum ab obedientia Prælatorum. Quod vero nec Generalis possit eximere subditum ab obedientia Prælati localis, tenet Rodrig. tom. 1. 99. quest. 23. art. 3. dicens quod illud implicat contradictionem.*

9 Secundum quod aduerto circa aliam principalem prohibitionem ex his quatuor, est circa liberum ingressum sæcularium in cubicula Religiosorum inscio prælato locali: Religiones enim optime sciunt inconuenientia inde nascentia: quæ sunt de ordinario violatio silentij, reuelatio secretorum, ac defectuum Religionis, impediri assistentiam in choro, & in aliis exercitiis Religiosis: & præterea quod sæculares facti domestici curiositates fratrum, vel loquelas notantes, eosdem Religiosos in æstimatione non habeant. Ad quæ euitanda sufficiat Ethimologia nominis Monachus, qui dicitur vnus solus, vel solitarius: qua de causa graues Religiosi antiqui secedebant in eremum. Et

vt multa omittam à Sanctis de hac materia dicta : Impossibile est moraliter loquendo , vt Religiosus ex nimia conuersatione cum secularibus non degeneret à perfectione sui status. Videatur inter alios D. Bernard. *serm. 2. post octauam Epiphan.* vbi ait quod conuersationes Religiosi cum secularibus , etiamsi sint. consanguinei, impediunt exercitium spirituale.

---

#### ADVERTENTIA IV.

*Vtrum hæc Bulla reuocet priuilegia concessa per capitulum cum Diffinitorio.*

**I** D Vbitari poterit vtrum ista Bulla reuocet priuilegia illa, seu immunitates quæ in capitulo, vel per statutum, vel prælatus cum Diffinitoribus concedit aliquibus Religiosis , vt quod habeant vorum in capitulo, quod non obligetur ad aliquas horas in choro, & alia similia concessa in præmium sui laboris tractati : respondeo quod non. Probo, quia hic Papa dicit se reuocare priuilegia concessa per superiores. Cum vero hæc lex sit odiosa , restringenda sunt verba illius ad significationem propriam , vt intelligatur solum de concessis per prælatos absque capitulo, & absque diffinitorio. Non enim dicit concessa per capitulum , sed per superiores. Et probatur , quia quando capitulum concedit aliquod priuilegium, cessat præsumptio mali, quæ datur quando solus prælatus cõcedit. Hic enim per se solum poterit duci affectione praua , amoris inordinati, vel ob interesse alicuius lucri in concedendo priuilegio Religioso suo amico. At quando conceditur

tur per capitulum, vel diffinitorium, cum sint multi collatores priuilegij, cessat illa præsumptio. Hæc possunt probari ex titulo iuris canonici, de his quæ sunt à prælatis sine consensu capituli, vbi multi textus prohibent ne Episcopi faciant negotia grauias sine consensu capituli, & secus facta annullant: sed si fiant cum consensu capituli, sunt valida, & Papa confirmat. Qui textus fundantur in eo quod solus Episcopus errare poterit, vel propter prauum affectum, vel propter ignorantiam: quod de toto capitulo non sic facile præsumitur. Facit etiam cap. *de quibus. 20. dist. vbi* dicitur facilius inueniri id, quod à plurius senioribus quæritur.

11 Hinc sequitur, quod si prælatus Generalis ex se solo dedit alicui priuilegium vt haberet votum in capitulo, tale priuilegium per hanc Bullam extinguitur: est enim datum per solum superiorem prælatum, & non à capitulo, imo addo, quod etiam si hæc Bulla non sit publicata; nihilominus prælatus solus etiam Generalis non potest alicui Religioso concedere vt habeat votum in capitulo. Probatur clare ex *reg. 29. in reg. iuris*, quæ dicit: Quod omnes tangit ab omnibus debet approbari. Habere autem votum in capitulo omnes tangit, quia habens votum in capitulo eligit Prouincialem, Diffinitores, &c. ergo ab omni capitulo hoc votum debet concedi. Quod ego confirmo exemplo nostri Ordinis: In capitulo enim generali Tolletano, celebrato anno 606. vt daretur votum perpetuum in capitulo, & diffinitorio, patribus qui fuerant Prouinciales, dicit statutum, quod recepta sunt prius vota secreta, & consensus totius capituli generalis. Et probatur, nam si prælatus Generalis se solo posset alicui Religioso concedere votum in capitulo, sequeretur magnum inconueniens: posset enim Generalis ante capitulum

pitulum concedere votum octo, vel decem fratribus, & sic eligeret Prouinciālem quē vellet, sæpius cum detrimento prouinciæ. Et ex his etiam conuincitur, quod nec prælatus Generalis, vel Prouincialis cum diffinitorio solo potest dare votum alicui Religioso quia prælatus cum diffinitorio non est capitulum. Et licet diffinitorium cum prælato eligant prælatos locales, qui habent votum in capitulo; illud non est dare votum, de quo agimus, sed est instituere prælatos locales, quibus annexum est dare votum in capitulo, idque de compromissionē capituli; quod tamen capitulum non compromittit vt diffinitorium det votum alicui Religioso non prælato. Si autem diffinitorium cum prælato concederet alicui Religioso aliquod priuilegium, quod non esset votum, credo quod non derogabitur per istam Bullam, ob proxime dicta *num. 1.* quia scilicet hoc priuilegium non conceditur à solo superiore, sed iam conceditur à multis, & cessat in hoc præsumptio posita in *num. 1.* dummodo non sit ex quatuor hic expresse prohibitis, de quibus *num. 2. & 3.* nec sit in præiudicium regularis obseruantie, quam Papa vult conseruari, & reformari.

12 Hinc etiam sequitur non auferri per hanc Bullam priuilegium in aliquibus Religionibus datum Lectoribus iubilatis, vt habeant votum in capitulo, &c. quia hoc priuilegium est datum in capitulo per statutum. Neque item auferretur licentia quā in Ordine Patris Francisci habent soli illi Patres qui fuerunt Generales, vel Commissarij generales, vt exeant à Conuentu cum socio sibi placito non petita licentia Goardiani: hæc enim licentia data est illis à capitulo generali, non vero ab vlllo superiore particulari. Neque item prohibet hæc Bulla quin Patres grāues habeant



beant socium sibi placitum pro subleuandis suis necessitatibus corporalibus, hoc enim & lex naturalis postulat, & statuta aliquarum Religionum concedunt. Solum prohibet Bulla ne prædicti Patres à Conuentu exeant absque expressa licentia prælati localis. Imo addo, quod non poterit prælatus localis dicere alicui Patri graui, vt toto tempore suæ prælationis exeat ad populum non sibi petita licentia, quia iam in hoc Bullam violat, quæ expresse vult vt omnes subditi petant expresse talem licentiam hoc ipsum tenere videtur Nauar. citato loco commentarij 4. vbi loquens de licentiis generalibus, quas ante hanc Bullam habebant Religiosi exeundi à Conuentu, ponit hæc verba. *Laudabilis, & melioris exempli obedientia, submissionisque animi esset, vt specialis licentia ad exitum quemcumque specialem peteretur, & fieret, quo memoria statui intra claustra manendi, in dies, & horas renouaretur, & frequentia exeundi, onere facultatis petenda minueretur.* Sic pius ille, & magnus Doctor optime ad intentum; quod Nauar. à fortiori diceret visa hac Bulla, vt scilicet licentia exeundi petenda sit toties quoties exeundum sit, & non possit eam prælatus localis concedere perpetuam pro toto tempore suæ prælationis.

13. Dubitatur præterea, an post istam Bullam, & prædicta priuilegia reuocata, possint postea Nuncij Collectores concedere aliquod priuilegium, ex illis hic reuocatis alicui Religioso; vel etiam an prælati superiores id possint concedere. Et videtur quod sic. Nam in Bulla quando Papa illa reuocat ponit hæc verba: *Hac vice dumtaxat reuocamus, & derogamus specialiter & expresse.* Quæ verba innuunt solum derogare Papam præterita non futura: confidit enim, quod de cætero neque Nuncij, neque superiores talia concedent.

Nihil

Nihilominus dico, non posse Nuncios, vel superiores post hanc Bullam ( si illa publicata sit ) prædicta priuilegia hic prohibita concedere. Nam in Bulla ponitur aliud verbum clarius, id est, *Perpetuo, ita quod nulli de cætero suffragentur.* Quæ verba clarissima sunt, cum aliis ibidem, cum dicit Papa: *Nec possint alicui concedi de cætero, absque licentia Papæ, vel Sedis Apostolicæ.* Ibi enim per Sedem Apostolicam non potest intelligi Nuncius Apostolicus, sed alius Papa successor istius præsentis, sic explicat hanc vocem Sanchez *de matrim. lib. 8. diff. 28. num. 61. & 62.* vbi ait quod quando Papa concedit aliquid vtens hoc verbo: *vsque ad beneplacitum nostrum, vel Sedis Apostolicæ,* ibi Sedes Apostolica significat alium Papam, quia est nomen proprium officij, & dignitatis. Et citat ad hoc Ioan. Andr. Dominic. Lapum, & alios Canonistas. Præterea ridicula esset, & nugatoria hæc Bulla, & reuocatio, si statim post illam prælati, & Nuncij possent similia priuilegia concedere. At summi Pontifices non concedunt Bullas frustraneas, & nugatorias. Adde quod Bulla renocat etiam priuilegia data per Nuncios, imò & per summos Pontifices antecessores: quomodo ergo credendum est prædictis Nunciis facultatem manere concedendi de cætero similia priuilegia? Quod autem lex non debeat esse frustranea, & delusoria; vltra lumen naturale id suadens, tenet glossa in Extratag. si fratrum. Ioan. 22. *ne se de vacante. in ver. tollatur occasio.* vbi citat textus pro intento isto. Imò & ista priuilegia data post istam Bullam fierent omnino in fraudem legis; fraus vero contra legem non debet admitti, vt omnes Doctores clamant.

14 Restat respondere ad illa verba posita. *Hac vice duntaxat.* Et dico illa non significare, quod Papa hæc vice duntaxat reuocet illa priuilegia à se prohibita, quia

quia alias dicit se illa reuocare perpetuo. Sed volunt dicere, quod reuocat Papa aliqua priuilegia generalia Ordini concessa, per quæ Prælati possent se tueri dicentes, quod per illa priuilegia communia Ordinis concedebant illa priuilegia particularia priuilegia relaxatiua Religionis: & hæc priuilegia, vel indulta Ordinis dicit Papa se reuocare pro hac vice dumtaxat. Innuens, quod nolit Papa in totum dicta priuilegia Ordinis derogare, sed hac vice dumtaxat, id est ad hoc solum intentum. Deducitur clare ista responsio ex ipsa Bulla. Hæc enim verba, *Hac vice tantum*, non ponuntur nisi post reuocatoriam generalem, per quam reuocantur priuilegia Ordinis, quoad hoc: Ait enim Papa. *Non obstantibus constitutionibus, consuetudinibus, priuilegiis &c. quibus omnibus hac vice dumtaxat derogamus.* Ecce quomodo verbum, *hac vice*, non refertur ad priuilegia particularia concessa particularibus hic reprobata: sed ad priuilegia Ordini in communi concessa, quibus superiores velint se tueri ad illa concedenda: & his priuilegiis derogat pro hac vice tantum, id est, ad hoc solum intentum.

15 Pro maiori etiam huius rei notitia, noto cum Reginaldo *tom. 1. sum. lib. 13. num. 157.* & Azor ibi citato, quod lex Papæ reuocatiua priuilegiorum (qualis est ista) non habet vim donec denunciata sit, non solum in curia Papæ, sed etiam in propria prouincia ubi degit priuilegiatus, vel sit illi iam nota de certo. Et citat Reginaldus etiam Abbatem. Idem tenet Suarez *tom. de leg. lib. 8. cap. 40. nn. 3. & seqq.* Et dicit Reginaldus quod est opinio communis. Quo supposito, si ista Bulla fuit publicata valide, & solemniter in Portugallia per Nuncium, videtur quod obliget in conscientia; iam enim ultra publicationem, scitur de illa de certo. Ex-

cepto

cepto si facta est supplicatio ad Papam, quæ supplicatio si debite fiat, & lex publice non recipiatur in principio, potest suspendere legem Papalem si concurrant illa quæ tradit Suarez *tomo de legibus libr. 4. cap. 16. à num. 6. & sequentibus*. Si vero non fuit publicata in Portugallia non obligabit, quia de essentia legis est quod promulgetur.

---

## A D V E R T E N T I A V.

*Si extendatur hæc Bulla ad priuilegia  
Monialium.*

16 **Q**Uamuis Papa in hac Bulla nec vllū verbum faciat de Monialibus, quia tamen inter illas poterit dari eadem occasio, & necessitas auferendi similia priuilegia relaxantia, quæ vel prælati, vel prælatæ illis contulerint, non abs re visum fuit breuiter hoc dubium proponere.

Igitur quod etiam illæ hic comprehendantur, probatur primo, quia Bulla loquitur verbis nimis generalibus, dicens: *Quorumcumque Ordinum*, Et præterea ait: *Quarumcumque personarum regularium, ut ipsa persona iuxta Regularia suorum, &c.* Quæ verba satis generalia sunt, & vtrique sexui aptabilia. Secundo, quia in Monialibus currit eadem ratio, & possunt inter illas dari exemptiones, & immunitates similes, vt non eundi ad chorum, vel eundi ad crates ad libitum, & alia similia priuilegia, quæ poterunt inter Moniales causare scandala, & relaxationem. Et confirmo ex dicto Nauarri, super caput. Hæc autem verba de pœnitentia distinctione 1. n. 2. tom. 1. vbi ait cum multis Doctoribus citatis

tis quod caput *constitutionem de Regularib.* 1. 6. loquens  
 tantum de Dominicanis, & Minoribus, extenditur etiā  
 ad Carmelitas, & alios Religiosos, quia in illis militat  
 eadem ratio. At in Monialibus militat omnino eadem  
 ratio huius Bullæ vt patet ex proxime dictis, ne detri-  
 mentum patiatur Religio ex priuilegiis illatum quæ  
 sunt relaxatiua illius. Si enim lex pænalis potest exten-  
 di de vno casu ad alium in quo est eadē omnino ratio,  
 vt multis probat Sanchez 3. lib. de *Matrimonio disput.*  
 42. num. 4. à fortiori poterit hæc Bulla extendi de fra-  
 tribus ad Moniales, in quibus militat eadem omnino  
 ratio, cum ista Bulla non sit pænalis, quia nullam pæ-  
 nam imponit præter priuilegiatorum priuationem. Vlti-  
 mo, quia nō est nouum, quod lex lata cum verbo mas-  
 culino, comprehendat etiam fæmininum, vt patet ex ca.  
*si quis suadente* 17. q. 4. vbi Papa excommunicat percus-  
 sorem clerici, vtens verbo masculino *siquis* & tamen  
 Doctores, & praxis illam legem extendunt etiam ad  
 mulieres. Aliud exemplum pro hac re ponit Syluest.  
 verbo *Hospitale* q. 5. vers. Quartum ex Clement. 2. de  
 Relig. domibus, & generaliter, quod masculinum in-  
 cludat etiam fæmininum tenent multi relati à Tiraq.  
 de retract. consanguineor. §. 1. gloss 9. num. 221. & Me-  
 noch. de adipiscend. possess. medio 4. nu. 61. & seqq. propter  
 quæ potest hæc pars probabilis, vtrūque videri. Quam  
 tamen vt certam non conculco, cum Bulla sit odiosa,  
 & nullum verbum faciat de Monialibus: & sit opinio  
 communis, quod in pænalibus, masculinum non com-  
 prehendit, fæmininum, teste Geminiano ad caput *in*  
*generali in 3. casu de electione*: & Anton. Gabriel. lib.  
*com. opinionum tit. de ver. signif. conclus.* 7. num. 17.

ADVERTENTIA VI.

*De alijs dubijs circa hanc Bullam emergentibus.*

17 **Q**Voniam Religiones sunt multæ, & variæ, & priuilegia quæ illarum Prælati dare possunt sunt multa, & varia, nec sit possibile occurrere omnibus dubiis in omnibus Religionibus exortis: omnium dubiorum resolutio petenda est ex verbis generalibus in ista Bulla positis. Constat ergo ex proœmio illius, quod finis Papæ est procurare quietem, & fœlicem statum Religiosorum, & conseruationem Regularis obseruantia: Ex proœmio autem legis pendet explicatio totius legis, seu Bullæ; teste Sanchez *lib. 2. de Matrimonio disput. 37. num. 3.* in secunda ratione. Priuilegia vero quæ Papa intendit reuocare sunt illa per quæ Religiosi eximuntur ab obedientia prælatorum, intellige saltem in parte: & ex quibus nascuntur scandala, & inconuenientia in Conuentibus, maxime de non assistendo in choro, & refectorio. Cum ergo iste sit finis legis, videtur quod nolit reuocare Papa alia priuilegia, si quæ data sunt, quæ scandalum non generant, nec Religionem relaxant, nec à Prælatorum obedientia eximunt, quæ vnaquæque Religio debet attendere. Et in particulari noto, circa priuilegia quæ Papa dicit, de quibus nascuntur scandala: quod si contingat alicui datum esse priuilegium in ratione, & æquitate fundamentum ad arbitrium prudentis viri, & nihilominus aliqui pauci de illo scandalizantur, de tali scandalo curandum non est, cum illud fere sit Pharisaicum: quæ vero possint esse huiusmodi priuilegia in ratione, & æquitate fundata, & ex se non scandalizantia. Dicam statim.

18 Pro quo aduerto D. Paulum 1. ad Thimot. 5. dicere. *Qui bene præsunt presbyteri duplici honore habeantur.* Et Pater noster Franciscus rarissimum exemplum humilitatis, in suo testamento iubet vt Theologis honor & veneratio exhibeatur, eo quod nobis ministrant spiritum, & vitam. Bartolus grauissimus Doctor citatus à Syluestro verbo *expense*, dicit quod secundum ius, & rectam rationem. *Abbas debet melius vestiri quam Monachus, Magister in Theologia, quam alij fratres, Doctor quam scholaris, & sic etiam de cibarijs*, Sic Sylvester Religiosus ex Bartolo. Adde quod Summa, & Mathematica æqualitas inter Religiosos, esset inæqualitas, & fere confusio. Probatur primo ex comparatione corporis humani, in quo non omnia membra sunt æqualia, neque æque nobilia, neque æque tractantur in vestitu, sed proportionate ad indigentiam cuiusque, vt docet experientia, quod idem seruandum est in corpore mystico Reipublicæ religiosæ. Debet seruari respectus ad litteratos, qui laborant, & laborarunt: ad senes, qui Religioni in multis obsequiis inservierunt, & sic de cæteris officiis sicut ratio, & lumen naturale dicat. Facit quod leges ciuiles liberant ab officiis onerosis, septuagenarios, & iubent ne cogantur ad talia officia. *ultima Cod. qui etatem lib. 1.*

19 Et in particulari de reuocatione priuilegij non eundi ad chorum, dico intelligendum esse de illis, qui non habent occupationem publicam pro bono communi, vt lectores, & similes. Religio enim indiget Lectoribus, & Scriptoribus librorum, aliisque similibus officialibus, qui si cogerentur chorum frequentare, sicut frequentant alij, careret Religio multis commodis, & proinde non erit intentio Papæ hos obligare, sed illos, qui nulla publica occupatione detinentur;

Quod confirmatur ex praxi Ecclesiæ: licet enim Concilium Tridentinum tam rigoroſe obliget beneficia-  
rios ad reſidendum in propriis Eccleſiis, concedit ta-  
men multa priuilegia aliquibus non reſidendi, quando  
occupantur in aliquibus occupationibus neceſſariis  
pro bono communi, vt experientia, & praxis obſeruat.  
Quæ omnia credere debemus D. Papam conſideraſſe.  
Quod probatur ex D. Thom. in 4. diſt. 15. quaſt. 3. art. 1.  
vbi agens quomodo violetur lex, ſeu mens legiſlato-  
ris ſic ait: *Cum probabiliter credi poteſt, ſi legiſlator adeſſet,  
cum obligare non vellet, talis non eſt reputandus legis tranſ-  
greſſor.*

20 Ultimo aduerto, quod Papa vltra illa quæ hic ex-  
preſſe reuocat: ponit hæc verba: *et quacumque eiufmodi.*  
Videlicet alia ſimilia quæ ſunt ſcandalofa, & contra  
Religionis obſeruantiam. Quæ verba licet à ſum. Pon-  
tifice non ponerentur finis, & intentio Bullæ ad illa de-  
bebat extendi. Nam lex pœnalis lata principaliter in  
fauorem animarum, eſt fauorabilis, & extendenda ex  
identitate rationis, vt tenet Sanchez lib. 1. de Matrim.  
diſp. 39 num. 5. citans multos Doctores. Dixi lex pœna-  
lis, non quod iſta Bulla continet aliquam pœnam ſpi-  
ritualem, vel corporalem: ſed ſolam reuocatio-  
nem, & annulationem actus. Reuocatio  
autem priuilegij non eſt pœna, cum  
poſſit id facere princeps, quan-  
do ſibi placuerit, & vide-  
rit expedire pro  
bono com-  
muni.



## CASVS XXXII.

*Responsiones contra certas propositiones Doctoris cuiusdam circa Conceptionem Matris Deipara.*

**Q**uidam Doctor Gaspar Ram in vrbe Cæsaraugustana regni Aragoniæ, parum deuotus erga Deiparæ Matris immaculatam Conceptionem, sequentes propositiones euomit non sine scândalo, & piarum aurium offensione. Ad quas Prælatus noster tunc Commissarius Generalis paucis abhinc annis curauit responderi, iuxta zelum quem nostra Religio semper habuit in defendenda Deipara Matre à peccato originali. Mihi vt omnium minimo illud onus respondendi iniunctum est. Et quia dicta in his responsis poterunt inferuire ad alia occurrentia libuit illa hic transcribere, ad aliquorum fortassè instructionem. Propositiones ergo illius fuerunt 19. hoc modo.

1 **Q**ue no puede entender el modo con que aya sido possible ser la Viergen concebida sin peccado original.

2 Que todos los que predicán de otra manera que el, la Concepcion, con desseo de satisfacer a los oyentes, saltan de la obediencia a lo ordenado por la Sede Apostolica, y pierden el respeto a los Santos.

3 Que contrauienem al ordenado en el ultimo mou proprio los que obligan, & hazen ley de que se jure defender, y persuadir la preservacion de la Virgen.

4 Que no haziendose en Roma semej ántes juramentos

de tener la Concepcion, no ay razon para que en España se hagan, y en hazellos, es querer que la I<sup>e</sup> vaya de España a Roma y que los Prelados de España, saltan mucho en esta consideracion.

5 Que el hazer los juramentos, y votos, que en España se hazen de la Concepcion, es de tanto escandalo para las otras naciones, como el querer canonizar en Valencia a fuerza de armas contra la Iglesia a un Clerigo.

6 Que para poner remedio a los escandalos causandos por los que predicán la Concepcion, se ha visto como obligado el Papa a mandar no se predique ni sustente en publico la opinion de S. Bernardo, S. Buenaventura, y S. Thomas.

7 Que el auer el Papa mādado esto, es de grande escandalo a las otras naciones, que saben mouemos y obligamos al Papa a que mande lo que no se dene.

8 Que un Padre Augustino de los mas graues destos Reynos y aun de España cometio gran sacrilegio, y fue escandaloso mentiendo en el pulpito porque dixo que S. Domingo defendio la Concepcion, y que sus hijos le siguen.

9 Que el obligarse a sentir, y jurar de creer la Concepcion, tiene grandes inconuenientes, abre porta a escrúpulos, y pone en peligro de peccar.

10. Que no es espirito de fee instar como insta el Rey N. Señor, que se determine por de fee la pureza de la Concepcion, y que algun dia se verán los indirectos que en esta istancia se hazen.

11. Que el libro de Lucio Dextro, y las la minas de Granada, que afirman auer predicado en España Sanctiago la pureza de la Concepcion, son de ningun valor, y de toda falsidad.

12. Que los que persuaden el juramento, y voto de creer, y defender la Concepcion, y procuran se hagan ley, ò estatutos que obliguen a ello aprueuan procedimientos contrarios a

la or-

lo ordenado por los Papas, y consiguientemente aprueuan peccados: y que con estas apuxamos nuestra opinion, y que Dios lo ha de juzgar.

13 Que los Reyes de Aragon en las leyes: y fueros que hizieron de tener la Concepcion pretendieron que el Vicario de Christo se tiene conformar con lo que acuerdan los Principes seculares, y que haziendose tales leyes, prueuierón el iuyzio de la Sede Apostolica.

14 Que la ciudad de Zaragoza no pueda jurar, ni hazer voto de guarda la Concepcion, como tan poco pueden las mas ciudades y ricindades.

15 Que el tener la Concepcion no es materia de voto.

16 Que los Reyes de Aragon en particular el Rey Don Juan II. usurpò la autoridad del Papa, mandando no se predique en el Reyno que la Virgen tuuo peccado original, y que no pudo hazer tal ley.

17 Que los prelados Arçobispos y Obispos de España no saben lo que hazen y usurpan la autoridad al Papa quando con su parecer, y a instancia suya se hazen los juramentos y votos en las Ciudades, y Iglesias.

18 Que los Reyes, y Prelados a cuyo cargo està pacificar los pueblos, y poner los en la obediencia de Christo, deuen disponerlos para lo que el Papa mandare, y hazen lo contrario.

19. Que es orden del Demonio para desacreditar la doctrina de S. Thomas, que el aborrece con mouer los animos de los pueblos con los sermones que se predicán en fauor de la Concepcion, mas por emulacion, que por deuocion.

Hæ sunt propositiones supradicti Doctoris: quibus vt responderetur necessarius erat integer liber, & non paruus: sed quia nec tempus suppetit, nec hodie iam ista materia tot probationes postulat, dicam summariè

quod sentio. Quia vero citatus Author in pluribus propositionibus, conqueritur de voto, & iuramento solito hodie fieri in aliquibus Ecclesiis de defendenda puritate immaculatæ Conceptionis, & expresse dicit in propositione 15. hanc materiam de defendenda sic Conceptione Deiparæ non esse materiam voti, antequam in particulari respondeam ad singulas propositiones Authoris, præmittam disputationem, in qua ostendam esse materiam voti, Deiparæ puritatem in Conceptione defendere, dicendo sic: Voueo me defensurum, & pie confessurum Deiparam Matrem caruisse peccato originali. Et pari modo hoc esse materiam iuramenti.

---

### Q V Æ S T I O.

*Utrum defendere quod Deipara Mater caruerit  
peccato originali, possit cadere sub  
voto, & iuramento.*

**Q**Uod non sit materia voti, nec iuramenti, pro isto Authore potest utcumque afferri hoc argumentum. Opus positum sub opinione, est indifferens ut eligatur, potest enim licite eligi utraque pars illius: ergo tale opus est etiam indifferens ad bonum, vel malum moraliter; probatur hæc prima consequentia, quia electio pertinens ad voluntatem, non tendit ad opus nisi sub ratione boni: ergo si opus est indifferens ut eligatur, est etiam indifferens ut sit, vel dicatur bonum. Tunc sic. Deiparam fuisse præseruatam ab originali, vel non fuisse, est res posita sub opinione, ut docent Bullæ Pontificiæ

titicia, & proinde vtraque pars potest eligi: ergo est obus indifferens ad bonitatem, sicut est indifferens ad veritatē. Constat autem iuxta omnes Doctores, quod res indifferens non potest esse materia voti, vel iuramenti, ac proinde materia posita sub opinione non potest esse materia voti, vel iuramenti. Et confirmatur, quia vtraque pars opinionis potest esse falsa, vel saltem vna illarum est falsa, cum duæ contrariæ non possint esse ambæ veræ: cum ergo istius opinionis de Deiparæ Conceptione sine originali, possit esse falsa illa quæ affirmat illam caruisse originali, poterit iuramentum cadere sub falsa materia, & sic vt minimum exponitur iurans periculo iurandi falsum, quod nullo modo est admittendum.

1 His non obstantibus dico, quod defendere Deiparam caruisse originali, est materia, quæ possit voto, & iuramento confirmari, iurando me id defensurum semper. Antequam conclusio probetur, suppono, quod vt plurimum, id quod est materia voti, potest etiam esse materia iuramenti de futuro. Vt, voueo me ieiunaturum sabbata, aut iuro me ieiunaturum sabbata. Quod confirmo, quia fere conditiones quæ requiruntur ad materiam voti, requiruntur etiam ad materiam iuramenti promissorii, vt passim apud Doctores videre licet, maxime apud Suarez *tom. 2. de relig. lib. 1. cap. 7. & seq.* vbi agit de materia iuramenti, & apud eundem *ead. tom. lib. 2. cap. 1.* vbi agit de materia voti. Videndus est etiam Sayro *lib. 5. clau. Reg. cap. 7.* vbi agit de materia iuramenti, & *lib. 6. cap. 3.* vbi agit de materia voti.

2 Posita ergo conclusio, probatur primo: Nam actus pius, religiosus, & laudabilis est materia voti, vt patet ex citatis Doctoribus: & est etiam materia iuramenti: sed defendere Deiparam caruisse originali, est actus

pius, religiosus, & laudabilis, ergo est materia voti, vel iuramenti: Ma. & consequentia patent. Probo Minorem per singulas partes. Et primo, quod sit actus pius probo quia virtus pietatis est illa, quæ versatur circa cultum Dei, parentum, vel etiam circa illos quos habemus loco parentum, teste etiam Calepino verbo *Pietas*: At Sanctos, maxime Deiparam habemus loco parentum spiritualium, & proinde colere Deiparam defendendo illam ab originali est actus pius descendens à virtute pietatis. Probo etiam, quod sit actus pius, ex autoritate Sixti Quinti, qui in Bulla posita à Rodriguez in Bullario fol. 1143. per quam concedit Fratribus Minoribus, ut possint recitare officium diuinum in hoc festo Conceptionis cum octauario, cum prius vocauerit ibidem Conceptionē Virginis purissimam, & hanc Minores petierint celebrari cum octaua, subdit Pontifex: *Nos tam pium, & laudabile propositum facere valentes, &c.* Ecce Papa vocat actum pium, defendere Deiparam ab originali: & simul inde manet probatum, quod sit actus laudabilis, sic enim expresse illum vocat ibidem Papa. Item Doctissimus Pater Pineda in tractatu, in quo exposuit legem Regni Aragoniæ circa Conceptionem Deiparæ, *aduertentia* 4. §. *Pero boluendo*, statutum Academię Parisiensis de iuramento exhibendo promouendis ad Doctoratum de defendenda opinione Scoti, vocat actum pium, & fauorabilem. Quod vero idem actus defendendi Deiparam sit etiam actus Religionis, idest ortus à virtute Religionis in communi, tenet expresse Bellarminus, *tomo* 1. *Controuers. lib.* 13. *de cultu Sanctorum cap.* 16. §. *Neque rationes* ubi ait, colere Sanctos esse actum Dulix, & Religionis, non ut sumitur Religio strictè, quæ respicit Deum tantum, sed ut est Religio communis, quæ respicit

spicit etiam Sāctos. Quis autem neget defendere Deiparam ab originali, esse cultū illius, & proinde actum Religionis? Quod denique hic actus sit laudabilis, iam patet, & in se, & ex Bulla Sixti V. citata, quæ vocat actum laudabilem. Et confirmatur: Nam si prædicare excellentiam alicuius Sancti, eo quod raro peccauerit, vel quid simile est actus dulciæ, pietatis, & Religionis in communi, actusque valde laudabilis, à fortiori dicendum est quod sit actus pius, Religiosus, & laudabilis dicere tantam Virginis excellentiam quanta fuit, neque habuisse originale. Secundo probo principaliter, percurrendo breuiter per singulas condiciones requisitas ad materiam voti, & iuramenti, quæ possunt reduci ad has quinque præcipue: Prima, quod non sit de materia impossibili. Secunda, quod non sit de re indifferenti, quæ scilicet ex se neque est bona, neque mala. Tertia, quod non sit res mala. Quarta, quod sit res melior quam sibi opposita. Quinta, ne sit opus impeditiuum maioris boni: Hæc autem omnia inueniuntur in hoc actu defendendi Deiparam ab originali: ergo est materia voti, & iuramenti. Probatur minor per singulas partes: Et quidem de prima patet, nam hæc materia non est impossibilis, nec enim fuit Deo impossibile præseruare Deiparam ab originali, vt etiam Doctores oppositi fatentur; neque item est impossibile hanc opinionem cum facilitate, & sufficientia defendere, vt experientia tot annorum docuit. Secundo, defendere Deiparam ab originali in laudem ipsius, non est actus indifferens, cum sit pius, religiosus, & laudabilis. Actus enim indifferens de se, neque est pius, nec religiosus, nec laudabilis, sicut est actus fricandī barbam, vel leuandi festucam à terra, vel similes, qui proinde ex se non cadunt sub voto, vel iuramento. Tertia etiam con-

ditio

ditio non deest huic actui, videlicet quod non sit res mala: Nam defendere Deiparā ab originali, est actus pius, religiosus. &c. ergo non est malus. Vnde non est actus malus ex se, & ex sua natura, vt patet: neque etiā est malus quia prohibitus, quia Ecclesia illum non prohibet, sed cum gaudio; & fauoribus permittit. Quarto, actus defendendi Deiparam ab originali, est melior quam oppositus, qui asserit illam contraxisse originale: est melius Deiparā caruisse originali, quam illam habuisse originale: ergo iste actus est melior quam oppositus. Vltimo defendere Deiparam ab originali, non est impedimentum maioris boni, neque enim id maius bonum impeditum assignabitur: imo defendere illam ab originali est actus impeditiuus multorum malorum, videlicet scandalorum offendentium saltem aures aliquorum fidelium simplicium, non quod sit error dicere illam habuisse originale, sed quia de Matre Dei ex affectu nimio horrent id concipere, quæ scandala in his annis proxime præteritis per experientiam patuerunt. Nec denique dari poterit alia conditio ob quam hic actus defendendi Deiparam ab originali excludatur à materia voti, vel iuramenti: ergo est materia cadens sub voto, & iuramento.

3 Tertio principaliter probatur ex praxi, & auctoritate. Nam imprimis Accademia Parisiensis cæterarum Accademiarum Mater, ducentis fere abhinc annis, ab omnibus promouendis ad Doctoratus gradum prius iuramentum exigit quo iurent se semper defensuros Deiparam ab originali. Res est notissima in tota Ecclesia, vt refert Canisius *lib. 1. de B. Virgine c. 7. Suar. tom. 2. de Incarnat. disp. 3. sect. 2.* Pineda in illo *tract. de lege Regum Aragonie aduertentia 4. §.* Pero boluiendo, & multi alij. Idem faciunt multæ aliæ Acade-

miæ



miæ in Hispania, Suarez, & Pineda testantibus. Tunc sic. Mirum est quod tot, ac tam graues Doctores Parisienses, quot illa Academia, tot abhinc annis habuit, nunquam dubitauerint, neque scrupulum fecerint de tali iuramento exhibendo vel acceptando. Secundo, adhuc etiam mirum est, quod tot summi Pontifices Romani à tot annis scientes illud iuramentum exhiberi, illud permiserint, cum non deberent permittere si aliquid erroris, vel falsitatis posset includere. Idemq; dicendum de prælatis, & Doctoribus aliarum Ecclesiarum, & Vniuersitatum illud publice permittentibus. Tertio, quod adhuc magis facit ad intentum, est quod Doctores Parisienses non solum prædictum iuramentum præstant doctorandis, sed etiam illius iuramenti violatores publice puniunt sicut refert *Cord. in suo questionario fol. 368. col. 2. in fine*, de quodam prædicatore punito ea de causa à Rectore, & Consiliariis Academiae, & assistente etiam Episcopo vt refert Pineda loco proxime citato. Idem refert Pater Ægydius *lib. 3. de Conceptione fol. 324. col. 2.* Probatur quarto, quia sicut audiui à fide dignis, Patres Ordinis D. P. Dominici, sic docti, sic pij, & religiosi, illos Religiosos, quos assumunt ad dignitatem Magistri, vel præsentati, prius adigunt iuramento, vel promissione, quod semper defendent doctrinam D. Thomæ: cum certum sit quod in doctrina D. Thomæ sint multæ propositiones pure speculatiuæ maxime in Philosophia quæ de se sunt indifferentes ad bonum & malum: Continetur etiam propositio quod B Virgo habuerit originale, & tamen hæc omnia promittunt defendere: Cur ergo non licebit sub voto, & iuramento defendere Deiparam caruisse originali, cum sit actus non indifferens, sed pius, religiosus, & laudabilis?

4 Probatur idipsum, quod Deiparam defendere ab originali sit materia voti, ex miraculis factis propter emissionem istius voti. Refert N. Bernardinus de Buttis in suo *Mariali serm. 7. de Conceptione. part. 2. fol. 28. col. 2.* quod quidam insignis Prædicator Italiæ Ioannes de Viterbio, cum prius Deiparæ Conceptionem maculatam assereret, eaque de causa (vt ipse credidit) infirmatus esset ad mortem absque remedio humano: ad se rediens votum fecit, quod si sanitatem recuperaret, semper in posterum defenderet Deiparæ præseruationem ab originali: quo facto sanitatem adeptus est, & pulsata campana, miraculum, & opinionem prædicauit. Secundum miraculum refert idem Bernardinus *serm. 9. de Conceptione fol. 40. i. p. littera I.* vbi refert quemdam virum pium, ac deuotum in ægritudine voluisse, quod si sanitate donaretur, poneret in limine portæ suæ titulum, quo B. Virgo caruerit originali: quo facto sanitati redditus fuit. Tertium adhuc miraculum refert de se ipso noster Alexander de Ales in *lib. de Conceptione*, vbi fatetur quod cum adhuc sæcularis graui morbo correptus esset, eo quod (vt ipse credidit) Deiparam diceret conceptam in originali, idque sic defenderet: votum emisit de illa postea defendenda, & subito ad pristinam sanitatem fuit restitutus. Citat hanc historiam noster Cartagena *tom. 1. B. Mariæ lib. 1. homil. 19.* prope finem: Ecce tantus Doctor, qualis fuit Alexander Ales. suo facto confirmauit quod defendere Deiparam ab origin. esset materia voti. Quartum miraculum est quod refertur communiter, maxime à Petro Nunez in suo *Sancturali Seraphico fol. 39. col. 2* in fine, videlicet quod cum Scotus Parisiis pergeret ad aulam publicam defensus publice puritatem Cōceptionis Deiparæ, & præteriret imaginem lapideam eius-

eiufdem Virginis: cum Scotus illi caput inclinaret, petens auxilium ad futuram difficilem difputationem; imago lapidea Scoto caput inclinauit, quafi annuens, & promittens auxilium. Ecce quatuor miracula facta erga vouentes defenfionem Deiparæ ab originali: ergo actus illam defendendi, eft materia iuramenti, vel voti: Non enim facit Deus miracula ad confirmationem rei illicitæ.

γ Obiicis. Quomodo potest eſſe opus bonum, & laudabile id quod pendet ex opinione dubia, quæ poteſt adhuc eſſe falſa, & proinde corruente veritate fundamenti, corruet bonitas illius operis. Reſpondeo id non obſtare. Do exemplum. Ego habeo opinionem quod Petrus valde indigeat eleemoſina, quia illam petit, vel illam fingit cum reuera non indigeat: hac opinione ductus facio illi eleemoſinam: mea eleemoſina eſt meritoria facta propter Deum, licet fundetur in opinione à parte rei falſa, ſed probabili. Eodem modo defenſio Deiparæ ab originali, licet fundaretur in opinione falſa à parte rei (quod non concedo) quia tamen id me latet, & hæc pars opinionis fulcita eſt tot fauoribus Eccleſiæ, & piis rationibus, non deſinet eſſe meritorium illam defendere, cum ſit pars hæc magis pia quam oppoſita.

6 Pro ſolutione argumenti contrarij poſiti in principio, noto primo rem indifferentem eſſe illam quæ de ſe neque eſt bona, neque eius oppoſitum eſt malum: vt ingredi, vel egredi hanc domum, abſtinere à capitibus animalium propter honorem Baptiſtæ, &c. non filare in ſabbato in honorem Deiparæ: Hæc enim omnia de ſe non ſunt bona moraliter, neque illorum oppoſita ſunt mala: Et proinde abſtinere ab his omnibus, neque eſt bo-

nus,

num, vel malum moraliter : neque in illis exequendis ex se fit aliquod obsequium sanctis; dixi ex se non esse bona, vel mala, quia ex circumstantia apposita bona, poterit effici actus meritorius, vel demeritorius: v. g. votum non ingrediendi domum istam, quia in illa datur occasio, vel peccandi, vel scandali: vel fiet è contra, votum malum, videlicet ne ibi exequar opus charitatis. Secundo aduerto, non idem esse in genere boni, & mali, quod opus sit indifferens, & quod opus sit opinabile, seu positum sub opinione: Nam opus esse indifferens est, quod neque illius executio, neque illius omissio sint aliquid bonum, vel malum. At quod opus aliquod sit opinabile, & reducat ad praxim, licet vna pars illius sit probabilior, & bona: altera opposita non desinet esse bona, quia est etiam probabilis. Exemplum sit. Datur casus, in quo opiniones sunt, an ego teneam ad restitutionem, aliis affirmantibus aliis negantibus: In hoc casu, ille qui eligit partem affirmantem, & restituit, cum à parte rei non sit vera pars ista, nihilominus meretur, cum faciat opus quod putat esse actum iustitiæ: ac proinde nimis differunt inter se opus indifferens, & opus morale positum sub opinione: seu clarius. Nimis differunt partes oppositæ operis indifferentis, vt filare, & non filare in sabbato, & partes oppositæ vnus operis positi in opinione: nam neutra pars operis indifferentis poterit laudabiliter eligi, seu meritorie, cum non sint ex se bonæ, vel malæ materialiter: At partes opinionis probabilis moralis: possunt eligi prudenter, laudabiliter, & meritorie, si sint de re bona morali posita sub opinione. Intelligo hic, & in præcedentibus, si in sabbato non abstinet ab aliis servilibus.

7 Hinc patet solutio ad argumentum initio positum.  
Dicen-

Dicendum est enim, quod licet immunitas Deiparæ à peccato sit opus positum sub opinione affirmatiua, & negatiua, & vtraque pars eligi possit, electio tamen ipsius partis quæ illam liberat à peccato non est opus indifferens, sed actus pius, religiosus, & honestus, quod non habet pars operis indifferentis, vt filare, vel non filare, quæ non est actus pius, religiosus, &c. & proinde licet quæuis pars circa Deiparam possit eligi, tamē illa de illius præseruatione tuenda habet in se bonitatem vt eligatur, & fundamentum laudabile, & Religiosum, vt electio voluntatis licite, & laudabiliter feratur ad illud, quale fundamentum laudabile, & pium nō inuenit in quauis parte operis indifferentis: & proinde ratione huius laudabilis fundamenti potest esse hæc pars materia voti, & iuramenti. Ad confirmationem eiusdem argumenti dicendum est, etiam si aliquando Ecclesia determinaret de fide Deiparam habuisse originale (quod nullus Catholicus sperat Ecclesiam facturam ob multas causas) adhuc hodie defendentes Deiparam ab originali poterunt mereri defendentes opinionem (per te falsam) non perdent meritum, cum modo habeant tot motiua, & rationes ad illam defendendam. Et quod homo possit mereri nixus opinione à parte rei falsa, sed putata vera, ostendimus supra n. 5. de dante eleemosinam putato pauperi, cum sit diues. Nunc adduco aliud exemplum clarum. Ecclesia per multos annos ante emendationem Breuiarij factam nuper à Clemente VIII. in alio Breuiario recitabant officium Inuentionis sanctæ Crucis, in quo referebatur quomodo Helena S. Crucem inuenerit, adigendo Iudæos sub pæna ignis vt ostenderent locum Crucis &c. præterea in die sanctæ Petronillæ dicebatur propria lectio qua dicebatur illam esse filiam D. Petri, &

postulatam à comite Flaquo in uxorem: Clemēs VIII. abrasit à Breuiario has ambas historias, quia (sicut dicunt) constitit illas continere falsitatem: Quæro ergo, nunquid recitantes antea officium illud Crucis fundatum in opinione falsa, sed putatam veram, & toleratum ab Ecclesia, nunquid peccabant recitantes: Nonne meritum habebant recitando, etiam si niteretur in falsa historia, ignorata, & ab Ecclesia tolerata? Eodem ergo modo licet opinio Scoti stet sub opinione, & licet Ecclesia illius oppositum aliquando determinaret, quod non speramus, adhuc hodie meritum erit defendere Deiparam ab originali cum sit opinio ab Ecclesia tolerata, imo & tot Bullis, & fauoribus roborata: & tot, ac tam piis rationibus communita. Neque cum his fundamentis iurans iurabit falsum, tum quia ille non putat se iurare falsum: tum quia ille non iurat Deiparam caruisse originali, hoc enim iurari non potest, cum stet sub opinione: sed solum iurat se defensurum id quod iudicat valde probabile ob tot rationes prædictas: iurans vero id quod credit verum, & habet motiua ad sic credendum non est periurus, vt Doctores dicunt in materia de iuramento.

---

*Responsiones particulares ad singulas propositiones Doctoris.*

*Ad primam.*

3 **I**N prima propositione asserit Author se non intelligere modum quo Beata Virgo potuerit in prima Conceptione præseruari à peccato originali.

li. Quibus verbis sic videtur argumentari. Ego non capio quomodo id fieri potuerit: ergo factum non fuit. Argumentatio sane tanto digna Authore: vel saltem magna indeuotio erga Deiparam, nolle scilicet assensum dare nisi illis quæ clare caperet proprius intellectus, vel suum intellectum proponere omnibus tanquam formam iudicandi de rebus. Non intendo per hæc quæ dicam quod Deiparæ præseruatio ab originali sit credenda assensu fidei, sed solo assensu opinatiuo: & hoc supposito arguo sic contra istum Doctorem. Capis modum quo Christi D. humanitas est sub Eucharistia consecrata: & modum quo D. essentia est in tribus personis? & modum quo humanitas est vnita Verbo Diuino? Teneris dicere, quod non capis: & tamen credis: ergo poteris assentiri assensu opinatiuo illi rei quam non capis, videlicet præseruationi Deiparæ ab originali. Secundo, si es vere discipulus Diui Thomæ, vt profiteris, recordare illius doctrinæ, qui circa Deiparæ Conceptionem non dicit se non posse capere, neque negat potuisse fieri, sed solum dicit non fuisse factum, & tamen concedit potuisse fieri. Lege Augustinum citatum à Flores Doctorum, *ver. fides. lit.* G. vbi de difficultate credendi mysterium Trinitatis sic inquit. *Quomodo creditur Trinitas recte homo interrogas: imo ideo bene creditur, quia cito non capitur, nam si cito caperetur, non esset opus ut crederetur.* Hæc ille. Satiùs, ac modestius faceret Author, si Galenum imitaretur, de quo fertur, quod cum non intelligeret quendam textum Hypocratis, neque audens textum impugnare, sic dixit: Melius est dicere nos non intelligere istam sententiam Hypocratis, quam ipsum refutare. Vide modestiam Gentilis erga textum Gentilis quem non capiebat. Iterum dico per hæc nolle me dicere quod

præseruatio Deiparæ sit credenda assensu fidei. Sed arguo à simili.

9 At sane quod potuerit Deus præseruare Deiparam ab originali, & modum quo id fieret, intellèxit turba Doctorum hanc opinionem defendētium, quos esset infinitum citare. Nam in eodem instanti quo anima Deiparæ fuit infusa corpori, in illo posteriori naturæ eiusdem instantis quo peccatum originale debuit resultare, potuit Deus gratiam statim illi infundere, per quam peccati resultatio impedita fuit, cum gratia & peccatum simul esse non possint. In hoc autem nulla est impossibilitas, vt Suarez asserit *tom. 2. de Incarnat. disp. 3. sect.* declarans modum istius præseruationis: non enim impossibile est apud Deum omne verbum: maxime cum Doctores oppositi concedant Angelos in primo instanti fuisse creatos in gratia, & in illorum creatione Deum simul condidisse naturam, & infudisse gratiam: & dicunt præterea primos parentes creatos fuisse in gratia: Cur ergo non potuit sic creare animam Virginis statim in gratia?

*Ad secundam.*

10 **I**N secunda propositione asserit Author, quod prædicantes Conceptionem Deiparæ alio modo ab illo quo ipse prædicat, deesse obedientiæ circa decretum Ecclesiæ, neque habere respectum ad Sanctos. Vbi vides quod in 1. propositione posuit se vt formam credendi, & in hac 2. proponit se vt formam prædicandi. Non explicat Author cui decreto Ecclesiæ contradicat prædicans Conceptionem diuerso modo ab eo quo ipse prædicat, & propterea mētem illius oportet inquirere. Et quidem imprimis non debet prædicare ad



se ad populum opinionem D. Thom. dicēdo Deiparam contraxisse originale : Iam enim hodie sic prædicans incurret censuram Pauli V. Pontif. Maximi positam contra sic prædicantes. Secundo non videtur prædicare opinionem Scoti quam impugnat. Tertio non videtur prædicare potuisse Deum Deiparam præservare, hoc enim ipse fatetur se non intelligere, neque talis mens ex his propositionibus colligitur: Restat ergo ut solum intendat dicere rem esse sub opinione: Si autem hoc dicat: dico etiam quod prædicantes opinionem Scoti, & illam probantes, non dicunt illam esse de fide, sed esse opinionem, licet dicant esse opinionem probabiliorē. Secundo dico, quod prædicantes clare opinionem Scoti, illamque probantes rationibus probabilibus, & authoritatibus, non desunt obedientiæ Ecclesiæ, neque contradicunt alicui illius præcepto, ut videre licet in Concilio Tridentino, & Bullis Sixti IV. & Pij. V. & Pauli V. cumque in particulari Paulus V prohibeat prædicari ad populum opinionem D. Thomæ, clare concedit quod possit prædicari opinio Scoti: iuxta illud commune dictum Iuristarum, exceptio firmat regulam, & praxis Ecclesiæ id ipsam confirmat, in qua opinio Scoti ad populum cum applausu prædicatur, & nullus prælatus sic prædicantes cōdemnat. Sin minus prodat hic Author decretum Ecclesiæ cui contradicant prædicantes populo opinionem Scoti. Quod vero, addit Authōr, prædicantes opinionem Scoti, suas probationes adducere, ut populo placeant, innuit se non sanum iudicium ferre de proximo suo, sinistre indicādo de illorum vana intentione. Dato autem quod aliqui id facerent, ut secundario placerent populo, id per accidens est ad nostrum intentum, neque ex eo contradiceretur aliquibus Bullis Pontifi-

ciis, vel decretis Matris Ecclesiæ.

II Quod attinet ad secundum dictum in eadem secunda propositione, videlicet, prædicantes opinionem Scoti more solito cum probationibus, non seruare decorem, vel respectum debitum Sanctis: Si id intelligit, quia per hoc videtur fieri iniuria D. Thomæ, D. Bernardo, & aliis Sanctis, qui oppositum contra Scotum tenuerunt, gratis, & sine causa hoc asserit Author. Quæ enim iniuria fit Sanctis, qui olim aliquam opinionem tenuerunt, si alij Sancti, vel Doctores posteriores discedant ab opinione priorum, ducti scilicet nouis, & melioribus motiuis, & fundamentis quæ longo tempore, & multo posteriorum studio sunt adinuenta: Nonne Ecclesia comparatur Auroræ, quæ in dies crescit? Nonne posteriores Doctores acuratus vnâ rem considerantes, & maiori studio pertractantes potuerunt aliquid assequi quod priores Sancti non fuerint assecuti? Nonne scholastici Doctores, & alij Recentiores reprobant sæpius dicta Patrum Ieron. Augustini, Chrysost. & aliorum, quibus tamen reprobatis per hoc iniuria non infertur? An illi Patres antiqui habuerunt assistentiam Spiritus Sancti, vt in nulla re possent errare: sit vnum exemplum. Iudam Iscariotem communicasse, & sanctissimam Eucharistiam de manu Domini recepisse in cœna, tradunt Augustinus, Ieronimus, Chrysostomus, Bernardus, Leo Papa, D. Thomas, & alij Patres citati à Barradas *tomo 4. Concord. lib. 3. cap.* Quibus non obstantibus alij multi Patres, quos ibi citat, & sequitur Barradas tenent oppositum tanquam probabilius: idque tenent absque iniuria Patrum citatorum. Et multa alia exempla facile esset passim reperire. Concludat discursum vnum dictum D. Ieronimi *tom. 7. ad illum locum Psalm. 86. Do-*  
minus

minus narrabit in scripturis populorum, vbi sic ait ad nostrum intentum, Quamuis ergo aliquis Sanctus sit post Apostolos, quamuis disertus sit, non habet auctoritatem: (intellige infallibilem) Hæc ille. Soli ergo Apostoli, & Auctores librorum Canoniconum irrefragabiliter sunt audiendi, illorumque dictis omnino standum est.

12 Ultimo perperde nostri Authoris ne dicam iactantiam, sed fiduciam. Se solum ponit vt regulam, & exemplar ad prædicandam Conceptionem, quasi quod aliter prædicantes censendi sint à rectitudinis tramite deuiare. Ego nimis dubito, imo probabiliter assero, quod si ille suam opinionem hodie in Hispania prædicaret, præmium prædicationis forte reciperet, sicut Bernardinus de Buis refert in suo Mariali recepisse in Gallia quendam prædicatorem, qui cum prædicaret contra immaculatam Deiparæ Conceptionem, finito sermone in eadem Ecclesia à plebeis verberibus publice affectus est:

*Ad tertiam.*

13 **I**N tertia propositione dicit contrariare ultimo Motui proprio illos qui iuramentum aliquibus exhibent per quod se obligent ad defendendam, ac persuadendam Deiparæ præseruationem ab originali. Non exprimit Author cuius Papæ sit iste vltimus Motus proprius. Cum tamen vocet vltimum conuincitur id intelligere de Motu proprio Domini Pauli V. promulgato anno 1617. die 12. Septembris. Neque enim loqui potest de Bullis Sixti III. Pij V. &c. quæ non sunt vltimæ. Si ergo Motus proprius Pauli V. attentè legatur, nihil omnino continet in fauorem Authoris, nisi

forte illa verba per quæ ibi Papa præcipit, vt vnusquisque possit libere in secreto vtramuis opinionem defendere. Sic enim ait. *Relinquatur vnicuique libera facultas tenendi, & asserendi vtramque partem.* Vnde poterit arguere Author hoc modo. Papa decernit vt vnicuique relinquatur libertas defendendi quamcunque partem maluerit. At qui iurauit, vel vouit defendere Scoti opinionem, adimit sibi libertatem defendendi partem oppositam: ergo tale iuramentum est illicitum, vtpotè impediens hanc libertatē à Papa concessam: Ac proinde non licet tale iuramentum à populo extorquere, cum per illud perdatur libertas defendendi vtramuis partem sicut papa concedit.

14 Hæc etiam argumentatio nihil efficit, nec prædictum iuramentum, vel votum facit amittere libertatem defendendi vtramuis partem eo modo quo Papa intendit. Pono prius exemplum, per quod res clara, & notā fiet. Constat quod contrahere matrimonium est res omnino libera, ita vt omnino liberum cuique sit vtramuis partem eligere, illud scilicet contrahere, vel non contrahere? Quo non obstante, ego licite possum petere, à quolibet, imo persuadere vt fiat Monachus pro salute animæ suæ, cum per Monachatū ille impediat à libertate contrahendi matrimonium: At neque ego peccaui, consulens Monachatum, ipsumve suadens, quamuis peccarem si vi cogerem, vt ille Monachus fieret, quæ omnia sunt notissima. Applicando vero dictum exemplum ad intentum, dico, Prælatos hodie, & superiores, exhibentes iuramentum, vel votum petentes de defendenda Deipara ab originali, vel illud suadentes sine vi, & sine coactione licite facere, neque per hoc impedire libertatem concessam à D. Papa defendendi vtramuis partem, vt clare deducitur ex pro-

ex proposito exemplo. Non enim exhibens iuramentum, vel petens votum, cogit, vel libertatem impedit: solum proponit ob laudem Virginis, & bonum iurantibus, ut ipse si velit libere iuret, vel voueat, per quod libere renunciât libertati quam posset habere ad utrâque partem defendendam, cui ipse libere renunciât per votum, vel iuramentum emissum. Eo modo quo vouens Religionem sua sponte renunciât libertati contrahendi matrimonium.

15 Cum ergo in prædicto ultimo Motu proprio Pauli V. nulla alia verba faueant Authori, nisi proxime posita, & explicata, sequitur quod gratis, & sine fundamento dicit, contradicere ultimo decreto Papæ illum qui petit à populo, vel suadet, ut fiat iuramentum de tuenda Deipara ab origin. Imo contra Authorem dico, quod si hodie alieubi peteretur à populo iuramentum defendendi opinionem D. Thomæ per tale iuramentum magis violaretur dictus motus proprius Pauli V. nam per tale iuramentum in communi præstitum sine distinctione, daretur occasio defendendi opinionem D. Thomæ etiam in disputationibus publicis, quod prædictus Motus proprius claris verbis interdicit.

*Ad quartam.*

16 **Q**uartâ propositio continet illicitum esse in Hispania tale exhibere iuramentum, eo quod Romæ non sit in usu, & proinde prælatos Hispaniæ in hoc mature non procedere, sed agere inconsiderate: & quod per hoc volunt prælati, ut fides ex Hispania deferatur ad urbem Romam. Et quod attinet ad primam partem propositionis, dico quod non valet argumen-

tum istud. Hoc Romæ non fit, ergo non debet fieri in Hispania: nam si valeret, etiam valeret sic. Hoc Romæ non fit, ergo non debet fieri Parisiis, sicut tamen fit ibidem à ducentis annis, & tamen Ecclesia non reprobatur fieri Parisiis: nec reprobatur fieri in Hispania, cum sit eadem omnino ratio de Gallia, atque de Hispania. Et ad maiorem istius arguménti probationem, debuerat Author meminisse sancitum esse ab Ecclesia, vt consuetudines particularium Ecclesiarum obseruentur, & permaneant si bonæ sunt, nec Ecclesiæ decretis repugnantes, etiamsi tales consuetudines Romæ non seruentur. Habetur hoc in *tota dist. 12. in decreto*, maxime in cap. *Scit Romana*. vbi ex duobus Pontificibus in Rubrica positus, sic habetur: *Nihil obsunt saluti credentium diuersa pro loco, & tempore consuetudines, si illis canonica non obstat autoritas*. Idem habetur ibidem cap. *Novit*: vbi Gregorius I. ad Augustinum Angelorum Episcopum sic scribit: *Placet, vt siue in Roman. siue in Galliarum, siue in qualibet Ecclesia aliquid inuenisti, quod plus omnipotenti Deo possit placere, solícite eligas.* &c. Ex quibus duobus capitibus clare colligitur, permittere summos Pontifices, vt Ecclesiæ particulares retineant suas consuetudines, quando sunt Deo placitæ, nec à Romana Ecclesia reprobatae, etiamsi prædictæ consuetudines seruentur extra Romanam urbem, & in illa non extent. His adde quod in materia sacramentorum, id est, in cæremoniis cum quibus illa ministrantur, tolerantur alibi consuetudines, quæ non vigent Romæ, constat clare ex cap. *de trina. de consecrat. dist. 4.* vbi Gregor. Papa dicit Romæ in baptizando infante fieri trinam immersionem, alibi vero fieri vnâ tantum, & vtrumque esse licitum, & tolerandum. Ad quod alludens D. Thomas 3. *par. quest. 66. art. 8.* dicit seruandam esse consuetudinem

tudinem particularium Ecclesiarum. Quibus positis. Cum exhibere nostrum iuramentum, sit consuetudo laudabilis, pia, & non prohibita à prælatis, neque à Summo Pontifice, & hæc vigeat Parisiis ab annis ducentis, & Valentis, & alibi per annos sufficientes ad introducendam consuetudinem validam, & laudabilem, sequitur quod licite eadem consuetudo possit continuari licet Romæ non obseruetur. Multæ enim sunt Romæ consuetudines in cultu diuino, quæ in Hispania, vel Gallia non obseruantur, neque Papa vult ad consuetudines particulares Romæ fideles obligare, cum videat id non esse necessarium ad salutem.

17 Quod vero asserit Author in eadem quarta propositione, quod exhibentes, vel suadentes hoc iuramentum, suo facto volunt, vt fides ex Hispania vadat Romam, si intelligit per hoc, velle prædictos, vt fides Hispaniæ Romæ recipiatur, vel quod Roma conformet se in fide cum Hispania, perperam, & fere temere colligit: Nunquam enim superiores, vel hi tale iuramentum petentes, vel suadentes somniarunt. Primo enim petentes, vel suadentes hoc iuramentum, non hoc stabiliunt, vt dogma fidei: neque suadent vt iuretur Deiparam caruisse originali, sed iurant se defensores opinionem Scoti intra terminos suæ probabilitatis, idque sub correctione Ecclesiæ, à qua sola protestantur saltem virtualiter, se expectare definitionem fidei, sollicitante illam definitionem Rege Catholico, & aliis Principibus: & proinde volunt quod fides circa hanc materiam de Roma veniat in Hispaniam, non è contra. Neque enim hoc iuramentum in Hispania, & Gallia seruatum obligat Papam vt hoc definiat. Et confirmatur, quia cum hoc iuramentum Parisiis ducentis abhinc annis seruetur, nemo dixit velle per hoc Parisienses

fientes vt fides ex Parisiensibus vadat Romam. Si vero Author per hoc intelligit velle nos, & desiderare, vt fides de Hispania Romam vadat, id est ex Hispania fiant postulationes, & instantiæ cum informationibus erga Sum. pontificem, quibus ille motus rem de fide definiat, si hoc velit, improprie loquitur: Nos enim licite facimus id postulando à Domino Papa vt amplius patebit ex dicendis in respons. ad decimam, in qua Author carpit Catholicum Regem eo quod istius rei definitionem à Sede Apostolica procuret.

*Ad quintam.*

18 **Q**uinta propositio ait. Exhibere hoc iuramentum, vel facere votum de tuenda Dei-  
 para ab originali tot scandala causare in aliis Nationibus, quot causauit in vrbe Valentia velle canonizare quemdam Clericum recens defunctum, cum opinione Sancti, idque reclamante Ecclesia. Ad hanc propositionem imprimis dico, mihi videri impossibile, quod alicubi causet scandalum talis iuramenti suasio, vel acceptatio, nisi forte apud aliquem, vel aliquos male affectos erga opinionem Scoti, qualis noster Author in his omnibus propositionibus esse conuincitur. Scio illud statutum Academiae Parisiensis ab omnibus laudari, & fere cum gaudio citari, & approbari, & neminem legi, qui illud scripto, aut voce reprobauerit. Neque credo in ciuitate Valentiae vbi idem statutum seruatur, aliquod scandalum inde exortum est. Et fortasse idem iuramentum solet exhiberi in aliis Academiis, vt refert Suarez *tomo 2. de Incarnat. disp. 3. sect. 3. §. secundum fundamentum*, quod clare indicat ex tali voto, seu iuramento tale scandalum non resultare.



16 Secundo dico, quod quando ex forma prædicti iuramenti alicubi scandalum resultatet, de tali scandalo nihil esset curandum, cum sit scādalum fere pharizaicum, idest sumptum de re quæ est bona: iuxta illud Mathæi 15. dictum à Christo Domino de Pharizæis, qui cum de quodam bono opere Christi Domini scandalumsumerent, dixit: Sinite illos, cæci sunt, & duces cæcorum. Quod autem hoc scandalum passiuum de tali iuramento ortum sit pharizaicum, & non iustum, neque scandalum fidelium, probatur, quia tale iuramentum, vel votum de opinione Scoti defendenda, est actus pius, Religiosus, & laudabilis, vt satis manet probatum in præcedētibus: ergo scandalum sumptum de isto actu pio, & Religioso, est scandalum de re bona, & proinde est pharizaicum, & proinde de illo non est curandum. Confirmatur etiam argumento ducto ab opposito. Nam si adeo fideles scandalizantur audientes in disputationibus, & concionibus Deiparam contraxisse originale, vt ea de causa tumultus, & rixas excitauerint, clare sequitur, quod audientes prædicare, asserere, & iurare se defensuros esse opinionem Scoti, non scandalizabuntur, sed potius ædificabuntur. Probo illud antecedens, quod scilicet fideles scandalizantur audientes Deiparam habuisse peccatum originale. Testatur id imprimis Papa Paulus Quintus in illo suo vltimo motu proprio, vbi dicit se hoc nouū decretum mandare de non publicando in publico opinionem Diui Thomæ, *Propter scandala, iurgia, & dissensiones inde exortas cum magna offensa Dei*. Testatur idem in particulari tota ciuitas Hispalensis, in qua ea de causa tumultus magnus fuit excitatus, etiam cum periculo vitæ aliquorum. Testatur etiā Italia, in qua in multis vrbibus eadem scandala sunt exorta in populo propter

pter disputantes, vel asserentes Deiparam habuisse originale peccatum. Testatur hoc Bernardinus de Busto maxime, *sermone 9. de Conceptione parte prima littera C.* vbi refert verberatum fuisse à populo quendam prædicatorem, eo quod dixisset in sermone Deiparam habuisse originale. Secundo id ipsum testatur, *eodem sermone 9. littera S. fol. 35.* vbi asserit mulieres Mantuanas noluisse dare eleemosinam panis quibusdam male affectis ad puritatem Conceptionis Deiparæ nisi ipsi resipiscerent, & illam opinionem deponerent.

2 Quod tandem Author adducit de populo Valentiniæ volente canonizare clericum defunctum Papa inconsulto, mihi imprimis non constat de circumstantiis historiæ, videtur enim nimis durum id credere de populo catholico, cum ibi sit Academia, & sint Doctores, Episcopus &c. qui deberent aduertere id non posse fieri: fides historiæ sit penes Authorem. Dato vero quod ita fuerit, debili argumento conatur probare suum intentum, videlicet per errorem, & furorem, populi insipientis, & tumultuantis, (quem nos etiam reprobamus) velle condemnare populum deuotum, qui de assensu prælatorum, ac de concordia populi in laudem Matris Dei iurant se defensuros opinionem ex qua eadem laus magna resultat. Adde quod populus Valentiniæ errauit si volebat canonizare Sanctum cum id facere non posset inconsulto Papa: In hoc autem nostro casu populus emittens hoc iuramentum facit actum licitum, & laudabilem, vt probauimus, ad quem actum peragendum non indiget licentia speciali papæ. Cum iste actus iurandi sit in substantia colere festum Deiparæ, quod festum est iam canonizatum ab Ecclesia. Quod autem festum Conceptionis sit canonizatum ab Ecclesia tradit docte, & fuse Pater Ægydius, *3. lib. de Concept.*

*Concept. q. 6. art. 1. §. 9.* vbi ostendit canonizationem Ecclesiæ, non solum fieri de Sanctis, sed etiam de festis Sanctorum. Pro quo facit etiam Suarez *tom. 1. de Relig. lib. 2. cap. 3.* & explicat Ægydius, quod canonizare Sanctum, est Ecclesiam decernere personam illam fuisse sanctam, & animam illius esse in gloria. At canonizare festum, est quod Ecclesia definit veram illius misterij sanctitatem, eamque proponit fidelibus celebrandam. Neque vero sanctitas istius festi Conceptionis Deiparæ consistit solum in gratiis agendis Deo pro concepta persona Deiparæ in originali, eo quod incarnatio Verbi Diuini iam habuerit principium in persona illa, seu Matre illa sic concepta: sed sanctitas istius festi consistit etiam in eo quod Deipara concepta sit sancta, & absque originali peccato: vt enim optime aduertit Suarez *tom. 2. de Incarnat. disp. 3. sect. 5. §. dicetur fortasse*: Cum hoc festum etiam celebretur in honorem Deiparæ, non esset Virgo honore digna propter suam Conceptionem, nisi talis Conceptio fuisset sancta, & pura. Iurant ergo fideles, & vouent se defensores Deiparam ab originali, & festum de hoc mysterio canonizatum ab Ecclesia, in quo iurando, & vouendo, quis poterit error intercedere? Quis non licite iuret illud in quod Mater Ecclesia sic propendet? vt enim alios fauores Ecclesiæ circa hoc festum fileam: Pro Deiparæ Conceptionis puritate sufficiat fauor ille quæ refert Pineda *tract. citato aduertent. 20.* ad priuilegium Ioan. primi Regis Aragoniæ, fauor inquam factus à Clemente VIII. in Bulla particulari, qua non solum approbavit, verum etiam præcepit obseruari in Italia compendium illud puerorum doctrinæ, recognitum, & approbatum à Congregatione reformationis doctrinæ Ecclesiasticæ, in quo compendio edocentur

puerī

pueri sic dicere in explicatione Aue Maria. Quod scilicet illa fuerit gratia plena quia illa per gratiam nec originalem culpam vnquam habuit, nec actuale mortalem, vel venialem. Ecce summus Ecclesiæ Pastor hoc lacte doctrinæ nutrit pueros. Nunquid Ecclesia hoc dictum postea reuocabit cum nota tanti Pastoris? Ego nihil definio in eo quod Ecclesia postea faciet: solum dico, quod si fecerit, quod non errabit, & quod in eo quod modo facit & permittit non errat, nec proinde errant iurantes se defensuros quod illa permittit.

*Ad sextam.*

21 **S**exta propositio asserit, sum. Pontificem motum, & quasi obligatum propter scandala orta ex prædicatione præseruationis Deiparæ, iussisse ne ad populum prædicetur opinio D. Bernar. D. Bonau. & D. Thomæ.

Si author intelligit, vt videtur, Paulum V. publicasse suam Bullam ne in publico prædicetur, vel defendatur opinio D. Thom. propter scandala orta ex prædicatione opinionis Scoti eandem comprobando rationibus, & exemplis, errat omnino, nec videtur Bullam legisse, cum potius oppositum clare contigerit. Clare enim Papa in illa exprimit se moueri ob scandala orta ex eo quod pars affirmatiua prædicatur ad populum, idest Deiparam habuisse originale. Verba Bullæ sunt hæc. *Ex occasione assertionis affirmatiuæ, quod Beatissima Virgo fuit in originali concepta, oriuntur in populo christiano cum magna Dei offensa, scandala &c.* Quomodo ergo palpat in meridie, & tam claram lucem non intuetur? Cur non videt opinionem Scoti populo prædicatam, & probatam, non scandalum, sed deuotionem excitare? &

re? & è contra quis non videt opinionem oppositam populo prædicatam scandalum parere sicut Papa tam claris verbis in Bulla testatur, & nos retulimus in responsione ad præcedentem quintam propositionem ex Bernardino de Bustis. Hoc ipsum insuper ratione confirmo: Nam populus Christianus in Deiparam vt plurimum deuotissimus, eidemque multum obsequi desiderans, numquam scandalizatur audiens quod illa caruerit peccato originali, & actuali: Imo potius audiendo contrarium scandalum patitur. Facit etiam vltra iam dicta id quod refert noster Cord.lib. 1. *questionary, quest. 44. de Concept. fol. 368. §. Nouerint, & seqq.* quod scilicet ex prædicatione vel assertionem cuiusdam prædicatoris impugnantis Deiparæ puritatem in Conceptione, ortum fuit graue scandalum in Gallia ad oppidum Deppe Rothomagi, & alibi, propter quod delatus fuit ad Rectorem, & Consiliarios Academix, & ab illis carceratus, & iussus assertionem retractare. Idem refert P. Ægydus lib. 3. fol. 295. de alio qui ab Innoc. VII. anno 1403. iussus est Palinodiam recantare circa id quod dixerat contra puritatem Conceptionis, Deiparæ.

22 Neque vero est quod Author noster aliquid magnum, & quasi insolitum ducat Dominum Papam præcipere, quod opinio D. Bernard. D. Bonauent. & D. Thom. in Ecclesia ad populum non prædicetur: per hoc enim imprimis nondum illos doctores damnat, & errantes in fide, cum rem nondum de fide definiat, & illorum opinionem permittat in secreto. Secundo illorum Doctorum autoritas non est autoritas de fide, vel Ecclesiæ. Tertio etiam si Papa hodie definiret Deiparam caruisse originali, & proinde consecutiuè damnetur illorum trium Doctorum opinio, nullam

inde illi infamiam incurrerent, quando enim illi vive-  
bant, & sic opinabantur, nondum aliquid contra Ec-  
clesiæ definitionem asseruerunt. Et sic in Ecclesia suc-  
cessiue multa sunt definita, quorum opposita multi  
Sancti Doctores antea tenuerant sine labe infamiæ,  
vel hæresis, vt facile esset exemplis ostendere. Quarto,  
quia magis ponderat scandalum populi christiani, illi-  
que magis de ferri oportet, quam ponderet autoritas  
illorum trium Doctorum. Quinto, quia plures Docto-  
res tenent opinionem Scoti quàm illorum trium Docto-  
rum. Horum Doctorum turbam videre poteris apud  
patrem Aegydiū lib. 3. de *Concept. quest. 1. art. unico à*  
*fol. 158. & quest. 4. 1010 art. 4.* Qua de causa Scotus, vel  
quiuis deuotus puritatis Conceptionis Deiparæ, iure  
poterit dicere illud, quod dixit Eliseus famulo suo re-  
ferenti de magno exercitu contrario circumdante, 4.  
Reg. 6. *Noli timere plures enim nobiscum sunt, quam cum*  
*illis.* Similiter dico. Quamuis exercitus quidam videat-  
ur circumdare ciuitatem Dei altissimi, Mariæ scilicet  
in Conceptione, asserentium illam maculatam, plures  
sunt nobiscum Doctores, quam pro illis; plures pro  
nobis sunt rationes, congruentiæ, fundamenta, mira-  
cula, fauores Pontificum quam pro cõtraria opinione.  
23 Addo quod D. Bernardus licet *epistola 174.* pri-  
mo contra Deiparæ præseruationem censerit, atta-  
men postea *sermone de Cena Domini 13. post initium tom.*  
*2. & sermone 4. in Salve Regina* oppositum tenuit pro-  
ut citat, & probat Pater Aegydius lib. 3. *questione 4. ad*  
*2. fol. 238. col. 2.* D. vero Bonauentura in *3. distinct. 3.* du-  
bie loquitur, neque resolute affirmat. Imo *tom. 3. ope-*  
*rum suorum serm. 2.* clare loquitur pro Deiparæ præser-  
uatione ab originali sic dicens. Nouo sanctificationis  
genere Redemptam Matrem à peccato originali (non  
quod

quod infuit, sed quod infuisset) præseruauit Deus. Sic ille ibi. Quod vero attinet ad D. Thomam, ille prius in 1. *distinct.* 44. *art.* 3. *ad* 3. Deiparæ immunitatem asseruit, licet postea oppositum docuerit in 3. *parte*. Si autem piæ reuelationi fidem adhibere licet, citat Pater Ægydius *lib.* 3. *de Conceptione* *fol.* 335. quod Beatus Thomas post mortem suam in Italia apparuit cuidam Episcopo Fautino suo deuoto, cui dixit se non bene scripsisse, cum dixit, Deiparam conceptam fuisse in peccato originali, quasi illum sui dicti pæniteret. Non ergo est quod Author noster tantum zelum ostendat pro his tribus Doctõribus, tum ob illa quæ proxime diximus *num.* 22. tum quia sufficienter ostenditur in hoc numero, illos dictum retractasse.

*Ad septimam.*

24 **S**eptima propositio profert nouum decretum Pauli V. fuisse magni scandali apud alias nationes, quæ sciunt nos mouere Papam, & illum obligare vt faciat quod non debet.

Mira audacia, imo & error peior omnibus ab isto Doctore assertis, vt audeat asserere Papam in suis Bullis pro Ecclesiæ regimine, & animarum salute editis, & pro illarum pace, & quiete datis, facere quod non deceat. Non solum autem Dominus Paulus V. in citata Bulla scandalũ non dedit exteris nationibus; verum etiam credere possumus, quod si à tali decreto abstineret, posset argui socordix & somnolentiæ in suo pastoralis officio, si certus de tot scandalis, & tumultibus ortis in Hispania cum Dei offensa, suis ouibus non succurreret cum illo oportuno remedio. Firmari potest exemplo à simili: nam minus inconueniens esset

excitari in Hispania scandala, & dissensiones circa stygmata P. N. Francisci, si illa habuerit, vel non, quam sint scandala orta ex prædicatione an B. Virgo habuerit peccatum originale, vt patet. Et tamé constat, quod orto tumultu in Hispania ab aliquibus dicentibus P. N. Frânciscum non habuisse in corpore stygmata Christi, Papa Alexander IV. Bullam particularem direxit ad Hispaniam, vt habetur in Compendio Mendicant. ver. *stygmata*. §. 6. in qua grauissimis pœnis & censuris prohibet, ne in Regnis Castellæ, & legionis prædicatores prædicent P. N. Franciscum dicta stygmata non habuisse, easdemque censuras voluit incurrere illos, qui dicta stygmata ab imagine prædicti patris abraferint. Quinimo ante Alexandrum IV. Papa Gregorius IX. in eodem compendio, & eodem verbo mandauit, & præcepit inquiri de quodâ Religioso, qui dicebatur prædicasse contra stygmata P. N. Francisci, in quo debuerat populum scandalizare, dicens in mādato, quod si fuisset culpatus inuentus, ad Sedem Apostolicam mitteretur audaciæ suæ pœnas recepturus. Si ergo duo hi Pontifices tanta diligentia occurrerunt scandalo orto circa prædicationem contra stygmata P. N. Francisci, quorum assertio non tam interest Ecclesiæ, quam honor Deiparæ: Quid culpandus est D. Paulus V. & dicendus facere quod non debuit, eo quod sua Bulla obuiauere scandalis prædicantium contra puritatem Conceptionis Deiparæ, quæ magis spectat ad Ecclesiam, & fidelium deuotionem, quam stygmata P. N. Francisci? & tamen de illis duobus summis Pontificibus Greg. IX. & Alexand. IV. sic præcipientibus circa stygmata P. N. Francisci, non legimus quod exteræ nationes sint conquestæ, sed omnes vsque adhuc paruerunt. Quod à fortiori debuit nos cogere ad obediendum



dum decreto D. Pauli V. circa prædicationem publicam contra Deiparæ præseruationem ab originali.

25 Neque ego possum mihi persuadere quæ sint prouinciæ scandalizatae de tali mandato, nisi forte sint aliquæ in Germania, quæ nec sum. Pontifici, Imo nec Christo Domino obediunt, de quarum proinde scandalo curari non debet. Si vero essent aliquæ prouinciæ Catholicæ ( de quibus non audio, nec credo ) quæ sic scandalizarentur, illarum scandalum, tanquam vere pharizaicum curari non debet, iuxta illa quæ supra iam diximus in responsione ad 5. propositionem. Inocredo quod etiam aliqui hæretici de tali decreto non essent scandalum sumpturi in Germania. Nam si illi Lutherum, vel Erasmus sequuntur & audiunt; hi ambo affirmant Deiparam caruisse peccato originali, vt passim videre est apud multos Theologos ambos pro hac opinione citantes, sicut in particulari citat Canizius lib. 1. de B. Virgine cap. 8. prope finem. §. Caterum aduersus.

26 Quod tandem innuit Author fideles Christianos Hispaniæ esse in culpa, eo quod Papam mouerint, & quasi obligauerint ad tale decretum indebite promulgandum, percontor ego Authorem. Per quæ prædicti fideles D. Papam mouerint, quomodo obligarunt? Nunquid muneribus & donariis? Nunquid preces illicitas interponendo? Nunquid aliqua falsa narrando? Mouit profecto sanctum & summum Pontificem pastoralis officij cura, & sollicitudo, mouit animarum periculum, salusque earumdem: Mouit erga Deiparam deuotio; cum enim sit Vicarius Christi D. filij Deiparæ, ipsius Christi Matris honori sedulo tenebatur prospicere: Ac proinde nec Papa fecit, quod non debuit, sed quod debebat. Neque externis nationibus dedit.

scandalum : nec fideles Hispaniæ tam principes quam prælati , errauerunt in aliquo tam pias preces Vicario Christi domini præsentantes, & offerētes. Adde quod Author in ista sua propositione innuit clare quod Papa possit errare in suo regimine directo pro salute animarum , cum dicat illum in hoc decreto fecisse quod non debebat. Quod tamen dictum doctores in materia de fide abominantur.

*Ad octauam.*

27 **O**ctaua propositio dicit , certum quendam Religiosum D. Augustini dicentem in publica concione, quod B. Dominicus dixerit Deiparam caruisse originali, fuisse in hoc mendacem, scandalosum, & sacrilegum.

His verbis clare innuit, seu potius vult Author quod B. Dominicus numquam asseruerit Beatā Virginem caruisse originali. Quod autem gloriosus Sanctus. Et Monarcha Dominicus id tenuerit, citant , & probant graues Authores moderni ex antiquis referentes. Primus est Canicius *lib. 1. de B. Virgine cap. 7. post medium fol. 38. col. 2.* vbi citat alios. Secundus est Pater Petrus de Oieda *in sua informatione de Conceptione ca. 7.* Tertius est Pater Ægydius *lib. 3. de Conceptione fol. 201. col. 2.* in fine citans ad eundem finem tres Doctores. Quartus est Suarez *tom. 2. de Incarnat. disp. 3. de Concept. sect. 5. §. Tertio principaliter.* Ecce quatuor Doctores moderni, & tam graues, præter illos quos isti citant, asserunt B. Dominicum bene de Deiparæ ab origin. præseruatione censisse, & puto quod Author noster nimis inferior sit his quatuor Doctoribus in citandis historiis, & Doctoribus. Quo posito ille Religiosus Ordinis D. Augustini  
a nostro

à nostro Authore accusatus, vel calumniatus, non fuit mentitus, cum dixerit id quod tam graues quatuor Authores referunt. Secūdo ex hoc sequitur quod prædictus Pater non fuit scandalosus, cum nec mēdacium dixerit, nec propositionem scandalosam prædicauerit, vt patet ex præcedentibus. Neque item Beato Dominico calumniam intulit, imo potius in laudem Sancti sui dictum redundabat. Non ergo video cur fuerit prædictus Religiosus id attribuens Beato Dominico, mentiens, sacrilegus, vel scandalosus, nisi forte id solum nostro auctori, visum fuerit, quasi dolenti, quod B. P. Dominicus, bene de Deiparæ præseruatione ab originali iudicauerit.

Quod denique prædicator ille non commiserit sacrilegium, probatione non indiget: vltra enim iam dicta, dato quod B. Dominicus nostræ non fuerit opinionis, quæ materia sacrilegij est, dicere aliquem Sanctum asseruisse aliquid quod non asseruit? Hoc vt plurimum mendacium esse poterit non sacrilegium. Si enim quis male citet pro sua sententia Augustinum ver. grat. vel Ieronimum, eo quod vel illos sic intelligat, vel sic citatos inueniat, non dicetur contra illos sacrilegium committere, licet possit mentiri, & hoc vt plurimum non formaliter, sed solum materialiter.

*Ad nonam:*

28 **N**ona propositio continet; iurare, vel obligare se ad defendendam Deiparam ab originali habere multa inconuenientia, & esse occasionem multorum scrupulorum, imo & periculum peccandi.

Gratis hæc omnia, & sine fundamento dicuntur; oportebat enim exprimere, quæ sint ita inconuenien-

tia, qui scrupuli, quæ peccandi pericula: Quæ quoniam non exprimuntur, nos quasi diuinantes sic discurremus; & supponimus ex iam dictis, & amplius dicendis, quod iuramentum de Deiparæ immunitate ab originali defendenda, est iuramentum de re pia, religiosa, & laudabili, vt patet ex quæstione proœmij, & est etiã actus voluntarius, & denique opus ab Ecclesia permissum, & miraculis confirmatum.

29 Quibus positis, sic discurremus contra Authorem. Hæc inconuenientia non nascuntur ex parte prælatorum, vel communicatum offerentium hoc iuramentum, potest enim hoc iuramentum ab illis offerri licite, & voluntariè, cum sit de re pia, licita, & religiosa: ergo licite ab illis potest offerri pro bono communis, & pro laude Deiparæ, vt amplius patebit ex responsione ad 12. propositionem: cumque licite hi possint petere, & offerre tale iuramentum, ex parte ipsorum non sunt scrupuli, neque periculum peccandi, cum neque ipsi peccent, neque alios peccare faciant: scrupulus autem hic daretur, vel occasio peccandi ex parte superiorum, si illi cogerent ad iurandum, vel actus iurandus esset malus, vel impossibilis, vel nimis difficilis, quorum nihil in hoc actu reperitur, vt constat. Vide infra post finem harum omnium responsionum modum, & formam quam dedit circa hoc Archiepiscopus Cæsaraugustanus, & Academia Complutensis.

30 Secundo ex parte subditorum iurantium, & se obligantium, nullum datur inconueniens, nullus scrupulus, nulla peccandi occasio; Probatur fundamentis numero præcedenti positis. Nam taliter iurantes voluntarie, iurant actum pium, religiosum, laudabilem, miraculis confirmatum, facilem, & proinde licitum: ergo ex parte iurantium scrupulus non datur. Secundo proba-

probatur, quia si Petrus ver. gr. potest in secreto absque iuramento amplecti vtramvis partem istius opinionis, & opinioni sic electæ potest adhærere absque iuramento vsque ad mortem, poterit vtique eidem opinioni sic electæ, & licitæ se conformare, & in illa firmari per iuramentum: Quod enim licite, ac religiose possum facere, possum vtique iurare me facturum in posterum: nullum ergo inconueniens, vel scrupulus datur ex parte iurantium, vel peccandi periculum.

31 Dices forte hunc scrupulum, vel periculum peccandi, nasci ex duobus: Primo quia cum iurans vt plurimum sit laicus, & idiota, nesciet defendere id quod iurat, cum ignoret Theologiam ad disputandum de tali quæstione difficili. Secundo, quia si Papa postmodum definiat opinionem *D. Thomæ*, is qui antea opinionem Scoti iurauerat, agitabitur scrupulis si bene iurauerit &c. Ad primum argumentum dico quod quando in confraternitatibus petitur hoc iuramentum à laicis, & idiotis, non petitur vt sint defensori *Deiparam* ab originali disputando Theologice, imo hoc non possunt petere à laicis: sed solum petitur ab illis vt verbo simplici id defendant, & Scoti opinioni non contradicant, quod poterunt facere absque Theologia, & sic ab omni scrupulo liberantur. Ad secundum dico quod licet Papa definiret opinionem *D. Thomæ*, (quod non speramus) is qui antea iurauerat defendere opinionem Scoti, nullo scrupulo poterit agitari, nam sic iurando non fuit periurus: cum iurauerit id quod putabat verum, & tot rationibus, & miraculis comprobatum.

32 Adhuc pro dictorum confirmatione, hoc exemplum subiicio. In aliquibus collegiis sæcularium studentium (qualia sunt *Conimbricæ*, *Salmanticæ*, & alibi) ingredientiæ collegium iuramento se obligant,

quod in omni statu, quem postea extra collegium sortiti fuerint, defendent quoad poterunt, res, ac bona, & iura talis collegij: si ergo hoc licitum est iurare pro defendendis bonis temporalibus illius collegij, cur nō licebit ingredienti confraternitatem Conceptionis verbi gratia defendere quoad poterit illius præseruationem à peccato, ex quo magna eidem Deiparæ laus, imo, & Christo domino resultat?

33 Neque denique ex tali iuramento resultant inconuenientia, vel periculum peccandi in populo, vidente populo fieri tale iuramentum. Nam populus pius, fidelis, & tam bene affectus ad Deiparam, non potest scandalizari de tali iuramento pro Deiparæ laude suscepto: Neq; aliqua inconueniētia ex parte populi poterunt assignari, quibus non faciliè respondeatur:

*Ad decimam.*

**D**Ecima propositio sic habet. Non est spiritus fidei instare, vt instat Rex noster Philippus, vt definia-  
tur de fide præseruatio Deiparæ ab originali: & futuro tempore apparebunt incommoda istius petitionis.  
34 Per spiritum fidei videtur Author intelligere zelum fidei, & proinde innuit non esse zelum fidei neque duci zelo fidei illum, qui petierit à Sede Apostolica prædictam definitionem circa Deiparæ Conceptionem. Contra quod ego assero esse clarum, & magnum zelum fidei id à Sede Apostolica postulare. Pro quo suppono, pie iuxta multos Doctores, quod opinio Scoti potest definiri de fide, vt inter alios tenet, & probat Suarez *tomo 2. de Incarnatione disputat. 3. sect. 6.* & Pater Ægidius *lib. 3. de Conceptione q. 8. art. unico*, vnde iam constat opinionem Scoti posse definiri de fide si Papa volue-

voluerit, Cum ergo spiritus fidei, seu zelus fidei, sit amor intensus, seu gāde desiderium, seu magnus affectus ad res fidei, vel obiectum fidei, vel ad augendam fidem, sequitur quod procurare vt opinio Scoti definiatur, & sit obiectum fidei, erit zelus fidei: saltē enim per hoc desiderium procuratur, vt obiectum fidei augeatur extēsiue, idest vt sint in Ecclesia plures propositiones fidei. 2. in alio sensu est etiam hæc petitio zelus fidei: nam per talem petitionem exaltatur maxime D. potentia, & summa misericordia Dei erga Deiparam. Exaltatur etiam ipsa Deipara: crescit fidelium deuotio erga eandem, quæ tria quis non videat pertinere ad zelum fidei? addo exēplum, postulauit Rex Hispaniæ, & alij Principes, à Pio III. & Sixto V. vt canonizaretur B. Didacus, sicut continetur in Bulla canonizationis ipsius edita à Sixto V. idemque contigit in canonizatione Beati Iacinthi illam petente Rege Polonia, vt habetur in Bulla canonizationis eiusdem, quas ambas Bullas habes in *Bullario Rodrig. fol. 1122. & fol. 1247.* idque solet fieri cōmuniter in canonizatione aliorum Sanctorum. semper enim Reges, & Principes illas postulant. In Bulla vero D. Clementis VIII in principio dicit Papa ex canonizatione Sāctorum resultare: *Quod Deus predicetur mirabilis in Sanctis suis. Item quod Rex sempiternæ maiestatis in Sanctorum concilio glorificetur. Diuini cultus augeatur obseruantia: fidelium pietas & deuotio excitetur, detestanda hæreses magis, magisque conuincantur.* Sic ibi Dominus Papa. Si ergo Reges non arguuntur ex eo quod petant à Papa canonizationem vnius Sancti, ex qua resultant illa tot, ac tam clara motiua fidei: Cur arguentur ex eo quod petant ab eodem Papa definitionē præseruationis Deiparæ ab originali, cum ex illa definitione similia motiua fidei sunt oriundæ

Nonn

Nonne magis exaltabitur, & Deipara cum ista definitione, magisque lætabitur Ecclesia quam cum canonizatione vnius Sancti? Eadem fere verba habentur in Bulla canonizationis sancti Didaci. Vbi ait Sixt. V. se illum canonizare. *Ut se Deus mirabilem in Sanctis suis demonstret, ut hæreticorum prauitatem coerceat, peruersitatem confundat.* Merito ergo dici poterit quod Reges, ac Principes postulantes à Papa istam definitionem vnde similia fidei bona resultare possunt ducantur spiritu, ac zelo fidei. Adde quod per talem definitionem, si daretur, cessarent tumultus, & poneretur silentium perpetuum in hac materia contradicentibus, neque in contrarium possent amplius quæstiones, & querelas opponere.

35 Secundum adhuc exemplum sit. Si hodie Imperator, vel Principes Germaniæ peterent à Sede Apostolica, vt pro quiete, & salute fidelium illius regni dignaretur aliquid definire de fide propter dubia exorta, quod olim multi Reges à sum. Pontifice postularunt: Quis neget prædictos Principes moueri, ac duci bono zelo fidei? Hoc ergo est quod facit Rex Catholicus in petenda ista definitione circa Conceptionem Deiparæ pro laude Dei, B. Virginis, & Hispaniæ quiete.

36 Quod vero Author in vltimis verbis istius propositionis male prophetat, de futuris incommodis hinc resultantibus, & futuro tempore conspiciendis, voluntaria diuinatio: est, & sine fundamento. Quin potius ab opposito quies magna sperari poterit ex obtenta definitione, vt patet ex suprædictis, cum aliis bonis motiuis supra iam dictis.



*Ad undecimam.*

**V**Ndecima propositio asserit librum Lucij Dextri, & Laminas repertas in monte sancto Granatæ, in quibus dicitur Iacobum Apostolum prædicasse in Hispania Deiparam ab originali immunem, nullius esse valoris, sed potius falsitatis.

37 Quod attinet ad librum Lucij Dextri, fateor me illum non habere, nec vidisse. Vidi tamen librum doctissimum Gregorij Lopez Madera, quem solū composuit de Reliquiis, & Laminis inuentis in illo sancto monte Granatæ, in quo libro fuisse satis, & sapienter multis ostendit, & probat veritatem, & authoritatem illarum Reliquiarum, & Laminarum, respondens omnibus dubiis, quæ circa illarum veritatem possent proponi. Nec puto quod liber dicti Gregorij quoad hoc, erit inferior libro Lucij Dextri. Ad singula propositionis verba sigillatim respondens.

38 Dico imprimis D. Iacobum Apostolum prædicasse in Hispania, est adeo certum ex traditione Hispaniæ, librorumque multitudine, ut probatione non indigeat. Quod autem Deiparam ab originali liberam prædicauerit, quid mirum est id fecisse Apostolum Deiparæ deuotissimum, cui adhuc illa viuens Cæsar-Augustæ apparuit, & sibi ab illo templum ibidem ædificari mandauit. Quid item mirum si Apostolus de illa prædicaret, id quod ille de ipsius præseruatione ab originali sentiebat, quod idem sensit Iacobus Minor de eadem Deipara, ut patet ex Liturgia eiusdem Iacobi Minoris, ubi sic habet: *Dignum est ut Beata Virgo dicatur semper Beata, & omnibus modis irreprehensibilis.* Sic refert Pater Ægidius lib. de Conceptione, fol. 194. col. 2. & alij multi. Ex quibus verbis clare constat Apostolum Deipa-

deiparam ab originali liberam credidisse. Nam si illud habuisset, non foret pro illo tempore Beata, nec irreprehensibilis, sed è contra infelix, & reprehensibilis. Adde quod graues Doctores dicunt à tempore D. Iacobi solitum esse in Hispania celebrari festum Conceptionis Deiparæ, & hoc est clarum inditium ab illo tanto Apostolo hoc fuisse prædicatum. De hac celebratione refert Petrus Nunez in suo Sancturali Seraphico *discursu* 1. *de Conceptione* fol. 78. §. *De manera*, vbi citat sanctum Marcum Maximū Episcopum Cæsaraugustanum, idque tunc maxime verum erit, si verum est quod multi docent recentiores, Apostolos Ierosolymis ante dispersionem, in quodam Concilio definiuisse Deiparam caruisse originali: citat Petrus Nunez citato loco fol. 37. col. 2. ex laminis repertis in monte sancto Granatæ ex duobus sociis sancti Iacobi. Idem tenet Pater Ægidius lib. 3. *de Concep.* q. 3. §. 1. num. 20, & §. 10. num. 52. multa pro eodem adducens.

39 Quod vero attinet ad principale intentum de Laminis ibi repertis, antequam de illis referam graue testimonium, præmitto quod pari assensu poterimus assentiri veritati Laminarum illarum, atque assentimur veritati Reliquiarum Sanctorum, quæ ibidem cū Laminis repertæ sunt, est enim vtroque eadem ratio de credendis Laminis, atque Reliquiis simul repertis, vt patet ex iis, quæ tradit Gregor. Lopez cit. lib. fol. 21. cap. 7. & seqq. & cap. 4. narrat miracula quæ contigerunt in inuentione prædictarum Reliquiarum. Quæ ergo authoritatem habeant Reliquiæ, & proinde Laminæ cum illis repertæ in illo sancto Monte Granatæ, constat ex euentu secuto. Nam statim Archiepiscopus Granatensis coacta Synodo Prouinciali vocauit duos Episcopos, & alios Prælatos, & viginti alios viros doctissimos,

etiffimos, inter quos fuit vnus Pater Thomas Sanchez Societatis Iesu, Author illorum librorum de Matrimonio, & affuerunt alij graues, & doctiffimi viri, qui omnes iuxta decretum, & formam Concilij Tridentini, vnanimiter decreuerunt, & scripto firmarunt prædictas Reliquias esse veras, & populo proponendas in publico, vt posset populus illas venerari: & ita mox factum fuit. Cuius historiæ, & facti meminit exacte Gregor. Lopez ad finem citati libri, ponens transumptum originalis decreti diocæsanj, & nomina omnium Doctorem, qui ibi subscripserunt. Quo posito, quæro à nostro Authore: Si hodie quis irreuerentiam faceret Reliquiis in illo monte repertis, & Prædicto modo in publico, populo propositis ab Archiepiscopo, iuxta Tridentinum, iniuriam aliquam irrogaret, nonne vt suspectus de fide foret puniendus? Cum ergo eadem sit autoritas de Laminis repertis cum eisdem Reliquiis, suo modo poterimus iudicare de pœna isti Authori debita, eo quod dicat prædictas Laminas esse falsas. Secundo pro earumdem Laminarum veritate facit omnino, quod tradit Pineda *lib. 8. tom. de rebus Salomonis cap. 1. sect. 8. fol. 577.* vbi post multas probationes adductas ad probandum quod Salomon saluatus est, vltimo adducit quamdam Laminam repertam cum aliis in isto sancto monte Granatæ, cuius exemplar ibi transcribit litteris Arabicis, Latinis, & Hispanis: quarum substantia est: quod Salomon post peccata sua fletu magno egerit pœnitentiam de peccato suo. Et facit Pineda vim magnam in probatione istius Laminæ, dicens illos libros Laminarum plumbearum, esse sanctiffimos, vel solo antiquitatis nomine probatiffimos esse censendos. Tercio de prædictarum Laminarum autoritate disserit Pater Ægydius *lib. 3.*

*lib. 3. de Concept. quest. 3. §. 2. num. 22.* vbi probat, & concludit prædictas Laminas in dicto monte Granatæ repertas, in quibus asseritur Deiparæ præseruatio ab original. esse recipiendas vt veras & permagnæ auctoritatis. Ecce cuius auctoritatis sint Laminæ illæ repertæ nuper in monte sancto Granatæ testibus Greg. Lopez, Pineda, P. Ægyd. quas noster Author sua solita fiducia, ne dicam proteruia, falsas appellat.

*Ad duodecimam.*

**D**Vodecima propositio dicit in sum. procurantes fieri statutum de exhibendo iuramento supradicto, & taliter iurantes, approbare processus contra decreta Pontificum, & proinde approbare peccatum; & quod cum peccatis fulcimus nostram opinionem (idest Scoti) quod proinde Deus debet iudicare.

40 Falsum, audax, & temerarium assertum, & multâ animaduersione dignissimum. Ad cuius respõsionem præmitto, quod Iuristæ in materia de tortura dicunt, quod iuramentum reo exhibitum est quoddam genus torturæ. Applico ad istum Authorem, cui iuramentum de Deipara defendenda ab originali, non illi exhibitum, sed fidelibus, eidem genus grauis torturæ est: & innuit in tot propositionibus quod non plus Diabolus torquetur exorcismis Ecclesiæ, quam ille torquetur hoc iuramento fidelibus exhibito, de quo in tot propositionibus sic anxie quæritur. Quamuis ergo huius propositionis difficultas, & obiectio soluta satis maneat ex quæstione posita in præmio huius casus, vbi probauimus iuramentum hoc esse licitum, religiosum &c. pro maiori tamen istius propositionis impugnatione, dico quod principes sæculares possunt exhibere subditis

subditis suis iuramentum cum viderint id expedire pro bono communi, & possunt condere legem de tali iuramento exhibendo, & suscipiendo, quod à fortiori facere possunt prælati Ecclesiæ. Sic tenet Suar. *tom. 2. de Relig. lib. 3. c. 1. §. dico 2.* & cõfirmatur, quia si pro bono tertiæ personæ leges omnes cogunt testem ad iurandum, quanto magis poterunt prælati, ac principes legem facere, vt pro bono communi, & pace publica ciues subditi iuramentum præstent in aliqua materia? Hinc obtinuit consuetudo, vt Reges, & communitates quando denuò creant, & assumunt officiales inseruituros, prius iuramento illos astringunt de officio fideliter obeundo, de suis legibus fideliter obseruandis, & sic de cæt. Si ergo principes, & Rectores communitatum, suis officialibus laudabiliter tale iuramentum exhibet, & suadent pro bono temporali, vel communitatis: cur licitum non erit prælatis, Academiis, confraternitatibus, & similibus simile iuramentum suadere, & exhibere pro bono spirituali, honore scilicet Dei, B. Virginis ac deuotione fidelium?

41 Et in particulari sic discurre. Sunt in aliquo regno aliquando leges contrariæ, vel saltem dissimiles legibus iuris communis ciuilis, ver. gratia, in Portugallia, vt experientia patet. Hoc tamen non obstante, Reges Portugalliæ à suis iudicibus denuò creatis petunt iuramentum quod seruabunt leges Portugalliæ in iudicando contra vel præter leges iuris communis ciuilis. Si ergo hoc iuramentum non reprehenditur in rebus ciuilibus cur damnabitur iuramentum de defendenda Deipara ab originali, cum non contradicat vlli iuri diuino, vel Ecclesiastico, vt suppono certissimum? Secundò principaliter: Qui fieri potuit vt tot Doctores Parisienses, & Valentini, & alij hoc iuramentum exhiben-

tes tot abhinc annis tale peccatum in illo exhibendo non aduerterint, quale noster Author in illo subodoratur? Cur tot sum. Pontif. à tot sæculis de tali iuramento conscij, non illud peccaminosum iudicarunt, nec condemnarunt? Cur etiam multi Doctores maxime Recentiores piissimi pariter, & doctissimi, quorum non est numerus, prædictum iuramentum recolentes, non solum peccati non arguunt, sed cum gaudio, & approbatione citant, imo & approbant?

42 Denique ostendat hic Author, cui decreto Pontificio contradicat statutum factum de iuranda defensione Deiparæ ab originali. Numquam enim ostendet. Si enim Concilium Tridentinum, & omnes Bullæ Pontificum iam citatæ permittunt tenere vtramvis opinionem, quomodo credendum est quod prohibeant me firmiter proponere, imo & iurare me defensuram opinionem Scoti, quam libere possum eligere?

43 Hinc manet perspicuum quam calumniose dicat Author prædicto iuramento approbati peccatum. Si enim sentit peccare nos defendendo opinionem Scoti, ultra calumniam nobis illatam, incurrit penas positas à Pontificibus contra damnantes peccati alterutrâ opinionem. Adde quod iurando pro Scoti opinione defendenda, non approbatur peccatum, sed potius actus pius, religiosus, & laudabilis, ut manet probatum in quæstione procemij, de hoc enim actu exhibetur iuramentum: nec proinde sic iurare, est fulciri opinionem nostram peccatis, sed iuramento licito, & laudabili, à sum. Pontificibus cognito, & tolerato, & à tot, ac tam piis, & doctis viris exhibito. Vnde neque timendum est ultimum dictum propositionis, seu comminatio Authoris; quod scilicet Deus hoc aliquando iudicabit, vel vindicabit. Quin potius ego maiori fundamento

damento authorem moneo quod iure diuinam vindictam poterit timere, si illum non pœniteat suæ proteruiæ, vel audaciæ in his propositionibus effusæ, contra Papam, Regem, & catholicos deuotos in cultu Deiparæ.

*Ad decimam tertiam.*

**D**ecima tertia propositio sic habet. Reges Aragoniæ per suam legem de semper deffendenda opinione Scoti, prætenderunt quod Papa se conformet decretis principum sæcularium: & per talem legem præuenerunt iudicium Sedis Apostolicæ.

43 O absurdam, & calumniosam illationem contra Reges Aragoniæ adeo pios Ioannem Primum, & Ioannem Secundum illius regni Si enim hi pro sua deuotione in Matre Dei, suiq; regni pace statuerunt semper se culturos festum Conceptionis Deiparæ cum titulo immaculatæ, aut ne in suo Regno aliter prædicaretur, quomodo per hoc festum voluerunt Papam se conformare illorum statuto, vel decreto? Quæ verba posuerunt Reges in illo suo decreto significatiua huius intenti, vel imperij, vt Papa illorum decretis stare deberet? nullum profecto verbum, vel inditium talis desiderij in illis reperitur. Nouerunt potius piissimi Reges in rebus fidei supremi pastoris Papæ leges spectare, illisque promptissime obedire. Nunquam enim intendunt Sedi Apostolicæ leges præscribere, nec suo facto obligare ad Regiam legem sequendam. Imo considero in hoc nostrum Authorem peius sentire de suis piis Regibus Aragoniæ, quam posset sentire de Iacobo Rege Angliæ: nam hic profitetur falsissime se esse caput Ecclesiæ Anglicanæ, non tamen dicit se præten-

dere, quod summ. Pontifex se conformet legibus Angliæ ab eodem Iacobo conditis: At N. Author hanc calumniam Regibus Aragoniæ infert, quod prætenderint Papam suis legibus conformari, quod illis nunquam venit in mentem. Neque vero factum ipsum, seu lex illa Regum, ex se erat potens ut Papam secum traheret ad idem faciendum. Nam liberum semper fuit sum. Pontifici eandem legem corrigere, seu annullare, si eam videret errorem continentem, sicut iam alij sum. Pontifices fecerunt annullando aliquas leges latas à Regibus, quas fidelibus nociuas esse intelligebant. Aliàs dicendum esset quod multi Reges, qui in suis Regnis leges condiderunt pertinentes ad cultum Dei, & animarum salutem, per hoc voluerunt trahere Papas ut se conformarent legibus ipsorum Regum, quod nullo modo est dicendum. Legatur Petr. de Oieda Societ. Iesu in suo tract. de Concep. fol. 11. pag. 2. ubi citat has leges Regum Aragoniæ, & nihil tale de ipsis suspicatur, imo magnifice de iisdem loquitur: legatur idem P. Pineida in sua explicatione ad legem Ioannis I. Regis Aragon. in qua illum de tali lege non damnat, sed potius laudat. Imo & Ioannes II. eiusdem Aragon. Rex, in sua lege quam tulit du cultu Conceptionis dei. pare, quam transcribit idem p. pineida in fine sui tractatus, nullo modo innuit velle se ut papa suæ illi legi conformetur: quin potius addit se illam legem condere, ut se conformet cum Concilio Basiliens. (cuius definitioni, etiam non validæ ut de fide voluit se conformare.) Si ergo Rex ille se conformauit cum Concilio inualido, & Acephalo sic definiente, quomodo vellet Papam caput Ecclesiæ conformari legibus eiusdem Regis? verba Regis omitto, videre illa poteris apud Pind. cit. loco, post medium legis ibi transcriptæ.



44 Quod tandem asserit Author prædictos Reges Aragon. sua illa lege præuenisse iudicium Sedis Apostolicæ, si per hæc verba præuenire iudicium intelligit, quod vsurpauerunt iurisdictionem Papæ, male id colligit: & de hoc dicemus in resp. ad 16. propositionem, vbi Author id clare obiicit prædictis Regibus. Sed pro isto Doctore, hoc verbum præuenire iudicium volo explicare: & dico quod prædicti Reges Aragon. in hoc sensu facto suo, vel lege sua præuenerunt iudicium Sedis Apostolicæ, quia defendentes immunitatem Conceptionis Deiparæ, præuenerunt, & anticipare fecerunt, quod speramus facturum Papam in futurum, ferendo legem, ac definiendo de fide opinionem Scoti, si ipsi consonum videatur. Hæc enim præuentio seu expectatio non est culpabilis, neque Sedi Apostolicæ iniuriola. Declaro prædicta per illam sententiam D. Ambrosij lib. 1. de Abraham Patriarcha cap. 2. vbi laudans Patriarcham, quod relicta patria amicis, &c. Deū fuerit secutus per terras longinquas, & alienas sic ait: *Facto præuenit Abraham dicta sapientū, & secutus Deum exiit de terra sua*, Id est, Abraham suo facto relinquendi omnia, præuenit, id est antea fecit, quod postea Philosophi docuerunt de temporalibus relinquendis; imo, & quod postea Christus Dominus consuluit circa omnia relinquenda propter illum. Sic etiam à simili: Reges Aragoniæ, sua illa lege de defendenda præseruatione Deiparæ ab originali, præuenerunt, seu antea fecerunt, quod fortassis postea iudicabit Ecclesia id ipsum definiendo, quod illi Reges antea fecerunt, non definiendo tamen, quia id nec potuerunt, neque intentarunt: Sed puto nostrum Authorem hanc sui dicti bonam expositionem non admissurum: si vero illi displiceat, aliis fortasse non displicebit aliquando.

*Ad decimamquartam.*

**D**Ecimaquarta propositio contendit, ciuitatem Cæsaraugustanam non potuisse iurare, vel vouere defensionem Deiparæ ab originali, neque hoc potuisse facere vrbes alias circumuicinas.

45 Respondeo licite potuisse, sicut iam satis, superque constat ex quæstione procœmiali, & ex responsionibus ad particulares propositiones præcedentes, in quibus probauimus hoc iuramentum, & votum esse de actu pio, religioso, & laudabili, miraculis confirmato, & ab Ecclesia tolerato, & toties practicato.

*Ad decimamquintam.*

**I**N decimaquinta propositione asserit, defendere præseruationem Deiparæ ab originali non esse materiam voti, nec iuramenti. Huius oppositum etiam abunde probauimus in quæstione procœmiali, & in multis aliis responsionibus, neque opusest aliquid amplius ad istam propositionem respondere.

*Ad decimam sextam.*

**D**Ecima sexta propositio continet, quod Reges Aragoniæ, maxime Ioannes II. vsurparunt sibi auctoritatem Papæ, præcipientes ne prædicaretur ad populum Deiparam caruisse originali, & quod talem legem facere non potuerunt.

46 Fundari videtur hic Author in eo quod Ioannes I. I. Rex Aragoniæ in illa sua lege transcripta à Pineda citato tractatu in Responsion. ad 13. punit exilio prædicatores aliter prædicantes contra suam legem, iam  
vero

vero Princeps sæcularis non potest punire personas exemptas quales sunt Clerici, vel Religiosi prædicatores. Secundo fundari potest, quod prædicti Reges Aragoniæ statuentes legem circa Conceptionem Deiparæ, tulerunt legem de re spirituali, & ecclesiastica, vt patet: & constat ex multis locis, & Doctoribus vtriusque iuris quod princeps sæcularis non potest ferre legem in spiritualibus pro regimine Ecclesiæ, vt habetur tota *dist. 96. in decreto*, & tradit Suar. *lib. 3. contra Regem Angliæ cap. 7. & 9.* ac proinde Reges Aragoniæ condentes legem de re Ecclesiastica vſurpasse videntur iurisdictionem summi Pontificis.

47 Ad hæc duo argumenta, primo responderi posset (quidquid sit de culpa Regum illorum in lege illa ferenda ob defectum potestatis) non errasse ex parte materiæ præcipiēdo scilicet rem ex se illicitam; nam præceperunt rem piam, & licitam, vt patet ex dictis, & hoc nobis sufficit, quia nihil aliud prætendimus, quam ostendere hoc esse licitum, & saltem cadere posse sub lege à Papa concedenda, & sub voto, & iuramento. Secundo tamen nos in gratiam tam piorum Regum Aragoniæ nitimur prædictos Reges defendere à culpa in prædictis legibus concedēdis. Primo quia bona fide fecerunt ducti impetu fidei, & zelo honoris Dei, Matrisque illius: constat autem apud omnes quod factum aliàs malum, si fiat bona fide excusare à peccato, maxime quando sit contra legem positiuam tantum, quale hoc fuit, non contra legem naturalem: & in particulari, quod spectat ad primum argumentum de pænâ exilij imposita à Ioanne II. prædicatoribus contra suam legem prædicantibus, quæ sunt personæ exemptæ, eidem iatisfacit Pater Pineda *citato tractatu ad legem Ioannis primi aduertentia 21. fol. 47. pag. 2. §. Todas*

*estas razones, & fol. 48.* vbi dicit legem magis esse comminatiuam, quam executiuam, seu esse solum ad terrorem absque animo executionis. Non enim lex præcipit vt Ministri Regis ducant ad exilium aliter prædicantes, sed quod ipsi Religiosi sponte exeant à Regno pro bono pacis: quod explicare videtur alio verbo ibi, addito: scilicet, aliter prædicantes incurfuros indignationem Regis, Rege videlicet amplius in illis nõ complacituro: seu fiant sicut inimici Regis, vt ait Pineda. Nam teste ibidem eodem Pineda differunt valde aliquem Regem condere legem obligantem etiam clericos, & eandem legem mandare exequi etiam in clericis per ministros Reg. & hæ moderationes, ait Pineda, in illa lege concurrerunt. Vide quæ ibidem ait Pineda § præcedente. *Mas en el caso.*

48 Ad secundum argumentum, quod scilicet princeps sæcularis non possit condere legem de festis, & rebus spiritualibus Ecclesiasticis, respondet Pineda *citas, proxime §. Mas en el caso & §. antecedente, veniendo pues,* in summa dicens ex communi sententia, posse principes sæculares condere legem de rebus Ecclesiasticis in hoc sensu, quod legem possunt condere statuentem pænas quibus obligent subditos vt magis obseruent leges Ecclesiasticas, & sic fecisse illos pios Reges Aragoniæ in fauorem rei Ecclesiasticæ, condendo leges quò magis voluntas Ecclesiæ, ac summi Pontificis executioni daretur. Sed clarius soluitur argumentum ex traditis à Suarez *tom. de legibus lib. 4. cap. 11. nu. 11. & seqq.* vbi tradit posse aliquando vnã, & eandem materiam pertinere ad potestatem Ecclesiasticam, & ad potestatem ciuilem, quia scilicet materia partim temporalis est, partim Ecclesiastica: sunt enim etiam crimina aliqua mixti fori, & ab vtraque potestate puniun-

niuntur, vt vsura, sodomia, blasphemia, & similes iniquitates: & proinde poterūt lex Ecclesiastica, & ciuilis simul versari circa vnam materiam, quamuis magis competat ad Ecclesiasticam, quam ad ciuilem. Exemplum clarum est; nam causa inatrimonialis, est causa Ecclesiastica vt patet, & tamen leges ciuiles in aliquibus se intromittunt in illam, videlicet ratione dotis, adulterij: & leges ciuiles puniunt matrimonium clandestinum, & nuptias incestas, vt melius obseruetur lex Ecclesiastica, de quo optime Sanchez *li. 4. de matr. disp. 47. num. 12.* Idque tunc maximè locum habet, teste Suar. quando lex ciuilis neque contradicit Ecclesiasticæ, neque ab Ecclesia reprobat. Cum ergo in multis Ecclesiis iam celebraretur festum Conceptionis ante illos duos Reges Aragoniæ, vt latè, & doctè deducit P. Ægydus *lib. 3. de Concept. q. 6. a. 1. §. 13.* festum enim hoc cæpit in multis Ecclesiis anno 1200. leges vero dictorum Regum fuerunt saltem ab anno 1380. sequitur quod potuerint valide, ac piè prædicti Reges legem condere pro lege Ecclesiastica melius obseruanda circa Deiparæ Conceptionem. His omnibus adde quod princeps sæcularis in similibus legibus suo gladio temporali subseruit gladio spirituali Ecclesiæ iuxta dictum in extrauag. *Vnam sanctam. de maioritat. & obedient.* vbi dicitur, duos esse gladios, spirituales, & temporalem, & hunc priori subseruire debere. Adde vltimo saltem Ioannem II. in sua lege præcipuè intendisse obuiare scandalis iam tunc ortis ex prædicta opinione in populo prædicata contra Deiparæ immunitatem ab originali: & tunc clarius potuerat eam legem condere pro tollendis tumultibus, & pro pace sui regni, & pro melius seruando festo Conceptionis Deiparæ ab Ecclesia iam celebrato.

*Ad decimam septimam.*

**D**ecima septima propositio continet, errare Episcopos Hispaniæ, quando ad illorum instantiam exhibetur iuramentum, & fiunt vota de defendenda Deipara ab originali, & quod in hoc vsurpant auctoritatem Papæ.

49 Iam in præcedētibz responsum manet ad vtranque partem istius propositionis, cum probatum maneat hoc iuramentum esse de re pia, religiosa, laudabili, miraculis comprobata, & proinde, nec exhibentes, nec iurantes facere rem illicitam. Item sicut probauimus duos illos Reges Aragoniæ per suas leges circa Deiparæ conceptionem non vsurpassē iurisdictionem papæ: ita per easdem rationes probatum relinquitur, Episcopos hoc iuramentum fidelibus exhibentes non vsurpare potestatem summi Pontificis. Imo Episcopis magis hoc licitum est, quam fuerit Regibus Aragoniæ, tum quia materia Conceptionis est materia Ecclesiastica, & materia iuramenti, & voti ad Episcopos magis pertinet quam ad Reges, de quo proinde facilius possunt legem statuere in sua diocesi, quam Reges in suo regno. Si enim vt diximus in respons. 12. princeps secularis pro bono communi potest aliquibus exhibere iuramentum: à fortiori poterunt id Episcopi pro quiete, & bono cōmuni suæ diocesis. Adde quod Episcopi hanc legem non faciūt in communi vt obliget omnes: sed tantum sub conditione petunt ab ingredientibus aliquam societatem, vel confratritiam libenter, ac voluntariè iurent defensionem Deiparæ ab originali. Neque in hoc Episcopi vsurpant iurisdictionem Papæ, vt iam diximus, & vltra adiicio: quia ille solum dicitur aliquid vsurpare, qui assumit id quod sibi non

bi non licet, vel quod suum non est. At exhibere hoc iuramentum, & est licitum, & ad Episcopum potius pertinet, quam ad alium, cum sit prælatus, qui melius potest iudicare de causa Ecclesiastica, & de materia iuramenti.

*Ad decimam octauam.*

**D**Ecima octaua dicit Reges, & Prælatos, quibus incumbit pacificare populum sibi subiectum, eumque firmare in obedientia Christi debere dispendere subditos ad id quod Papa ordinauerit: eos vero contrarium facere per hoc iuramentum exhibitum.

50 Fatemur primo officium Regum, & Prælatorum esse pacificare populum, illumque continere in obedientia Christi &c. sed negamus per hoc iuramentum id effici, quod Author dicit, videlicet inquietari populum, nec manere dispositum ad id quod Papa ordinari: tale enim iuramentum non continet aliquid quod iurantem auertat ab obedientia Papæ, sed semper ille manet paratus defendere opinionem Scoti quandiu Papa non contradixerit, eo modo quo Parisienses iurantes à ducentis annis, neque inquietant populum, neque auertuntur ab obedientia, ac dispositione summi Pontificis. Neque propter hoc iuramentum exorti sunt tumultus, & scandala Valentiae, vel Cefaraugustæ, vel Hispali, sed ex eo quod in publico diceretur Deiparam habuisse originale, quod populi deuotio audire non patitur, Secundo, dictum iuramentum magis firmat populum in obedientia Christi, cum enim per illud magis firmentur fideles in amore, ac deuotione Deiparæ Matris, vt patet: ex consequenti, magis affecti manent ad Christum filium, ac proinde in eius obedientia magis firmanantur sicut à contrario, si Deipara-

ram originali maculatam credunt, minus ad illam afficiuntur, minusque proinde ad filium. Tertio exhibitio istius iuramenti non prohibet; quin populus maneat dispositus ad futuram determinationem Papæ, per illud enim non adimunt potestatem Papæ, nec dicunt se non obedituros oppositum definienti, sed parati manēt, & prompti ad suscipiendam semper Sedis Apostolicæ determinationem siue per definitionem, siue per iuramenti istius prohibitionem: solum enim iurant se hoc defensores tanquam probabilius, & tanquam Dei honori, & Beatæ Virginis decori congruentius.

*Ad ultimam.*

**V**Ltima propositio dicit, esse opus Diaboli ad infamandam doctrinam D. Thomæ, quam Diabolus execratur, mouere animos populorum per sermones prædicatos in fauorem Conceptionis Deiparæ, eiusdem Doctōris doctrinam infamare: & hos sermones plus habere æmulationis, quam deuotionis.

§1 Hoc est corollarium, & conclusio Authoris: hæc illius deuotio in Matrem Deiparam. Mira, & excessiua æmulatio pro doctrina D. Thomæ, cum non sit Ordinis D. Patris Dominici: O si tantam haberet Author æmulationem pro Deiparæ cultu, quantum ostendit pro D. Thom. doctrina zelum. Non dico hunc authorem errasse in defendenda opinione D. Thomæ: sed miror adeo tenacem illius adhesionem doctrinæ D. Thomæ, ut cogatur talia dicere. Hic enim locum habet prouerbiū. Ne quid nimis. Et quidem puto potuisse D. Thomam hodie illi dicere si ad nos descendere illud quod Moyse*s Num. 11*. dixit cuidam suo Ministro.



*nistro. Quid emularis pro me? Quis tribuat ut omnis populus propheta.* Tolerabile est, quod Author D. Tho. opinionem sequatur: sed intolerabile prorsus quod innuat se non tolerare sermones prædicatos in fauorem præseruationis Deiparæ ab originali.

52 Dico ergo primo. Maioris Authoritatis est in Ecclesia Dei, vel saltem æqualis, doctrina D. Aug. & D. Ieronimi, quam sit doctrina D. Tho. Magis odibilis diabolo est doctrina D. Augustini, quam D. Thom. Nam D. August. cum pluribus hæreticis decertauit facto, & scripto, quam D. Tho. ita ut ea de causa D. Augustinus vocetur in Ecclesia Maleus hæreticorum, quod nomen D. Thom. non est sortitus, nec tot libros contra hæreticos scripsit sicut D. Augustinus: & proinde doctrina D. August. odibilior est diabolo quam doctrina D. Tho. Cum quo tamen stat quod hodie sæpius aliqui Doctores in aliquibus non sequuntur opinionem D. August. nec ex eo dicitur in hoc interuenire diabolus ad infamandam doctrinam D. August. Secundo dico, Quam infamiam incurrit D. Thom. vel illius doctrina eo quod in vna opinione deferatur ab aliis? Nunquid infamatur D. Augustinus, D. Ieronym. & alij, si in vno illorum dicto deferantur? Nunquid D. August. Ieronymus, vel D. Thomas in omnibus quæ scripserunt habuerunt assistentiam Spiritus Sancti? Nunquid errare non potuerunt in aliquo? Nunquid doctrina D. Thomæ definit esse mirabilis eo quod in vno, vel altero dicto reprobetur? Credo hæc omnia esse euidencia.

53 Tertio dico. Qua conscientia potest hic Author asserere, quod tales sermones prædicati cum probationibus de præseruatione Deiparæ ab originali, plus habent æmulationis quam deuotionis? Nunquid omnium

nium prædicatorum cor intuetur, ac deuotionem? Nunquid omnium deuotionem introspicit? Nonne ut plurimum, vel semper bene præsumendum est de proximo, maxime quando opus quod facit est de se bonum, & laudabile quale est istud? Nunquid de omnibus Religiosis grauib, & piis, Deiparæ præseruationem ab originali prædicatibus sinistre cogitandum, & suspicandum est? Non ego sic consulerem ferre iudicium de proximo, quia clarum periculum est iudicandi temerarie. Et per hæc puto sufficienter responsum esse ad omnes propositiones Authoris.

Vt autem constet vera esse nostra responsa ad prædictas propositiones datas circa iuramentum hoc sic ab Authore isto impugnatum, constet item de intentione prælatorum Hispaniæ illud concedentium, & de forma quam aliquæ Academiæ seruant in iurando, & videatur quomodo dictum iuramentum nihil erroris contineat, libuit hęc transcribere formam concessionis Archiepiscopi Cæsaraugustæ Aragoniæ, in qua Author iste tunc viuebat, & simul formam iurandi seruata ab Academia Complutensi, idque in suo sermone Hispano.

---

Concessão do Arcebispo de Zaragoza  
para o iuramento da Conceição.

**N**Os Don Fray Pero Gonçalles de Mendoça por la gracia de Dios, y de la S. Sede Apostolica, Arçobispo de Zaragoza del conseje de su Magestad &c. A los armados nuestros el Dean, y Cabildo de nuestra S. Iglesia Metropolitana, y a los Prioros, Rectores, y Vicarios de nuestro Arçobis-

*Arçobispado salud en el Segñ, que es verdadera salud.*

*Considerando el fernor con que los Catholicos de Espana siguen el espiritu de la Iglesia santa, y la deuocion de sus Romanos Pontifices, que conuidan, y exortan a la limpia Concepcion de la Reyna de los Angeles sin peccado original, concedendo muchas inaulgencias: y la deuocion, que nuestros Principes, y Reyes la han tenido, deseando dexarlo vinculada a esta Corona, y Reynos de Aragon para que como principal parte de sus entranas los subaitos la metan en sus pechos, y los successores la hereden. Viendo logrados en la Magestad del Rey nuestro Senor essos desseos, mostrando en las diligencias que haze ordinarias, y exiraordinarias con la sanctidad de nuestro my sancto Padre Papa Paulo V. (espirito verdaderamente catholico, pio, deuoto y sancto) y el cuidado con que ha assentado, y apoyado esto por las Vniuersidades madres nuestras dignas de toda veneracion, y respeto, cuyo exemplo doctrina sana, y catholica ha abier to los braços al zelo de los Prelados, y Cathedrales de Espana para que la abracen, y estre chen en su pecho con voto, y juramento de celebrar, enseñar, y defender la immaculada Concepcion de la Virgen Maria nuestra Senora por todos los siglos que la Iglesia la solemnize, y celebre: inçgando los estautos, votos, y juramentos que sobre esto se han hecho en las ciudades, por obras religiosas, y agradables a la diuina Magestad. Que considerado todo, y la obligacion que la Sanctidad de Sixto IV. diçe nos corre de alabar, y dar gracias a Dios todo poderoso por la immaculada Concepcion de la Virgen nuestra Senora: Dignũ, quin potius debitum reputamus, vniuersos Christi fideles, vt omnipotenti Deo de ipsius immaculatæ Virginis mira Conceptione gratias, & laudes deferant &c. R visto el fernor que los feles de nuestra diocesis y prouincia tienen de vnir (para mas morito) a la deuocion el voto: Damos nuestro decreto*

decreto, facultad, y licencia a todos los sobredichos Cabil-  
dos, Priores, Rectores, y Vicarios, para que admitan al voto,  
y juramento las ciudades, villas, y lugares, y mas communi-  
dades que le quisieren hazer, solemnizando aquel dia quan-  
to les fuere possible, alentando lo a las alabanzas diuinas, de-  
spertandolos a cosa tan agradable a los ojos de Dios, y de  
toda la Corte celestial, reuerenciar, y glorificar esta serenissi-  
ma Reyna, para que assisean mas aptos, y dispuestos a la  
gracia por sus meritos, y intercession. Y por no perder el ca-  
mino que tantos sumos Pontifices han abierto con gracias, y  
indulgencias, ni dexar de dar algun passo en el en se vea el  
reconocimiento con que viuimos a esta celestial Senora y con  
el que nos hemos criado en la Seraphica Religion de nuestro  
Padre S. Francisco concedemos aquel dia a los que hizieren  
el voto quarenta dias de indulgentia. Y a todos los fieles de  
nuestra diocesis, y prouincia que auiendo dicho el Ave Ma-  
ria, dixeren cada dia, Bendita, y alabada sea la limpia Con-  
cepcion de la Madre de Dios cõsebida sin peccado original:  
y a los predicadores, y personas que en el pulpito, o fuera del  
con affeçto santo, y desseo del bien-y prouecho de las almas  
enseñaren y persuadieren esta deuocion. Dat. en nuestro Pa-  
lacio Arqobispal en 17. de Agosto de 1619.

Fr. Pedro Gonçalles de Mendoza. Arçobis-  
po de Zaragoza.

Forma

Forma del juramento que hizo la Vni-  
versidad de Alcalà.

**Q**uoniam gloriosissima Virgo Maria Mater Dei Augustissima, his qui elucidant ipsam (hoc est ipsius sanctitatem eximiam, & gratias prope diuinas in lucem proferunt) vitam aeternam pollicetur. Ego N. N. ad grauissimam illam questionem, quæ de illius Conceptione, sanctificationisque exordio est, Patrum monumentis diligenter inspectis, prospectisque matura consideratione Theologia momentis, amplam admodum occasionem nactus elucidandi eius gloriam: doctrinam, quæ differit gloriosissimam Virginem Mariam, præueniente, & operante diuini Numinis gratia, nunquam actualiter subiuisse peccato originali, sed immunem semper fuisse ab omni originali culpa, sanctamque & immaculatam, tamquam piam, & consonam cultui Ecclesiastico, fidei Catholica, rectæ rationi, & sacre Scripturæ hætenus semper summa confusione defendi, ac propugnauit. Sed quo felicius tandem eiusdem Sanctissimæ gloriam in lucem proferam, utque sit illustrius omnium oculis testata eandem veram sententiam tenendam, & amplectendam post hæc sub sacrosanctæ iuramenti Religionis tactis Euangelis, promitto, recipio, spondeo. Sic illi grauissimi Doctores.



TERTIA PARS.

CASVVM  
MORALIVM.  
QVÆ MAIORI EX  
PARTE CONTINET  
CASVS NON SPECTANTES  
ad Regulares.

---

CASVS I.

*An Episcopus successor teneatur solvere de-  
bita Episcopi sui antecessoris.*



VIDAM Episcopus ultima-  
marinus, non Religiosus, sed  
Clericus, existens in morbo,  
antequam moreretur fecit te-  
stamentum non habens licen-  
tiam Papæ ad illud faciendum.  
In testamento reliquit tria le-  
gata principalia. Primum fuit,  
vt darentur Petro mille quadringenta scuta aurea quæ  
illi

illi promiserat viuens eo quod duxerat in vxorem cō-  
fobrinam quandam ipsius Episcopi. Hanc summam  
pecuniæ deposuit testator coram depositario fideli à se  
electo, declarans quod illa maneret inclusa in certa  
capsula, & certo sacco: & iniunxit executori sui te-  
stamenti, vt prædictam summam pecuniæ daret præ-  
dicto Petro legatario. Succedente Episcopo successore,  
notificatum est illi de testamento: Episcopus suc-  
cessor, respondit, se nolle intromittere se in materiam  
illius: & quod executor illud executioni mandaret. De  
Episcopi mortui spoliis nihil accepit nisi certas res  
mobiles, quæ possent estimari prætio trecentorum du-  
catorum. Aperta capsula testatoris non sunt inuenta  
nisi mille scuta, & defuerunt quadringenta: Petrus re-  
cepit mille: & petiit ab Episcopo successore, vt sibi re-  
stitueret quadringenta quæ deerant, & sibi fuerant  
promissa in dotem ab Episcopo antecessore. Et non  
defuerunt viri docti, qui scripto dixerunt Episcopum  
successorem illam pecuniam quæ defuit, teneri dare  
Petro. Et declaratur, quod ille Petrus hanc pecuniam  
non petiit ab Episcopo successore nisi post transactos  
decem, vel duodecim annos.

I Et videtur quod Episcopus successor teneatur ad  
illam pecuniam soluendam. Nam hæres tenetur ad  
soluenda debita illius cui succedit, vt communis opi-  
nio tenet, de quo præcipuè Syl. ver. *hereditas*, 3. q. 5. ci-  
tans alios: At Episcopus defunctus contraxit illud de-  
bitum licite, cum illud promiserit causa dotis, quæ est  
causa pia, & Episcopus successor accepit tanquam hæ-  
res illa spolia defuncti 300. ducatorum: ergo tenetur  
ad illud debitum defuncti: & hoc maiorem habet lo-  
cum, eo quod Episcopus successor non facto inuenta-  
rio acceptauit illas res mobiles defuncti Episcopi, per

hanc enim acceptationem publicauit se hæredem : & hæres adiens hæreditatem non facto inuentario tene-  
tur ad debita defuncti, etiam vltra vires hæreditatis  
iuxta communem Doctorum sententiam quam tenet,  
& citat Vega Minimus ver. *herederos. casu* 4.

2 Antequam ad principale quæsitum respondeam,  
suppono primo hoc testamentum Episcopi factum si-  
ne licentia Papæ, si fuit factum de rebus acquisitis ex  
redditibus Ecclesiæ fuisse omnino inualidum, & nul-  
lum, cum de iure communi, & particulari Pontificio,  
prohibitum sit Episcopis testari de rebus acquisitis ex  
beneficio. Habetur expresse ex cap. 1. *de testam.* & cap.  
*relatum. eod. tit.* & cap. *Quia Joannes* 12. *quest. 5.* vbi Papa  
Gregorius præcipit Episcopo Raenati, qui volebat  
reuocare testamentum sui antecessoris, in quo certa  
bona legauerat cuidam monasterio, ad quod idem Pa-  
pa Gregor. concesserat licentiam Episcopo defuncto,  
vt illa monasterio posset donare, scribit Gregor. viu-  
enti Episcopo, ne donationem reuocet: nam ipse Papa  
dicit se illam approbare, non quod Episcopus defun-  
ctus illius mentionem fecerit in testamento, sed quia  
(inquit Papa) hoc ei viuenti promissimus: ergo istud  
testamentum factum de redditibus Ecclesiasticis, vt  
suppono, fuit nullum, & donatio facta Petro de qua  
meminit testamentum fuit nulla, vtpote facta sine li-  
centia Papæ: & vt omittam alias citationes, Nauar.  
*in commentario de spol. clericorum.* §. 6. fol. mihi 185. col. 4.  
& sequenti fol. 106. *tom. 1. suorum operum*, citat tres Bul-  
las trium summorum Pontificum, videlicet Pauli III.  
Iulij III. & Pij III. qui omnes claris, ac disertis verbis  
prohibent Episcopis ne possint testari de bonis acqui-  
sitis ex redditibus Ecclesiasticis: & multa ibi Nauar.  
accumulat ad intentum maxime in §. *Tertio noto.*  
Quod



Quod adeo verum est vt dicat, & probet Sarmient. *de reddit. Eccles. p. 3. cap. 2.* quod neque possit testari clericus de illis rebus, quas emit ex redditibus Ecclesiasticis, quia hæc sic emptæ sunt in rigore bona Ecclesiastica. Imo ad hoc intentum dicit Panorm. super primum cap. *de testament. num. 1.* quod Ecclesia habet fundatam præsumptionem, vel intentionem de iure communæ super omnibus bonis possessis à prælato defuncto, unde omnia præsumuntur esse Ecclesiæ, nisi probetur ex aduerso esse patrimonialia, vel acquisita ex propria industria: de his enim duobus vltimis poterit testari addit Sarmiento *4. p. reddit. Eccles. cap. 4. num. 6.* quod cum Episcopi in Hispania testari non possint, licet possint donare in vita: tamen si sint mortui proximi in infirmitate, ex qua decedunt, etiam si inter viuos nomen illi donationi imponatur, & ad traditionem deueniatur, censetur dari per testamentum, & proinde non valet donatio. Consonat id quod dicit Lessius *lib. 2. de iust. ca. 19. dub. 4. nu. 44.* quod id quod Episcopus poterat donare inter viuos, non potest dare per testamentum. Idem tenet Azor. *tom. 2. lib. 7. to. 10. cap. 6.* præcipue in §. *Sexta queritur.* Denique Nauar. *tract. de reddit. Eccles. q. 3. nu. 6.* ait quod neque consuetudo in Hispania licentiam dat Episcopis testandi de rebus acquisitis ex redditibus Ecclesiasticis sine speciali licentia Papæ.

3 Suppono secundo, quod Episcopus successor non est hæres Episcopi antecessoris, & quod si aliqua bona mobilia Episcopi defuncti ad successorem deueniunt, non deueniunt iure, seu titulo hæreditatis, sed ex donatione Papæ, qui cum sit dominus bonorum acquirentium ex redditibus Ecclesiasticis illa bona per mortem Ecclesiastici, vel applicat Cameræ Apostolicæ, vel iuxta consuetudinem aliquarum prouinciarum il-

la relinquit Episcopo successor. Declaratur exempl'o maioratus; nam is qui ingreditur maioratum, non illum accipit ab isto defuncto proxime antecedente, sed à primo fundatore maioratus. Probo insuper quod Episcopus successor non sit hæres sui antecessoris: Nam non est hæres voluntarius, id est voluntariè institutus hæres ab Episcopo antecessore, vt suppono fieri communiter. Item non est hæres necessarius id est consanguineus de iure succedens defuncto etiam ab intestato, numquam enim Episcopus successor succedit iure consanguinitatis antecessori suo. Imo nec potest, cum enim bona Episcopi defuncti sint bona Ecclesiastica, non possunt adiri per successionem hæreditatis, cum neque Episcopus moriens illa possit relinquere, vel donare titulo hæreditatis. Denique hoc expresse affirmat Panorm. ad caput 1. *de solutionibus*. vbi expresse ait successorem alicuius in beneficio, non esse heredem illius cui succedit: pro quo assignat inter alia, rationem illam quam proxime attigimus de maioratus successore, non accipiente illum de manu proximi antecessoris, sed de manu primi fundatoris, & alia ibi addit Panorm. ad intentum quæ paulò post referemus.

4 Suppono tertio iuxta communem opinionem Doctorum in materia restitutionis, quod debitor debens aliquam pecuniam v.g. Petro, & Petrus mittit ad debitorem Nuncium dicens, vt per illum Nuncium mittat sibi pecuniam suam; si talis debitor pecuniam debitam tradit illi Nuncio, & Nuncius fugiat, neque det pecuniam creditori, debitor liberatur à debito, nec tenetur amplius soluere, quia misit pecuniam per Nuncium destinatum à creditore, qui sibi debet imputare infidelitatem Nūcij à se electi, & liberari istum debitorem in foro interno, & externo; tenet Nauar. *in sum.*

*sim. cap. 17. num. 67. Syluest. Medina, citati à Rebello 1. p. de obligat. instit. lib. 2. quest. 13. sect. 3. num. 13. & idem dicendum est de re depositata: si enim deponens elegit depositarium, & per Nuncium ab illo petat depositum reddatque Nuncio, & res ad deponentem non perueniat: liberabitur depositarius, quia est utrobique eadem ratio: Addunt Nauar. cit. cap. 17. num. 185. Syluest. loco citato, & Gom. 2. tom. cap. 7. n. 3. quod si depositarius rem depositatam misit ad deponentem per Nuncium fidelem, & pro tali reputatum, facta debita diligentia super fidelitate requisita, & res non peruenit ad deponentem, depositarius manet liber à restitutione in foro conscientie. Videatur Rebello 2. p. de obligat. instit. lib. 16. quest. unica §. Quintum dubium.*

§ His positis sit conclusio. Iste Episcopus successor de quo agitur, non tenetur nec in foro interno, neque externo ad solutionem istorum quadringentorum scutorum, quæ Petrus dicit sibi deberi per testamentum Episcopi antecessoris. Probo imprimis ab autoritate. Sic enim expresse tenet Panorm. super citato cap. 1. de solution. ubi expresse dicit, quod succedens alicui in beneficio non tenetur nisi ad soluenda debita, quæ antecessor contraxit pro necessitate Ecclesiæ: & Hostiens. super idem primum capitulum de solut. dicit quod successor prælati tenetur de omnibus, de quibus tenebatur prælatus, in quantum prælatus. Idem tenet Zerola olim Episcopus Italiæ, in 1. part. praxis Eccles. ver. Successor. §. 4. Anteneatur, citatq; Nauar. & declarat Zerola, quod licet Episcopus antecessor contrahat debita nomine Ecclesiæ, si tamen non constet fuisse facta pro necessitate Ecclesiæ, non tenetur successor ad talia debita soluenda. At in casu præsentis constat quod Episcopus antecessor non contraxit illud debitum. 400.

scutorum pro necessitate Ecclesiæ, sed pro affectu carnali ad consanguineos: & habetur hoc clare in textu cit cap. 1. *de solution.* vbi successor in beneficio non cogitur soluere debita antecessoris nisi facta fuerint in utilitatem Ecclesiæ. Videndus est etiam Azor *tom. 2. sue sum. lib. 7. toto cap. 6. maxime quest. 6.*

6 Deinde probō conclusionem hac ratione principali. Episcopus successor, de quo agitur, non tenetur ad hoc debitum soluendum ratione testamenti conditi ab antecessore: nec ratione alicuius hæreditatis sibi delatæ: nec ratione debiti quo defunctus tenebatur Petro legatario: nec quia successor aliqua obligatione particulari se obligauerit ad soluendum illud debitum: ergo ad illud non tenetur. Consequentia clara est. Probatur antecedens quoad singulas partes. Nam successor non tenetur id soluere ex vi testamenti facti: probauimus enim clare supra, prædictum testamentum factum sine licentia Papæ fuisse nullum: quod autem nullum est, seu quod nihil est, nihil potest operari. Imo etiam si prædictum testamentum esset validum, non posset obligare Episcopum successorem, cum defunctus in illum iurisdictionem non haberet, neque successor esset hæres, vel consanguineus defuncti Episcopi, vt iam ostendo. Secundo non tenetur successor soluere illud debitum ratione hæreditatis sibi delatæ. Nam Episcopus defunctus non instituit illum hæredem in testamento, neque Episcopus successor defuncto successit ratione consanguinitatis vt constat: ergo ratione hæreditatis aditæ non tenetur soluere. Si vero Episcopus successor defuncti ex mobilibus accepit illos 300. ducatos, hos non accepit titulo hæreditatis, sed accepit illos tanquam donatos à Papa, qui est dominus illorum spoliū, seu bonorum Ecclesiasticorum, & secun-

secundum consuetudinem istius prouinciæ Papa illa spolia relinquit Episcopo successori, qui illa recipit à Papa, non vero à suo antecessore Episcopo titulo hæreditatis, vt tenet Panorm. cit. cap. 1. *de solut.* Tertio non tenetur successor illa 400. scuta soluere, eo quod defunctus Episcopus illa debebat Petro legatio, nã vt probauimus ex textu cit. cap. 1. *de solut.* & ex tot Doctoribus, successor nõ tenetur soluere debita antecessoris nisi facta fuerint pro necessitate Ecclesiæ; hæc vero debita non sic contracta fuerunt, sed pro maritanda consobrina Episcopi. Quarto denique non tenetur successor soluere hoc debitum ex obligatione aliqua, qua se specialiter, & sponte obligauerit ad illud soluendum, vt suppono, nec talis obligatio seu promissio soluendi ostendetur: ergo nullo modo ad illud soluendum obligatur. Et confirmatur per doctrinam communiter traditam à Doctoribus, maxime à Vega Minimo 2. *par. ver. Mandas. casu* 20. vbi tradit, successorem alicuius in maioratu, licet sit consanguineus, & aliàs hæres legitimus antecessoris proximi, si tamen renunciat hæreditati illius, non tenetur soluere illius debita, pro quo citat multos recentiores. Quod confirmari videtur ex *regul. iuris in* 6. dicente. Qui sentit commodum sentire debet & onus, & è contra. Id est, qui non sentit commodum non debet onus sentire. Cum ergo iste Episcopus successor, neque fuerit hæres, neque habuerit commodum hæreditatis, non debet sentire onus soluendi debita. Circa id vero quod dixi illos 300. ducatos de spoliis defuncti Episcopi sumptos à successore, non fuisse ab eo sumptos ratione hæreditatis, sed tanquam donatos à Papa, vel à iure communi; addo, seu declaro de iure communi bona Episcopi defuncti pertinere ad successorem Episco-

pum, sicut habetur cap. *Hac huius*. 12. q. 2. & cap. *de lici-*  
*cis*. & cap. *Illud. ead. causa & quest.* licet de iure particu-  
 lari summi Pontifices aliud decernant, illa ut pluri-  
 mum applicando Camera Apostolicæ, vel relinquen-  
 do Episcopo successori, ut audiui esse positum in more  
 apud Episcopatus ultramarinos: sed in hoc standum  
 consuetudini prouinciarum: Neque vero Episcopus  
 successor notificatus de testamento antecessoris, & di-  
 cens, seu permittens quod executioni daretur, per  
 hoc dictum, vel permissionem se obligauit ad solu-  
 endum id quod deerat pecuniæ in capsula, vel sacco.  
 Nam approbare testamentum, vel permittere ut exe-  
 cutioni mandetur, non est se obligare ad soluenda de-  
 bita testatoris. Aliàs iudex, cui defertur testamentum  
 post mortem testatoris, & dicit quod executioni detur,  
 per hanc iussionem, vel permissionem diceretur se  
 obligare ad soluendum id quod de bonis defuncti sol-  
 ui non potest: quod nemo vnquam dixit.

7 Nunc probo, quod dato (& non concesso) quod  
 Episcopus successor aliqua via esset obligatus ad solu-  
 uendam hanc pecuniam, attentis tamen circumstantiis  
 in informatione positis, adhuc tamen ab illius solutio-  
 ne deobligaretur. Probo 1. ex eo, quod dixim<sup>9</sup> supra ex  
 Nauarro in sum. de debitore mittente pecuniam cre-  
 ditori per famulum fidelem à prædicto creditore de-  
 stinatum, qui debitor deobligatur ab ulteriori solutio-  
 ne: Nam Episcopus defunctus elegit depositarium pro  
 sua pecunia depositata, & per ipsum depositarium, &  
 testamenti executorem iussit illā reddi Petro. Episco-  
 pus vero successor per eundem depositarium, & exe-  
 cutorem iussit pecuniam dari Petro: ergo licet tota  
 pecunia ad Petrum non deuenierit, & licet Episcopus  
 successor ad illius solutionem teneretur, iam satisfecit  
 suæ

suæ obligationi mittendo pecuniam Petro per depositarium, & executores fideles nuncios ab ipso defuncto pro solutione destinatos. Faciunt adhuc pro liberatione Episcopi successoris duo casus positi à Sylu. *in sum.* ver. *legatum* 3. q. vbi ponit primum casum in hunc modum. Si testator in testamento dicat: Relinquo Petro tria millia scuta, quæ sunt clausa in tale sacco, & in illo non inueniantur nisi duo millia, hæc solum duo millia habebit Petrus, & nõ amplius. Cum ergo Episcopus defunctus iusserit dari Petro 1400. scuta designate contenta in tali sacco, & in illo solum inuenta sunt mille, hæc solum mille habebit Petrus, & non amplius, maxime si depositarius non accepit pecuniam numerando, sed illam in sacco obsignato recepit: potuit enim deponens illam, decipi, vel obliuisci. Et eadem quæst. 5. addit aliud exemplum, videlicet, si testator in testamento dixit: Dentur Petro decem mensuræ olei, quæ sunt in tali vase: & in tali vase non sunt inuentæ nisi sex: hæc sex solæ illi debentur. Et aliud tertium exemplum ibi ponit seruiens ad intentum, & citat tex. iuris ciuilis. Secundus casus ponitur ab eodem Sylu. verbo *depositum* q. 7. videlicet: si quis in vna naui, vel in diuersorio reliquit sacculum pecuniæ obsignatum, non numerata pecunia coram nauita, vel hospite diuersorij, & postea deponens dicat in sacco mansisse ver. gratia mille ducatos, & sibi deesse ducentos: in tali casu neque nauta, neque dominus diuersorij tenentur ad soluendos illos 200. quamuis deponens iuret illos deesse, pro quo citat Cardinalem, speculatorem, & vnā legem ciuilem: quæ omnia nimis faciunt pro nostro casu, ad probandum, quod nedum Episcopus successor, neque item depositarius istius pecuniæ tenentur reddere Petro 400. illa scuta, quæ dicit de-  
fuisse

fuisse in sacco. Nam sicut colligitur ex informatione proposita, Episcopus moriens non numeravit pecuniam sacculi coram ipso depositario, sed solum dixit in tali capsula manere in sacco 1400. scuta reddenda Petro. Unde neque ipse depositarius tenetur restituere 400. quæ defunt, neque ipse Petrus legatarius habet ius ad illa petenda, cum culpa huius rei ad solum testatorem reduci debeat, qui vel fuit oblitus, vel pecuniam non numeravit coram depositario: & proinde multo magis excusatur à restitutione Episcopus successor, qui neque est hæres, nec vidit pecuniam, neque illam iussit deponi, nec ad illud debitum soluendum aliqua via se obstrinxit Et cõfirmatur adhuc, quoniam iste Petrus hodie petens ista 400. quæ dicit defuisse in sacco, non ostendit aliquod testimonium, vel instrumentum publicum fide dignum, per quod constet defuisse in sacco illa 400. scuta: sed solo suo dicto id nititur confirmare. Cuius dictum, cum sit pars habens interesse in causa propria, nihil potest probare. Oportuit enim pro cautela recipere, & numerare pecuniam sacculi coram notario publico, vel testibus, qui possent probare defectum talis pecuniæ.

8 Argumentum in contrarium initio positum iam manet solutum ex dictis: negandum est enim Episcopum successorem fuisse hæredem Episcopi defuncti, ut clare ostendimus ex Panorm. & aliis rationibus adductis. Negandum est etiam Episcopum successorem per acceptationem illorum 300. ducatorum de spoliis defuncti, se fecisse hæredem, vel acceptasse hæreditatem. Probauimus enim illos 300 ducatos non accepisse titulo hæredis, neque de manu Episcopi defuncti, sed de manu Papæ, vel consuetudine permessa à Papâ: & sic accipiens illos ut donatos à Papa, non se obliga-  
uit



uit ad soluenda debita Episcopi defuncti, maxime cum ostenderimus ex iure communi non teneri successorem ad debita defuncti Episcopi, nisi cum probatum fuerit illa fuisse contracta pro Ecclesiæ necessitate subleuanda. Et eadem responsio danda est ad secundum argumentum, vel confirmationem primi.

## C A S V S II.

*De quodam matrimonio pretensō ab  
una fœmina.*

**Q**Uædam fœmina pauper, non præcedente fraude, nec promissione, nec precibus importunis sui corporis copiam fecit cuidam adolescenti diuiti, & cum illius amicitia longum tempus continuauit eidẽ fœminæ dans ordinaria alimenta etiam quoad vestes, ita vt donata ab illo æstimari possent pretio quingentorum aureorum. Durante hac conuersatione propter remedia, & alimenta, quæ fœmina sibi, & matri pauperi recipiebat, cum ille eidem nec verbo, nec scripto matrimonium promiserit, illa è contra iuueni scriptũ dedit à se subscriptum, quo fatebatur se neque illi esse nuptam, nec illum sibi aliquid debere, nec sibi matrimonium promississe, & ideo libere posse illum cui vellet nubere, neque illam ab illo aliquid expectare: & hoc idem dixit illa coram multis aliis personis sub eadem forma verborum: transacto aliquo tempore fœmina peperit ex illo filiam, quam ille statim sub sua cura recipiens, iussit filiam alibi educari: post hæc omnia citat iuuenem coram Ordinario, petens vt se ducat

cat in vxorem, eo quod ab illo deflorata fuerit, & ille sub titulo sponsæ de futuro domum suam frequenter. Adolefcens asserit se cum primum ad illam accessit virginem non inuenisse, nec domum suam intrauit cum animo, vel titulo sponsæ, vel vxoris, sed tanquam ad domum sceminæ communis.

Quæritur an prædictus adolefcens cogendus sit illam ducere in vxorem vel in foro interno, vel externo?  
 I Prima conclusio, in foro interno prædictus iuuenis non tenetur illam ducere in vxorem, neque eidem aliquam restitutionem facere ultra iam factam. Hæc est communis Doctorum, & in particulari eam tradit Nauarr. in *summa latina cap. 16. num. 16.* & quia est communis doctrina, solum in probationem adduco regulam illam iuris citatam à Nauarro, videlicet, scienti, & consentienti non fit iniuria: & hæc mulier sciuit, & consensit non fraude, non vi, nec precibus importunis: ergo illi non est facta iniuria: & proinde prima pars conclusionis manet probata, videlicet non teneri ad illam ducendam in vxorem: Et etiam si quoad copulam fuerit rogata leuiter, id non obstat, quia hoc non est facere preces importunas, quæ inducant restitutionem matrimonij. Secunda pars conclusionis, quod scilicet neque aliam restitutionem facere teneatur, probatur ex multis: Primo, quia iam illi, ac matri dedit in alimentis æstimationem 500. aureorum, quæ solutio sufficientissima fuit vt restitueretur defloratio sceminæ pauperis, etiam si per preces importunas verè fuerit deflorata. Secundo, quia ipse asserit illam non fuisse à se virginem repertam, & sic eum illam non deflorauerit, multo minus illi debebat, imo & cum 500. illis aureis cum excessu illis satisfecit. Tertio quia Sanchez *lib. 4. de matrimonio disput. 10. num. 1. citat. 9.* Doctores graues dicentes

tes, quod neque quando præcedunt preces importunæ, deflorator tenetur restituere aliquid fæminæ sic consentienti, licet ipse Sanch. oppositum teneat cum communi. Si ergo tot Doctores & graues illud asserunt de vero defloratore, præcedentibus præcibus importunis: iste de quo quæritur, qui nec deflorauit, neque adhibuit preces importunas, & iam quingentos aureos dedit fæminæ isti, à fortiori liberabitur ab ulteriori restitutione faciendâ.

Maius dubium est, an in foro externo cogendus sit iste ducere in vxorem prædictam mulierem? Nauar. citato loco clare innuit cogendum esse in foro externo ad illam ducendam, licet illam iam defloratam inuenierit. Probat ex cap. 1. & 2. *de adulteriis*, vbi dicitur quod in isto casu fæmina dotanda est, vel in vxorem ducenda. Assignat Nauarrus hanc rationem. Nam licet hæc mulier à parte rei non sit virgo, ius commune virginem illam præsumit in foro externo, & sicut virgini faciendâ est illi restitutio, & non alio modo quam ducendo illam in vxorem: & citat ad hoc Panormitanum, Ioannem And. S. Antoninum, & ait esse opinionem communem.

2. Hoc non obstante credo, quod neque in foro externo cogendus est illam ducere. Ante probationem respondeo ad illos duos textus citatos à Nauarro, ex illis enim deducitur clare probatio istius secundæ conclusionis, & dico illos non loqui de nostro casu. Nam caput primum incipit; si seduxerit quis virginem, dormieritq; cum ea &c. Secundum capitulum dicit: Peruenit ad nos quod Felix, quandam virginem stupro decepit, &c. Itaque vnum capitulum ait, seduxit, aliud dicit, quod decepit: quæ duo verba significât fraudem, & dolum, quibus præcedentibus iubet Papa vt ducatur

tur in vxorem. Cum ergo in hoc casu iuuenis iste non seduxerit, nec deceperit, nec promiserit verbo, vel scripto, nec preces importunas adhibuerit, clare constat, quod illam non tenetur ducere. Secundo probatur, quia licet ex parte iuuenis aliqua obligatio daretur ducendi illam in vxorem, ipsa illum ab ista obligatione liberauit confitens scripto suo, & coram testibus, quod ipse iuuenis nihil sibi promiserat, neque aliquid debebat: quod constat ex verbis positis in scripto fœminæ. *Por me não ter obrigação, nem eu a elle, e poder fazer de si o que quizer*: In quibus verbis clare confitetur, quod iuuenis illi non est obligatus. Et infra dicit quod de illo nihil prætendit, & quod illa posset remittere omnem obligationem, si extaret, constat ex communi opinione dicente quod sponsalia possunt dissolui per consensum, ac remissionem vtriusque sponsi, de quo Sanchez lib. 1. de matrim. disp. 52. vbi citat ad hoc multa.

3 Nec contra hoc obstat, quod illa dicitur allegare, quod dictum scriptum dedit cum illa adhuc esset constituta in minori ætate, idest non habens viginti quinque annos, quæ ætas per leges regni dicitur ætas minor ad contractus ineundos in Minori habente Tutorem; nam ad contractum matrimonij valide ineundum, non requiritur illa ætas viginti quinque annorū, nec licentia Tutoris, sed satis est habere annos pubertatis, qui in fœmina est annus duodecimus. In quo fœmina potest contrahere valide matrimonium inuito patre, & tutore, vt. definit Concilium Tridentinum sess. 24. cap. 1. de matrimonio, & tradit Sanchez lib. 4. de matrim. disput. 22. & ego confirmo ex praxi: nam si fœmina in anno duodecimo per scriptum promittat sponsalia, tenent sponsalia, imo & matrimonium, si per

per procuratorem id contrahat, vt praxis obseruat: ergo etiam per scriptū poterit remittere obligationem quam aliquis vir habebat ad contrahendum cum illa, est enim eadem omnino ratio in contrahendo sponsalia, & in illa dissoluendo.

---

C A S V S III.

*De quadam donatione facta à Clerico nepti  
cuidam filia fratris sui.*

**Q**uidam Clericus rogatus à Petro per epistolam, quid dare vellet Francisco si duceret in matrimonium neptem quandam ipsius Clerici. Clericus per epistolam sic respondit. Dono illi quinque meas proprietates immobiles, quas omnes specificauit. explicās loca particularia vbi erant sitæ. Et addidit quod donabat illi omnia bona quæ haberet ipse Clericus in morte. Et insuper statim misit ad illum munus quoddam pretio 100. aureorum æstimabile. Virtute huius donationis per epistolam factæ, celebratum est matrimonium inter Franciscum, & neptem Clerici, & viuente Clerico acquisierunt possessionem rerum illarum immobilium promissarum, seu donatarum pro dote. Mortuus est Clericus sine testamento. Aliæ neptes clerici volunt annullare donationem præteritam; inter alia allegant, quod Clericus donauit duas proprietates ex illis quinque alteri nepti priori, & nunc viuenti iam donatas quæ est in possessione illarum; cumque illas iam alteri donasset in vita, effectu secuto non potuit illas donare huic secundæ nepti, & sic donatio in

vno claudicans, claudicat in toto. Addunt quod donatio facta fuit per epistolam missiuam, & secretam quæ non videtur sufficiens ad validandam tantam donationem. Addunt per quandam legem istius Regni, ad hoc vt donatio facta per epistolam absenti valida sit, opus est vt tres vel quatuor testes intersint scriptioni epistolæ, & videant donatorem epistolam suo scripto firmare, vt dubitatio omnis tollatur circa fidem epistolæ, & donationis: quæ solemnitas defuit in epistola huius Clerici donantis.

*Quæritur an prædicta donatio valida fuerit  
in utroque foro.*

**I** Redo quod valida fuit in utroque foro de iure communi, ciuili, & Theologico, & quod aliæ neptes illam non possunt annullare. Et imprimis quod fuerit vera donatio, patet, quia in epistola Clericus utitur verbo, *Dono*, & *do*, per quæ communiter fiunt donationes: & præterea fuit donatio acceptata à donatario, cum statim viuente Clerico possessionem acquisierit de proprietatibus donatis. Præterea facta fuit causa dotis, quæ donatio causa dotis est multum priuilegiata in iure. Quod vero donatio pura, simplex, & acceptata (si est inter viuos, qualis fuit ista quoad illas quinque proprietates) statim firma sit, & effectum sortiatur, sine eo quod possit amplius reuocari, est expressa lex istius Regni *lib. 4. Ordina. tit. 63. §. 10.* & est communis sententia omnium Iuristarum, & Theologorum, ita vt vbi primum acceptatur, sortiatur effectum, & dominium rei donatæ statim transeat ad donatariū: tenet inter alios Rabello *de obligat. iust. lib. 18. quest. 12.* vbi citat text. & Doctores: idque adeo verum est, vt si dona-

donator moriatur antequam donatarius acceptet, poterit donatarius post mortem donantis valide acceptare, vt tenet idem Rabello *cit. lib. quest. 3. num. 6.* & tenebuntur hæredes donantis rem donatam tradere donatario. Idem tenet Sanch. *lib. 1. de matrim. disp. 6. num. 5.* citans multos, & dicens hoc fore verius, quando donator ante mortem misit epistolam, in qua diceret se donare, sicut misit iste Clericus dicens se donare nepoti, & illa, viuente Clerico acquisiuit possessionem rerum promissarum. Quod vero donatio fieri possit valide per epistolam missam, tenet expresse Iulius Clarus *lib. 4. §. Donatio. quest. 12. num. 1.* dicens esse communem opinionem, pro qua citat vnā glossam, & Capicium. Nec potest obiici contra hanc donationem, quod fuerit facta sine insinuatione, vel licētia Regis, cum aliās illa excedat quantitatem 300. aureorum: Nam lex prohibens fieri donationem talem summam excedentem absque insinuatione, non comprehendit donationem quæ fit causa dotis, qualis est ista; sic tenet expresse Rabello *cit. lib. 18. q. 6. ad finem*, dicens esse opinionem communem, maxime Gamæ *de iur. 163. & 213*. Si vero dicas, verba quibus iste Clericus vsus est in epistola, dicens: Do talem & talem proprietatem, non fuerunt verba donationis, sed stipulationis, quæ est veluti promissio dandi de futuro, quæ promissio est stipulatio facta præcedente petitione, seu percontatione aliorum, quod est requisitum ad stipulationem. Dico imprimis prædicta verba non fuisse promissionem de futuro, sed reuera donationem de præsentī: non enim dixit dabo: sed do. Dico secundo, quod licet essent verba de futuro, ac stipulatio, adhuc obligarent in foro interno, & externo, postquam stipulatio fuit acceptata, & possessio rerum promissarum acquisita. Sic tenent commu-

niter Doctores loquentes de stipulatione acceptata, vt inter alios tenent Syluest. ver. *pactum*. in principio, & ver. *stipulatio*. adeo vt iuxta illum ver. *stipulatio*. stipulatio acceptata transeat ad hæredes. Et idem tenet Azor tom. 3. *summ. Moralis lib. 1. in princip. § Quinto stipulatio*. Cum ergo constet quod ista donatio fuit vera, & valida, per quam dominium rerum donatarum transiit ad donatarium, non possunt hodie hæredes Clerici annullare illam. Quod adeo verum est, vt dicat Sanchez citat. disp. & num. quod licet donator moreretur antequam donatarius acceptaret, hæres donantis non potest illam reuocare, quia facultas reuocandi non transit ad hæredes, vt tenet Couar. 3. par. *variæ. cap. 14. num. 17.* & Iulius Clarus cit. lib. 4. § *Donatio. q. 13. ad finem.* & alij citati à Sanc. ibid.

2 Contra istam donationem obiiciunt ( sicut extra informationem positam accepi ) quod iste clericus in ista donatione, inter proprietates, seu possessiones huic nepti donatas, fecit mentionem, & donauit illi duas possessiones, quas antea iam donauerat alteri nepti nunc viuenti, & illas possidenti: & sic donans modo clericus huic secundæ nepti possessiones alteri nepti iam donatas, & de facto possessas, donatio corrumpitur, cū dederit id quod dare iam nō poterat: sicut quādo scriptura est falsa in vno, est etiam falsa in alio. Et confirmatur, seu probatur illius nullitas à simili. Nam vendere, vel donare rem litigiosam, est illicitum, imo in iure punitur, & venditio, seu donatio annullantur, vt habetur lib. 4. *Ordin. istius regni tit. 10. §. 3. & seqq.* ergo à simili magis illicitum erit, & in iure nullum, donare rem clare alienam, quales sunt hæ duæ possessiones, quas iste clericus donauerat priori nepti, quæ illas actu possidet, & sic mansit secunda hæc donatio inualida, & nulla,



nulla, quia per illam donata est res aliena.

3 Pro responsione istius obiectionis, præmitto, quod etiam mihi dictum fuit, quod quando clericus fecit donationē priori nepti illarum duarum possessionum; declarauit in donatione, quod si prior illa neptis filius non haberet, illæ possessiones redire deberent ad alios clerici consanguineos. Et hodie prædicta prior neptis caret filiis, & nec sperat illos habere. Præterea mihi dictum fuit, quod prior neptis sciens dictum clericum donasse huic secundæ nepti suas duas possessiones, consensit, nec restituit, imo quod eas eidem statim vult dimittere. Hoc supposito ad obiectionem dico, donationem secundam factam nepti secundæ, esse validam saltē quoad illas possessiones, quas illi denuō donauit, & quas non donauerat antea priori nepti: & quod donatio quoad has saltem fuerit valida, probatur clare ex *Regula 37. de Reg. iur. in 6* quæ dicit. Vtile per inutile non debet vitari: idest actus qui ex vna parte est bonus, & utilis, non debet reddi nullus, & inutilis ob aliam partem eiusdem actus. Et affert ibi glossa in principio exemplum satis ad propositum istius casus, quod est huiusmodi. Dicunt leges ciuiles (& est lex expressa Portugalliæ *lib. 4. Ord. tit. 63.*) quod si quis donauerit alicui rem aliquam excedentem valorem 300 aureorum absque licentia, & insinuatione Regis, talis donatio sit nulla quātum ad id quod excedit summam 300. aureorum: Erit autem valida quoad 300. illos aureos. Vbi vides posse vnā, & eandem donationem esse validam quoad vnā partem, quam donare poterat, & nullam quoad illam partem quam donare non poterat. Quod in ista clerici donatione locum habet: Dato enim, quod fuerit nulla quoad illas possessiones priori nepti iam donatas (de qua tamen statim dico) fuit ta-

men valida quoad illas quas præfenti nepti donat, & priori non donauerat. Et adducit glossa in citata Regula legem *sancimus*. Cod. *de donatio*. & alios multos text. & Doctores. Et ideo non potest verti in dubium validitas istius donationis quoad dictas possessiones, quas clericus nepti præfenti donauit priori nepti antea non donatas.

4 Tota controuersia est, an ista donatio valida fuerit, vel valida reddi potuerit quoad illas duas possessiones, quas antea iam donauerat nepti priori? Respondeo, suppositis quæ supposui numero præcedēti, etiam quoad has duas possessiones donationem istam fuisse validam. Probo quia accedente hodie consensu prioris neptis, & ratificatione illius quoad donationem illarum suarum possessionum, donatio præterita quoad has duas possessiones nulla, vel dubia, per consensum prioris neptis conualefcit, & rata manet. Neque est nouum in iure quod donatio, vel alienatio alicuius rei, quam ego dare non poteram, conualefcit, & reualidetur accedente postea consensu illius, qui erat verus rei dominus, ac si consentiret ante donationem. Habetur clarum exemplum in cap. *Cum nos*, de his quæ fiunt à prælatis &c. Vbi dicitur quod collatio cuiusdam Ecclesiæ facta ab vno Episcopo sine consensu capituli, quæ sine isto consensu fuerat nulla, postea potest ista collatio, & donatio reddi valida accedente nouo consensu capituli: vbi glossa notat, quod aliquando subsequens consensus valet: & quod ratificatio retrahitur; & quod id quod ab initio non valet, interdum ex postfacto conualefcit. Aliud huius rei exemplum est in cap. *si quis* 1 2. q. 2. & aliud in c. *ult.* 1 6. q. 1. quæ vide. Dato ergo quod donatio secunda istius clerici quoad illas duas possessiones priori nepti donatas, non fuerit valida,

cum

cum illas donauit huic nepti secundæ ; nihilominus etiam quoad has duas possessiones est hodie valida, quia accedit consensus, & ratihabitio prioris neptis illas dimittentis iuxta tres textus proxime citatos. Secundo principaliter probatur, quia actus factus cum confidentia probabili, quod ad illum interuenit ratihabitio de præfenti, vel de præterito ex parte illius cuius licentia requiritur ; talis actus valet, vt est communis Doctorum opinio apud Sanchez libro 3. de Matrimonio disput. 35. num. 2. & seqq. vbi citat multos Doctores, & est actus validus etiam in materia Sacramentorum, quod est grauius (de quo dat Sanchez exempla) Quod maximè inferuit ad casum præsentem : satis enim probabiliter credi debet, quod clericus iste moralem, & certam confidentiam habebat, quod prior neptis istam donationem de suis duabus possessionibus ratam haberet, vel esset habitura, eo quod, nec filios haberet, nec sperabat habere : & illæ duæ possessiones illi fuerint à clerico concessæ sub conditione, si filios haberet, & aliàs redirent ad alios consanguineos. Confirmantur hæc omnia per id quod tradit Nauar. in commentario de spoliis clericorum §. 2. num. 5. fol. 100. pag. 2. col. 1. ex Bartolo, & aliis in l. inter omnes §. recte ff. de furt. videlicet, quod cum intercedit iusta causa credendi, quod dominus alicuius rei velle debeat vt alius capiat, vel ea in aliquem vsum vtatur, eo quod est cognatus, amicus, vel de ipso benemeritus, vel ob alias circumstantias, præsumitur in dubio illud velle; sic Nauar. ibi. Imo ab effectu secuto constitit, quod Clericus benedictam habuit hanc confidentiam de ratihabitioe prioris neptis, quia nempe illa consensit, & dixit se velle secundæ nepti dictas possessiones dimittere.

5. Ad argumentum primum initio positum in con-

trarium iam satis patet solutio ex dictis : ac dicendum  
primo, quod ista donatio in nullo claudicauit, nam va-  
lida fuit etiam quoad duas possessiones priori nepti  
prius donatas accedente ratihabitione prioris neptis  
post clerici donationem : cumque de aliis possessioni-  
bus nullum sit dubium, vt patet ex dictis *num. 3.* sequi-  
tur quod donatio non claudicauit in aliquo. Dico se-  
cundo, quod saltem donatio non claudicauit ex parte  
illarum possessionum quas clericus donauit nepti se-  
cundæ, & priori nepti non donatas. Ad secundum ar-  
gumentum dico talem ac tantam donationem valide  
potuisse fieri per solam epistolam missiuam, vt proba-  
ui *num. 3.* ex Iulio Claro, & Sanchez. Ad tertium dico  
illam legem Portugalliæ (si extat) requirentem ad va-  
lorem donationis factæ per epistolam, vt epistola scri-  
bi videatur per duos, vel tres testes, intelligi dummo-  
do alias certissime non constet de voluntate donantis  
per rei euidenciam ; si enim constet de illa per rei eui-  
denciam, non erunt necessarij testes in epistolæ scrip-  
tione, iuxta illud commune dictum Iuristarum, quod  
euidencia facti probatione non indiget. At per euiden-  
tiam facti constat quod iste Clericus donauit, ac vo-  
luit donare, eo quod illo viuente secunda neptis acqui-  
siuit possessionem dictarum rerum sibi per epistolam  
donatarum : Hinc colligo, quod licet Clericus episto-  
lam non scriberet, in qua dixit se donare, adhuc ista  
donatio valida esset sine scripto, quia scilicet interue-  
nit donatio, re, & facto per consensum Clerici, qui  
adhuc viuens, sciens, & consentiens, vidit, & consen-  
sit, quod secunda neptis illarum proprietatum posses-  
sionem acquireret, quæ est donatio in re, & facto. Hoc  
ego probo exemplo iuridico omnino simili. Præcipitur  
in iure, maxime in cap. *Cordi nobis. de appellation.* quod  
appel-

appellatio ab interlocutoria fiat in scriptis: hoc non obstante, potest appellatio fieri facto, arrepto scilicet itinere ad superiorem: imo cap. *dilectum* li. 2. de appellat. dicit Papa plus esse appellare facto, quam verbo, ubi glos. ver. *facto pronocere*, citat pro eodem multos textus & addo quod plus nos factis demonstramus, quam verbis: & quod facto consentimus, & quod facto renunciamus iuri nostro, & sic de aliis: ergo à simili, quāuis illa lex ad valorem donationis per epistolam factæ requirat epistolam scribi prædicto modo, nihilominus hæc donatio fuit valida, quia Clericus postea videns, tacens, & consentiens hanc neptem possidere res illas in epistola contentas, facto donauit, & plus est facto donare, quam donare verbo, vel scripto, iuxta textum, & glossam citatam.

6 Ad primum vero argumentum positum *num. 2.* de scriptura, quæ si sit falsa in vno, redditur falsa in totum: dicendum primo argumentum à simili, vel ab exemplo, non habere fidem indubitata. Dico secundo, non semper scripturam falsam in vno reddi falsam in alio, de quo non libet hoc loco differere, videantur Doctores cum disputant de falsariis siue de fide instrumentorum. Dico tertio sicut dixi supra *n. 5. in 1. solut. ad primum*, quod videlicet ista donatio in nullo claudicauit, cum valida fuerit quoad vtramque sui partem, vt patet ex dictis *num. 3. & 4.* Ad secundum argumentum eiusdem numeri 2. de exemplo rei litigiosæ venditæ, omiſſis aliis solutionibus dico, quod ex eadem lege Portugalliæ ibi citata, habetur solutio argumenti: nam paulò post §. 11. permittit lex quod res litigiosa, licet vendi non possit, tamen possit dari in dotem matrimonij. Hæc vero duæ possessiones prioris neptis, non sunt venditæ à Clerico, sed datæ in dotem vt patet. Secundo

dico has duas possessiones non fuisse rem litigiosā v<sup>t</sup> patet: res enim litigiosa est illa contra quam lis iamota est: & contra istas possessiones lis nulla fuerat attentata, & præterea, dato quod fuisset res litigiosa, prior neptis quæ poterat litem mouere post Clerici donationem consensit, ratificauit, & possessiones dimisit: & Clericus illas donauit, cum certa morali confidentia de tali neptis ratificatione, seu ratihabitione.

## CASVS IV.

*De quodam patre exheredante filium  
sibi iniuriosum.*

**A**dolefcens filius cuiusdam nobilis alloquebatur amatorie quendam adolescentulam se in natalibus inferiorem. Pater conscius filium coarguit, & monuit, vt à talibus amoribus & colloquiis abstineret, addens illud matrimonium, sibi ac parentelæ non cōuenire. Eo nonobstante filius continuans amores, cum quadam die in platea publica hanc fœminam alloqueretur, pater pertransiens filium suum percussit gladio non euaginato, in dorso, & mox secum filium in domum reduxit. Ambobus domum ingressis, pater assumpto pallo, seu baculo, & manum leuans ad filium percutiendum cum baculo, dixit filio: Nonne tibi præcepi ne illam fœminam alloquereris? Quo audito filius baculum vi de manu patris excussit, & ultra procedens, cum vterque venissent ad manus, filius patrem superans deiecit in terram, & ex tali proiectione in terram patris vnum brachium ita læsum, & attritum fuit, vt per aliquot dies à medicis illi fuerint applicata reme;

remedia medecinalia. Post aliquot dies filius vt mole-  
 staret patrem , matrimonium de facto contraxit cum  
 alia fœmina vilioris conditionis quam erat prior. Po-  
 stea cum pater in quadam platea publica hunc filium  
 obuium haberet , ambo rixati sunt gladiis euaginati.  
 Rixa extincta , filius coram populo verba iniuriosa  
 protulit contra patrem , addens eum non esse patrem  
 suum, seque dedignari talis patris esse filium : & ex illa  
 die, si forte patrem in platea obuium habebat, illi ca-  
 put non aperiebat leuato galero. Adueniente tempore  
 quadragesimæ pater adiit parochum prius pœniten-  
 tiæ sacramento recepto, & à parcho petiuit sanctissi-  
 mæ Eucharistiæ Sacramentum. Parochus dare noluit,  
 sed eidem iniunxit vt prius ab illo suo filio veniam pe-  
 teret, & cum illo reconciliaretur, pater id facere recu-  
 sauit.

Quæritur primo. Vtrum hic pater in conscientia  
 teneretur veniam petere à filio suo , & an parochus ea  
 de causa potuerit illi sacratissimam Eucharistiam de-  
 negare?

2 Vtrum pater huic filio veniam dare teneatur, eum-  
 que ad antiquam amicitiam , & familiaritatem reci-  
 pere, si filius satisfactionem det, & veniam postulet?

3 Vtrum hic pater possit filium exhæredare ob illa-  
 tas iniurias : & dato quod possit , quomodo debeat il-  
 lum exhæredare.

1 Antequam ad singula quæsitâ respondeam , tria  
 suppono. Primum est, neminem teneri restituere, aut  
 veniam petere, nisi alium læserit iniuste in honore, vel  
 cæteris bonis temporalibus. Si autem in his damnum  
 dedit iuste, non tenebitur veniam petere, nec restituere.  
 Probatur duobus exemplis clarissimis. Primum sit;  
 Iudex iuste condemnauit Petrum ad flagella, & ad pœ-  
 nam

nam pecuniariam : clare læsit in honore , & pecuniis non tamen tenetur Petro aliquid restituere, quia iuste, ac licite fecit. Secundum exemplum in eadem materia. Testis iuridice interrogatus, suo testimonio causam fuit ut Petrus damnetur ad triremes , & pœnam pecuniariam : clare læsit Petrũ in honore & in pecuniis, sed non tenetur restituere, nec veniam petere, quia iuste fecit Et confirmatur ratione, nam cum restitutio sit actus iustitiæ , debet fieri contra actus oppositos iustitiæ, id est, contra actus iniustos, qualis est ablatio honoris, vel pecuniæ iniusta : non vero debet fieri, vel iungi restitutio , seu veniæ petitio circa actus iustos, qualis est iusta læsio in honore, vel in pecunia.

2. Secundo suppono , quod filius tenetur obedire patri, quando filio consulit , vel suadet ne certam fœminam ducat in vxorem, vel è contra si consulat, ut certe nubat, eo quod ex tali matrimonio resultat damnum notabile ipsi patri, vel parentelæ : aut quia ex tali matrimonio prætendit pater aliquod particulare commodum, & interesse. Hanc conclusionem probat de cœte, & efficaciter Bellarminus *tom. de Sacram. lib. 1. de matrim. cap. 19. propos. 3. usque ad finem cap.* ubi imprimis ait, peccare filios , qui sine iusta causa nubunt contra voluntatem parentum, vel insciis parentibus. Probat ratione, & dat exemplum in Isaac Patriarcha , qui non nupsit nisi sponsæ sibi à patre Abraham assignatæ : & citat D. Ambrosium , multa de hac re dicentem *lib. de Abraham. cap. ult.* ubi D. Ambrosius nimium laudat quædam verba Euripidis Poetæ , dicta in persona cuiusdam fœminæ , cui cum quidam certum matrimonium inculcaret, illa respondit, *Sponsalium quidem meorum pater meus curam habebit, hoc enim non est meum.* Probat etiam ibidem Bellarminus , quod pater consulens ut fi-



vt filius nubat, vel non nubat alicui certæ mulieri, habens causas ad id suadendum, non contradicit Concilio Tridentino punienti illos, qui impediunt libertatem circa matrimonium contrahendum. Eandem conclusionem, quod scilicet filius sub peccato teneatur obedire parentibus in contrahendo matrimonio, si illud iuste, & honeste præcipiant, tenet Sanchez *libr. 4. de matrim. disp. 23. concl. 2.* vbi ait teneri filium sub peccato mortali obedire patri consulenti matrimonium iuste, cum illis scilicet duabus circumstantiis suprapositis: quia tunc pater præcipit iuste, & in materia graui & honesta. Et probatur ratione naturali: nam pater plus amat filium, quam filius amet patrem. Item pater maiorem habet scientiam, & experientiam ad cognoscendum quodnam matrimonium filio conueniat, quàm habeat filius, qui vt plurimum in matrimonio eligendo ducitur pulchritudine, seducitur à mulierculis, & ab amicis adolescentulis & similibus: ac proinde tenetur stare iudicio, & consilio parentum rectius consulentium. Excipit Sanch. dummodo filius habeat intentionem nubendi. Nam si velit Religionem ingredi non tenebitur patri obedire matrimonium consulenti. Citat ad hoc Sanchez fere viginti Doctores Canonistas & Theologos, inter quos est D. Bonauentura. D. Thom. Nauar. & alij graues Doctores. Hoc ipsum dixerunt etiam Ethnici Philosophi: maxime Terentius in *Hecyra Actor. 3. sce. 4* vbi inducit quendam iuuenem qui cuidam matrimonium sibi consulenti, respondit: *Nam me parenti potius, quam amorì obsequi oportet.* Quod optime seruit ad intentum. Denique multis in locis sacr. Script. dantur præcepta filiis vt obediant parentibus in licitis, & honestis. *Prouerb. 1. ad Ephes. 6. ad Colos. 3.* & alibi sæpe. Iam vero contrahere matrimonium

cum

cum certa fœmina honesta, concurrente vtilitate patris, & honore parentelæ, res est licita, iusta & honesta, ac proinde tenetur filius obedire.

3 Tertio suppono, patrem posse punire, & castigare filium vsque ad verbera, si filius patri sit inobediens, vel in alia materia vitiosus. Hæc satis probatur ex lumine naturali, imo ex praxi omnium gentium. Probatur etiam ex sacra scriptura, maxime *Ecclesiastici* 7. vbi dicitur: *Filij tibi sunt, erudi illos, & curua illos à pueritia.* Primum iubet vt erudiantur filij, deinde vt curuentur punitione videlicet corporali, disciplina, & flagellationibus necessariis. Quod adeo verum est, vt dicant Doctores communiter quod potest pater punire filium etiam clericum, si erret, idque sine incurſu excommunicationis, sicut clare colligitur *ex cap. 1. & ex cap. cum voluntate. de sentent. excom.* vbi glossa ver. *De familia.* ad citatum cap. *cum voluntate*, & Doctores communiter in materia excommunicationis, dum explicant capitulum *Si quis suadente.* Quod etiam docuerunt Gentiles Philosophi, maxime Epictetus in *Euchirid.* dicens: *Pater est, curandum est, cedendum est ei, in omnibus ferendus, cum aut obiurgat aut verberat.* Et Romani in legibus 12. tabularum teste Hallicarnazeo *lib. 2.* tantum imperium patri erga filium concedebant: *Vt posset filium, coercere, siue verberare, siue etiam mallet occidere.* Denique ex Theologis sufficiat videre Reginaldum *tom. 2. sum. lib. 20. num. 41. & seqq.* vbi cum D. Tho. Syl. & aliis dicit posse patrem verberare filium: & ad hoc teneri quando filius malos mores induit, & citat Catechismum Concilij Tridentini, & D. Antoninum. Hoc posito.

*Responsio*

*Responsio ad primum quæsitum.*

4 **A**D primum quæsitum dico non potuisse patrem ob prædictam causam obligare patrem ad petendam veniam à filio; & iniuste ea de causa illi fuisse denegatam sanctiss. Eucharistiam. Prior pars probatur ex primo supposito, nam iste pater non læsit filium in honore, vel cæteris bonis temporalibus iniuste: quod probo discurrendo per singulos actus re-  
 latorum in informatione: primo enim, cum in platea illum percussit in dorso gladio nõ euaginato, illum non læsit in salute, ut patet, neque in honore iniuste; nam filium percussit, & puniuit in publico qui in publico peccabat contra obedientiam à patre positam ne illam feminam alloqueretur, & præterea filius illam alloquens amatorie, peccabat contra bonos mores, & proinde potuit iuste à patre corripì, neque dedecus incurrit filius percussus à patre. Neq; ite pater à filio honorem, vel bonum aliquod abstulit iniuste, quando illum voluit percutere baculo: nam primo, effectus non est secutus eo quod filius baculum de manu eripuit: Conatus vero ad percutiendum, effectu non secuto non obligat ad petendam veniam percussione non secuta: alias iniungi deberet restitutio, vel veniæ petitio illi, qui sola cogitatione voluit furari, vel percutere effectu non secuto, quod nullus dixit. Et confirmatur, quia in criminalibus, conatus ad crimen non punitur pœna ordinaria. Addo, quod licet iste pater de facto, baculo percuteret, non lædebat iniuste cum posset imò deberet iuste filium errantem percutere: & proinde ob iustam percussione filij, non tenebatur ab illo veniam postulare, poterat enim filium peccantem etiam verberare, iuxta Reginaldum supra: plus autem filius dole-  
 ret,

ret, & quæreretur de patre si ab illo nudus verberaretur, quam si ab illo baculo percuteretur. Pater autem senex non sic facile potuisset filium robustum nudare ad verbera, & proinde recurrit ad facilius supplicium per baculi fustigationem. Denique in tertio actu quando ambo rixati sunt in platea euaginato gladio, pater filium in honore, vel bono aliquo temporali non læsit, cum non dicatur quod pater fuerit in rixa aggressor, vel quod filium vulnerauit. Cum ergo in nullo prædictorum actuum pater à filio honorem, vel aliquod bonum temporale abstulerit, saltē iniuste, sequitur quod cogi non debuit ad restituendum, vel ad veniam petendam à filio. Secundo principaliter probatur: Nam dato, (& non concessio) quod pater in aliquo illorū trium actuum filium læserit in honore, & aliis bonis, adhuc pater non tenebatur à filio veniam petere; Nam maiorem læsionem in salute, & honore dederat filius patri: illum in terram proiiciendo cum læsione brachij, & eidem in platea verba iniuriosa dicendo, illum suum patrem esse negando, ac denique non leuato galero ipsum pertranseundo, maius inquam hoc est damnum, & maior iniuria patri illata à filio, quam fuerit vlla iniuria à patre filio illata, vt patet: At constat quod vna iniuria per aliam iniuriam compensatur, & vnum delictum compensatur per aliud delictum: Exempli gratia: Fecisti mihi vnam iniuriam, ego in recompensam aliam tibi irrogaui æquivalentem (quidquid sit de peccato) non teneor restituere, vel veniam petere, quia delicta paria, mutua compensatione tolluntur, vt habetur expressis verbis cap. *Intelleximus de adulter.* & cap. *Nihil* 32. *quæst.* 6. & l. *viro ff. solut. matrim.* de quo videatur Rabel. 1. p. lib. 2. q. 18. nu. 7. & 9. & proinde iuxta hanc doctrinam, maiorem obligationem petendi

tendi veniam habebat filius à patre, quam pater à filio quia delicta non fuerunt paria, sed delictum, & iniuria facta à filio fuerūt maiora. Imo ex parte patris nec fuit delictū, neque iniuria, vt probauimus. Vide Valerum Cartuxanum *lib. de different. vtriusque fori verbo compē-  
saio differ.* 6. Facit etiam pro hoc, doctrina Nauarri in *sum. latina cap. 14. num. 25. in fine*: vbi agens de modo quo iniurians veniam postulare debeat ab iniuriato sic ait. Quando duo se mutuo offendunt, & amborum offensio est æque grauis, qui prius offendit debet prius reconciliationem petere. At vero si posterior iniuria sit maior, posterior debet prius eam petere. Sic Nauar. citatque Syluest. At constat quod iniuria facta patri à filio fuit multo maior: ergo filius veniam debuit petere à patre, & non è contra. Et ratio naturalis id suadet, nam qui maiorem iniuriam fecit plus debet, ac proinde ille veniam postulare tenetur.

5 Hinc probata manet secunda pars istius conclusionis, iniuste videlicet fecisse parochum huic patri hac de causa sanctiss. Eucharistiam denegantem. Quod sic magis declaro: Nam Sacramenta parochiano negari non debent, nisi vel quia parochianus aliquod graue scandalum dedit in populo, vel quia non vult facere aliquid ad quod ex præcepto tenetur, vel quia est in peccato M. publico. Iste pater circa hanc materiam non dedit scandalum in populo volens iuste punire filium: Item non tenetur ex præcepto petere à filio veniam ob multa dicta *num. 4.* præcedenti: neque proinde ea de causa, qua veniam non petit, est in peccato, vt constat ex dictis: ergo non illi possunt denegari Sacramenta, cum Sacramentorum denegatio sit pena grauissima, & infamans, & æquiualeat excommunicationi, quæ priuat Sacramentorum receptione. Si autem

hic parochus dicat, se illum patrem priuasse Sacramē-  
 ti sanctis. receptione, eo quod nollet filio iniuriam con-  
 donare, & illum ad suam antiquam amicitiam, & con-  
 uersationem admittere, dico, quod neque ob hanc cau-  
 sam illum potuit à Sacramentorum receptione exclu-  
 dere vt statim dico, & probō in responsione ad secun-  
 dum quæsitum.

*Ad secundum quæsitum.*

6 **A**D secundum quæsitum dico quatuor. Pri-  
 mum est, quod iste pater numquam potest  
 in corde habere odium erga filium, neque illi velle  
 malum aliquod autoritate propria inferendum. Hæc  
 est communis Doctorum, ita vt probatione non indi-  
 geat: Nam odium, & desiderium mali, est peccatum, ac  
 peccatum nec pro vno instanti, potest admitti, vel re-  
 tineri etiam si inde mille forent bona vtilia euentura.

7 Secundum dico. Iste pater nō tenetur filium istum  
 admittere ad antiquam amicitiam, & cōuersationem.  
 Est hæc etiam communis Doctorum: illam tenet Ma-  
 gister in dist. 30. D. Thom. 2.2. quæst. 147. art. 5. & Gaet.  
 ibid. S. Anton. 4. par. tit. 6. cap. 4. §. 2. Cordub. casu 58. Na.  
 var. cu. cap. 14. & num. 25. & in lib. Consiliorum, cons. 5. nu.  
 2. de pœnit. & remiss. Valerus Cartuxus lib. de different.  
 vtriusque fori. ver. remissio. different. 2. num. 4. Comitulus  
 lib. 4. respons. Moral. quæst. 3. 2. ad finem. & alij ab his cita-  
 ti. Probatur primo ex facto Dauidis, aliàs Clementissi-  
 mi erga inimicos; qui tamen 2. Reg. cap. 14. cum of-  
 fensus fuisset antea à filio Absalone, eaque de causa il-  
 lum exulare iuberet ab vrbe Ierosolyma, post aliquot  
 annos rogatus Dauid ab amicis, & Magnatibus, vt filio  
 exilium remitteret, remisit vt Ierosolymam rediret,  
 sed

sed addidit: *Faciem meam non videat*. In quo clare ostendit se nolle illum ad antiquam cōversationem & amicitiam recipere. Secundo probatur, quia iste offendens ratione offensæ mihi factæ non est factus melioris conditionis erga me, quam alij, qui me antea non offenderant, sed potius peioris: at ego non teneor recipere ad particularem amicitiam, & conuersationem vllum hominem ex illis qui me nō offenderunt: ergo minus teneor ad illam amicitiam recipere istū meum offensorem. Tertio id probat Valerus Cart. cit. ver. *remissio. different.* 4. quia per receptionem ad antiquam conuersationem censetur iniuriatus iniuriam remittere, & cedere iuri quod habebat ad prosequendam per iudicem restitutionem damni resultantis ex iniuria illata, vt ibi multis probat: at nemo tenetur condonare dānum resultans ab aliqua iniuria illata, vt statim probō in tertio dicto: ergo neque tenetur admittre iniuriātem ad antiquam familiaritatem, per quam admissio- nem remittitur restitutio damni per iniuriā illatā. Imo addit Comitulus cit. *quest.* 32. *num.* 18. aliquando posse talem circumstantiam interuenire, ob quam laudabiliter poterit iniuriatus offensorem non alloqui, nec illum ad amicitiam particularem admittre, vt euitetur aliquod grande malum in iniuriante, vel in iniuriato, & citat ad hoc Gabriel. Syluest. Angelum, Tabienam, & alios.

8 Tertio dico, quod iste pater non tenetur in foro externo remittere filio iniuriā sibi illatam, licet filius pœniteat, & veniam petat; quod sic explico. Non tenetur pater cedere iuri quod habet ad faciendum per iudicem sæcularem, vel per leges vt filius iste puniatur, iuxta dispositionem legum, exhæredando illum, vel quid simile, quia hoc non est peccatum, imo licitum,

petendo scilicet restitutionem damni illati per iniuriam: idque accedente iudicis autoritate. Ista conclusio est expresse Nauar. *cit. cap. 14.* & Cartuxani *cit. loco ver. remissio.* Probat illam Nauar. ex tribus capitulis iuris canonici, quæ vide, & ex Syluest. *ver. caritas q. 4.* Imo addit Nauar. posse aliquando contingere vt iniuriatus obligetur non remittere, nec cedere huic iuri, sed procurare vt iniuria per iudicem puniatur, si conducat ad vtilitatem spiritualem offensoris, vel obsequium Dei, vel vtilitatem Reipublicæ, quæ in hoc casu locum habere possunt: saltem enim conducet ad bonum clarum Reipublicæ punitio istius filij, vt per illius punitionem cæteri filij contineantur in obedientia, & reuerentia erga patres suos. Et probatur adhuc conclusio: nam licet nemo possit in corde habere odium, neque vindictam per se sumere de iniuriante, neque illi velle malum: tamen non obligat Deus vt quis remittat damnum datum in salute, vel pecunia, quando damnum resultauit ex iniuria illata: alioquin, si quis per iniuriam mihi vulnus infligeret propter cuius curationem multas feci expensas cum medicis, & incurri lucrum cessans: vel si quis occidit patrem sex filiorum qui relictæ sunt orphani sine remedio, non posset accusari taliter vulnerans, aut occidens de damno illato, sed tenerentur offensi totum dimittere, quod nemo dicet.

9. Quartum dico. Tenetur hic pater in publico filiū se alloquentē, & salutātem, alloqui, & resalutare, si ex eo quod non resalutet oriatur scandalum. Hæc etiam est communis opinio: Et probatur quoniam vnusquisque tenetur vitare scandalum pusillorum, & asseritur à Doctōribus citatis supra in secundo, & tertio dicto. Vnde infertur quod cessante scandalo, ac nemine vi-

dente



dente, vel sciente, non tenebitur pater refalutare, vt colligitur ex Doctõribus supra citatis, maxime Comitolocitato num. 18. & Valero Cartuxano citata differentsia 2. num. 4. in medio, vbi doctẽ aduertit, raro aliquem posse scandalizari ex eo quod videat patrem non alloqui, vel resultare filium offensorem; non enim præsumitur quod pater id facit ex odio, sed vt filium puniat, & emendet. Raro enim pater odit filium, cum carnem suam nemo odio habeat.

10. Obiicis, ac probas teneri hunc patrem dimittere iniuriam huic filio petenti veniam, & reconciliationem. Nam Christus Dominus Matth. 6. in illis verbis, *Dimitte nobis debita nostra, sicut & nos dimittimus debitoribus nostris*, iniunxit nobis, vt dimitteremus iniurias nobis factas à proximis, alias non ipse nobis dimitteret peccata nostra, vt omnes patres, ac Doctores ibidem exponunt. Quod idem probatur ex illo Matth. 18. vbi Christus D. consulens vt vnusquisque remittat iniurias proximo iniurianti, dicit. Sic pater meus cælestis faciet vobis, si non remiseritis vnusquisque fratri suo de cordibus vestris: vbi ex pæna ibi iniuncta videtur colligi obligatio præcepti remittendi iniurias. Ad hoc argumentum bene respondet Maldonad. ad citata verba Matth. 6. *Dimitte nobis*. Ex cuius ibi doctrina dicendum est: aliud esse iniuriam, aliud vero damnum ex illata iniuria resultans, cuius rei ibi ponit exemplum: & concludit teneri nos dimittere iniuriam proximo, non vero damnum resultans ex iniuria: & in substantia innuit, remittere iniuriam proximo, consistere in his tribus, quod scilicet ei malum non velimus: quod illum non odiamus, quod de illo per nos ipsos vindictam non capiamus: Ecce in quibus consistit remissio iniuriæ, & ad hoc omnes tenentur. Damnum vero causa-

tum ex illatione iniuriæ nemo tenetur ex præcepto remittere iuxta dicta n. 8. sed solum ex cōsilio, nisi forte proximus offendens sit in extrema, vel graui necessitate: tunc enim ab illo non possemus expetere compensationem damni temporalis illati, potest iuuari, seu explicari hæc responsio per illud aliud dictum Christi D. circa inimicos consulentis: Benefacite ijs, qui oderunt vos. Luc. 6. in quibus verbis, vt constat, non iniungit præceptum vt inimicis nostris exhibeamus nostra bona temporalia, vel vt illis inseruiamus obsequio speciali: hoc enim tantum est in consilio, vt praxis Ecclesiæ obseruat. Si vero ibi aliquod præceptum interuenit, est quod alloquamur inimicum, resalutemus, non odiamur, non illi mala imprecemur, nec vindictam propria autoritate sumamus.

*Ad tertium quesitum.*

**A**D tertium quesitum dico, posse hunc patrem exhæredare hunc filium in suo testamento illumque priuare omnibus bonis, quæ alias ab ipso patre posset post mortem accipere. Hæc conclusio est diffinita in iure ciuili communi, & particulari istius Regni Portugalliæ. Habetur expresse in Authent. *vt cum de appell. cognos. §. causas autem*, & in l. 4. & duabus seqq. in 7. par. 6. vbi ponuntur 14. causæ ob quas potest pater filium exhæredare. Prima est, si filius patri manus iniuriose iniiciat. Secunda, si filius contra patrem in præsentia verba iniuriosa proferat: remittitq; ibidem lex iudicis arbitrio, iudicare quæ in hac materia sit grauis iniuria patri à filio illata, & sufficiens ad filium exhæredandum. Easdem duas causas exhæredandi ponit lex Portugalliæ libro 4. Ordin. tit. 38. §. 4. & 5. cum eadem

dem declaratione, seu remissione ad iudicis arbitriū. Idem habetur in glossa in cap. *Quintanallis. de iurciur.* in verb. *Exhæredaret.* Tenent etiam vnanimiter Doctores Theologi, maxime Molina *tom. 1. de iust. tract. 2. disp. 170. Reginald. tom. 2. lib. 20. num. 37. & seqq.* Sylu-  
ver. *hereditas. 2.* Couar. ad cap. *Raynutius. de testam. in principio.* & multi alij ab his citati. Nec debent videri rigoroſæ illæ leges filium exhæredantes ob has duas causas, duosve actus commissos & perpetratos à filio contra patrem, aut matrem: siquidem Deus eosdem duos actus in lege veteri pœna mortis plecti iubebat, quæ est pœna grauior exhæredatione. Exod. 21. habetur: *Qui percusserit patrem suum, aut matrem morte moriatur.* & cap. 20. Leuitici, dicitur: *Qui maledixerit patri suo, aut matri morte moriatur.* Nam vt ait Plutarchus opusc. de pietate erga fratr. post peccata commissa in Deum, nullum est peccatum grauius quam offensa facta parentibus, quibus nostrum esse corporeum debemus, & nunquam possumus æquale reddere. Verba Plutarchi. sunt hæc. *Neque vestigium vllum extat impietatis maius, quam contemptus, & delictum aduersus parentes.* Quæ applicando ad nostrum casum: constat quod iste filius manus iratas iniecit patri, quando baculum de manu patris excutiens, patrem proiecit in terram cum brachij læsione, & comminatione: fuit enim hæc manuum iniectio iniuriosa, violēta, & peccaminosa. Nam vt explicat Molina *cit. disput. in principio*, hæc iniectio manuum filij erga patrem, est explicanda sicut iniectio manuum facta erga clericum ad incurrendam censuram excom. constat vero quod si iste filius cum his circumstantiis manus iniiceret in clericum, maneret excommunicatus: ergo illas iniiciens in patrem incurrit pœnam exhæredationis. Item si prædictæ leges exhæ-

redant filium iniuriosa verba patri dicentem, idque remittunt iudicis arbitrio: quis iudex non arbitrabitur hunc filium grauissimam iniuriam verbalem irrogasse patri, cum post rixam in platea iniurias multas eidem patri dixit, de quibus iudex inquireret: item cum ibidem negauit illum esse patrem suum, illumque patrem ferre habere erubuit: & denique cum illum obuiam habens lenato galero non salutabat? Confurgit profecto ex his omnibus grauissima iniuria filij erga patrem. Quod vt clarius constet, considero à simili, quam iniuriosum sit filiū negare patrē suum. Christus D. Matth. cap. 10. dixit: *Qui negauerit me coram hominibus, negabo & ego eum coram patre meo*: & D. Lucas idem aliis verbis referens, ait cap. 9. *Qui me erubuerit, hunc filius hominis erubescet cum venerit in maiestate sua*. Ergo à simili, cum iste filius negauerit patrem suum, & illum ferè erubuerit coram multis in publico, iustum videtur, vt pater possit illum similiter negare priuando illum hæreditate per testamentum. Quod item grauis fuerit iniuria istius filij obuio patri caput non discoopere, nec salutare, colligitur ex eo quod Deus in Leuitic. cap. 19. præcipiebat, vt cuncti senibus quibusque reuerentiam exhiberent, vbi versu 32. dicitur: *Coram cano capite consurge, & honora personam senis*. Pro quo multa congerit Lorinus ad citatum locum ex multis Philosophis & historiis. Et in particulari citat duos versus Iuuenalis, qui de Romanis sic refert. *Credebant hoc grande nefas, & morte piandum, si iuuenis vetulo non assuerrexerit*. Citat etiam Aristotelem 9. *Eth. cap. 2.* dicentem hanc reuerentiam iuuenis erga senem ostendi in hoc, vt ei assurgatur, vt de sede, & accubatione superiore descendatur, &c. similia præstentur. Citat etiam Callistratum dicentem, ideo Romanos hanc reuerentiam iuuenum

erga

erga senes commendasse, vt alienis honorem habendo, parentes magis honorarent. Si ergo graue delictum reputabant gentiles cuicunque seni non assurgere, eisdemque reuerentiam non exhibere: grauior omnino iniuria huius filij iudicanda est, qui patri suo proprio obuiam facto, neque caput discooperuit, neque vt patrem reuerentiauit.

12 Contra hanc conclusionem obiicia, & probas, hunc filium non incurrisse pœnam exhæredationis contentam in citatis legibus. Nam vt explicat Molina, & Reginaldus cit. locis, & alij, si filius manus iniiciat in patrē, vt se à patre defendat, quia scilicet pater filium inuadit: tunc non potest exhæredari, quia vtitur iure suo, & lex naturalis dicit vt quis se defendat ab inimico inuadente, & ad hoc citat Molina, Couarruias. At constat quod hic filius quando patri manus iniecit, proficiens ad terram cum brachij collisione, defendebat se à patre filium cum baculo, seu pallo inuadente: ex tali namque percussione poterat vita filij periclitari: ergo cum patri manus iniecerit ob suam iustam defensionem, non incurrit pœnam exhæredationis: sicut omnes Doctores dicunt, percutientem clericum, qui se inuadit, non incurrere excommunicationem, quia id facit ob suam iustam defensionem.

13 Ad hoc argumentum respondeo cum eodem Molina, & Reginaldo dicentibus filium non esse exhæredandum ob iniectionem manuum in patrem, ob sui iustam, & legitimam defensionem: At filius iste cum patri baculum de manu excussit, illumque ad terram proiecit, non est vsus legitima, & licita defensione, sed illicita. Probo clare, quia pater licitè, ac iustè filium baculo percutere volebat ob filij inobedientiam, & malos mores amoritios, vt supra diximus in tertio suppo-

sito: ergo filius non defendebat se iuste à patre sic iuste illum castigare volente : Nam aliàs daretur bellum iustum pro vtraque parte, si scilicet pater iuste posset punire, & filius posset iuste repugnare etiam cum damno illato patri : Quod bellum iustum pro vtraque parte Doctores non admittunt : Adde quod pater filium baculo percutiens non intendebat, nec poterat sic filium occidere: nam baculo percutiens non præsumitur vel-  
 le occidere maxime si sit pater, vt probat Iulius Clarus *in praxi crimin. §. homicidium numero 5.* referens casum similem, qui contigit Neapoli. Quod magis declaratur, & confirmatur per ea quæ tradit Syluest. verbo *homicidium 3. quest. 4. dicto 3.* & Tabienæ verbo *irregularitas 2. numero 3.* dicentes quod defensio illicita illius, qui licite impugnatur, non excusat illum ab irregularitate, cum se sic illicite defendat : At iste filius illicite se defendebat à patre illum punire volente, ergo non excusatur per illam manuum iniectionem in patrem. Secundo dico, quod quoad secundum casum quando iste filius euaginato gladio cum patre rixatus est, non constat quod pater fuerit aggressor, & sic per hoc filius non excusatur ab illa rixa. Deinde licet pater fuerit aggressor quoad rixam, & filius initio rixæ posset se defendere à patre iuste, non poterat finita rixa, dicere patri verba iniuriosa, neque illum negare esse patrem suum. Nam transacta rixa, ac defensione, patrem iniuriare, non pertinet ad defensionem, sed offensionem : vt enim bene probat Reginaldus cit. loco, seu *tom. lib. 30. tract. 2. num. 106.* deducens id ex duobus iuris capitulis, quando aliquis se defendit ad propulsandam vim sibi illatam, id non decet facere ad vindicandam iniuriam præteritam, id enim esset se vindicare : sed solum debet propulsare vim præsentem. Vnde hic

de hic filius dicens patri iniurias post rixam, non se defendit, sed vindicauit, & iniuriauit: idemque fecit, scilicet iniuriare, quando patrem transeuntem non salutauit leuato galero. Secundo principaliter respondeo ad hoc argumentum cum doctrina Doctorum, quam Doctores colligunt ex cap. *suscipimus. de homicid.* cum glossa ibidem ver. *tutela*, & Summistis ver. *irregularitas*. quando agunt de defensione facta cum moderamine inculpatæ tutelæ: vbi dicunt, quod vt se aliquis iuste defendat à præsentē violentia, inter alia debent hæc concurrere. Primo, vt si potest fugere fugiat, si illi fuga indecora non sit. Secundo, vt saltem clamet, ac vociferetur. Tertio, vt pro defensione faciat minus quod facere potest, quod tunc seruabit, si illud tantum fiat, quo omisso vis illata repelli non posset. Quarto, vt si possit se defendere percutiendo, vel vulnerando, non occidat. Iam vero hic filius hanc regulam non seruauit in sua defensione. Quando enim pater prius baculo illum voluit percutere, poterat filius sine opprobrio patrem fugere, vt patet, & non illum ad terram allidere: poterat item baculum de manu excutere, & non patrem ad terram prosterne. Item, quando cum patre rixatus est euaginato gladio in platea, etiam si pater esset aggressor, poterat fugere per plateam publicam sine opprobrio; nullum enim dedecus est filio patrem iratum fugere. Tertio in eadem rixa excessit filius, quando finita rixa patri dixit iniurias, & negauit illum esse patrem suum, & caput postea non discooperiebat, hæc enim omnia finita rixa, non pertinebant ad iustam defensionem, sed ad claram iniuriam, & offensionem. Vide inter alios Reginaldum citato tract. 2. à num. 105.

14 Quod attinet ad secundam partem istius tertij quæsti, quomodo scilicet hic filius debeat à patre exheredari

hæredari, dico id facere debere patrem in testamento posito, & expresso proprio nomine istius filij, & exprimendo causam ob quam illum priuat hæreditate, quia scilicet sibi talem, ac talem intulit iniuriam: postea defuncto patre, filij hæredes debent coram iudice probare vere interuenisse illam causam exhæredandi à patre in testamento relatam; & iudex debet sententiam exhæredationis pronunciare. Ita Sanch. *lib. 3. de matrim. disp. 33. num. 4. & seqq.* Quod si pater voluerit hæredes post mortem suam liberare ab hoc onere probationis, poterit pater dum viuit coram iudice agere, & dum testes, ac res sunt in memoria recenti, poterit coram iudice probare causas exhæredationis, illique probatis tenebitur iudex ferre sententiam exhæredationis, qua sententia pronunciata non erit amplius necessarium illum in testamento exhæredare. Adhuc pro maiori istius rei doctrina aduerto Molinā *cit. disp. 170. §.* Dubium præterea est, dicere quod licet iste filius ante mortem patris egerit pœnitentiam, per quam sufficienter peccatum, & ingratitude suam purgauerit, si tamen pater illum in testamento exhæredauit, non potest filius mortuo patre illam suam pœnitentiam, & satisfactionem allegare, vt cum aliis ad hæreditatem admittatur: nam vt ait Molina, etiam si pœnitentia deleat, ac purget crimen in foro interno coram Deo, non tamen id facit coram hominibus, nec impedit quin possit executioni mandari pœna in legibus assignata, vt multis exemplis praxis quotidiana obseruat.





## CASVS V.

*De duabus dispensationibus circa matrimonium  
cum duobus obtentis à Summo  
Pontifice.*

**Q**uidam vir obtinuit à summo Pontifice dispensationem contrahēdi matrimonium cum quadam fœmina sua consanguinea intra quartum gradum, allegans quod habitaret in oppido paruo, & esset vir nobilis, & quod in illo oppido non reperiretur fere aliqua fœmina nobilis sibi æqualis quæ non esset sibi cōsanguinea, vel alio impedimento impedita: nec posset facile extra suum oppidum aliam non consanguineam ducere: obtenta dispensatione, & celebrato matrimonio incurrit scrupulum, eo quod in dicto suo oppido vna vel altera fœmina sibi æqualis, & non consanguinea erat, cum qua potuit contrahere absque dispensatione. Quæsitum fuit an talis dispensatio valida fuerit, eo quod narratio falsa fuisse videtur.

Alius copulam habuit cum quadam fœmina consanguinea formato conceptu, & spe formali, vt propter copulam transactam facilius dispensationem impetraret à Papa. Postea dispensationem obtinuit expressa copula in narratione, sed tacuit se copulam habuisse cum spe facilioris impetrationis, quæ taciturnitas videtur vitiasse obtentam dispensationem, & proinde matrimonium virtute illius contractum fuisse nullū, iuxta illa quæ tradit Concil. Trident. sess. 24. ca. 5. de matr. Quod enim ea circumstantia habitæ copulæ cum spe facilioris impetrationis dispensationis obtinendæ

*cap. 5.* Tridentini ponentis pœnam quod careant spe dispensationis, habentes copulam cum spe facilioris dispensationis obtinendæ; quibus verbis clare innuit requiri ad hanc pœnam incurrendam vt vterque habens copulam hanc spem concipiant, & quasi sub illa vterque paciscatur. Vnde si vnus tantum hanc spem formet, non vitiabitur dispensatio ex taciturnitate illius spei in narratiua. Quod si vterque spem forment facilioris dispensationis, & sub illa ad copulam accedant, tenet Sanchez *cit. disp. 25. num. 38.* dispensationem fore nullam, si taceatur illa spes facilioris dispensationis obtinendæ. Citat pro ista opinione Nauar. Rodrig. Cordub. Ludoic. Lopez, Gut. Probat principaliter, quia stylus Curia Romanæ habet, mentem Pontificis esse non dispensare in hoc casu nisi exprimatur illa spes, cum qua habita est copula. Iam vero stylus Curia Romanæ facit ius, vt habetur in *cap. quam graui. de crimine falsi*. Et est quidem hæc opinio verior, & securior.

3 Qua non obstante, puto defendi posse quod etiam si vterque copulam habeat sub illa spe formali, facilius impetrandæ dispensationis, idque taceant in narratiua, quoad spem illam, non ideo fore dispensationem nullam, dummodo copula exprimatur: idque præcipue practicandum censerem quando illi qui sic iam contraxerunt sunt pauperes non valentes nouam dispensationem obtinere, & sunt in bona fide. Moueor imprimis, quia ipse Sanchez *citata disput. 25. num. 37.* dicit hanc opinionem secundam teneri à Nauar. *lib. 4. consil. iiii. de consanguin. consilio 5. num. 5.* & ab Henriq. *lib. 11. de matr. cap. 3. num. 6.* & Petro Lædesm. *de matr. q. 56. art. vlt. dub. 2. difficult. 3. post 3. conclus. coroll. 2.* & ad illam inclinari Humadam ibi citatum. Moueor secundo, quia principale fundamentum quo nititur Sanchez de stylo Curia,

Curia, videtur iam hodie non obligare saltem in Hispania. Nam Rodr. *addit. ad summam tom. 4. cap. 39. concl. 5.* in simili materia ait quod stylus Curia non obligat in Hispania: citat imprimis ad hoc Staphileum, Ferretum, Azeuedo, & Rebuffum. Et addit, paucis ab hinc annis in ciuitate Tolletana bis à Vicario Generali fuisse iudicatum contra stylum Curia. Et probant, quia ad hoc vt stylus Curia obliget tanquam ius commune oportet illum esse scriptum, promulgatum, & à Sum. Pontifice approbatum; quod non constat de aliquo stylo Curia: maxime quia hic stylus multoties mutatur pro arbitrio Summ. Pontificum, prout notat Mandos. & Rebuffus ibi citati à Rodriguez: cum ergo fundamentum Sanchez de stylo Curia non vrgeat, poterit, secure teneri opinio opposita Henriquez, &c. Ad capitulum vero *quam graui. de crimine falsi*, dico primo illud capitulum esse iam antiquatum per contrarium vsum sicut aliqua contenta in corpore iuris, saltem in decreto. Secundo dico tunc stylum Curia facere ius, quando talis stylus fuerit scriptus, promulgatus, & inuariabilis. Quod confirmari potest à simili, nam declarationes Cardinalium editæ Romæ auctoritate Papæ circa Concilium Tridentinum, sunt inuariabiles, & tamen iuxta grauium Doctorum opinionem non faciunt ius commune, eo quod non sint promulgatæ toti Ecclesiæ. Sic sentit Delrio *lib. 6. Magic. disquis. cap. 1. sect. 3. prope finem.* Et Valero Cartuxano *libro de differ. vtriusque fori*, ver. *Nullitas different. 5. §.* Sed certè, vbi citat Nauarrum *in concil. 34. de prabend.* & alij viri doctiss. quos suppresso nomine citat Rodr. *tom. 1. qq. q. 11 art. 2.* & fauent tradita à Sanchez *lib. 2. de matr. disp. 14 n. 4.* Si ergo hæ declarationes factæ auctoritate Papæ cum sint inuariabiles, non faciunt ius commune

mune obligatis totam Ecclesiam, eo quod non promulgantur vt lex communis. Minus faciet, ius commune stylus Curia non promulgatus Ecclesiae, & quotidie variabilis pro arbitrio succedentium Pontificum.

4 Occasione duorum præcedentium dubiorum, quæ de facto contigerunt, volui hîc apponere solutionem alterius dubij similis quidem, sed forte quotidiani, ac difficillimi, quod mihi aliquando propositum fuit: quod tale est. An in dispensatione matrimonij obtinenda inter consanguineos, vel affines, & generaliter inter eos inter quos est impedimentum dirimens, sit facienda mentio copulæ habitæ inter illos. Ante cuius solutionem præmitto in triplici tempore posse hanc copulam haberi. Primo, antequam Papa Romæ concedat dispensationem per expeditionem litterarum, quas dirigit, seu committit Episcopo, vel Ordinatio, vt cognita veritate, si ita est, dispense cum consanguineis: vbi vides Papam per hanc commissionem factâ Episcopo nondum dispensare, sed committere Episcopo vt dispense, & sic ista copula habetur ante dispensationem. Secundo potest haberi hæc copula postquam Papa Romæ litteras commissionis direxit Episcopo vt dispense, sed tamen antequam Episcopus causa examinata dispense autoritate Papæ. Et hæc etiam copula habetur ante dispensationem factam, vt patet ex proxime dictis. Tertio potest contingere hæc copula postquam Episcopus examinata causa dispensauit autoritate sibi à Papa commissa.

5 Hoc posito Sanchez *lib. 8. de matrim. disp. 25. à num. 6.* refert tres opiniones hac de re iuxta illa tria tempora. Prima asserit, non esse necessariam expressionem copulæ, etiam si fiat copula antequam Papa Romæ lit-

teras commissionis expediat, sed validam fore dispensationem tacita copula in narratiua. Pro hac opinione citat nouem Doctores graues, inter quos est Nauarr, Ouandus, Salzedo, Bernard. Diaz, & alij. Secunda opinio posita à Sanchez *num. 7.* ait, quod si illa copula accidit antequam Papa concedat, vel committat Episcopo dispensationem, talis dispensatio erit subreptitia, & nulla; secus si contingat post expeditas litteras Papæ ad Episcopum, licet Episcopus nondum causam examinauerit, & dispensauerit: si enim contingat post Papæ commissionem, valebit etiam antequam Episcopus exequatur. Pro hac secunda opinione citat duos tantum, vel tres Doctores. Tertia opinio quam sequitur ipse Sanchez *num. 8.* vt securiorem asserit reddi dispensationem subreptitiam tacita copula in narratiua inter hos impeditos, siue illa contingat ante Papæ dispensationem, seu commissionem, siue post, antequam Ordinarius illam expediat. Ex quo dicto imprimis clare collige, quod si copula habeatur postquam Episcopus examinata causa dispensauit, non impedit matrimonium postea celebrandum, iam enim dispensatio valide facta est. Si vero copula præcedat hanc expeditionem, seu examinationem Episcopi dispensantis auctoritate Papæ, dispensatio, & matrimonium subsecutum erunt nulla ex taciturnitate copulæ. Probat hoc Sanchez cum rationibus, & cum sex præcipue Doctoribus: præcipuum vero illius fundamentum est, quia sic obseruat stylus curiæ Romanæ, vt scilicet exprimitur in narratiua copula habita ante completam dispensationem dandam. Vltra hæc dicta à Sanchez, *Rabbello tom. 1. de obligat. iust. lib. 4. de matrim. prope finem scilicet. 7. cap. 5.* inter declarationes Cardinalium editas circa matrimonium; quas refert in declaratione *num. 149.* refert

refert illos Illustriss. DD. declarasse fore dispensationem nullam datam consanguineis pro matrimonio contrahendo non facta mentione copulæ in supplicatione habitæ inter illos ; idemque dixerunt de copula tacita habitæ inter affines , vel cognatos spirituales, vt ibi citat Rabello. Et est quidem hæc tertia opinio multo probabilior, & securior, tum ob rationes, & Doctores citatos à Sanchez, tum propter stylum Curia, tum propter declarationem Cardinalium citatam à Rabello, & sic ego in praxi consulerem.

6 Hoc non obstante , quæris an possit quis tuta conscientia sequi primam opinionem dicentem fore validam dispensationem inter quosque impeditos consanguinitate , vel affinitate qui dispensationem impetrarunt pro matrimonio contrahendo non facta mentione copulæ habitæ ante dispensationem. Ego attendita fragilitate humana, paupertate, scandalo, bona fide, quæ poterunt aliquando concurrere, iudico posse confessarium aliquando illis, vel parte illorum concurrentibus quietare sic coniugatos, maxime post iam factū, vtendo prima opinione, illisque dicere valide esse dispensatos. Moneor primo, quia ipse Sanch. *cit. num. 8.* licet sequatur tertiam opinionem, nihilominus in principio citati *num. dicit* primam , & secundam opinionem præcedentes esse probabiles. Secundo moueor, quia prima illa opinio dicens fore validam dispensationem obtentam copulæ mentione non facta , asseritur à nouem grauib. Doctores citatis à Sanch. *num. 6.* inter quos est Nauarrus, Oñand Salzedo, Bern Diaz, iam vero, vt tenet Sanchez *lib. 1. Decal. cap. 9 num 7.* auctoritas vnius tantum Doctores si sit probatus , ac doctus, & rationes aliquas pro se adducat, sufficit vt possit quistute secundum illius dictum operari: vnde à

fortiori poterit quis tute sequi in praxi opinionem illam primam Nauar. Ouandi, &c. cum pro se afferant tres rationes probabiles citatas, & positas à Sanches citato num. 6. Ad fundamentum vero præcipuum cunitur tertia opinio Sanch. de stylo Curia, iam respondi supra num. 3. stylum Curia non facere ius commune saltem in Hispania. Ad declarationem vero Cardinalium relatum a Rabello, similiter diximus eodem num. 3. illam non obligare, iuxta Doctores ibi citatos; idque saltem in foro conscientia, maxime si non sit munita, & firmata sigillo alicuius personæ in dignitate constitutæ, prout exponit Rodríguez citata questione 11 artic. 2.

---

## CASVS VI.

*De quibusdam sponsalibus de futuro iuratis.*

**Q**uidam vir, & femina consanguinei adinuicem intra 4. gradum sponsalia contraxerunt iurando coram testibus de futuro matrimonio celebrando, non facta mentione vel cōditione, si Papa dispēfaret. Pater adolefcētis eidem promisit pro dote certam summam pecuniæ. Impetrata à Summo Pontifice dispensatione, cognouit sponsa, quod pater sponsi non habebat illam pecuniam, quam filio promiserat in dotem, eam enim pecuniam ante celebratum matrimonium postulauit, & ille dixit post illud celebratum se daturum. Cognouit item tunc primo sponsa quod sponsus esset notabiliter ludo deditus alearum, quod si antea sciret, sponsalia non iuraret.

Quæ-

Quæritur an hæc mulier teneatur in foro conscientie huic viro nubere : & vtrum in foro externo ille possit illam obligare ad matrimonium contrahendum ?

1 Credo quod ista mulier in foro conscientie non tenetur cum isto viro matrimonium contrahere ob rationes sequentes. Prima, quod in contractu sponsaliorum, seu in verbis iuratis non expresserunt. *Si Papa dispensauerit* : Cum enim essent consanguinei, & impediti ad contrahendum debebant exprimere, ac dicere, ducam te in virum, aut in uxorem si Papa dispensauerit : iuxta probabiliorem opinionem quam citat Sanch. lib. 5. de matr. disp. 1. num. 5. vbi citat. 27. Doctores Canonistas, & Theologos dicentes quod consanguinei sic sponsalia celebrantes possunt resilire, & contrarie prædictis sponsalibus etiam post obtentam dispensationem : & quod non tenet matrimonium inter consanguineos sine licentia Papæ, & tale matrimonium promittere sine Papæ licentia, est malum, & peccatum vt constat : at iuramentum, & promissio in materia continente peccatum, non obligat, imo est nullum per *regulam iuris* § 8. in 6. quæ dicit, nõ est obligatorium contra bonos mores præstitum iuramentum. Alias probationes affert Sanchez num. 5. quas vide.

2 Secunda causa ob quam ista mulier deobligatur ab isto matrimonio, est, quia pater sponsi non implet promissionem factam filio dandi prædictam pecuniam, fuit enim illa promissio quasi conditio appositæ, sub qua fæmina promisit matrimonium, ac proinde conditione non impleta promissio fæminæ non obligaret etiam si fuerit iurata. Pro quo videndus est Sanchez lib. 1. de matr. q. 59. maxime num. 2. vbi dicit, & probat quod si fæminæ non detur dos promissa, non tenetur



vir illam ducere etiam si promississet, & iurasset. Et dat rationem: quia promissio dotis est veluti conditio sub qua sponsalia celebrantur, & sic deficiente conditione, non obligat promissio, nec iuramentum quia iuramentum recipit conditiones contractus, *l. fin. Cod. de non numerāda pecunia*. Quod dictum potest, ac debet etiam applicari ad casum præsentem: quia licet id quod viro promittitur non sit proprie dos, est tamen conditio sub qua femina promittit matrimonium, & acceptat nubere, & proinde non impleta ista conditio non obligat feminae iuramentum. Et confirmatur, quia si non interueniret ista promissio de danda pecuniæ summa prædicto sponso, femina non promitteret, nec iuraret, ut satis constat ex iis, quæ postea contigerunt; quæ probant illam promississe sub spe illius conditionis implendæ. Et præterea, quia ut ait Sanchez supra citatus, si post promissionem factam res notabiliter mutantur, promissio non obligat, ut etiam patet in materia voti: at post promissionem istius feminae res sunt notabiliter mutatae, cum pater sponsi promissionem non impleat.

3 Tertia causa ob quam ista mulier ad contrahendum matrimonium non tenetur, est quod denuo cognouerit adolescentem sponsum ludo nimis deditum esse; quem defectum licet iuuenis ante sponsalia iam haberet, ad sponsæ notitiam nondum venerat, idque si illa sciret, matrimonium non promitteret: Quod enim in tali casu defectus ante existens, sed postea cognitus, sufficiens sit ad sponsalia dissoluenda, tenet communis opinio, quam citat Sanch. *lib. 1. de matrim. disp. 63. nu. 2.* citans multos Doctores: Idem habet *eodem libro disp. 62. num. 6.* vbi ait credendum esse sponso asserenti cum iuramento se non promissurum si sciret talem defectum

Etum in sponsa : quod idem dicendum de sponsa circa sponsum, cum sit eadem ratio : Et hoc quod dicit credendum esse sponso iuranti, intelligit de foro interno, & externo, si probabile sit arbitrio prudentis viri, & attentis circumstantiis non fuisse promissurum cognito illo defectu. Et citat ad hoc Nauar. Couar. Mascardum, & Gratiam, At satis probabile est, imo euidens est nullam faminam velle nubere homini audissimo ludendi, qui sua bona paucis diebus ludo exponat, ac dissipet. Videatur etiam pro eodem intento idem Sanch. eodem libro disp. 64. neque ad hæc sponsalia hac de causa dissoluenda necessarium est vt intercedat auctoritas iudicis Ecclesiastici, si dicta causa, vel similes sunt notoriæ, vt tenet Sanchez citato lib. 1. disp. 69. conc. 1.

## CASVS VII.

*De sponsalibus cuiusdam nobilis cum virgine  
deflorata, quæ erat infimæ sortis,  
seu conditionis.*

**Q**uidam filiusfamilias nobilis promisit, ac iurauit cuidam feminae virgini, & honestæ se illam ducturum in vxorem, idemque illa iurauit : & ambo habuerunt animum iurandi, & implendi iuramentum : & cum isto pacto, & confidentia ineundi matrimonij illa consensit suæ deflorationi. Et declaratur quod iuuenis erat annorum 19. & cognoscebat sortem, & conditionem feminae esse infimam, & vilem.

Quærantur duo. Primum, an iuuenis teneatur in conscientia illam ducere non obstante inæqualitate

natalium, & non obstante quod pater iuuenis id ægre ferat. Secundum, si saltem pater, aut iudex Ecclesiasticus possint dissolvere dicta sponsalia, attenta sponsalium disparitate.

I Prima conclusio. Iste adolescens in conscientia, & sub peccati mortalis pœna, tenetur hanc fœminam in uxorem ducere, & dicere contrarium, esset temeritas. Probatum primo ex iure canonico, ex cap. *ex litteris. il. 2. de sponsal.* ubi Papa iubet, quod filiusfamilias, qui adhuc erat in potestate patris, & iuravit virgini se illam ducturum in matrimonium, cogatur ab Episcopo etiam cum censuris eandem ducere, etiam si dicat se velle esse Religiosum. Confirmatur conclusio, quia in hoc casu concurrunt duæ obligationes graues, & naturales. Prima est sponsaliorum iuratorum, quæ magis obligant quam sponsalia non iurata. Secunda fuit defloratio virginis, cui illa consensit sub pacto, & iuramento matrimonij futuri: & manebit infamata notabiliter, si à matrimonio illam excludat. Neque obstat contra hoc disparitas natalium, quod ille sit nobilis, & illa sit infimæ sortis: nam, ut ait Sanchez *lib. 1. de mat. disp. 14. num. 2.* citans alios graues Doctores, iuuenis sciens, & videns fœminam sibi inferiorem, & nihilominus iurans, & promittens id quod suum erat, cessit liberaliter iuri suo, seu iuri suæ nobilitatis. Eandem opinionem tenet Molina *tom. 2. de iust. tract. 2. disp. 271. §. Quoddam exemplum.* ubi in alio casu difficiliore dicit: quod si fœmina nobilis, & diues sponsalia contraxerit cum quodam viro infimæ sortis, seu plebeo, vel paupere, idque contra voluntatem patris, & consanguineorum id indigne ferentium, & scandalum capientium, teneri nihilominus talem fœminam tali sponso nubere in conscientia, sicut probat praxis Ecclesiæ, quæ

quæ in tali casu obligat illam ad contrahendum. Minor autem infamia est in hominum æstimatione, virum nobilem nubere fæminæ inferiori, seu dispari, quam fæminam nobilissimam, ac diuitem nubere viro dispari, & ignobili. Probatur insuper, quia hoc iuramentum fuit promissorium, & factum in fauorem tertij, fæminæ videlicet: iuramentum vero factum cum his circumstantiis, neque Summus Pontifex relaxat, cum non relaxet iuramenta cum præiudicio tertij, vt dicit communis opinio relata à Vega in *summ. 2. parte, ver. iuramento, casu 49.* citans D. Thom. Gaetanum, Rodrig. & alios. Adde quod multi nobiles hodie sine obligatione sponsaliorum iuratorum sponte ac libere ducunt vxores ignobiles, pauperes, vel alia infamiâ maculatas, idque vel ducti amore pecuniæ, vel pulchritudinis: quod ergo facit pecunia vel pulchritudo, vt ducatur in vxorem fæmina inferior, & inæqualis, cur non faciet, & obligabit vt faciat amor Dei, & iuramentum D. Majestati exhibitum?

2 Neque in hoc casu locum habet dictum Sanc. *libr. 1. de matrim. disp. 10. num. 5. & seq.* quod scilicet si vir valde nobilis promisit fæminæ matrimonium, quæ virò multum inferior est, ac dispar in natalibus, tunc talem virum non teneri cum illa contrahere, si ex tali matrimonio scandala debent resultare, quemadmodum resultare debent ex isto de quo agimus: non inquam obstat, quia illic, vt patet ex titulo disputationi affixo, & ex dictis *num. 2.* loquitur Sanchez de illo, qui fîcte promisit animo non implendi: item non loquitur de sponsalibus iuratis, & in casu præsentis ex parte adolescentis interuenit iuramentum non fîcte, sed cum animo implendi, & fuerunt sponsalia iurata, & subsecuta est defloratio virginis cum pacto, & spe matri-

monij; quę omnia magnam, & ingentem pariunt obligationem. Et confirmatur per id quod tradit idem Sanchez *lib. 1. de matrim. disp. 44.* vbi dicit, quod contrahens sponsalia cum aliqua fœmina, & cum spe futuri matrimonij illam deflorauit, talis non potest ingredi Religionem, sed tenetur illam ducere in vxorem: & dato quod illam non deflorauerit, ait teneri illam ducere, si ex modo quo cum illa conuersatus fuit, illa incurrere debet infamiam, si cum illo non contrahat matrimonium.

3 Secunda conclusio. Pater istius adolescentis non potest illi relaxare seu irritare hoc iuramentum. Est conclusio certissima, vt patebit ex mox dicendis. Et probatur, quia pater non potest irritare iuramentum filij maioris annis quatuordecim, quando intrauit annos pubertatis, idest à decimoquarto, & supra, quando iuramentum est personale, & non de rebus realibus, vt pecunia, & similibus: sed est iuramentum personale, idest de re quam per se solum facere potest, ac debet, vt de tradenda sua persona Religioni, vel vxori, cum hæc duo facere possit absque patris licentia, neque quoad hæc duo sit sub patria potestate. Confirmo, & declaro per ea quę Doctores communiter dicunt in materia de voto videlicet, quod pater potest irritare votū Religionis emissum à filio ante annū 14. secus si sit emissum post annum 14. tenet inter alios Sayro *Clauis Reg. lib. 5. cap. 8. num. 50.* citans alios, quia est votum personale independens à patria potestate. Et eadem omnino est ratio in iuramento personali circa matrimonium. Imo maior ratio datur in iuramento personali quod non possit irritari à patre, quia est iuramentum promissorium factum homini de matrimonio quod potest valide implere sine consensu patris: & iuramentum factum

factum hominī difficilius relaxatur quam iuramētum factum Deo, vt dicitur in *l. Celsus ff. de Recept. Arbitr.* vbi dicitur quod mitius agitur cum Deo, quam cum hominibus. Et quod pater possit irritare iuramentum filij maioris quatuordecim annis quando est iuramentum personale, tenet clare Sanch. *lib. 6. de matrim. disp. 38. num. 15. & 16.* dicens cum multis Doctoribus, quod si filius iurauit sponsalia tenetur iuramento. Per quod videtur sentire, quod pater tale iuramentum nequeat irritare: & ibidem *num. 17.* idem clarius innuit. Imo idem clarius tenet Sanch. *lib. 3. Decalog. cap. 20. num. 3.* prope finem. Denique probatur ex multis textibus, & communi Doctorum opinione dicentium, quod si filius familias faciat contractum alium à matrimonio, & contractum firmet iuramento, si aliàs contractus est licitus, & honestus iure humano, talis contractus valet etiam repugnante patre. Citat hos text. Sanchez *cit. proxime loco, & disp. seq. num. 1.* quos ibi vide. Idem tenet Mol. *cit. in 1. conclusione*, & Rabello *de oblig. iust. lib. de contract. in genere, q. 9. num. 3.* vbi dicit amplius, quod si contractus initus à filio familias est prohibitus per legem, sed non prohibetur cum irritatione actus, & filius iurauit, contractus manet validus, & citat capitulum quamuis pactum de pactis. Et habetur in glos. ad *l. 1. ver. Emptori, Cod. si aduersus vendition.* & Bartol. Iason. Gom. Gutier. citati à Sanchez vltimo loco proxime citato. Hic vero contractus de matrimonio ineundo est contractus licitus, honestus, & iuratus à filio, neque est contra leges, imo conformis legi diuinæ naturali, & positivæ Ecclesiasticæ.

4 Maius dubium esse poterit an iudex Ecclesiasticus possit hoc iuramentum relaxare, videlicet, an possit Vicarius Generalis, vel Episcopus relaxare, iubendo

ne tale matrimonium contrahatur: & videtur quod id possit facere per illa quæ tradit Sanch. *lib. 1. de matrim. disp. 14. & disp. 62.* videlicet quod si ex disparitate sponforum, vel alia causa, secutura sunt grauius scandala, vel odium capitale inter coniuges futuros, vel alius malus exitus timetur, potest iudex Ecclesiasticus, imo debet tale matrimonium impedire: quia nunquam iustitia obligat aliquid fieri, quod sine peccato fieri non potest: & in hoc casu probabiliter timetur odium patris contradicentis erga filium, & filij erga vxorem futuram & scandalum consanguineorum patris: & ita colligitur ex cap. *cum in tua. de sponsal.*

5 Hoc non obstante, credo quod nec iudex Ecclesiasticus potest hoc iuramentum infringere seu relaxare nec sponsalia ista dissoluere. Probo, nam sicut supra probaui, nec Papa relaxat iuramentum cum præiudicio tertij, quando iuramentum est promissorium, quale est hoc: ergo nec iudex Ecclesiasticus inferior id poterit facere; videatur Vega *cit. loco casu 49. vet. iuramentum.* Secundo probo ex praxi Ecclesiastica, quam citat Molina *loco cit. 1. conc.* dicens solere Ecclesiam obligare ad matrimonium, etiam quando famina nobilis promisit viro ignobili, licet ideo aliqui scandalizentur, & inquietentur, tale enim scandalum videtur potius pharizaicum, quam pusillorum, seu iustum: vel potius dicendum, quod tale scandalum non est actiuum datum scilicet à sponsis sic contrahentibus: sed est scandalum passiuum, & pharizaicum, sumptum ex actu honesto, & licito, imo executorio actus boni, impletionis videlicet iuramenti, & restitutionis factæ à viro ob deflo-  
rationem feminae despósatæ. Imo videtur quod maius, ac iustus scandalum orietur in populo, si viderint hominem violantem iusiurandum, & feminae honestæ  
de

defloratæ non restituentem : & patebit porta, vel dabi-  
 tur occasio vt similes adolescentes nobiles pauperes  
 fæminas honestas deludant ac deflorent, scientes quod  
 etiam si illis sub iuramêto matrimonium promittant,  
 à tali iuramento per iudicem sunt liberandi. Et eodem  
 modo respondetur ad odium, quod ea de causa paren-  
 tes, vel consanguinei poterunt concipere : Nam sine  
 causa, & fundamento illud odium concipient, cum  
 odiant rem iustam & licitam, imo debitam de iure fie-  
 ri. De odio vero inter hos ipsos sponfos non est cur ti-  
 meatur, cum mihi dictum sit ambos propensos esse ad  
 matrimonium contrahendum: imo etiam si non essent  
 propensi tenentur odium deponere, eo quod ad id se  
 iuramento obligarunt. Neque Sanchez citatus videtur  
 his contradicere, ibi enim non loquitur de sponsalibus  
 iuratis, sed de ordinariis non iuratis, & factis sine de-  
 floratione fæminæ. Hoc vero fuit iuratum promissum,  
 & cum fæminæ defloratione. Nec capitulum cum in  
 tua de sponsal. loquitur de sponsalibus iuratis cum de-  
 floratione, sed de ordinariis. Et confirmatur adhuc,  
 quod iudex Ecclesiasticus non possit hæc sponsalia dis-  
 soluere, nam iudex Ecclesiasticus non potest violare le-  
 ges ciuiles fundatas in lumine naturali, & quando non  
 contradicunt Eccles. sed illi subseruiunt. Imo ius cano-  
 nicum sæpius se remittit ad leges ciuiles quando sunt  
 iustæ, & honestæ, ita vt quando deest lex canonica, iu-  
 dex Ecclesiasticus iudicet per leges ciuiles iustas, & ra-  
 tionabiles. Cum ergo sint multi textus ciuiles dicentes  
 validum esse contractum filijfamilias factum inuito  
 patre, si iuramento illum confirmet, non potest iudex  
 Ecclesiasticus has leges violare hoc iuramentum rela-  
 xando. Hi textus habentur l. *tam ex contract.* § 7. ff. de iu-  
 diciis, & l. *filijfamilias ex omnibus* § 8. ff. de actionum  
 & oblig.



& obligat. & in Authent. *Sacramenta puberum.*

6 Extra informationem mihi propositum fuit, quod iste adolescens post sponsalia iurata, & post deflorationem, constituit procuratorem per scripturam, cui procuratori dedit authoritatem vt suo nomine duceret in vxorem prædictam scēminam. Et quod procurator virtute talis mandati illam coram parōcho, & testibus duxit in vxorem nomine illius adolescentis: sed tamē priusquam matrimonium cum illa prædicto modo celebraretur, adolescens coram testibus reuocauit mandatum, seu procuratorem factum, licet ista reuocatio ad notitiam procuratoris non peruenerit. Ego respondi, & de facto dico, prædictum matrimonium fuisse nullum ob reuocationem mandati etiam ignoratam à procuratore. Est textus expressus in capitul. *procurator. de procura. in 6.* vbi expresse sic dicitur de hac materia: *Licet tam ipse (id est procurator) quam ea cum qua contraxit reuocationem penitus ignorassent, nullius momenti existit matrimonium.* Idem tenet glossa in cap. *Tibi Domino Ioanni 6 3. dist. ver. & iurare.* Et est communis Doctorum. Quamuis enim in aliis contractibus, ac negotiis diuersis à matrimonio, vt reuocetur valide procurator constitutus, necessarium sit vt reuocatio perueniat ad notitiam procuratoris, aliàs facta per ipsum valebunt: tamen in negotio matrimonij, cum sit iugum graue, & irreuocabile, decreuerunt iura, vt reuocatio procuratoris facta ante contractum matrimonij valida sit, si fiat coram testibus, etiamsi talis reuocatio ad procuratoris constituti notitiam non peruenerit. Et si matrimonium contrahat post factam reuocationem ignoratam sit nullum & inualidum. Ex hac tamen commissione facta procuratori ab isto adolescente, satis cognoscitur quam sponte voluerit hoc matrimonium  
cum

cum ista fœmina contrahere, & quam sine fundamento timendum sit odium futurum inter vtrumque si de facto matrimonio copularentur.

---

C A S V S V I I I.

*De quadam dispensatione obtenta cum  
falsa narratione.*

**T**Empore Gregorij XV. Summ. Pontificis, vir & fœmina consanguinei in secundo gradu, petierunt à Summo Pontifice dispensationem ad matrimonium contrahendum, allegantes infamiam, & paupertatem: ob mortem Summi Pontificis dispensatio non fuit obtenta. Summus Pontifex successor Gregorij, in principio sui Pontificatus noluit omnino cum aliquo dispensare in 1. & 2. gradu, ob solam causam infamiæ. Post aliquod tempus cepit cum aliquibus dispensare, non ob causam infamiæ; dispensabat tamen si præcessisset copula. Prædictus vir, & fœmina nouam supplicationem Summo Pontifici præsentarunt, dicentes inter illos copulam præcessisse, cum tamen à parte rei non interuenerit. Et sic obtenta est dispensatio cum narratione falsi.

Quæritur an potuerint valide matrimonium contrahere virtute istius dispensationis sic obtentæ? Et declaratur quod tempore dicti Gregorij XV. & antecessorum illius facile in hoc secundo gradu dispensabatur propter infamiam: & quod successor illius cepit dispensare quando præcesserat copula, & infamia. Et isti yltra copulam falso allegatam allegauerunt paupertatem,

pertatem, & infamiam veram.

1 Quod ista dispensatio fuerit inualida, & nulla, probatur, quia in illa interuenit narratio euidens falsi, vt patet clare:: at quæuis narratio falsi reddit dispensationem nullam: vt tenent multi, & graues Doctores vtriusque iuris, & Theologi citati à Sanchez libro 8. de matrim. disput. 21. num. 31. Secundo, quia quando narratio falsi in supplicatione pertinet ad causam finalem, dispensatio in ea fundata corrui, vt tenent multi graues Doctores citati à Sanch. cit. disp. num. 11. at in hoc casu narratio falsi pertinuit ad causam finalem; si enim Papa sciret non præcessisse copulam, omnino non dispensaret, quia pro tunc cum nullo dispensabat deficiente copula: ergo dispensatio fuit nulla. Tertio, quia in dispensatione obtinenda necessario explicanda sunt quæ ius exprimi iubet, vel seruat stylus Curiae, vel quæ consuevit princeps postulare pro dispensatione concedenda, vt late probat Sanchez citata disp. num. 17. & disp. 25. num. 8. At stylus Curiae, & consuetudo successoris dicti Gregorij obseruabat, vt non dispensaretur nisi cum infamia præcessisset copula, quæ hic non præcessit: ergo dispensatio fuit nulla.

2 Pro parte affirm. quod dispensatio fuerit valida videtur clare tenere Sanchez cit. disp. 25. nu. 45. vbi postquam dixerat fore dispensationem nullam si Papæ allegetur copula falsa, quæ non præcessit non allegata alia causa: subdit statim contra Cordub. Veigam, & Rodriguez, quod si simul cum illa falsi narratione copulæ, narrata fuit vera infamia fæminæ, vel vera scandala inde secuta, vel secutura, tunc non obstante falsa narratione copulæ, dispensationem esse validam. Probat ex Couarruua, quia copula cum consanguinea non potest recta iustitia mouere principem ad dispensandam,

sandam : cum potius ex se reddat difficiliorem dispensationem. Ad idque imponitur pœna pecuniaria. Secundo probat, quia Papa solet dispensare ad solam infamiam fœminæ, & timorē ne maneat innupta. Et in hoc casu exposita est Papæ vera infamia mulieris, unde poterat timeri ne mulier maneret innupta. Exposita est etiam Papæ vera paupertas, ob quam etiam solent Sum. Pontif. dispensare : itaque ultra falsam copulam allegatam, narratæ sunt duæ causæ veræ, ob quas Papa solet dispensare. Et tunc præcipue locum habet, quod habet Sanchez *citata disput. 21. num. 42.* videlicet quod quando in rescripto narrantur plures causæ copulatiuè, quarum aliæ veræ sunt, aliæ falsæ, spectanda est causa quæ nititur rescriptum, eaque existente vera non obstare cæterarum falsitatem. Et addit, quod cum causæ narrantur disiunctiuè, sufficit alteram esse veram ne rescriptum sit subreptitium. Confirmatur amplius per id quod tradit Sanchez *citata disput. num. 45. in fine*, ubi ait cum quodam Doctore ibi citato valere dispensationem impetratam ex falsa relatione matrimonij initi, & consummati inter consanguineos, cum tamen nondum esset consummatum : quia similiter, imo facilius non habita consummatione solet Papa dispensare, quod exemplum videtur valde simile ad præsentem casum. Videtur etiam Sanchez esse huius opinionis ex eo quod tradit *cit. disp. 21. num. 18.* citans Mandozium, & Gut. qui dicunt ; illud dictum quod Doctores dicunt, corruere gratiam tacita veritate, qua cognita princeps minime concessisset (quæ est causa finalis) hoc inquam dictum esse intelligendum, quando ideo remoueri principem à concessione est conforme iuri, & ex causa iusta, ac debita procedit. Secus quando procederet ex affectu, aut alia causa non considerabili ad dispen-

fationem. At in hoc casu Papam noluisse dispensare nisi præcedente copula non videtur conforme iuri, id est non est definitum in iure vt id præcedat: quin potius aliquando esset occasio (licet remota, & illicite arrepta) vt aliqui accederent ad copulam cum peccato pro dispensatione facilius obtinenda. Et proinde videtur. Papam denegare hanc dispensationem non præcedente copula ex affectu, & nimio zelo ne contrahantur matrimonia inter consanguineos: quæ proinde causa non est considerabilis ad dispensationem, sed est illi extrinseca, vt videtur colligi ex dictis à Sanchez *citato num. 18. in principio*, & proinde dispensatio non videtur vitiata, ex eo quod Papa non dispenseret omnino si sciret defuisse copulam; quia defectus iste copulæ non est conformis iuri, nec præscriptus in iure ad dispensandum. Facit etiam pro hac opinione quod tradit Sanchez *cit. disput. 21. num. 20.* videlicet, quod stante dubio an causa narrata in informatione fuerit finalis, an impulsua solum, tenendum est quod fuerit tantum impulsua, cuius falsitas non annullat dispensationem. Et in narratione istius casus non constat clare, quod narratio falsæ copulæ, fuerit causa finalis ob supradicta, an solum impulsua. Facit etiam quod ait ibidem Sanchez *num. 25.* videlicet, quod stante dubio an dispensatio valida sit, vt quia dubium est an satis probetur veritas narratorum, vel quia dubium est an causa tacita vel expressa falso inter alias causas veras sit finalis, tunc dispensationem reputandam esse pro valida, quia in dubio enitendum est vt actus valeat, quod ibi probat euidenter. At in isto casu dubium est an causa copulæ falso narratæ inter duas veras fuerit causa finalis dicta narratio falsæ copulæ, ac proinde videtur stante hoc dubio teneri pro valida dispensatione,

tione, cum narratæ sint præterea duæ causæ veræ ob quas solet Papa dispensare, videlicet infamia, & paupertas. Ob hæc omnia potest credi quod ista opinio teneatur à Sanchez: quod si ille eam tenet, videtur posse à quouis in praxi teneri cum sit opinio tanti viri. Ego enim in hac re nihil certum iudico nec proprium consilium interpono, sed fere disputationis gratia supradicta collegi. Alij viderint momenta rationum, & authorum, quos citauimus.

3 Pro eodem intento disputandi pono solutionem argumentorum adductorum in principio pro parte negatiua. Ad primum dici potest illud dictum Doctorum, quod quæuis narratio falsi vitiat dispensationem, debet intelligi quando narratio falsi pertinet ad causam finalem, & quando cum illo falso non narrantur aliæ causæ veræ, ob quas Papa soleat, & possit dispensare: vt ait Sanchez *cit. disp.* 21. *num.* 11. & *num.* 32. citans multos. At in hoc casu non constat an narratio falsæ copulæ fuerit causa finalis. Et præterea ultra illam narratæ sunt duæ causæ veræ ob quas solet Papa dispensare: vide Sanchez *cit. disput. num.* 42, & 45. Ad secundum dici potest non constare vtrum in hoc casu narratio falsæ copulæ fuerit causa finalis, maxime cum ultra illam narratæ sint aliæ duæ causæ iam dictæ. Ad id vero quod in particulari additur, Papam non fuisse omnino dispensaturum si sciret defuisse copulam, dici potest quod hoc denegans Papa non denegaret ex eo quod esset iuri conforme, sed ex affectu vt supra dixit Sanchez & Mandoz. & Gutier. & proinde etiam tunc dispensatio non corrueret. Ad 3. dici potest 1. nullum scriptum ius præcipere vt pro ista dispensatione naretur copula præcedens, vel intercedat copula præcedens: nam in Conc. Trid. *sess.* 24. *cap.* 5. *de Matrim.* vbi

præcipue agitur de dispensationibus matrimonij neque vllum verbum de hoc ponitur: quod attinet ad stylum Curia vide quæ supra dixi *casu 5. huius 3. partis num. 3.* vbi dixi ex Rodriguez stylum Curia non facere ius, neque obligare saltem in Hispania, vt Rodrig. ait *tom 4. addit. ad sum. ver. Matrimonium cap. 39. concl. 5.* citans alios. Ad id quod addit argumentum debere exprimi in narratiua id quod Papa solet petere vt exprimatur, dici potest hoc idem pertinere ad stylum Curia, de quo proxime diximus: & hanc particularem Papæ consuetudinem non esse ius scriptum, vel publicatum Ecclesiæ. Dicit potest secundo hanc consuetudinem nolendi dispensare nisi præcedente copula non esse præscriptam a iure: videatur Sanch. *cit. disp. 21. num. 18.* cum ibi citatis.

Hactenus dicta, vt vides, retuli ex mente Sanch. & fere disputandi gratia, non quod iudiciū meum interponam: quinimo iudico in praxi, Sanchez opinionem non esse tenendam, sed dicendum quod ista dispensatio fuerit nulla ex narratione falsi, & quod Papa non dispensaret si sciret copulam defuisse. Videat qui voluerit, quod sibi tenendum sit in re tam quotidiana, & securius eligat.

---

## CASVS IX.

*De quodam ingresso Religionem post matrimonium ratum, cum certa dubia circumstantia.*

**Q**uidam cum spe matrimonij deflorauit virginem sponte sub eadem spe consentientem: post copulam

Iam, vt honorem ablatum refarciret cum matrimonio, cum eadem sic deflorata contraxit matrimonium in facie Ecclesiæ, sed celebrato matrimonio cum eadem copulam non habuit, sed statim ingressus est monasterium quoddam Religionis approbatæ. Et declaratur, quod iste post copulam habitam promisit fœminæ se illam ducturum in vxorem.

Quærentur duo. Primum an prædictus in foro conscientiæ possit licite ingredi Religionem, non obstante tali matrimonio. Secundo, an dato quod Religionem intret, & in illa profiteatur, professio valida iudicanda sit. Et quidem quod licite possit Religionem intrare, videtur probari, quia non impeditur ex parte deflorationis, & promissi matrimonij. his enim duobus iam satisfecit ducendo illam in vxorem, sicut de facto duxit: eo enim ipso quo matrimonium cum illa contraxit in facie Ecclesiæ, refarciuit infamiam fœminæ si quam contraxerat, talis enim infamia per matrimonium restauratur: & præterea quod attinet ad promissionem fœminæ factam de illa ducenda in vxorem, iam hoc promissum impleuit celebrato de facto cum illa matrimonio in facie Ecclesiæ. Secundo, non impeditur iste ab ingressu Religionis eo quod matrimonium de facto cum illa contraxit, quia cum post hoc matrimonium copula habita non sit, tale matrimonium non est dicendum consummatum, vt postea videbimus, sed solum fuit ratum, quod certissimum est non impedire ingressum Religionis.

1. Ante responsionem dubiorum præmitto, istud matrimonium, de quo agitur, ante quod præcessit copula illicita, sed post illud talis copula non intercessit, hoc inquam matrimonium non esse dicendum consummatum, sed tantum ratum. Probo euidenter, quia



matrimonium non consummatur per copulam antecedentem, sed per subsequentem, ut patet ex ipso verbo consummare: nam id consummat, & perficit rem aliquam, quod subsequitur, & ultimo loco succedit illi rei quam consummat, illi enim aduenit tanquam forma perficiens: forma autem est posterior materia. Quod suo modo potest etiam probari ex illo dicto Christi D. Ioann. 19. *Consummatum est*. Hoc enim non dixit nisi accedente ultimo opere suæ passionis subsequuto, ac perfecto. Secundo probō, quia illa copula præcedens hoc matrimonium fuit peccaminosa & peccatum, ut patet. Iam vero Sacramentum Matrimonij, quod est res sancta, & sacra, non debet perfici & consummari per peccatum, seu actum peccaminosum, qualis fuit illa copula præcedens hoc matrimonium. Cum ergo post hoc verum matrimonium copula non sit subsequuta, omnino dicendum est quod fuerit solum ratum, & non consummatum. Hoc posito.

Ad primum quæsitum dico, hunc in foro conscientie non potuisse licite post hoc matrimonium intrare Religionem. Probo, quia cum matrimonium huic fœminæ defloratæ promiserit, huic promissioni non satisfecit celebrando matrimonium ratum tantum, & illam statim relinquendo. Nam in contractibus verba sunt accipienda in significatione propria, & communi, ut omnes Doctores dicunt, & praxis obseruat, alias multe inconuenientia nascerentur: At in communi hominum usu & acceptione, quando alicui fœminæ promittitur matrimonium, non promittitur matrimonium ratum tantum, sed consummatum, per quod videlicet vir se obligat ad conuiuendum mulieri, ad eam alendam, illiusque necessitates subleuandas, quod non impletur per matrimonium solum ratum,

&amp;c

& statim Religionem ingrediendo. Et confirmatur, quia, vt Logici dicunt, nomen æquiucum, vel quodcumque aliud, stat pro significato principaliori: Cum ergo nomen matrimonij possit esse æquiucum ad ratum & confirmatum, si nomen matrimonij simpliciter pronuncietur, debet accipi pro consummato, quod est principale, & non pro rato solum. Et declaratur hoc exemplo. Nomen Religionis potest dici æquiucum ad Religionem propriam cum tribus votis in Ordine Mendicantium vel Monachorum, & ad Religionem Militarium sancti Iacobi, vel Alcantaræ, & similes, quæ non sic stricte obseruant tria vota sicut Mendicantes, & Monachales. Quis ergo dicet, quod promittens esse Religiosum, implebit votum intrando, & profitendo in Ordine Militari Diui Iacobi? Non, vtique, quia nomen Religionis stat pro significato principali, & magis vsitato, videlicet pro Religionibus strictissime sumptis non Militaribus. Et huius opinionis esse videtur Sanchez *lib. i. de sponsal. disp. 44. a num. 4. maxime num. 7.* vbi generaliter ait, quod in his casibus non satisfacit promissor si contracto matrimonio, non consummato, Religionem ingrediatur. Et probat, quia tale matrimonium in ordine ad promissum implendum est fere actus otiosus, & delusorius, maxime si ex defloratione præcessit infamia, quia si hæc præcessit, cum ingressu Religionis non restaurabitur, imo magis reuiuiscet, & confirmabitur.

3 Ad secundum quæsitum dico, quod si iste post illud matrimonium celebratum, illicitè in conscientia, Religionem approbatam intret, & in illa profiteatur, valida erit professio illius. Hæc probatur euidenter, primo, quia talis professio non erit irrita ex eo quod iste habeat debita, vel sit debitis obnoxius eo quod vir-

ginem deflorauit: ex hoc enim capite in rigore nihil illi debet restitutionis, quia illa sponte consensit sine vi, dolo, vel precibus importunis; scienti vero, & consensienti non fit iniuria, vt est communis Iuristarum sententia. Secundo, quia hoc debitum deflorationis non annullat professionem: nam licet Sixtus V. in sua Bulla particulari annullauerit professionem illius qui professionem emitteret habēs debita ciuilia. Clemens VII. postea hanc Bullam reduxit ad terminos iuris communis; & per ius commune professio habentis debita non est inualida, vt ego probaui in *meo primo tomo Dubiorum Regular.* verbo *Nouitij qualitates num. 19.* & tradit Sanchez *lib. 4. Decalogi cap. 19. à num. 2.* maxime *num. 19.* Secundo principaliter, ista professio non desinet esse valida ob matrimonium ratum, vt supra probatum manet *num. 1.* huius casus. At de fide est quod professio emissa post matrimonium ratum non consummatum est valida; vt definiuit Concilium Trident. *sess. 24. canone 6.*

4 Circa proxime dicta potest oriri nouum dubium, quod credo circa hunc casum contigisse. Videlicet an si iste qui sic contraxit matrimonium ratum ingrediat̃ Religionem approbatam, quidem, sed sit talis Religio, in qua post vota solemnia Religiosi possunt exire ab Ordine, per talem professionem dirimatur illud matrimonium præcedens ratum, ita quod taliter professus exiens ab Ordine non teneatur ad illud matrimonium redire? sit exemplum. Congregatio sancti Ioannis Euangelistæ in Portugallia, vulgo de sancto Eloi, *em Lisbod*, vel alia similis. Est Ordo approbatus ab Ecclesia, à quo tamen professi possunt sine peccato exire absque vllō vinculo Religionis postea manente. Quæris inquam an si aliquis Religiosus ex prædictis qui

qui post matrimonium solum ratum in aliqua Religione ex prædictis modo prædicto professus est, & postea à dicta Religione exiuit, vel expulsus est, fecerit professionem validam, per quam dissolutum sit præteritum matrimonium ratum, ita vt exiens ad illud redire minime teneatur? Respondeo, quod attinet ad professos dictæ Congregationis S. Ioannis in Portugallia, illos in illa Religione vere professos per talem professionem ita dissolvere præteritum matrimonium ratum, vt exeuntes postea ab Ordine, non teneantur ad illud redire. Probatur ex cap. vnico de voto, vbi ad dirimendum matrimonium duæ requiruntur conditiones, prima quod fiat votum in Religione approbata: Secunda quod sit professio vere constituens hominem Religiosum. At constat, quod dicta professio in Congregatione sancti Ioannis Euangelistæ est facta in Ordine approbato ab Ecclesia, & multis priuilegiis Pontificiis munito, & proinde constituit professos illius in vero statu Religioso: Ergo professio facta in illo dirimit omnino matrimonium ratum præteritum, etiam si taliter matrimonio rato copulatus postea à Religione exeat. Et quod taliter à Religione exiens postea non teneatur ad præteritum ratum matrimonium redire, probatur clare, quia obligatio semel extincta non conualescit, vt habetur l. qui res §. *Aream ff. de solut. & in Regulis iuris in 6.* & Nauarrus consilio Si de Regular. littera D. ergo si per professionem istius Religionis matrimonium ratum præteritum solutū fuit quoad vinculum matrimonij, tale vinculum iam extinctum per professionem, non reuiuiscet per exitum à prædicta Religione, vel ab alia simili à qua licitum sit post professionem exire. Et sic audiui iudicatum fuisse in isto Regno circa vnum Religiosum istius Regni.

Hoc tamen matrimonium non dissolvitur per vota simplicia emissã à Religiosis Societatis IESV finito biennio novitiatus, quia licet illa vota efficiant hominem vere Religiosum, iuxta Bullam Gregor. XIII. citatam à Sanchez *lib. 5. Decalogi cap. 1.* tamen cum non sint vota solemnia sed simplicia non habet vim ad dissolvendum matrimonium ratum præcedens, ut tradit Henríquez *tom. 2. sum. lib. 1. cap. 8. num. 7.* & idem tradit Sanchez *lib. 2. de matrimon. disp. 18. num. 6.* licet ibi dicat *num. 8.* probabilius esse quod per professionem solemnem in ordine Militari S. Ioannis Baptistæ dirimatur matrimonium ratum præcedens de quo non est mens disputare.

5. Ad primum argumen. initio positum in contrarium dicendum est talem ingressum Religionis non satisfecisse promissioni matrimonij, ac deflorationi mulieris per solum matrimonium ratum, tale enim matrimonium non intelligitur quando fœminæ promittitur matrimonium, maxime quando promittitur in recõpensam offensæ deflorationis, ut latius manet probatum supra *num. 2.* & ex ibi dictis patet solutio ad alia contenta in eodem 2. argumento; cumque per illud matrimonium promissioni non satisfecerit, sequitur quod licite Religionem non potuerit ingredi stante tali debito. Secundum argumentum nihil facit contra nos, confirmat enim responsionem ad secundum quæsitum.

CASVS

## CASVS X.

*De quodam defuncto mortuo in duello, & sepulto in loco sacro.*

**D**VO adolescentes cōdicto inter se duello, fuerunt ad locum pugnæ condictū, & euaginati gladiis vnus akeram lethali vulnere in pectore percussit, & affugit: percussus cadens in terram manus tetendit ad cælum, & pectus percussit, signa contritionis ostendit, sed ex defectu confessoris non fecit confessionem sacramentalem: & ita mortuus est. Parochus accepta informatione illū sepeliuit in loco sacro Ecclesiæ. Quæritur an parochus errauerit illum sepeliens in loco sacro, & vtrum pro illo possint Missæ celebrari?

Et quod pro illo missa celebrari non possit probatur primo, quia iste moriens in publico duello mortuus est excommunicatus per quatuor, vel quinque excommunicationes positas à variis Summis Pontificibus, & relatas à Comitolo *in summa Respons. Moralium lib. 6. q. 13.* & aliis. At orare non licet pro publico excommunicato oratione publica qualis est missa, iuxta communem sententiam Doctōrum, maxime D. Thom. 3. p. q. 79. art. 3. & alios. Secundo probatur quia hic mortuus fuit in peccato, mortuus est enim in duello prohibito lege naturali, & Ecclesiastica: pro illo autem qui moritur clare in peccato mortali orare non licet, vt habetur in cap. *Fures de furtis*. Et eadem argumenta similiter probare videntur non debuisse sepeliri in loco sacro. Et declaro, quod iste adolescens in illo articulo mortis petiuit confessionem.

1 His non obstantibus dico, & respondi potuisse pro anima illius Missas celebrari. Antequam hoc probem suppono, ut rem certam, nos non teneri euitare excommunicatum in communicatione rerum spiritualium, vel temporalium, nisi fuerit excommunicatus nominatim declaratus, vel notorius clerici percussor: sic definiuit Martinus V. in extrauagan *Ad exisanda*. quam refert Nauarrus in *summa latina* cap. 27. num. 35. & hodie est recepta communiter in praxi. Et ideo non tenemur euitare illum, qui publice quidem incurrit in excommunicationem, sed non est declaratus nominatim ab Ecclesia, dummodo non sit notorius clerici percussor: vnde à clerico scienter excommunicato possum valide recipere sacramenta dummodo non sit ille excommunicatus nominatim; vel notorius clerici percussor, ut Doctores communiter tradunt in materia excomm. licet ibid. dicant quod licet id non possim facere ut plurimum propter scandalum, vel propter caritatem proximi: constat vero quod iste mortuus in duello, de quo quæritur, licet mortuus sit in excommunicatione, non tamen fuit nominatim per Ecclesiam declaratus excommunicatus, imo fuit à parcho in loco sacro sepultus.

2 Hoc posito, probo argumento generali, quod pro illo possint Missæ celebrari: nam licet publice incurrerit excommunicationem, non tamen fuit nominatim declaratus excommunicatus ut patet, & pro excommunicato non declarato possumus orare ut dicunt Doctores mox citandi, neque hunc excommunicatum, nō denunciatum tenemur vitare in communicatione ritualium, vel temporalium: Secundo probo, sic non est mortuus clare in peccato mortali licet paulo ante mortem clare peccauerit mortaliter

Inter in actu duelli, tamen fini o duello ingemuit, pectus percussit dans signa contritionis, per quam contritionem mori potuit in gratia, iuxta illud, *In quacunque hora ingemuerit peccator. & iuxta illud Publicani pectus percutientis, ac dicentis, Deus propitius esto mihi peccatori*, propter quod descendit iustificatus: Cum ergo hic sit mortuus cum his signis contritionis, clare sequitur quod mortuus non fuit in claro peccato mortali, ac proinde poterit orari pro illo oratione publica. Ita sentit in terminis Nauar. in *sum. latina cap. 27. num. 36. vers. Ad secundum*, sic dicens. *Pro excommunicato non denunciato, nec notorio potest orari publice*: & ibid. ait cum D. Thoma, quod iste talis potest sepeliri in loco facto. Idem tenet ipse Nauar. *tom. 2. suorum operum cap. 19. de orat. concl. 6.* dicens quod excommunicato non denunciato potest applicari Missa. *Si ostendit signa contritionis, aut si mortuus est in iis ob quæ credo illum mortuum esse extra peccatum mortale.* Sic Nauar. Hic vero mortuus est cum signis morientis extra peccatum, vt tenet Reginald. *tom. 2. sua sum. lib. 32. tract. 1. sect. 2. num. 76.* vbi ait, quod possunt celebrari diuina pro illis qui excommunicati ex hac vita decesserunt cum signis contritionis, ob quæ merito creduntur mortui extra peccatum M. & citat Nauarrum. Idem tenet Henric. *tom. 2. sum. lib. 9. cap. 15. num. 3.* citans prædictam extrauagantem Martini V. & Nauarr. & dicit esse opinionem aliorum Recentiorum; verba Henriquez sunt hæc. *Imo si publice denunciatus non sit (qualem vitare iubet Concilium Constantiense) posset pro illo sacerdos accepta stipende offerre Missam.* Quo nihil clarius desiderari potest. Et omnes hi tam graues Doctores fundantur in cap. à nobis il. 2. de sentent. excomm. vbi Papa Innocent. III. loquens de excommunicato nominatim declarato, qui mortuus



mortuus est in excommunicatione absque absolutione, sed cum signis contritionis, dicit Papa quod talis excommunicatus etiam post mortem potest absolui ab excommunicatione quoad effectum sepulturæ sacræ, & ut possint fideles orare pro ipso. Et quod ibi loquatur Papa de mortuo excommunicato declarato constat ex textu in fine capituli, ubi Papa dicit quod ut iste Clericus absolvatur servetur forma Ecclesiæ cum Psalmo Pœnitentiali, & oratione Dominica & aliis consuetis: quæ forma absolvendi non adhibetur ab Ecclesia nisi in absolutione excommunicati declarati si ergo Ecclesia utitur illa benignitate cum excommunicato declarato ut possit orari pro illo; quomodo non utetur cum isto non declarato cuius communicationem non prohibet in vita, & mortuus est cum signis contritionis?

3 Quod vero parochus non errauerit dando illi sepulturam sacram, ultra quod id asseritur in terminis à Nauar.*cit. num. 36. sum. cap. 27.* cum D. Thoma: probatur etiam ex iis quæ tradit Nauar.*lib. 5. consil. tit. de sent. excom. cons. 24. num. 3.* ubi dicit, quod si prælatus posuerat excommunicationem in generali in quodam capitulo Canonorum, ligantem quemvis Canonicum qui certum crimen commiserit (quæ excommunicatio valet) ait Nauarrus, quod si quidam Canonicus illius capituli, qui tale crimen antea commiserat, mortuus sic fuit, potuit sepeliri in loco sacro, & rationem reddit, quia non fuerat nominatim declaratus: & citat eandem Extrauag. Martini V. quod clare inferuit ad casum præsentem. Nam licet hic excommunicatus de quo agimus, mortuus fuerit excommunicatus per excommunicationem generalem Ecclesiæ positam contra acceptantes duellum, non tamen fuit ante declara-

tus

tus per aliquem prælatum Ecclesiæ.

4 Obiicis Concilium Tridentinum *sess. 25. cap. 19. de reform.* iubet vt moriens in duello non sepeliatur in loco sacro in pœnam delicti; ergo licet iste non fuerit declaratus excommunicatus, nihilominus debet carere Ecclesiastica sepultura, iuxta prædictum Tridentini decretum. Respondeo prædictam legem Tridentini esse pœnalem, vt patet, & proinde stricte intelligendam prout verba sonant. Cum ergo dicat priuandum esse sepultura Ecclesiastica morientem in duello, videtur in illa non comprehendi hunc, de quo agimus, quia non est mortuus in duello, sed finito duello, & mortuus est cum signis contritionis. Et præterea loqui, videtur Tridentinum de illo qui moritur in duello cum claro peccato mortali sine signis contritionis, hic vero obiit cum signis contritionis.

5 Ex his facile soluuntur omnia argumenta posita in principio pro parte contraria: Dicendum enim, quod licet hic mortuus fuerit excommunicatus, non tamen fuit declaratus nominatim, & præterea mortuus est cum signis contritionis; pro tali vero sic moriente potest Missa celebrari, illique potest Ecclesiastica concedi sepultura, iuxta tres graues Doctores supracitados, & Extrauagantem Martini V. Facit adhuc pro isto casu quod tradit Nauar. *consil. 4. de sepult.* vbi ait sepeliendam fuisse in loco sacro fœminam inhonestam, quæ inuenta est mortua in domo sui amazij variis confecta vulneribus. Non enim constat quod illa mortua fuerit in ipso actu inhonesto, sed credi potest quod Amazius illam occidit extra illum actum ob aliam causam diuersam: & quod illa moriens potuerit nomen Iesu inuocare, ac de peccatis præteritis dolere: Adhuc pro isto casu, & quomodo aliquis dicendus sit excom-

excommunicatus declaratus, videri potest Zerola 1; *par.praxis.verb. Excommunicatio. §. Tertium dubium.* vbi bona dicit ad intentum.

6 Obiicis, ex dictis sequi posse aliquem in excommunicatione mortuum, & ab illa non absolutum gloriam intrare, quod videtur inauditum. Probatur sequela, nam iste mortuus clare excommunicatus propter duellum, non fuit absolutus ab ista excommunicatione per confessionem sacramentalem, vt dictum est in informatione. Item contritio vera si illam habuit, non tollit excommunicationem, quia hæc non tollitur nisi per absolutionem datam à potente absoluere, & nemo potest absoluere se ipsum: & nihilominus dicis offerri posse Missas pro ipso, quibus liberetur à pœnis purgatorii, ergo ab illis liberatus per Missas, & suffragia, poterit intrare gloriam ab excommunicatione non absolutus. Respondeo concedendo sequelam posse videlicet aliquem intrare gloriam cum excommunicatione à qua non fuit absolutus, quia tamen aliàs exstebat in gratia: quod non esse impossibile ostendo hoc exemplo probante, quod excommunicatus actualis possit esse in gratia. Nam si quis post incursum excommunicationem vera contritione pœniteat, & proponat procurare absolutionem, statim manet in gratia, cum vera contritio statim peccatum aboleat, & reponat in gratia, vt est de fide: vbi vides gratiam simul esse posse cum excommunicatione; vnde si talis tunc moriatur in gratia non habens copiam confessoris ad absoluendam excommunicationem, eo non obstante saluabitur. Addo aliud exemplum. Misit quis nuncium in Indiam, qui ibidem Clericum occideret. Antequam nuncius ad Indiam perueniat, & mandatum exequatur, mandans resipuit, doluit, confitetur sacramentaliter,

ter, reponitur in gratia de peccato præterito, nec potest via humana mandatum reuocare: post illum repositum in gratia, mandatarius in India occidit Clericum, & ex tunc mandans incurrit excommunicationem canonis *si quis suadente*. vt omnes concedunt, quia hanc non incurrit ante factam occisionem; vnde constat posse excommunicatum esse in gratia, imo & posse existentem in gratia incurrere excommunicationem ob peccatum præteritum. Et datur ratio adhuc efficacior, & clarior. Nam excommunicatio maior solum efficit, & impedit ne excommunicato dentur Sacramenta, vel ne illa ministret, solumque tollit receptionem Sacramentorum, non vero tollit gratiam directe; effectus enim proprius excommunicationis non est tollere gratiam directe, sed Sacramenta. Si ergo quis existens in gratia per contritionem veram, & simul excommunicatus moriatur in gratia, saluabitur, quia moriens in gratia, non indiget Sacramentis quoad esse si illa aliàs recipere non potest. Ergo non est inauditum, neque implicat contradictionem aliquem saluari ab excommunicatione non absolutum.

---

### CASVS XI.

*De quodam officio Lectoris prouiso à prelato contra  
formam edicti propositi, vt oppositores  
examinarentur.*

**I**N certa religione est statutum, vt officium lectoris Philosophiæ prouideatur per concursum oppositorum examinandorum per tres, vel quatuor Patres, qui

facto examine suffragentur pro digniori, eidemque officium lectoris conferatur. Publicato edicto Petrus cum aliis se opposuit, & facto examine, per suffragia electorum fuit electus ad officium lectoris: antequam electio publicaretur, Petrus rei ignarus, dixit praelato se renunciare, ac desistere à præfatione talis officij. Prælati non acceptavit renunciationem, seu desistentiam, imo illi dixit quod erat electus ad officium per suffragia examinatorum: propter quod Petrus prælati gratias egit, manum ipsius osculatus. Hoc non obstante postea prælati illud officium lectoris non dedit Petro, sed alteri, qui per examen non se opposuit, nec fuit examinatus iuxta Ordinis statutum, sed tamen iam in Ordine fuerat lector Philosophiæ per tres annos.

Quæritur utrum Petro excluso ab hoc officio lectoris facta fuerit iniuria, & proinde possit à prælati appellare, & petere restitutionem? & an potuerit officium licite dari illi antiquo lectori, qui per examen non concurrat cum aliis?

Ad hæc omnia respondeo per dicta sequentia. Quod iniustitia facta est Petro excluso ab officio: & proinde currit obligatio illud eidem restituendi, & ex consequenti non potuit illud conferri antiquo lectori non examinato. Hæc conclusio est D. Tho. Alberti Magni Scoti, Ricard. Pallud. & aliorum multorum, quos citat, & sequitur Rabello *de oblig. inst. tom. 1. lib. 3. q. 1. fol. 145.* qui omnes dicunt, quod publicato edicto ut qui voluerit se opponat officio, vel beneficio per examen, prælati, vel præses oppositionis tenetur de iustitia illud conferre digniori ex illis qui se opposuerunt, & fuerunt examinati In cuius probationem adducit multas rationes: præcipua illarum est, quia proposito edicto ut quis se opponat, & quicumque voluerit examinetur,

netur, ex tali edicto resultat contractus iustitiæ commutatiuæ inter iudicem præsidem, & oppositores, per quem prælatus ex contractu iustitiæ obligatur stare promissis: & vocat Rabello hunc contractum, Facio vt des, idest, oppositor legit in publico, subiitque examen vt ob hæc illi daretur officium, si dignus inueniretur: At contractus iustitiæ commutatiuæ in re graui (vt est iste) non solum obligat in conscientia vt impleatur, sed etiam obligat ad restitutionem si non impleatur, vt communis Doctorum sententia tenet in materia de restitutione. Si vero respondeas, quod inter prælatum & subditum non cadit obligatio iustitiæ, eo quod subditus non habet velle, aut nolle, nec habet dominium alicuius rei ratione, cuius possit obligare prælatum de iustitia: Respondeo duo. Primum est, quod licet ob dictam causam prælatus non possit obligari de iustitia proprie loquendo obligari tamen potest subdito naturaliter in conscientia ad seruandum pactum initum cum subdito: ad eum modum quo Dominus, licet de iustitia non possit obligari seruo, potest tamen illi obligari naturaliter in foro conscientiæ ad seruandum pactum cum seruo initum in re graui: & quod prælatus possit obligari subdito in foro cōscientiæ ciuilitè tenet clare Sanch. tom. 2. *Decalog. lib. 7. cap. 8. num. 17.* citans Abbat. Nauar. Rodrig. Rabel. & alium Secundo dico, quod ad maiorem huius rei obligationem in hoc casu facit, quod iste prælatus vltra obligationem in foro conscientiæ ob proxime dicta, obligatur etiam ex statuto Ordinis allegato, quod iubet officium dari digniori opposito, & examinato: prælatus autem inferior non potest dispensare in statuto generali Ordinis, vt suppono.

2 Secundo, ex dictis sequitur, non potuisse hunc præ-

latum hoc officium lectoris dare illi alteri, qui non se opposuit per examen, licet aliàs esset dignior Petro, & licet esset sufficientior ad lectionem, eo quod iam fuerat lector Philosophiæ. Probo quia iste qui se non opposuit per examen, non habet ius ad hoc officium, neque inter illum, & prælatum interuenit contractus supradictus natus ex oppositione, & examine, sicut interuenit inter Petrum, & prælatum: hoc vero officium non est conferendum ob maiorem sufficientiam cuiuscunque sed ob maiorem sufficientiam illius qui se opposuit virtute edicti publicati, quia cum hoc solo initum est pactum, & non cum illo sufficientiori, qui non subiit examen. Et confirmatur ex praxi Academicarum. Si enim vacante cathedra Conimbricæ, & posito edicto, duo vel tres tantum se opponant cathedræ, & post lectionem, & examen veniat alius sufficientior quidem illis tribus oppositis, & sine examine transacto tempore edicti petat sibi cathedram concedi eo quod sit clare sufficientior aliis, numquid audietur, vel ius aliquod ad cathedrâ habebit? Minime certe. Quod idem in isto casu locum habet. Hoc ipsum confirmat Rabello *citata q. 5.* citans Nauarrum dicentem, esse inauditum in Ecclesia quod aliquis quantumvis dignior habeat ius iustitiæ ad aliquod beneficium nisi per oppositionem, aliumve titulum ut ei beneficium conferatur. Ille autem alius pater, qui iam lector fuerat Philosophiæ, propter illam lectionem solam præteritam non habet titulum, vel ius vllum ut sibi conferatur secundo hoc lectoris officium, cum id in nullo Ordinis statuto decretum sit, ut antiquus lector philosophiæ obtineat denuo officium vacans eiusdem Philosophiæ. Et probatur amplius ex eo quod ait Rabello *cit. q. 5.* Quarto, ubi ait cum Soto, Nauar. & Lædesm. quod

scho-

scholaſtici, qui vacante cathedra eligunt aliquem extra oppoſitores examinatos, peccant, & tenentur reſtituere prædictis oppoſitoribus digniori videlicet inter illos, ſi cathedram non obtinuit. Quod facit nimis ad iſtum caſum; quia dantes ſuffragium in cathedris ſunt fere iudices partiales illius cauſæ, & proinde peccant dândo ſuffragium illi qui ſe non oppoſuit.

3 Hinc clare ſequitur quod Petrus, de quo agitur, qui ſe oppoſuit, & pro quo maior pars electorum ſuffragata fuit, habet ius vt in iudicio poſtulet reſtitutionem officij denegati circa quod habet ius ad rem. Et probatur, quia habere ius ad rem eſt habere actionem ad petendum in iudicio, id quod eſt debitum ex contractu, vel ex aliqua lege. Petrus vero iſte qui ſe oppoſuit, & habet maiorem partem examinantium, ſeu ſuffragantium, habet actionem ad petendum hoc officium tum ex contractu nato ex poſito edicto, tum ex lege, ſeu ſtatuto Religionis decernente vt ſibi detur.

4 Neque obſtat renunciatio, ſeu deſiſtentia quam antea Petrus fecit coram prælato circa id officiũ: nam prælatus illam non acceptauit, & renunciatio non acceptata nõ ſortitur effectum vllum vt præxiſ communis obſeruât, & dato quod prælatus acceptaret renunciationem factam antequam examinatores darent ſuffragia, & nihilominus poſtea conſentiret vt ſuffragatores libere darent ſuffragia, illaque darent Petro eidem, iam prælatus per hoc factum renunciauit acceptionem renunciationis ante acceptatæ, & Petrum rehabilitauit ad ſuffragia pro illo ferenda, & ad officium obtinendum. Probo quia prælatus conſentiens vt ſuffragia darentur pro illo, fecit actum contrarium illi, quem antea fecerat acceptando renunciationem, & in ſubſtantia dixit per hoc factum ſe non acceptare.



renunciationem præteritam. Probo, quia faciēs actum contrarium in iudicio, videtur renunciare vt patet ex *l. ad solutionem Cod. de re iudic. & cap. cum venissent de testib. & cap. solitudinem de appellat.* & tenent multi Doctores citati à Brunoro in  *suis locis commun. ver. Actus num. 3.* qui sunt Felin. Dec. Roman. Craueta, Ruin. & alij. At prælatus iste consentiens vt suffragia darentur Petro fecit actum contrarium præteritæ acceptationi renunciationis. Maxime cum constet, quod iam Petrus habebat pro se suffragia quando renunciavit. & renuntiatio nō fuit acceptata: imo osculata manu prælati acceptauit officium. Confirmatur exemplo. Communis opinio docet, quod si subditus habet irregularitatem, in qua Prælatus potest dispensare, sitque irregularitas nota Prælato. Et Prælatus dicat subdito vt vadat ad ordines recipiendos non declarans quod dispensat in irregularitate: nihilominus eo solo dicto, vel facto censetur dispensare cum subdito, quia non requiritur, quod dispensatio fiat verbis. Ita Suarez *tom. de censur. disput. 41. prope finem*, citans vnam glossam Syluest. Nauar. Maiolum, & alios. Quod facit ad istum casum: nam dato quod Petrus de quo agitur, renunciauerit ante data sibi suffragia, & sic maneret inhabilis ad officium: cum tamen Prælatus id sciens consenserit vt suffragantes illi darent suffragia, per hoc suum factum rehabilitauit illum, & renunciavit acceptationi renunciationis Petri antea factæ: & confirmatur omnino ex *cap. 2. de Renunciat.* vbi dicitur renunciantem suo beneficio cum iuramento posse illud iterum obtinere si eligatur à maiori parte capituli, quo nihil clarius considerari potest.

Vltimo dico quod à dicto Prælato potest clare Petrus appellare ad superiorem, cum probatum sit sibi claram

claram illatam esse iniuriam, & grauamen in re notabili, quæ est clara materia, & causa appellandi, vt colligitur ex iure in titulo de appell. Addo quod iste Prælatus dare non poterat hoc officium lectoris illi patri qui quondam fuerat lector Philosophiæ ante hoc editum oppositionis publicatum; nam statutum Ordinis obstat, in quo decernitur, quod collatio istius lecturæ fiat per oppositionem præcedente edicto.

## C A S V S XII.

*De quodam Clerico causante abortum fœmina.*

**Q**uidam Clericus beneficium habens Ecclesiasticum, consilium dedit vt fieret abortus cuiusdam fœminæ tempore quo fœtus nondum erat animatus: sed culpa mandatarij, vel consilium petentis, factus est abortus fœtu iam animato. Hoc posito, quærentur tria, vel quatuor.

Primum, an iste clericus incurrerit irregularitatem, eo quod abortus reuera factus est fœtu iam animato?

Secundum. An dato, quod irregularitatem incurrit, possit retinere suum beneficium secunda conscientia?

Tertium. Quis possit dispensare cum illo supposito quod incurrerit irregularitatem, ob homicidium voluntarium?

Quartum. Quæritur, si iste Clericus præter abortum, ad susceptionem Ordinum, vel ad beneficium acquirendum, prius munera dedit illis qui pro illo ad hæc duo intercederent, incurrit simoniam, ac pœnas

impositas simoniacis: & an possit beneficium retinere, eiusque fructus licite sumere?

**I** Quoniam ex humana malitia, vel fragilitate casus iste abortus non raro contingit, & circa tempus quo foetus animatur irrepsit vulgaris; sed non vera opinio, visum fuit ante responsionem dubiorum præmittere hanc breuem aduertentiam pro decisione similium casuum. Igitur vulgare dictum est quod anima masculi infunditur quadragesima die post coitum: anima vero feminae die octuagesima, & ex hac regula volunt deducere an fuerit animatus fetus pro euadenda irregularitate Dico igitur hoc vulgare dictum esse falsum. Prima enim opinio est, quod anima masculi aliquando formatur die 30. aliquando 35. aliquando 40. aliquando 45. & anima feminae inducitur aliquando die 45. aliquando 50. & hoc secundum minus probabilem opinionem Leuinij cap. 11. verior autem opinio Medicorum est, quod corpus masculi formatur vt longissime die trigesima: feminae vero corpus vt longissime formatur die quadragesima secunda: sic expresse tenet Hypocrates Medicorum princeps, *libro de natura faetus nu. 10.* & id probat ex purgatione mulieris, quæ post partum masculi durat triginta diebus, & post partum feminae durat 42. diebus vt longissime. Cum Hypocrate tenent Lessius *lib. 2. cap. 9. dubio 10. num. 65.* & Cornelius *super Penthat. ad cap. 12. Leuitici*, ad illa verba: *Sin autem femina pepererit.* Et hæc sententia Hypocratis tenenda est: Ideoque pro fabula reputandum est quod animæ feminae infundantur die 80. & ultra rationem medicam Hypocratis, ratio ipsa videtur id persuadere: Cum enim corpus masculi, & feminae sint eiusdem speciei, quæ causa poterit intercedere vt anima feminae in duplo tardius infundatur quam anima masculina

Cum

Cum ergo ad euadendam irregularitatem tutior pars sit eligenda, ac facienda maior diligētia, quæ fieri possit ut procurans abortum se credat liberum ab illa, solos triginta dies à coitu debet numerare, quia in hoc trigesimo die anima masculi infunditur: quamuis vero anima fæminæ infundatur die quadragésima secunda ut longissime, iuxta Hypocratem, quia tamen procurans abortum nescit an fætus sit masculus, an fæmina, se debet reputare irregularem, si post dies triginta illud causauit delictum; nisi forte ex materiæ eiectione constaret clare fætum esse fæmineum. Quamuis enim in aliis irregularitatibus in dubio nemo se debeat reputare irregularem, in materia tamen homicidij (qualis est abortus fætus formati) tenetur in dubio quis se reputare irregularem, ut probat Sanchez *libro primo Decalogi cap. 10. nu. 43.* citans graues decem Doctores.

2 Hoc posito dico ad primum quæsitum, quod iste Clericus incurrit irregularitatem propter causatum abortum modo prædicto. Probo primo, nam licet consilium dederit ante animationem fætus, hoc illum non excusat: nam adhuc fuit causa illius homicidij saltem indirecte ob consilium datum, mulier enim ex ipsius consilio abortum fecit; licet quoad tempus dilataisset: omisit enim Clericus aduertere fæminam, illique efficaciter suadere ne post fætus animationem illum causaret. Imo addo quod licet hanc aduertentiam obnixe faceret, & nihilominus fæmina excedens consilium abortum faceret post fætum animatum adhuc clericus diceretur causare homicidium & esset irregularis. Probo *ex cap. vlt. de homicid. in 6.* vbi Papa decernit esse irregularem illum qui mandauit seruo, vel amico ut flagellaret certum hominem expresse cauēs, & aduertens ne illum occideret: Seruus autem excedens mai-

datum illum hominem interfecit. Ait Papa taliter mandantem incurrisse irregularitatem: quia ut ait in textu: *in mandato fuit in culpa, & hoc euenire posse debuit cogitare.* Quod proprie facit ad casum istum: nam Clericus iste nec monuit faminam ut homicidium caueret, & licet admoneret, debuit cogitare, hoc potuisse euenire, cum famina imprudenti, & indiligenti negotium tale committeret. Probatur etiam ex cap. *Sicut ex literarum. de homic.* ubi Papa declarat fuisse irregularem quendam Religiosum, qui cuidam famina, quam ille grauidam effecerat per zonam arripuit quasi ludens, & illa ex tali motione fecit abortum, si fetus erat animatus. Probatur etiam ex iis, quæ tradit Suarez *tomo de censuris disp. 65. sect. 2. num. 6. §. Quoad hoc*, ubi probat incurrire irregularitatem homicidij casualis non solum illum qui directe consulit homicidium, sed etiam illum, qui facit aliquam actionem iniuriosam vnde sequitur homicidium: Hic vero Clericus fecit actionem iniuriosam dando consilium, ex quo secutum est homicidium. Et citat Suarez textus, & Doctores. Adde, quod iste dando tale consilium, dedit operam rei illicitæ, & occasionatæ ad homicidium, ut patet: qui vero dat operam rei illicitæ, ex qua sequitur homicidium, est irregularis, licet non intendat homicidium, ut tenent communiter Doctores, maxime Reginald *tom. 2. lib. 30. tract. 2. cap. 10. num. 113. & seqq.* Probatur insuper ex eo quod retulimus supra ex Sanch. *num. 1. istius casus* quod ibi vide.

2 Ad secundum quæsitum dico, hunc Clericum per tale homicidium, & irregularitatem non amisisse beneficium iam acquisitum, nec fructus illius: quia secundum probabiliorem Doctorum opinionem irregularitas contracta post obtentum beneficium, non priuat

priuat beneficio, nec fructibus illius: sed solum impedit receptionem sacrorum Ordinum, vel exercitium illorum. Sic tenet Nauar, *in summa lat. cap. 27. num. 49.* & Suarez *tom. de censur. disp. 4. sect. 2. à num. 14.* maxime *num. 22.* vbi citat text. gloss. & Doctores. Sequitur Reginald. *tom. 2. lib. 30. tract. 2. num. 10.* & alij multi. Huius ratio est, quia irregularitas ex sua natura, & intrinsece non priuat nisi receptione sacrorum Ordinum, & vsu illorum, vt patet ex definitione irregularitatis: At beneficium Ecclesiasticum, neque est Ordo sacer, neque vsus illorum: imo haberi potest à Clerico non habente Ordines sacros. Cum ergo irregularitas non priuet beneficio, poterit hic Clericus suum beneficium retinere, ac proinde licite illius fructus possidere, & insumere, iuxta Suar. *cit. num. 22.* & Sanchez citato loco. Licet autem dictum beneficium, & fructus possit retinere, bene tamen aduertit Suarez *cit. disp. 40. num. 16.* hæc sequentia. Primum, quod si beneficium est simplex cum sola obligatione recitandi horas canonicas, vel est beneficium, quod habet simplex ministerium quod potest ministrari per alium, talis beneficiarius existens irregularis, non tenetur dimittere beneficium quia potest seruire dicto beneficio per se solum, dicendo horas canonicas, vel per alium non celebrando Missam, vel vtendo Ordinibus sacris. Si vero beneficium habet curam animarum, vel requirit personalem residentiam cum vsu Ordinum sacrorum, tunc non potest retinere, nec inservire dicto beneficio, quia irregularis existens non potest sacros Ordines exercere: sed debet vel beneficium dimittere, vel quanta poterit diligentia procurare dispensationem irregularitatis cum moderatione sequenti.

- 4 Moderatio vero est, quod si talis irregularis timet, quod

quod ex eo quod abstineat à Missâ, vel ab exercitio ordinum, delictum suum manifestabitur, & incidet in notabilem populi infamiam, poterit præmissa prius sacramentali confessione delicti Missam celebrare ad euitandam infamiam, vel Ordines sacros ad eundem finem exercere, sed hoc solum illis vicibus in quibus necessarium sit vitare infamiam. Et celebrans cum isto moderamine non peccabit, nec pœnam aliquam incurret. Sic tenet Rodrig. *in sum. cap. 179. num. 11. conc. 6.* citans Nauar. Castro, Gutier. & tenet Suarez *cit. loc. num. 19.* & hoc dummodo in dispensatione procuranda negligens non sit; suæ vero conscientiae remittitur arbitrari an non celebrans incurrat infamiam, & vtrum in procuranda dispensatione negligens sit. Et addit Suarez, quod si voluerit beneficium renunciare, valida erit renunciatio. Ratio prædictorum tradita à Rodrigu. est communis, quia præceptum naturale de conseruanda fama præponderat præcepto positivo Ecclesiæ, quo iubet ne irregularis sacros Ordines exerceat: hoc enim præceptum non obligat cum damno notabili infamiæ.

§. Ad tertium quæsitum dico, Episcopum istius Clerici posse cum illo dispensare in ista irregularitate. Probo, quia licet Concilium Tridentinum *sess. 24. cap. 6. de reformat.* concedens Episcopis amplam dispensandi facultatem in irregularitatibus excipiat, dummodo non sit homicidij voluntarij; irregularitas istius Clerici non fuit homicidij voluntarij, dans enim consilium abortus ante fœtus animationem clare videtur quod homicidium non intenderit, sed solum voluit quod abortus fieret tempore, quo non fiebat homicidium. Cum ergo homicidium istius Clerici solum fuerit casuale, poterit Episcopus ex commissione Trid. cit. loco facta

facta, cum illo dispensare: quod vero hoc homicidium non fuerit voluntarium, probatur ex definitione homicidij voluntarij posita à Suarez *tom. de censur. disp. 64. sect. 1. num. 3.* collecta ex Tridentino, vbi dicit, homicidium voluntarium esse illud quod fit ex proposito: & ait illud fieri ex proposito quod fit cum animo occidendi, & addit quod ius ciuile vt aliquod homicidium sit voluntariū, requirit dolum: quæ duo defuisse videntur in hoc abortu. Sed in hoc standum est conscientia ipsius Clerici informantis de animo quem habuit dando consilium. Si enim clare habuit animum non cau- sandi abortum fœtus animati, non fuit homicidium voluntarium. Secus si animum habuit contrarium. Cum ergo vt suppono, hoc homicidium fuerit solum casuale, & occultum, non deductum ad forum contentiosum, poterit Episcopus dispensare iuxta concessio- nem Tridentini citatam. Potest etiam in hac irregula- ritate dispensare Commissarius Generalis Cruciatæ iuxta Rodrigez in *Addit. Cruciatæ Additione ad §. 13. num. 1. & m. 6.* vbi dicit quod Bulla plumbea commis- sionis illius hoc illi concedit, etiam si homicidium ca- suale publicum fuerit: sed hoc dictum Rodriguez in- telligitur pro solo regno Castellæ. Commissario enim Portugalliæ in sua Bulla non concedit pro homicidio casuali. Sed Episcopus solum potest quando est secre- tum.

6 Quartum quæsitum de simonia, plures ac maio- res inuoluit difficultates, & ideo dico primo, absque dubio istum Clericum commisisse simoniam, illiusque pœnas incurrisse, si munera dedit pro sacris ordinibus accipiendis, vel pro beneficio impetrando: hæc est adeo certa vt probatione non indigeat, habetur clare *1. qu. 1. cap. Ordinationes.* & alibi sæpe. Excipitur cū da-

tur



tur aliquid temporale post obtentum iam beneficium, vel post acceptatos Ordines sacros animo solo gratificationis, vt tenet Nauar. *in sum. cap. 25. num. 68.* quod non videtur in hoc casu interuenisse: sed vt dicitur in informatione data sunt hæc munera ante susceptionē Ordinum & beneficij, & cum animo hæc impetrandi. Quod vero simonia committatur etiā dādo aliquid temporale alicui vt intercedat pro ordinibus sacris, vel beneficio impetrandis, tenet expresse Nauar. *lib. 5. consiliorum. tit. de simonia. conf. 46.* quamuis ibidem dicat non esse simoniam dare aliquid famulo vel amico illius, qui Ordines, vel beneficium debet conferre: dūmodo non det vt hæc impetret, sed vt litteras executionis, vel collationis citius expediat, vel se certiolem faciat de statu negotij. Denique probatur hoc per Extrauag. Greg. XIII. *de datis, & promissis. contra simoniacos.* quam citat Nauar. *in cons. cit.* Idem tenet Nauarr. *in lib. 3. consil. tit. de prob. conf. 54. num. 2.* vbi dicit, quod in simonia, paria sunt dare aliquid collatori beneficij, vel illi qui sit causa collationis, vel renunciationis, & citat Innocentium receptum communiter.

7 Hoc posito certissimum est per multos textus, & Bullas Pontificias, præcipue Sixti V. Greg. XIII. & Pauli II. & aliorum, quod simoniacus verus, & realis incurrit pœnas sequentes, videlicet excommunicationem, irregularitatem, priuationem beneficij, & inhabilitatem ad quodcunque aliud beneficium obtinendum, & suspensionem. Videatur inter alios Suar. *tom. 5. de censuris. disp. 31. sect. 4. à num. 23. vsque ad 46.* & Rodrig. *in sum. tom. 2. cap. 56. conc. 6.* & hæ pœnæ imponuntur simoniaco, tum in Ordine, tum in beneficio. Quod vero attinet ad absolutionem, vel dispensationem cum simoniaco in prædictis. Dico sequentia.

8 Primo ab excommunicatione simoniaci potest absolui per Bullam Cruciatæ, vt tenet Rodriguez *in explicatione Cruciatæ* §. 13. num. 3. Nota. citans Nauarrum, & hoc dicit posse fieri semel in vita, & in hora mortis. Secundo in irregularitate, inhabilitate & cæteris, non potest dispensare Commissarius Cruciatæ teste Rodriguez *cit. num. 3. & in addit. ad Cruciatam ad §. 9. nu. 7.* sed poterit in his omnibus dispensare Episcopus si crimen sit secretum, ex commissione supra citata Tridē-  
tini, vt sentit idem Rodriguez *Addit. ad summam* tomo 4. cap. 1. §. 9. & fauet Nauarrus *lib. 5. consiliorum titulo de simon. consilio 4. num. 2.* dicens, quo ad remedium simoni-  
niaci occulti, Episcopus quatenus opus est secreto illi conferat beneficium, & loquitur de impetrante bene-  
ficio per simoniam. Et quod possit Episcopus dispen-  
sare in his prædictis faciunt multa, quæ tradit Sanchez *lib. 2. Decalogi cap. 11. à num. 12. vsque ad num. 14.* Aduer-  
to etiam cum Rodriguez *tomo 2. summa verbo simonia* cap. 56. §. Lo sexto, & communj Doctorum, illum qui  
obtinuit beneficium per simoniam teneri etiam in fo-  
ro consciētiae, statim illud renunciare, & fructus etiam  
perceptos: quod intelligitur nisi statim obtinuerit di-  
spensationem ad illud retinendum cum rehabilitatio-  
ne ad ipsum: sed quo ad restitutionem fructuum stan-  
dum erit determinationi Episcopi.

9 Vltimo pro remedio adhuc istius delinquētis ad-  
uerto illum potuisse excusari ab incurfione harum pœ-  
narum, primo si quando illa munera donauit fecit bo-  
na fide, nullo modo aduertens illud esse simoniam, vel  
quoduis aliud peccatum: Nam pura, & totalis inaduer-  
tentia, seu inconsideratio excusat à pœna legis, idem  
dic de ignorantia inuincibili. Ita Suarez *tomo de censu-  
ris disputatione 4. sect. 8. num. 11. & num. 19.* & Vasquez

*tomo primo super 12. disputatione 107. cap. 3. mem. 8. de qua ignorantia inuincibili standum erit conscientie delinquentis, & qualitati personæ illius: Difficile enim est hodie inueniri ignorantiam inuincibilem in re tam quotidiana, & tam prohibita: faciliusque in hoc credi poterit omnimoda inconsideratio, quam ignorantia inuincibilis: Differunt enim inconsideratio, & ignorantia. Et ratio huius est, quia si inconsideratio, vel ignorantia inuincibilis excusauit à culpa in foro conscientie, etiam excusauit à pœna; quia culpa, & pœna sunt correlatiua, & ubi culpa non est, pœna non debet irrogari in foro saltem conscientie, de quo hic agimus. Secundo modo posset excusari hic Clericus à simonia dando illa munera, si non dedit principaliter ad ordines, & beneficium impetrandum, sed principaliter dedit ob amicitiam, vel ob gratificationem alterius beneficij iam recepti: licet minus principaliter dederit etiam ob illa duo impetranda. Ita Nauar. in citato titulo de simonia consilio 23. num. 4. & alij. Sed hæc etiam excusatio rara est, & difficile in praxi consueta. Quisque viderit examen suæ conscientie.*

---

### CASVS XIII.

*De alio abortu causato à quodam Religioso sacerdote.*

**Q**uidam Religiosus causauit abortum fatus animati: fuit absolutus ab excommunicatione, & à peccato per potentem absoluere: sed in irregularitate non fuit dispensatus, vel quia non est ausus se prodere prælato, vel non credebat in illa posse prælatum dispensare

spensare. Celebrauit missas pro vt occasio, vel necessitas se offerebat: postea tortus scrupulo, vult agere de remedio. Quæsitæ sunt sequentia.

Primum, an suus Prouincialis, vel etiam prælatus localis possint cum ipso dispensare in dicta irregularitate?

Secundum, an dato quod prælatus conuentualis possit dispensare, possit id committere alicui alteri confessori vt cum ipso dispense?

Tertium, an si iste Religiosus sic irregularis, fuit præsens in aliquo capitulo etiam conuentuali, in quo Prouinciales absoluunt præsentem in generali, & cum illis dispensant in communi, censendus sit talis Religiosus dispensatus per illam dispensationem generalem?

Quartum, an prædictus Religiosus post legitimam dispensationem obtentam, debeat ratificare omnes confessiones quas fecit in irregularitate existens?

1 Ante responsionem dubiorum suppono, quod Prouinciales, & prælati locales conuentuum, quales sunt Abbates, Priores, Rectores, & similes habent priuilegium per communicationem, vt possint dispensare cum suis subditis in omni irregularitate etiam homicidij voluntarij, dummodo non sit notorium. Sic enim concessit Martinus V. Abbatibus D. Benedicti vt refertur in *compendio Mendicantium* ver. *dispensare* §. 24. vbi Capucinus citat Cordub. idem dicentem: & idem tenet etiam Rodr. 1. tom. qq. q. 24. art. 12.

2 Quo posito, quod attinet ad primum quæsitum Rodrig. in 2. 10. qq. q. 33. art. 4. prope finem, tenet, quod licet prælati Regulares possint virtute dicti priuilegij dispensare cum subdito homicida volutario, non tamen possunt dispensare cum faciente abortum fetus ani-

mati: quia, inquit, homicidium talis abortus est qualificatum, & grauissimum, cum occidatur corpus, & anima fœtus priuetur gloria: quando vero aliquod priuilegium conceditur ad dispensandum in homicidio, non intelligitur id de homicidio qualificato, qualis est iste abortus. Citat pro se Nauarrum, id affirmantem in casu simili. Qui Nauar. *lib. 5. consiliorum tit. de homic. cor. cil. 4.* ponit hunc casum. Quidam occidit Clericum: petiit à Papa dispensationem non exprimens quod occisus fuerit Clericus, sed solum dicens se occidisse hominem. Respondet Nauar. dictam dispensationem fuisse nullam, quia illa circumstantia Clerici fuerat necessario exprimenda, quia erat crimen magis qualificatum occidere Clericum. Nihil vero loquitur Nauar. de abortu, sed ex similitudine casus, vel homicidij Clerici mouetur Rodrig. ad asserendum, non posse prælatos Regulares dispensare in abortu fœtus animati, eo quod sit homicidium qualificatum modo supra explicato.

3 Quo non obstante ad primum quæsitum dico posse prælatos Regulares virtute dicti priuilegij dispensare cum subdito causante scienter abortum fœtus animati. Probo, quia cum lex non distinguit, neque nos debemus distinguere, vt habetur in l. *Non distinguemus ff. de Recept. qui arbit.* Sed Papa Martinus V. concedens prædictum priuilegium dispensandi, non facit distinctionem homicidij qualificati, vel non qualificati: ergo neque nos debemus distinguere, Probatum etiã hoc ex destructione argumenti, vel fundamenti, quo nititur Rodr. ex Nauar. Dico enim exemplum, & dictum Nauarri non esse verum, sed potius dicendum, validam fuisse dispensationem illam datam illi homicidæ etiam si in supplicatione non expresse rit circumstantiam

stantiam Clerici, ibi enim non erat necessarium illud exprimere. Sic in terminis tenet Sanchez contra Nauarrum in lib. 8. de matrim. disp. 21. num. 22. & remittit se Sanchez ibidem ad probationes huius rei à se adductas eadem disputatione num. 18. & causa, seu ratio illius potissima est, quia irregularitas non est posita ab Ecclesia delictis, eo quod sint grauiora; nam hæresis delictum est grauissimum, & tamen non punitur irregularitate, idemque cernitur in simonia, & blasphemia. Sed posuit Ecclesia irregularitatem pro suo arbitrio maxime in homicidio, ob fundamentum in illo reperi- tum; quia scilicet in homicida deest lenitas, & mansuetudo requisita ad sacerdotem representantem Christum D. mansuetudinis, ac lenitatis exemplar. Destructo fundamento Rodrig. seu exemplo Nauarr, destruitur dictum Rodriguez, & proinde manet probatum posse Prælatum Regularem dispensare cum subdito in abortu animati fœtus. Hoc ipsum probat Córduba ad citatum locum compendij, dum explicat prædictum priuilegium Martini V. ubi Córduba perpendit, quod in priuilegio non specificat Papa quod dispensent in homicidio voluntario: sed solum dicit, quod dispensent in omni irregularitate: ex quo verbo generali, ait Córdub. debere nos intelligere quod prædicta concessio non debet intelligi de sola dispensatione homicidij casualis, quod est minus, sed etiam de homicidio voluntario quod est maius: quia inquit verba generalia generaliter, & sine distinctione sunt intelligenda. At plus est in illo verbo generali intelligere homicidium casuale, & voluntarium; quam in verbo generali homicidij intelligere non qualificatum & qualificatum, seu graue, & grauius, seu grauissimum homicidium. Nam homicidium graue, vel grauius sunt

eiusdem speciei, & solum distinguntur secundum magis, & minus: homicidium vero casuale, & voluntariū specie sunt distincta. Adde contra id quod in particulari dicit Rodrig. Abortum scilicet fœtus animati esse homicidium magis qualificatum, eo quod occidatur corpus, & anima descēdat ad limbum; nam dico quod ut plurimum, magis qualificatum, & grauius est homicidium quo occiditur adultus, quam quando occiditur abortiuus. Nam cum duo rixantur adinuicem, si sunt ambo in peccato M. ut in multis occasionibus solet contingere, is qui alium occidit, & occidit corpus, & facit ut anima vadat ad infernum damnatorum, quod grauius est quam animam abortiui vadere ad limbum puerorum; & tamen non negabit Rodr. posse Prælatum dispensare cum suo subdito homicida voluntario secreto non notorio, qui occidit hominem qui probabiliter creditur mortuus in peccato mortali. Quod adhuc probō ex eo quod Greg. XIV. reuocauit Bullam Sixti V. circa abortum, cum tanta benignitate, ut excommunicationem Sixti reseruata Papæ, committeret, cuius confessori ab Episcopo approbato: exinde enim credendum est quod irregularitatem ex abortu contractam non sic voluerit reseruare, ut nec Pro uincialis, nec Generalis Ord. potuerit in illa dispētare.

4 Adhuc pro hoc secundo dubio quærit Rodriguez *tom. 1. qq. 9. 24. art. 5 2. 5. Quinto notandum*, utrum Vicarius, seu Subprior Conuentus mortuo Prælato locali, ut Priore, Goardiano, & cæteris, possit in hac irregularitate dispensare; Et primo arguit quod non possit à simili. Nam iuxta Panormit. quem citat, capitulum *sede vacante* non succedit in his, quæ mortuus Episcopus habebat ex iure particulari, seu priuilegio, sed in illis quæ habebat de iure communi; At Prælatus conuen-

tualis

tualis mortuus non habebat de iure communi dispensare in irregularitate homicidij voluntarij, sed ex priuilegio: ergo Subprior, vel Vicarius Conuentus defuncto succedens, illi non succedet in hoc priuilegio particulari. Nihilominus respondet Rodriguez se credere quod dictus Subprior, seu Vicarius defuncto succedens in hoc poterit dispensare: probat dupliciter primo, quia hoc priuilegium non conceditur dignitati Abbatis præcisè, sed in fauorem animarum quod sic cōcessum innuit posse extendi ad personam habentem eandem omnino iurisdictionem. Secundo probat, quia beneficia principum recipiūt extensionem de vno casu ad alium similem. Quod videtur posse probari ex cap. *cum dilecta de confirm. utili, & inutili*. Ex illis verbis. *Nos eiusdem equitatis similitudine promouati*. Ego opinionem Rodrig. non reprobō. Eam tamen non admitterem, si Prælatus localis viuens absentiam faceret à Conuentu: in illius enim absentia, credo Subpriorem id non posse, nec Vicarium, quia non est sedes vacans, nec tantam iurisdictionem habet capitulum absente Episcopo, quantam habet sede vacante per mortem Episcopi.

5 Adhuc pro ista dispensatione quam possunt concedere prælati Regulares virtute dicti priuilegij Martini V. aduerto duo. Primum est, quod si dispensaret cum subdito in ista irregularitate ex concessione Pij V. facta Patribus Dominicanis, de qua ego dixi 1. *tomo Dubior. Regular.* verbo *Abbas*, tunc non possent dispensare cum subdito in ista irregularitate abortus animati: quia Pius V. in illa concessione concessit prælatis Dominicanis erga suos subditos id quod Conc. Trid. concessit Episcopis in *sess. 24. cap. 6*. At ibi Concilium excepit irregularitatem homicidij voluntarij, cuius di-



spensationem negauit Episcopis, & proinde eandem negauit Pius V. prælatis Dominicanis. Debent ergo prælati Regulares in hac dispensatione uti non illa concessione Pij V. sed concessione citata Martini V. quæ amplior est. Secundo, noto quod cum Martinus V. in citata concessione concedat posse prælatos regulares dispensare in homicidio voluntario, dummodo non sit notorium: ad cognoscendum quando crimen sit notorium, conducit valde quod tradit Farinacius, *tam. de Inquisitione tota q. 2. 1. maxime num. 11. 18. 39. 47. & 49.* ubi ad notorium dicit requiri decem testes, & non sufficere pauciores. Facit etiam quod tradit glossa in cap. *Manifesta 2. q. 1. in summario glossæ*, videlicet, quod illud quod sciunt quinque in secreto, adhuc dicitur occultum, vide ibi: quia sæpius hæc in praxi contingunt non solum in materia homicidij, sed etiam in aliis in quibus agitur de publico, vel notorio.

6. Ad secundum quæsitum dico, supposito, quod Pro-  
uincialis, & prælatus conuentualis possunt in hoc ab-  
ortu dispensare, possunt etiam illud cuius suo subdito  
committere, ut cum alio suo subdito dispenset. Probo  
ex traditis à Sanchez *lib. 2. de matr. disp. 40. num. 13.* ubi  
dicit, quod iurisdictio concessa alicui per priuilegium  
principis, est ordinaria; quod intellige nisi princeps li-  
mitet, ut illa alteri non subdelegetur: & ista autoritas  
dispensandi in homicidio voluntario concessa prælatis  
Regularibus à Martino V. est iurisdictio principis data  
per priuilegium, & Martin. V. non eam restrinxit, sicut  
Pius V. fecit in sua concessione facta prælatis Domini-  
canis, dicens ut per se ipsos dispensarent, & non per  
alios. Cum ergo hæc concessio Martini V. sit concessio  
per priuilegium data, erit concessio, seu iurisdictio or-  
dinaria, & non restricta. At constar quod id quod quis  
habet

habet ex iurisdictione ordinaria, potest alteri committere, seu delegare, iuxta communem Doctorum opinionem, de qua late vide Sanc. *in 3 lib. de matrim. disp. 31. num. 1.* citantem Doctores, & textus.

7 Ad tertium quæsitum dico, quod si iste Religiosus post commissum hoc delictum præsens fuit in capitulo, seu catu aliquo, in quo superior dixit in generali, dispensato vobiscum in omni irregularitate; talis Religiosus mansit sufficienter dispensatus in ista irregularitate, ita ut nulla amplius dispensatione indigeat: talis enim dispensatio absolute data, fuit impenſa à potente, & volente dare, & proinde debet suum sortiri effectum. Ita in terminis docet Nauar. *in sum. latina cap. 26. num. 13.* ubi loquens de dispensationibus, & absolutionibus datis à prælatis Regularibus in capitulo, in generali, subdit hæc verba. *Quod Religiosi notare debent, qui in visitationibus ab irregularitate, & alijs censuris, absoluntur à superioribus, nam esto tunc non meminerint, illa sublata censentur, neque tenentur aliam quærere absolutionem, sed satisfaciunt confitendo peccata ob quæ illas incurrerint.* Sic. Nauar. citatis Angelum, Sylu. & Rozele.

8 Ad vltimum quæsitum dico: quod si iste Religiosus post absolutionem legitimam à peccato abortus, & ab excommunicatione illi annexa, neque habens qui dispensaret in irregularitate, neque habens recursum ad prælatum dispensantem, celebravit, imens probabiliter notabilem infamiam ex omissione celebrationis, non peccavit sic celebrando nec tenetur iterare illas confessiones, quas fecit illo tempore quo post peccatum rite confessum, fecit, dum dispensationem non obtinuit, nec fuit in morosa negligetia illam procurandi, nec celebravit nisi quando aliter vitare non potuit infamiam. Secus si celebravit antequam rite à

primo peccato abortus, & illius censura absolueretur; vel si celebrauit, sine periculo infamiae; pro quo vide omnino quæ diximus in proxime *precedente casu* 11. *num.* 4. quæ applica ad hunc delinquentem.

## CASVS XIII.

*De quadam dote facta Clerico titulo patrimonij ad Ordines.*

**Q**uidam carens patrimonio, suscepit Ordinem sacrum subdiaconatus. Huius rei misertus quidam vir pius, dixit prædicto Clerico se illi donare triginta aureos singulis annis in pecunia, vel rebus æquivalentibus, qui redditus annuus computatur pro dote sufficienti ad Ordines suscipiendos: quam summam dixit se illi donare pro suscipiendis cæteris Ordinibus sacris: & Clerico simul donauit domum contiguam sibi, in qua Clericus viueret. Et addidit donator hæc verba. *Sed māducabimus, & conuinemus mysticè, vel simul.* Suscepit Clericus Ordines sacros sub hoc titulo, & recepit illos triginta aureos modo exposito habitans iuxta donatorem cum porta domus vtrique communi. Post aliquot annos Clericus non benè viuēs, & ob tædium conceptum aduersus donantem, ex domo donatoris exiuit: & donator noluit illi amplius donare 30. aureos promissos, nec illorum æstimationem.

Quæritur, an prædictus donator potuerit reuocare hanc donationem, & negare Clerico hos 30. aureos annuos? & videtur quod sic: nam ista promissio, & donatio videtur quod fuerit cōditionalis propter illa ver-

ba apposita: *Sed manducabimus simul.* id est, dummodo manducemus, & conuiuiamus simul. Promissio vero seu donatio conditionalis non obligat, non impleta conditione: & Clericus non impleuit conditionem, quia noluit conuiuere, & manducare mysticè cum donatore. Secundo probatur, quia actus actiuorum non extenduntur vltra intentionem agentis, teste Aristotele: id est mea, promissio non extenditur vltra illum modum, vel intentionem, quam non intendi: sed iuxta modum quem intendi. At iste donator quando promissit illos 30. aureos solum intendit illos donare quandiu Clericus conuiueret, & manducaret cum donante. ergo abeunte Clerico, & non conuiuente cum donatore, nec cum illo manducante, non tenetur donator ad promissionem implendam. Tertio, quia promissio potest reuocari à donatore, vel promissore, si post promissionem res mutantur notabiliter, vt tradunt Doctores communiter: Sicut votum factum Deo non obligat vouentem, si post votum res notabiliter mutantur: at post promissionem huius donatoris res notabiliter mutatae sunt, exiuit enim Clericus à domo donantis, & noluit cum illo conuiuere; ergo ad promissionem factam non tenetur: & praeterea quod res mutatae fuerint constat, quia Clericus postea male vixit, quae est mutatio notabilis.

1 Ante responsionem praemitto primo, praedictum Clericum licite potuisse sacros Ordines recipere virtute illius promissionis, seu patrimonij, loco patrimonij paterni, etiamsi, alias nihil haberet vnde viueret. Cardinales enim Concil. Trid. Romae declarant, quod Clericus carens patrimonio, vel beneficio poterat ordinari virtute alicuius donationis sibi ab aliquo factae, si esset congrua ad suam sustentationem, & talis ab Epif-

copo iudicata. Citat hanc declarationem Cardinalium Azor *tom. 2. lib. 3. cap. 4. q. 1.* sed addiderunt Cardinales, Dummodo donatio vera sit, non ficta, & simulata. Et ista donatio fuit vera, & secuto effectu. Secundo præmitto in hoc casu, de quo quæritur, non solum intervenisse promissionem acceptatâ à donatario, sed etiam donationem realem secuto effectu: Nam clericus per aliquot tempus recepit illos 30. aureos, & est nimis diversa, sola promissio de futuro non secuto effectu, ab illa donatione, quæ iam effectum sortita fuit, ut constat ex iure, praxi, & Doctoribus. Tertio præmitto quod Concil. Trid. *sess. 21. c. 2. de reform.* præcipit quod patrimonium, vel beneficium ad cuius titulum Clericus ordinatus est, non possit à dicto Clerico renunciari, permutari, vel alienari, nisi cum licentia Episcopi, & prius constituto quod prædictus Clericus aliunde sufficienter habet unde sustentetur. Si autem prædictus Clericus sine his circumstantiis alienaverit, vel renunciaverit dictum patrimonium, vel beneficium, talis alienatio, vel renunciatio nullius sint valoris.

2. Hoc posito dico prædictum donatorem non potuisse reuocare istam donationem factam Clerico. Primo quia ista donatio fuit vera, & realis secuto effectu. Et præterea donatio facta cum his circumstantiis, & pro causa pia, ut est ista, non potest reuocari iuxta communem Doctorum opinionem, de quo inter alios videatur Navar. *lib. 3. consiliorum tit. de donat. toto consilio 5.* Quod vero hæc donatio non fuerit conditionalis, & dato quod talis fuerit, non sit de tali conditione curandum, patebit ex solutione ad primum argumentum. Secundo probatur, quia res donata inter viuos, & tradita donatario, statim transfert dominium rei donatæ in donatarium, ut late probat Rabello cum multis *to. 1.*

*de obligat. inst. fol. 870. col. 1.* At in isto casu interuenit donatio realis, & inter viuos: ergo donator transtulit dominium illorum 30. aureorum in donatarium Clericum ordinatum, qui illorum reddendorum acquisiuit possessionem, qua proinde possessione non potest donator illum priuare. Tertio, quia hi 30. aurei annuales hodie effecti sunt patrimonium Clerici ad cuius titulum suscepit Ordines sacros, vt patet ex dictis *nn. 1.* At iuxta Concil. Trid. ibi citatum, patrimonium ad cuius titulum Clericus ordinatur non potest alienari, permutari, vel renunciari: ergo nec Clericus iste potest hos 30. aureos renunciare, nec proinde donator potest illos reuocare, cum non possit reuocari id quod Concilium Tridentinum prohibet alienari: alias si donator posset reuocare conuinceretur quod fidei, & simulate, vel valide donauerit: & confirmatur, quia si Episcopus daret alicui beneficium ad Ordines suscipiendos, vel pater alicui patrimonium ad eosdem Ordines, nec Episcopus, nec pater possent tale beneficium, vel patrimonium reuocare. Quarto probatur à simili, ex eo quod traditur in cap. *Episcopus de prabend.* vbi præcipitur quod si Episcopus aliquem ordinauerit non habentem congruum patrimonium vnde sustentetur, nec beneficium Ecclesiasticum, tandiù illi necessaria ministret quandiù in aliqua Ecclesia &c. Si ergo ius canonicum obligat Episcopum, vt det alimenta Clerico à se ordinato non habenti vnde viuat, & hoc nullo præcedente ad id pacto inter Episcopum & talem sic ordinatum: maiorem obligationem habet iste donator sustentandi clericum istum cū quo fecit pactum clarum, & expressum illum sustentandi cum illis 30. aureis. Hanc opinionem videtur tenere Nauar. *lib. 1. consil. tit. de temporibus Ordin. consil. 13. num. 3.* vbi ait quod non potuit

pōtuit soror cuiusdam Clerici petere ab illo agrum, quem ipsi Clerico donauerat ad titulum Ordinum suscipiendorum, etiam si talis Clericus frater illi sorori deberet summam pecuniæ ratione eiusdem agri, & citat ad hoc duos textus iuris ciuilis: & ex solutione argumentorum patebit amplius probatio istius dicti.

3 Ad primum igitur argumentum in contrarium initio positum, quod est validius reliquis, dico imprimis hanc donationem non fuisse conditionalem, sed absolutam. Nam verba illa appōita, *sed comedemus ambo simul.* non sunt conditio appōita sed solum modus donationis, qui modus non obligat, etiamsi non impleatur, iuxta communem sententiam: Declarauit enim donator per illa verba, modum quo esset traditurus illos 30. aureos. Et quod prædicta verba appōita, non fuerint conditio, probatur ex iis quæ tradunt Dōres declarantes per quæ verba apponatur conditio: & dicunt, vt plurimum solere conditionem apponi per hæc verba, *dummodo*, vel per *si*, vt si dicatur: *dummodo hoc feceris*, vel: *si hoc feceris*, vel similes. Dictio vero *sed*, non videtur idem significare, quod *dummodo*, aut *si*. Videatur hac de re inter alios Sanch. lib. 5. de matr. disp. 1. num. 2. Secundo ad idem argumentum dico, quod licet illa donatio fuerit condicionalis, illa tamen conditio, quod posset alias donationes reuocare, habenda est pro non adiecta, neque vitiat donationem: nam conditiones appōitæ in contractu impossibiles de iure, id est quæ non possunt impleri nisi violato iure, non annullant contractum, vt late probat Molin. tom. 1. de iust. tract. 2. disp. 206. conc. 2. citans multa, & Sanch. lib. 5. de matrim. disp. 4. num. 7. & Less. 2 lib. de iust. cap. 18. dub. 15. num. 121. Ita vero conditio, quod si non manducarent ambo simul, posset donator reuocare donationem,

tionem, non potest impleri sine violatione iuris Trid. prohibentis ne Clericus alienet patrimonium datum ad Ordines suscipiendos, nec proinde possibile est reuocari à donante: ergo talis conditio posita contra ius debet pro non adiecta reputari, ita vt donationem iam possessam non reuocet. Tertio adhuc probo hanc donationem non fuisse conditionalem. Nam hæc donatio facta modo prædicto fuit examinata ab Episcopo, & iudicata sufficiens ad Ordines suscipiendos, iuxta citatam declarationem Cardinalium: ergo non fuit conditionalis. Valet optime consequentia, quia si fuisset conditionalis, non posset acceptari ab Episcopo, nec iudicari sufficiens, quia non poterat ordinare Clericū cum patrimonio dubio, & pendente à conditione futura, ageret enim Episcopus in hoc contra Concilium iubens absolute, vt Clericus habeat patrimonium, quod intelligitur verum, absolutum, independens à conditionibus. Cum ergo ista donatio vt præsentata Episcopo debuerit carere conditione, seu illis verbis: *sed ambo comedemus*. Illi sic præsentatæ, & iudicatæ ab Episcopo tanquam absolutæ, & non conditionali standum est. Et huic donationi coram Episcopo factæ standum est, non verò illi quæ solum inter illos priuatim ordinatæ est.

4 Ad secundum argumentum dico, tunc intentionem agentis non extendi ultra mentem illius, quando intentio eius est libera, seu posita in libertate agentis; quando vero illa intentio est de obligatione ipsius operis, seu annexa necessario tali operi, tenetur agens operari secundum intentionem talis operis, & non potest habere aliam intentionem alienam ab opere illo. At in isto casu per illam promissionem acceptatam, donans tenetur habere intentionem debitam, seu annexam

huic



huic donationi acceptatæ , & in effectu securæ. Secuto enim effectu non est liberum aliud , vel aliud intendere. Et potest exponi per illud quod Doctores dicunt in materia de voto. Videlicet quod intendens vere vouere, seu votum facere, & non intendens se obligare, vel non exequi rem promissam , peccat mortaliter , & tenetur ad votum, vt tenet Sanch. cum communi libro 4. *Decal. cap. 1. num. 22. & seqq. & lib. 1. de matrim. disput. 9.* Ergo cum hic intenderit vere promittere 30. aureos, idque non conditionaliter, saltem coram Episcopo, vt probatum est in solutione primi , non potuit habere intentionem talem , per quam ille effectus impediretur. Et confirmatur dictum Aristotelis, nam is qui promittit facere rem aliquam , ad quam faciendam lex præscribit certam intentionem, tenetur adhibere prædictam intentionem legis , non vero suam intentionem propriam. Vt qui promittit dicere missam pro aliquo, certo tenetur intentionem applicare pro illo , & non pro alio: ergo cum iste donator promiserit donare hos 30. aureos, & de facto donauerit, debuit habere intentionem præscriptam à lege, videlicet à Concilio Trid. iubente vt donatio facta Clerico pro ordinibus recipiendis, sit absoluta, vera, realis, & non dubia, seu dependens à conditionibus. Et declaratur ex traditis à Sanchez *cit. loco 4. Decal. num. 25.* vbi ait , quod vouens intendens vere vouere, & conscius obligationis ex voto confurgentis, licet tunc illius non meminerit, tenetur ad votum, quia implicite voluit se obligare. At hic donator sciebat obligationem confurgentem ex Concilio Trid. vt ille mihi dixit , & proinde licet non intenderet se obligare nisi illo suo modo , implicite , & virtualiter, voluit se obligare iuxta mentem Triden. obligantis ad veram , & absolutam donationem , non de-  
pen-

pendentem à conditionibus.

5 Ad tertium dico, quod quando Doctores dicunt donatorem posse reuocare donationem, intelligitur, antequam illa sortiatur effectum per possessionem acquisitam à donatario in re donata: secus si iam donatarius possessionem, ac dominium rei donatæ acquisiuerit. Si enim post possessionem iam acquisitam superueniat ingratitudo, vel res notabiliter mutantur, non poterit reuocare; sic tenet Rabello *cit. tom. lib. 8. quest. 2. num. 1. & 9.* At in isto casu iam donatarius acquisiuerat possessionem illorum 30. aureorum, ut dicitur in informatione, ac proinde non poterit illos reuocare. Et in particulari de illo quod additur in informatione; hunc Clericum post donationem male vixisse, quæ causa forte fuit ut à domo donatoris exiret, vel à donatore expelleretur; Dico quod ex hac causa, quod male vixerit, non potuit donatio reuocari. Pro quo facit lex istius Regni *lib. 4. Ordinatio. tit. 55.* ubi ponuntur quinque causæ ex quibus causatur ingratitudo sufficiens ad reuocandam donationem; & nulla illarum est si donatarius vixerit male in sua persona, vel si discesserit à domo donatoris. Ad hoc enim ut sit ingratus necessarium est, ut donatarius inferat aliquod malum directè personæ donatoris, quod in isto casu non evenit. Et adhuc respondeo ad illud quod addit argumentum, post donationem istam res valde fuisse mutatas: Dico enim cum Rabello proxime citato, quod hoc intelligendum est de mutatione notabili, ita ut inde promissionis impletio reddatur impossibilis, vel illicita, vel damnoſa, vel inutilis donanti, vel donatario, quorū nihil in hoc casu interuenit ex eo quod isti Clerico reddantur 30. aurei extra domum donatoris, ut patet discurrendo per omnes particulas proxime positas.

CASVS

## CASVS XV.

*De quadam venditione tritici annualis,  
non statim oblato reddito annua-  
li tritici.*

**Q**uidam vir nobilis vendidit Petro certam sum-  
mam tritici reddendi singulis annis, quæ sum-  
ma Lusitanæ dicitur, *dois moyos de renda*. Quæ summa  
tritici apretiata fuit pretio sexcentorum quinquaginta  
aureorum. Venditor habens necessitatem pecuniæ, an-  
tequam scriptura venditionis fieret petiuit à Petro, vt  
statim totam illam pecuniam donaret, & scripto par-  
ticulari se obligauit intra certos dies facere scripturā  
venditionis, vel ad reddendam totam pecuniam rece-  
ptam. Petrus totam pecuniam pretij tradidit statim  
venditori. Propter certum impedimentum ortum cir-  
ca tales redditus annuales tritici, scriptura non est fa-  
cta in mense vno assignato. Emptor videns illos reddi-  
tus annuales esse dubios, & scripturam venditionis  
non fieri, petiuit à venditore vt vel triticum prædictū  
quotannis reddendum assignaret in alio agro non li-  
tigioso, vel singulis annis dum scriptura non fiebat, si-  
bi emptori daret singulis annis illos duos modios, seu  
*moyos de trigo*, donec scriptura venditionis fieret. Et ita  
factum est, nam per quatuor annos in quibus scriptu-  
ra facta non est, venditor dedit Petro *duos illos modios*,  
vel *moyos de trigo*.

Queritur an Petrus in conscientia poterit hoc tri-  
ticum annuale recipere loco pecuniæ iam traditæ em-  
ptori: Et videtur quod non possit. Nam illud non po-  
tuit

tuit recipere ratione venditionis, & emptionis. Nam venditio illa nulla fuit donec scriptura venditionis facta non fuit, ut expresse habet lex istius Regni *lib. 4. Ordinatio. tit. 8. §. 3.* & probat Rabello *lib. 9. de obligat. inst. tom. 1. quest. 1. sect. 1. num. 9.* cum ergo emptio fuerit nulla in utroque foro non poterit emptor ex hoc titulo venditionis illud annuale triticum recipere. Secundo videtur quod non possit illud recipere ratione census: nam iuxta motum proprium Pij V. ad validitatem census debet intervenire Notarius publicus coram quo, & testibus numeretur pecunia, quæ omnia hic defuerunt. Neque tertio potuit hoc triticum recipere ratione contractus societatis: in contractu enim societatis non designatur certa summa reddenda ex lucro: & in hoc certa summa tritici reddenda designata fuit singulis annis reddenda. Nec denique apparet ex quo alio iusto titulo hæc summa tritici recipi potuisset: ergo videtur restituenda. Et fuit hic casus litigatus coram tribunali Regio.

I Hoc non obstante, credo prædictum emptorem potuisse in conscientia hos redditus annuales recipere singulis annis antequam scriptura venditionis fieret per quatuor annos, neque ad restitutionem teneri. Probo primo, quia Petrus dans hanc pecuniam ante scripturam, & antetraditam possessionem, nullo modo intendit mutuare pecuniam, ut constat, sed intendit facere contractum emptionis eo modo quo posset fieri, non amittendo interesse suæ pecuniæ, & sic intendit facere contractum bonæ fide: & licet Motus proprius Pij V. de censibus in hoc casu servatus non fuerit: quoad emptionem census ob causam allegatam, nihilominus in hoc contractu non defuerunt conditiones naturales requiritæ ad emptionem census fuit-

datam in bonis venditoris. Ad cuius intelligentiam aduerto quod in citato Motu Pij V. ad validā emptionē census requiruntur 2. vel 3. conditiones, quorum aliqua deficiente emptio census non valet. Quo non obstante dicit Reginald. *tom. 2. lib. 2. n. 415.* citans Nauarrum, Valentiam, & Molinam, qui omnes dicunt, Pium V. non intendisse per illum motum proprium definire usurarium esse contractum census, in quo deesset aliqua ex conditionibus ibi assignatis: sed solum voluit ad securitatem illas conditiones in census emptione concurrere: & alias prædictus contractus præsumeretur usurarius in foro externo. Quo non obstante dicunt citati Doctores, quod si in foro conscientie constitit, quod in emptione prædicti census non interuenit fallacia, & quod datum est iustum pretium cum cæteris conditionibus requisitis de lumine naturali, tunc emptio talis census est valida in foro conscientie, licet non concurrant conditiones requisitæ a Pio Quinto. Conditiones vero requisitæ de lumine naturali ad validam emptionem census, sunt quatuor tantum, ut refert Reginald. *cit. lib. num. 411.* & Rabello *cit. tomo lib. 10. q. 7.* quæ conditiones in substantia sunt. Prima ut census fundetur in re fructifera, quod hic interuenit, positus est enim census in possessionibus fructiferis venditoris. Secunda, quod ematur iusto pretio, quod hic etiam seruatum est: tradita enim illa pecunia iudicata fuit publicè iustum pretium pro illo redditu annuali tritici. Tertia, ut si perdat in toto, vel in parte res immobilis, super quam fundatus est census, sic etiam amittatur respectiue in toto, vel in parte, id est diminuatur redditus annualis census, quæ etiam conditio hic non defuit. Quarta quod non vendatur res immobilis super quam fundatus est census, absque licentia

centia emptoris, quæ etiam hic interuenit. Hæ sunt in substantia quatuor conditiones requisitæ de lumine naturali, licet citati Doctores illas diuerso modo enumerent. Cum ergo hæ conditiones in hoc contractu census interuenerint, dicendum est contractum istum fuisse licitum in foro conscientiæ, licet in illo defuerint conditiones requisitæ à Pio V. qui solum decreuit de foro externo, & præsumptiuè.

2 Secundo principaliter probo Petrum non teneri ad restituendum hunc annuum redditum tritici receptum, ex eo quod tradit Valent. *tom. 3. disp. 25. puncto 1. & 2. & Vega 2. p. summæ ver. usura casu ultimo*, & alij dicentes esse licitum istum contractum, videlicet: Do tibi centum, vt quotannis reddas mihi quinque saluo capitali. Addit Valentia quod etiam si contrahentes non specificent aliquem contractum specialem, possunt ibi tria concurrere, videlicet, vel contractus societatis, & assecurationis: cum assecuratione, vel mutui cum lucro cessante & damno emergente. Nam cum centum communiter singulis annis lucentur decem, vel undecim, ego paciscor tecum contractu societatis, quia do pecuniam, & tu ponis industriam, & ex decem quæ debet lucrari mea pecunia, remitto tibi quinque pro assecuratione meæ pecuniæ, ne pereat: & ad hoc ait Valentia cum Vega, quod si ego dedi alicui hæc centum videns quod ille habet possessiones fructiferas, vel habet industriam negotiandi vt mihi respondeat cum lucro iusto, quamuis illi non declarem, velle me contractum societatis, vel assecurationis, vel damni emergentis: contractus est licitus, & possum ego recipere illa quinque absque determinatione expressa contractus societatis, emptionis census, vel cæterorum, sed solum ex generali quadam intentione lucenti il-

la quinque aliquo modo quo licite fieri possit attentis circumstantiis personarum. Quæ omnia in hoc contractu euenerunt. Nam iste emptor dedit suam pecuniam fundatus in possessionibus fructiferis venditoris, & intendit lucrari sua pecunia modo licito possibili: & in substantia interuenit emptio census cum circumstantiis, & conditionibus requisitis de iure naturali, ut diximus *num. 1. precedente*; ergo contractus, & lucrum annualis redditus fuerunt licita in foro conscientiæ. Potest etiam hoc confirmari ex dicto communi Iuristarum dicentium; Si non valet hoc quod ago propterea, valeat ut valere potest, ut citat glossa in cap. *duo pueri de despons. impuber. ver. matrimonium*. Cum ergo cõstet quod iste emptor non voluit mutuare, sed emere, licet contractus non tenuerit iuxta Motum proprium Pij V, validum tamen fuit de iure naturali in foro conscientiæ, in quo læsio nulla data fuit.

3 Tertium fundamentum ob quod potuerit Petrus hunc redditum annualem tritici recipere ob datam iam à se pecuniam, est damnum emergens vel lucrum cessans. Cum enim recepta sit sententia posse quemuis recipere aliquod lucrum ex mutuo ultra sortem propter damnum emergens iste emptor habuit damnum emergens, quia, ut mihi dictum fuit, volebat hunc redditum annualem dare filio suo pro dote matrimonij contrahendi: cumque nec posset dare filio pecuniam illam iam datam venditori, nec filio daret illos modios tritici in re possessionis per scripturam venditionis, & proinde matrimonium filij dilaretur, resultauit clare emptori damnum emergens ex traditione suæ pecuniæ: ergo potuit licite illum redditum annualem tritici recipere pro illo damno emergente; maxime cum prædictam pecuniam nõ mutuauerit, ut diximus, sed

sed dederit titulo emptionis. Quod adhuc probatur à simili ex ca. *salubriter de usuris*, vbi Papa decernit, quod si socer promisit genero certam pecuniæ summam pro dote, & quandiù illam pecuniam non tradit, dat genero possessionem immobilem fructiferam, poterit gener comedere fructus illius possessionis quandiù promissa pecunia non traditur, absque vlla postea restitutione fructuum, idque sine vlllo peccato usuræ, & sic tenent omnes Doctores *ad cit cap.* quo nihil clarius considerari potest ad nostrum casum: intelligitur ille textus quod gener non tenetur aliquid restituere de perceptis fructibus quando socer tradiderit sibi totam pecuniam promissam: & ratio principalis illius tex. vt explicat Lud. Lop. 2. p. tract. 6. est damnum emergens accrescens genero, qui tenetur sustentare uxorem ex bonis ipsius generi, dum pecunia dotalis non traditur à socero: Quod etiam in isto casu suo modo euenit vt patet ex proxime dictis. Et idem dicendum erit si constiterit quod iste Petrus emens incurrit etiam lucrum cessans, eadem enim est ratio, ac de damno emergente, vt Doctores dicunt. Pro lucro vero cessante, vel damno emergente computat Veg. 2. p. ver. *usura casu* 76. quodcumque discommodum, vel incommodum accrescens domino pecuniæ, vt fabricare opus necessarium, vel continens, quod non fabricauit ob defectum suæ pecuniæ, vel quid simile.

4 Quarto probatur ex eo quod tradit Sà in *Aphor. ver. usura. num. 8.* videlicet quod si ego feci contractum qui in se erat usurarius, sed feci bona fide, possum retinere tantum lucrum, quantum aliàs per contractum licitum lucraturus eram: & consonat huic dicto illud aliud Valent. *cit. loco punct. 3.* videlicet quod si feci contractum bona fide, & postea inuentus fuit usurarius,



solum teneor restituere id quod extat, non vero id quod consumptum est: vel teneor restituere id in quo factus sum ditior. Addit tamen Valentia, quod stante dubio an contractus sit vsurarius, & fuit iam factus contractus, non debent confessores statim iniungere restitutionem, quia in dubio melior est conditio possidentis: & in hoc casu, saltem non constat clare illum fuisse vsurarium, ob tot rationes supra citatas: & addit Valent. quod si facta diligentia non potest vinci dubium circa contractum, nec clare constat fuisse vsurarium, non tenetur ad restitutionem, ob eandem causam, quia melior est conditio possidentis.

5 Sed adhuc duo aduerto, primum est, quod si prædicta pecunia data à Petro emptori, aliàs exposita in contractu societatis licito, & ordinario singulis annis valeret minus quam iste redditus annualis tritici, quæ recepit singulis annis, tunc Petrus emptor tenetur restituere emptori illud quod plus recepit ultra id quod pecunia valeret exposita in contractu societatis licito. Secundum est, quod licet credam potuisse Petrum recipere dictum redditum annualem tritici modo supradicto, consulerem vt dictum contractum dissoluat petens suam pecuniam ad tollenda dubia: quam si recuperare nequeat, denuo faciat contractum societatis, vel emptionis census iuxta Motum proprium Pij V. pro maiori securitate conscientie.

6 Ad argumentum positum in principio patet solutio ex supradictis dicendum est enim potuisse Petrum hunc redditum annualem recipere singulis annis in foro conscientie tum ex titulo emptionis census, non quidem iuxta Motum proprium Pij V. sed iuxta ius naturale concurrentibus illis 4. conditionibus, de quibus dixi *num. 1.* quæ in hoc contractu concurre-  
runt

tunt, tum etiam illud triticum potuit recipere propter citatum caput *salubriter de usuris* : tum denique ob doctrinam supra traditam *num. 2. à Valentia, & Vega*, per quam constat quod illud recipere potuerit.

## CASVS XVI.

*Notata quædam circa emptionem censuum.*

**Q**Voniam materia censuum non raro contingit, estque valde difficilis, volui hic breuiter ponere aliqua selecta, quæ collegi circa præcipuos aliquos casus censuum : pro aliis vero remitto lectorem ad Farinacium *tom. de consiliis toto consilio 54. & eodem tom. decis. 10. quæ est in 2. p. tom. tota illa decisione.*

1 Quod ergo attinet ad censum emptum non numerata pecunia de præsentī, sed ex vi solius debiti antiqui, vel ex pecunia olim data, vel mutuata, & alias conditiones Motus proprii Pij V. dico imprimis, Philippum Regē Secundum Hispaniæ, proprio scripto ordinasse Gubernatoribus, seu iudicibus Portugalliæ, ut dictum Motum proprium Pij V. in litium controuersis executioni non darent : & lites censuum non admitterentur fundatæ super eodem Motu proprio, idemque mandauit seruari in Castella. Sic refert Roder. *de reddit. lib. 1. quæst. 13. num. 3. vers. in 2. cum Auedan. de censibus cap. 37. num. 19. & 28.*

2 Quod census emptus sine pecunia numerata præcedente debito claro, & liquido valeat etiam in foro externo, tenent multi, & graues Doctores in Hispania. Patiz. *consil. 75. num. 32. vers. 4. Floren. in praxi verb.*

*huiusmodi census num. 95. Rodan. de rebus Ecclesiasticis de constitutione annui census num. 61. Caball. tract. de censur. quest. 7. per totum. Benedict. Boni tract. de censibus art. 35. vnde decisive. Salas de vsu, & consuetudine cap. 8. num. 45. Surt. consilio 162. à num. 38. Roder. de reddit. annuis lib. 1. quest. 13. num. 3. Auendan. de censibus cap. 38. à num. 7. Gratia. de censibus cap. 321. num. 17. Farinae. decis. 285. à num. 1. in decisionibus Rotæ. Nauar. consilio 1 de emptione, & comment. de usuris num. 88. ver. Est tamen questio. Rabello 1. tomo lib. 10. de censibus quest. ultima cum ibi citatis, & Vega 1. par. summa verbo censos casu 24. §. lo 3. digo, & alij: & in praxi sic iudicatum fuit Olyssipone anno 1621. in quadam lite Ducis Bargar-tiæ: & in multis alijs locis Hispaniæ, vt referunt varij Doctores, maxime Roder. lib. 1. de reddit. quest. 13. num. 3. Vide etiam Ludoicum de Beia 3. part. Resp. Moral. casu 31. per totum maxime §. partem tamen: & licet Pius V. dicat in suo motu proprio, quod talis contractus si-ne conditionibus ibi requisitis est usurarius, intelligit ex fictione iuris, seu ex præsumptione, non vero à par-te rei, & sic cessante præsumptione iuris cessat pœna usuræ: iuxta citatos Doctores à Vega citato casu 24 & à Rabello cit. libro quest. 6. in explicatione quintæ con-dicionis: & omnino vide Rodrig. in Bulla Cruciatæ in explicatione dicti Motus proprii Pij V. dum explicat quartam conditionem Motus proprii dub. 1. §. Digo lo 3. vbi satis inclinatur ad opinionem cit. Doctorum, quod valeat dicta emptio census non numerata pecunia etiam in foro externo vbi multa dicit.*

3 Quod autem dicta emptio census facta non nu-merata pecunia, ex vi solius debiti antiqui, valeat sal-tem in foro conscientiæ, vltra citatos Doctores, tenet expresse Rodrig. loco citato in fine proximi num. 2. &

Lessius

Lessius lib. 2. de iust. num. 8. Reginald. tom. 2. lib. 25. num. 419. vers. 5. dubium. & Rabel. cit. quest. 6. num. 8. Nauarr. cit. comment. de usuris. num. 88. Gratia vbi supra cap. 387. qui refert decisiones Rotæ.

4 Circa illa verba motus proprii, quod pereunte re in toto, vel in parte, super quam fundatus est census, debeat diminui pro rata etiam solutio census ex parte venditoris. Circa hæc inquam verba tenet Rodriguez in addit. ad summ. tom. 3. verbo *censos*. cap. 66. concl. 13. citans multos, illa clausula motus non obstante hodie in Hispania contrarium seruari, & quod iam in publico tribunali oppositum iudicatum est, & quod hodie in fundatione census est, potest adhiberi hæc clausula, seu conditio; vt pereunte re censuaria non pereat census, citat Molin. & alios.

5 In Motu proprio Pij V. ponuntur hæc verba prope finem: *Si aliquid detur, vel remittatur, vel dimittatur contra mandata Bullæ tacite, vel expresse, id possit à fisco vindicari.* Quo posito, quaeris: Si aliquis emit censum pecunia non numerata, ex vi solius debiti antiqui, an emptor amittere debeat pecuniam quam antea dederat etiam in loco, vbi dictus Motus proprius obseruatur? Credo quod non, sed quod pecunia illi restituetur, deductis expensis, & fructibus receptis. Probo primo, quia in omni venditione, seu emptione quando est nulla, & iubetur rescindi, emptor recuperat pecuniã, quam primo dederat: At contractus census est emptio, & venditio. Secundo, quia pupillus, & minor licet contrahant nulliter absque licentia Tutoris, vel Curatoris, & proinde contractus rescindatur, nihilominus pupillus aut minor non perdunt pecuniam datam, licet teneantur ad restituendum damnum contractus, & ad id quod acceperunt virtute contractus, vt tenet San-

chez *lib. 6. de matrim. disp. 3. 8. num. 1.* quod applica ad intentum. Tertio, quia aliàs iste Motus proprius esset lex valde rigorosa, si vellet amitti pecuniam capitalem olim debitam, & datam pro emptione census: quod non speratur à Summ. Pontifice Patrè benigno. Neque Motus proprius id declarat, imò nec innuit. Quarto, quia licet Motus proprius prohibeat poni in emptione census conditionem de soluendo lucro cessante ob negligentiam debitoris census. Nihilominus non prohibet Papa vt solvatur damnum emergens ob negligentiam illius, vt tenet expresse Rodrig. in expositione eiusdem Motus proprii *dub. 7.* & Rabello in explicat. eiusdem *condit. 3. num. 15.* Cum ergo Papa nolit vt emptor census perdat interesse damni emergentis, multo minus debet velle vt perdatur tota pecunia olim data, & debita à venditore census, maxime quando contractus factus fuit bona fide, & absque peccato. Ad illa ergo verba Papæ dicentis secus data repetenda esse à titcō, dicendum est illa non debere referri ad omnes clausulas contentas in corpore Bullæ, sed solum ad casum positum in versiculo in quo ponuntur citata verba, qui versiculus incipit: *Pacta etiam continentia*, & ad clausulam proxime antecedentem in versiculo *volumus*, vt patebit legenti. Facit quod tenet Sanch. *lib. 7. de matrim. disp. 108. num. 3* & *8. lib. de matrim. disp. 161. ad pñem*, vbi ait clausulam positam in fine tunc solum reterendam esse ad omnia contenta in lege, quando in omnibus præcedentibus est eadem ratio; secus si sit diuersa ratio. Et præterea tunc posse referri ad præcedentia, quando lex adiicit verba ista: *Vt præferuntur*, vel hæc: *Sic in præmissis*. Et hîc non currit eadem ratio, vt perdatur pecunia olim data, & debita. Neque iste casus e t̃ similis illi posito in eadem Bulla in vers. citatō

*volumus*

*volumus*, & in vers. cit. *pacta etiam continentia* : nec Papa ponit illa verba *ut praefertur*, siue *in praemissis* : ac proinde praedicta pecunia olim data, & debita non perditur fisco: Imo arguo ex verbis Bullae : Nam si Papa non vult amitti pretium census nisi in casu ibi posito in versiculo *volumus*, signum est quod nolit idem pretium perdi in alio casu, dato quod contractus sit nullus.

## C A S V S XVII.

*De quodam matrimonio contracto cum variis conditionibus circa dotem, & arras.*

**Q**Uidam vir, & foemina nobiles matrimonium contraxerunt subsequentibus conditionibus. Foeminae pro dote datae sunt viginti octo millia ducatorum, sic distributa : videlicet duodecim millia ducatorum in aestimatione duarum commendarum, quas Rex dedit marito, quarum aestimatio erant septingenti quinquaginta mille ducati singulis annis, septem millia in quodam officio honorifico, de quo non agitur, quia pactum fuit, ut mortuo marito ( sicut iam mortuus est ) de tali officio lis non mouetur. Sex millia in quadam concessione Regis colligenda in nauibus Regnorum externorum, quae sine debita licentia portum Olyssiponensem intrarent, id est sine debito registro: quarum bona spectant ad fiscum Regium: sed haec sex millia effectum non habuerunt, quia similes naues prohibita, & confiscandae nunquam intrarunt. Tria millia in vestibus, monilibus, & iocularibus ad ornatum muliebrem: quae tria millia dicitur in rigore, & veritate,

veritate, quod vix pro mille possent æstimari. Itaque ex his 28. millibus aureis non recepit maritus nisi æstimationem duarum commendarum, singulis annis reddentes 750. ducatos quæ tamen commendæ illius morte cessabant, & cessarunt. Ex parte fœminæ pactum initum est, quod maritus de bonis sui maioratus, & aliis possessionibus sibi daturus erat septem mille aureos pro arris: & quod mortuo illo, sibi reddenda: erat per integrum dos cum arris, quod vt securius recuperare posset additum fuit, vt mortuo illo sine filiis, illa maneret in domo possidens, & gubernâs domum, & bona mariti, quod lex Lusitana vocat (*ficar à molher por cabeça do cazal*) idque donec dotem, & arras promissas recuperaret per quinque annos sic vixerunt in eadem domo pacifice, absque filiis. Intra hos quinque annos, cum vir esset infirmus ad mortem, fœminæ scriptum propria manu firmatum dedit, per quod constabat se omnem dotem sibi promissam integrè recepisse. Conualecente marito ex morbo, fœmina ob certam causam petit diuortium matrimonij coram iudice Ecclesiastico, illudque obtinuit contra voluntatem mariti per tres sententias, ab eoque discedens secessit in Monasterium Monialium. Et per sententiam iudicatum est vt maritus eidem in vita daret mille aureos pro alimentis: illa vero marito restitueret mille quingentos aureos, quos secum tulit de domo mariti ad Monasterium vadens. Quo posito proposita sunt sequentia dubia pro foro tantum conscientiæ.

Primum est. Si æstimatio cômendarum à Rege facta, & data, potest recipi in conscientia, cum sint bona ecclesiastica, & credatur esse simoniam talia bona pretio æstimari: & quæritur an sit simonia.

2 Antequam maritus soluere illa sex millia aureorum

rum promissa à Rege in fisco nauium intrantium sine registro, cum maritus illa sex millia numquam receperit, neque in toto nec in parte.

Tertium. Si est obligatio dandi illi arras, cum illa à domo viri discesserit diuortiumque impetrauerit?

Quartum. Supposito, quod quando vir mortuus est, litigabatur causa, & erat litis pendentia, an valida foret scriptura in qua maritus viuens cōfitebatur totam receptionem dotis, cum id falso confiteretur, eo quod ex dote solam æstimationem cōmendarum receperit; an inquam hac lite pendente, potuerit illa seingere in possessionem, & regimen domus mariti inuito testamentario, & hærede, vt tanquam caput domus suam dotem, & arras recuperaret, idque iudicis sententia non expectata?

Quintum. Si faciens se caput domus, seu *cabeça de casa*, vt lex dicit, ad dotem, & arras recuperandas ante sententiam iudicis, eaque de causa excommunicat[i]onem fecit fulminari contra detentores aliquorum bonorum defuncti mariti, vel eidem aliquid debentes, vt possit illis iuramentum exhiberi circa prædicta, teneantur scientes denunciare, & iurantes teneantur veritatem dicere: attento quod excommunicatio lata sit supponendo quod illa esset caput cazalis, domum mariti gubernans, idque præcedente diuortio ab illa procurato inuito marito? & an prædicta excommunicatio valida fuerit?

Sextum. An dato quod excommunicatio valida fuerit, famuli, & aliæ personæ quibus defunctus maritus debebat seruitia, & obsequia, & alia debita, habentes aliquid de bonis defuncti, possint pro satisfactione suorum seruitiorum illud retinere, non denunciantes, & illud in iuramento recepto tacentes? Attento, quod illud



illud declarantes nunquam, aut difficillime restitutionem sui seruitij, vel debiti recuperabunt?

Septimum. Si coloni, conductores, vel similes qui cum marito cōtractum fecerant, & post mortem illius cum hærede, ac testamenti executore compositionem fecerant, cautionem recipiētes ab ipsis, idest apocham: idque ante promulgatam excommunicationem, an hi post publicatam excommunicationem teneantur ad denunciandum, vel ad veritatem iurandam?

Octauum. Si defunctus in suo testamento præcepit hæredi, vel executori testamenti, vt certa debita restitueret, vel certas obligationes impleret, possit fieri satisfactio talium debitorum, & obligationum de bonis defuncti, non obstante excommunicatione, & litis pendentia circa dotem? & idem quæritur de expensis factis pro funere defuncti.

Nonum. Supposito, quod dicta dos fuerit fere phantastica, & vxor per annos decem recepit singulis annis mille aureos pro alimentis ratione dotis, an teneatur restituere hæredibus defuncti pro rata id quod illi datum est pro alimentis vltra valorem, & qualitatem dotis, eo quod illi data sunt illa mille contra voluntatem mariti, qui erat dominus illorum.

Vltimum. Si aliquæ personæ, quibus defunctus aliquid debebat, possint hoc sibi debitum à defuncto recuperare ab illis qui defuncto tantundem debebant vtendo fere compensatione, permittente hærede; idque non obstante excommunicatione lata?

I. Ad primum dubium: Dico non esse simoniam recipere æstimationem commendarū Militarium, quales sunt istæ. Nam commendæ militares non sunt materia simoniæ. Tenet expresse Suarez *tomo 1. de Relig. libro 4. de simonia cap. 27. num. 6. citans Victoriā, Rodr.*

*tom.*

tom. 4. *Addit. summa cap. 133. conclus. 11.* Reginaldum  
 tom. 2. lib. 19. num. 78. & alij: & probatur ex praxi. Nam  
 in Hispania vbi commendæ Militares frequentiores  
 sunt. Consuetudo antiqua est vt Reges estimationem  
 commendæ assignent viris nobilebus, vt certas fami-  
 lias ducant in vxores. Non est autem credendum tam  
 pios, & catholicos Reges id sic facere frequenter, &  
 publice, sciente Summo Pontifice, si res esset materia  
 simoniæ. Secundo, quia commenda nec est officium,  
 nec beneficium Ecclesiasticum, vt in illius æstimatio-  
 nis collatione incurri possit simonia: officium enim  
 Ecclesiasticum, vel beneficium datur propter actio-  
 nem spiritualem, vt catandi in choro, dicendi D. offi-  
 cium, & similes. At commendatur pro actione tempo-  
 rali, & sæculari, qualis est militare in bello. Sic tenet  
 Saa in *Aphor. verb. simonia num. 2.* & Rodriguez *cit. c. a.*  
 133. ait commendam esse ius mere temporale reci-  
 piendi decimas, quod ius potest conuenire puro sæcu-  
 lari. Nam sæcularis conducens redditus beneficij ali-  
 cuius Clerici pro hoc anno, pro quibus Clerico assi-  
 gnat certam summam pecuniæ singulis annis, habet  
 ius recipiendi decimas vt patet, & tamen non est simo-  
 niacus, quia illas decimas non recipit pro officio, vel  
 beneficio Ecclesiastico. Et eodem modo habens com-  
 mendam, licet habeat ius recipiendi decimas, non il-  
 lud habet propter officium, vel beneficium Ecclesia-  
 sticum, vel aliud spirituale, sed propter actionem tem-  
 poralem militiæ, ad quam paratus est vocante Rege.  
 Videantur prædicti Doctores citatis locis, vbi plura de  
 hoc dicunt, & alios citant.

2. Ad secundum dico, Maritum non teneri post mor-  
 tem soluere illa sex millia, de quibus quæritur, cum il-  
 la nunquam receperit in dote. Probo, quia in promif-  
 sione

sione illorum sex millium pro dote, virtualiter, vel etiam formaliter interuenit pactum, quo maritus se obligauit ea se soluturum, si uidelicet sibi traderentur pro sustentanda vxore, & oneribus matrimonij, hic enim est finis propter quem dos datur viro ab vxore: Cum ergo hæc pecunia sex millium in nauibus prædictis nunquam tradita sint marito, videtur quod ad soluenda hæc sex mille non obligetur, cum conditio non sit impleta, id est, Si mihi dederis dotem, soluam illam tibi post mortem. Quod probatur clare ex l. *Quæro.* §6. §. *Inter locatorem.* ff. *locati.* vbi dicitur. *Non implenti implendum non est:* & probatur ex opinione communi omnium Doctorum dicentium, contractum conditionalem non obligare, si conditio appositæ non impleatur: & hoc magis patebit ex solutione, vel responsione sequenti ad tertium, vbi probo non obligari hunc maritum ad soluendas arras, cum illi dos tradita non fuerit integra, nisi pro rata dotis.

3. Ad tertium dico, quod hæc fœmina non perdidit arras præcise ex eo quod diuortium petierit, & obtinuerit: & probo, quia si illa habuit ius petendi diuortium marito ad id causam dante, quale ius habuisse videtur cum per tres sententias illud obtinuerit, prosequens tale diuortium vsa fuit suo iure, nemo autem vtens iure suo pœnam meretur: ergo procurans, & obtinens diuortium per iudicem Ecclesiasticum, & cum iustitia non meretur talem pœnam qualis est arrarum amissio. Secundo. Quia vxor acquirit ius ad arras per consummationem matrimonij, sicut inter alios probat Molina tom. 2. de iust. tr. 1. c. 2. disp. 431. & citat ad hoc Anton. Gómez, Valascum, & alios: sed hæc mulier consummauit matrimonium, ergo acquisiuit ius ad arras, nec tale ius amisit per iustam procurationem diuortij

uortij, quia in illo procurando iuste, nulli fecit iniuriam, vt diximus. Ex alio vero capite *potuit hac mulier arras amittere*, si non in totum, saltem in parte, quia scilicet totam dotem promissam non tradidit marito. Est enim communis Doctorum opinio, quod vxore non tradente viro totam dotem promissam, non tenetur maritus arras soluere, nisi saltem pro rata dotis traditæ. Ita quod si nihil ex dote tradidit nihil illi debeatur pro arris: Si vero solam partem dotis tradidit, solum soluet arras proportionatas parti dotis traditæ: Sic tenet Sanchez *lib. 6. de matrim. disp. 37. num. 2.* citans multos tex. & Doctores, & Rabello *tom. 1. de oblig. inst. lib. 6. quest. 4. §. Tunc etiam.* Et probatur etiam per legem *quæro* citatam proxime in respons. ad secundum, & per rationem ibi adductam. Nam promittere arras pro dote est contractus conditionalis, & proinde non impleta conditione, si dotem dederis, non obligabitur vir ad solutionem arrarum promissarum. Quantitas vero arrarum, quas maritus pro dote potest promittere, est taxata in *lib. 4. Ordin. Portugall. tit. 47* vbi dicitur quod pro arris dabitur solum tertia pars dotis ab vxore traditæ.

4 Ad tertium dico. Quod videtur quod hæc mulier nõ potuerit esse caput domus, seu *cabeça do casal*, mortuo marito, eo quod cum illo non viuebat tempore mortis mariti. Probat, quia lex istius Regni *lib. 4. tit. 95.* in principio dicit, quod vxor per mortem mariti manebit caput domus, seu *cabeça do casal*, si viuebat cum illo in hora mortis commensalis illius &c. Hæc autem in hora mortis mariti non viuebat cum illo, cum iam ab illo fecerit diuortium, & viueret in monasterio. Nec obstat quod maritus in contractu dotis illi promisit quod illo mortuo, illa maneret caput do-

*mus sue*, illam gubernans vsque ad integram recuperationem dotis, & arrarum: Non obstat, quia hæc promissio mariti non potuit præiudicare legi citatæ Portugalliæ disponenti, quod vt vxor per mortem mariti maneat caput *domus*, & *cazalis*, debet conuiuere marito in hora mortis, quod in ista defuit: nam inferior per suum contractum non potest contraire legi superioris, vt patet ex *Reg. c. 4. in 6. de Regul. iur.* vbi dicitur, quod ea quæ contra ius sunt, debent pro infectis haberi, & alibi sæpe. Secundo non obstat, quia in contractibus præcipue attendenda est mens contrahentium: & clare colligitur, quod maritus in contractu dotis faciens illam per suam mortem caput *cazalis*, debuit habere mentem conformem ad talem legem nec credendus est voluisse quod caput domus suæ maneret mulier ab illo per diuortium separata: sed id promisit conformiter ad legem, si videlicet illa in horâ mortis conuiueret amicabiliter. Potest hoc etiam probari ex lege Dāni infecti in principio ff. *de damno infecto*, vbi dicitur quod verba debent intelligi iuxta subiectam materiam, & naturam contractus: ac proinde in verbis quibus maritus viuens illi promisit, quod per suam mortem maneret caput *cazalis*, considerata est materia, & contractus, de quo agebatur: erat enim materia matrimonij, & inter coniuges amicos, & ea de causa illam constituebat caput *cazalis*: quæ coniugalis amicitia mutata est per diuortium. Et confirmatur, quia promissio reuocari potest, si post illam res sunt notabiliter mutata: vt omnes doctores dicunt. At post istam promissionem quod illa per mortem viri maneret caput *cazalis*, res sunt notabiliter mutata per diuortium scilicet, quæ est maxima mutatio possibilis inter coniuges.

5 Quod

5 Quod vero attinet ad id quod obiter tangit prædictum quæsitum quartum, videlicet maritum ante diuortium illi dedisse apocham, seu scriptum in quo cōfitebatur se omnem dotem promissam in integrum recepiſſe: cum hinc pendeat maior pars resolutionis istius casus, antequam respondeam an talis apocha valida fuerit, noto primo: quod ista apocha, seu dotis receptæ confessio in re fuit donatio, per quam maritus donauit vxori dotem quam illa sibi debebat: Nam donatio est si tibi remitto actionem quam habeo in te: vt tenet Nauar. *consil. 1. de testam.* in fine dicens quod remittere est donare, Idem tenet Reginal. *tom. 2. lib. 2. §. n. 616. facit lex 18. Cod. de donat. & cap. veniens il primeiro de testib. cum gloss. ibidem, & gloss. in cap. si quis ordinauerit. de simonia*, verbo, *Ab executione*. Secundo noto quod donatio inter coniuges prohibita est per multa iura sæcularia etiā istius Regni, & per ius canonicum quos textus refert, & citat Rabello *tom. de obligat. inst. lib. 6. q. 13. sect. 2. num. 8.* Tertio noto, quod donatio inter coniuges si quando licite fit, confirmatur per mortem, dummodo ante mortem præcedat rei traditio vera, hanc tamen donationem poterit maritus in vita reuocare, vt expresse tenet Rabello citato proxime loco in fine *numeri 10. & sect. 3. num. 16. & 17. ubi num. 16.* ait posse hanc donationem inter coniuges reuocari, & expresse, & tacite: & tenet Molina *tract. 2. de inst. disp. 439 §. Secundum si eadem tom. 2.*

6 Hoc posito, censeo prædictam apocham, seu confessionem dotis receptæ, seu remissionem dotis fuisse nullam, & inualem. Fundamentum præcipuū huius dicti est, quia talis remissio, seu donatio inter coniuges non fuit confirmata iuramento in vita, nec confirmata per mortem mariti, cum ipse in vita saltem taci-

te reuocauerit, mouendo litem super validitate talis apochæ, seu confessionis: imo, & per ipsum diuortium fit de facto annullata talis remissio dotis. Hoc in terminis tradit Mol citata disp. & citato §. vbi loquēs de confessione dotis facta a marito vxori post celebratū matrimonium ponit hæc verba. *Interim tamen dum pe. seuerat matrimonium, posse reuocari à viro, censeri que reuocatum si fiat inter ipsos diuortium.* Sic ille. Et licet diuortium non fieret, sufficienter illam reuocauit maritus, facto suo, id est mouendo litem super validitate dictæ apochæ seu confessionis: hæc enim litis motio tacita fuit, imo clara reuocatio dictæ apochæ, & confessionis: non solum enim verbo, sed etiam facto potest quis facere reuocationem, argumento clare sumpto ex cap. *Dilecti* 2. de appell. vbi glossa verb. *facto pronocare*, multos tex. citat vtriusque iuris inter alia dicens, plus esse factis demonstrare, quam verbis dicere, pro quo citat l. ff. de edil. edic. si tamen §. ei qui, & ff. de leg. de quibus in fine, & cap. ad Audientiam eod. tit. de appell. cum ergo, & maritus reuocauerit facto, & diuortium ab illa procuratum interuenerit, dicendum omnino est prædictam confessionem dotis receptæ (aliàs falsam) & apocham super illa datam fuisse nullius valoris. Secundo principaliter probatur ex illis quæ tradit Rodrig. tom. 3. sum. cap. 133. concl. 21. dicens donationem factam inter coniuges dissolui, si post donationem factam inter ipsos ortæ sunt graues discordiæ, & inimicitia, etiam si nascuntur culpa coniugis donantis: pro quo citat tex. iuris civilis, & quatuor graues Doctores Recentiores, quos vide. At inter hos coniuges post datam apocham, & remissionem dotis ortæ sunt graues discordiæ, cum propter illas sententia diuortij lata fuerit. Quod idem clarius ait Rodrig. cit. cap. concl. 20. vbi ait donationem inter coniuges reuocari, si inter illos fiat diuortium,

nisi is qui fecit donationem ratificet, vel post diuortium reconcilientur:& citat in marg.vnā leg.Rozel.Syl.Angel.Idē tenet Mol.10.2.de iust.17.2.disp.189.§. Tacite censetur, dicens id intelligi cum diuortium sit inuito altero coniuge, vt hic contigit:& citat Mol.tres leges iuris ciuilibus:& hi cōiuges post diuortium non sunt recōciliati, nec maritus ratificauit remissionē dotis, imo facto reuocauit motione litis circa dotis confessionem. Quod itē vir possit reuocare donationem factam vxori tenet Sanc.lib.6.de Matr.disp.1.n.2.multa citans cum Ordin. istius regni lib.4.tit.65. Tertio facit ad hoc quod tradit Rabel.cit.lib.6.q.10.sect.2.§. His positis. citās Couar. Barbof.& alios, videlicet, quod hēres huius defuncti possunt litem mouere circa illam confessionem dotis factā à defuncto, an fuerit simulata & ficta, vel fraude obtenta: quod ex indiciis coniecturari debet, quas circūstātiās, & indicia hēres ventilabunt, vide Moli.cit.disp.439.§.vt quod tenendū sit. Adde quod si vxor per preces importunas hanc dotis confessionem extorsit à marito, tunc per mortē mariti non confirmatur, Sanc.lib.4.de Matr.disp.10.n.7.saltem in foro conscientie.

7 Ex omnibus proxime dictis videtur colligi, quod dicta vxor male fecit, imo peccauit, eo quod lite pendente super validitate remissionis dotis factæ à marito, illa voluit recuperare totam dotem à se non datam, & inualide sibi remissam. Constat hoc ex eo quod in iure canonico, titulo *vt lite pendente in 6. & Decretalibus*, præcipitur vt lite pendente nihil innouetur: illa vero innouauit, dotem recuperans etiam impetratis censuris à iudice Ecclesiastico. Nec excusabitur illa dicens, quod maritus in vita id illi concessit, faciens illam post mortem caput domus suæ, & *cabeça do casal*. Nam vt supra diximus, maritus illam non poterat fa-



cere caput cazalis contra dispositionem legis, eo quod tempore mortis non conuiuebat cum marito, & præterea quia apocha, seu confessio, & remissio dotis fuit à viro reuocata in vita, vt patet ex tot Doctoribus supra citatis.

§ Iam ad quintum quaesitum dico, quod si excommunicatio lata fuit, seu impetrata sub titulo, quod illa esset cabeça do cazal, ad recuperandam totam dotem, credo quod excommunicatio fuit nulla, & proinde non ligabat. Probo primo, quia quando aliquid impetratur à iudice per narrationem falsi, concessio iudicis est nulla, vt Doctores dicunt in materia de matrim. maxime Rodrig. tom. 2. qq. q. 46. art. 6. §. *Pro maiori.* & in hoc casu narratum est falsum, quod scilicet esset cabeça do cazal, ad recuperandam integram dotem, cum de hoc esset lis mota vt patet. Secundo, quia ex parte iudicis error, seu deceptio passiuæ intercessit, putauit enim illam esse cabeça de cazal, & habere ius ad exigendam totam dotem, illamque recuperandam; quod ius illa non habebat ob multa à nobis dicta proxime num. 6. Si vero iudex excommunicationis sciret illam non habere ius ad totam dotem recuperandam, profecto excommunicationem non fulminaret in re tam dubia, maxime cum super remissione dotis lis mota iam esset. Tertio, quia iudex Ecclesiasticus non potest cogere per censuras, vt aliquis soluat debitum incertum, sed solum id quod est debitum certum. At incertum est an huic vxori tota dos debeat, tum ob litem motam, tum ob dicta num. 6. quia illa dotem totam marito non tradidit, quam totam vult recuperare ex titulo confessionis, seu remissionis factæ à marito, quæ tamen à marito reuocata est, & per diuortium annullata. Cum ergo tam incertum sit an illi debeat

tota

tota dos, non poterit iudex obligare per censuram ut debitum tam incertum illi solvatur. Facit quod ait Rodrig. *tom. 3. sum. cap. 105.* videlicet, quod quando dubitatur an excommunicatio sit iusta, vel iniusta respectu causæ, quæ movit superiorem ad illam fulminandam, non tenetur obedire ille, qui si obediat patietur aliquod damnum in se, vel damnum alteri causabit. In hoc vero casu poterit contingere ut aliquis restituens huic vxori rem illi non debitam, cogatur postea idem restituere hæredi defuncti cum suo damno notabili, si videlicet postea iudex sæcularis iudicet vxori non deberi totam dotem.

9 Ad sextum dico, quod licet hæc excommunicatio esset valida, famuli, & cæteræ personæ, de quibus hic quæritur, non tenentur manifestare id quod habent. Probo primo, quia excommunicatio lata pro furtis, vel aliis rebus detentis, & usurpatis non obligat illos qui rem aliquam possident iusto titulo, ut isti possident, eo quod defunctus illis debebat hæc debita clara & liquida. Quod vero retinens rem cum iusto titulo non teneatur parere excommunicationi, neque item illi qui sciunt talem possidere illam rem iuste, quod non teneantur hi de illo sic habente denunciare, est opinio communis, maxime Nauar. *in sum. lat. cap. 17. num. 113. & seqq.* Henriq. *tom. 2. lib. 13. cap. 21. num. 1.* Si vero aliquis horum plus haberet de bonis defuncti quam esset debitum quo sibi defunctus obligabatur, residuum debiti reddere tenebitur illi cui iudicatum fuerit deberi. Addo quod isti, de quibus hic quæritur, non tenentur denunciare cum periculo claro amittendi id quod possident, scientes certo moraliter quod illud quod habent ut sibi debitum, vel postea non recuperabunt, vel in recuperando facient magnas expensas. Sed ad maiorem

istorum securitatem; satius illis erit credere quod excommunicatio lata fuit nulla ob dicta supra *mem.* 8. & eo quod non est obligatus quis soluere debitum domino incerto, ut supra diximus.

10. Ad septimum respondeo eodem modo quo ad sextum, videlicet quod isti, de quibus quæritur in 7. casu, qui ante excommunicationem compositionem fecerant, & habebant apochas, & cautiones ab hærede, & testamenti executore datas, non obligantur ad restituendum, vel denunciandum, possident enim iusto titulo, maxime cum non obligentur bis soluere idem debitum, & cum periculo claro, quod postea rem suam non recuperabunt. Et quia iam soluerunt hæredi qui erat in possessione recuperandi debita: & possessio istius vxoris fuit quasi per intrusionem ob litem pendentem. Si vero forte per iudicem sæcularem iudicatum fuerit quod vxori tota dos reddenda sit ob apocham à marito datam vxori in vita per confessionem dotis: tunc isti de quibus quæritur deobligabuntur à restitutione, siquidem in re iam soluerunt quod debebant hæredi, & hæres per sententiam soluet illi vxori id quod isti debebant, & sibi hæredi soluerant, & è contra, si sententia feratur, quod isti vxori tota dos non debebatur, etiam hi de quibus quæritur non tenentur isti vxori soluere, siquidem iudicatum est illi non deberi totam dotem quam petebat: & quod illi debetur per sententiam iudicis habita proportionem dotis datæ, soluetur ab hærede per sententiam iudicis.

11. Ad octauum dico primo, quod si quando defunctus mortuus est, non erant in domo sua aliqua bona propria, sed solum aliena, quæ ille debebat creditoribus; in tali casu ex his bonis alienis facienda est pompa funeralis moderata tamen: & ad hoc poterat hæres

recu-

recuperare debita quæ defuncto debebātur, si non erat aliqua pecunia, de qua fierent funerales expensæ, neque debitores id soluentes excommunicationem incurrebant. Sic tenet Sayro *Clau. Regia lib 10. tract. 5. cap. 10. num. 23.* citans multos Doctores, & dicens, quod quando in domo defuncti non sunt alia bona nisi illa, quæ debet realiter, de illis faciendæ sunt expensæ funerales, quia creditor oppositum volens erit inuitus irrationabiliter. Sed si tempore mortis defunctus haberet alia bona propria, de illis non de alienis pompa funeralis faciendæ est. Neque item de bonis, seu de illis, quæ sunt alteri debita poterunt solui legata, & obligationes iniunctæ in testamento. Nam stante lite pendente, an vxori dos tota debeatur, mobilia quæ sunt in domo defuncti sunt bona litigiosa, vt patet cum super illis mota sit lis: bona vero litigiosa quatenus talia sunt, non possunt alienari, seu distrahi, vt colligitur ex tertio ca. *vt lite pendente*, cum gloss. ibi in verbo *litigiosi*, & eodem titulo in *6. cap. 1.* cum glossa ibidem verbo *litigantibus*. Qua de causa stante lite pendente cessandum est ab his solutionibus dubiis donec feratur iudicis sententia, cui nam primo soluendum sit, & hoc maxime quia dos mulieris habet multa priuilegia vt debeat præferri cæteris debitis.

12 Ad nonum dico sicut ad octauum, videlicet quod durante lite circa dotem, iste debitor defuncti non potest se componere cum creditore ipsius defuncti, quia incertum est vtrum hæredi, an vero mulieri soluendum sit. Quod si se composuerint modo exposito in quæsito, periculum erit quod distrahatur res litigiosa, & alteri debita, contra textus citatos num. præcedente, & sic soluens exponitur periculo bis soluendi vt supra dictum est. Debet ergo debitor defuncti stante lite per-

dente, & excommunicatione valida existente, denun-  
ciare iudici excommunicationis, se certum quid debe-  
re defuncto, & videat cui illud dandum sit; quod ta-  
men dabit cum cautione debita, ne postea illud amit-  
tat, & bis soluat idem debitum.

33 Ad vltimum dico, quod si iudex mandans mulie-  
ri dari mille aureos singulis annis pro alimentis, iudi-  
cauit per se, ac directe causam dotis, quod scilicet tota  
deberetur mulieri, ob confessionem mariti, & iudicās  
apocham illi datam à viro fuisse validam, tunc mulier  
in foro conscientie potest retinere dictos mille aureos  
absque obligatione aliquid ex illis receptis restituen-  
di, quia per iudicis sententiam licite eos retinet. Si vero  
iudex qui iussit illi dare illos mille aureos pro alimen-  
tis non iudicauit ex officio, causam dotis, nisi ex respec-  
tu diuortij, & ob solam informationem datam ab illa  
dicente quod ad matrimonium tradiderat pro dote suo  
viro viginti octo mille aureos, iudicans quod respectu  
talis dotis debebantur illi mille aurei, tunc res est ma-  
gis dubia. Nam imprimis certum est, quod vir tenetur  
uxorem alere etiam si illam sine dote duxerit, vt tenet  
Sanch. lib. 4. de matrim. disp. 26. num. 21. citans Innocen-  
tium cum aliis octo grauib. Doctoribus: & proinde  
hic vir tenetur hanc uxorem alere, maxime cum ab il-  
la saltem partem dotis receperit: & alere illam debet  
conformiter ad suum statum, etiam post sententiam  
diuortij. Sola ergo quæstio esse poterit, an illi mille  
aurei alimentorum fuerint excessiui, maxime cum illa  
se receperit ad conuentum Monialium vbi Minores  
expensas facere debebat: & considerandum etiam est  
an attenta sua persona, prædicta mille scuta essent ex-  
cessiua pro alimentis, quod meum non est iudicare: &  
proinde stante dubio, illa accedente sententia iudicis  
secu,

secure videtur potuisse illos mille aureos pro alimentis recipere, nec illos debere restituere, cum, vt proxime dicimus ex Innocentio vir teneatur alimenta dare vxori quam duxit etiam indotatam. Addo etiam, quod licet supra num. 3. dixerim arras dandas esse vxori iuxta qualitatem dotis adductæ. Alimenta tamen constante matrimonio non sunt illi danda iuxta quantitatem dotis traditæ viro, sed iuxta qualitatem vxoris talis viri.

## C A S V S XVIII.

*De cuiusdam virginis defloratione, & homicidio fere inde secuto.*

**Q**uidam homo valde nobilis ingrediebatur domum cuiusdam fœminæ viduæ, cum cuius filia virgine habebat oscula, & tactus obcœnos, idque cum facilitate, illaque non multum repugnante in principio, licet ille id precibus, & promissis antea impetraret: idque fecit per annum cum dimidio: postea intentans de facto copulam cum illa habere, restitit illa vehementer, & actus non est subsecutus. Postea alia die intentans ille eandem copulam actuaalem, restitit illa similiter, sed non cum tanta vehementia sicut prima vice fecit, & sic illam deflorauit: & declaratur quod quando ille prima vice copulam intentauit, illaque restitit, ille minatus est illi mortem, obijciens eidem, quod ideo copulæ non consentiebat, quod ab alio iam deflorata erat. Quæritur an teneatur vir illam dotare, & deflorationem restituere? & declaratur quod iste  
vir

vir est aliàs matrimonio cum alia copulatus.

2 Hic idem vir, eo quod quidam frater istius puellæ, illam abduxit à domo matris, intentauit hunc fratrem puellæ in publico iniuriare: & cum hoc animo intrauit domum matris, vbi tunc iste filius existerat die clara, cum intentione formata, & deliberata non occidendi, sed solum intendens vt illum de domo matris fugere faceret. Ingressus domum matris, frater puellæ occurrit intranti euaginato gladio, & paruo pugione, & prius intentauit statim pectus intrantis gladio perforare, quam intràs nobilis gladium euaginaret. Quod videns intrans, & credens propriam vitam periclitari, nisi iuuenem occideret, euaginavit gladium, & prædictum iuuenem interfecit, ita tamen vt ipse occisor manserit cum tribus vulneribus ab adolescente receptis. Et declaratur quod iste vir vltra quam quod erat valde nobilis, erat etiam reputatus viribus fortissimus. Declarat etiam ipse occisor, quod si ille pro sui defensione minus faceret, quam fecit, sua vita periclitaretur. Declarat etiam, quod in alio tempore, ante istum ingressum habuit animum occidendi hunc adolescentem: sed illo animo deposito nunc cum domum matris intrauit proposuit formaliter illum non occidere, sed solum ad fugam cogere. Hoc posito, quæritur an iste occisor peccauerit mortaliter occidendo pro sua defensione: & vtrum homicidium fuerit voluntarium an casuale: & vtrum teneatur occisor restituere vitam, & damna hæredibus defuncti.

1 Ad primum quæsitum dico, absque dubio teneri defloratorem illam dotare, illique restituere iuxta qualitatem personæ ipsius sceminæ. Primo, quia interueniunt in principio preces importunæ hominis nobilis ad sceminam inferiorem sibi, & promissiones, quæ  
duo

quo minuunt voluntarium, maxime in fœmina fragili, de quo Sanchez *lib. 4. de matrim. disput. 10. num. 4. &* Rabello *tom. 1. de obligat. iust. 1. par. lib. 3. quest.* qui dicunt preces importunas, & promissiones minuere voluntarium. Secundo, quia minatus est illi mortem, & exprobrauit, quod videretur ab alio deflorata: solæ autem minæ mortis hominis robusti erga fœminam fragilem causant omnino metum cadentem in virum constantem, & tollunt omnino voluntarium, maxime cum fœmina ante has minas restiterit. Constat vero quod extorta per metum etiam leuem sunt restituenda, iuxta Sanch. *cit. lib. disp. 9. num. 4.* Neque obstat quod puella antea consentiebat facile in osculis, tactibus, &c. vnde posset videri, facile consensisse in copula; Non obstat, nam qui dat libenter minus, non censetur dare libenter quod est maius: multo vero minus est consentire in osculis, & cæteris, quam in defloratione per quam fœmina perdit matrimonium futurum, & incurrit multo maiorem infamiam. Neque obstat quod ait Sanchez *citata disputatione 10. num. 4.* raro scilicet preces importunas viri inducere restitutionis obligationem, nisi quando (ait) puella vi talibus precibus voluntate repugnante, solum vt importunitatem repellat, consentit deflorationi. Ad hoc enim dico quod hæc omnia possumus credere hic contigisse, & puellam consensisse tantum vt importunitatem repelleret, imo vt minas præteritas mortis fugeret: & illius etiam secunda resistantia satis indicat se consensisse victam precibus. Aliud exemplum ponit Rabello *citata questione num. 5.* & aliud Vega Minimus 2. parte summa verbo *stuprum casu 1.* quæ confirmant hanc responsionem, quæ omitto breuitatis gratia, quia suppono hoc esse certissimum.



2. Ad secundum quæsitum dico primo, hoc homicidium non fuisse voluntarium : vt enim probat Suarez *tom. de censuris disput. 44. sectione 1. num. 2.* ex D. Thoma ibi citato, vt aliquid sit propriè ac directè voluntarium, non satis est quod sit voluntarium modo aliquo in sua causa, sed opus est quod sit voluntarium in se, & in suo effectu. Exemplum Habere me domi medicinam purgatinam colerae, non est propriè, & formaliter velle purgationem, vel potionem sumere, quia possum aliàs illam medicinam habere domi, vt illam dem alteri: vel possum non habere necessitatem illius. Sic igitur vt homicidium sit propriè, & formaliter voluntarium, debet esse volitum, & prætensum clare in se, & ita vt clare proponat occidere. Et non sufficiet solum velle vulnerare, quia vulnerare non est occidere. At hic homo licet voluerit cogere adolescentem ad fugam, hoc non est velle occidere: quinimò expresse mentaliter proposuit se non occisurum, quod propositum excludit omnem voluntatem occidendi. Si enim dicas hoc homicidium esse voluntarium, sequeretur quod esset directè volitum, & directè nolitum. Probatur sequela, quia primo fuit directè nolitum: hic enim clare proposuit non occidere, & sic fuit directè nolitum: & per te est voluntarium, ergo est directè volitum: quæ implicatio non est admittenda. Secundo probatur, quia principaliter iste homo voluit se defendere, cum occidit, vt ipse ait: itaque solam defensionem voluit directè, occisionem verò indirectè, & minus principaliter. Addè quod vir nobilis, & reputatus fortissimus non poterat cum honore fugere ab adolescente inferiore sibi in nobilitate, idque in luce clara die: ac proinde homicidium fuit solum casuale. Videatur Suarez *citata disputatione 44. num. 4. sect. 1.* vbi clare tenet quod  
is qui

is qui solum vulnerare intendit, si casu ex calore iracundiae occidat, non esse homicidam voluntarium saltem in foro conscientiae: hic autem minus intendit quam vulnerare, solum enim intendit fugam causare.

3 Dico secundo. Hunc hominem peccasse mortaliter, & incurrisse irregularitatem homicidij casualis. Quod peccauerit mortaliter constat quia licet non intenderit occidere, tamen dabat operam rei illicitae. Intrauit enim domum alienam cum armis, & intendens cogere ad fugam filium matris illius cum infamia, quae omnia illicita sunt & iniuriosa, & occasionem dantia, ut filius se defenderet cum armis, & intrantem violententer domum matris, expelleret: & ille sic intrans debuit advertere has omnes occasiones posse esse causam homicidij: Quod vero id teneretur, & deberet advertere, colligitur clare ex cap. ultimo de homicid. in 6. ubi Papa, de quodā, qui iussit alium verberare, exprimens, ut cauere ne occideret: & mandatarius excedens in flagellando occidit: respondet Papa quod talis mandans incurrit irregularitatem, quia tenebatur advertere tale homicidium contingere potuisse. Quod vero irregularitatem incurrerit, probatur ex cap. ult. proxime citato, & ex cap. Tua nos de homicid. casus enim ibi adducti sunt similes isti: & praeterea quia omnes Doctores dicunt incurri irregularitatem homicidij casualis quando occidens antea dabat operam rei illicitae, & occasionatae ad occidendum, quod in isto homicida contigit, ob iam supra dicta in principio huius numeri: & utraque pars istius dicti videtur probari ex ijs, quae tradit Candelabrum Aureum in tract. de irregular. num. 212. vide Syluest. ver. homicidium 3. q. 4.

4 Dico tertio hunc teneri restituere haeredibus occisi damna secuta, si quae illis ex morte illius resultant.

runt, ad arbitrium prudentis viri. Probatur primo ex illa Regula iuris quæ dicit. Qui causam damni dat dñum dedisse videtur: iste vero ingrediens domum alienam viduæ, cum animo iniuriandi filium causam damni dedit: & hoc videtur expresse tenere D. Thom. 2. 2. q. 64. ar. 8. in fine cap. dicens, quod qui dat operam rei illicitæ non euadit homicidij reatum, si ex ipsius opere mors sequatur. Nota verba, homicidij reatū, idest obligationem ad pñam subeundam & damna restituēda. Et probo ex eo quod tradit Rabello *cit. lib. q. 12.* citans Mercatum, videlicet, quod intrans domum alicuius animo adulterandi, vel faciendi aliquam iniuriam, ex qua fuit aggressus à marito, vel alio si iste sic intrans occidit maritum, vel alium vt se defenderet, adhuc teneretur restituere aggressori occiso, propter causam quam illi dedit ob iniuriam intentatā: imo addit quod vir etiam nobilis tenetur tunc fugere, si prius intentasset talem iniuriam. Constat vero quod hic de quo agimus ingressus est domum animo faciēdi iniuriam adolescenti, & sciebat adolescentem esse intus: cum tamen intrans cum animo adulterandi supponat maritum non esse domi vxoris cum qua intēdit adulterare: & proinde maiori periculo homicidij se exposuit iste quam intrans animo adulterandi, & proinde occidens aggressorem tenetur ad restitutionem. Facit denique lex si plures §. Sed si fidei iussor ff. qui satisfacere cogantur, vbi dicitur quod lex non suffragatur subijcienti se periculo sua sponte: & iste libenter se subiecit periculo occidendi, vt patet ex dictis.

**CASVS**

## CASVS XIX.

*De quadam emphyteusi, cum certis conditionibus facta.*

**Q**uidam dominus directus Ecclesiasticus dedit Petro quandam possessionem immobilem sub emphyteusi ordinario contractu, sic dicens in contractu. Do Petro in emphyteusi talem certam possessionem, pro vita trium personarum, ita videlicet, ut primus possessor in fine vite sue nominabit secundam personam Et secunda eodem modo nominabit tertiam, qui omnes singulis annis soluent directo domino certam pensionem cum declaratione, quod nullus illorum possit alienare, nec distrahere, nec transferre dominium utile eius emphyteusis, seu possessionis.

Possedit Petrus virtute predicti contractus dictam possessionem immobilem titulo primæ vite, & virtute illius, in testamento quod fecit, nominavit suam uxorem pro secunda vita. Postea ductus aliquibus respectibus, per scripturam publicam nominavit nepotem suum, & in ipsum per scripturam transtulit ius suæ primæ vite absque licentia directi domini, & sibi reservavit usumfructum dictæ possessionis in vita: & nepos statim possessionem accepit dictæ rei emphyteuticæ. Postea idem Petrus fecit aliam scripturam in qua iterum nominat propriam uxorem pro secunda vita, & reuocavit scripturam, quam fecerat in contrarium: & declaravit Petrus in suo ultimo testamento, se ex obligatione conscientie iterum suam uxorem nominasse pro secunda vita; iterumque reuocavit alias scri-

pturas in contrarium, & vxori commisit vt statim possessionem acciperet illius rei immobilis datæ in emphyteusim: cuius iam nepos possessionem acquisiuerat. Lis mota est, & per primam sententiam adiudicatum est, quod Petrus in possessione persisteret, quam prior receperat. Vxor vero de proprietate litigaret.

Quo posito, quæsitum fuit, quâ scripturam ex istis teneatur directus confirmare, an factam prius Petro, an factam vxori: & videtur quod scriptura facta Petro fuerit inualida, primo, quia facta est contra formam contractus; Nam directus dominus in contractu apposuit ne vllus ex illis emphyteutis posset dominium suum in alium transferre: Petrus vero per scripturam factam nepoti dominium suum in nepotem transtulit sine licentia directi domini: non seruata vero forma contractus, corrumpit contractus, vt omnes fatentur. Secundo, quia Petrus per vltimum testamentum reuocauit scripturam factam nepoti, seu translationem sui iuris: at reuocatio facta in testamento validior est quâ præterita scriptura facta nepoti. Nam vltimum testamentum reuocat etiam priora testamenta testatoris, si quæ fecerat, & proinde potuerat reuocare priorem scripturam factam nepoti, quæ minorem vim videtur habere, quam testamentum prius factum ante vltimum testamentum.

I. Ego credo standum esse scripturæ illi priori quæ nepotem nominauit transferendo in illum de facto ius vtile quod habebat, reseruatis sibi fructibus in vita. Totum ac præcipuum istius fundamētum, seu probatio est lex istius Regni, in lib. 4. *Ordinat. tit. 37. §. 1.* vbi postquam dicit, quod is qui in re emphyteutica habet ius nominandi vsque ad mortem, potest nominare semel, & bis, & quoties voluerit. Subiungit tamen mox  
ibidem,

ibidem, quod si nominans per scripturam publicam transfulerit in vita rem emphyteuticam in aliū, transferens in alium totum ius quod habebat in illa, sibi reſeruans vſumfructum illius, tunc iam non poterit perſonam aliam nominare: ſed potius iſte in quem trāſtulit dominium vtile, poterit de re illa emphyteutica diſponere. Quo nil clarius dici potuit ad noſtrum caſum: nam Petrus quidem prius nominauit vxorem. Poſtea hanc nominationem factam ſine ſcriptura, & ſine trāſlatione dominij vtilis, per ſcripturam publicam nominauit nepotem, transferens in illum dominium vtile quod habebat cum reſeruatione fructuum, iuxta citatam legem Luſitaniæ: ergo non potuit iuxta eandem legem alteram nominationem, vel ſcripturam facere contra dictam legem: maxime cum nepos iam haberet poſſeſſionem acquiſitam in re emphyteutica. Vult enim prædicta lex, quod nominatio facta per ſcripturam cum translatione dominij vtilis ſit nominatio irreuocabilis. Ratio vero iſtius legis eſt: nam in nominatione ordinaria facta ſine ſcriptura, & ſine translatione dominij (qualis primo facta eſt vxori) non abdicat à ſe nominans ſtatim dominium vtile quod habet in re emphyteutica, ſed innuit quod tale dominium conferet poſt mortem. Cum vero tale dominium vtile transfert in vita per ſcripturam publicam cum reſeruatione fructuum, ſtatim abdicat à ſe dominium vtile talis rei emphyteutiæ, ac proinde non poteſt de illa re emphyteutica amplius diſponere, cum iam illius dominium à ſe tranſfulerit per conſeſſionem dictæ legis. Exemplum eſſe poterit in re vendita. Nam poſtquam dominus rei alicuius per venditionem iuſtam, & traditionem rei venditæ, abdicauit à ſe dominium rei venditæ, iam non poteſt illius rei venditæ

dominium alteri applicare, quod suo modo facit ad propositum casum.

2 Pro solutione argumentorum suppono breuiter rem esse certissimam apud omnes, in re emphyteutica tradita cum placito nominandi duplex dominium considerari: primum dicitur dominium directum, seu quasi radicale, quod manet apud primum institutorem emphyteutis, & eius hæredes, per quod scilicet dominium obtinet ius, ut res emphyteutica non possit omnino alienari, seu vendi ab emphyteuta sine licentia ipsius domini directi, ne videlicet per talem venditionem dominus directus amittat pensionem, seu annum censum, quem habet in re emphyteutica. Aliud dominium super re emphyteutica manet apud emphyteutam, quod dicitur dominium utile, per quod dominium habet ius vtendi omnibus fructibus rei emphyteuticæ. Et quando emphyteuta in vita, vel in morte nominat alium, non transfert in illum primum dominium directum, quod pertinet ad directum dominum: sed transfert in illum secundum dominium quod dicitur utile, seu quod habet in vsu fructus rei emphyteuticæ.

3 Hoc posito, ad primum argumentum dico Petrum cum per scripturam nominauit nepotem transferendo in illum dominium utile, quod habebat, non id fecit sine licentia domini directi, nec cum illius præiudicio. Nam ipso facto quod idem dominus directus dedit illi potestatem nominandi quem voluerit, manente semper dominio directo, & pensione soluenda apud ipsum directum dominum, in tali casu Petrus nominauit cum expressa licentia domini directi: & quamuis viuens Petrus transfulerit in nepotem dominium utile quod habebat in re emphyteutica, hæc translatio talis

talis dominij non nocet domino directo cum ab illo  
 non auferat dominium directum nec pensionem illi  
 debitam. Neque item translatio huius dominij utilis,  
 est illa quæ prohibetur sub conditione in contractu  
 emphyteutico, in quo dicitur ne res emphyteutica  
 alienetur, neve eius dominium transferatur. Sed illa  
 conditio intelligitur, ne res omnino alienetur per ven-  
 ditionem, vel per translationem dominij directi, per  
 quæ dominus directus perdit pensionem, & domi-  
 nium directum. Et proba non intelligi illam conditio-  
 nem in contractu emphyteutico de translatione do-  
 minij utilis non transferenda: quia si de ista intelli-  
 geretur, esset conditio appposita contra legem expre-  
 sam Regni citatam quæ permittit emphyteutæ fa-  
 cere translationem dominij utilis in sua vita modo  
 prædicto. Conditio vero appposita in contractu con-  
 tra dispositionem legis, est nulla, & tanquam nulla re-  
 ijicitur. Iuxta illam Regulam *iuris in 6.* dicentem: quæ  
 contra ius fiunt, debent utique pro infectis haberi.  
 Hæc mea responsio est Iulij Clari *tit. de emphyteusi q. 13.*  
*§. ulterius quaro,* & Rabelli *de obligat. iust. lib. 13. de em-*  
*phyteusi q. 4. num. 11.* qui cum aliis ibi citatis dicunt, quod  
 licet emphyteuta non possit alienare rem emphyteu-  
 ticam: Si tamen primus institutor dedit ré emphyteu-  
 ticam pro se, & pro aliis ( ut fuit ista pro tribus vitis) in  
 tali casu dicunt quod poterit emphyteuta rem aliena-  
 re: explico ego, id est dominium utile in sua vita trans-  
 ferre: & addit Rabello sufficere ad hoc consensum ta-  
 citum domini directi. Iulius vero Clarus dicit esse opi-  
 nionem communem. Tenet hoc idem expresse Iulius  
 Clarus *codem lib. de emphyteusi q. 15. num. 1.* ubi dicit em-  
 phyteutam Ecclesiæ, qualis est iste, posse donare ius  
 suum, dummodo id faciat sine præiudicio Ecclesiæ: &



citatur ad hoc Baldum, & alios. Et licet Iulius Clarus in ead. q. dicat ad id requiri expressum consensum domini directi, id intelligitur quando res emphyteutica alienatur in totum, videlicet per venditionem: & quod sic fit intelligendus Iulius Clarus, probatur quia statim post, addit, quod in tali alienatione soluendum est laudemium domino directo, quod non soluitur nisi quando res emphyteutica alienatur in totum, non vero soluitur laudemium in sola nominatione rei emphyteuticæ, quia per hanc solam non exit res à potestate domini directi: & eodem modo debet intelligi Ordinatio istius Regni *eodem lib. 4. tit. 38.* cum dicit emphyteutam non posse alienare absque licentia domini, & quod si alienet, soluet quarentenam. Quia quando in titulo præcedente lex locuta est de nominationibus rei emphyteuticæ, per quas res non alienatur, nihil ibi locuta est lex de soluendo laudemio, nec de noua licentia ad nominandum, vel transferendum dominium utile: sed supposuit sufficere antiquam licentiam institutoris datam ad nominandum post se aliam personam.

4 Ad secundum argumentum dico primo non potuisse Petrum per testamentum reuocare scripturam factam nepoti cum translatione iuris acquisiti, & postquam Petrus erat in possessione rei emphyteuticæ: constat clare quia nemo potest testamento reuocare id quod iuxta legem valide donatum est cum possessione iam quæsitâ. Exemplum si vendiderat Petrus viuens equum, illumque iam tradiderat Francisco, cum possessione equi iam quæsitâ: nunquid poterit testamento reuocare venditionem, cum iuste equum Francisco iam tradiderit? Sic igitur cum Petrus iuxta legem Regni iam nepoti tradiderit ius ad rem emphyteuticam, idque fere recepto pretio, idest receptis fructibus il-  
lius

lius, quos sibi reſeruauit, iam non poterit illam ſcripturam, & translationem per teſtamentum reuocare. Dico ſecundo ad id quod addit argumētum, videlicet, quod ſi vltimum teſtamentum reuocat alia teſtamenta prius facta ab ipſo teſtatore, etiam poterit reuocare ſcripturam factam in vita ab ipſo teſtatore cum traditione ipſius rei: hoc inquam omnino negandum eſt. Nam quando teſtator per prius teſtamentum aliquid mihi donabat, per talem donationem nondum in me trāſtulit dominium rei ſic donatæ, ſed per ſolam mortem quæ teſtamentum confirmat, acquirō illius rei dominium, & trāditionem, & ideo teſtamētum vltimum poteſt annullare ante facta teſtamenta, quia nondum erant morte confirmata, nec legatarij in illo priori teſtamento poſſeſſionem, vel dominium rei legatæ acquiſierant. Ac ſcriptura contractus facta à teſtatore ante mortem cum translatione dominiij, & traditione rei, ſtatim eſt confirmata per translationem dominiij, vt patet in exemplo ſupra poſito de re vendita: & ideo poteſt teſtator reuocare teſtamentum prius, non verō poteſt reuocare ſcripturam factam ſeruata diſpoſitione legis, in qua teſtator iam trāſtulerat à ſe dominium quod habebat, ſicut contigit in hoc caſu.

---

### CASVS XX.

*An poſſit Epiſcopus celebrare in Oratorijs,  
& ſui Capellani.*

Circa celebrationem miſſæ in Oratorio, mihi propoſita ſunt dubia ſequentia. Primum. An poſſint Epiſcopi hodie altare particulare erigere, & in illo ce-

lebtrare, vel facere celebrare?

Secundum. Si postquam illud in suo pallatio erexerint; vel in sua villa rurensi possint in eo celebrare quicumque sacerdotes voluerint? & hoc absente ipso Episcopo?

1. Antequam ad dubia respondeam suppono primo *in c. finali de privilegiis in 6.* hoc priuilegium Episcopis sic concedi. *Vt possint altare habere viaticū, & in eo celebrare, ac facere celebrari ubicunque.* Finis vero ob quem à Papa hoc priuilegium illis conceditur, ibidem exprimitur; quia scilicet sæpe Episcopi absentes sunt à suis Ecclesiis ob diuersas causas: *Nec semper possunt commode ad Ecclesias accedere pro Missa celebranda, vel audienda in ipsis.* In quibus verbis innuitur tale priuilegium illis concedi solum quando absentes sunt à suis Ecclesiis, maxime quando sunt in itinere. Propter quod Valer. Cartuxanus *libr. de differentia vtriusq. fori. ver. Missa. differentia 2.* nouissime dicit, quod cessante ista causa, si videlicet Episcopus non est in itinere, vel in infirmitate, non posse illum celebrare, vel celebrare facere in Oratorio sui pallatij: citat ad hoc declarat. Cardinal. Romæ, quam dicit esse in ordine 841. qui hoc dubium sic declararunt. Idem refert Ludoicus de Beja in suis Respon. Moral. 4. par. casu 33. §. *Aduertendum tamen.* & probari potest ex capite *Cum cessante. de appellation.* vbi dicitur quod cessante causa cessat effectus: vnde cum causa illius priuilegij concessi Episcopis fuerit itineratio, vel infirmitas, his cessantibus cessat priuilegium. Addi potest ad hoc, quod ego vidi meis oculis anno 1626. in aula cuiusdam domini tunc Collectoris istius Regni, publicari edictum Sanctissimi D. N. Papæ Urbani VIII. in quo prohibebat ne Episcopus aliquis, vel similis prælatus licentiam dare posset ali-

cui

cui celebrandi, vel celebrare faciendi in Oratoriis priuatis, & scirent omnes talem licentiam concedere esse referuatum soli Summo Pontifici: & Azor *tom. 1. sum. lib. 10. cap. 26. in fine*, dicit eisdem Cardinales declarasse non posse Episcopum dare licentiam celebrandi in Oratoriis particularibus, quod consonat nouo mandato Urbani VIII. proxime citato. Cum vero Episcopis adempta sit potestas dandi licentiam aliis celebrandi in Oratoriis, videtur quod neque ipsi id poterunt facere in particularibus Oratoriis; & Azor *cit. cap. quest. 5.* citat declarasse Cardinales, quod ratione itineris, vel infirmitatis poterant Episcopi in particularibus Oratoriis celebrare, vel facere celebrare, quia (ait Azor) licet caput final. citatum *de priuileg.* solum exprimat causam itineris: Cardinales tamen declararunt etiam causam infirmitatis, cum æquiualeat iterationi: vnde videtur etiam Azor eiusdem esse sententiæ cum Cartuxano citato: & licet Azor *cit. loco q. 4. & Fatin. in suis declarationibus Cardinalium ad sess. 22. Trident.* & alij dicant, quod quando Tridentinum prohibuit celebrari in Oratoriis particularibus, ipsi Cardinales iterum declararunt per hæc non derogari priuilegio Episcoporum in cap. fin. *de priuileg.* Sed mens Concilij fuit tollere abusum, & in Episcopis non est abusus, cum fiat ex causa, &c. in dicta declaratione. Sic ibi. Hoc non obstante constat quod dictum priuilegiū datum Episcopis cap. fin. *de priuilegiis*, datum illis fuit ob illam causam itineris, vel infirmitatis, vel absentia ab Ecclesiis, & cessantibus his causis cessat lex. Ob hæc omnia, ac tales Doctores recentiores videtur hic casus habere difficultatem, nisi in contrarium obstaret praxis, & sequentia.

2 Dico ergo primo. Ante Concilium Tridentinum

Episcopi poterant celebrare in Oratoriis particularibus, & ad hoc dare licentiam cum causa. Habetur expresse in cap. *Missarum de consecrat. distinet* 1. ubi sic habetur: *Missarum solennia non ubique, sed in locis ab Episcopo consecratis, vel ubi ipse permiserit, celebranda esse censuimus.* Idem dicitur in cap. *Concedimus.* eadem dist. & sic affirmat Azor *cit. cap. 26. quest. 5.* Obiicis. Si ergo Episcopus ex hoc iure tam antiquo poterat Missas celebrare extra Ecclesiam, quid necesse fuit ut post tot annos Bonifacius VIII. id concederet Episcopo in cit. cap. *fin. de privilegiis?* Credo quod id fecit ad tollendum scrupulum Episcopis celebrandi extra Ecclesiam quando abessent à sua diocesi, extra quam non habent iurisdictionem tam amplam: & Bonifacius VIII. cit. cap. *dicti se id concedere,* quia Episcopi ex diuersis causis habent ab Ecclesiis suis se absentare.

3 Dico secundo. Concilium Tridentinum hanc potestatem non ademit Episcopis *sess. 22. in decreto de obser. in cel. Missarum:* neque quoad se ut illas celebrarent neque illis prohibuit ibidem ne talem licentiam darent celebrandi in Oratoriis. Sic tenet expresse Suarez *tom. 2. super 3. p. disp. 81. sect. 3. de Missa §. Obseruandum est secundo.* Pro quo citat Sot. Nauarr. & alios. Idem tenet Nauar. *consilio 16. de priuil. & Beia in Respons. Moral. 4. part. casu 33. §. Tertio dico:* & in declarationibus Cardinalium impressis à Marzilla primæ impressionis anno 1613. *sit. 8. de celebr. Missarum fol. 398. & seq.* citantur tres declarationes Cardinalium post Tridentinum dicentes, posse Episcopum dare licentiam celebrandi Missas in Oratoriis particularibus: & eadem tres declarationes citantur à Farinacio in suo tomo declarationum Cardinalium ad citatam. *sess. 22. Trident.* Cum ergo Episcopi ante Tridentinum hoc possent, &

Tri-

Tridentinum id illis non ademerit, à fortiori id poterunt post Tridentinum quoad Oratoria sui pallatij, vel domus, vt in ipsis possint celebrare, vel facere celebrari. Probo hoc dictis à Sanchez *lib. 8. de Matrim. tota disp. 3.* vbi probat Prælatum, qui potest dispensare cum alio in certa materia, posse etiam in illa secum dispensare. Si ergo Episcopus ante Tridentinum poterat dispensare cum aliis ad celebrandum in Oratoriis, etiam id poterit hodie saltem quoad se in Oratoriis suæ domus, vel pallatij, si aliqua noua prohibitio non obstat.

4 Dico tertio. Illud mandatum nouum D. Urbani VIII. prohibens ne Episcopi dent licentiam celebrandi in Oratoriis, videtur quod illud non interdicit vt possint ipsi celebrare, vel facere celebrare in Oratorio pallatij sui, vel domus suæ tantum. Ratio naturalis dicitur, quia cum Papa in hoc solum intendat vitare abusus, sicut supra dixi ex alia declaratione Cardinalium, cum Farinacio, & in Oratorio Episcopi abusus præsumendi non sint: & alias Episcopi teneantur quotidie ex decentia celebrare, vel missam audire, sequitur D. Papam Urbanum VIII. id solum prohibuisse Episcopis quoad oratoria sæcularium, & cæterorum, in quibus abusus euenire solent, non vero quoad propriam personam Episcopi, & sua Oratoria. Eandem rationem affert Beia *cir. casu 33 §. Tum quia*, in alio casu huic simili; vt enim probet quod Tridentinum in illo decreto de obseru. non comprehendit Oratoria Episcoporum, considerat verba decreti: *Ne patiantur à secularibus, vel regularibus peragi in priuatis domibus.* Et ait statim in prædictis verbis non comprehendit Episcopos, & ideo de loco celebrationis ipsorum, cum nihil innouet, relinquitur dispositioni iuris antiqui. Sic ibi Beia. Idem applico ad hoc nouum mandatum D. Urbani VIII. videtur

detur enim solum locutus de Oratoriis sæcularium, idque ad maiorem obseruationem Tridentini: cumque de celebratione Missæ dicendæ ab ipso Episcopo, ac de ipsius Oratorio verbum non fecerit, id relinquitur iuri antiquo, de quo dixi *iii.* 2. & 3. & denique confirmo ex praxi, nam post illud nouum mandatum D. Urbani VIII. videmus omnes Episcopos Portugalliæ in Oratoriis sui Pallatij celebrare, & facere celebrari, sicut antea faciebant.

5<sup>o</sup> Hinc videtur probatum, posse Episcopos in suis Oratoriis facere, & concedere id quod antea poterant etiam ante Trid. cum ipsum Tridentinum de illorum Oratoriis non sit locutum, nec nouum mandatum Urbani Papæ VIII. illorum Oratoria comprehendat ob rationes supradictas. Quod vero attinet ad declarationem citati cap. final. *de priuilegiis*. vbi cum restrictione illa Episcopis conceditur celebratio in Oratoriis, ratione itineris, vel infirmitatis, dico, quod quidquid sit de illo capite, illud aliud capitulum Missarum *de consecr. dist.* 1. id concedere Episcopis absolute, & sine illa restrictione, cuius capituli decreto poterunt proinde Episcopi acquiescere. Licet enim dictum capitulum *Missarum*, non sit Concilij generalis, sed solum prouincialis, videlicet Triburicensis, & proinde non videatur facere legem pro tota Ecclesia, est tamen iam insertum in corpore iuris, & videtur à tota Ecclesia approbatum: & tanquam legem vniuersalem Ecclesiæ illud capitulum citant Doctores, vt Suarez supra citatus. Azor, Nauar. in *sum. lat. cap.* 25. *num.* 82. Syluest. ver. *Missæ* 1. q. 1. §. *secundum*. & alij.

6<sup>o</sup> Ad secundum quæsitum iam patet responsio ex dictis, cum enim Tridentinum, nec nouum mandatum D. Papæ Urbani VIII. comprehendat Oratoria Episc-

Episcoporum, credo quod illi etiam in villa rurali poterunt cum debita decentia erigere altare, & in ipso celebrare, vel celebrari facere, si non per cap. finale *de priuileg.* saltem per capitulum *Missarum.* citatum, quod id illis concedit sine restrictione. Et quanquam illa generalis concessio sit illis restricta hodie saltem per D. Urbanum VIII. iam diximus id intelligi solum quoad Oratoria sacularium, in quibus timentur abusus, non quoad Oratoria Episcoporum, in quibus illi non presumuntur. Si autem prædicti Episcopi, & in suo paltatio, & in villa cum decentia possunt in prædictis Oratoriis celebrare, vel celebrare facere coram se: ego non credo, quod illo absente possint alij sacerdotes celebrare, quia illud priuilegium non est reale, id est concessum illi Oratorio, vel loco, sed videtur esse solum priuilegium personale concessum scilicet soli personæ Episcopi cum celebrat, vel cum ibidem audit: ac proinde cæteri sacerdotes illo absente non poterunt tali priuilegio gaudere.

7 Ultimo dubitari potest, an Episcopus possit altare erigere priuatum, vt in illo celebret, vel faciat celebrare in Oratorio priuato, etiam quando est in aliena diocesi? Credo quod poterit. Primo quia dictum cap. fin. *de priuileg.* videtur fauere, dicens de illis: Concedi quia sæpe absunt à suis Ecclesiis, quod maxime potest euenire cum sunt in aliena diocesi. Secundo id probatur, quia Episcopum celebrare Missam in Oratorio priuato dum in aliena diocesi moratur, non est exercere iurisdictionem contentiosam, vt patet, sed voluntariam: hanc vero voluntariam iurisdictionem, seu potius priuilegium personale potest exercere in aliena diocesi; vt tenet Sanch. lib. 3. *de matrim. disp.* 19. à num. 7.

CASVS



## CASVS XXI.

*De quodam iudice dante consilium reo.*

**Q**uidam Religiosus doctus in certa causa fori externi dedit consilium cuidam alteri de modo quo erat se defensurus: postea iste qui dedit consilium, creatus est iudex delegatus in illo proprio casu, in quo dederat consilium, subortus est scrupulus, vtrum in foro conscientię potuerit esse iudex in illa causa, in qua dederat consilium; & potest casus figurari in re magis quotidiana, videlicet an iudex actualis videns reum non aduertere circumstantiam, in qua maxime consistit sua defensio, possit in foro conscientię illi dare consilium, quo suę causę prospiciat?

Quod in primo casu ille consulens non possit postea esse iudex, neque in secundo casu iudex possit dare consilium reo. Probatur primo ex cap. *Nullus unquam* 4. *quest.* 4. vbi Papa Fabianus dicit, in omni iudicio quatuor personas debere adesse (videlicet distinctas inter se) id est iudices, accusatores, defensores, atque testes. Vnde colligitur clare, quod iudex debet esse persona distincta à defensore, ac proinde non potest iudex esse defensor rei consilium dando. Secundo probatur ex his quę tradit glossa in cap. *si contra. de off. & potest. indic. deleg. in 6. ver. Additio.* vbi dicit, posse recusari iudicem illum, qui prius curauit vt sibi causa committeretur, vel qui dixit parti auctori, quod habebat iustitiam in causa: minus est autem dicere parti quod habeat iustitiam, quam illi dare consilium pro victoria acquirenda. Tertio, quia ille qui fuit aduocatus in vna causa potest recusari ne sit postea iudex in eadem causa, vt

sa, vt habetur in cap. *postremo fraternitati de appell. ubi gloss. ibid. in verb. Aduocati officium.* alia dicit ad intentū: cuius ratio est, quia qui iam fuit aduocatus in ista causa manet ad illa valde propensus, ita vt credendum sit quod postea factus iudex iudicabit pro illa opinione, quam tenuerat dum esset Aduocatus: quod eodem modo credendum est de illo qui prius consilium dedit in causa, moraliter enim postea iudicabit iuxta consilium à se datum. Quarto, iudex debet esse rectus, & æqualis, iuxta illud in Psalm. 118. *Iustus es Domine, & rectum iudicium tuum:* At si iudex det consilium reo iam non est æqualis, iam enim propender magis ad reum quam ad accusatorem, & fauet plus vni parti quam alteri: ergo non potest parti dare consilium, quod si dederit, videtur quod non possit esse iudex.

I His non obstantibus credo quod in foro conscientie nullus ex prædictis dans consilium impeditur quin possit esse iudex in foro conscientie si cesset omnis carnalis affectus, licet in foro externo possint prædicti recusari ab officio iudicis. Hæc 2. pars conclusionis probatur ex argumentis proxime positis, quæ vt nimium probant prædictum consulentem posse in officio iudicis recusari in foro externo. Prior vero pars, quod scilicet talis iudex consulens quando iam est iudex si facit in secreto, & qui consuluit antequam esset iudex, non ob id impediatur in foro conscientie ab officio iudicandi, asseritur primo à Corduba q. 259. ubi ponit casum, qui contigit, videlicet sic: Baiulus cuiusdam villæ secreto misit processum cuiusdam cause eidem Doctori, qui patrocinnatus fuerat in causa, vt sententiam ordinaret, &c. nam si re vera eam tulit secundum Deum, nullo habito respectu ad affectionem carnalem, valida est in foro conscientie, nec peccauit idem Doctor il-

Iam ordinando secundum Cordub, citatum, & Valero Cartux. lib. de different. vtriusq. fori. verbo *iudex differentia* 8. hunc casum Cordubæ citans, non reprobatur, licet ipse dicat se non consulere. Facit etiam ad hoc gloss. in cap. dilecto filio de testib. & attest. in verbo *recusastis*, ubi dicit, quod ille qui volebat esse Aduocatus meus, & cui ego reuelavi secreta meæ causæ, non ideo potest recusari, neque impeditur esse postea iudex meus. Et tamen hic talis qui volebat meus esse Aduocatus, iam erat propensus ad meam causam: non inquam obstat, quia ut ait cit. gloss. ille non debet iudicare iuxta illud quod scit ex me, sed secundum allegata, & probata. Vnde potest formari ratio principalis: Nam qui dat cōsiliū pro tali re faciendā, vel tale cōsiliū est iustum in se, vel est iniustum. Si est iustum non peccat vllō modo sequendo postea idem cōsiliū in danda sententia. Si vero est iniustum potest illud postea mutare in danda sententia, cum in illa non debeat sequi suum cōsiliū antea datum, sed secundum allegata, & probata. Et cōfirmatur ex eo quod tradit Sanch. libro primo Decalog. cap. 9. nu. 45. citans multos, videlicet posse iudicem hodie dare sententiam in vna materia secundum vnā opinionem probabilem: & altera die ferre aliam sententiam in eadem materia secundum aliam opinionem probabilem, si cesset scandalum. Secundo probatur, quia dans cōsiliū non se coarctat ad standum semper eidem cōsilio, sed poterit postea illud mutare, maxime cum viderit pondera rationum, quas vnaquæque pars pro se allegabit, quæ cogent illum ad mutandum cōsiliū. Tertio in particulari, quod iudex consulens reo, ut caueat in re aliqua, non facit iniuriam accusatori, si bene consulit: nam cōsulens id quod est iustum, nulli facit iniuriam: ut è contra, si iudex accusatori iustum

stum consilium daret, pro sua re consequenda, nullam faceret reo iniuriam, vt cōstat: Ergo cuius parti dans consilium in foro conscientia: neque facit alicui iniuriam, nec damnum infert alteri, neque sibi libertatem adimit, vt postea in ferenda sententia sequatur allegata, & probata, & sententiam mutet.

2 Ad primum argumentum sumptum ex cap. *Nullus*. dicendum est primo ibi per defensores, intelligi Aduocatos, qui publice coram iudice in tribunali pro aliqua parte patrocinantur: At consulens secreto in domo sua non est Aduocatus, vt tenet expresse Autor *Repertorij Inquisitorum* ver. *Aduocatus* §. 1. & §. *Sed non dicitur*, & §. *Sed Doctor* ad quod citat vnā legem, Bartolum, & Angelum. Aduocatus ergo proprie dictus de quo loquitur cit. caput *Nullus*, debet esse persona distincta à iudice. Consulens vero in secreto, vel domi suæ, qui non est Aduocatus, potest esse persona non distincta à iudice. Secundo dico præcipuum quod ibi Papa intendit esse, vt iudicis persona sit omnino distincta à teste, & ab accusatore: & accusator distinguatur omnino à iudice, & à teste: & testis omnino non sit accusator, & index. In defensoribus autem id non requirit omnimodè, vt patet ex verbis textus, maxime quia Aduocatus non est de substantia iuris. Si enim reus sit valde doctus, & doctor in iure ciuili, & nolit sibi dari Aduocatum, poterit idem esse reus, & Aduocatus in propria causa, vt patet. Ad secundum dico dictam glos. loqui de foro externo, in quo poterit recusari is qui procurauit causam sibi committi, si id sciatur: Nos vero loquimur de foro interno, in quo dicimus talē procurantem sibi causam committi non peccare, nec ab officio iudicis impediri, si cesset scandalum, & omnis affectio carnalis. Et idem dicendum est ad secundam

partem eiusdem argumenti, posse scilicet in foro externo recusari iudicem, qui dixit parti illam habere iustitiam; secus de foro interno de quo agimus. Ad tertium dico similiter illum qui fuit aduocatus in vna causa, posse recusari ne sit iudex in eadem causa: secus si fuit tantum consulens in eadem causa, & secreto in domo sua: tunc enim poterit esse iudex, quia vt diximus ad secundum, aliud est esse aduocatum in publico coram iudice, & aliud consulere in secreto in domo sua. Et adhuc pro maiori explicatione dictorum in solutione huius tertij, & secundi argumenti, dico quod potest aliquando actus impediri per exceptionem iudicis oppositam, si tamen non apponatur exceptio actus valebit in foro interno, & externo, de quo sunt multa exempla quotidie in iure. Nam si exceptionem non opposui iudici, vel testi, cum poteram, & tacui, & consensi virtualiter, postea tempore non licito, non possum excipere, & facta per iudicem vel testem valent. Sit vnicum exemplum in particulari: testimonium tulit Religiosus subditus contra me, qui Religiosus testimonium tulit sine licentia sui Prælati, Ego poteram exceptionem ponere tali testimonio, eo quod sine licentia sui Prælati dixit testimonium in iudicio: si tamen non excepi, valet testimonium dicti subditi. Ita Sanchez cum aliis ibi cit. 6. lib. Decal. cap. 13. à num. 106. maxime num. 110. Ad id vero quod additur in eodem tertio argumento, quod iudicaturus iam manet propensus ad id quod dixerat in dando consilio, respondimus sufficienter num. 1. quod scilicet hac propensione non obstante, potest ille postea mutare voluntatem in iudicando ex allegatis, & probatis. Et poterit licite non mutare voluntatem, quam habuit in dando consilio, si non obstantibus allegatis, & probatis in processu, viderit

derit suum cōsiliū fuisse verum, & iustum. Ad quartum argumentum patet etiam solutio ex dictis *num. 1.* nām licet iudex ante dederit consiliū reo, vel actori, non ideo desinit esse rectus, & iustus, nec alteri plus fauere, quam alteri, iniuste videlicet. Cum enim antea in dando consilio reo iustè, fecerit rem iustam, imo aliquando piam & necessariam, non fecit iniuriam, nec damnum causauit parti oppositæ, & ideo non desinit esse iustus, rectus, & æqualis. Et omnia hic dicta intelligo vt dixi, in foro cōscientiæ tantum, & cessante scandalo.

## C A S V S XXII.

*De quodam peccato mortali putato veniali.*

**Q**uoniam hominibus scrupulosis sæpius hoc solet accidere, volui pro quiete, & consolatione aliquorum casuum hic inferere quod aliquando de facto contigit. Quidam vir timoratus, & sollicitus aliàs animæ suæ, fecit quendam actum, qui aliàs erat in se peccatum mortale, sed ille facto discursu sibi possibili, cogitauit illud tantum esse peccatum veniale, & cogitans esse solum veniale, actum exercuit, nullo modo facturus si sciret esse peccatum mortale. Quæritur an iste peccauit solum venialiter, an vero mortaliter.

**1** Credo quod solum peccauit venialiter, & priusquam hoc dicerem, casum communicauī cum viro doctissimo Theologo, pro tali publice reputato. Rationes ad id persuadentes sunt istæ. Qui facit actum, que de se est peccatum mortale, si facit omnino bona fide,

nec peccat venialiter, vt omnes concedunt: ergo à simili, & respectiue, qui facit peccatū mortale veniale putatum, aliās non facturū, peccat solum venialiter, Secundo peccatum vt sit peccatum, totum pendet ex hoc vt sit voluntarium: ergo sicut voluntarium dat esse peccatum in totum, sic etiam dabit esse peccatum in parte: & volenti, seu iudicanti solum esse veniale, non imputabitur ad mortale. Quod si dicas istum volentem peccare venialiter deliberate, & faciētem actum peccati mortalis, iam se exponere periculo peccati mortalis, & proinde iam committere mortale, obiicio contra, & arguo tertio cum his duobus exemplis clarissimis. Primo, qui ab eodem domino per interualla furripuit res minimas, peccauit solum venialiter quādiu per furta minima non accessit ad quantitatem notabilem, & sufficientem ad mortale; quando vero cōmisit vltimum furtum paruum, quod iunctum præteritis efficit quantitatem notabilem, tunc per illud furtum vltimum peccat mortaliter, cum sit complementum damni notabilis. At omnes concedunt, quod si iste in vltimo furto paruo, quod ob proxime dictum, est iam peccatum mortale, non aduertit tale furtum vltimum esse mortale, sed solum credidit esse veniale, sicut præcedentia parua, neque aduertit ad præcedentia furta parua: hic talis etiam in vltimo furto peccauit solum venialiter, licet iam esset mortale à parte rei, & licet se exponeret periculo peccandi mortaliter, & sciret clare se peccare venialiter in vltimo furto. Sic de vltimo furto paruo non considerato vt mortali tenet Caietan. verb. *furtum* & Rabello *de obligat. iust. lib. 3. qu. 15. sectio 4. §. Hinc colliges*: & fauet Sanchez *lib. 7. Decalog. cap. 21. num. 4.* quod exemplum est omnino adæquatum. Secundum exemplum sit: peccans cum fœmina

miria confanguinea, quam omnino ignorat esse confanguineam, peccat quidem mortaliter sed non peccat peccato incestus ut patet, si enim id sciret non faceret, & tamen exposuit se periculo committendi peccatum incestus, quod erat annexum isti actui: & hunc incestum euasit, propterea quod incestum nullo modo esse credidit, neque illum intendit. Facit ultimo quod tradit gloss. in cap. *plerumque de donat. inter virum, & uxorem*, in verbo, *Repetere non valebit*, ubi dicit quod crimina secundum intentionem iudicantur, & iniuria ex affectu mentis fit: & citat ad hoc quinque, vel sex text. vtriusque iuris quæ ibi videri poterunt: & ibi dicta iuvant ad præsens intentum.

## CASVS XXIII.

*De quodam Confessore revelante furtum iudici  
ex licentia pœnitentis positi in articulo mortis.*

**Q**uidam existens in articulo mortis dixit suo confessori, ut iret ad iudicem sæcularem, illique ex sua parte diceret, in tali loco esse sub terra coopertam rem magni pretij, quam ipse pœnitens furto rapuerat, eamque suo domino redderet. Confessor iudici manifestavit locum, latrone iam in extremis agente. Sed conualuit latro de infirmitate. Post sanitatem affectam publico carceri traditus est: Quæritur, an si iste latro per iudicem ad mortem condemnetur, prædictus confessor maneat irregularis?

1 Casus pro utraq; parte satis dubius est. Ante cuius



imo reuelando faciebat opus quod credebatur licitum; vt restitutio sortiretur effectum, ergo non incurreret irregularitatem iuxta hos Doctores. Secundo, quia Inquiltores sancti Officij non incurrunt irregularitatem tradendo hæreticos iudici sæculari, quos certo sciunt damnandos esse ad mortem, & non euadunt hanc irregularitatem propter intercessionem, vel protestationem quam faciunt coram eodem iudice ne procedat ad effusionem sanguinis, iuxta *cap. Nonimus de verb. signif.* nam licet aliqui Doctores dixerint eos illam euadere ob dictam protestationem: Suar. tamen *tom. de censur. disputat. 47. sect. 1. in fine* ait, causam cur non incurrunt irregularitatem esse, quia iudex Ecclesiasticus tradens aliquem brachio sæculari, nec dat iurisdictionem iudici sæculari nec dictat sententiam sanguinis, nec ad illam inducit, sed solum declarat delictum, & reum afficit penis Ecclesiasticis, & permittit reum capi à iudice sæculari. Sic iste confessor sua reuelatione facta iudici, non dedit iurisdictionem iudici sæculari, nec tulit sententiam mortis, neque induxit ad illam, nec fuit testis iuratus, sed solum intendit vt restitutio fieret vero domino. Tertio probari potest ex eo quod tradit Reginal. *tom. 2. lib. 30. tract. 2. num. 118.* quod scilicet non sum irregularis (licet ille ponat verbum, videtur) si Petrum induxi ad committendum delictum propter quod ille captus damnatur ad mortem: quia in hoc non censeor occidisse. Sic iste confessor non videtur penitentem hunc occidere reuelatione facta iudici, licet per accidens, & remotè ex sua reuelatione mors fuerit secuta. Quarto probari potest ex eo quod dicit idem Reginal. *cu. loco num. 121.* quod scilicet, is qui habet curam infirmi non ex obligatione iustitiæ, sed solum ex caritate, & pietate, non incurrit irregularitatem ob

mortem secutam ex sua negligentia si fuerit levis negligentia: nisi quando illius negligentia circa vigiliam, & medicinas adhibitās fuerit grauis, & notabilis: & isto confessor in sua reuelatione facta iudici non videtur peccasse saltem grauiter. Vltimo confirmatur quia ista irregularitas est pœna grauissima, & proinde non debet imponi nisi ob culpam grauē, & mortalem, vt tenet *Suar. cit. tom. de censur. disp. 45. sect. 5. num. 8.* cum aliis ibi citatis. Facit adhuc pro ista opinione *Henriqu. tom. 2. lib. 14. cap. 12. num. 7. post medium*, vbi loquens de ista irregularitate, dicit non esse irregularem, illum qui dicit, vel facit aliquod opus pium: vt si confessor dicat carnifici, permittitur tibi facere officium tuum, vel dicat reo vt ascendat patibulum &c. ibi.

2. Pro parte tamen affir. quod incurrerit irregularitatem secuta morte sunt vrgentes rationes. Primum est argum. fundatum in eo quod etiam citati Doctores dicunt, videlicet quod homicida ex homicidio casuali, quando dabat operam rei licitæ, vt euadat irregularitatem, debet facere diligentiam moralem, & sufficientem ne sequatur mors ex suo facto. Et in particulari *Suarez cit. disp. 35. sect. 5. num. 41.* specificans qualem diligentiam facere debeat homicida casualis dans operam rei licitæ: vt euadat irregularitatem: dicit quod talis dicetur ille, qui fecit omne illud quod debuit, & potuit, & solum omisit facere id quod non est animaduersum, quia sine magna ingenij perspicacitate, & solertia non potuit animaduerti. Sic ille. At constat quod iste confessor cum ordinaria, imo & cū tarda solertia potuit aduertere pœnitentem posse conualescere ex infirmitate, & suam reuelationem factam iudici posse illi mortem causare. Et quidem, si pœnitens non declarauit confessori expresse vt reuelaret iudici statim

tim ante mortem suam ( quod de illo non est credendum , voluisse scilicet se tali periculo exponere ) sed absolute dixit cōfessori , vt id iudici reuelaret ; magis culpandus est confessor , nec ab irregularitate excusandus , secuta morte , cum clare deberet intelligere pœnitentem id sibi committere , solum post mortem suam. Et proinde non apposuit diligentiam debitam , imo fuit in magna negligentia , maxime cum posset dicere iudici locum furti , & cui esset restituendum , non reuelato nomine furis. Et hinc colligitur secundum argumentum iuxta supradictum ex Azorio , quia scilicet iste confessor ex lege diuina , & naturali tenebatur abstinere ab ista reuelatione prout sic facta , declarato nomine latronis illo viuente , cum tali ipsius periculo , ac proinde irregularitatem incurrit. Tertio probatur , quia testis dans testimonium in causa sanguinis vnde mors sequitur , est irregularis , vt omnes admittunt , etiam si in illo dando non peccat : ratio est , quia vt ait Henriquez *2. tom. sum. lib. 14. cap. 12. num. 9.* cum ibi citatis , testis influit in sententiam sanguinis , eodemque modo iudex : & in hoc casu iste confessor etiam influit in sententiam sanguinis , quamuis remote. Et sic vt minimum colligitur ex dictis quod iste confessor attentata sua negligentia , dedit operam rei licitæ , sed illicitæ.

3 Visis argumentis pro vtraque parte eligat quis partem securiorem : ego enim magis credo quod incurritur ob dicta proxime num. 12. quia tamen hic quæritur de foro conscientie , dico quod si iste confessor attentata bona fide qua fecit , credens se facere opus virtutis , non peccauit mortaliter iudicio boni viri , non est reputandus irregularis , etiam si credat se peccasse venialiter in omissione diligentie faciendæ. Sic tenet Suarez *1. tom. de censur. disp. 45. num. 8.* citans Salon. & So-

tum, qui dicunt homicidam casualem si in facienda diligentia fuit negligens solum ex culpa veniali, non esse irregularem: tanta enim poena, quanta est irregularitas non est ponenda pro culpa veniali. Si vero cognouerit, quod sua negligentia fuerit culpa mortalis, debet se reputare irregularem. Pro quo etiam notat Sayro cita. loco num. 3. quod debita diligentia, & circumspectio in hac materia discernenda est ex circumstantiis loci, temporis, & personarum, & similibus, & ex qualitate negotij. Si vero facta omni inquisitione dubius adhuc omnino maneat an omissio suae diligentiae fuerit mortalis, an non, stante tali dubio in aequilibrio debet se reputare irregularem: nam in irregularitate orta ex homicidio, stante dubio debet quisque se reputare irregularem, prout tenet Sanchez lib. 1. Decalogi cap. 10. nu. 43 citans decem graues Doctores. Quod in aliis irregularitatibus extra homicidium dicit non habere locum.

---

CASVS XXIV.

*De quodam legato pro redimenda  
puella captiua.*

**Q**UADAM foemina nobilissima in suo testamento iniunxit haeredi, vt redimeret vnam puellam ex captiuis apud Turcas, quae esset septem vel octo annorum: cepit haeres per mercatores, & negotiatores agere de redimenda quadam illius aetatis captiua inter Turcis. Post negotiariam captum, mortuus est mercator agens negotium, & ortae sunt aliae difficultates,

&c

& impedimenta, ob quæ istius captivæ redemptio effectum non habuit vsque ad annum decimum quintum suæ ætatis. In hoc anno hæres paratus est profequi negotium redemptionis, sed dubitat, & quærit, an sit redimenda alia quæ sit hodie septem, vel octo annorum tantum, iuxta formam testamenti. An vero redimenda sit illa prior, quæ est hodie quindecim annorum, de qua iam captum est negotium, & intentata redemptio, eo quod iam videatur habere ius ad rem, siue ad talem redemptionem.

1 Respondeo, quod si illa prior in septennio, vel hodie sciens de tali legato, & sciens iam agi de sua redemptione acceptavit, vel acceptavit pro illa pater, aut mater, aut tutor ipsius, vel prælatus illius, vel persona potens acceptare valide pro alio, tunc ista est redimenda, licet sit quindecim annorum. Probo primo, quia per illam acceptationem per se factam, vel per aliquam personam ex supradictis, iam acquisiuit ius ad dictam redemptionem pro se captam. Probatur hoc ex iis quæ Doctores communiter tradunt circa promissionem factam absenti, quando scilicet obliget promissorem ad implendum. Inter quos præcipue est Reginaldus *tom. 2. sum. lib. 25. cap. 6. sect. 3. num. 77.* ubi citans alios ait, quod si promisi Petro absenti certam pecuniam, promissio non obligat in conscientia donèc Petrus absens acceptet: si tamen in præsentia promissoris acceptet promissionem, vel donationem pro Petro, pater, mater, tutor Petri, vel prælatus, creditor etiam cui Petrus debet, vel alius potens valide acceptare pro absente in causa pia, tunc promissor tenetur implere promissionem Petro. Quod etiam in isto casu cernitur: nam istud legatum de redimenda captiva absente, est quædam donatio, vel promissio facta captivæ destinan-

stinandæ per hæredem. Si ergo iam hæres hanc destinauit Mariam v.g.& illa absens,& sciens iam acceptauit,vel acceptauit pro illa absente pater,tutor,mater, aut vllus ex supradictis,iam ista,licet hodie sit quindecim annorum,habet ius ad rem.per talem acceptationem,& proinde huic,& non alteri implenda est promissio legati,& redemptionis. Idem probatur ex iis quæ tradunt Doctores agentes de commutatione voti,maxime Vega *secunda par.sum.ver.votum.casu* 115. vbi cum multis resoluit,quod si promisi calicem certæ Ecclesiæ,& non fuit præsens persona quæ acceptaret promissionem pro tali Ecclesiâ, possum ego commutare votum,& dare calicem alteri Ecclesiæ,maxime si sit pauperior:at si facta promissione ibi erat aliquis minister Ecclesiæ illius cui primo facta est promissio,qui acceptauit promissionem nomine Ecclesiæ,vel alia persona,quæ valide posset illam acceptaret promissionem,iam teneor dare priori Ecclesiæ quia acquisiuit ius per acceptationem;quæ omnino faciunt pro nostro casu.

2 Si vero ista puella hodie quindecim annorum,nec sciuit de sua redemptione iam cæpta,nec acceptauit per se,nec pro illa acceptauit pater,mater,tutor,aut aliquis ex supradictis,non tenetur hæres istam redimere,quia nõ acquisiuit ius ad rem per illam acceptationem,sed poterit hæres aliam septennem redimere:imo ad hanc septennem tenebitur ob formam testamenti,non ad illam quæ nec est septennis,nec ius acquisiuit per suam acceptationem. Vltimo aduerto,quod si testatrix nominauit illam priorem puellam,vel aliam proprio nomine,vel nomine suorum parentum,tunc ista redimenda est quantæcumque sit ætatis vt patet.

3 Quæris

3 Quæris: quid si pro nunc non inueniatur aliqua puella captiua septennis, in casu, quo illam priorem non teneatur hæres redimere ob defectum conditionum positarum *num. 2.* Respondeo tunc redimendam esse priorem quindecim hodie annorum, quia saltem in hac impletur intentio testatricis, & quia iam apta erat tempore quo testamentum debuit ex obligatione impleri. Potest hoc probari ex casu posito à Sanchez *lib. 1. de matrim. disp. 33. num. 32.* vbi dicit, quod si quis legauit certam pecuniam certæ virgini pro suo matrimonio, & quando is mortuus est iam illa erat nupta, potest illi donari legatum, quia iam fuerat habilis quando testamentum conditum est: & constat, quod testatoris mens fuerit huic fauere: quod potest hic applicari. Denique si hodie nec prior illa quindecim annorum viua sit, nec aliqua septennis, vel octo annorum reperiatur, credo ad nullam grandæuæ ætatis redimendam teneri, quia verba testamenti sunt intelligenda in significatione propria, & illa expresse dicunt vt redimatur septem, vel octo annorum puella. Sed de isto legato standum erit decreto Episcopi: & tutius est aliam quamcumque redimere.

---

C A S V S X X V.

*De Moniali illegitima, an possit esse Abbatissa sine dispensatione.*

QVædam Monialis Ordinis sanctæ Claræ secundæ Regulæ, electa est in Abbatissam per suffragia Conuentus cum esset illegitima ex prohibito concubitu. Prouincialis noluit illam confirmare propter hoc  
im

impedimentum, neque cum illa dispensare: quæritur an possit esse Abbatissa sine prælati dispensatione, & an prælatus potuerit illam excludere?

1 Sanchez *lib. 5. Decal. cap. 5. num. 19.* ait Monialem illegitimam non posse esse Abbatissam sine dispensatione; licet concedat posse cum illa prælatos dispensare, & illam ad officium habilitare. Additque Monialem bigamam; quæ scilicet bis nupsit, non posse esse Abbatissam, etiam cum dispensatione prælati. Non affert Sanchez aliquam rationem particularem contra illegitimam ne sit Abbatissa, nisi textus, & rationes communes probantes, seu prohibentes ne masculi illegitimi sint prælati, sed rationes quas affert infra ponam & soluam.

2 Ego credo quod Monialis illegitima potest esse Abbatissa, vel Priorissa, absque vlla dispensatione prælati, maxime si sit Regulæ primæ, vel secundæ Sanctæ Claræ, vel Ordinis habentis communicationem priuilegiorum, & proinde quod hæc, de qua agitur, non potuit excludi ab officio Abbatissæ, neque indiguit dispensatione vt in officio confirmaretur. Pro istius probatione suppono, quod Moniales S. Claræ gaudent priuilegiis omnibus, quæ habent fratres Minores, siue talia priuilegia fuerint concessa illis immediatè, siue talia priuilegia habeant ipsi Minores per communicationem. Nam illud priuilegium quod aliqua Religio habet per communicationem, habet illud tanquàm sibi proprium, & tanquam si sibi immediatè, & nominatim fuisset concessum, vt patet ex multis locis *compendij* maxime in *ver. communicatio priuilegiorum*, §. 9. in fine, & §. 12. & alibi. Quod vero Moniales S. Claræ gaudeant priuilegijs concessis Fratribus Minoribus habetur in *compendio Mendicantium* citato proxime verbo §. 14. ex Leone



Leone X. Quo supposito, fratres Minores gaudent priuilegio concessio Religiosis Sancti Ioannis Euangelistæ, in Portugallia, quæ dicitur Congregatio Sancti Ioannis Euangelistæ; in quorum compendio fol. 9. pag. 2. habetur hoc priuilegium; *Vt admissus ad professionem inter illos si habet defectum natalium ipso facto sit dispensatus non solum ad Ordines, sed etiam ad omnia solita gubernari per fratres illius Ordinis, Prioratus, Rectorias, &c.* Cum ergo Moniales S. Claræ gaudeant hoc priuilegio concessio Minoribus per extensionem participationis, sequitur quod Monialis S. Claræ ipso facto quod fuit admissa ad professionem manet dispensata ad omnia officia, & prelaturas Religionis, ita vt non indigeat alia dispensatione. Et hoc credo esse verum. etiam si dicta Monialis esset illegitima sacrilega, idest nata ex concubitu sacrilego: lex enim, seu dictum priuilegium non distinguit, sed loquitur in communi, de omni defectu natalium. Prædictum vero priuilegium est in praxi apud dictos Religiosos, vt scio certe: Quamuis autem hoc priuilegium ignoretur à Monialibus, neq; apud illas sit in praxi, hoc non tollit quin illo possint frui nunc postquam illius notitiam habent, vt tradit Rodrig. tom. 1. qq. 9. 6 1. art. 3. §. *At Urbanus*. Et idem Rodrig. in exposit. *Cruciat* ad §. 9. 1 3 2. in tit. *de voto ultra-marino*. Secundo probo, quia textus excludentes illegitimos ab officiis, & dignitatibus, quales sunt caput 1. & cap. fin. *de filiis presbyterorum*, loquuntur solum de masculis, vt patet ex verbis textuum. Lex autem loquens de masculis, maxime in odiosis, non comprehendit foeminas, vt tenet Geminianus in cap. *in generali* in 3. casu. *de elect.* & Anton. Gabriel *com. opin. tit. de verbor. signifi. concl. 6. num. 17*. Tertio, quia Sixtus V. in Motu proprio contra illegitimos, nec vllum verbum fecit de

de fœminis in ordine ad prælaturas, vel ad professionem. Quarto, quia fœminæ non sunt proprie prælatae, prælatura de qua loquuntur Canones, vt colligitur ex D. Thom. in 4. dist. 25. q. 2. art. 1. *quæsi. iunc.* 1. & tenet hanc opinionem expresse Rodrig. tom. 1. qq. q. 13. art. 21. & citat pro eadem Cynum, Bartolum, Ancharranum. Fa- uent. Pallud. Tabiena citati à Sanchez *cit. cap. num.* 18.

3 Rationes particulares Sanchez sunt hæc. Primo ad- ducit duos textus supracitados ex cap. 1. & fin. *de filiis presby.* sed ad hæc duo capitula iam respondi supra nu. 2. in *argum.* 2. Secunda ratio Sanchez est, quia in cap. *Indemnitatibus. de elect.* in 6. dicitur quod Abbatissa ha- bet dignitatem: & hæc dignitas interdicitur illegiti- mis citatis duobus cap. *de filiis presb.* Respondeo, quod licet citatum cap. dicat Abbatissam habere dignitatē, non dicit quod hæc dignitas sit Ecclesiastica prælatura, sed est dignitas improprie, vt diximus ex D. Tho. pro- xime citato. Est enim dignitas Abbatissæ, quædam so- la præminencia tanquam matrisfamilias: eo modo, quo parochus dicitur prælatus, id est improprie præ- latus, vt habetur cap. 1. *de cleric. agrot.* licet enim ibi & alibi parochus vocetur prælatus, intelligitur impro- prie, & large, vt explicat idem Sanchez 7. lib. *Decal. cap.* 29. num. 56. & Syluest. ver. *Prelatus. ad initium.* Imo ipse Sanch. *cit. lib. 5. cap. 1. num.* 19. sic attenuat iurisdictionē Abbatissæ, vt dicat illam non posse imponere præcep- tum spirituale in ordine ad finem spiritualement; ac proinde ex mente eiusdem non est proprie prælata. Tertia ratio Sanchez est, quia Concilium Trid. *sess.* 25. *cap. 7. de Regular.* tanti facit officium Abbatissæ, vt non nisi quadragenariam, & post annos 8. professionis eligendam esse decernat. Respondeo, esto quod ita sit, sicut est: non inde sequitur, quod excludat illegitimā

ab

ab officio Abbatisſæ: imo inde arguo, & probo illam non excludi. Nam cum ibi Tridentinum tam exacte assignauerit conditiones requiſitas ad Abbatisſam, & nullam mentionem fecerit de natalibus illius, ſeu quod debeat eſſe legitima, clare innuit, quod defectus natalium non ſit impedimentum ad officium Abbatisſæ, ſi enim impediret, à Concilio diceretur. Vnde iuxta Regulam Iuriſtarum, illa quæ in lege non prohibentur, conceſſa intelliguntur: vt refertur in indice Decretalium, verb. *conceſſum*.

4 Imo addo contra Sanchez, quod etiam Monialis bigama poterit eſſe Abbatiſſa: tum ob ſupradicta, quia ſcilicet Abbatiſſa non eſt proprie prælata: tum propter citatum priuilegium conceſſum Patribus congregationis S. Ioannis Euangeliftæ: tum quia ipſe Sanchez concedit Monialem non virginem poſſe eſſe Abbatiſſam: per quod etiam innuit quod non virgo ex concubitu illicito poterit eſſe Abbatiſſa cum non diſtinguat quomodo virginitatem amiſerit. Maius vero incommodum videtur vt ſit Abbatiſſa non virgo ex concubitu illicito, quam non virgo bigama, quæ bis validum matrimonium contraxit. Tum denique quia bigamia ſolum, & proprie impedit receptionē Ordinum ſacrorum, quos Abbatiſſa non recipit: & præterea pœnæ impoſitæ bigamis in titulo de bigamis ſolum imponuntur masculis bigamis, & proinde non comprehendunt fœminas bigamas iuxta dicta *num. 2.* Imo inauditum videtur, quod in titulo de bigamis intelligantur fœminæ bigamæ in decretalibus, vel in 6. omnia enim capitula in titulo de bigamis in decretalibus & in 6. clare loquuntur ſolum de bigamis masculis, & in ordine ad ordines ſacros ſuſcipiendos.

5 De Moniali vero, quæ incontinenter, & inhoneſtè

vixerit, an possit esse Abbatisa? Dico breuiter, quod si inhonestè vixit intra Religionem, prohibetur esse Abbatisa *in cit. cap. 7, Trident.* vbi requiritur, quod in ordine laudabiliter vixerit, Si vero inhonestè vixit ante ingressum Religionis, & delictum sit publicum, impeditur fieri Abbatisa propter scandalum.

---

### CASVS XXVI.

*De quodam parcho qui dixit duas missas  
vna die. Vnam veram & ordinariam,  
alteram siccam.*

**I**N quodam oppido paruo erant duo tantum clerici, vnus parochus, alter coadiutor. Coadiutor tenebatur ex officio in quadam Dominica dicere missam maiorem omni populo. Parochus eadem die Dominica summo mane missam ordinariam celebrauit confidens quod coadiutor celebraturus erat missam hora solita, vt totus populus audiret, Coadiutor, vel ex infirmitate, vel alio impedimento non potuit, vel noluit illa die Dominica celebrare. Parochus qui iam celebrauerat, & erat Dominica solemnis in Ramis Palmarum, ne populus tali die maneret in toto fraudatus solatio spirituali, solemniter benedixit Ramos, & postea dixit Missam siccam populo, cum illis cæremoniis, & vestibus, quas aliqui libri pro missa sicca assignant. Accusatus est clericus parochus de tali missa coram Regio tribunali, Ordinum Militarium, erat enim parochus professus Ordinis Militaris Sancti Iacobi, cuius Ordinis Rex est supremus Magister. Quæritur an iste paro-

parochus peccauerit, vel aliquam pœnam incurrerit ex celebratione istius Missæ siccæ?

1 Ex duobus capitibus credi posset hunc parochum peccasse. Primo ex eo quod duas missas eadem die dixerit contra textus mox citandos. Secundo ex eo quod missam siccam dixerit extra mare, & sine necessitate. Sed ego respondeo ex neutro capite peccasse, vel pœnam ullam incurrisse. Probo, quod non ex primo: nam textus qui prohibent eadem die duas missas ab vno sacerdote celebrari, quale est capitulum *consulisti de celebr. Missarum*, & cap. *sufficit. de consecr. distinet*, 1. loquuntur solum de duabus missis veris, ordinariis, in quibus sit verum sacramentum, vt praxis quotidiana docet: at missa sicca non est missa in rigore, cum in illa non fiat vlla consecratio, oblatio, nec consumptio, quæ sunt partes essentielles missæ: & ideo nauigantes non tenentur sub M. audire missam siccam dictam in nauibus diebus festis vt tenet Azor *tom. 1. lib. 7. cap. 7. quest. 6.*

2 Neque peccauit ex 2. capite ex eo quod missam siccam dixerit extra mare, & non sit consuetudo iam celebrare in terra: Nam missa sicca non est illicita ex se. Probo quia non est illicita ob legem prohibentem, si quidem nulla lex Ecclesiæ datur, quæ illam prohibeat dicere extra mare: imo videmus illam in aliquibus prouinciis esse in praxi extra mare, vt refert Durand. *lib. 2. de Riibus Eccl. cap. 4. ad finem*: & Henric. *tom. 2. lib. 9. cap. 27. num. 2. in gloss. littera A.* refert quod Leo X. approbavit quendam librum, qui dicitur Sacerdotale, in quo continetur forma dicendi missam siccam: ergo non est prohibita, imo permessa ex lege. Addit Durant. *cit. loco*, quod Durand. *in suo. Ration. diuini officij lib. 4. cap. 1. num. 23.* dicit, quod si Sacerdos non potest conficere, quia forte iam celebrauit, vel ob aliã

causam, tunc potest sumpta stola &c. dicere missam siccam, modo ibid. assignato: nec specificat quod debeat dici in mari, vel in terra: & Durant. *cit. loco* ad finem quod in Gallia videlicet Tollozæ, quando aliquis defunctus sepelitur post prandium, dicitur missa sicca pro illo: ergo etiam in terra dici potest missa sicca. Et hoc ipsum contigit isti parochi, cum enim iam mane celebrasset veram missam, & non posset aliam veram secundo celebrare, potuit pro aliqua consolatione populi secundo dicere missam siccam per quam populus ad aliqualem deuotionem excitaretur. Denique missa sicca non est illicita ex parte materiæ, seu ex parte rei in illa contentæ: Nihil enim continet malum contra Ecclesiam, vel bonos mores; solum enim iubet recitari Epistolam, Euangelium, Orationem Dominicam, & dare benedictionem, & pauca alia, quæ clare sunt bona, & sancta, de quibus in illa dicendis, vide Durantum *cit. loco*, & contenta in illa non sunt superstitiosa, sed possunt excitare deuotionem populi, vt patet, ergo ex nullo capite prædicta missa est illicita, nec proinde parochus ullam pœnam ex illius celebratione incurrit. Vltimo non potuit iste parochus condemnari ex eo quod populo illa die veram missam non dixerit, quia vt supra dictum est, Coadiutor illa die tenebatur populo missam communem dicere, non parochus: & proinde si populus illa die Dominica vera missa caruit, culpa fuit coadiutoris, non autem parochi. Et ob has causas, noui prædictum parochum in publico tribunali fuisse absolutum ab omni culpa, & pœna.

## CASVS XXVII.

*De quodam casu pertinente ad materiam  
restitutionis.*

**O**Lyssipone hyemabant octo tritemes Galliæ cum suo duce generali. Dux generalis conduxit quãdam nauiculam, vel cimbam, vt iret ad alium portum distantem per tres, vel 4. leucas, vulgo barreiro, pro conuehendo pane nautico, vulgo biscouto, ad trirremium sustentationem. Dixit dux generalis officiali cuiusdam triremis (vulgo Meirinho) vt prædictam cimbam pararet assignans illi Turcas Remiges captiuos, qui de terra ad cimbam prædictam panem nauticum asportarent baiulando. Cumque ex officio dictus officialis triremis teneatur in simili casu assignare milites Christianos sufficientes pro custodia, & securitate Turcarum, designauit nouem Turcas pro oneribus portandis, & tres tantum milites ad custodiam. Nocte, Turcæ captiui contra Catholicos paucos insurgentes illos (vt creditur) occiderunt, & cum nauicula ad partes Affricæ transfugerunt. Dominus nauiculæ, qui manserat in terra, petiit à duce generali trirremium restitutionem suæ cimbæ, siquidem de illius mandato cimba fuit conductæ.

Dux generalis remisit se ad Theologos, qui dicerent vtrum in foro conscientiæ ille teneretur restituere damnum illatum: an vero ad restitutionem cimbæ teneretur officialis triremis cuius culpa damnum illatum est eo quod de militibus sufficientibus non prouiderit, & tot Turcas destinauerit.

1 Ego respondi, me credere, quod dux generalis nō tenebatur in conscientia restituere pretium nauiculæ domino petenti: sed quod ad id tenebatur officialis triremis dictus Meirinho. Probo, quia si dux generalis ad hanc restitutionem teneretur, esset ex eo quod iussit talem cimbam conducī: Sed ex ista iussione non teneatur: ergo probo minorem, nam ista sola iussio, vt cimba conducatur vel locetur, ex se non est causa ordinata ad illud damnum inferendum, vt patet in praxi quotidiana, per quam de mandato Regis similes cimbe capiuntur pro seruitio Regis: & ex tali Regis mandato præcise, non sequitur simile damnum. Fuit ergo proxima causa damni dati officialis Triremis, cui ex officio incumberebat prouidere cimbarum de militibus sufficientibus, & non prouidit. Neque ex eo quod generalis dux iussit dicto Officiali vt cimbarum conduceret, & pararet, & officialis negligens fuit in cimbarum paranda, talis negligentia officialis imputanda est duci generali. Facit pro hoc regula illa qua dicitur: Quod dico tibi vt facias, & tu potes facere bene, & debes facere bene, non dico tibi vt facias male. Quam regulam citat, & applicat ad casum similem Sanchez in lib. 7. de matrim. disp. 95. num. 10. & 11. Cum ergo dux generalis officiali triremis dixit, vnā nauiculam conduceret, pararet, & mitteret, & talis officialis posset, ac deberet parare bene & sufficienter; non dixit illi dux generalis vt pararet male, sed virtualiter dixit illi vt pararet bene, iuxta regulas, & exigentiam negotij commissi, & proinde damnum illatum non euenit ex negligentia ducis generalis, sed officialis. Secundo facit ad deobligandum ducem generalem à restitutione, quod tradit Sayro in Clau. Reg. lib. 10. tract. 2. cap. 6. num. 4. vbi citans Gaet. Sot. Lædesin. Couar. Petr. Nauar. & alios dicit,



cit, quod ad hoc, vt aliquis dicatur causa damni dati, non sufficit quod sit conditio sine qua non: sed oportet quod aliquo suo influxu, & concursu morali concurrat ad illud damnum, & conferat ad illum effectum: Iussio vero ducis generalis vt cimba caperetur, & mitteretur, non influxit influxu particulari in tale damnum, vt patet etiam moraliter Et addit Sayro *cit. lib. cap. 7 num. 6.* mandantem non teneri ad restitutionem, nisi quando imperium suum fuit periculosum, id est, ex se ordinatum, & occasionatum ad causandum damnum. Hæc autem iussio ducis generalis vt sic, non fuit ordinata, neque occasionata ad tale damnum inferendum. Probatur etiam efficaciter ex eo quod tradit Rabello *tom. de oblig. inst. lib. 2. de rest. quest. 14 sect. 3.* vbi explicans in quibus casibus iubens teneatur ad restitutionem *num. 12.* dicit optime ad intentum: Quod si Dominus nec expresse, nec tacite damnum præcepit, quamuis famulus nomine ipsius damnum intulerit, non tenebitur dominus ad restitutionem, cum nec ratione rei acceptæ, nec iniustæ acceptionis, nec aliunde teneatur. Imo, nec si postea sciens erimen suo nomine patratum, id ratum habeat; & citat Medinam, & Petrum Nau. quo nihil clarius ad intentum dici potuit. Nam in hoc casu dux generalis nec expresse, nec tacite damnum hoc fieri mandauit, nec post factum ratum habuit, sed potius reprobauit, ergo ad restitutionem non tenetur. Et addit ibidem Rabello *num. 13.* quod si scio damnum nomine meo inferendum, & tamen non impedio cum commode possim, peccabo contra charitatem, non tamen contra iustitiam, ac proinde ad restitutionem non tenebor, nisi vel ex officio damnum teneam impedire, &c. & tamen dux generalis ex officio non tenebatur hoc damnum impedire, sed id ex offi-

cio spectabat ad Officialem tritemis, & dux generalis, nectale damnum somniabat. Et confirmatur, quia aliàs diceremus teneri Regem ad restitutionem omnium damnorum causatorum per suos ministros culpabiliter, & negligenter operantes: vt v. g. cum iudices Regis iudicant iniuste, cum Scribæ, & Notarij officio male funguntur, plus exigendo, & falso scribendo, & sic de aliis officialibus Regiis, quibus Rex dat officia, & præcipit vt officia exequantur bene, & secūdum consuetudinem, & ignorat quando aliquid male ab illis agitur. Quod nullus dicit, neque in his casibus Regem ad restitutionem obligat: & idem dicendum erit de inferioribus principibus, ac dynastis respectu inferiorum sibi subditorum: qui subditis non imperant vt male agant, nec sciunt quando actu male agunt, nec proinde tenentur tunc aduertere, nec possunt: licet teneantur punire cum postea male factum aduertunt. Facit denique quod tradit Sà in *Aphor.* ver. *Restitutio.* num. 25. & num. 36. videlicet, quod in foro conscientia de quo agimus, non tenetur restituere qui fecit bona fide, nec qui dubitat an fuerit causa damni. Et citat pro hoc secundo dicto Syluest. & Valentiam. At constat quod dux generalis in suo mandato fecit bona fide, vt patet. Et præterea est in dubio an fuerit causa damni: imo clarius constat quod non fuerit causa damni ex suo præcise mandato.

2 Quod vero obiicitur ex Regula iuris, qui causam damni dat, damnum dedisse videtur: dico intelligendum esse de illo, qui est causa damni vera, naturalis, vel moralis per se, & directa: non vero de causa per accidens omnino remota, vel quando solum est conditio sine qua non: si enim causantes solum per accidens, remotissime, & velut conditio sine qua non, essent

sent obligandi ad restitutionem: obligaretur restituere faber, qui fecit gladium, vel clauem quibus quis iniuste occiditur, vel res aliena ex domo clausa eripitur ignorantibus his fabris, neque tale intendentibus, vel scientibus. Et id contigit in hoc casu, fuit enim dux generalis sua iussione causa peraccidens, remotissima, & conditio sine qua non.

3 Ultimo dico, quod nec dux generalis tenebitur restituere in casu, quo officialis triremis non habet unde restituat: Nam nemo tenetur restituere pro alio nisi quando fuit per se causa damni naturalis, vel moralis vt dando consilium, fauorem, mandando, vel quid simile, vt Doctores tradunt in materia restitutionis, maxime quando agunt an Dominus in conscientia teneatur restituere damnum illatum à suo seruo, ante condemnationem, de quo damno dominus nesciuit, & seruus non potest restituere: & dicit communior opinio, quod non tenetur dominus. Quod efficaciter probat Rabel. lib. 1. de restit. quest. 10. sect. 4. concl. ultima, pro qua ibi citat multos, & graues Doctores antiquos, & recentiores: magis autem videtur obligandus dominus ad restitutionem damni illati per seruum restituere non valentem, quam dux generalis ad restituendum damnum illatum per officialem triremis restituere non potentem.

## C A S V S XXVIII.

*Dubia circa officium Conceptionis Deiparæ, quod incipit: Sicut lilium.*

Circa officium Conceptionis Deiparæ, cuius officium ad vespervas incipit, *Sicut lilium*. Proposita

sunt sequentia dubia. Primum, an dictum officium recitatum fuerit in Ordine Minorum antequam Paulus V. Summus Pontifex id Minoritis concesserit, vel, si aliquando aliud diuersum in eadem Religione fuerit recitatum.

Secundo, à quo tempore, vel à quo anno in eadem Religione prædictum officium captum est recitari.

Tertium, quis fuerit Author istius officij, *Sicut lilium* & an Sedes Apostolica aliquod priuilegium, vel indulgentiam concesserit illud recitantibus.

Quartum. Vtrum non obstante verbo, *Quod possint illud recitare*, maneat liberum recitare aliud officium Conceptionis diuersum ab isto, *Sicut lilium*: vel si debeant recitare de Conceptione, necessarium sit ut recitetur?

Ad primum dico. Hoc officium Conceptionis sicut lilium, caput recitari in Ordine Minorum à tempore Sixti III. anno 1475. in quo anno coram eodem Sum. Pontifice Romæ facta est disputatio celeberrima de Conceptione Deiparæ, & ibi resolutum fuit disponente Papa, ut in Ecclesia hoc festum celebraretur sub titulo immaculatæ Cōceptionis: ad quem finem commendauit Papa cuidam Leonardo Nogarola protonotario Sedis Apostolicæ viro doctissimo, ut componeret dictum officium, *Sicut lilium*. Ita refertur in 3. par. *Chron. Ordinis Minorum* lib. 3. cap. 60 §. *En este tiempo*: & refert Pater Ægydius lib. 1. de *Concept. Deipara* q. 6. §. 1. fol. 294. & dicit Chronicorum Author cit. loco quod ab eo tempore Sixti III. vsque ad præsens recitatum est in Ordine Minorum prædictum officium, sicut lilium, etiam à Clericis. Postea anno 1480. Frater Bernardinus de Bultis Minorita reformauit idem officium *Sicut lilium* in aliquibus locis, & Papa Sixtus III.

III. adhuc viuus approbavit idem officium reformatum, sicut refert Tolcinianus *in historia Franciscana lib. 3. fol. 311. pag. 1. in medio pagine*, & probatur ex compendio Mendicantium verbo *Conceptio Virginis §. 7.* & ex his manet responsum ad tria dubia posita in primo quæsito, videlicet, quod hoc officium recitatum est ante Dominum Paulum V. & quod ab anno 1475. vel saltem ab anno 1480. habuit initium: & quis fuerit Author illius. Et quod in particulari quæritur, an aliquo tempore recitatum fuerit aliud officium Conceptionis diuersum ab isto, de hoc constare non potest, quia ante Breuiarium à Pio V. reformatum, erat in variis prouinciis varietas multa Breuiariorum, vt Tolletani Bracarensis, Eborensis &c. & dabatur maior libertas variandi, vel mutandi diuinum officium, quam modò datur. Sufficit quod ait Author chronic Minorum cit. loco, quod à tempore Sixti III. dictum officium sicut lilium, cæpit in Ecclesia celebrari, etiam à Clericis: & sufficit quod refert P. Ægydius citato loco ex verbis Sixti III. dicentis, quod dictum officium Sicut lilium *A nobis emanauit*, id est à nobis Papa. Et sufficit quod ibidem addit Ægydius, hoc officium Sicut lilium, non esse reprobatum per nouum Breuiarium: & ex hoc etiam manet responsum ad 2. quæsitum, ex quo anno in Ordine Minorum cæperit recitari idem officium & quis fuerit Author illius.

2 Ad secundam partem tertij quæsitij dico, quod videndus est Rodriguez *tom. 1. qq. q. 57. art. 3.* vbi refert concessionem Sixti III. ex monum. Ordin. per quam Papa concedit fidelibus vtriusque sexus, qui missam, vel officium Conceptionis, sicut lilium celebrauerint, aut dixerint, aut illius horis canonicis interfuerint, his inquam concedit illas omnes indulgentias, quas Pa-

pa Urbanus concessit illis, qui præsentes fuerint missæ, & horis canonicis in die Corporis Christi D. Quas indulgentias recenset Rodrig. *citato loco* §. *Circa quam* : & Leo X. concessit aliquas indulgentias intuitu Conceptionis B. Mariæ tam fratribus, quàm sæcularibus, vt habetur in compendio Mendicantium verbo *Conceptio Virginis* §. 12. & hoc quantum ad indulgentias concessas respectu huius officij, vel Conceptionis Deiparæ. Quod attinet ad priuilegia concessa recitantibus hoc officium Sicut lilium, videatur Rodriguez in *Bullario folio 650.* ubi ponit Bullam Leonis X. per quam concedit Ecclesijs Hispaniæ, vt possint in die Conceptionis Deiparæ, & per totam illius octauam, suspendere interdictum, dummodò recitent officium Conceptionis compositum à dicto Leonar. & dicant missam eiusdem officij, quæ incipit Egredimini, quæ hodie canitur à fratribus Minoribus. Vndè colligo, quod etiam tempore Leonis X. dabatur licentia Ecclesijs Hispaniæ, etiam sæcularibus, dicendi officium Conceptionis, Sicut lilium, compositum à dicto Leonardo, & reformatum per Bernardinum de Buis. Et quamuis ego in 2. tom. *Dubiorum Regular. ver. Interdictum num. 2. & 3.* dixerim cum Suarez, & Henr. quod in Hispania suspenditur interdictum in festo Cõceptionis Deiparæ, etiam si tales Ecclesiæ Hispaniæ non dicant officium Conceptionis Sicut lilium: hoc non obstat, quin datum fuerit prædictum priuilegium à Leone X. in forma supradicta, quod priuilegium ponit Rodriguez *cit. loco Bullarij.*

3 Quod vero attinet ad Fratres Minores circa hoc officium Sicut lilium, quia aliqui credere poterant eos illud non posse recitare post reformationem Breuiarij Pij V. iubentis vt officium D. dicatur solum iuxta re-

ta regulas dicti Breuarij, dico quod Pius V. concessit expresse Fratribus Minoribus vt possint recitare officia sui Ordinis prout communiter sunt impressa, quorum prius est officium Conceptionis, Sicut lilium. Sic habetur affixus titulus in principio officiorum nostri Ordinis, & dicitur in titulo id concessisse Pium V. anno 1569. 14. die Maij, vnde obiter colligo, quod cum ista concessio fuerit priuilegium concessum annis ab hinc 57. Fratribus Minoribus, videant ceteri Mendicantes, qui communicant nobiscum in priuilegiis, quod potuerint ab illo anno in illo communicare, maxime cum iam esset concessum à Sixto III. & Leone X.

4 Ad vltimum quæsitum, *Ut possint recitare*, &c. an possint priuilegiati quibus hoc priuilegium conceditur, dicere aliud officium Conceptionis extra hoc, Sicut lilium? Dico sequentia, Primo, quod supra citavi duas Bullas vnam Sixti III. aliam Leonis X. & neutra istarum continet verba obligantia ad dictum officium hodie recitandum, maxime post Breuiarium Pij V. obligantis ad recitandum iuxta illius tantum Regulas. Nec aliqua Religio vltra Franciscanam poterat illud recitare ex vi priuilegij Sixti III. & Leonis X. quia Pius V. id prohibet generaliter, nisi à ducentis annis sic consueuerint recitare. Dico secundo, quod si aliqua Religio denuo impetrauit priuilegium recitandi dictum officium, Sicut lilium, talis Religio antequam priuilegio illo vtatur, poterit illi renunciare in capitulo generali propter duas Regulas generales Iuristarum, videlicet quod priuilegium non confertur inuito, & quod vnusquisque potest renunciare suo priuilegio: & hoc intelligo de Religione in communi, quæ potest in capitulo generali illud renunciare. Dico tertio

tio quod Religiosus in particulari non potest huic priuilegio renunciare: volo dicere: Si tota Religio cuius est professus, ex priuilegio recitat hoc officium, Sicut lilium: Religiosus particularis istius Ordinis non potest aliter recitare, recitando alio modo: quod ostendo hoc exemplo. Clericus particularis non potest renunciare priuilegio canonis, & fori, quia hæc duo priuilegia non sunt concessa huic Clerico in particulari, sed Ordini Clericali in communi primario, vt omnes Doctores dicunt, Sic in nostro casu, Religiosus particularis non posset dicere aliud officium diuersum ab isto, Sicut lilium, si tota illius Religio illud recitat, quia hoc priuilegium non est suum particulare, sed totius Religionis: sic tenet Reginald. *de renunciatione priuilegij, tom. 2. lib. 18. num. 160.* citans Azorium, qui dicunt teneri Religiosum recitare officium diuinum iuxta formam sui instituti. Et probatur ex cap. *de his, & ca. Placuit, distin. 12.* Quantum vero peccatum committeret iste Religiosus mutando officium, collige ex iis quæ dicunt Doctores de Clerico dicente vnum officium pro alio scienter vna die, vel altera, de quo Reginald. *cit. lib. num. 172.* citans Suarez.

§ Ad vltimum dico; quod si Papa concessit alicui Religioni vt diceret officium Conceptionis sicut lilium, & concessit cum particularitate, vt scilicet illud recitet singulis sabbatis sicut facit Religio Franciscana, si Religio non recitauerit illud officium, Sicut lilium, non manet priuilegium in suo vigore, quia non seruatur forma priuilegij. Cum enim priuilegium sit lex priuata, non seruata forma, & verbis illius, violatur lex, seu priuilegium, & sic non seruata forma priuilegij perditur priuilegium: Est enim priuilegium quasi contractus conditionalis, quo Papa aliquid concedit si  
aliquid



aliquid taliter fiat: de quo latè Suarez tom. de legibus lib. 8. cap. 13. à num. 2. usque ad finem capitis. Vide etiam illum eod. lib. 8. cap. 12. & seqq. ubi multa dicit, ad cognoscendum quomodo amittatur priuilegium.

---

CASVS XXIX.

*De quodam parcho qui excommunicauit parochianum, quod non audiret missam in propria parochia.*

**Q**uidam Parochus excommunicauit suum parochianum eo quod non audiebat missam in propria parochia, cum tamen certo constaret eum illam audire in Conuentu Religiosorum iuxta quod habitabat: & declarauit illum excommunicatum: appellauit parochianus ad Ordinarium, siue ad Vicarium Generalem Episcopi. Interim dum litigium durabat, parochianus inquietus ob communicationem prohibitam sibi cum aliis, fecit se absolui à Parcho ad cautelam, non obstante litigio.

Quæritur primo, vtrum parochus ordinarius possit excommunicare: quod dubium iam alibi vidi contigisse.

Secundo, quæritur, an Parochus possit cogere parochianum cum pœnis vt adeat propriam parochiam pro missa audienda in diebus festis, ac Dominicis?

Tertio. An isti parochiano petenti absolutionem excommunicationis ad cautelam, nocere potuerit talis petitio, & proinde reputandus fuerit excommunicatus, eo quod per talem petitionem visus est fateri se excommunicatum?

1. Antequam ad quesita respondeam præmitto hunc parochianum non prudenter egisse appellando ad Vicarium Generalem Episcopi: sed potius debuit ille, vel potius Prælatus dicti monasterij, in quo missam audiebat, debet adire conseruatorem talis Conuentus, & petere ab illo iuridicè, vt mandaret Parocho ne in hoc molestaret parochianum eo quod dictus Conuentus habet priuilegia, vt possit quicumque Catholicus in illo missam audire, & cum illa satisfacere obligationi: quæ priuilegia mox citabo. Hoc enim est proprium officium conseruatoris cuiusque Religionis, defendere illius Religiosos contra violatores suorum priuilegiorum, per quorum violationem Religiosis fit iniuria, & iniuria, & ideo hoc magis spectat ad conseruatorem Ordinis, quam ad Vicarium generalem; & magis spectabat ad Prælatum Conuentus, quam ad parochianum hoc negotium prosequi, ne per tales omissiones Religiosi sua priuilegia amittant.

2. Ad primum quæsitum dico resolute, quod parochus ordinarius, siue dicatur Prior, siue Curatus, siue Vicarius, siue quouis alio nomine, non potest excommunicare suum parochianum, nisi id sibi in speciali committat Episcopus, vel id habeat ex consuetudine antiqua, & præscripta. De secunda parte huius conclusionis nemo dubitat: potest enim Episcopus alicui pro aliquo casu dare iurisdictionem ad excommunicandum: & similiter consuetudo antiqua, & præscripta dare potest iurisdictionem, etiam ad excommunicandum, sicut alibi Doctores tradunt. Prior ergo pars conclusionis, quod scilicet parochus ordinarius de iure communi non possit excommunicare, asseritur à Nauarro in *sum. cap. 27. num. 5.* & super caput *cum contingat. de rescr.* Panormitanus ad caput *cum contingat. de foro competen.*

*competen glossa in cap. Nemo 2. quest. 1. Lædesm. 24. qu. 24 art. 1. & notissime illam tenet Sanch. lib. 3. Decal. cap. 29. num. 56. & alij. Et probatur, quia licet parochus habeat curam animarum, non tamen habet forum contentiosum, vnde nec est proprie, & stricte prælatus, sed large, & improprie, teste Syluestro verb. *prælatum. ad initium. Et idem ver. excommunicatio. notab. 2. num. 5. neque obstat cap. cum ad Ecclesiarum. & cap. si sacerdos. de offic. ordinarij. vbi pro rato habetur, quod plebamus S. Pancratij suos parochianos excommunicauerit; nam iuxta glossam cit. cap. cum ad Ecclesiarum. talis parochus vel erat præfectus Ecclesiæ Collegiatae, vel id fecit ex commissione officij superioris prælati, non vero quatenus solum parochus erat. Nec item obstat cap. 1. de clerico agrotante. vbi parochus appellatur prælatus: large enim, & improprie vocatus est ibi prælatus, vt diximus; eo fere modo, quo Abbatissæ vocantur prælatæ. Et praxis communis Ecclesiæ idem obseruat.**

3 Ad secundum quæsitum dico, non posse fideles cogi à parochis, vt audiant Missam in propria parochia, nec impedire possunt quin illam audiant in Monasteriis Regularium. Ita tenet Nauarrus *in sum. cap. 21. num. 5. & multis probat Azor tom. 1. lib. 7. cap. 6. quest. 4. idem dic de concione audienda. Citat Nauarrus citato loco priuilegium Leonis X. concessum Religiosis in ista materia. Concessit hoc idem Clemens VIII. vt habetur in Bullar. Rodrigo. fol. 1197. col. 2. num. 4. & citat Azor vnā declarationem Cardinalium, qui ita declararunt, quam Azor dicit esse in ordine 112. inter declarationes Cardinalium. Extat etiam praxis generalis Ecclesiæ id tolerantis, ob quæ ait Nauarrus non posse Episcopum ad oppositum cogere. Alios Doctores citatos inuenies apud Nauarrum, & Azor.*

4. Obiiciunt aliqui Extrauagantem Sixti IV. quæ incipit, *Vices illius, de treuga, & pace.* vbi dicitur teneri parochianos in diebus festis Missam audire in propria parochia. Obiiciunt etiam Concilium Tridentinum sess. 24. cap. 4. de reform. vbi dicitur teneri parochianos in diebus festis propriam adire parochiam ad audiendum verbum Dei. Non inquam hæc obstant: quia imprimis ius commune citatæ Extrauagantis hoc solum voluit; ne parochiani id faciant in diebus festis contempto proprio parrocho, sic explicat Azor citato loco dicens, sic etiam explicare Innocentium, Hostiensem, & alios Canonistas. Secundo respondet Nauarrus citans Syluestrum, & Antoninum, quod capita iuris cõmunis dicentia quod parochiani audiant Missam in propria parochia, sunt abrogata per generalem consuetudinem in contrarium ab Ecclesia scitam, & toleratam. Ad Concilium Tridentinum dico imprimis quod illud citato loco non reuocat priuilegia Mendicantium, & supra vidimus duo priuilegia cõcessa monasteriis, & vnã declarationem Cardinalium, qui explicant in illa materia ipsum Tridentinum. Secundo dico Concilium ibi solum loqui de concione audienda, non vero de Missa audienda. Tertio dico cum citato Azor, Tridentinum etiam quoad concionem non posuisse præceptum, sed exhortationem; & præterea etiã quoad concionem, non esse in vsu. Circa primam vero responsionem datam ad Extrauag. Sixti IV. quod scilicet solum prohibet ne parochiani id faciant proprio parrocho contempto, intellige, vt formaliter, & expresse non contemnant parochum: quem contemptum non habent fideles adeuntes monasteria Religiosorum pro Missa, & concionibus audiendis, cum ibi diuina officia vt plurimum perfectius, ac deuotius celebrentur,

& plures sint celebrantes, & quavis hora celebrent, & concionatores doctiores, & non est credendum saltem hodie, velle Ecclesiam suos fideles istis commodis priuare, impediendo illos ne in Monasteriis diuina audiant, sed semper ad propriam parochiam vadant.

5 Posset adhuc obiici idem Concilium Tridentinū, quod *sess. 22. in decreto de obseruandis in celebratione Missæ*, ponit hæc verba: *Moneant etiam eundem populum, ut frequenter ad suas parochias, saltem diebus dominicis, & maioribus festis accedant.* Vbi clare loquitur de parochianis circa suas parochias adeundas diebus festis. Respondeo vt supra, verba Concilij ibi non præcipere: ait enim moneant populum. Non ait, cogant. Et Marzilla in declarationibus Cardinalium quas impressit ad citatum locum Tridentini, citat declarationem Cardinalium, quæ dicit non esse mentem Concilij, quod parochi, vel prælati per censuras populum cogant, neque ea de re per Concilium præceptum imponi, sed solum velle Concilium, quod moneantur fideles, vt id faciant, quando commode fieri poterit. Alia capitula iuris canonici citat Reginaldus *libro 19. tomo 2. q. 3. nu. 22. & sequentibus*, quæ videntur etiam obligare parochianos pro Missâ adire parochiam: ad quæ capita iuris ibi respondet Reginaldus: & responsio in substantia data est in supradictis *num. 4.* vide alios multos Doctores hac de re citatos à Barboza in *suis remission. ad Tridentinum super cit. sess. 22.*

6 Ad tertium quæsitum dico breuiter, quod isti parochiano nocere non potest, quod petierit absolutionem ab excommunicatione, nec proinde reputandus est excommunicatus, vt excommunicati pœnas subeat. Sic in terminis dicit Panormitanus ad caput *Ad præsentiam de appellat.* dicens quod si quis petit se absolui

ad cautelam, non per hoc fatetur se esse excommunicatū. Idem citat glossa parua marginalis ad citatum ca. *Ad presentiam*. Et ratio dicitur ita esse nam multa petimus, vel facimus ad vitandam molestiam, non quod nobis, necessaria sint. Addo quod ista excommunicatio lata à parcho fuit omnino nulla ex defectu iurisdictionis ex dictis *num. 2.* & præterea etiam si parochus haberet iurisdictionem ad excommunicandum adhuc esset nulla, quia lata esset contra ius, idest contra priuilegia Summorum Pontificum, & declarationem Cardinalium, & contra generalem consuetudinem Ecclesiæ, & ideo diceretur continere errorem intolerabilem & proinde illi parendum non esset.

## CASVS XXX.

*De quodam contractu in materia census.*

**P**etrus mutuauit Francisco certam summam pecuniæ pro tempore designato tantum, addens quod si præfixo tempore pecuniam non sibi redderet teneretur Franciscus per viam census vendere, seu reddere Petro certam mensuram tritici singulis annis, dicens quod ad illum finem habebat illam pecuniam designatam: Franciscus pecuniam mutuatam non reddidit termino præfixo, nec scripturam census venditi facere voluit. At singulis annis Petro dabat certam mensuram tritici prout putabat mutuatam pecuniam posse lucrari singulis annis. Detinuit Franciscus dictam pecuniam annis quindecim modo prædicto, clamante semper Petro, ut vel sibi pecuniam suam redderet, vel census scripturam faceret. Mortuus est Franciscus, & testamento

stamento præcepit hæredibus, vt dictam pecuniam sibi mutuata, Petro redderent. Hæres petit vt Petro iuramentum exhibeatur, per quod dicat, quantum triticum quotannis reciperet à Frâncisco, in satisfactionem sue pecuniæ mutuatæ pro quolibet anno. His sic positus: quæsiuit à me Petrus hoc solum; an teneretur ob tale iuramentum confiteri triticum receptum, attento quod sua pecunia tot annis caruerit, in quibus posset cum illa multo plus lucrari? Ego respondi, casum alias habere maiores difficultates prius enodandas, quas sic breuiter resoluo.

I Dictum pactum; vt non reddita sibi pecunia mutuata præfixo in termino, sibi Franciscus censum tritici venderet, fuit pactum illicitum, & fere vsurarium. Nam ratione mutui imposita est Francisco obligatio quasi de iustitiâ, ad quam alioqui non tenebatur, idest ad vendendum sibi Petro censum tritici. Hæc est communis Doctõrum dicentium, vsuram esse, ratione mutui imponere mutuuario aliquam obligationem pretio æstimabilem, ad quam non tenebatur aliàs. Nam sicut dicitur in leg. *Sicut. Cod. de actionibus*, omnis obligatio tollens libertatem pecuniæ æstimabilis est. Idem habetur institut. *de obligation. ad initium*. At obligatio imposita Francisco ratione istius mutui, vt illo non soluto præfixo termino, tritici censum venderet, est obligatio ad quam Franciscus non tenetur, & pretio æstimatur, & denique libertatem minuit. Hæc conclusio præter quam quod est communis de mente Doctõrum, asseritur à Rabello *lib. 8. de usuris quæst. 4. num. 2.* & in particulari ibidem *num. 4.* vbi dicit cum Soto, vsuram esse si tibi mutuo oleum, vel vinum, ea conditione, vt mihi vendas triticum. De qua re multa aliâ exempla traduntur à Doctõribus, vt si mutuuario

obligationem imponam, vt triticum deferat ad meum mollendinum, panem ad ureum furnum, & similia, quæ sunt obligationes pretio æstimabiles, & ad quas mutuarius nō tenetur ratione mutuæ: vide alia exempla citato loco apud Rabello *num. 4 & num. 5.*

2 Dico prædictam venditionem census prædicto modo petitam à Petro transacto termino præfixo ad solutionem, non potuisse fieri valide, saltem in foro externo ex vi præteritæ pecuniæ mutuatæ, quam Franciscus receperat, etiam si fieret scripturis venditionis census per publicum Notarium. Probatum clare ex Motu proprio Pij V. de censibus, in quo iubet irritam esse constitutionem census si in illius venditione pecunia non numeretur coram testibus, & Notario. Hæc vero pecunia, quam Petrus olim mutuatam Francisco tradiderat, non potest numerari, nunc quando fit scriptura venditionis census tritici, id est quando Petrus petebat fieri scripturam census transacto termino præfixo ad solutionem mutuatæ pecuniæ.

3 Tertio dico, si ad recuperandam pecuniam suam ab hæredibus, Petro exhibeatur iuramentum à iudice, vt dicat quantum triticum receperit à Francisco singulis annis in recompensationem pecuniæ detentæ, tenetur Petrus iurare veritatem, & declarare quantum tritici receperit singulis annis ob detentam pecuniam. Hæc etiam est clarissima, & certissima: Nam si Petrus vellent receptum triticum retinere, & præterea totam suam pecuniam olim mutuatam accipere ab hæredibus, claram vsuram committeret recipiendo dictum triticum ratione mutuatæ pecuniæ, & præterea exigendo totam pecuniam mutuatam in solidum, quod est clarissima usura. Si vero Petrus cogitat (vt innuit) posse se receptum triticum tacere, & occultare ratione

lucris



lucris cessantis, quia sua pecunia non soluta per tot annos poterat mercari censum verum tritici perpetuum: ad hoc respondeo in dicto sequenti.

4 Quarto dico, quod si Petrus ex mutuatione suæ pecuniæ, & retardata solutione habuit lucrum cessans, ut ipse innuit, potest coram iudice petere restitutionem veri lucris sibi cessantis, si in veritate sibi cessauit, maxime cum id videatur expressisse in principio quando mutuauit; hæc etiam est communissima Doctorum in materia de usuris, dicentium posse mutuantem aliquid ultra sortem recipere ratione lucris cessantis, vel damni emergentis. Quæ vero conditiones requirantur ut vere dicatur lucrum cessare, tradunt communiter Doctores, maxime Rabello citato libro 8. de usuris. qu. 6. ubi citat multos Doctores, & assignat sex conditiones ut vere dicatur lucrum cessare, & ob illud cessans exigere interesse.

5 Ex conditionibus vero ibi positis, secunda in ordine est quæ facit multum ad nostrum întentum: ait enim cit. quæst. 6. num. 3. inter alia requiri, ut non plus recipias quam lucrum cessans æstimeretur, alioquin receptio talis excessus vel erit usuraria vel iniusta. Et ratio naturalis id dicit, ut non possis plus petere, quam æstimeretur id quod amisisti. Exemplum accommodatum omnino est, in compensatione debiti, quam quis facit per se ipsum seruatis debitis conditionibus. v.g. Petrus mihi debebat centum clara & liquida, non vult soluere, neque ego habeo probationes, quia dedi in occulto, nec possum modo aliquo recuperare: possum in conscientia clam cessante scandalo illa centum accipere: vel debitum quod alias illi clam debebam non reddere, faciendo compensationem debiti ad debitum, dummodo non plus accipiam quam mihi debebatur.

si enim plus accepero, tenebor restituere excessum illud, quem ultra debitum accepi. Hanc doctrinam applico ad casum præsentem, & dico considerandum esse quantum triticum accepit Petrus à Francisco singulis annis pro retardata solutione pecuniæ, constat enim Franciscum illud triticum non soluisse Petro ratione gratificationis, vel alio titulo gratuito, sed in compensationem lucri quod Petro cessabat ex detenta pecunia: unde si constiterit quod triticum redditum quotannis tanti æstimabatur, quantum lucrum Petro cessabat, vel quantum Petrus acciperet de censu tritici illa pecunia singulis annis, credo quod in tali casu hæredes Francisci nihil debent Petro ratione lucri cessantis ob causam supradictam, quia aliàs vellet Petrus ratione lucri cessantis plus accipere quam amitteret in lucro cessante. Si vero triticum receptum à Petro singulis annis non æquivaleret pretio lucri quod cessavit singulis annis, tenebuntur hæredes Francisci ad restituendum Petro id quod defuit ad illud iustum lucrum quod sua pecunia potuit acquirere attentis circumstantiis, periculis, & cæteris arbitrio prudentis viri. Et ad hoc liquidandum, ut dixi *num. 3.* tenetur Petrus exhibito sibi iuramento declarare veritatem, de tritico quotannis recepto. Et hoc dico supposito quod in veritate Petro lucrum cessavit. Si enim non cessavit tenebitur Petrus in conscientia restituere hæredibus Francisci omne triticum receptum tamquam lucrum ex mutuo, ut clare constat ex dictis à nobis supra *num. 1.* quia cessante, idest non interveniente lucro cessante, pactum fuit illicitum.

## CASVS XXXI.

*De quodam tabellione qui vocatus noluit ire.  
ad approbandum certum te-  
stamentum.*

**Q**Uædam Catherina vidua habebat fratrem vxoratum, & alios consanguineos, nepotes scilicet ex fratribus. Hæc morti propinqua volens condere testamentum, vocauit confessorem suum, vt testamentum suum scriberet, & ordinaret. Prædictus frater id sciens, domum sororis adiit, & impediuit ne illa testamentum faceret. Imo sororem in domum suam duxit sic ægrotantem, & vocauit amicum suum ipsius scilicet fratris, qui testamentum sororis scripsit, & ordinauit: sic facto testamento, vocauit tabellionem qui dictum testamentum approbaret. Tabellio respondit, se paratum esse ad illud approbandum, sed post approbationem se secum adducturum esse testamentum clausum, nec illud relicturum esse in manu fratris, eo quod essent alij prætensores ad hæreditatem sororis suæ. Noluit frater Catherinæ vt tabellio cum illa conditione approbaret testamentum. Et quia in illo oppido pro tunc non erat alius tabellio, fecit hic frater Catherinæ testamentum approbari per quendam Notarium Apostolicum Ecclesiasticum. Mortua Catherina iudex sæcularis sententia publica declarauit testamentum esse nullum eo quod non fuisset approbatum per tabellionem Regium, sed per Notarium Apostolicum, qui iuxta legem istius Regni non potest approbare testamenta, vt habetur *lib. 2. Ordin. tit. 20.*

-Fratr Caterinæ fraudatus hæreditate sibi relicta in testamento non approbato iuridicè, litem mouit contra tabellionem, qui noluit approbare nisi sub dicta conditione, eo quod causa fuerit sibi ademptæ hæreditatis. Quæritur, an frater hanc litem intentans habeat ius vt tabellio sibi restituat hæreditatem amissam. Et vtrum dictus tabellio pœnam aliquam incurrerit ex eo quod vocatus noluerit ire ad testamentum approbandum.

1 Et pro parte affirmatiua, quod tabellio teneatur in conscientia restituere huic fratri Catherinæ hæreditatem amissam, videtur probari primo: quia impediens aliquem ab asscutione alicuius boni tenetur illud restituere, vt tenent communiter Doctores in materia restitutionis, maximè Angelus ver. *Restitutio*. 10. & alij. At Tabellio iste sua omissione impediuit ne frater Catherinæ adiret hæreditatem sibi à Catherina relictam. Secundo id clarius ostenditur: quia obligatus aliquid facere ex officio, & omittens illud facere, si ex sua omissione damnum alicui resultet, tenetur ad restitutionem talis damni, vt omnes Doctores dicunt in materia restitutionis, dum explicant personas obligatas ad restituendum in illa particula, *Non obstant*, vt ver. gratia de custode vinearum obligato ex officio, ac de similibus, qui ex officio tenentur aliquid facere: sed iste tabellio tenetur ex officio approbare testamenta, ad hoc enim constituitur officialis publicus à Rege: ergo omittens approbationem huius testamenti tenetur de damno illato isti fratri Catherinæ.

2 His non obstantibus, dico primo. Nimis inclinor vt credam, hunc fratrem Catherinæ incurrisse pœnam impositam per legem istius Regni lib. 4. *Ordin. air.* 84. illi qui impedit ne aliquis liberè faciat testamentum:

quæ

quæ pœna ultra alia ibi, est vt talis careat spe hæreditatis sibi inde obuenturæ. Moueor, quia iste clarè impediuit ne dicta soror testamentum faceret libere cum suo confessore, vt illa volebat: & licet illa postea testamentum fecerit in domo fratris, vehemens præsumptio est quod non fecit liberè, vt statim dico num. sequenti, Probo præterea ex Mascardo *tom. 3. de probationibus concl. 1361.* vbi probat illum censeri impedire ne aliquis testamentum faciat, & subiici pœnis impositis taliter impediendi, qui non solum impediuit aliquem testari, sed etiam impediuit ne testaretur cōtra id quod volebat, & ad id adhibuit aliquod impedimentum: Frater vero Catherinæ, dato quod sibi soli tota hæreditas, vel maior pars relinquebatur in illo testamento nullo, impediuit ne Catherina relinqueret aliquid cæteris consanguineis, adhibens impedimentum ne illa testaretur libere in domo sua sicut volebat. Et citat Mascardus multos Doctores, maxime Menochium *de arbitr. casu 395. num. 34.*

3 Dico secundo vehemēs præsumptio est quod istud testamentum sic factum à Catherina, etiam si approbaretur iuridicè à Tabellione, adhuc esset nullum, & fratri Catherinæ ex vi illius non esset danda hæreditas. Suppono ante probationem, quod ob solam vehemētem præsumptionem quæ violentæ æquipolleat, potest iudex ferre sententiam, etiam in causa grauissima, quando crimina sunt difficilis probationis, vt praxis istius regni obseruat, etiam in criminalibus; quo supposito dico, vehementem esse probationem, imo violentissimam præsumptionem quod hoc testamentum fuerit factum absque libertate requisita de iure vt testamentum sit validum, & proinde etiam si hoc approbaretur non valeret ex defectu libertatis in Catherina.

Proba-

Probatnr clare ex tot circumſtantiis , quæ in illo concurrerũt. Primo enim impediuit ſororem ne teſtamentum faceret cum ſuo confefſore. Secundo illam abduxit : in domum ſuam propriam. Tertio aduocauit amicum ſuum vt ſorori teſtamentum ſcriberet & ordinaret. Quarto noluit vt Tabellio iret approbare teſtamentum cum illa conditione, quod ſecum reducturus eſſet teſtamentum clauſum. Quinto interuenit etiam metus reuerentialis Caterinæ erga fratrem ſuum , maxime cum eſſet extracta à domo propria , & poſita in loco non tuto, fœmina fragilis, & ægrotans : quis non videat has omnes circumſtantias facere violentam præſumptionem, imo euidentiam, quod Caterina tale teſtamentum libere non fecit? Quod adeò verum eſt, vt contractus factus per ſolum metum reuerentialem ſit nullus, vt probat Sanchez libro 4. de mat. diſp. 4. & hoc tunc magis verificabitur, ſi conſtiterit, quod illa ante hoc teſtamentum domi ſuæ exiſtens, ſignificauerat ſe aliis conſanguineis aliquid teſtamento donaturam : & licet id non exprimeret verbo, ſufficiebat, quod alios conſanguineos habebat pauperiores hoc fratre; tunc enim omnino credendum eſt quod hanc voluntatem piam aliquid relinquendi prædictis, mutauit in domo fratris victa precibus importunis, & metu reuerentiali eiufdem fratris.

4. Dico tertio, quod non audeo affirmare dictum tabellionem teneri in conſcientia reſtituere tali fratri Caterinæ hæreditatem amiſſam ex ſua approbatione omiſſa, ſi tabellio ſciebat has omnes circumſtancias proxime dictas præceſſiſſe, vt videtur ſciuiſſe iuxta informationem datam, & iuxta proteſtationem quam adhibuit : probatur : quia licet tabellio ex officio teneatur approbare teſtamentum, id intelligitur quando teſtamentum

mentum ritè confectum est iuxta leges Regni: at testamentum istud erat factum sine libertate, vt patet ex dictis, & hoc tabellioni notum erat: ergo non tenebatur illud approbare. Et confirmatur. Nam si iste Tabellio vocaretur ad approbandum testamentum alicuius hominis, quem reperiret actu esse insanum, vel mente captum, tenereturne illud approbare? Minime, quidem: idem ergo modo non tenebatur approbare hoc testamentum quod sciebat factum esse non libere. Secundo, probatur, quia transgrediens aliquam legem bona fide putās se habere causam licitam ad illam violandam, seu omittendam, non peccat, & excusatur à transgressione illius: & qui lædit sine lata culpa non tenetur restituere, vt tenet *Sot. li. 4. de iust. q. 7. ar. 2.* & *Toledo lib. 5. cap. 18.* & *Sà in Aphor. verb. restitutio:* & *Nauart. consilio 4. de accusat. num. 5.* citans *D. Thom. alios:* At iste Tabellio putauit se habere causam iustam non approbandi illud testamentum nisi secum clausum adduceret, pro pace, & securitate aliorum hæredum, & cum hac bona fide, & causa, omisit approbare: ergo non peccauit in illa omissione, nec proinde tenetur ad restituendum saltem in foro conscientie: quod tunc verius erit si constet quod alij hæredes id petierunt à Tabellione, vt secum domum ferret testamentū clausum, nec illud in domo fratris relinqueret. Adde quod nulla est lex quæ obliget testamentum clausum approbatū manere in domo testatoris, cum sæpe ipsi testatores testamentū clausum iam approbatum, dent alicui amico, vel Religioso seruandū in domo sua: & sic Tabellio non adhibuit conditionem iniustam dicendo quod testamentū clausum secum erat delaturus. Tertio probō in particulari quod iste tabellio non teneatur restituere ex eo quod impedierit fratrem Caterinæ, vel filios

lios eius ab assequenda hæreditate illi per hoc testamentum relicta: nam illud dictum doctorum, quod impediens aliquem ab assecutione alicuius boni tenetur illi restituere, intelligitur, si impediuit vtens dolo, fraude, & metu, vt tenent Doctores mox citandi: item intelligitur quando impediuit bonum ad quod habebat ius ad rem, vel in re, vt tenet inter alios Azor *tom. 3. sum. mor. lib. 4. ca. 9.* citans Angelum, Syluest. Tabien. Armil. Adrian. & alios. At tabellio sua omissione non est vsus dolo, fraude, nec metu, nec frater Caterinæ habebat ius ad rem, neque in re: quia ad totam hæreditatem fororis non habebat ius ad rem, cum tale ius non acquiratur nisi per testamentum rite approbatum: ergo ex hoc capite quod impediuit, non tenetur ad restitutionem. Et adhuc explico illud dictum, quod impediens assecutionem alicuius boni, tenetur restituere; dico adhuc, esse intelligendum, si iniuste impediuit: secus si iuste impediuit, tunc enim non tenebitur: sit exemplum. Volebat Episcopus dare beneficium indigno, ignorans illius defectus: ego informauī Episcopum, illique detexi defectus illius cui dare volebat beneficium: impediui illum ab assecutione beneficij; non tamen teneor illi restituere quia impediui iuste. Sic etiam in hoc casu; tabellio sciens per illam præsumptionem, hoc testamentum factum esse sine libertate in iure requisita ad testandū, non impediuit iniuste, fratrem Catharinæ ab assecutione hæreditatis sibi relicte ex testamento non libere facto. Et licet Azor *cit. loco §. Porro contingit*, dicat quod hæres institutus in testamento habet iam ius ad hæreditatem ad eundā, intellige de hærede instituto in testam. valido, libere facto, cum cæteris conditionibus: quod in hoc non reperitur, cum testatrix caruerit libertate in illo condendo. Et ex his so-

lutione



lutum manet primum argument. in contrarium initio positum, quod dicebatur teneri restituere illum qui impediuit assecutionem alicuius boni.

5 Ad secundum argumentum potest primo dici tabellionem ex officio non teneri approbare testamentum, quod clarè scit esse factum sine libertate in iure requisita, sicut supra dixi de testamento mente capti, vel à iudicio alienati: hic vero tabellio, maxime in oppido paruo vbi casus contigit, scire potuit testamentū hoc esse factum sine libertate ob circumstantias supra numeratas: & sic non tenebatur ex officio testamentum approbare. Secundo dici potest, quod licet teneretur alias ex officio approbare, quia tamen omisit id facere bona fide, sine dolo, sine fraude, non tenetur restituere, iuxta tot Doctores supra citatos *num. 4.* saltem pro foro conscientiae, de quo solum hic disputo.

6 Ad secundam partem quaesiti principalis, an scilicet tabellio hic pœnam aliquam incurrerit positam à legibus? dico hoc pertinere ad forum externum de quo iudex saecularis viderit. Ego saltem in legibus Regni non inuenio aliquam pœnam particularem ipsis impositam tabellionibus qui talem approbationem facere noluerint, maxime si causam habuerint, qualem iste habuit. Nam *cit. 4. lib. Ordin.* vbi agitur de impediendis testamentorum factionem, nec titulo 80. aliqua illis pœna imponitur. Imo si licet argumentari à simili, Ordinationes *lib. 4. tit. 24. §. 17.* loquentes de tabellionibus, qui negligenter negotia partium exequuntur, & qui asperam responsionem illis reddunt, non dicunt quod tabellio parti damnum restituat: solum dicit lex ibi, quod Tabellio suspendatur ab officio per vnum mensem. Et in *lib. 1. tit. 80. §. 1.* iubet, vt Tabellio, qui intra vnum diem parti non dederit instru-

men-

mentum grauaminis petitem, amittat officium: non vero dicit, quod parti damna restituat. Adde præterea quod illa pœna amittendi officium non videtur esse in praxi: & ideo non video legem, ex qua obligetur iste Tabellio in foro externo restituere pretium hæreditatis amissæ fratri Catherinæ istius propter omissionem approbationis istius testamenti. Et quando lex talis daretur. Respondere potest Tabellio, illam non habere locum, quando constaret de testamento facto sine libertate, sicut constitit de isto: vel quando constituerit quod alius prætenfor hæreditatis fecit protestationem tabellioni, ne testamentum approbatum domi testatoris relinqueret, vt præsumitur hic euenisse: & confirmatur, quia *cit. lib. 4. Ordin. Lusitania tit. 80. §. 1.* dicit lex in approbatione testamentorum, quod testator manu propria debet dare testamentum tabellioni approbanti, vt illud approbet: non vero dicit, quod tabellio illud approbatum reddat testatori. Si vero alicubi id deberet exprimi, quod tabellio testamentum approbatum secum in domum suam non deferat, hoc loco foret exprimendum. Et aliquæ personæ sua testamenta approbata dant tabellionibus vt illa seruent, ac proinde non apposuit hic tabellio fratri Catharinæ conditionem vllam contra legem de deferendo secum testamento approbato, per quam conditionem appositam, mereatur aliquam pœnam legis maxime præcedentibus talibus circumstantiis supradictis contra libertatem testatricis præsumptis. Seruit adhuc pro isto quæsito an tabellio iste pœnam vllam incurrerit, id quod dicit Mascardus in suo indice generali, ver. *Notarius*, videlicet, quod Notarius si malitiose errauerit, punitur, ( licet citatio folij sit falsa ) ergo à contrario sensu, si Notarius non errauerit malitiose, vt iste non errauit,

errauit, non punietur: cum iste fecerit bona fide, & putans se habere causam non approbandi testamentum nisi cum illa conditione quam adiecit.

7 Vltimo ad illud, quod mihi extra informationem dictum est, an videlicet, non obstante nullitate istius testamenti ex defectu approbationis, & libertatis, valida fuerint legata, quæ testatrix iussit fieri pro anima sua: dico fuisse valida, & proinde implenda, non obstante nullitate testamenti, vt sunt Missæ, capellæ, officia defunctorum, & similia, & hoc etiam in foro externo, vt in particulari tenet expressè Molina *tom. 1. de iust. disp. 134.* dicens esse opinionem communem, & citat Costam, & Iulium Clarum, hoc citat Molina *cit. disp. §. quando iuxta.* & in §. præcedente, quod incipit, *testamentum tunc.* Quod vero hoc testamentum etiam nullum, fuerit factum ad causas pias, vt legatum pro anima ibi sit validum, tenet Molina *cit. disp. in princip.* citans Abbatem, qui dicit tunc relinquit aliquid ad causam piam, quando relinquitur in bonum propriæ animæ, vt si relinquat Ecclesiæ, vel pauperibus etiam consanguineis. Vnde licet hoc testamentum fuerit nullum, legata tamen præcise pro anima sua relicta erunt valida, & implenda. De cæteris bonis in particulari relictis certis personis titulo hæreditatis. Iudicandum ac disponendum erit, ac si moreretur abintestata. Videatur Molina *cit. disp. §. Ratio cur.* vbi congruenter ad hoc loquitur, & alij.



## CASVS XXXII.

*Professio nulla cuiusdam Monialis*

**Q**Uædam fœmina ingressa est monasterium Monialium coacta iussu parentum, finito nouitiatu, ante professionem coram quinquaginta Monialibus, & imagine crucifixi, protestata fuit se nolle esse Monialem, neque intendere profiteri: & paulò post professionem emisit coram Abbatissa: numquam tamen professionem ratificauit etiam actu interno. Post annum duodecimum à facta professione, mortuis parentibus illa impetrauit Bullam Papæ, vt posset reclamare non obstante quinquennio. Adhuc tamen hac Bulla non fuit vsa propter metum fratrum suorum, qui timebant ne suo egressu illa priuaret illos bonis temporalibus, quæ ipsis obuenerant ratione suæ professionis. Denique anno vigesimo quarto post suam professionem impetrauit aliud rescriptum Papæ ad reclamandum non obstante quinquennio, & cæteris annis: in quo Papa commisit certis iudicibus delegatis, vt non obstante quinquennio illam audirent, & inuenta nullitate professionis, illam in sua libertate reponerent, & obligarent Conuentum, & alios possessores vt eidem bona sua temporalia restituerent. In hoc tamen secundo rescripto non dixit Papa se reuocare decretum Concilij Triden. verbis expressis. Et præterea in hoc secundo rescripto impetrando, non est narratum Papæ iam impetrantem obtinuisse primum rescriptum anno duodecimo post professionem, quo non fuit vsa. Denique declaratur quod parentes Monialis paulò ante professionem, graues minas, & damna illi oppo-

opposuerunt nisi professionem emitteret. Hoc posito.

Quæritur primo, an professio valida fuerit præcedente illa sua protestatione coram Monialibus, & præcedente metu, ac minis patris?

Secundo quæritur, an secundum rescriptum ad reclamandum anno 24. validum fuerit, etiam si Papa in illo verbis expressis non dixerit, se id concedere, non obstante decreto Concilij Trid in contrarium.

Tertio, an secundum rescriptum validum fuerit, quamvis impetratrix pro illo obtinendo non narrauerit se iam aliud prius rescriptum impetrasse à sede Apostolica anno 12. post dictam professionem ad reclamandum, quo tamen vsa non fuit.

*Responsum.*

**A**D primum dico professionem hanc fuisse nullam in utroque foro: idque ex tribus capitibus. Primum est, quia defuit clare voluntas vouendi, & se obligandi per vota emissa, vt clare illa ostendit in sua protestatione facta paulo ante professionē. Votum autem emissum ore sine intentione vouendi, & sine animo se obligandi, non est votum, vt tenet communis Theologorum sententia, quam refert Sanchez tom. 1. Decal. lib. 4. cap. 1. num. 19. Valentia 22. disput. 6. q. 6. puncto 1. q. 1. Lessio tom. de iustitia lib. 2. cap. 40. disp. 1. num. 6. & alij. Huius causa est, quia iuxta Aristotelem, Actus non extenduntur vltra mentionem agentis. Et sic verba vouentis non extenduntur vltra intentionem illa proferentis. Hæc autem proferens verba voti, habuit omninò intentionem non vouēdi, nec se obligandi. Præterea, quia votum est quædam lex particularis, quam sibi vouens imponit. At lex non obligat nisi iux-

ta intentionem legislatoris, aded vt si legislator nolit illam obligare, non obligabit. Colligitur idem clare ex capit. *Cum virum de Regular.* vbi Papa ait, tæminam, quæ habens etatem, & volutatem professâ fuerit: *Non poterit monastica professionis à se iugum excutere, cum eam non constet euidenter contradixisse, cum benedictionem accepit.* ( idest cum professionem emisit.) At constat quod ista professâ, nec voluntatem habuit vouendi, & præterea euidenter contradixit per antecedentem protestationem. Ergò à contrario sensu poterit iugum professionis excutere iuxta illum textum. Quod vero illa protestatio facta paulo ante professionem, sit clarum iudicium quod in ipsa professione emittenda habuit dissensum internum, patet ex ijs quæ tradût Ioan. Andr. Calder Barbat. Ant Gabr. Petr. Lædes. Emanuel Rodr. cit. à Sanchez lib. 2. de matr. disp. 45. q. 2. à n. m. 7. qui dicunt quod si aliquis sponsus coram testibus ante matrimonium protestatur se per verba futura matrimonij nolle consentire in matrimonio, signum, est, quod non consensit. Nec obstat limitatio ibi posita à Sanch. num 19 dicente, quod si talis protestatio fiat altero sponso absente, vel ignorante, vel si sciuit, dissensit; tunc protestatio illa non valet, eaque non obstante per verba sequentis matrimonij videtur recessisse ab illa protestatione, & interius consensisse, non inquam obstat, quia etiam illa professâ quâdo protestata est etiam absens erat prælata, & tota plena cõmunitas, ac proinde per sequentia verba professionis non recessit à priori protestatione. Adde quod tempore emissæ professionis adhuc impendebat metus parentum, qui fuerat causa istius protestationis. Denique quod tẽpore professionis emissæ, & toto sequenti tempore habuerit istum dissensum vouendi, cum talis dissensus sit res pẽdens

dens à sola anima , probari potest iuramento ipsius, eo modo quo Nauar. *consilio 1. de constitutionibus q. 2. nu. 7.* ait ignorantiam , &c. quæ sunt obscura , & pendentia solum ab anima : probari debere per iuramentum partis.

2 Secundum caput Nullitatis in hac professione fuit metus saltem Reuerentialis patris, qui illam inuitam ad monasterium adduxit , & paulò ante professionem ad cratem est allocutus , admonens ne profiteri detrectaret. Iam vero quod solus metus Reuerentialis annullat professionem tenent viginti Doctores graues, quos citat Sanchez *lib. 4. de matrim. disp. 6. num. 13.* & Farinacius in suis declarationibus Cardinalium , quas collegit, & impressit *fol. 106. ad session. 25. Tridentini ca. 11. de Regular.* ait Romæ in Rota præsidente Oradino decisum fuisse professionem cuiusdam fæminæ fuisse nullam, eo quod facta fuerit per metum reuerentialem. Et præter Doctores citatos à Sanchez, idem tenet Brunorus in suis locis commun. verbo *Matrimonium nu. 4.* vbi citat Iasonem, & Marsylium idem dicentes. Idem sentiunt Sayro , & Riccio citati à Barbosa in suis Remissionibus ad Tridentinum *sess. 25. cap. 19. de Regular.* idem tenet Henriquez *tomo 2. sum. lib. 11. cap. 9. §. 5. littera S.* Idem tenet Valerus Cartuxanus *lib. de different. utriusque fori*, verbo *Metus differentia 3. §. Hinc infero.* vbi citat alios. Ratio istorum Doctorum est, quia status Religionis includit maius , & rigidius , vinculum quam includat matrimonium , & ideo requirit maiorem libertatem quam matrimonium: & ex cõsequenti licet metus solus reuerentialis non annullat matrimonium, annullat tamen professionem. Facit quod tradit Molina *tom. 3. de iust. 1. par. disp. 572. num. 29. §. utrum autem* : vbi ait renunciationem legitimæ factam à filio

coram patre ob metum reuerentialem illius, esse nullam licet fiat cum iuramento. At maius quid est professio solemnis, vbi non solum renunciat filius legitimis, sed etiam proprię voluntati in perpetuum: ac proinde requireret perfectam, & omnimodam libertatem, quam non habet ille qui operatur cum metu reuerentiali.

3 Tertium caput Nullitatis in ista professione fuit metus cadens in virum constantem, vt enim refertur, pater minas asperas fecit, vt quod per crines illam aliàs raptare debebat, & asperę illam tractare deberet. Quę minę arbitrio prudentis viri à patre incussę fragili fæminę, metum grauissimum causant: Minus enim requiritur ad causandum metum grauem in fæmina, quam in viro, vt tradit Sanchez *lib. 4. de matrim. disput. 3. num. 2.* citans multos. Quando vero vltra metum reuerentialem adduntur minę, omnes Doctores dicunt incuti metum cadentem in virum constantem, pro quo citat multos Sanchez *lib. 4. de matrim. tota disp. 6. maxime nu. 7. & ibidem n. 22.* ait Sanchez quod licet ad hoc, vt minę incussę causent metum viri constantis, necesse est vt minans solitus sit minas exequi: ait tamen Sanchez, quod in dubio præsumendum est quod minę dabuntur executioni, & quod allegans minas non tenetur probare quod comminator illas exequi soleat. Cum ergo in hac professione metus grauis interuenerit, consequens est vt fuerit nulla ipso iure, & ipso facto: iuxta caput *puella 20. q. 1.* & caput *cum virum Regular.* quę duo capitula citantur à Tridentino in margine *sess. 25. cap. 19. de Regular.* cum agit de professione ob metum annullanda. Imo addit Sanchez *lib. 4. Decalogi tomo 1. cap. 3. num. 13.* quod si aliquis professionem emittat per metum grauem, etiamsi aliàs verba professans



tens intendat vouere, & se obligare: adhuc professio erit annullanda. Nam, ait Sanchez, Ecclesia talem professionem irritat, & insufficientem reputat ad hoc, vt possit ex illa oriri aliqua obligatio. In hoc vero casu ista proficiens nullo modo intendit vouere, vel se obligare, imo hæc duo excludit ab intellectu; & voluntate per actum positium dissensus interni.

*Ad secundum quæsitum:*

4 **A**D secundum quæsitum dico, Papam in secundo rescripto clare reuocasse Concilium Tridentinum circa decretum quinquennij, constat hoc ex verbis ipsius rescripti, sic enim ibi dicitur: *Aduersus lapsum quinquennij Regularibus ad reclamandum à Concilio Tridentino præfixi, &c.* Hoc enim est, quod postulatum fuerat à Papa, restitutio videlicet contra quinquennium lapsum, quod Tridentinum præfixerat ad reclamandum, & in nullo alio iure expressum reperitur, quod professus post quinquennium non reclamet nisi in Tridentino. Et paulo post proxime citata verba, ait Papa in rescripto alloquens iudices delegatos: *Aduersus lapsum quinquennij auctoritate nostra prout de iure, restituatis, & in suis iuribus audiat.* Quæ enim clarior reuocatio Tridentini dari potest, quam dum Papa referens decretum Trident, mox contra ipsum aliquid disponit & concedit in contrarium. Ita Rodrig. 3. tom. *Addit. ad summam. cap. 78. concl. 2.* vbi licet dicat cum communi non derogari Concilio Tridentino, nisi Papa illud exprimat: ait tamen Papam Tridentino derogare, quando aliquid expresse concedit contra illud. Et citat ad hoc Felinum, Loays, & Sanchez. Idem tenet Henriq. lib. 7. de indulgent. tom. 1. cap. 26. num. 3. Couarr.

*Rubr. de testam. 2. par. num. 19. vers. 4. conclusio in quodam casu simili. Sarmiento lib. 7. select. cap. 14. alios citans num. 7. & Iulius Clar §. Testamentum. quest. 99. §. ceterum.* Et probatur exemplo omnino simili in materia de testamentis. Nam rigorosior est reuocatio testamenti prius confecti, quam sit intellectus clausulæ Papalis derogantis. Et nihilominus quando testator conficit secundum testamentum contrarium priori, censetur derogare priori testamento, etiamsi illius prioris reuocationem non exprimat; ergo licet Papa in hoc secundo rescripto non exprimat derogationem Tridentini, nihilominus censetur illud clare abrogare, eo quod in secundo rescripto disponat contrarium Concilio Tridentino circa quinquennij reclamationem. Reuocare enim facto, plus est quam reuocare verbo. Eo modo quo appellare facto, arrepto scilicet itinere ad superiorem, plus est quam appellare verbo, vt habetur in cap. *Dilecti. il. 2. de appellat.*

*Ad tertium quesitum.*

5 **A**D tertium dico, quod licet impetratrix illa in narratione secundi rescripti non fecerit mentionem prioris rescripti obtenti ad reclamandum anno 12. post professionem, ista taciturnitas non vitiauit impetrationem secundi rescripti, quia hæc taciturnitas pertinet solum ad causam impulsiuam, quæ non vitiat gratiam, iuxta omnes, & non pertinet ad causam finalem. Quod explico sic Si illa veritas tacita de priori iam rescripto obrento, narraretur Papæ, vt plurimū faceret vt Papa difficilior concederet secundum, eo quod femina negligens fuerit in exequendo priori rescripto, non tamen Papa negaret omnino, cum dura-

ret

ret eadem, imo & maior necessitas. At constat quod quando tacetur verum, cuius expressio solum redderet difficiliorem dispensationem, talis taciturnitas veri nō vitiat dispensationem, vt tenet Sanchez cum multis *lib. 8. de matrim. disp. 21. num. 32.* ergo hæc taciturnitas non vitiauit rescriptum secundum. Et in hoc casu finalis causa dispensandi fuit succurrere necessitati forminæ tot annis oppressæ, & inuitæ, quæ causa finalis non fuit occultata Papæ: sed solum fuit omiſſa causa impulsiva, cuius omiſſio non vitiauit gratiam, vt omnes fatentur, maxime Adrianus, Medina, Decius, Nauarrus, Berous, Syluest. & alij citati à Sanchez loco proxime citato. Secundo principaliter id probo ex traditis à Sanch. *disp. cit. 21. num. 42.* vbi ait cum multis citatis ibidem, quod si in supplicatione Papæ exhibita narrantur multæ causæ copulatiue, quarum aliquæ veræ sunt, aliquæ falsæ, spectandam esse causam cui nititur rescriptum, atque hac existente vera, non obſtare cæterarum falsitatem, nec vitari rescriptum, quia dispensatio tunc nititur ratione vera, & sufficiente ad dispensandum, & citat ad hoc Sanch. 19. Doctores. At constat quod in hoc secundo rescripto narrata est Papæ causa finalis vera, videlicet vis illata forminæ in professione, illiusque dissensus: & huic causæ principaliter innittitur secundum rescriptum: ergo hoc rescriptum non fuit vitiatum ex taciturnitate prioris rescripti, cum in eo tacendo nihil falsum narratum fuerit Papæ, sed solum tacitum verum, quod non pertinebat ad causam finalem. Concordat cum hac doctrina Suarez *tom. 2. de relig. tract. de voto. lib. 6. cap. vlt. num. 5.* & Nauar. *tom. consiliorum* primæ impressionis in fine. in *Addit. ad tit. de rescript. fol. 629. col. 2.* vbi citat Abbatem dicentem, quod narratio falsi solum vitiat gra-

tiam quoad illud cuius causa fuit, & ita poterit gratia esse subreptitia quoad vnum, & valida quoad aliud. In hoc vero casu nullum falsum fuit narratum, vt proxime dixi, licet fuerit omiffum verum non pertinens.

6 Quæsitum etiam fuit an fratres, & consanguinei huius fœminæ impediētes ne illa professio declaretur nulla per iudices delegatos, metuentes amissionem bonorum temporalium illius quæ illi possident, incurrant excommunicationem positam à Tridentino contra cogentes fœminas inuitas intrare in monasterium & in illo profiteri. Videntur enim hi fratres illam cogere ad professionem, vel saltem ad statum religiosum? Respondi tamen me credere illos non incurrere: Nam lex pœnalis, qualis est ista, striēte est interpretanda: & isti consanguinei non cogunt vt intret monasterium, neque vt habitum suscipiat, neque vt profiteatur: iam habitum suscepit, iam professâ est, solum procurant ne declaretur professio nulla, qui actus à Concilio Triden. non prohibetur. expresse; & aliâs videntur habere ius ad defendenda bona temporalia, quæ possident sibi delata per putatam professionem sororis. Secus dicendum, si illi in principio quan-

do illa inuita intrauit monasterium, illi

scienter cooperati sunt ad ingressum.

Vide quæ dicta sunt supra

prima parte casu 9. de

alia professione Mo

nialis facta per

metum.

## CASVS XXXIII.

*De quadam donatione facta Monasterio  
Monialium.*

**Q**Uædam nobilis fœmina vidua & habens filium, eo morte sublato sepeliri fecit illum in quadam Ecclesia Monialium : eidem capellam particularem constituens cum particulari sepultura. Qua de causa eidem Ecclesiæ donauit aliqua donaria, seu donatiua, vt lampadem, calicem, & candelabra argentea, & similia: eaque donauit absque scriptura, absolutè, gratis, & sine vlla conditione apposita. Post multos annos, prædicta domina ædificauit vnum Monasterium Monialium, ad cuius Ecclesiam vult transferre ossa filij cum licentia Ordinarij. Quæsitum fuit an posset prædicta domina simul cum ossibus filij transferre prædicta donaria quæ dederat priori conuentui, illaque auferre à priori Monasterio reuocando priorem donationem?

Et quod possit illam reuocare potest probari ex eo quod dicunt Theologi, & Iuristæ, maxime D. Thom. 2. 2. quæst. 110. art. 3. ad 3. & alij, videlicet, donationem posse reuocari ex eo quod post illam superuenit notabilis mutatio rerum: sicut votum mutatur, seu non obligat, si post votum mutatur notabiliter materia voti. At in hoc casu post factam donationem priori Monasterio, superuenit notabilis illa mutatio, qua sepultus filius in priori Ecclesia, transfertur ad Ecclesiam nouam cum licentia Ordinarij: ergo potest reuocari donatio facta priori Monasterio. Secundo, hæc domi-

na Comitissa fecit hanc donationem priori Monasterio intuitu filij ibi sepulti, & proinde filij sepultura ibi posita videtur fuisse finis ob quem illa donaria dedit priori Ecclesiæ: cum ergo hodie per translationem filij sepulti ad aliam Ecclesiam, cesset finis ob quem facta est donatio, cessabit etiam ipsa donatio, iuxta illud dictum commune, quod cessante fine legis, cessat lex, & cessante fine cessant illa quæ sunt ad finem.

*Responsum.*

1 **H**Oc non obstante, dico prædictam Comitissam non posse cum ossibus filij deferre donaria quæ dederat priori Monasterio, & proinde non posse reuocare priorem donationem. Probatur primo ex communi sententia Doctörum vtriusque iuris dicentium donationem inter vivos, qualis fuit ista, factam absolute sine conditione, & post traditionem rei donatæ, non posse reuocari. Hoc inter alios affirmat, & refert Iulius Clarus in sua praxi *lib. 4. §. Donatio num. 3.* vbi citat leges, & Doctores id asserentes: & ex Theologis tenet Azor *tom. 3. lib. 1. cap. 8.* vbi citat etiam leges ciuiles: & habetur in iure canonico capite *verum de condit. appositis*. Et licet aliqui sint casus ob quos donatio potest reuocari, qualis est ingratitudo, & alij, in hac donatione nullus ex illis casibus interuenit. Cum ergo hæc Comitissa donauerit prædicta donaria priori Monasterio donatione liberali, sine conditione, & inter vivos, & fuerit acceptata à Monialibus prioris Monasterij illa possidentis pacifice per multos annos, nõ poterit illam reuocare. Accedit ratio pro ista communi sententia, nam si is qui aliquid alicui absolute donauit posset ad libitum post multos annos donationem

nem reuocare, sequerentur quotidie multæ inquietationes, & scandala, & motiua impatientiæ, quæ tamen inconuenientia non sunt admittenda in Republica. Secundo idem probo ex eo quod tradit Rabel. *lib. 1. de donat. in genere quest. 3. sect. 3. §. Tertio dici potest*, ubi citat, & sequitur Angelum, & Duennas dicentes, quod quando donator dat pro causa pia, censetur donare irreuocabiliter. Hæc vero Comitissa dedit prædicta donaria pro causa pia: Donauit enim Ecclesiæ pro cultu diuino, pro anima filij, & pro anima sua propria, quæ omnes sunt causæ piæ, vt constat: ergo censenda est donasse irreuocabiliter. Tertio hoc colligitur ex quadam epistola ipsius Comitissæ scripta in quadam occasione ad Abbatissam prioris Conuentus, in qua petiuit ab illa vt sibi accommodaret pro certo festo celebrando candelabra, & lampadem, quæ ipsa donauerat, promittens quod finito festo eadem redderet prædictæ Abbatissæ: Cum ergo mutuo illa peteret, promittens reddituram se illa esse, signum clarum est illam confessam esse quod dicta donaria dederat Conuentui irreuocabiliter, transferendo illorum dominium in prædictum prius monasterium, & sic hodie non poterit illud priuare prædicto dominio acquisito. Quarto est quidam textus efficax ad hoc probandum desumptus ex D. Ambrosio, qui textus habetur in cap. *Sunt qui opes* 17. q. 4. ubi dicitur, quod dans aliquid Ecclesiæ animo tumultuario, idest non plene deliberato, & cum impetu, facit donationem validam, ita vt si postea rem sic donatam velit reuocare ab Ecclesia, committat sacrilegium. Hæc autem Comitissa prædicta donauit Ecclesiæ non animo tumultuario, & indeliberato, sed animo quieto, & deuoto: ergo non poterit donationem reuocare. Quinto probatur ex eo quod tradit

tradit Comitulus in suis Respons. moral. lib. 7. q. 7. num. 11. vbi citans Felinum, & alios ait, quod si quis carens filiis aliquid donauit Ecclesiæ, & post donationem eidem nati sunt filij, quos posset commode alere cum re illa iam donata Ecclesiæ, non potest ad hoc reuocare donationem factam Ecclesiæ, quia iuxta quandam glossam ibi citatam, potior est causa pia, quam causa liberorum. Hæc autem Comitissa donauerat Ecclesiæ, illique non sunt nati filij, sed filijs carebat, neque indigebat rebus donatis ad sustentandum filium. Et confirmat ibi Comitulus dicens, quod res donata monasterio transiit in dominium monasterij, quo non proinde potest priuari per reuocationem donationis, quæ fuit ratio iam supra à nobis tacta.

2 Ad primum igitur argumentum in principio pro parte contraria positum, respondet Rabello libro 18. q. 11. num. 9. dicens, illud quod dicitur posse reuocari donationem, si post illam superuenit notabilis mutatio, intelligendum esse, si talis mutatio superueniat antequam res promissa tradatur donatario: Si enim iam tradita sit, non poterit reuocari. Præterea intelligendum est illud, si per mutationem superuenientem donatio reddatur illicita, vel inutilis donatario. Vt si promittitur gladius homini, qui postea deuenit in amentiam, & furiam, cui proinde illicitum, & inutile est dare gladium, & sic de aliis exemplis. In hoc vero casu ista mutatio superueniens donationi, idest translatio filij defuncti ad secundum monasterium superuenit post tradita iam illa donaria priori monasterio, & per multos annos ab illo possessa. Præterea hæc donatio per istam mutationem superuenientem, filijve defuncti translationem non est facta illicita, vel inutilis priori monasterio, sed est illi valde utilis: ergo non potest reuocari per istam mu-



mutationem superuenientem. Ad secundum dico non valere hanc consequentiam. Dedit hæc donaria intuitu filij ibi sepulti : ergo non existente ibi filio sepulto cessat ratio donationis, ita vt possit reuocari : non valet primo, quia dare illa donaria intuitu filij sepulti non fuit apponere conditionem donationi : intuitus enim, seu respectus ille non est conditio appositæ quod ibi manerent donaria quoadvsque tantum maneret corpus filij, nihil enim tale fuit expressum in donatione. Secundo non valet consequentia, quia ille respectus, seu intuitus filij ibi sepulti, non fuit causa finalis donationis, sed solum fuit causa impulsiva, seu mouens ad donandum. Causa vero finalis fuit gloria Dei, cultus Ecclesiæ, salus animæ propriæ, vel animæ filij, & hic finis non cessat per translationem filij defuncti ad secundum monasterium. Tertio dico, quod licet illa donaria fuerint donata priori monasterio intuitu filij ibi sepulti, prius monasterium hæc dona non amittit, siquidem illa ex sua sola, & propria voluntate voluit hanc translationem facere. Declaro hoc, exemplo omnino simili. In materia de matrimonio dicunt Doctores mox citandi, quod si sponsus ante cōtractum matrimonium mittit aliqua donaria sponsæ (quam vocant sponsalitiæ largitatem) illa donaria dantur intuitu matrimonij futuri, & proinde sponsa acquirit dominium illorum, manentque propria illius : ita tamē quod si culpa illius postea matrimonium non sequatur, illa donaria ante donata amittit, & reuertuntur ad sponsum. Si verò è contra matrimonium non sequatur culpa sponsi, ipse illa perdit, & manent sponsæ, vt omnes Doctores tradunt communiter, maxime Sanchez libro 6. de matrimonio disp. 18. conclusionē 3. & Rabello de obligatione iustitiae 2. parte libro 6. quæ ubi citant alios. Quod optime facit

facit ad nostrum casum. Licet enim hæc Comitissa donaria illa dederit priori monasterio intuitu filij ibi sepulti: cum tamen translatio filij ex hoc loco fiat solum ex sua causa, & propria voluntate monasterio fere repugnante, & non consentiente: prædictum monasterium non debet donaria antiqua amittere, cum filij sepultura ibi perpetua non cesset culpa monasterij, sed ut ita dicam culpa Comitissæ filium transferentis.

3 In fine duo aduerto. Primum est, quod si Abbatissa prioris Monasterij ad solam petitionem Comitissæ illi donaret omnia antiqua donaria, quæ dederat, Abbatissa peccaret mortaliter, & incurreret pœnas positas contra alienantes bona Ecclesiæ. Alienaret enim in hoc bona Ecclesiæ pretiosa, quorum dominium monasterium vere acquisierat. Secundum est, quod si forte Comitissa impetraret à Sum. Pontifice Bullam, ut cum ossibus filij transferret etiam donaria illa quæ dederat priori monasterio, præsumi potest, quod talis Bulla sit subreptitia ob narrationem alicuius falsi, ut quod dictum fuerit Papæ illa donaria donata fuisse priori monasterio sub conditione, quandiu scilicet ibi manerent sepulta ossa filij, vel quid simile. Et proinde contra talem Bullam posset ad Papam recurri per supplicationem: cum sit res certissima apud Doctores, quod nunquam Princeps, vel Papa concedit aliquid cum præiudicio tertij, nec per sua priuilegia intendit aliquem priuare iure iam sibi quæsito, ut inter alios tradit Suarez *tom. de leg. lib. 8. cap. 27. num. 9.* citans ad hoc duo capita iuris canonici, & vnâ legem ciuilem. At talis Bulla, si exiret, priuaret potius monasterium iure, & dominio clare quæsito circa illa donaria, & proinde posset præsumi subreptitia.

CASVS

## CASVS XXXIV.

*De quadam licentia confirmata à Domino Collectore.*

**Q**uidam Generalis cuiusdam Ordinis concessit licentiam certo Religioso ad certum quid faciendum: iste confirmavit prædictam, licentiam per D. Collectorem Apostolicum illius Regni. Finito officio D. Collectoris, illoque egresso à dicto Regno, & alio succedente, prædictus Generalis prædictam licentiam à se datam reuocavit. Et declaratur, quod quando D. Collector illam licentiam confirmavit, addidit, quod illi licentiæ nullus contradiceret, sub pœna excommunicationis, & priuatione actuum legitimorum.

1 Quæritur primo. An prædicta licentia semper valida sit, etiam si D. Collector illam confirmans, officio finito sit egressus provinciam? & an sit necessarium illam confirmare per Collectorem successorem?

2 Secundo quæritur, an Prælatus Religionis possint prædictam licentiam reuocare, & annullare?

3 Quæritur, an si Prælatus Ordinis prædicto Religioso præcipiat ne utatur tali licentia, incurrat pœnas impositas à D. Collectore confirmatore illius?

4 An Religiosus cui talis licentia concessa est, teneatur credere Prælato inferiori Religionis dicenti se habere commissionem ad prædictam licentiam impediendam, sine eo quod literas suæ commissionis ostendat?

*Responsum.*

**A**D primum dico, prædictam licentiam sic confirmatam validam esse, & suum robur non amisisse, etiam postquam D. Collector præteritus officium finiuit, & prouinciam fuit egressus. Est expressum hoc à Syluestro verb. *delegatus quasi*, 15. vbi ait, quod etiam si delegatus Papæ finierit officium in persona, & sit prouinciam egressus non finiunt constitutiones eius factæ in prouincia, neque illa quæ sunt facta, vel cæpta per suos delegatos. Quod à fortiori locum habebit in dominis Collectoribus Regnorum, qui sunt delegati ad vniuersitatem causarum. Delegatus enim ad vniuersitatem causarum est ordinarius, vt latè probat Sanchez *lib. 3. de Matrim. disp. 31. num. 2.* Secundo probatur ex traditis ab eodem Sanchez *lib. 8. de Matrim. disput. 28. num. 83.* vbi multos citans resoluit quod licentia concessa alicui ad suscipiendos Ordines, valida est etiam post mortem Episcopi concedentis. Tercio probatur ex eo quod tradit Nauar. *consilio 4. de Clericis non resident. num. 2.* vbi ait licentiam semel datam durare etiam post mortem concedentis, iuxta capitulum. *Si super gratia de offic. Delegati in 6.* & glossam ibi citatam. At ista licentia est data, & confirmata à D. Collectore autoritate Apostolica, & non est reuocata à D. Collectore successore: ergo valida est. Facit quod tradunt octo Doctores iuris canonici citati à Sanchez *lib. 7. Decalogi cap. 29. num. 29.* dicentes. Secundo, Quod si Prælatus regularis conferat beneficium certo Religioso, & Papa confirmet, non potest amplius Prælatus tale beneficium auferre. Licet autem ibi Sanchez *num. 30.* limitet id intelligi, dummodo Papa confirmet ex certa scientia; cæteri tamen Authores loquun-

loquuntur absolute. Et præterea confirmatio ex certa scientia solum est in usu apud Sum. Pontificem, non vero in cæteris Prælati inferioribus. Hinc colligitur responsio ad id quod continet prima interrogatio, dicendum est enim non esse necessarium, quod ista licentia confirmetur à nouo D. Collectore succedente. Si enim illa valida est, & iam confirmata, donec reuocetur iuxta supradicta, non indiget alia confirmatione: quod enim validum est, non oportet revalidari: ad eum modum quo in regulis iuris in 6. dicit quædam Regula: eum qui certus est non oportet amplius certiorari.

3 Ad secundum quæsitum dico, nullum Prælatum Religionis posse prædictam licentiam confirmatam à D. Collectore annullare, vel reuocare. Constat clare quia inferior non potest annullare legem superioris, vt definit Clementina *Ne Romani. de electione.* & alia iura. At Prælati Ordinis sunt inferiores D. Collectore Apostolico, qui illam confirmauit: ergo non possunt illam reuocare. Et declaratur exemplo. Si enim Generalis Ordinis confirmaret aliquam licentiam datam ab aliquo Prouinciali, iam talis Prouincialis, qui illam prius dedit, non poterit illam reuocare, quia sic reuocaret licentiam Generalis superioris. Quod in nostro casu militat eodem modo.

4 Ad tertium quæsitum dico, Prælatum Religionis impediens talem licentiam incurrere penas impositas à D. Collectore confirmante. Probatur, quia prior licentia data à Generali, & confirmata à D. Collectore iam non est solum licentia, sed transiit etiam in mandatum, & præceptum: quia præcepit D. Collector confirmans, ne aliquis sibi inferior talem confirmationem impediret, idque præcepit sub grauibus penis: ergo

Prælatus Regularis contraueniens, & violans præceptum D. Collectoris, incurrit pœnas positas talis præcepti transgressoribus.

5 Ad quartum dico Religiosum subditum non tene-  
ri credere prælato Regulari dicenti se habere commis-  
sionem ad annullandam prædictam licentiã, nisi osten-  
dat commissionem. Probatur, quia etiam delegato Se-  
dis Apostolicæ non creditur nisi ostendat litteras suæ  
delegationis, & commissionis, vt habetur expresse in  
capite, *Cum in iure de offic. & potestate iudicis deleg. cum*  
*gloss. ibi verbo Super mandato.* Et cap. *Cum à nobis de*  
*resib. & attestat.* & multo minus credendum est prælato  
Regulari dicenti se habere commissionem ad reuocan-  
dam licentiam D. Collectoris. Adde quod licet præla-  
tus Regularis talem commissionem ostenderet factam à  
Generali Ordinis, illi non tenetur obedire, quia Ge-  
neralis Ordinis non potest reuocare licentiam confir-  
matam à D. Collectore, vt probauimus sub censura  
Ecclesiæ, & Doctorum.

## CASVS XXXV.

*De iurisdictione Prouincialis supra Conuentum  
Monialium in certo casu.*

Quædam prælata certi Conuentus Monialium du-  
rante suo officio iussit fabricare certum opus ar-  
genteum pro cultu diuino suæ propriæ Ecclesiæ. Pro  
quo opere fabricando contractum iniuit cum aurifice  
in pretio ducentorum aureorum reddendorum aurifi-  
ci pro labore operis. Ad quod debitum soluendum in  
scri-

scriptura publica designauit ducentos aureos, quos Petrus suo tempore debebat clare eidem Conuentui. Et vt hoc maius robur obtineret Prouincialis Conuentus patentibus litteris consensit in contractu, & sub censuris mandauit vt illi ducenti aurei soluendi à Petro applicarentur ad solutionem pro pretio aurificis, & in alia re non insumerentur. Finito officio prioris prælatae successit alia quæ non vult stare contractui prioris, sed vult vt illi 200. aurei debiti à Petro sibi soluantur pro aliis necessitatibus Conuentus, & ad hoc litem intentauit Petro, vt illos sibi reddat, non aurifici.

Quæritur, an Prouincialis potuerit illud mandare: & an prælata succedens teneatur stare contractui suæ antecedentis?

I Respondeo prælatum præcedentem potuisse inire valide illum contractum applicando illi ducentos aureos soluendos postea à Petro. Item potuisse Prouincialem mandare vt illi 200. aurei applicarentur aurifici pro solutione operis, & alio modo non insumerentur: & proinde prælata, quæ successit teneri ad standum contractui inito per Prouincialem firmato. Et quidem quod prior prælata potuerit facere prædictum contractum applicando illi 200. illos aureos suo tempore iam debitos à Petro, constat, quia prælata conuentus habet plenam administrationem bonorum temporalium conuentus in bonum commune ipsius conuentus, maxime accedente consensu Prouincialis, vt praxis obseruat: sed illud opus argenteum iussu fieri à priori prælata erat clarè in bonum conuentus, & cultus diuini, & illi 200. aurei debiti à Petro, erant iam bona temporalia illius conuentus, de quibus illa potuit disponere: ergo potuit illos applicare ad soluendum opus aurificis pro bono communi conuentus. Et hæc

ratio amplius roborabitur ex mox dicendis, ubi probabitur prælatus successorem teneri stare cōtractui antecessoris inito pro bono conuentus, imo ad soluenda debita contracta per antecessorem pro eodem bono communi conuentus. Quod autem Prouincialis idem potuerit mandare obligando illos 200. aureos ad solutionem faciendam aurifici, constat, quia Prouincialis habet plenam administrationem, & iurisdictionem etiam in temporalibus pro bono conuentus in quouis monasterio Monialium sibi subdito. Patet hoc maxime in prouincialibus Minorum circa Moniales sibi subditas. Nam in compendio Mendicantium verbo *Moniales* §. 21. Iulius II. committens Prouincialibus Minorum Regimen Monialium, ait, quod circa illas habeant omnem iurisdictionem quam antea circa illas habebat Cardinalis protector easdem gubernans. Iurisdicctio vero Cardinalis protectoris illas antea gubernantis tradita in eodem compendio verbo, *Protector Ordinis* §. à *Papa Urbano*, erat hæc: vt illas gubernaret *Instituendo, destituendo, statuendo, ac disponendo prout secundum Deum viderint expedire. Quæ verba satis significant plenam iurisdictionem datam Prouinciali disponendi de rebus etiam temporalibus Cōuentus Monialium. Et confirmo exemplo: nam maius est dare licentiam ad alienanda bona immobilia conuentus Monialium quam dare licentiam vt certa pecunia cōuentus insumatur in aliqua re particulari: illud enim prius non potest fieri nisi concurrentibus certis solemnitatibus, & necessitatibus, hoc vero secundum illas solemnitates non requirit: sed Prouincialis potest dare licentiam vt bona immobilia Conuentus Monialium alienentur in bonum commune eiusdem Conuentus, seruatis aliis solemnitatibus, vt constat: ergo poterit dare*  
*licen-*



licetiam, vt certa pecunia Conuentui debita, infumatur solum in soluendo alio debito, ad quod tenetur Conuentus. Cum ergo Prouincialis posset illud præcipere, clarum est non posse prælatam succedentem contraire tali mandato in re graui, & 200. illos aureos sibi applicare, nec proinde litem mouere Petro vt illos sibi soluat. Iam enim hoc esset inferiorem posse abrogare legem superioris, contra capitulum *Cum inferior. de maiorit. & obediens.* & Clement. *Ne Romani de elect.*

2 Dico secundo, Abbatissam succedentem teneri stare contractui à sua antecedente inito in bonum ipsius Conuentus. Hoc docet, & probat Rodrig. *tom. 3. qq. Regul. q. 26. art. 1.* citans Abbatem, Cardinalem, Decium, & alios. Idem tenet Syluest. *verf. Dignitas.* citans alios, addens esse communem, adeo vt etiam Papa, & Imperator teneantur stare contractui inito per antecessores, quando est in bonum Ecclesiæ, vel Regni, & fuit initus nomine dignitatis, seu officij. Et idem habetur in cap. *Dilecti filijs. de foro compet.* At Abbatissa præcedens fecit illum contractum cum aurifice nomine dignitatis, seu officij, & contractus est clare initus pro bono Conuentus: ergo Abbatissa succedens tenetur stare contractui, nec potest illi contraire. Videatur etiam Rodrig. *tom. 3. addit. ad summam. verb. Capitulum sede vacante. concl. 9.* vbi dicit cum Gutierrez, & Rodoaño, posse capitulum sede vacante petere pecuniam mutuata pro bono communi, & urgente necessitate Ecclesiæ, quam pecuniam postea Ecclesia, vel successor Episcopus tenetur soluere.

3 Dico tertio, Etiam si Abbatissa præcedens non relinqueret illos 200. aureos suo tempore sibi debitos, & applicatos ad soluendum pretium aurifici, adhuc

Abbatissa succedens teneretur soluere illud debitum aurifici contractum à præcedente prælata pro bono communi Conuentus, idque de bonis aliis eiusdem Conuentus. Sic habetur expresse cap. 1. *de solutionibus*. pro quo multa ibi citat glossa in ver. *Prædecessoris*. Et confirmatur, quia monasterium tenetur soluere debita contracta per aliquem Religiosum habentem administrationem Conuentus, vel si talia debita contraxit de licentia Prælati, de quo sufficiat videre tradita à Rabello *tom. de oblig. iust. lib. 1. de contractu in genere. quest. 8. sect. 1. à num. 8.* citante ibi Molinam *de iustit.* imo quod maius est, monasterium tenetur soluere contractum debitum per Religiosum particularem sine licentia prælati, si contractus cessit in bonum aliquod Conuentus, vt colligitur ex cap. *quod quibusdam. de fide instrum.* & approbat Nauarrus *consilio 14. de Regular. num. 8. & 16.* Si ergo Conuentus tenetur soluere debita contracta per procuratorem Conuentus, imo & contracta per Religiosum particularem sine licentia Prælati, quando talia debita resultarunt in bonum Conuentus: quantò magis tenebitur Abbatissa succedens soluere debita Abbatissæ antecedentis quando illa contraxit pro bono communi Conuentus; quale bonum fuit hoc de quo agimus, videlicet Custodia ad portandam sanctissimam Eucharistiam? Quod multo magis habet locum in nostro casu, quando Abbatissa præcedens de licentia Prælati reliquit illos ducentos aureos sibi iam debitos à Petro pro soluendo debito aurificis. Et ipsa praxis hoc obseruat etiam in sæcularibus, qui vnum debitum compensat cum alio debito: vt verbi gratia debeo tibi decem aureos, sufficienter soluo dicendo tibi, vt hos decem aureos colligas à Francisco, qui totidem aureos mihi debet.

Ex.

Ex his sequitur non posse iudicem sæcularem admittere Abbatissam succedentem ad intentandam litem Petro pro recuperandis sibi 200. aureis applicatis per Prouincialem aurifici: hoc enim esset impedire iurisdictionem Prælatorum, quam habent ex priuilegio circa regimen Monialium. Et præterea dictus iudex obuiaret in hoc, tot iuribus supracitatis dicentibus teneri successorem stare contractui antecessoris, & soluere debita contracta ab antecessore redundantia in bonum Conuentus: quod non est admittendum, sub censura Ecclesiæ &c.

---

C A S V S XXXVI.

*An Conuentus Minorum debeat dare alimenta,  
& expensas Religioso contra se litiganti  
extra Conuentum.*

**Q**uidam Religiosus de Ordine Minorum ob culpas graues per sententiam expulsus est ab ordine priuatus habitu Religionis: & exilio punitus: & à Conuentu iam egressus cum habitu clericali sæculari, appellauit coram D. Collectore qui appellationi destulit, & causam delegauit cuidam Religioso alterius Ordinis, coram quo expulsus prædictus suam appellationem prosecutus, manens extra Conuentum, & cum habitu clerici. Ante omnia petit à suo iudice delegato, vt obligaret Prælatos Ordinis vt sibi extra Conuentum darent alimenta, & pecunias ad expensas litis, nolebat enim ad Ordinem redire.

Quæsitum est an Conuentus teneretur ad prædicta

alimenta, & pecunias pro expensis ministrandas: & videtur quod ad id obligetur monasterium. Nam in capitulo *ex parte de accusat.* iubet Papa vt Religioso habenti litem contra suum Abbatem. *De rebus monasterij expensæ necessaria ministrantur.* Et hunc textum sequuntur omnes Doctores communiter. Sed prædictus Religiosus habet litem contra suos Prælatos circa suam expulsionem, quæ suæ famæ valde nocet: ergo monasterium debet illi expensas ministrare, & alimenta.

*Responsum.*

**H**OC non obstante censui non teneri monasterium ad danda alimenta prædicto Religioso ob causas sequentes. Prima est quia monasterium non tenetur dare alimenta Religioso litiganti contra se, quando Religiosus est extra conuentum, & extra obedientiam Prælati, ita expresse explicat Panormitanus citatum caput *ex parte*, & colligitur ex verbis eiusdem capituli, ibi enim cum prius dicat Papa subditos non impediri ab accusatione Prælati, ait: *Eo, quod de obedientia & subiectione Abbatis esse noscuntur.* At iste iam non est de obedientia Prælatorum Ordinis cum sit extra Conuentum, & Prælati nõ obediat. Et addit etiam ad hoc Panormitanus, monasterium non tenetur dare expensas litiganti Religioso, nisi quando Religiosus litigat ad bonum commune Conuentus, vt si accuset Prælaturum eo quod dilapidator sit, & bona Conuentus dissipauerit. Si vero Religiosus litiget pro bono suo particulari non tenetur Conuentus dare expensas ad litem, vt clare probat ibidem Panormit. *num. 13.* Idem tenet in terminis Riccio *iom. 1. Decision. Collectanea 850.* pro quo citat vnâ Decisionem Rotæ, quæ est

num. 799. At iste Religiosus in hac sua lite non prosequitur bonum commune, vt patet, sed solum prosequitur bonum particulare: ergo non tenetur monasterium illi dare expensas ad litem. Circa vero primam rationem Panormitani, quod non teneatur Conuentus dare expensas ad litem, quando ille est extra Conuentum, id ipsum magis amplio ex Sanchez *lib. de matrim. disp. 4. quest. 2 à num. 20. vsque ad 27.* vbi inter alia dicit maritum non teneri alere vxorem, quando illa existit extra domum viri sine licentia viri, & sine culpa viri: & citat ad hoc textus iuris vtriusque. Imo addit, quod si vxor fugerit à domo viri ob sœuitiam viri, & nihilominus vir dedit sufficientem cautionem de illa bene tractanda, & illa redire noluerit, non tenetur vir illam alere extra domum, & citat ad hoc *num. 24. Barbosa*: & quod non teneatur pater dare alimenta filio quando filius est extra domum paternam inuito patre, tenet etiam Riccio *tom. 1. Decisionum decisione 97.* At iste Religiosus est extra Conuentum inuita Religione, imo ipsa Religio petiit, vt ad Conuentum rediret, offerens alimenta intra Conuentum, & sufficientem cautionem: & tamen ille noluit acceptare: ergo non tenetur Religio illum alere extra Conuentum.

2 Tertia ratio principalis ob quam non tenetur conuentus Minorum hunc sustentare extra conuentum ministrando etiam pecunias ad litem, est quia conuentus Minorum est notoriè pauper, & viuit ex eleemosinis: ergo non tenetur illi dare alimenta extra Conuentum. Valet consequentia à simili: nam quando pater est inops, non tenetur alimenta dare filio: & quando vir est pauper omninò, non tenetur dare alimenta vxori: ita Sanchez *citata disp. num. 27.* citans textus, & Doctores, & Riccius idem tenet de patre inope erga filium

filium, *citata decisione* 97. maiorem vero obligationem habet pater ad alendum filium, & vir ad alendam uxorem, quam habet Prælatus ad alendum subditum. Pater enim, & vir obligantur ad alendum filium, & uxorem ex iure naturali; non sic vero tenetur Prælatus ad alendum subditum. Imo Henricus super citatum cap. *ex parte*, generaliter dicit, Religiones Mendicantes non teneri suis Religiosis litigantibus dare expensas ad lites, quia scilicet non habent redditus in communi unde possint dare pecunias: quod in nulla Religione magis ad vnguem seruatur, quam in Religione Minorum, qui nullos omnino redditus habent, neque in communi, neque in particulari. Et hoc videtur colligi ex cit cap. *Ex parte*, Idem enim ibi Papa iubet dari expensas monacho litiganti, quia inquit *Non habet proprium*. At Religio Minorum non habet proprium etiam in communi: ergo non tenetur dare expensas Religioso litiganti, maxime existenti extra Conuentum, cum id valde onerosum futurum sit Conuentui viuenti ex eleemosinis. Vltima ratio sit, quia filium non tenetur pater alere quando filius fuit ingratus patri, vt tenet Riccio *tom. 1. Decision. Collectanea* 962. citans, & sequens Baldum *decisione* 29. At iste Religiosus fuit ingratus Religioni patri, quam sæpe offendit, & molestauit, adeo vt mereatur ob culpas ab ea expelli: ergo illi non debet alimenta extra Conuentum.

Sub censura Ecclesiæ,

& Doctorum.



CASVS

## CASVS XXXVII.

*De absolutione cuiusdam notorij Clerici  
percussoris.*

**Q**uidam Clericus malæ famæ, & ob sua crimina priuatus vsu Ordinum, sæpiusque ob malam linguam, & mores ab aliquibus iniuriatus, & percussus, infamauit quemdam Petrum adolescentem nobilem, sed filium familias, falso dicens de illo quod esset timidus, & pusillanimis, & fugiens facile aggressores suos. Et præterea cum prædictus Clericus nocte fugeret duos inuadentes se, postea publicauit quod Petrus adolescens erat ille qui noctu fugit duos illos inuadentes, cum hoc esset falsum. Petrus his prouocatus publice, & in platea Clericum palo percussit aliquibus videntibus, dicens se illum sic percutere eo quod se falso infamaret, & pusillanimum vocaret.

Quæritur an Confessarius Regularis possit absolvere Petrum percussorem, & dato quod possit, quid præmittere debeat ad istam absolutionem.

*Responsum.*

**I** Dico primo, talem percussorem Clerici posse absolui per Bullam Cruciatæ, de quo non est dubium, cum ipsa concedat absolutionem ab omnibus censuris Papæ reservatis, exceptis aliquibus contentis in Bulla Cœnæ, qualis, seu de quibus exceptis, non est percussio clerici. Et quando iste percussor non haberet Bullam Cruciatæ, posset illum absolvere confessor

fessor regularis per sua priuilegia, vt expresse tenet *Rodrig. tom. 1. qq. Regul. q. 61. art. 8. & 5.* idem dicit monens quod ante absolutionem debet satisfacere parti læsæ. Citat ad hoc *Rodrig. priuilegium Pauli III. concessum Patribus Societatis Iesu.* Idem tenet idem *Rodrig. in explicatione Cruciatae ad §. 9. num. 56. & in Addit. ad Cruciata. cit. §. 9. num. 50. & Nauar. in sum. lat. ca. 27. num. 42.* Idem tenet *Vega Minimus in sum. ver. Absolutio. casu 28. §. La segunda. & alij ibi citati à Vega.* Accedunt duæ rationes ad facilitandum istam absolutionem per dicta priuilegia: Prima est, quia illa percussio non est deducta ad forum contentiosum; Clericus enim percussus non accusauit coram iudice Ecclesiastico. Secunda est, quoniam nondum est liquidata satisfactio, quæ dari debeat clerico percusso. Quando vero liquidatum non est quanta satisfactio dari debeat parti læsæ, ait *Rodrig. cit. art. 8.* posse percussorem data prius cautione quod satisfaciet id quod iudicatum fuerit à viris prudentibus, absolui. Quanta vero satisfactio danda sit huic clerico percusso, valde dubium est, vt patebit ex dicendis. Hoc autem solum aduerto, posse hanc absolutionem dari à confessario Regulari etiã extra sacramentalem confessionem, vt dicunt multi *Doctores cit. à Sanch. lib. 7. de matrim. disp. 15. num. 25. & concordat Suarez tom. 4. de Relig. lib. 9. cap. 2. maxime num. 27.*

2 Dico secundo, circa satisfactionem dandam huic clerico percusso, teneri prius percussorem per tertiam personam dicere percusso se paratum esse ad dandam satisfactionem iudicatam prudentis arbitrio. Si vero clericus percussus dicat se nolle acceptare satisfactionem, innuens forte quod vel per se, vel per iudicem Ecclesiasticam illam sumet, potest, ac debet absolui per-



percussor, iam enim fecit quod potuit. Item si clericus dilatat responſionem volēs fatigare, & moleſtare percussorem, poterit etiam absolui, quia teste Henriquez *tom. 2. cap. 28. num. 1.* nam iste percussor fecit quod erat in se; & pia mater Ecclesia non intendit negare beneficium absolutionis facienti quod in se est. Si vero clericus percussus velit acceptare satisfactionem, eligendi sunt duo arbitri, vnus à percusso, alius à percussore, qui consideratis omnibus circumstantiis delicti, iudicent qualem satisfactionem percussor debeat exhibere.

Porro in ista percussione quoad satisfactionem, tria potissimum debent iudices considerare. Primum est, quod clericus percussus non fecit expensas in curandis vulneribus, nullum enim vulnus illi fuit inflictum, cum percussio palo tantum facta sit: & quoad hoc solum æstimandum est quanta sit iniuria palo illata. Ad quod multum iuuat videre id quod Dominus præcipiebat in lege veteri *Exod. 21. cap. num. 8.* de simili fere percussione: vbi in simili fere percussione solum iubeat solui expensas medicinæ, non vero aliquid pro infamia. Ego vero in hoc casu sentio aliquid restituendum percusso pro sola infamia, iuxta qualitatem tamen clerici iniuriati, de quo statim in tertio dicto. Secundo loco considerare debent hi arbitri, quod Petrus percussor percussit prius prouocatus iniuria sibi facta à clerico, qui Petrum vocabat timidum, & pusillanimum, quod homo nobilis pro iniuria reputat. Et clericus falso dixit Petrum quadam nocte fugisse à duobus illum insequentibus. Iam vero prius prouocatus si percutiat, vel occidat, multo minorem pœnam meretur, vt est communis opinio Iuristarum, maxime id docet Iulius Clarus in sua *praxi crim. §. iniuria. num. 14.* & Au-  
thor

thor Repertorij Inquisitorum. verb. *Iniuria*. §. *Si prouocatus*. vbi dicit quod prouocatus ad iram, si verbo, vel facto faciat iniuriam prouocanti, non teneri iniuriarum, & citat gloss. in *l. ob hec verba*. ff. *de his qui notant. infam.* Idem tenet Nauar. ad cap. *Si quis iratus. de pœnit. dist. 1. num. 4. §. Tertio quod quamuis*. Tertium considerandum ab his arbitris in ista satisfactione arbitranda, est quod iste clericus percussus erat fere persona infamis saltem infamia facti: dicitur enim priuatum fuisse exercitio Ordinum ob culpas: item quod sit malæ famæ, & linguæ, & ob id iam fuisse ab aliis percussum: quæ omnia indicant illum habere paruam famam, imo infamia multa notatum esse. Iam vero iniuria illata personæ infami multo leuior est, minorique pœna digna. Ita Commentator Iulij Clari §. *Iniuria. num. 47.* citans Piguerium. Et praxis obseruat, quod grauitas iniuriæ pœtenda est ex grauitate personæ offensæ, ita vt cæteris paribus, eadem numero iniuria facta viro grauissimo, grauissima censeatur, quæ tamen eadem facta viro infimo, vel infami, leuissima reputabitur. Quartum denique adhuc considerabunt hi arbitri, quod vna iniuria compensatur per aliam iniuriam, teste Rabello *tom. de obligat. iust. 1. par. q. 18. lib. 2. num. 8.* & Lessio *lib. 2. de iust. cap. 11. dub. 25. num. 133.* & aliis. Iam vero iste clericus percussus prius infamauit Petrum, vt supra dictum est: ergo iniuria illi facta à Petro suo modo seruiet ad compensationem istam facendam. Hæc inquam omnia præmittenda sunt, & considerata ante absolutionem istius percussoris. Simulque illi exhibendum est iuramentum, quo iuret se in posterum obedire præcepto iudicis Ecclesiastici in his quæ pro pœnitentia iniunxerit, sed de hoc iuramento vide omnino Henricus *lib. 13. de excom. cap. 28. num. 4.* & quod se præsentabit

tabit Sedi Apostolicæ sublato impedimento; quod tamen iuramentum non esse necessarium affirmat Reginald. *tom. 1. lib. 1. cap. 19. sect. 3.* quando confessor absoluit virtute priuilegij, per quod manet vere absolutus sine obligatione se præsentandi Sedi Apostolicæ.

4 Addo vltimo quod cum iste Petrus sit filiusfamilias in potestate patris existens, si pater ipsius noluerit pro eo satisfactionem dare clerico læso, poterit absolui sine data, vel oblata satisfactione, imo & sine cautione. Cum enim filiusfamilias nihil ex se habeat vnde possit restituere, est impossibilitatus naturaliter ad restituendum: & nemo tenetur ad impossibile. Cum item pater nolit restituere pro illo, deobligatur pro nunc à restitutione. Non enim tenetur pater ipsius pro delicto filij, seu refarcire damna illata à filio, quando ipse pater ad talia damna non fuit vlllo modo cooperatus, vt tenet inter alios Iulius Clarus *in praxi crim q. 86. nu. 3. & 4.* & tenet expresse Lessius *lib. 2. de iust. cap. 9. dub. 17. num. 121.* & est de mente Reginaldi *cit. cap. 19. & sect. 2. num. 252.* dum ait filium percussorem clerici non teneri adire Romam pro absolutione quaerenda si pater dissentiat. Loquitur vero cum suppositione quod non sit qui absoluat per priuilegium. Quamuis

vero detur potens absolvere per priuilegium, semper tamen filiusfamilias manet addictus patriæ potestati vt non possit sine illa aliquo ire, vel aliquid donare. Sub censura &c.

## CASVS XXXVIII.

*De ingressu fæminarum in claustra monasterij virorum, absque processione &c.*

**P**AUCIS abhinc annis in hac Olyssipone in aliquibus monasteriis virorum cæpit quædam consuetudo seu potius corruptela obrepere, vt cum in aliquo monasterio magnum aliquod festum celebratur, cuius respectu claustrum interius conuentus ornatur tapetibus, & alijs sericis, fiat processio mane per claustrum: & postea vespere eodem die sine processione facta, aperitur claustrum, & ingreditur populus promiscue, etiam fæminæ, ad videndum ornatum claustri, ibique manent, imo & sedent conuersantes cum hominibus, & Religiosis per tempus notabile. Idque faciunt aliquando per continuos octo dies in quibus durat octauarium festi.

Quæsitum fuit, an hoc licitè possit fieri: & an prælati hoc permittentes incurrant aliquas pœnas?

**I** Ante respõsionem præmitto Pium V. anno 1566. publicasse motum proprium, quo strictè prohibuit ne fæminæ cuiusuis status, & qualitatæ forent, possent intrare in monasteria Religiosorum, etiam Mendicantium. Quam Bullam Gregor. XIII. anno 1575. confirmauit, & reuocauit omnes licentias à Sede Apostolica, quibuscumque fæminis concessas ad ingredienda monasteria Religiosorum, quas Bullas ponit Rodriguez in fine suæ explicationis ad Cruciatam. Quia tamen prior Bulla Pij V. videbatur rigorosa, & fere interdicens fæminis omnem ingressum in monasteria Religio-

gioforum; teste Rodriguez *in suo Bullario folio* 978. Idem Pius V. anno 1568. ad instantiam Cardinalis Cribelli, viux vocis oraculo, & quasi lege declaratoria, suam Bullam præteritam moderatus est, seu temperavit, concedendo videlicet, vt illa nonobstante possent mulieres intrare in claustra Monachorum, concurrente aliqua ex sequentibus occasionebus, vel conditionibus. Prima est ratione Missæ, vel diuini officij intus celebrati. Secunda ratione alicuius processionis factæ per claustrum. Tertia ratione alicuius defuncti intus sepeliendi. Quarta, quando pro verbo Dei audiendo datur magnus concursus populi qui non possit per portam Ecclesiæ commodè intrare, & egredi: tunc poterunt mulieres cum viris intrare per ianuam communem conuentus, & per claustrum ire ad Ecclesiam: & finito sermone poterunt mulieres egredi per claustrum ad ianuam cōuentus, dummodò in hoc ingressu, & egressu vadant via recta ad Ecclesiam, vel ad ianuam conuentus. Et de ista concessione prædictus Cardinalis fidem fecit scripto firmatam, quæ habetur apud Rodrig. *citato loco Bullarij*. Neque mihi constat de vlla alia constitutione Pontificia super hac materia edita. Quo posito: ad quæstionem in principio positam.

2 Dico mulieres non posse licitè admitti ad videndum ornatum claustri vespere, vel mane, quando nulla fit processio, nec interuenit aliqua ex illis quatuor conditionibus positis in secunda declaratione Pij V. & proinde prælati illas sic admittentes peccant, & pœnas incurrunt positas in priori Bulla Pij, & Gregorij. Hanc conclusionem tenet in terminis Rodriguez *tom. 1. qq. Reg. q. 48. art. 3.* vbi rem magis stringens in §. *Circa quâ*, ait non posse prælatum facere processionem extraordinariam, & insolitam, vt ratione ipsius mulieres in-

expressi à Pio Quinto, in quibus possunt intrare mulieres, faciunt cessare omnes alios casus, in quibus quis posset præsumere licitum esse ingressum, qualem quis posset præsumere esse hunc ad solum videndum ornatum claustrum. Facit optime ad hoc dictum Nauarri *in consilio 8 de electione num. 2.* vbi ait à iure Regulari non esse recedendum nisi quoad ea quæ inueniuntur excepta; pro quo citat vnam glossam iuris communiter receptam: ergo ab illa priori Bulla Pij V. & Greg. prohibente ingressum fæminarum in Conuentus virorum non est recedendum; nisi quoad illos quatuor casus exceptos ab eodem Pio Quinto. Tertio, quando lex assignat aliquam formam, vel conditionem seruandam pro aliquo actu faciendo, qui non seruat talẽ formam, vel conditionem, & peccat, & aliquando facit actum nullum, vt videre est in non seruante formam, & conditiones assignatas ab Ecclesia, & seruandas in electione, vel alienatione bonorum Ecclesiæ: At mulieres intrantes ad solum videndum ornatum claustrum non seruant formam assignatam à Pio Quinto pro tali ingressu, cum in illo nulla inueniatur conditio ex quatuor illis assignatis ab eodem Pio Quinto: ergo mulieres taliter ingredientiæ peccant: & proinde peccant prælati illas admittentes, & consentientes. Ecce rationibus, Doctoribus, & ex decreto Pontificio manet satis probata nostra conclusio. Neque ego credo aliquem Sum. Pontificem posteriorem Pio V. cõcessisse aliquam declarationem vt intrent mulieres ad solum videndum ornatum claustrum, cum talis actus sit vanus, vt plurimũ, curiosus, & occasionatus ad pericula, & scandala, maxime cum mulieres in hoc ingressu (vt fertur) sedeant aliquando in claustro conuersantes, & longam moram trahentes. Quod quam suspectum sit potest pro-

bari à simili. Nam Leo X. in compendio Mendicantium ver. *Ingressus in monasteria Monialium* §. 34. concedens Minoritis cōfessoribus Monialium vt ingrediantur monasteria Monialium pro Sacramentis eisdem ministrandis quando ægrotant, addit Papa vt intrent, dummodo sacerdos intra non moretur nisi tanto tempore quanto indiget ad celebrandum &c. & Pius V. in 4. casu supradictō cōcedens vt mulieres pro causa prædicationis intrent per claustrum modo ibi assignato, addit quod vadant recta via, & recto tramite, quæ verba moram, & detentionem in claustro non admittunt. Quomodo ergo credendum est aliquem Sum. Pontificem postea concessisse vt mulieres intrent in claustra Religiosorum vt solum videant ornatum claustri, & ibi sedeant, vel ad libitum morentur?

4 Neque vero dici potest legem illam declaratiuam Pij V. pro modo illo intrandi, esse abrogatam per contrarium vsum. Nam iste vsum vel abusus sic intrandi, nouissimus est, & ante annos octo vel decem tantum, sicut audio: Lex autem Ecclesiastica postquam iam est radicata, & recepta per multos annos non potest abrogari nisi per 40 annos, vt Doctores communiter docent, maxime Suarez *tom. de legib. lib. 7. cap. 18. num. 12.* Lex autem Pij V. assignans modum intrandi lata est anno 1568. & sic iam decurrerunt anni fere sexaginta. Et saltem in prioribus quadraginta annis fuit receptissima, & practicata quoad illum modum intrandi pro illis tantum quatuor occasionibus: ac proinde consuetudo ista contraria intrandi eo modo de quo quaeritur per decem tantum annos non potuit abrogare prædictam legem. Nam licet lex in principio suæ publicationis, quamdiu non est radicata, possit abrogari per contrarium vsum intra annos decem: tamen postquam

quã lex est recepta, & practicata per annos 40. non potest abrogari nisi per alios annos 40. Addo vltimo quod vt consuetudo abroget legem debet esse consuetudo rationabilis, vt est communis Doctorem opinio; & habetur expresse in cap. finali de consuetudine: sed ista consuetudo sic ingrediendi monasteria Religiosorum ad solum videndum ornatum claustrum, non potest esse rationabilis: Fundatur enim vt plurimum in curiositate videndi: & præterea dantur in illa occasiones periculorum, & scandalorum. Ergo numquam poterit abrogare legem Pontificiam. Et potest forte applicari ad hoc intentum exemplum Dinæ filiæ Iacob, quæ sic periclitata est propter curiositatem videndi homines Religionis illius. *Genes. 34.* & scimus ex *Psal. 73*: Quanta malignatus sit inimicus in sancto? id est in loco sancto, vt exponit ibidem Lorinus. Sub censura Ecclesiæ Romanæ, & Doctorem.

## C A S V S XXXIX.

*An possint Religiosi ministrare sacrosanctam Eucharistiam extra suos Conuentus.*

QVædam Domina nobilis cum filia sua habet licentiam Nuncij, vel Ordinarij, vt possit facere missam celebrare in priuato Oratorio intra domum suam, sed Ordinarius decreuit, vt si illa vellet Sacramentum Eucharistiæ in tali Oratorio recipere, id solum reciperet de manu parochi proprij, non vero de manu alicuius alterius etiam Religiosi ibidem celebrantis, idque quouis tempore per annum. Quæritur



an si ibi aliquis Religiosus celebret iuxta licentiam s<sup>c</sup>minæ cōcessam pro missa ibi celebranda, possit eidem dominæ ministrare Sacramentum Eucharistiæ, non obstante illa prohibitione Ordinarij? Et videtur quod non possit. Nam Episcopus potest prohibere Religiosos ne celebrent in Oratoriis priuatis s<sup>c</sup>cularium pro vt illis concessit Concilium Tridentinum sessione 22. in decreto de obseruandis in celebratione Missæ. Ergo Episcopus potest impedire ne iidem Regulares ministrent Sacram Eucharistiæ eisdem s<sup>c</sup>cularibus in eisdem Oratoriis Valet consequentia, quia qui potest destruere id quod principale est, potest destruere id quod minus principale, & annexum est, iuxta legem 1. & 2. ff. de pecu. leg. vbi dicitur quod perempto principali, perimitur accessorium. At ministrare Eucharistiæ est accessorium celebrationi Missæ, & Missa est quid principale: ergo si Episcopus potest prohibere ne Regulares celebrent missam in Oratorio, quod est principale, potest eosdem inhibere ne ibidem ministrent Eucharistiæ quod est accessorium. Et confirmatur ex illa maxima Iuristarum deducta ex cap. Per venerabilem, qui filij sint legitimi, quæ ait: Qui potest quod est plus, potest vtique quod est minus, & videtur quod maius quid est impedire celebrationem missæ (quod potest Episcopus vt vidimus) quā impedire ministrationem Eucharistiæ. Secundo principaliter probatur quod id possint prohibere Episcopi non obstantibus priuilegiis Regularium, quia vnum ex priuilegiis quomuniuntur Religiosi ad dandam sacram Eucharistiæ s<sup>c</sup>cularibus, est illud concessum à Paulo III. Patribus Societatis Iesu, quod incipit, *cum inter cunctas*. In quo tamen Papa addit, vt id fiat. *Sine alicuius præiudicio*. Iam verò clarum præiudicium videtur fieri Parocho, vt in  
sua

sua propria Ecclesia, quale est Oratorium existens in propria sua parochia, aliquis Religiosus ministret Eucharistiam suo parochiano ipso parrocho inscio, & inuito. Iniuria enim videtur fieri Domino domus alicuius, si illo inuito in eadem domo fiat aliquis actus notabilis. Tertio probatur ex Clementina Religiosi de privilegiis, ubi Papa expresse prohibet, ne aliquis Religiosus ministret Eucharistiam alicui sæculari sine speciali parrochi licentia: & addit Papa: *Nullus Religiosus eisdem super hoc exemptionis, vel alio privilegio suffragante.* Quo nihil clarius dici potuit, & declaratur exemplo: Si enim Religiosus aliquis vadat ad aliquam Ecclesiam parochialem, & ibi velit Eucharistiam ministrare alicui parochiano, inscio, & inuito parrocho illius parochiæ, utique male faciet, quia iniuriam parrocho facit. Quod idem dicendum videtur, si velit Religiosus eandem ministrare in Oratorio existente in parochia parrochi, est enim Ecclesia illius parrochi. Quarto, si Religiosi possent ministrare Eucharistiam extra suos Cōventus in domibus priuatis, possent etiam eandem Eucharistiam ex suo Conuentu cum processione, & pompa deferre ad priuatam domum pro communione sæcularis, quod est inauditum, & scandalum causaret.

His non obstantibus, dico posse quemuis Religiosum celebrantem in prædicto Oratorio ministrare Eucharistiam matri illi, ac filiæ dummodò non sit in articulo mortis, & in die Paschæ pro obligatione præcepti quadragesimalis communionis: & quod sic ministrando Eucharistiam, nec peccabit, nec pœnam ullam incurret, etiam si faciat inscio, & inuito parrocho. Hæc conclusio est Rodrig. & Suarez, quos antequam citem duo prius suppono. Primum est, Religiosos Mendicantes, & cum eis communicantes habere privilegiū

ut possint dare Sacram Eucharistiam sæcularibus extra suos Conuentus, excepto die Paschatis. Præcipuum priuilegium ad hoc inseruiens est Pauli IV. anno 1557. apud Bullarium Rodriguez fol. 851 in quo Papa facit mentionem in præmio, quomodo Vicarius Generalis Fratrum Minorum apud Sedem Apostolicam conquestus fuit de aliquibus parochis Italiæ, eo quod assenserent prædictos Fratres non posse ministrare Sacramenta Pœnitentiæ, & Eucharistiæ sæcularibus nisi intra Ecclesias suorum Conuentuum; non vero extra suos Conuentus. Qua querela proposita & audita, Papa in hunc modum concedit Minoritis. *Quod de cætero per totum orbem omnium utriusque sexus fidelium pro tempore dicti Ordinis Fratres à suis superioribus deputati confessores confessiones, etiam infirmorum ubilibet, etiam extra domos, & habitacula eorundem Fratrum audire, eosque absoluerent, ac omni tempore, præterquam in die Resurrectionis Dominica Sacramentum Eucharistiæ tam illis, quàm quibusvis personis ministrare possint, Apostolica Authoritate concedimus.* &c. Quo nihil clarius potuit desiderari ad intentum. Et hoc priuilegium tam clarum non viderat Rodriguez tom. 1. qq. *Regular. quest.* 56. art. 3. ubi hanc materiam disputauerat ante suum Bullarium. Neq; Villalobos quos statim citabo, hoc priuilegium viderunt. Alia priuilegia (licet non tam clara) per quæ Regulares possunt ministrare Eucharistiam sacrosanctam sæcularibus etiam extra suas Ecclesias sunt Nicolai V. Sixti IV. & Leonis X. quæ citat Rodriguez cit. art. 1. Suarez tom. 4. de Religione libro 9. cap. 3. §. Circa alteram, in fine istius §. dicens illos tres Pontifices concessisse Religiosis, ut possint dare Eucharistiam Catholicis sæcularibus: *Sine limitatione ad proprias Ecclesias, vel aliquod templum.* Aliam concessionem ad idem citat Villa-

Villalobos *tom. 1. tract. 9. difficultate 54. §. ultimo*, dicens Pium V. concessisse quod Religiosi possent audire confessiones, & sacram Eucharistiam ministrare etiam extra suos Conuentus: non tamen citat librum vbi concessio ista scripta sit. Hinc manet clarum habere Religiosos priuilegium ministrandi Eucharistiam sæcularibus etiam extra suos Conuentus: semper excipio diem paschatis, & articulum mortis.

2 Secundo suppono, quod celebrare Missam extra Conuentus in Oratoriis quoad Religiosos, esse actum nimis distinctum ab actu dandi Eucharistiam extra Conuentus, vnus enim actus non depēdet ab alio, quia Missa potest celebrari sine eo quod ministretur Eucharistia: & è contra potest ministrari Eucharistia sine eo quod celebretur Missa, vt patet quotidie in Conuentibus, vbi sæpe datur Eucharistia populo sine Missa: sed dantur particule consecratæ repositæ in sacratio. Cumque sint hi duo actus distincti, Summi Pontifices duo priuilegia distincta concesserunt Religiosis, vnum vt possint celebrare extra Conuentum (de quo alibi.) Aliud vero priuilegium distinctum est, vt possint dare Eucharistiam sæcularibus extra Conuentum, sicut paulo supra vidimus. Ac proinde cum sint distincta priuilegia celebrare Missam extra conuentum in Oratoriis, & ministrare Eucharistiam sæcularibus extra conuentus, vnum priuilegium non pendet ex alio, & ex consequenti reuocato vno non censetur reuocatum alterum, nisi id exprimatur. Tertio adhuc suppono Episcopum non posse reuocare priuilegium datum alicui à Summo Pontifice, cum inferior non possit abrogare legem superioris, nisi forte Papa expresse committat Episcopo vt reuocet priuilegia Religiosorum, sicut commisit Concil. Trident. supra citato loco

Ioco Episcopis, vt possent præcipere Religiosis ne celebrarent in Oratoriis priuatis sæcularium; nihil tamen ibi dixit de ministranda Eucharistia sæcularibus extra conuentum, quod est priuilegium distinctum.

3 His suppositis, conclusio supra posita, quod scilicet possint Religiosi celebrantes in Oratoriis dare Eucharistiam prædictæ fœminæ, de qua quæritur, & filiæ eius, non obstante prohibitione Episcopi iam manet probata ex dictis: habent enim ad id clarum priuilegium, vt vidimus, quod priuilegium distinctum est à priuilegio celebrandi in Oratoriis. Et Episcopus non potest hoc priuilegium abrogare, nisi id illi expresse à Papa committatur, quod non commisit Tridentinum citato loco, vt diximus: ergo possunt id facere Religiosi per dicta priuilegia, maxime cum id fiat in secreto sine scandalo. Hoc ipsum tene nouissime Suarez *tom. 4. de Relig. lib. 9. cap. 3. §. Dices: ergo licebit.* vbi in fine ait, quod Religiosus habens licentiam ordinarij, pro Missa celebranda in aliquo Oratorio particulari, non erit necessaria specialis licentia ad dandam Eucharistiam, sed ex vi priuilegij licebit. Sic ille. Sed in nostro casu Religiosus celebrat in hoc Oratorio de licentia Papæ, vel Episcopi, vt suppono: ergo ex vi sui priuilegij poterit ibidem ministrare Eucharistiam. Et licet Suarez cit. cap. §. *tertio circa.* dicat posse Episcopum ex iusta causa præcipere suo parochiano ne sacram Eucharistiam recipiat in tali Oratorio in pœnam alicuius delicti, vel ob aliam causam iustam; Hoc non facit contra nos, quia in hoc casu supponimus nullam dari culpam in hac matre & filia, ob quam priuentur sacra communione, neque aliam causam iustam. Imo addit Suarez cit. loco hæc verba. *Si Episcopus prohibeat subdito non quidem Communionem simpliciter, sed ne illam à nostris*

*nostris sacerdotibus ( Societatis scilicet Iesu ) recipiat, talem prohibitionem non ob stare huic facultati, quia illa supposita praeceptum est iniustum, & directe pugnans cum privilegio Pontificis. Quo nihil clarius dici potuit. Hoc ipsum tenet Rodriguez cit. art. 3. §. circa quas. ubi in fine sic ait. Per facultatem tamen Leonis X. extra Communionem paschalem, id sibi indirec te per viam communicationis generaliter conceditur in omnibus communionibus voluntariis, ut scilicet in quacunque Ecclesia possint fideles communicare. Id est illis Eucharistiam dare. Idem tenet Villalobos loco supra citato. Idem tenet Frater Ioannes à Cruce, in sua Epitome de statu Religionis lib. 2. cap. 5. §. Tertia conclusio.*

4 Probatur adhuc conclusio rationibus. Prima iam fuit supra tacta: nam Religiosi habent clarum privilegium ad dandam Eucharistiam sæcularibus extra Cōuentus suos, & Episcopus non potest illud abrogare, ut diximus. Nec constat ullum Papam post illos supra citatos, hæc nostra privilegia reuocasse: sin minus reuocationem ostēdant noui Pontificis. Reuocatio enim privilegij debet intimari privilegiato, teste Suarez *tom. de legibus. lib. 8. cap. 40. num. 6.* & Doctores communiter: ergo nihil impedit quominus Religiosi hoc suo privilegio vtantur. Secundo, ista prohibitio Episcopi, ne Religiosi dent sacram Eucharistiam in hoc Oratorio, in rigore est reuocatio dicti privilegij concessi Religiosis, ut patet: Episcopus autem non potest reuocare privilegia Papæ, neque id illi commisit Trident. cit. loco circa ministrationem Eucharistiæ extra Cōuentum faciendam à Religiosis: licet commiserit Episcopo, ut possit illis prohibere, ne celebrent in Oratoriis, quod est nimis distinctum à ministratione Eucharistiæ, ut supra dictum est. Tercio probatur, quia illud

Iud priuilegium Pauli VI. non est antiquatum per non  
 vsum, quia vt Religio amittat priuilegium per non  
 vsum, requiritur spatium centum annorum cum aliis  
 conditionibus, quæ hic non interuenerunt, de quo Ro-  
 drig. tom. 1. q. 9. Regul. q. 61. art. 3. Bulla autem Pauli IV.  
 data est anno 1557. & nondum fluxerunt anni cen-  
 tum. Et præterea non constat quod vlli Religiosi vfi  
 sint hoc priuilegio, forte enim illud præsticant quoti-  
 die. Quarto probatur, quia ministrare Eucharistiam  
 hoc modo in Oratorio priuato nullum damnum, vel  
 iniuriam infert parochio: hæc enim communio est vo-  
 luntaria, & non fit in articulo mortis, vel in die Pas-  
 phatis, in quibus solum tenetur parochianus illam re-  
 cipere de manu parochi. Sicut enim extra articulum  
 mortis, & diem Paschatidis potest parochianus vnus  
 parochiæ sacram Eucharistiam recipere in aliena pa-  
 rochia incio, & inuito proprio parochio, quia tunc cõ-  
 municat voluntarie: ita etiam extra illos duos dies  
 poterit recipere Eucharistiam in suo Oratorio de ma-  
 nu Religiosi ibidem potentis celebrare. Et dato quod  
 in hoc aliquod præiudicium fieret parochio, adhuc  
 posset Religiosus Eucharistiã ibi ministrare. Nam licet  
 Papa non concedat priuilegium cum præiudicio tertij,  
 si tamen Papa sciat, & videat inde oriri præiudicium  
 tertij, & nihilominus priuilegium concedat, tenet pri-  
 uilegium, quia Papa id potest facere: vt clare patet in  
 priuilegio quod aliqui Pontifices concesserunt aliqui-  
 bus monasteriis, vt non soluerent decimas, quod ta-  
 men clare videbant Pontifices redundare in præiudi-  
 cium Episcoporum, quibus debentur decimæ: & ni-  
 hilominus tale priuilegium validum est. Eodem modo  
 scire debuit Paulus IV. & alij Pontifices ex ministra-  
 tione Eucharistiæ per Religiosos extra suos Conuen-  
 tus

tus aliquod præiudicium posse erga parochos resultare, & nihilominus ad id priuilegium concesserunt, ergo priuilegium valet: est enim illud præiudicium valde paruum, vel fere nullum.

§ Ad primum argumentum in oppositum patet solutio ex dictis: nam Concilium Tridentinum citato loco non dedit potestatem Episcopo abrogandi hoc priuilegium quod habent Religiosi ministrandi Eucharistiam extra conuentus, licet illi concesserit vt posset abrogare priuilegium illorum celebrandi missam in Oratorio priuato, quod est diuersum ab isto, de quo agimus, & destructo illo priori non destruitur hoc secundum, cum sit vnum indepēdens ab alio. Ad id quod primo adducitur in argumento, videlicet, quod qui potest in maius, potest in minus: Si intelligitur absolute, est falsum. Nam sacerdos absoluens pœnitentem in Sacramento Pœnitentiæ, dat remissionem peccatorum, & gratiam, vt minister, & tamen non potest illi dare vnum diem indulgentiæ per modum indulgentiæ extra sacramentum, quod est minus. Intelligitur ergo quod potens maius, potest & minus, quando illud minus est contentum sub maiori, illique subordinatum, & pēdens à maiori. At dare Eucharistiam, de se non est subordinatum, vel depēdens à Missa, vt supra vidimus. Et adhuc probatur alio exemplo: nam in cap. i. *de Torneamentis*, conceditur quod possit absolui ab excommunicatione ille qui moritur in torneamento illicito si ante mortem petierit: non vero illi conceditur sepultura Ecclesiastica, quod est minus quam absolutio ab excommunicatione, & sic cōceditur illi quod est maius, non vero conceditur illud quod est minus, vt ibidem notat glossa. Ad aliud quod adducitur in eodem primo argumento, quod accessorium sequitur naturam principalis,



cipalis, & quod hoc destructo, destruitur accessorium<sup>t</sup> potest primo negari quod dare Eucharistiam sæculari, ex se sit accessorium missæ: licet enim Eucharistia conficiatur in missa, & in fieri pendeat à Missa, non tamen pendet ab illa in conferuari, neq; quoad ministratiōē, seu exhibitionem communionis, vt supra dixi. Et dari potest aliud exemplum: nam pater in humanis producit filium, & filius pendet à patre in fieri, non tamen filius dicitur accessorium patris. Secundo respondetur, illud quod dicitur accessorium perire perempto principali, intelligi quando accessorium est tale, quod non possit consistere sine suo principali. Sic exponit Nauar, in consilijs *consilio 35. de voto, & voti redempt.* & tunc dispositum in principali censetur dispositum in accessorio. Secus (ait Nauar.) quando accessorium potest consistere sine suo principali. At supra vidimus ministratiōem Eucharistiæ posse existere sine missa: ergo licet ministratio Eucharistiæ esset accessorium missæ, dispositum in hac, non censeretur dispositum in ministratiōe Eucharistiæ.

6 Ad secundum argumentum dico, quod primo, Eucharistiam ministrare sæculari in Oratorio non causat præiudicium parochi, vt supra diximus: & dato quod aliquod paruum præiudicium causaret, Papa videns, & sciens potuit illud priuilegium concedere, sicut diximus in exemplo de decimis. Ad tertium respondet Suarez *citato cap. 3. §. Obijci vero*, quod Papa Clemens V. non potuit reuocare concessiones Pontificum successorum, quia Papa antecessor non ligat manus posterioris: & paulus III. fuit posterior Clemente V. & concessit contrarium. Ad quartum respondet idem Suar. *cit. cap. §. Dices: ergo*: negando sequelam, licet enim Papa concedat Religiosis vt possint ministrare Eucharistiam

rīstiam ſæcularibus extra ſuum conuentum , non concedit proinde vt illam poſſint cum pompa , & proceſſione ex cōuentu per plateas deferre ad infirmos, quia hoc eſſet contra conſuetudinem, & ſatis conſtat talem modum illam deferendi pertinere ſolum ad parochos, & hic modus deferēdi proprie intelligitur in illis verbis Papæ : *Sine alicuius præiudicio*. Et talis modus illam deferendi per planteas ad infirmos, non eſt in vſu apud Regulares. Leges autem attendunt ad id quod regulariter fit & frequenter accidit. Et ſic potuit Papa concedere Religioſis vt extra conuentus poſſent miniſtrare Eucharīſtiam , quia hoc ſcandalum non generat : non tamen debuit cōcedere vt illam per plateas cum pompa ad infirmos deferrent , quia hoc in vſu non eſt , & proprium officium parochorum eſt. Sub cenſura &c.

---

### C A S V S XL.

*De quodam Clerico ordinato cum tribus ordinibus ſacris ſine interſitijs, & extra tempora.*

**Q**uidam habēs ſolos ordines minores ex. quodam Episcopatu Inſularum, obtinuit licentiam à capitulo ibi ſede vacante poſt annum, vt Olyſſiponem veniens ibidem omnes tres Ordines ſacros maiores recipere non diſtinguente capitulo , neque diſpenſante, neque petente diſpenſationē circa interſitia, vel circa tempora. Olyſſiponem veniens erat etiam tunc capitulum ſede vacante : ſed quidam ibi Episcopopus titularis eidem dixit ſe habere priuilegiū ordinandi extra tempora Quo audito recepit ab eodem Episcopo omnes

tres Ordines sacros intra paucos dies sine interstitijs, & extra tempora: & quando illos suscepit, habuit bonam fidem, & credens se id posse licite facere. Post ordines susceptos orto aliquo scrupulo, fecit se absolui per Bullam Cruciatæ ab omni censura, & peccato si forte antea incurrerit. Postea ad Insulam rediens exercuit bona fide susceptos Ordines. Quo audito Gubernator Episcopatus Insulani, per sententiam declarauit illum irregularem eo quod ordines suscepisset extra tempora, & sine interstitiis, & in eisdem ministrasset. Olyssiponem rediit ubi iam tunc erat destinatus, & consecratus Episcopus pro eodem Episcopatu Insulano.

Quæsitum fuit primo quas pœnas prædictus incurrerit?

Secundo, an suus Episcopus possit cum illo dispensare, etiam Olyssipone existens extra suam dioceseſem.

### *Responsum.*

**P**rima conclusio. Iste clericus non incurrit suspensionem, neque irregularitatem ex eo quod ordines sacros receperit non seruatis interstitiis sine dispensatione. Probo, quia Concilium Tridentinum sess. 23. cap. 13. & 14. iubens seruari interstitia, nullam pœnam suspensionis, vel irregularitatis imponit contrafacienti, vt videre est in textu vtriusque capituli. Quando vero lex non imponit has pœnas, neque nos debemus imponere, vt docent communiter Doctores. Hoc ipsum expresse tenet Zerola 2. p. *praxis Episc.* verbo *Ordo*, §. *Octauo, an qui*, ubi ait quod licet Sixtus V. pœnam suspensionis imposuerit ordinatis non seruantibus

uantibus interstitia , postea tamen Gregorium XV. temperando Bullam Sixti, suspensionis pœnam abstulisse. Idem tenet Suarez *tom. de censur. disp. 31. sect. 1. num. 43.* dicens eandem suspensionem sublatam esse. Idem tenet Reginal. *tom. 2. lib. 3. tract. 2. num. 71. §. Re-ducitur,* & Riccio *3. p. Decisionum decis. 576.* citans Sayrum. Et sic ob interstitia non seruata, videtur sine causa fuisse hunc clericum per sententiam declaratum irregularem.

2 Antequam ego proponam secundam conclusionem , noto , & facio magnam viam in eo quod dicitur in ipsa informatione, videlicet hunc clericum quando suscepit Ordines omnes sacros modo prædicto , & quando in illis ministravit, habuisse bonam fidem. Et probari etiam potest quod habuerit bonam fidem, quia scilicet Episcopus titularis in illa materia versatus & bonus Theologus , eidem clerico dixit, se habere priuilegium ad prædictos Ordines sic conferendos. Et saltem habuit Clericus ignorantiam inuincibilem, quæ fere est idem, ac bona fides. Ignorantiam enim inuincibilem dicitur habere is qui interrogat Doctorem grauem : & nihilominus ille Doctor errauit in consulendo : tunc enim sequens consilium Doctoris , etiam erratum, habet ignorantiam inuincibilem, quia interrogans illam vincere non potuit & proinde habuit bonam fidem credendo Episcopo , & Theologo. Et adhuc noto , quod licet licentia data huic clerico à capitulo Sede vacante, exprimeret , quod posset recipere tres Ordines sacros maiores , seruatis tamen interstitiis, & in temporibus Ecclesiæ , adhuc tamen hic clericus poterat habere bonam fidem, & recipere omnes Ordines absque interstitiis credendo Episcopo titulari, & docto , dicenti se habere priuilegium ad Or-

dines conferendos extra tempora, & sine interstitiis. Eo scilicet modo, quo si subditus habens casum reseruatum à quo suus Episcopus non vult, vel non potest illum absoluerè: potest talis subditus adire Nuncium, vel alium habentem potestatem delegatam, & ab illo beneficium absolutionis recipere. Hoc posito sit.

3 Secunda conclusio. Hic clericus quando primo recepit ordinem Subdiaconi extra tempora, nō incurrit irregularitatem, nec suspensionem, siquidem illum suscepit bona fide. Hoc sic deduco: quia quando ordinatus est Subdiaconus non erat suspensus ob non seruata interstitia, quia hæc non tunc obligabant. Deinde quando suscepit ordinem Diaconi, & Sacerdotis, non incurrit suspensionem ob non seruata interstitia, vt patet ex prima conclusione. Deinde cum in susceptione horum trium Ordinum maiorum non esset suspensus iuxta iam dicta, non incurrit irregularitatem in illis omnibus suscipiendis ratione vltatę censurę suspensionis quam non habebat. Secundo probatur non incurrisse irregularitatem in ordinibus recipiendis, quia scilicet omnes illos suscepit bona fide, & cum eadem in illis ministravit. Censurę vero, & irregularitates quę ponuntur ob delictū non incurruntur, quando adest bona fides, vt est communis Doctorum opinio, de qua fuse & docte Sanch. lib. 9. de matrim. c. i. p. 32. à n. m. 15 citans multos. At iste clericus suscipiens hos Ordines sacros habuit bonam fidem, ergo nullam incurrit irregularitatem Et confirmatur, quia vbi non est culpa, non datur pœna: pœna enim & culpa sunt correlatiua: at hic clericus suscipiens hos Ordines non habuit culpam cum haberet bonam fidem: ergo non incurrit pœnas suspensionis,  
vel

vel irregularitatis. Est huius opinionis expresse Suar.  
*tom. de censuris. disp. 31.* vbi loquens de suspensione po-  
 sita contra ordinatum extra tempora, ait illam non in-  
 currere eum, qui credit se habere legitimam faculta-  
 tem, vel Episcopum illam habere, vel ex alia simili  
 ignorantia inculpabili, quo nihil clarius dici potuit ad  
 intentum. Hic autem clericus credidit Episcopum ha-  
 bere facultatem, vt se ordinaret extra tempora, & sine  
 interstitiis. Eandem opinionem tenet Comitoulus *lib.*  
*6. suarum responsionum, q. 7. num. 1.* dicens ordinatum ex-  
 tra tempora tunc solum incurrere suspensionem, si fe-  
 derit cum præsumptione, secus si faciat cum aliqua  
 ignorantia. Idem probatur ex eo quod communiter di-  
 cunt Doctores fere in simili materia, videlicet, quod si  
 ego antequam susceperem ordinem Subdiaconatus,  
 feci diligentiam moralem quam potui ad sciendum si  
 haberem ætatem requisitam, & nihilominus à parte  
 rei illam non habebam, suscipiens talem ordinem non  
 incurri irregularitatem, nec suspensionem propter bo-  
 nam fidem. Sic tenet Nauar. *in sum. lat. cap. 27. num. 155.*  
 & Suar. *cir. disp. 31. num. 26.* Reginaldus *cit. tract. num. 7.*  
 §. *Monet super.* Quod currit eodem modo in eo qui re-  
 cipit Ordines sacros extra tempora bona fide. Hic vero  
 clericus omnes suscepit cum bona fide, vt supponi-  
 mus: & hoc amplius confirmabitur ex dicendis in se-  
 quenti conclusione.

4 Tertia conclusio. Iste clericus non incurrit irregu-  
 laritatem postea celebrans Missam (idem dic de exer-  
 citio aliorum ordinum sacrorum) si celebrauit bona fi-  
 de. Probo hoc ex tribus fundamentis: Primum est ex  
 Bulla Pij II. quæ pro hac materia frequentius citatur,  
 quæ incipit, *Cum ex sacrorum.* in qua ponitur oçena irre-  
 gularitatis ordinato extra tempora, & in illa ponun-

tur hæc verba: *Si in illis ministrare præsumpserit*. Quando vero lex Pontificia pœnalis ponit hoc verbum, *Præsumpserit*, contrafaciens cum bona fide, vel cum aliqua ignorantia non incurrit illam pœnam, vt tenet communis opinio Doctorum: de quo Henriq. *tom. 2. lib. 13. cap. 23. num. 3.* citans multos in glossâ littera C. & tradunt multi alij. At iste clericus celebrauit bonâ fide, vt suppono: ergo non incurrit irregularitatem. Secunda ratio est, Si aliquis Sacerdos à parte rei est excommunicatus, idque ipse ignorat, vel obliuiscitur, & bona fide celebrat, non incurrit irregularitatem positam contra excommunicatum celebrantem, idque ob bonam fidem, vt tradunt communiter Doctores, maxime Syluester ver. *Irregularitas. §. 18. vers. Quintum*, & Nauarr. *in sum. lat. cap. 27. num. 244.* Henriq. *lib. 14. de irregul. cap. 7. num. 1.* citans alios in glossâ littera I. ergo à simili iste clericus, dato quod esset suspensus (quod non erat, neque excommunicatus) cum celebrauerit bona fide, nō incurrit irregularitatem. Addo quod dicitur de hoc clerico, quod post susceptos ordines fecit se absolui per Bullam Cruciatæ à quodam Patre Societatis Iesu, qui tum per Cruciatam, tum per sua priuilegia poterat illum absolvere ab omni censura reseruata Sedi Apostolicæ, quæ non esset Bullæ Cœnæ: & hanc absolutionem suscepit antequam Missam celebraret. Tertia ratio, seu fundamentum est, id quod tradit Nauarrus *in sum. lat. cap. 27. num. 155.* vbi docet, quod ille qui temerarie ordinatus est, postea tamen bona fide, & candida simplicitate per pœnitentiam purgato peccato, exercuit ordinem existimans id sibi esse licitum, non sit irregularis per Bullam citatam Pij II. Nauarrum sequitur Reginald. *lib. 3. cap. 6. num. 61.* quod dictum Nauar. continet plus quam petit noster casus: nam ibi loquitur

tur de illo, qui ordinatus est temerarie, & postea cum sola confessione peccati, & sine dispensatione irregularitatis celebravit. Nos autem loquimur de clerico ordinato non temere, sed bona fide, & qui celebravit bona fide. Denique fauet quod dictum mihi fuit, hunc clericum, antequam Missam celebrasset, petiisse licentiam à capitulo Sede vacante pro Missa celebranda: quod satis probat illum habuisse bonam fidem in celebrando: debuit enim in petitione præsentata Capitulo exponere quomodo Ordines extra tempora, & sine interstitiis suscepit: quo non obstante Capitulum dedit licentiam celebrandi: in quo significavit se velle dispensare cum illo in omni impedimento quod haberet ad celebrandum. Poterat autem capitulum sede vacante dispensare cum illo in omni irregularitate orta ex delicto, non deducta ad forum contentiosum, sicut potest Episcopus per Tridentinum *sess. 24. cap. 6.* sicut dicunt Suarez, Reginaldus, Rodrig. Sanch. & Sayro citati à Barbosa in suis Remissionibus ad Tridentinum ad citatum cap. 6. Tridentini: qui omnes dicunt, quod capitulum sede vacante succedit Episcopo in omnibus quæ sunt iurisdictionis. Quod autem dare licentiam ad celebrandum, si datus licentiam sciat dari impedimentum celebrandi, & nihilominus dat licentiam, per hanc licentiam dispense in impedimento, est etiam communis Doctorum opinio, quam citat Suarez *tom. de censur. disput. 41. sect. 3. num. 5.* posse fieri dispensationem non solum verbis, sed etiam aliquo facto.

6 Ultima conclusio. Dato quod iste clericus incurrit aliquam suspensionem, vel irregularitatem, (cuius oppositum manet probatum) illius Episcopus poterit illum absolvere, & cum illo dispensare, etiam dum existit extra suam diocesim. Prior pars, quod pos-



fit hoc Episcopus, patet ex Concilio Tridentino *sess.*  
*24. cap. 6.* ubi conceditur Episcopo quod possit absol-  
 uere ab omni censura, & dispensare in omni irregula-  
 ritate orta ex delicto, quæ non sit deducta ad forum  
 contentiosum. Neque obstat quod ista irregularitas (si  
 extitit) iam deducta fuit ad forum contentiosum, quia  
 Gubernator Episcopatus, ut dicitur illum per senten-  
 tiam declarauit irregularem. Non obstat, quia illud fo-  
 rum contentiosum iam finitum est: quia iuxta bonos  
 Doctores locum illum Tridentini explicantes, post-  
 quam finitum est iudicium fori externi ad quod irre-  
 gularitas deducta est, potest Episcopus dispensare in  
 illa. Sic in terminis tenet Reginaldus *rom. 2. lib. 30. cap.*  
*3. scilicet. 4. num. 29. §. Sextum est.* ubi sic ait. Si delictum fuit  
 deductum ad forum contentiosum, sed iudicium iam  
 est finitum, probabile est posse Episcopum dispensare  
 in irregularitate ex illo secuta. Idem tenet absolute  
 Sanchez *lib. 2. Decalogi, cap. 11. num. 21.* citans multos:  
 & maxime locum habebit, si clericus iste sit pauper  
 non valens Romam adire, & aliàs infamiam patiatur  
 eo quod missam non celebret. Secunda pars conclu-  
 sionis, quod scilicet id possit Episcopus facere exis-  
 tens extra suam dioccesim, probatur, quia iuxta Do-  
 ctiores communiter, Episcopus existens extra suam  
 dioccesim erga suos subditos exercere potest omnia il-  
 la quæ sunt iurisdictionis voluntariæ, teste Sanchez  
*lib. 3. de Matrim. disput. 19. cum ibi citatis num. 8. eius-*  
*dem libri num. 5. §. Secundo inferitur.* At absoluere, &  
 dispensare in Episcopo, est actus iurisdictionis vo-  
 luntariæ, non contentiosæ: ergo id facere poterit extra  
 suam dioccesim. Sub censura Ecclesiæ, &c.

## CASVS XLI.

*De alio clerico qui recepit omnes Ordines sacros omiſſis Ordinibus minoribus.*

**Q**uidam clericus parui pendens Ordines minores, illisque omiſſis, recepit omnes tres Ordines sacros. Vixit in hoc ſtatu annis duodecim, vel quindecim miniſtrans in tribus ordinibus ſacris pro occaſionibus occurrentibus. Quæſiuit à quodam Religioſo prædicatore ordinario an teneretur recipere ordines minores, quibus carebat. Prædicator euoluens aliquos libros, eidem reſpondit non teneri ad illos recipiendos, quia illos nunc recipiens incurreret infamiam, & periculum, quod Episcopus illum puniret, qui neceſſario caſum ſcire debebat, cum Ordines minores recipere non poſſet ſine Episcopi licentia. Acquieuit Clericus, & manſit in priſtino ſtatu miniſtrans in tribus Ordinibus ſacris receptis, non recipiens minores. Prædicator qui dederat conſilium volens ſcite an rectè conſuluerit mihi caſum propoſuit, & cum illo caſu poſſunt quæri ſequentes quæſtiones.

Prima eſt, an iſte clericus verè receperit characteres trium Ordinum ſacrorum, abſque minoribus? Videtur enim, quod ordines minores ſunt porta ad alios ordines ſacros, ſicut baptiſmus eſt porta ad cætera ſacramenta: & proinde ſicut carens baptiſmo nullum verum ſacramentum recipit: ita carens ordinibus minoribus nullum ordinem ſacrum valide recipiet.

Secunda quæſtio: an iſte teneatur ſub peccato mortali recipere Ordines minores quibus caret?

Tertia. Si existente periculo infamiae grauis, vel metu magni supplicij, possit ordines minores omittere, & in tribus sacris ministrare?

Quarta, an sic celebrans absque minoribus ordinibus incurrat aliquam censuram Ecclesiae, vel irregularitatem?

*Ad primam.*

1 **A**D primam quaestionem non defuerunt qui dicerent hunc talem non recepisse veros characteres Ordinum sacrorum, nec proinde esse verum Sacerdotem, Diaconum, &c. Doctores qui hoc dixerunt citat gloss. super cap. *unicum de clerico per saltum promotio*, verbo, *De misericordia*. Quo non obstante, certissime tenendum est praedictum clericum verè recepisse characteres trium sacrorum, & proinde esse verum Sacerdotem, &c. Sic tenet cit. glossa ad citatum cap. & Ostiens. ad idem capitulum, & alij Doctor. communiter. Idem tenet Suarez *tom de Baptismo disput. 11. sect. 3. §. Terrio de charactere*, ubi ait quod licet ordo superior recipi non debeat ante ordinem inferiorem, si tamen recipiatur factum tenet: & adducit rationes claras. Tenet etiam Henric. *tom. 2. lib. 1. cap. 14. num. 2. in fine* citans D. Thomam. Neque vero minores ordines sic sunt porta Ordinum sacrorum, sicut baptismus est porta ceterorum sacramentorum, quia hoc in nullo Concilio, vel in aliquo textu iuris canonici dictum reperitur.

*Ad secundam quaestionem.*

2 **A**D secundam quaestionem dico hunc Sacerdotem teneri sub mortali recipere Ordines  
mino-

minores omiffos fi commodè poffit. Sic tenet Oftienf. citato c. dicens quod ordinatus per faltum tenetur fupplere id quod fibi deeft. Et citat ad hoc cap. *In fmgulis.* & capit. *quisumque dift.* 73. vbi Sum. Pontifi. dicunt confuetudinem antiquiffimam effe Ecclefie, vt ad facerdotium afcendatur per gradus ibi designatos incipiendo ab ordinibus minoribus, qui ibidem numerantur. Et Concilium Tridentinum *feff.* 23. *in canone 2. de facramento Ordinis*, ponit anathema neganti quod in Ecclefia fint ordines minores, per quos velut per gradus quofdam in facerdotium tendatur. Ex quibus textibus colligitur hæc ratio clara. Qui recipit ordines facros, non recipiendo minores violat legem Ecclefiafticam claram, & in materia grauiffima: ergo peccat grauiffime omittens ordines minores fi ad facerdotium tendat, & ab ifto peccato non liberatur donec illos recipiat. Idem tenet Nauarrus *in confilio 9. de tempor. ordin. num.* 4. vbi ait, quod cum quidam Protonotarius diceret certis hominibus, fe poffe eifdem minores ordines conferre, & pofttea dubitatum eft an id poffet: tenebantur prædicti ordines minores à vero Epifcopo recipere. Idem tenet Henriquez *tom.* 2. *fum. lib.* 14. *cap.* 6. *num.* 3. quatenus ait ordinatum per faltum non poffe recipere ordinem omiffum fine difpenfatione.

3 Tota dubitatio eft an ifte de quo agimus incurrit pœnas impofitas illis, qui ordinantur per faltum, quæ funt fufpenfio ad non exercendum ordinem fufceptum, & inhabilitas ad alios recipiendos: & irregularitas fi miniftrèt in ordine recepto. Refpondeo certius effe, quod incurrerit in prædictas pœnas. Primo, quia fecit fcienter, & cum malitia, & contemptu. Secundo, quia textus, & Doctores loquentes de ordinatis per faltum non diftingunt de ordinibus maioribus vel

vel minoribus Tertio, quia communior opinio Theologorum est, ordines minores esse etiam sacramenta imprimencia characterem, de quo Henriqu. *tom 2. lib. 10. cap. 14. num. 2. littera M.* ex Conciliis Florent. & Trident. D. Tho. & aliis ibi citatis. Quo non obstante dici etiam potest probabiliter hunc non incurrisse prædictas pœnas impositas ordinatis per saltum ob dimissos ordines minores. Fauet huic dicto Nauar. *consil. 28. de sentent. excomm. à num. 11. usque ad 15.* ubi ait, quod recipiens ordines minores existens excommunicatus, non incurrit irregularitatem ad alios recipiendos. Quod probat primo, quia iura loquentia de male promotis, quæ ibi citat, loquuntur solum de male promotis ad ordines sacros, non vero de male promotis ad ordines minores. Secundo, quia minus peccant isti, quam illi. Tertio, quia iuxta opinionem multorum satis probabilem, quos ibi citat, ordines minores non sunt sacramenta, sed sacramentalia: & proinde non est eadem ratio puniendi promotos per saltum in ordinibus minoribus, ac in maioribus. Quarto, quia Bulla Pij II. puniēs ordinatos ante legitimam ætatem, vel extra tempora, vel sine litteris dimissoriis, non punit sic ordinatos in minoribus, sed in maioribus ordinibus. Quod ipsum ego colligo ex duobus textibus loquentibus de promotis per saltum. Primus est in cap. *Sollicitudo. dist. 52.* qui solum loquitur de illo qui suscepit ordinem Diaconi, & Presbyteri, omissio ordine Subdiaconi. Secundus textus est in cap. *unico de clerico promotus per saltum.* qui solum loquitur de Subdiacono, qui omissio ordine Diaconi recepit ordinem Sacerdotis. Et nullus ex his loquitur de saltu in ordinibus minoribus: vnde videtur, quod recipere maiores, omissis minoribus, non sit proprie ordinari per saltum, maxime quia pœne sunt

sunt restringendæ, non extendendæ; idque præcipue quando militat diuersa ratio, vt hic militat iuxta Nauar. quia scilicet ordines minores non sunt sacramenta, & circa illorum omissionem committatur minus peccatum. Semper tamen dico, hunc peccasse grauissime, & teneri ad suscipiendos ordines minores modo explicando statim in sequenti responsione.

*Ad tertiam questionem.*

4 **A**D tertiam quæstionem dico, quod si hodie iste clericus responso sibi dato ab illo prædicatore, quietus est, cum bona fide, & ego sciam quod si illum monuero esse obligatum ad recipiendos ordines minores, ille contemnet metu infamiæ, & supplicij, & sic infordescet perseuerans ministrando in ordinibus receptis cum mala conscientia per totam vitam, in tali casu credo illum non esse admonendum de obligatione recipiendi minores, sed relinquendum illum esse in sua bona fide. Probo hoc exëplo clarissimo à Theologis recepto, dicentibus, quod si in Sacramento confessionis confessarius ex coniecturis deprehendat aliquam, vel aliquem vxoratum publice, non contraxisse verum matrimonium propter clarum impedimentum dirimens ab illis ignoratum, & nihilominus constet Confessario satis probabiliter, quod si pœnitentem moneat de remedio, & dispensatione quærenda, ille cõtemnet, vel ob infamiam, vel ob supplicium, vel ob expensas faciendas in dispensatione obtinenda, & manebit in eodem statu cum mala conscientia accedendo ad non suam: in tali casu non est admonendus pœnitens de illo impedimento, sed relinquendus in sua bona fide, vt in particulari docet Sanchez libro  
2. de

2. de Matrimonio, disput. 38. num. 6. cum multis & gra-  
uibus Doctöribus quos citat. Pro quo inter alia addu-  
cit Sanchez vnum textum sumptum ex D. Augustino  
in cap. *Si quis autem. de pœnit. dist. 7.* vbi D. Augustinus  
sic ait: *Si scirem non tibi prodesse, non te admonerem.* Secū-  
do id probat Sanchez, quia nulla lex obligat nos ad  
actus inutiles, & frustraneos. Tertio, quia nō debemus  
alicui laqueum iniicere ad peccandum. Quæ omnia  
applicari possunt, & debent ad nostrum casum de ad-  
monendo isto Clerico circa minores Ordines susci-  
piendos: Si enim sit probabile quod ex monitione plus  
peccabit modo prædicto, abstinendum est à monitio-  
ne, Si vero sit spes quod acquiescet, monendus est vt  
ordines minores recipiat. Neque obstat quod citato  
loco ait Sanchez, illam doctrinam locum habere, quā-  
do pœnitens habet ignorantiam inuincibilem impedi-  
menti, & habet bonam fidem: At clericus de quo agi-  
mus non habuit ignorātiā inuincibilem nec bonam  
fidem, cum omiserit ordines minores ex contemptu,  
& proinde ex malitia. Ad hoc enim dico quod licet iste  
clericus habuerit malam fidem in principio quando  
maiores sine minoribus recepit. Hodie tamen potest  
habere bonam fidem propter dictum prædicatoris si-  
bi dicentis, & rationes allegantis ad probandum quod  
hodie ob rationes adductas non teneatur minores re-  
cipere cum metu infamiæ, supplicij, expensarum, si  
forte Episcopus arguat illum quod etiam ea de causa  
irregularitates contraxerit. Denique facit ad hoc id  
quod diximus in proxime præcedenti §. Qui incipit  
*Tota dubitatio ex Nauarro.*

Ad

*Ad quartam quæstionem.*

5 **A**D quartam quæstionē dico, quod si talis Clericus habet bonam fidem qua credit se non teneri ad minores Ordines suscipiendos, tunc sic celebrās, & alios Ordines exercēs, non incurrit in aliquam censuram, vel pœnam Ecclesiasticam, & proinde non peccat. Probatur clare ex eo quod tradit Nauarrus *in summa latina cap. 27. num. 15.* dicens, quod qui bona fide recipit Ordines sacros putans se esse legitimum, cum à parte rei sit illegitimus, vel illos suscepit ante debitam ætatem, cogitans se illam habere facta prius diligentia, talis non incurrit vllam pœnam propter bonam fidem, quam habuit. Et adhuc plus est quod ait idem Nauarrus citato capite *num. 239.* videlicet quod qui habet vnam censuram reseruata, & caret confessore, qui possit illum absolue, vt si sit censura Bullæ Cænæ Domini, & alias si non celebret famæ periculum incurrat, vel scandalum resultabit: iste talis contritus, & confessus de aliis peccatis à quibus potest absolui poterit celebrare sine incurso alicuius irregularitatis: quia tunc præualet præceptum naturale conseruandi propriam famam præcepto positiuo Ecclesiastico de non celebrando cum censura. Idem tenet Henriquez *tom. 2. lib. 13. cap. 21. nu. 3.* cum aliis ibi citatis; & Rodriguez *in sum. 1. p. cap. 166. conclus. 1.* citans alios: ergo si iste Clericus fuerit in bona fide, vt supponimus, & credat se habere rationes sufficiētes ad deponendum dubium practicum, nō peccabit, neque incurret aliquam pœnam Ecclesiasticam, iuxta prædicta ex citatis Doctoribus. Facit adhuc pro hac parte, quod tradit Henriquez *tom. 2. libro 10. cap. 14. num. 2.* videlicet, quod qui iteraret Ordines minores scienter, non esset irregularis, &

cit



citat in glossa littera N. Scotum, Palludanum, Sotum, Castro, & alios. Et rationem assignat, quia in iure non inuenitur irregularitas posita contra iterantem Ordines Minores. Cōmunis verò opinio docet non esse curandum de irregularitate illa, quæ non reperitur in iure posita, & expressa: quod etiam facit ad probandum id quod supra diximus pœnas impositas cōtra promotos male, vel per saltum ad Ordines non intelligi de male promotis in Ordinibus minoribus. Sub censura sanctæ Romanæ Ecclesiæ, & Doctorum.

## CASVS XLII.

*De quodam Religioso reclamante contra suam professionem post quinquennium.*

**Q**uidam professus in quodam Ordine Mendicantium commisit culpas dignas magno supplicio post annum decimumquintum suę professionis: Cumque illum prælatus punire vellet pro commissis culpis; respondit, se non esse vere professum eo quod professionem emisisset ante annum decimum sextum suę ætatis completum. Ad hæc dixit prælatus se non posse reclamationem illam acceptare, nec probationē ætatis, eo quod Concilium Tridentinum *sessione 25. capite 19. de Regularibus*, præcipiat vt nō audiat quisquam reclamans de nullitate suę professionis, nisi id faciat intra quinquennium post professionem emissam: ille verò iam erat professus quindecim ab hinc annis. Replicauit subditus, se non sciuisse hunc defectum ætatis suę in tempore professionis, nisi duobus abhinc mensibus,

sibus, idque ignorasse per totos illos annos quindecim, nunc autem cognouisse talem defectum ætatis, & nullitatis professionis: Illud verò quinquennium assignatum à Tridentino ad reclamandum à professione, non esse numerandum à die professionis, sed à die notitiæ, quam professus habuit de tali defectu: Se verò ante duos modo menses id sciuisse: & sic illi dixit quidam aduocatus sæcularis.

Orta est igitur quæstio, an prædictum quinquennium assignatum à Concilio Tridentino pro reclamatione professi sit numerandum à die professionis, an verò à die notitiæ, quam habuit professus de nullitate suæ professionis. Et quod numerandum sit à die notitiæ, non verò à die professionis, videtur probari exemplo adæquato ferè in simili materia, quæ talis est. Episcopus publicauit edictum, vt omnes qui scirent de tali furto, v.g. denunciarent Episcopo intra dies triginta: Quidam, qui sciebat de furto non habuit notitiam huius edicti, nisi 28. die post illius publicationem, dicunt graues Theologi, quod non tenetur denunciare post duos statim dies quando complentur triginta dies assignati ab Episcopo: sed poterit expectare alios triginta dies ad denunciandum: quia (inquiunt) illi triginta dies assignati ab Episcopo non debent numerari à die publicationis talis edicti. Ita tenet Henriquez *tom. 2. summa, lib. 13. cap. 18.* & Suarez *tom. de censuris disp. 20. ad finem illius disputationis.* Et rationem assignat Suarez, quia iste inculpabiliter ignorans diem publicationis, non debet esse peioris conditionis in spatio dierum assignatorum, quam illi qui audierunt publicare; & proinde si his dantur triginta dies, totidem dabuntur illi qui nouit post 28. dies. Quod optime conuenit nostro casui.

I His non obstantibus, dico quinquennium assignatum à Concilio Tridentino pro reclamazione professionis, numerandum esse à die professionis, non verò à die notitiæ quam habuit professus de nullitate suæ professionis. Sic tenet Sanchez *lib. 7. de Matrim. disput. 37. quest. 2. num. 19.* vbi pro hac opinione solum citat Nauarrum clarè illam habentem *lib. 1. consil. tit. de his quæ vi, consil. 6. & in comment. 4. de Regul. num. 71. vers. 3.* Hanc etiam opinionem tenet Rodriguez *tom. 4. Addit. ad summam. verb. Nouicios, cap. 65. concl. 5. & citat Azorium.* Ponit tamen Sanchez rationes efficaces, quas confirmat multis, & grauibus Doctoribus. Prima eius ratio est. Quia licet tempus non currat quando præfigitur in odium negligentiae alicuius, si detur ignorantia, vel impedimentum: secus est quando tempus præfigitur non in odium negligentis, sed in fauorem alterius, & hanc maiorem probat autoritate grauissimorum decem Doctorum: At quinquennium hoc non est assignatum in odium negligentiae professi, sed in fauorem Religionis, ne longo tempore litibus molesteretur: ergo hoc quinquennium, debet currere professo etiam ignoranti impedimentum. Et probat exemplo adducto per Balbum, in materia præscriptionis: nam tempus præscriptionis ipso iure procedit contra ignorantem, & ignorantia non impedit cursum præscriptionis, quia præscriptionis ius concessum est ob bonum commune, & ad lites euitandas. Sic etiam tempus præfixum ad reclamandum à Tridentino, curret professo etiam ignoranti, propter bonum commune Religionis. Secundo probatur, quia numquam obuieretur litibus, nec tranquillitas Religionis obtineretur, quod fuit intentum decreti illius Tridentini, si locus esset allegationi ignorantiae contra illius quinquennium

nium lapsum. Tertio probatur ex verbis citati decreti Tridentini: ait enim professum non posse reclamare: *Nisi intra quinquennium tantum à die professionis.* In quibus verbis notandum est illud, *À die professionis.* Quod clare intuit à die professionis numerandum esse quinquennium. Deinde consideranda est dictio, *Tantum,* quæ exclusiua est, & affirmat id quod ponit, negans omnes alios casus præter expressos, iuxta legem *ob as.* Cod. de *prædiis Minorum,* & cap. *Cum Ecclesia Sutrina de causa possess.* ergo excludit omnem computationem quinquennij à die notitiæ, &c. Prætereà dato quod hæ rationes non valerent, & dato quod hic Religiosus impedimentum ignorauerit, & cum iuramento affirmet se illud ignorasse vsque ad annum 15. post professionem, id quidem illi proderit quoad forum internum non verò quoad forum externum: vt enim ait Rodriguez tom. 3. *Addit. ad sum. cap. 206.* ad finem citans Menochium, Gregorium Lopez, & alios, in foro externo nihil probat dictum ignorantis etiam si dicat cum iuramento. Religio verò in hoc casu possidet, & habet possessionem claram sui professi, quam non potest infirmare solum dictum subditi testificantis in eausa propria.

2 Ad exemplum adductum in oppositum de ignorante publicationem edicti ex Suarez, & Henriquez responderi potest iuxta primam rationem Sanchez allatam, videlicet illud tempus præfixum ab Episcopo ad denunciandum assignari in odium negligentiae quã habere possunt denunciatores in non denunciando, & idèd tale tempus præfixum non currere ignorantibus edictum, vt illi Doctores dicunt. Tempus verò quinquennij à Concilio Tridentino præfixum non assignatur in odium negligentiae professi, vt ait Sanchez, sed

propter bonum commune Religionis, vt non inquireretur litibus perpetuis: Et idè mirum non esse si quinquennium Concilij Tridentini currat contra professum ignorantem suum impedimentum: non vero currat contra ignorantem publicationem edicti pro denunciatione facienda. Sub censura Romanæ Ecclesiæ, & Doctorum.

---

CASVS XLIII.

*De obligatione annexa quibusdam possessionibus  
cuiusdam Conuentus.*

**Q**uidam Conuentus Monialium habebat aliquas possessiones immobiles sibi relictas à piis testatoribus, cum obligatione vt singulis annis pro suis animabus iuberent celebrari certam copiam Missarum, & officiorum in Conuentu quodam Religiosorum eiusdem ciuitatis. Ad quem hanc addiderunt clausulam in testamentis, quod nullo vnquam tempore, quacunque via prædictæ possessiones possent à Monialibus vendi, vel alienari. Successu temporis, ob malum regimen, Conuentus Monialium incidit in magnam egestatem, & contraxit multa debita apud multos creditores. Instantibus vero his creditoribus, iustitiæ sæcularis ministri in foro publice vendiderunt dictas possessiones quibus erant annexæ missæ multæ, & officia. Religiosi Conuentus prædicti petierunt, vt Abbatissa Monialium sibi solueret Missas, & officia ad quæ tenebantur ex institutione testatorum, qui Monialibus possessiones reliquerant cum obligatione procurandi,

randi, vt illa officia & Missæ dicerentur in Conuentu eorundem Fratrum. Abbatissa respondebat se, & suū Conuentum iam deobligari à tali solutione Missarum, eo quod iam non possiderent possessiones illas quibus talis obligatio Missarum annexa fuerat, & proinde illam obligationem Missarum pertinere ad illos qui hodie possidebant prædictas possessiones.

Quæritur, an prædicta obligatio curandi vt illæ Missæ dicantur manserit apud Moniales, an vero transierit cum illis possessionibus ad illos qui illas hodie possident? Et quidem videtur illa obligatio mansisse apud Moniales, nam ipsis tantum à testatoribus illa obligatio iniuncta est, non vero illis qui hodie possessiones possident. Si autem prædictæ Moniales sua culpa prædictas possessiones amiserunt, sibi imputent. Nemo enim ex sua culpa debet lucrum reportare, vt Doctores dicunt communiter. Præterea secundo, tenebatur saltem Abbatissa quando sibi ademptæ sunt illæ possessiones ob debita, protestari coram iudice, vt iuberet illis quibus dictas possessiones tradebat, quod ipsi haberent illam obligationem Missarum dicendum; quam monitionem, vel protestationem si Abbatissa non fecit, videtur etiam ex hoc capite manere cum illa Missarum obligatione. Ad eum modum, quo, si venditor non manifestat emptori vitium occultum rei venditæ, vel seruitutes agri venditi, vel obligationes rei venditæ, manet venditor cum illis obligationibus, & tenetur in conscientia ad omnia damna emptori subsecuta, prout Doctores communiter dicunt in materia *de emption. & vendit.* ac proinde si Abbatissa non monuit Iudicem, vel creditores quando illæ possessiones sibi ademptæ sunt, de obligatione Missarum illis annexa, videtur apud Abbatissam, &

ipsius Conuentum prædicta obligatio manere.

1 Pro solutione præmitto, quod licet confiscatio Regis proprie sit, quâdo Rex aufert ab aliquo bona temporalia propter culpas commissas in Deum, vel in Regem, & sibi Regi applicat: tamen suo modo etiam dici potest confiscatio, seu fiscus, quando Rex aufert ab aliquo bona sua temporalia ob debita, quæ alicui debet, & illa adiudicat creditori cui debet; vtroque enim interuenit ablatio bonorum facta autoritate Regis, & per accidens est, quod fiat propter crimina, vel propter debita; & argumentum à simili habet vim apud Doctores, vt in multis casibus passim videmus. Hoc posito.

2 Ad præsens dubium respondeo, mihi satis probabile videri, quod Conuentus Monialium, de quo agitur, non tenetur ad obligationem Missarum prædictarum impositam possessionibus sibi ademptis. Probo hoc primo ex *Regula 55. de Regul. iuris in 6.* quæ sic habet. *Qui sentit commodum sentire debet & onus: & è contra, id est. Qui non sentit commodum non debet sentire onus.* Sed Conuentus iste Monialium non sentit commodum illarum possessionum, ergo non debet sentire onus Missarum dicendarum. Secundo constat ex iure, quod res transit cum onere suo. Cap. *Ex litteris. de pignoribus.* & cap. *Pastoralis. de decimis.* & cap. *Cum non sit in homine 16. quasi. 1.* At possessiones prædictæ habentes illam obligationem Missarum tranſierunt ad alios dominos: ergo cum illis transire debuit onus Missarum dicendarum. Tertio inhærendo exemplo proxime posito de fisco, quod diximus habere magnam similitudinem cum ista ademptione possessionum facta autoritate Regis, adduco propriissimam doctrinam traditam per Sanchez lib. 2. *Decal. cap. 22. à num. 74. vsque ad nu. 87.*

tria

tfia enim ibi dicit ad hoc concernentia.

3 Primum est *num.* 74. quod fiscus tenetur soluere debita contracta à reo ante commissionem criminis: & probat hoc per textus & Doctores, quos ibi videt; sed hoc debitum Missarum dicendarum contractum erat à Conuentu Monialium antequam incideret in culpam, vel negligentiam soluendi creditoribus: imò à fundatione Conuentus debebatur hoc debitum: ergo fiscus, id est possessores harum possessionum hodie tenentur ad illa debita soluenda. Secundum quod dicit Sanchez ibidem *numero* 86. id magis confirmat. Ait enim post confiscationem bonorum nullam litem, seu actionem pro debitis ipsi reo confiscato posse intentari, sed mouendam esse solum contra fiscum possidentem bona. Et citat etiam textus, & Doctores: ergo hodie lis non est mouenda pro hoc debito missarum contra conuentum Monialium, fere confiscatum; sed contra possessores harum possessionum qui se habent vt fiscus. Tertium quod addit Sanchez *codem num. cum text.* & Doctoribus, est adhuc maius, videlicet, quod ille cui per fiscum bona sunt adempta, non tenetur postea soluere debita antiqua etiam si veniat ad pinguiorem fortunam, idque neque in foro externo neque in interno: Si ergo etiam hæreticus, qui propter hæresim amisit omnia sua bona per confiscationem, deobligatur à soluendis debitis antiquis in vtroque foro, videtur idem dicendum de conuentu monialium, qui non propter crimina contraxit debita, sed propter negligentiam, vel malum regimen amisit possessiones quibus annexa erat obligatio missarum dicendarum, vt deobligandus sit à solutione perpetua harum missarum.

4 Quarto adhuc facit in fauorem Monialium, quod dictæ possessiones non poterant vendi à ministris iusti-



tiz; nec à Conuentu, cùm haberent clausulam per testatores appositam ne vnquam possent alienari: vt habetur in Ordin. Portugalliæ lib. 3. tit. 93. §. 3. Quod adeò verum est. vt neque Rex confiscans bona Heretici possit confiscare illa quæ prohibita sunt alienari, vt tenet Nauar. *lib. 5. consiliorum tit. de simon. consilio 5.* & Iulius Clarus *in praxi crim. §. fin. q. 78. num. 40.* citans multos dicentes, quod in confiscatione non veniunt bona prohibita alienari. Vnde talis venditio possessionum fuit nulla, vt pote contra legem facta: vnde aduerto posse has Moniales multum iuari ad recuperandas prædictas possessiones per priuilegium concessum à Ioanne 22 Fratribus Ordinis Mōris Oliueti relatum à Rodrig. *tom. 3. qq. Regular. q. 56. art. 2. §. His tamen:* per quod illis concessit quod possint habere restitutionem in integrum circa læsionem factam in bonis suis Conuentuum, siue facta fuerit læsio per prælatum Conuentus, eiusque culpa, siue culpa procuratoris Conuentus, siue culpa cuiuscunque personæ sæcularis cuiuscunque sit dignitatis.

§ Ad primum argumentum in oppositum dicendum est, quod licet testatores in suis testamentis solis Monialibus hanc missarum obligationem imposuerint, & non aliis, est, quia supposuerunt illas possessiones nunquam fore alienandas, sicut in testamento mandarunt. Dato autem quod siue male, siue bene sint alienatæ, standū est illis iuribus citatis dicentibus quod res transeat cum onere suo, sicut transeunt res confiscatæ. Ad id quod addit argumentum non debere Moniales reportare lucrum ex sua culpa in non soluendo præterita debita, dico, quod Moniales non soluere obligationem Missarum, quam non debent, non est lucrari aliquid, sed vt plurimum est non amittere, & non obligari ad

ri ad id quod non debet. Nemo autem ob culpam qualemcunque obligandus est ad id quod non debet. Ad secundum argumētum dicendum est exemplum venditoris non facere contra nos, quia conuentus Monialium non vendidit has possessiones, vt diximus, sed solum per ministros iustitiæ venditæ sunt, inuito ferè Conuentu: & quando Conuentus illas amisit inuitus, non tenebatur adhibere illam monitionem, vel protestationem: sicut illam non tenetur hæreticus facere quando sibi inuito bona per fiscum auferuntur: cum post confiscationem actio pro debitis non sit mouenda contra confiscatum, sed contra fiscum, vt supra diximus ex Sanch. Sub censura, &c.

---

#### CASVS XLIV.

*De quodam adulterio putato, & dinortio: & obligatione denunciandi propter edictum.*

**Q**Vædam nupsit viro cuidam bona fide, cum neuter putaret subesse impedimentum. Illa tamen quando nupsit non habebat annos duodecim requisiti ad validitatem matrimonij. Progressu temporis, illa commisit clarum adulterium cum altero viro. proprius vir illam multis vulneribus fauciauit, & putans illam manere mortuam, aufugit. Conualecente illa ex vulneribus, ille iterū accusauit illam propter adulterium. Illa confugit ad iudicem Ecclesiasticum coram quo probauit delictum suum non fuisse adulterium, eo quod, quādo illa nupsit non habebat annos duodecim; idque probauit coram iudice, & proinde non fuisse

adulterium cum matrimonium fuerit nullum. Iudex Ecclesiasticus protulit sententiam diuortij inter vtrumque, declarans matrimonium fuisse nullum, & proinde posse vtrumque cui vellet nubere. Quo obtento illa accusauit illum quod durante putato matrimonio dissipasset dotem suam, pro quo fecit illum carcerari carcere publico, allegans quod dato quod matrimonium fuerit nullum reddenda sibi esset sua dos integra. Ille durante hoc litigio sumpsit certas res pretiosas aureas, & argenteas, quas sub pignore cuidam Petro tradidit, vt sub illis pignoribus sibi commodaret centum aureos, quæ pignora tradidit in secreto, & præsumitur dicta pignora allata fuisse à fæmina inter dotem. Fæmina impetrauit ab Episcopo excommunicationem, per quam obligauit sub censura, vt quicumque sciret de prædictis rebus ablatis, denunciaret intra paucos dies.

Multa ex prædicto casu orta sunt dubia. Primum an prædicta fæminæ fornicatio, fuerit verum adulterium: & per hoc adulterium amiserit dotem marito acquirendam?

Secundum, si, dato quod dotem non amiserit, Petrus detinens pignora prædicto modo apud se à viro deposita, teneatur denunciare iudici Ecclesiastico de pignoribus sibi à viro commendatis, si sciat, & timeat se amissurum esse centum aureos quos sub pignoribus viro putato commodauit, cum ille modo carceratus sit & pauper?

Tertium, dato quod non teneatur denunciare cum tanto damno, cui reddere debeat prædicta pignora: an viro qui dedit, an fæminæ cuius erant, an vero sibi retinere possit in compensationem?

Ad primum dubium dico fornicationem illam fæminæ habitam durante matrimonio putato, fuisse  
Theo-

Theologicè, & formaliter verum adulterium quoad malitiam, licet materialiter tale non fuerit cum in rei veritate illa non esset vera coniux. Quod autem formaliter, quoad malitiam fuerit adulterium, & in specie adulterij reponendum, probatur ex communi Doctorum sententia, quod sola intentio operantis facit suum actum, & proinde peccatum reponi in certa specie, vt si credebam me rapere rem alienam, cum re vera non esset, sed mea, furtum formaliter commisi ex mala intentione: & sic de multis aliis exemplis apud Theologos. Et vltra Theologos habetur in cap. *Cum voluntate de sententia excommun.* vbi sic dicitur. *Cum voluntate, ac proposito maleficia distinguantur, &c.* Vbi glossa plura citat, & addit. At ista fœmina voluntate, & proposito voluit committere adulterium cum se vere vxorem putaret. Quod vero attinet ad secundam partem eiusdem primi dubij, dico per leges huius Regni lib. 5. *Ordinat. titulo 38. §. 2.* Maritus non acquirit dotem vxoris adulteræ, nisi quando illam actu in adulterio deprehensam ibidem occidit. Vel si illam post delictum accusat de adulterio, & probato crimine sibi dos per sententiam adiudicatur. Sed iuxta sacros canones hæc mulier amisit dotem. Sic tenet glossa capitis *plerumque, de donat. Inter virum, & vxorem.* In verbo, *Repetere non valebit*, vbi ponit casum in fœmina, quæ reputatur vere nupta, quæ peccauit cum homine diuerso à putato marito: & postea accusata à viro putato, inuentum est fuisse matrimonium nullum, eo quod illa esset consanguinea viri sui, qui est casus omninò similis huic nostro. Et ibi citata glossa cum aliis textibus quos citat ait quod talis mulier dotem amisit. Idem tenet Panormitanus ad citatum caput *Plerumque*, vbi citat Innocentium, Hostiensensem, Gosedr. & Ioannem Andr.

Andr. qui sunt grauiores inter Canonistas. Et clare colligitur ex verbis citati capituli *Plerumque*, vbi Papa ait. Quod si mulier causa fornicationis à viro separata fuerit, dotem amittat. Non ait, ob adulterium, sed ob fornicationem. Hæc autem fuit separata à viro propter fornicationem. Quod tamen intelligo, vt semper post delictum sit necessaria sententia iudicis Ecclesiastici, quæ declaret crimen, & condemnet in dote. Quod si non est factum in isto casu, fuit, quia à iudice Ecclesiastico non fuit petitum, nisi declaratio validitatis matrimonij.

2 Ad secundum dubium dico, Petrum habentem pignora non teneri denunciare de pignoribus sibi commendatis cum tali periculo. Est enim communis Doctorum opinio, quod nemo tenetur denunciare, si ex denunciatione resultare sibi debet damnum notabile. Sic tenet Corduba in *sum. quest.* 63. & 64. Sayro in *Clau. Reg. lib. 2. cap. 14. num. 32.* vbi citat plures alios. Riccius *tom. 1. Decis. Collectan* 995. & alij communiter. At constat, quod si Petrus denunciaret de pignoribus, iudex iubebit illa reddere mulieri, & Petrus non poterit recuperare suam pecuniam à viro putatio, carcerato, & paupere. Et aduertit Sayro *cit. loco*, quod in hoc casu, quando ex denunciatione mihi resultabit damnum notabile, si ego vocatus fuero à iudice pro testimonio ferendo in illo casu, exhibitoque iuramento, posse me negare, ac dicere, me de casu nihil scire, subintelligendo apud me: quod non sciò ita vt tenear reuelare. Quia iudex in tali casu non potest obligare vt veritas reueletur cum tanto damno proprio.

3 Tertium dubium multas petit responsiones. Et primo dico, quod si vir, qui dedit pignora, non mihi poterit reddere 100. aureos, quos sub pignoribus commodaui,

modavit, non teneor illi pignora reddere, quia non teneor amittere centum aureos: & ob eandem causam non tenebor pignora reddere mulieri, cum amissione meæ pecuniæ. Hic tamen casus decidi debet per alium casum, quotidianum tractatum à Doctoribus in materia restitutionis, quando quærent, an is qui bona fide emit rem à latrone, & postea novit rem illam esse Ioannis: an possim rem donare latroni petendo pretium, quod illi dederam, an verò teneatur rem donare Ioanni vero domino, etiam si sciam me pecuniam meam amissurum? In quo duæ sunt opiniones.

4 Prima asserit teneri me reddere rem Ioanni vero domino, non latroni, etiam si sciam me pecuniam meam amissurum. Secunda opinio fauorabilior in quam magis inclino, dicit posse me reddere rem latroni ut mihi reddat pecuniam meam, etiam si sciam illum non esse redditurum vero domino, si aliter non possum pecuniam meam recuperare. Hanc opinionem tenet Rabel. *tom. de iust. 1. p. lib. 2. qu. 9. num. 3. concl. 1.* pro qua citat Altiziodor. Alexandr. Alensem, Sylu. Antonin. Nauar. Tabienam Lopez, & alios, cum quibus poterit quietari conscientia, & adducit claras rationes pro illa: præcipua est, quia neque ex obligatione iustitiæ, & charitatis teneor saluare rem alienam, reddendo illam vero domino, cum amissione magnæ pecuniæ meæ. Cum ergo in hoc casu, si reddā pignora femine cuius suppono esse, sim pecuniam meam amissurus. Si item restituam pignora viro putatiuo, qui est carceratus, & pauper, & mihi restituere pecuniam meam non valet, illamque proinde amittam; sequitur quod illa pignora potero retinere per modum compensationis: dummodo restituam illud quod dicta pignora plus valent quam pecunia, quam ego dederam

com-

commodatam sub pignoribus. Compensatio enim fieri debet seruata iustitia, vt scilicet compensans non plusumat de re aliena, quam sit illud quod sibi debebatur. Aliàs compensatio esset iniusta, & proinde furtum committeretur. Est autem hæc restitutio excessus valoris pignorum facienda illi, de quo constabit esse verum dominum talium pignorum; siue sint scæminæ eo quod pertinuerint ad dotem suam, siue sint viri, eo quod ad illum iusto aliquo titulo pertinuerint. Quod non dico sine causa, potest enim maritus pignorare bona mobilia ex dote vxoris ad faciendas expensas pro sua iusta defensione, quando ipse maritus non habet aliquid vt se defendat, sicut inter alios tenet Riccius *10m. 1. Decis. Collect. 1245. & 1974. & alij.*

## CASVS XLV.

*De quadam dote, & donatione facta à parentibus cuidam filia.*

**Q**uidam vir, & vxor illius habebant filiam legitimam, & vnicam tantum, quam matrimonio iunxerunt cuidam adolescenti: quibus sic matrimonio iunctis dotem constituerunt in hunc modum. Donamus, & in dotem constituimus futuris nuptis omnia nostra bona mobilia, & immobilia, donaria aurea, & argentea quæ hodie habemus, & possidemus, & in posterum habebimus, & acquisuerimus, siue per donationem nobis factam, siue per hæreditatem, siue per Regis liberalitatem, & remunerationem (habebat vir enim ius ad Regis munera ob multa obsequia Regi præstita) siue quocunque alio titulo acquirenda, &c.

Mortua

Mortua est vxor dotatrix: mortuus est etiam gener vtriusque, & mansit filia legitima vidua cum aliquibus filiis, & sustentatur redditibus, & possessionibus sibi relictis à marito, quæ sunt sufficientes, & viuit iuxta patrem suum viduum in domo separata, sed habente eandem portam communem patris. Pater viuit in domo alia vicina, & domi secum habet aliam filiam illegitimam, & naturalem, sibi gratam & beneficam, cui committit administrationem liberam suorum reddituum, qui ampli sunt. Et eadem filia naturalis ultra hanc administrationem habet peculium profectitium sufficiens ad suam sustentationem. Et eadem filia naturalis expendit redditus paternos in sustentanda domo paterna, & residua seruat sibi.

Quæsitum est primo. An pater possit donare huic filiæ naturali, & illegitimæ, vel cuicunque alteri id quod superest ex suis redditibus, non obstante rigoroſa illa donatione, & dotatione facta filiæ legitimæ: an vero teneatur residuum dare filiæ legitimæ? Quod pendet ex eo, an iste pater licet fecerit illam donationem amplam, sit nihilominus dominus fructuum omnium istarum rerum donatarum, ita vt possit hos fructus donare cui voluerit.

Secundo quæritur, an illa filia naturalis, cui pater commisit omnium reddituum suorum administrationem, possit sibi reseruare id quod superest ex congrua domus paternæ sustentatione.

Pro responsione suppono primo ex Iulio Claro *lib. 4. sue praxis §. Donatio. quest. 19. num. 7.* & aliis, donationem omnium bonorum præsentium, & futurorum, non esse validam nisi fiat causa mortis, esse vero inuàlidam si fiat inter viuos. Ratio huius discriminis est, quia cum donatio inter viuos statim transferat dominium



nium rei donatæ in donatarium, non permittunt leges vt aliquis in vita sua omnia det nudus inanens absque remedio vnde sustentetur, & absque re vlla de qua possit testari in morte: talis autem donatio qua aliquis sic omnia donat inter viuos statim transfert dominiũ omnium rerum in donatarium. Si vero donatio omnium bonorum præsentium, & futurorum fiat causa mortis, licita est; quia talis donatio non transfert statim dominium rerum donatarum in donatarium, sed tale dominium promittit dandum post mortem: & interim taliter donans causa mortis, manet cum dominio, & vsumfructu bonorum suorum. Hanc etiam doctrinam tradit Rabello cum aliis quos citat *tom. de obligat. iust. lib. 18. q. 12. num. 1.* Cum ergo ista donatio, de qua quæritur, fuerit donatio omnium bonorum, vt constat, ad hoc vt valida sit, oportet vt non sit donatio inter viuos, per quam donans à se transtulerit statim dominium omnium bonorum in filiam legitimam & generum: sed oportet vt sit donatio causa mortis, per quam donans manserit cum dominio, & vsumfructu bonorum suorum, cum obligatione tamen dandi in hora mortis dictæ filiæ legitimæ omnia bona tunc extantia.

2. Secundo noto, & suppono in re quapiam esse tria hæc distincta: dominium rei: vsumfructum rei: & simplicem vsum rei: dominium rei habet ille qui est dominus rei absolutus, ita vt possit illam dare, alienare transferendo à se dominium in alium, sicut habet quilibet in oue sua. Vsumfructum tantum rei habet ille, qui non est dominus rei, habet tamen dominium supra fructus istius rei, vt illos possit comedere, & libere donare. Huiusmodi est pater circa bona castrensia filij impuberis, quorum non habet dominium, habet tamen

men vsum fructum, & habet ius donandi, & expendendi fructus illius peculij, dum filius impubes est. Tertio simplex tantum vsus dicitur, quando quis neque habet dominium rei, vt possit illam alienare, neque habet vsumfructum liberum, cum fructus rei non possit liberè donare, vel administrare, sed habet solum vsum simplicem rei, vt possit tantum illa vti pro necessitatibus præcisiss. Huiusmodi simplicem vsum tantum, habet seruus in veste, vel alia re notabili sibi à domino data, & eundem solum simplicem vsum habet Frater Minorita in sua veste, & similibus. Seruus enim non habet dominium vestis suæ, neque item vsumfructum liberum illius, cum non possit illam concedere vt alius illa vtatur: sed solum habet vsum nudum, & simplicem, vt illa veste vti possit ad suam tantum necessitatem subleuandam.

3 Hoc posito cum istud dubium non proponatur hodie pro foro externo litigioso, sed solum pro foro conscientie quietandæ. Prima responsio est, quod ipse pater donans resipiscere debet ad intentionem quam habuit tempore donationis, & per illam intentionem debet regulare id quod hodie potest: nam iuxta Aristotelem receptum à Iuristis, Actus agentium non extenduntur ultra intentionem illorum & proinde si recordatur quod tempore donationis habuit intentionem, quod de fructibus bonorum suorum nihil omnino daret alteri, quam filia, hoc tenetur hodie seruare. Si vero non recordetur clare, quod expresse tunc illam rigorosam intentionem habuerit; explicanda est donatio, seu promissio, quod facta fuerit modo consueto; ita scilicet vt ipse in vita maneret saltem vsumfructuarius suorum bonorum, videlicet habens liberam administrationem fructuum bonorum suorum, ita vt de illis fru-

etibus donare posset cui vellet. Neque enim cogitandum est de homine nobili, diuite, & viuento in sæculo, quod in illa donatione voluerit manere cum simplici tantum usu bonorum suorum, sicut est seruus, aut Frater Minor qui de rebus, quibus vtuntur, nihil omnino possunt dare. Ac proinde poterit talis donator sicut usufructuarius de fructibus bonorum suorum dare cui voluerit. Secundo probatur, quia hæc donatio fuit donatio causa mortis, vt sup. diximus.

4<sup>a</sup> Sed in hac donatione non transit statim dominium rei in donatarium, vt probat Rabel. cit. loco : ergo nec transit usufructus, sed manet usufructus apud donantem vsque ad mortem, & proinde ex fructibus rerum suarum facere poterit quod voluerit, & confirmatur exemplo, nam Episcopus non est dominus sui beneficii, neque item beneficiarius est dominus sui beneficii: & tamen vterque est liber administrator fructuum suorum beneficiorum, adeo vt de fructibus beneficiorum donent libere, saltem ad opera pia, imò & de illis redditibus maioratus instituunt, & testantur, vt praxis in Hispania obseruat nullo prælato prohibente: ergo licet iste donator, de quo agimus, per illam donationem transtulisset statim dominium bonorum suorum in filiam donatariam cum tamen adhuc maneat usufructuarius bonorum suorum, & fructuum administrationem habeat, poterit de illis, seu de redditibus suis donare in vita cui voluerit. Vltimo probatur, quia in verbis cit. huius donationis non exprimitur, neque ex illis clare colligitur, donatorem obligasse se ad nihil donandum in vita cui voluerit de fructibus bonorum suorum. Hoc tamen monuerim non posse hunc donatorem de industria ita prodige dispensare fructus bonorum suorum vt nihil de illis postea ad filiam legitimam

nam perueniat. Hoc enim iam esset fraus ac dolus qui nulli debet patrocinari, & peccaret in hoc mortaliter iste pater.

§ Ad secundum quæsitum facilis est responsio. Nam si filia naturalis habet expressam licentiam patris, ut superflua de expensis anni sibi reseruet; non est dubium quin possit id facere cum pater possit donare de his fructibus, ut supra vidimus, maxime cum donet filiæ, & filiæ in obsequio continuo patris manenti, & quæ per mortem patris non potest esse hæres, sicut alia legitima cui manent omnes possessiones patris reseruatæ. Sufficere etiam poterit ad id licentia patris tacita, collecta ex circumstantiis quæ indicent patris claram intentionem esse ut filia naturalis illa residua sibi seruet; ut quia pater illam impense diligit: quia numquam ab illa exigit ratiocinium expensarum, quia illi vult remunerare continuum obsequium in patris cura impensum: & similes circumstantiæ, quibus concurrentibus, locum habet illa regula Iuristarum, quod licentia tacita habetur pro expressa, ut dicitur in l. Cum quid ff. de reb. cred. & colligitur ex cap. 2. de rescriptis, & Doctores concedunt communiter. Sub censura &c.

## C A S V S XLVI.

*De quodam voto conditionato eundi Ierusalem.*

Q Vidam vir nobilis, & sexagenarius existens in actuali conflictu belli, sic vouit. Si me Deus eripuerit ex hoc periculo promitto ire Ierusalem. Euasit ex periculo. Postea quæsiuit an secum posset dispensa-

ligiosus dispensare in his votis conditionalibus , non solum ante impletam conditionem , sed etiam post illam impletam. Vide etiam Vegam Minimum 2. p. sum. verbo *votum, casu* 10. ubi ait quod per Bullam Cruciatam possunt etiam hæc vota conditionalia commutari in fauorem Cruciatæ. Idem tenent hi Doctores posse Episcopum dispensare in his quinque votis, quando sunt pœnalia, ob rationem supra datam à Sanchez.

3 Ex alia etiam via facilius dispensabitur cū hoc homine , quia scilicet est senex sexagenarius : tales enim non tenentur ire Romam etiam ob percussione[m] clerici : de quo Sanchez 7. de matrimonio disp. 3 2. num. 16. Reginald. tom. 1. in *Appendice de excommunicat. lib. 1. num. 250*. Sub censura Eccles. & Doctorum.

## C A S V S XLVII.

*An Clerici possint negotiari saltem per alium.*

R Ex Catholicus per epistolam particularem anno 1629. petiit à quodam Capitulo diœcesano Canonicorum , vt vellet pro rata portionum singulorum Canonicorum inire societatem cum certis mercatoribus in negotio mercantili, vt ex lucro resultante infermeretur pecunia in expensis pro bello inferendo hæreticis Hispaniam infestantibus, & pro Catholica fide defendenda. Capitulum à singulis Conuentibus Religiosorum illius ciuitatis petiuit consilium , an possent ipsi Canonici Clerici exercere illam negotiationem per mercatores ad illum pium finem. Secundò quasiuit capitulum diœcesanum , an, dato quod maior pars

Canonicorum in Capitulo consentiret, quod Canonici inirent illam societatem mercaturæ, illi Canonici, qui nõ consenserunt deberent exponere partem suorum reddituum periculis illius negotiationis, seu mercaturæ.

Et quidem pro primo quæsito videtur res valdè pia, & proinde licita, quòd Canonici Clerici sine peccato possint inire illam societatem negotiationis. Nam si Clericis licitum est in bello iusto hortari Catholicos in bello, vt fortiter pugnent contra hostes fidei absque peccato & absque periculo incurrendæ irregularitatis, vt suppono clarum ex communi Doctorum opinione: à fortiori videbitur licitum vt Clerici cum sua pecunia possint per alios negotiationem exercere, vt ex lucro societatis possit bellum inferri hæreticis, & hostibus Ecclesiæ pro fide catholica defendenda.

Ego ad primum quæsitum respondi primo, rem esse notissimam in generali. Clericis prohibitam esse negotiationem lucrativam sub penis grauissimis in iure canonico. Quas pœnas, & prohibitiones, qui videre voluerit, legat Salzedo in sua *praxi criminali Ecclesiastica cap. 55.* cum additionibus commentatoris. Citat etiam hæc capita Iuris Canonici clericis interdicentia negotiationem, Ludoicus Beia in suis *Respons. Moral. 3. p. casu 36. parlo post initium fol. 377. col. 2. pag. 1.* Respondi secundo, quòd non obstantibus illis prohibitionibus Iuris Canonici, graues, & recentiores Doctores tenent non peccare mortaliter Clericos exercentes negotiationem mercaturæ, si id faciant non per se, sed per alios Hos. citat Salzedo *citato cap. 55. dictæ praxis,* & tenet Lessius *lib. 2. de inst. cap. 21. dub. 1. num. 6.* Beia *citato casu 36. & Molina tract. 2. de inst. disp. 342. §. Vtrum autem,* citans Medinam, ait se non condemnare hanc opinionem de peccato mortali. Et idem ego dico. Opposita

posita tamen opinio quòd scilicet non sit licitum Clericis negotiari per alios asseritur à glossa Clementinæ primæ *de vita & honest. clericorum* in verbo, *publicè, & personaliter* : ubi ponit hæc verba de Clerico negotiante. *Si ergo occultè, vel per alium hoc exercetur, cessat pœna, licet non culpa.* Idem tenet Salz. citato cap. 55. §. *Sed utrum in fine.* Et Molina citato loco licet dicat se non damnare peccati opinionem affirm. ait tamen quòd clericum negotiari per alium habet aliquid scditiatis, & indecentiæ ratione status. Ego illam probo ex illa Regula iuris 72. in 6. quæ dicit. *Qui facit per alium est perinde ac si faciat per se ipsum.* Quo nihil clarius ad intentum dici potest. Si enim Clericus per alios negotietur, idem est ac si per se ipsum negotietur. Et quantacumque diligentia per alios adhibeatur, semper manet periculum negotiandi in materia illicita, peccaminosa, vel saltem dubia, quod non decet statum clericalem.

Secundo ad hoc ipsum primum quæsitum dico, quod licet Clerici possent negotiari per alium, idque verum esset de quouis clerico particulari, considerandum est quod aliqua licent, sed non expediunt, ut mox dicemus ex Diuo Paulo. Non enim poterit videri decens, & expediens, & conueniens nobilissimo Capitulo diœcesano per alios mercaturam exercere, habet enim hoc indecentiam, & scditiatem, etiam in clerico particulari, ut dixit Molina citatus; & multò magis erit indecens in Capitulo diœcesano clericorum, & Canonicorum. Facit ad hoc dictum D. Pauli. 1. ad Corinth. cap. 6 & cap. 10. *Omnia mihi licent, sed non omnia expediunt, & iterum omnia mihi licent, sed non omnia edificant.* Quod Pauli dictum D. Bernard. commendat Papæ Eugenio lib. 3. *de considerat.* dicens: prudenter spectandum esse in singulis, quid liceat, quid deceat, quid

expediat. Neque obstat, quòd ista negotiatio, & mercatura inseruiat ad sumenda arma contra hostes Ecclesiæ, & pro defendenda Ecclesia. Nam arma clericorum non sunt ferrea, non pecuniæ, non negotiatio, sed sunt orationes, Psalmi, & vigiliæ, iuxta illud eiusdem Pauli dictum propriè de Ecclesiasticis 2. ad Cor. 10. *Arma militia nostra non carnalia sunt, sed potentia Dei ad destructionemmunitionum.* Et Illud Ioel. 2. *Inter vestibulum, & altare plorabunt Sacerdotes ministri Domini, & dicent. Parce Domine, parce populo tuo.* & iuxta Illud Psalm. 19. *Hi in curribus, & hi in equis, nos autem in nomine Dei nostri inuocabimus.* Sæcularibus enim ducibus conuenit bellare pro Ecclesia Dei in curribus, & in equis. Sacerdotes verò bellant inuocando nomen Domini in choro, & orationibus.

Secundum quæsitum maiorem habet difficultatem, an scilicet, dato, quod in capitulo maior pars canonicorum consentiat, quod capitulum ineat prædictam negotiationem mercaturæ pro dicto intento applicando pro rata de singulis portionibus canonicorum, in tali casu illi canonici qui non consenserunt teneantur etiam pro rata contribuere ad dictam negotiationem de portionibus suorum reddituum. Pars affirmatiua, quod scilicet ad id teneantur, videtur probari ex toto titulo de his quæ fiunt à maiori parte capituli *in decretalibus*, maxime in cap. 1. & 4. ubi dicitur, quod prælatus cum maiori parte capituli potest contradicente minori parte quod visum fuerit pro fabrica Ecclesiæ, &c.

Quo non obstante, dico quòd in tali casu pauciores canonici recusantes, non tenentur de suis portionibus contribuere ad prædictam societatem negotiationis. Ante huius probationem præmitto ex gloss. communiter recepta in cap. *Cum omnes. de consist.* quod duobus modis



modis aliquid potest pertinere ad collegium, seu collegiales plures collegialiter congregatos. Primo cum pertinet ad illos tanquam ad vniuersos, non tanquam ad singulos. Sic pertinet ad Canonicos cum Episcopo disponere de possessionibus immobilibus Ecclesie, an possint vendi &c. & sic pertinet ad canonicos vt vniuersos disponere de rebus aliis comunib<sup>9</sup> Ecclesie in quibus singuli canonici non habent singularem vsum, vel particulare interesse. Alio modo pertinet aliquid ad Canonicos, vel collegiales non tanquam ad vniuersos sed tanquam ad singulos, quia scilicet singuli in re tali habent singularem, & particularem vsum, & interesse: huiusmodi sunt redditus prębendę canonicatus. Hi enim redditus prębendarum non pertinent ad omnes tanquam ad vniuersos, non enim insumuntur hi redditus in bono communi canonicorum, sed vnusquisque canonicus expendit suos proprios redditus in suo bono particulari. Et proinde redditus prębendarum canonicorum pertinent ad omnes canonicos non tanquam ad vniuersos, sed tanquam ad singulos: singuli enim canonici habent singulare ius, & singularem vsum ad proprium redditum suę prębendę, quod ius non habet alius canonicus. Hoc posito ait cit. glossa cum multis textibus ibi citatis, quod quando aliquid pertinet ad omnes collegiales tanquam ad vniuersos, sufficit vt consentiat maior pars capituli, vt factum reneat, & omnes obligentur. At quando aliquid pertinet ad omnes tanquam ad singulos, non sufficit quod maior pars consentiat, sed requiritur, quod omnes & singuli consentiant, alias factum non valebit saltem quoad singulos. Adhuc exemplum clarius istius secundę partis dari potest in materia electionis. Pręcipitur in cap. Quia propter de electione, vt cum electio facien-

da est vocentur omnes electores nullo omisso, quia ad omnes pertinet electio. Ad quem locum omnes Iuristæ exponunt quodd si in electione vnus tantum elector non vocetur, electio potest ab eo non vocato postea annullari. Cuius ratio est, quia eligere in illa electione pertinet ad omnes electores non solum quoad vniuersos, sed etiam quoad singulos. Singuli enim habent ius eligendi, & singuli habent ius vt vocentur, & ad singulos pertinet habere bonum Prælatum: ac proinde si vnus tantum non vocetur, tota electio poterit ab isto annullari, quia electio pertinet ad singulos. Eodem modo expendere, & colligere redditus annuales cuiusque præbendæ, seu canonicatus pertinet ad omnes canonicos, non tanquam ad vniuersos, sed tanquam ad singulos, vt patet ex dictis. Ac proinde si vnus vel pauci non consentiant in insumptione reddituum suæ præbendæ, factum non tenebit quoad istum recusantem. Confirmantur hæc tenus dicta ex eo quod pensio non potest constitui in beneficio à capitulo sede vacante, imò nec ab ipso Episcopo in beneficiis, quæ sunt suæ collationis, vt inter alios tenet Azor *tom. 2. moral. lib. 8. cap. 6. quest. 1.* & probat clarè ex cap. *si quis præb. 1. quest. 3.* & cap. *Maiores*, & cap. *Vacante*, & aliis ibi citatis, per quæ mandatur, vt beneficia sine diminutione conferantur. Cum ergo nec Capitulum, neque Episcopus possint beneficia quoad redditus minuere, sequitur quod non poterit beneficiarium obligare, vt de suis redditibus conferat certum quid ad talem negotiationem mercaturæ. Maximè cum dubium sit ob prædicta an possit clericus per alios hanc negotiationem exercere. Et præterea per hanc negotiationem possit pecuniam suam exponere periculo illam amittendi, vt sæpè contingit in ista negotiatione mercaturæ.

caturæ

caturæ: ad quod ipse inuitus non tenetur. Sub censura Ecclesiæ, & Doctorum. Et mihi constat quod hæc pars apud citatum capitulum in utroque puncto præualuit.

---

## C A S V S XLVIII.

*Dubia quædam circa electiones cuiusdam Capituli.*

**Q**Uædam congregatio Religiosa à Sede Apostolica approbata habens Prælatum generalem, & multos prælatos locales, habet consuetudinem ab annis centum quinquaginta quod electio sui Prælati generalis, & prælatorum localium fiat hoc modo: ut scilicet singuli professi singulorum Conuentuum tempore capituli mittant suum suffragium secretum obsignatum ad capitulum, in quo declarent se eligere in Prælatum generalem fullanum, & in talem prælatum localem fullanum, & sic in singulos prælatos locales fullanum, & fullanum omnes in singulari nominando. Quibus omnibus & singulis suffragiis in capitulo examinatis, & perpenſis, declarantur electiones Prælati generalis, & locales, non expectata alia electione. Et ultra prædictam consuetudinem centum quinquaginta annorum; habet dicta congregatio duas Bullas Apostolicas Pontificum recentiorum, confirmantes eandem consuetudinem. Additur & præcipitur in eisdem Bullis, ut electiones in dicta congregatione nullo modo fiant facta prius aliqua nominatione, seu designatione personarum: sed suffragia singulorum dentur libere  
secun-

secundum Deum , impositis grauibz pœnis secus facientibus , & præterea quod electiones factæ non seruata illa forma, & consuetudine in prædicta electione, sint nullæ, & nullum robur obtineant.

Hoc posito, quidam Prælatus generalis, & Visitator generalis illius congregationis tempore visitationis ante capitulum, destinarunt quatuor Patres ex grauioribus eiusdem congregationis, quasi compromissarios totius congregationis pro electione futura: de quorum quatuor, ac de duorum Prælatorum generalium mandato, scriptum est ad singulos prælatos locales, vt in suis Conuentibus monerent singulos Religiosos vt in suis suffragiis secretis ad capitulum mittendis, suffragium darent pro generali Prælato, fullano nominatim illum designando: & pro singulis prælatis localibus assignauerunt singulos nominatim & expresse, quos singuli electores deberent nominare in suo suffragio secreto: Addentes in suo mandato, quod talis ordo in electionibus futuri capituli foret retinendus. Hoc posito quæsitum est, quid sentiendum sit de tali mandato, siue decreto. Ego circa tale decretum, seu mandatum dico sequentia.

Primo, Quod duo dicti Prælati generales non potuerunt facere quatuor compromissarios, qui nominarent omnes prælatos eligendos in capit seq. Probo clare: Cum enim Papa per duas Bullas expresse iubeat, vt in electionibus istius congregationis fiant electiones per vota secreta singulorum Religiosorum totius congregationis missa ad capitulum, quæ est electio per secretum Scrutinium assignata in cap. *quia propter. de electio.* non possunt Prælati Ordinis hanc formam secreti Scrutiniij mutare, & facere electiones per compromissarios. Probatur clare, quia Papa in duabus Bullis approbat

probat solum, & iubet fieri electiones in hac congregatione per formam Scrutinijs secreti, & per vota singulorum Fratrum totius congregationis secreta: ergo inferiores praelati non possunt hanc formam immutare, faciendo electiones per compromissarios. Nam licet in cap. *quia propter, de elect.* concedat Papa duas vel tres formas ad faciendam electionem, per Scrutinium scilicet secretum, quæ est ibi prima forma, vel per compromissarios, quæ est ibi secunda forma assignata: loquitur ibi per particulam disiunctivam, Vel, Aut, Seu, & sic relinquit in voluntate electorum, quam formam sequi voluerint. At in istis duabus Bullis istius congregationis Papa non loquitur per particulam disiunctivam, nec relinquit in arbitrio electorum an velint eligere per compromissionem, an per Scrutinium secretum, sed determinat expresse quod fiat electio omnium Prælatorum Congregationis per Scrutinium secretum, & suffragia secreta omnium, & singulorum Fratrum totius Congregationis. Vnde non manet in arbitrio Prælatorum Congregationis facere electionem per secundam formam compromissionis. Et facit ad hoc dictum Iuristarum, quod expressum in lege facit cessare præsumptum. De quo Brunor verb. *leges num.* 18. in suis locis communibus, & verb. *Masculus num.* 3. & citat tex. & Doctores dicentes quod inclusio unius, est exclusio alterius. Videatur etiam optime ad idem intentum Sylvester. 2. part. verb. *statutum quest.* 3. ubi citat legem civilem dicentem; quod id quod in lege omissum est, pro omisso haberi debet. At Papa in duabus Bullis istius congregationis pro electione Prælatorum facienda solum facit mentionem de electione secreta per suffragia singulorum Fratrum: ergo in illa non habebit locum electio per Compromissarios, quæ

quæ est diuersa nimis ab electione per Scrutinium secretum.

Secundo dico, in eligendis his quatuor Compromissariis interuenisse errorem iuris, seu contra ius: nam dato, quod eligi possent compromissarij, isti compromissarij non poterant eligi à solo Visitatore, & Prælato generali istius Congregationis, sed debuerunt eligi à singulis Religiosis totius Congregationis, qui sunt electores in omnibus electionibus istius capituli. Probatur clarè ex cap. *quia propter de elect.* vbi cum prius dixisset quod pro electione facienda vocentur omnes electores, & sint præsentes, tunc assignat illis primam formam eligendi per scrutinium secretum. Deinde ait quod si noluerint eligere per scrutinium secretum, eligant (omnes scilicet, quos prius vocari iussit) per Compromissarios: vbi clarè supponit electionem per Compromissarios faciendam esse ab illis omnibus qui solent eligere per Scrutinium secretum. Ad hoc enim facit directe *Regula iuris in 6.* Quod omnes tangit, ab omnibus debet approbari. Eligere enim prælatus per Compromissarios pertinet ad bonum commune omnium electorum, & proinde ad eligendos Compromissarios, omnes electores debent vocari sicut vocantur ad eligendum per Scrutinium secretum. Et hoc in terminis practicatur in Ordine Patris Nostri Francisci, in cuius capitulis Prouincialibus primo omnes electores præsentes eligunt solum Prouincialem per formam Scrutinij secreti, quæ est prima forma assignata in citato capite. *Quia propter de electione.* Deinde illi omnes electores Capituli eligunt quatuor Diffinitores, qui sunt Compromissarij in quos totum Capitulum compromittit; vt ipsi soli postea eligant prælatos locales, qui sunt Guardiani.

Tertio

Tertio dico. In his electionibus clarè violatas fuisse duas illas Bullas Pontificias expresse veritates nē in electionibus istius Congregationis præcedat aliqua nominatio, vel præsentatio alicuius designatæ personæ, & quodd secus factum, sit irritum, & nullum, ut patet clarissimè in textu Bullarum. At prædicti prælati, & quatuor Compromissarii scribentes ad prælatos locales ante capitulum, nominarunt, ac designarunt particulares personas seu patres pro singulis officiis, & prælaturis eligendos. Et proinde citatæ Bullæ Pontificiæ clare violatæ sunt. Quæ de causa in hoc puncto non est necesse plura adducere.

Ultimo dico in hac nominatione, ac designatione illorum quos eligere deberent singuli electores Conuentuum, clare violatum est ius naturale, & Canonicum dicentia, quod electio debet esse libera, & sine coarctatione ad vnum duos, vel tres. Hi vero patres Compromissarii coarctarunt electiones omnes faciendas ad vnum tantum eligendum, quem vnum solum eligendum nominarunt, & designarunt pro quouis officio, & prælatura. Probo hoc imprimis ex Rodrig. 10. 2. 99. Regul. 9. § 1. vbi postquam art. 10. probauit clare electionem debere esse liberam; in articulo 11. inde probat non posse coarctari electionem ad duos, vel tres, ut scilicet electores eligant solum vnum ex duobus, vel tribus designatis: & ait electionem sic factam, & coarctatam esse nullam ex defectu libertatis. Pro quo dicit se vidisse propriis oculis in Ordine Minorum declarari tanquam nullas electiones duorum, vel trium Goardianorum, qui electi fuerant proponente præside duos, vel tres tantum ex quibus solis eligendus esset quiuus Goardianus. Et citat pro se ibi Doctores. At in ista electione de qua agimus, prædicti Compromissa-

ij modo prohibito electi, assignarunt, & nominarunt pro singulis Prælaturis eligendos, non duos, vel tres, sed vnum tantum quem deberent eligere singuli electores Conuentuum pro singulis prælaturis, quæ coarctatio maior est, videlicet ad vnum tantum, quam illa de qua agit Rodriguez ad duos, vel tres tantum. Tandem probo ratione Theologa, quod quando electio coarctatur ad vnum, non detur libertas requisita ad electionem. Probo ex iis quæ doctè tradit Azor *tom. 1. Moral. lib. 1. cap. 25. quest. 1.* vbi agens de libertate voluntatis nostræ, dicit primo quod electio requirit consultationem rationis circa media conuenientia ad finem. Secundo, quod post consultationem mediorum variorum ad finem, voluntas eligit medium conuenientius, relictis illis mediis, quæ iudicat inutilia. Itaque ad liberam electionem requirit Azor ex Aristotele, quod dentur multa media ad finem, de quibus consultet ratio, & voluntas, & relictis aliquibus eligat vnum: alias non dabitur propriè electio voluntatis. Si enim pro assequendo certo fine, non detur nisi vnum tantum medium, non dicitur ibi voluntas consultare de medio, quod eligat, sed ferè cogitur ad eligendum vnicum illud medium pro illo fine assequendo: & sit exemplum. Ex Olyssipone volo ire in Insulas Tertiarias, non est aliud medium eundi nisi per nauem. Tunc non cōsulto rationem an possim ire pedibus propriis, an vectus equo, curru, vel lectica, quia non datur aliud medium nisi nauigium: & proinde ibi non cadit consultatio, nec electio medij. Eodem modo si mihi in electione facienda proponatur vnus tantum eligendus, ita vt alium non possim eligere: quomodo ibi potest interuenire electio libera? Quomodo possum consultare rationem an iste sit doctus, prudens, virtute prædi-



prædictus: si alium præter hunc non possum eligere? Cum ergo pro singulis Prælati eligendis in electione, de qua agimus, vnus tantum propositus sit eligendus pro singulis prælaturis, clarè constat electiones fore nullas ex defectu libertatis in voluntate.

## CASVS XLIX.

*Explicatur quadam Bulla Martini Quinti circa dispensationem pro dicendis horis canonicis.*

**P**apa Martinus V. in compendio Mendicantium, verbo *Infirmi fratres*, concessit Patribus D. Ieronimi in hunc modum. *Quod fratres S. Ieronimi dum fuerint infirmi, & etiam senes, & valetudinarii, qui tenentur ad horas canonicas, satisfaciant recitando aliquos Psalmos, vel id quod suis confessoribus visum fuerit.* Sic ibi.

Hoc posito, quæsitum fuit an ad vtendum tali priuilegio necessariū sit, quod Religiosus talis Ordinis habeat simul iunctas illas omnes conditiones: videlicet, quod sit infirmus & senex, & valetudinarius, (id est quod sit in conualescentia præteritæ ægritudinis) vel an sufficiat quæuis tantum conditio ex illis assignatis: ita vt sufficiat quod solum sit senex, vel solum quod sit actu ægrotus, vel quod sit solum valetudinarius, seu conualescens ex morbo præterito? Quod vero ad validitatem priuilegij requiratur, quod Religiosus habeat illas omnes conditiones simul iunctas, videtur probari, quia ibi Papa bis ponit particulam, *Et*, copulatiuam. Particula vero copulatiua coniungit dicta, & senten-

tias præcedentes cum sequentibus, vt constat ex praxi Iuristarum, & Latinorum. Secundo probatur, quia priuilegium contra ius commune debet restringi, vt omnes Doctores concedunt: sed hoc priuilegium concedit aliquid contra ius commune, quo Religiosi tenentur dicere horas canonicas: ergo est restringendum vt minus lædat ius commune quam fieri possit: & proinde particula, *Et*, intelligenda est copulatiue, vt iungat simul omnes illas conditiones, sic enim minus lædet ius commune recitandi. Ac proinde vt hoc priuilegium valeat, & Religiosus possit dispensari, debent copulatiue concurrere omnes illæ conditiones: vt sit infirmus, & senex, & valetudinarius.

Quo non obstante dico, ad hoc vt Religiosus dictæ Religionis per hoc priuilegium rite dispensetur, non requiri, vt omnes illæ tres conditiones simul concurrant: sed sufficit quod vna tantum in illo inueniatur, si videlicet solum sit actu infirmus, vel solum senex valde, vel solum valetudinarius. Probo primo hæc ratione Theologica, & Iuridica: Nam si omnes illæ conditiones simul deberent concurrere, vt Religiosus posset dispensari in officio diuino, vt scilicet esset simul & senex, & infirmus, & valetudinarius: parum, vel nihil fauoris Papa in eo concederet Religioso, cum solum ob actuale infirmitatem Religiosus excusetur à recitando diuino officio, nec priuilegio indigeat. At de Principe sperandum est, quod in suo priuilegio aliquem fauorem particularem subdito indulgeat. Et hoc magis probabitur, & euidentius confirmabitur ex solutione duorum argumentorum positorum in contrarium.

Ad primum ergo argumentum in contrarium, dico quod particula, *Et*, copulatiua, sæpius in materia Legum,

gum, & Bullarum accipitur disiunctiue, vt idem sit quod particula disiunctiua, *Aut*, seu, *Vel*. Habet hoc expresse Nauarrus citatus à Rodrig *tom. 3. qq. q. 17. art. 19. §. Ad argumenta*, vbi etiam citat Panorm. Idem tenet Rodrig. *cod. tom. 3. q. 29. art. 14. §. Non obstat*. Idem tenet Comitulus in *Respons. Moral. lib. 7. q. 9. num. 4. & lib. 1. q. 9. num. 2.* & ambo hi Doctores tradunt ad hoc exemplum. Si vero in aliqua materia, particula, *Et*, sumi debet disiunctiue, est in hac præsentī, ob rationem supra tactam, videlicet quia aliàs paruum, vel nullum fauorem Papa concederet, si sumatur copulatiue.

Ad secundum argumentum dico primo, istam concessionem Martini V. non esse priuilegium, sed esse potestatem concessam ad dispensandum cum Religiosis in obligatione diuini officij, quando illud difficile possunt recitare, vt patet. Ait enim Papa se concedere Religiosis S. Ieronymi, vt possint illorum confessores dispensare in diuino officio, tali vel tali causa existente. Dispenſatio vero est quid distinctum à priuilegio, vt Doctores dicunt communiter. Maxime vero inter alia differt priuilegium à dispensatione, quia hæc vt detur, requirit iustam causam ad dispensandum, priuilegium vero vt concedatur non requirit causam, sed solam liberalitatem Principis concedentis. Cum ergo Papa Martinus V. in ista concessione attendat ad causam infirmitatis, senectutis, &c. fecit potestatem dispensandi, non vero concessit priuilegium. Hoc posito constat quod licet dispensatio actualis iam data, sit stricti iuris, & strictè interpretanda: potestas tamen concessa ad dispensandum est ample interpretanda, vt tenet Sanch. *lib. 8. de matrim. disp. 2. à num. 1.* multa, & multos adducens ad id confirmandum. Cum ergo ista concessio Martini V. sit potestas data confessoribus dicti Ordinis

ad dispēſandum in officio diuino, hæc potestas est ample & large interpretanda, ita vt particula copulatiua, *Et*, ſumatur diſiunctiue, & non copulatiue. Secundo reſpondeo ad idem ſecundum argumentum: quod licet iſta conſeſſio Martini V. eſſet priuilegium non vero facultas diſpenſandi, adhuc iſtud priuilegium eſſet ample interpretandum, non vero ſtriſte: quia ſcilicet hoc priuilegium non eſt conſeſſum vni Religioſo particulari, ſed toti Religioni in communi. Probat hoc Sanch. *lib. 8. de matr. diſp. 1. num. 13.* citans alios, & dicens, quod priuilegium etiamſi ſit contra ius commune; ſi ſit conſeſſum toti Religioni, non vni particulari, eſt ample & large interpretandum. Inter alia id probat Sanch. quia quando priuilegium non conceditur vni vel alteri particulari, æquatur legi: ac proinde habetur ac ſi in corpore iuris inſertum eſſet, ſunt enim conſtitutiones perpetuæ. Idem tenet Henriq. *lib. 7. de indulg. cap. 22. num. 3. & 4.* vbi citat alios. Cum ergo iſta conſeſſio (dato quod ſit priuilegium) non ſit conſeſſa vni particulari, ſed toti Religioni, debet interpretari large & ample, & proinde particula *Et*, copulatiua, debet accipi pro diſiunctiua in fauorem totius Religionis. Sub cenſura, &c.

---

### CASVS L.

*De quadam ſcœmina, quæ emiſit votum caſtitatis cum certa intentione & circumſtantia.*

**Q**Uædam ſcœmina poſt annos pubertatis ob nimium deſiderium quod habebat intrandi monaſterium

Monia

Monialium, & in illo profitendi, fecit votum castitatis, in animo habens quod illam seruatura erat in monasterio: non vero manens in sæculo ob difficultatem illam seruandi extra monasterium, maxime quia iam non habet matrem: Pater huius sæminæ sciens de voto castitatis, approbavit, & consensit in illo. Post aliquod tempus filia per se, & per suos confessores procurauit coram patre, vt operam daret, & media adhiberet, vt posset illa ingredi Religionem vbi votum castitatis emissum obseruaret. Pater respondit resolute, quod illa viuentem se patre non erat ingressura Religionem. Quo viso, illa carens matre, & timens se post mortem patris mansuram solam absque matre, & absque persona suam honestatem curante, vult statim de præsentì contrahere matrimonium, & ad hoc contrahendum ab aliquibus sollicitatur. Quæritur primo, an pater illius possit licite illam matrimonio locare? Secundo, an illa possit licite matrimonium contrahere, visa resistentia patris ad profitendum? Tertio, an post mortem patris teneatur intrare Religionem vt in illa melius votum castitatis emissum obseruet? Quarto, an hodie possit cum illa dispensari, vt nubat, visa impossibilitate morali ad profitendum in Religione?

Ad primū dico: patrem istius puellæ scientem de voto filiæ, peccaturum mortaliter si stante prædicto voto eam velit matrimonio copulare. Constat clare, quia in ea sic maritanda est causa euident vt filia violet votum castitatis: idque tum maxime, quia pater non habet potestatem irritandi hoc votum personale emissum à filia post annos pubertatis; vt omnes Doctores affirmant in materiâ de voto. Adde, quod cum pater in hoc voto consenserit, & sciat filiam illud fecisse intuitu Religionis, videtur teneri sub eadem obligatione pec-

cati dotare filiam pro ingressu monasterij, si habet facultates, & diuitias vt possit illi dotem dare necessariam ad profitendum in monasterio. Qui enim consentit in causa, consentit in effectu, vel saltem in re annexa illi rei cui consensit. Iam verò ingressus Religionis est quid annexum vt votum castitatis melius seruetur. Addo quod pater non potest impedire ne filia intret monasterium, & in illo profiteatur: nam si id impediatur incurrit anathema positum à Concilio Trid. *sess. 25 ca. 18. de Regular.* contra impediētes virgines volentes intrare Religionem.

Ad secundum dico. Quod quamuis pater istius faminae contradicat ingressui in monasterium, illa non potest hodie licite matrimonium contrahere. Probat-  
 tur primo, quia per matrimonium clare violat votum castitatis, vt patet, Secundo, quia vnusquisque tenetur facere quantum in se est, vt seruet votum emissum: & in casu quo votum emissum fuerit conditionale ( vt fortè hoc fuit ) tenetur ipse facere ne posita conditio sua culpa eueniat, vt Doctores tradunt in materia de voto conditionali. Sed ista famina potest expectare mutationem voluntatis paternæ, si illi dicatur quod peccat, & incurrit anathema Tridentini si impediatur ingressum illius in Religionem. Potest item expectare mortem patris, vt illo mortuo intret libere Religionem; ergo hæc duo tenetur expectare vt possit suum votum castitatis implere: votum enim castitatis valde obligatorium est, & pro illo implendo debet fieri omnis diligentia possibilis. Neque nouum est vt quis pro obligatione conseruandæ castitatis in non nubendo, teneatur expectare aliquod tempus, vel etiam mortem alterius abstinendo à matrimonio. Sit primum exemplum. Quando duo coniuges ob discordias obtinent

nent à iudice Ecclesiastico sententiam diuortij: sic manentes separati, vnus non potest secundum matrimonium contrahere, sed debet expectare mortem alterius, vt possit nubere: ergo à simili, ista fœmina habens vinculum voti simplicis, non potest nubere, cùm possit expectare mortem patris vt sit Religiosa: maxime cùm votum castitatis de se possit seruari extra Religionem; vt patet in multis (etiam coniugatis) qui illud seruant extra Religionem. Secundum exemplum sit. Duo contraxerunt matrimonium ratum in faciẽ Ecclesiæ coram parochio. Eo sic rato tantum contracto, & non cõsummato, alter illorum cõuolauit ad Religionem. Et quãuis professio solemnis Religionis dirimat matrimonium ratum solum: ille ex his duobus coniugibus, qui mansit in sæculo non potest statim secundo nubere, sed debet expectare professionem alterius vt possit nubere. Non est ergo nouum vt obligetur quis expectare tempus, vel mortem alterius vt possit suæ obligationi satisfacere, si aliter illam non potest implere.

Ad tertium dico hanc fœminam ex vi sui voti castitatis non teneri ingredi Religionem vt in illa melius seruet votum castitatis emissum. Probo, quia imprimis votum castitatis ex se obligat tantum ad castitatem seruandam, quæ potest seruari extra Religionem: neque tantum onus, quale est iugum Religionis obligat ex se vouentem solam castitatem. Sic tenet Sanchez *lib. 9. de Matrim. disp. 34. num. 3.* in simili ferè materia. Et probatur illo axiomatico adducto ex Aristotele. Actus agentium non extenduntur vltra intentionem illorum, vt habetur in *l. non omnis. ff. si certum persatur.* Item non tenetur hæc fœmina intrare Religionem ex eo quod nimis desideraret fieri Monialem, &

fecit votum castitatis intentione seruandi illud in Religione: Nam habere desiderium profitendi in Religione, vel habere intentionem seruandi castitatem in illa, non est vouere Religionem. Votum enim est promissio clara, & expressa, facta Deo: & proinde solum desiderium, vel intentio alicuius rei, non est votum, vt omnes Doctores dicunt in materia de voto: & proinde id, quod dixi supra, debere hanc scēminam expectare mortem patris, vt ipsa possit implere suum votum intrando Religionem, dixi, non quod ad talem ingressum teneatur ex vi voti castitatis præcise: sed ex sua intentione, quam formauit, & ob maiorem securitatem, quam habere potest seruandi illud in Religione existens.

Quantum quæsitum petit, an hæc scēmina hodie, visa resistentia patris possit habere aliquod remedium dispensationis vt secum dispensetur pro matrimonio contrahendo? Ego saluo meliori iudicio, credo, quod si ista scēmina certissime sciat, quod per mortem patris non debet habere hæreditatem, possessiones, nec pecunias quas possit donare monasterio pro sui receptione ad dotem consuetam Monialis, in tali casu poterit Episcopus, vel confessor Regularis per sua priuilegia dispensare vt possit matrimonium contrahere. Moueor, quia votum castitatis quod emisit non fuit absolutum, sed conditionatum. Non enim dixit absolute voueo castitatem, sed animo addidit, in Religione seruandam: quod in rigore fuit conditio addita, ac si diceret, voueo castitatem si intrauero Religionē. Illa enim fatetur quod non voueret castitatem, nisi intra Religionem seruandam: ergo votum illius fuit conditionale non absolutum. Hic vero iterum inseruit Maxima illa proxime citata, quod Actus agentium non extenduntur



duntur ultra intentionem illorum : ac proinde, si promisit castitatem solum in monasterio seruandam, non promisit castitatem absolute, sed solum conditionate, videlicet in monasterio. At ista conditio intrandi monasterium est reddita impossibilis, vt supponimus, eo quod illa per mortem patris non habet dotem soluendam monasterio pro sui receptione ad habitum : ergo existente hac conditione impossibilitata intrandi monasterium suum votum conditionatum pendens ab ista conditione impossibili, poterit facilius dispensari. Quod autem votum castitatis, & quodcunque aliud reseruatum Papæ, si sit votum conditionale tantum, careat reservatione, & possit dispensari ab Episcopo, vel ab habente ad id priuilegium, antequam conditio voti impleatur: tenet Sanchez lib. 4. *Decalogi cap. 40. num. 99.* pro qua opinione citat Tolletum, Antonium Gomez, Petrum Lædesma : & ait esse receptam à viris doctissimis. Idem tenet Vega Minimus 2. p. *sum. ver. votum caste* 10. & Villalobos 2. p. *tract. 34. difficult. 36. num. 10.* & Less. *tom. de iust. lib. 2. cap. 40. num. 131. §. Verum & si* quod citati Doctores probant sufficiētibus fundamentis, quæ omitto breuitatis gratia. Et proinde poterit quis secure tot, & talium Doctōrum opinioni acquiescere, vt credat quod Episcopus possit dispensare in voto conditionato istius fæminæ. Quod si Episcopus id potest, possunt etiam Confessores Regulares per priuilegium Martini V. concessum Patribus Benedictinis Montis Serrati, quod refert Sanchez lib. 8. *de matrim. disp. 16. num. 1.* & Capucinus in  *suis Addit. ad compendium ver. dispensatio. titulo ex priuilegijs sancti Bernardi §. Julius 2.* per quod priuilegium conceditur dictis Patribus D. Benedicti facultas absoluedi, & dispensandi cum secularibus in casibus, & votis Episcopis refer-

uatis. Quo priuilegio gaudent omnes Mendicantes, & ceteri qui habent communicationem priuilegiorum cum dictis patribus. Et per Bullam Cruciatæ poterit quilibet cōfessor approbatus, prædictum votum castitatis conditionatum, non dispensare, sed commutare in fauorem Cruciatæ iniuncta sufficienti eleemosina, vt notat Sanchez *cu. disput. 16. num. 2.* & Vega *citato casu 10.* & alij.

## C A S V S LI.

*An possit praelatus Regularis punire subditum suum  
culpatum ob peccatum nefandum.*

**Q**uidam prouincialis visitans ex officio prouinciæ inuenit subditum culpatum in crimine nefando fecit processum contra illum, eoque vocato dedit illi articulos culparum. Paulo post antequam illum puniret inuenit quod idem culpatus protulit ore quandam propositionem hæreticam in quadam occasione eiusdem criminis nefandi. Quæritur quid facere debeat Prouincialis circa hæc duo delicta subditi?

Primo dico, quod attinet ad propositionem hæreticam, non posse Prouincialem illum punire, imo nec citare vt audiatur, sed debet illum statim remittere ad Inquisitores fidei, mittendo ad illos processum illius delicti hæretici, si quem fecit, &c. Spectantia ad illius probationem: sic decreuit expresse D. Papa Paulus V. in Bulla propria concessa Inquisitoribus sancti Officij anno 1606. Kalend Septembris, adhibitis grauissimis pænis contra superiores Religiosorum intromittentes se  
ylkerius

ulterius hac de re in suis subditis, eosque non deferentes illico ad sacrum tribunal: citat Valle de Empsalmis *fol. 441. col. 1. in fine.* Quod cum sit decretum Papæ, & adeo clarum, non est quod circa illud aliquid addamus.

Tota dubitatio est de alio delicto istius subditi, videlicet nefando. Primo enim quæritur, an possit prælatus Regularis in hoc Regno Portugalliæ suum subditum propter illud punire; constat enim Inquisitores fidei in hoc regno habere priuilegium concessum à Gregorio XIII. per quod inquirunt, & puniunt crimen nefandum, & proinde videtur illis hoc crimen reservari, ita ut prælati regulares non possint illud in suis subditis punire. Et quidem Valle de Empsalmis *sectio. 3. capit. primo numero 14.* citans illam Bullam Gregor. XIII. ait in illa concedi Inquisitoribus plenissimam potestatem puniendi hoc crimen etiam priuatiue ad omnes alios iudices, & superiores Ecclesiasticos, cumlatiue tamen ad sæculares potestates. Quibus verbis clare innuit alios Iudices Ecclesiasticos etiam Episcopos respectu clericorum, & prælatos regulares circa suos subditos non posse cognoscere de crimine nefando, cum dicat id concedi Inquisitoribus priuatiue, id est priuando iudices Ecclesiasticos iurisdictione ad cognoscendum de illo. Mitius tamen in hac materia locutus est, ac sensit Pater Frater Antonius de Sousa in suo libro *de sollicitatione fœminarum in confessionis Sacramento tract. 2. cap. 2. num. 23.* vbi cum sit Consiliarius supremi Tribunalis sancti officij, clare dicit posse Prælatos Regulares contra suos subditos in hoc crimine procedere, & sententiam diffinitiuam ferre: dicens quod in commissione citata facta à Papa Inquisitoribus, non coarctatur potestas ordinaria Prælatorum

latorum ad puniendum hoc crimen: sicut non coarctatur potestas iudicum secularium, qui non obstante citata Bulla quotidie de hoc delicto cognoscunt, & illud puniunt: in quo prælati Regulares non debent esse peioris conditionis, quam potestas secularis, & proinde ait pater Souza hoc crimen hodie esse mixti fori, & reuera ex tenore commissionis factæ à Gregorio XIII. Inquisitoribus ad cognoscendum de nefando, quam transcribit idem Valle citato *cap. 1. num. 16.* nullum verbum ponitur ex quo colligatur hoc illis concedi priuatiuè, priuando Prælatos alios Ecclesiasticos iurisdictione ordinaria ad cognoscendum de illo. Sed solum colligitur quod Papa hoc concedit dictis Inquisitoribus cumulatiquè, vnde non priuantur Prælati Ecclesiastici ad cognoscendum de eodem nefando, & illo puniendo. Et confirmat idem Pater id ipsum hac ratione, quia scilicet crimen nefandum non est suspectum de fide vt soli Inquisitores de illo possint cognoscere. Si enim hoc crimen esset suspectum de fide, non possent illo modo iudices seculares de illo cognoscere. Idem tenet D. Archiepiscopus Cunha in *lib. de sollicitat. seminarum in confess. quæst. 2. num. 19.* dicens posse Episcopos punire hoc crimen præuenta causa.

Quo supposito manet clarum, quod potest Prælati Regularis hodie præuenta causa punire hoc crimen in suo subdito, nec teneri illum deferre ad sacrum tribunal pro hoc delicto. Vt autem euitentur dubia, quando nam in crimine mixti fori dicatur causa præuenta iam in priori Prælati præueniente: dico quod per solam citationem rei præuenitur causa: sic habetur expresse in *cap. Gratiam gerimus de offic. & potest. iudicis deleg.* & tenet Riccius 4. p. *Decisionum decis. 1148.* citans alios. Et Prælati Regularis, de quo agimus iam citantur

citauit istum reum. Item quòd etiam non citato reo; sed per solam inquisitionem factam contra illum præueniatur causa, habetur in *lib. 2. Ordinat. istius Regni tit. 9. §. 3.* & Cunha *cit. lib. quæst. 3. num. 13.* loquens de alia causa præuenta pertinente ad sanctum officium; quæ est similis isti. At Prouincialis, de quo agimus iam fecit inquisitionem particularem circa crimen nefandum istius Religiosi: ergò iam præuenit causam, & proinde potest illum punire, non obstante quòd aliàs habet crimen hæresis deferendum ad sanctum officium eo modo quo supra dixi. Et proinde potest prælatus regularis talem subditum carceri mancipare, paratus tamen illum reddere Inquisitoribus, si illum repossant, puniendum ob delictum fidei. Neque his à nobis dictis obstat, quòd iste Religiosus dixit hanc propositionem hæreticam in occasione patrandi criminis nefandi: hanc enim dixisse in illa occasione, non mutat naturam peccati nefandi, neque aufert à Prælato Regulari suam potestatem ordinariam puniendi hoc crimen nefandum: & proinde satisfacit suæ obligationi denunciando de illo, & mittendo processum de hæresi ad Inquisitores, interim puniendo nefandum sicut potest.

## CASVS LII.

*Præuilegia viuæ vocis oraculo.*

**D**Ominus Papa Gregorius XV. reuocauit omnia præuilegia concessa cunctis Religionibus viuæ vocis oraculo. Quo non obstante Papa D. Urbanus VIII.

VIII. eadem priuilegia viuæ vocis oraculo concessa reu-  
 ualidauit, & confirmauit Religioni Societatis IESV,  
 anno 624. 19. die Aprilis: idque confirmauit absolute  
 sine vlla clausula exclusiua cæterarum Religionum.  
 De hoc, scripto suo testimonium perhibuerunt qui-  
 dam pater Prouincialis, & alius Pater grauis eiusdem  
 Societatis, quorum testimonia manu propria subscri-  
 pta ego vidi. Vnde non potest esse dubium quod cæte-  
 ri communicantes in priuilegiis cum Patribus eius-  
 dem Societatis IESV, gaudeant priuilegiis sibi conces-  
 sis per viuæ vocis oraculum. Sub censura, &c.

*Omnia supradicta in hoc libro subijcio censura Sanctæ  
 Romanæ Ecclesiæ, & correctioni reuerentissimi  
 Tribunalis Sancti Officii.*

FRATER LAVRENTIVS  
 DE PORTEL.

LAVS DEO.



INDEX RERVM  
NOTABILIVM.  
QVÆ CONTINENTVR  
IN HOC LIBRO.

A



Abbatissa potest esse Monialis, quæ est illegitima, idque sine dispensatione Prælati fol. 766. toto casu 25. Potest etiam Bigama esse Abbatissa. fol. 769. num. 4.

Abbatissa potest eligi Monialis attingens tantum annum quadragesimum, licet non habeat illum completum. fol. 97. & seq.

Abbatissa an possit alienare rem relictam monasterio cum clausula ne vnquam alienetur, si res est hodie inutilis, cum licentia debita. fol. 126. & seqq. & ibi ponuntur inseruientia pro alienatione rerum Ecclesiæ.

Abbatissa dans professionem Nouitiæ non admonito prius Episcopo iuxta decretum Tridentini, potest puniri ab Ordinario, sed tamen professio facta valida est. fol. 64.

Absolutio, vel dispensatio Episcopi conferentis Ordines, vel Prælati in capitulo Prouinciali, quid operetur circa præsentis. fol. 3. & seqq.

Abortum

## Index rerum notabilium.

**Abortum** cauſans, quando ſe debeat reputare irregu-  
larem. fol. 681. & ſeqq. Et huius occasione dicitur  
quòd anima fœminę non infunditur die octuageſi-  
ma, vt opinio populi dicit, ſed die quinquageſima,  
& aliquando ante eodem. fol. 79.

**Actus actiuorum** quando intelligantur fieri vltra in-  
tentio- nem agentis. fol. 702. num. 4

**Actus agentis** præſumitur fieri eo modo, quo eſt vti-  
lior agenti: idque pro obligatione ſcrupuloſi,  
fol. 444.

**Actus de ſe nullus**, factus cum prauo animo punibilis  
eſt. fol. 101

**Adulterium** an committat fœmina, quæ à parte rei eſt  
vxo- rata, ſed nulliter ob impedimentum, fol. 874

**Aduocatus** dandus eſt reo Religioſo: & an dandus ſit  
Aduocatus ſæcularis ſi petat. fol. 209

**Aduocatus** non dicitur qui domi ſuæ conſulit. fol. 753.  
num. 2.

**Arras** quomodo amittat mulier non tradens dotem  
marito, fol. 721

**de Alienatione** rei Eccleſiaſticae apud Moniales. fol.  
126.

**Appellare** poteſt quilibet de capitulo pro bono com-  
muni, & etiam pro bono particulari, fol. 92

**Appellatio** à grauamine, vel ab interlocutoria facien-  
da eſt in ſcriptis, & exprimi debet cauſa appella-  
tionis, fol. 136. num. 2.

**Appellatio**, & reuſatio in quo differant. fol. 168. num.  
3. & an reuſatio poni debeat in ſcriptis, fol. 172.  
num. 6.

**Appellationem**, & reuſationem friuolam poteſt iu-  
dex per ſe ſolum reiicere. fol. 171

**Appellatio friuola** quæ ſit, fol. 151. & à lege, vel ſtatu-  
to non



## Index rerum notabilium.

to non potest appellari.

ibid.

Appellatio potest fieri facto sine verbis, arrepto itinere ad superiorem, si verbo non admittatur, fol. 617

### B.

**B**eneficium, vel officium prius obtentum nulliter, ob impedimentum annullans collationem, quomodo possit reualidari sine noua collatione, fol. 3. & seqq.

Beneficium iam possessum non amittitur per irregularitatem superuenientem: & an possint renunciari, vel possint fructus percipi. fol. 682. & seqq.

Baptismus datus à Clerico Iudæo, an possit reiterari, fol. 221. toto casu 28. & multa dubia inde orta.

Baptizatus nulliter detecto errore cogendus est profiteri legem Euangelicam, & iterum baptizati. f. 240

Bigamus si ordinetur, & celebret quas pœnas incurrat. fol. 16. & seqq.

Bulla Pij V. concedens Religiosis multa priuilegia non est reuocata per Gregorium XIII. fol. 490. n. 6

Bulla Pij V. de censibus, an obliget in Hispania, maxime quando emitur census non numerata pecunia. fol. 711. & seqq. Et alia ibid. de censibus.

Bulla Papæ missa ad vnum Regnum quando obliget in aliis Regnis. f. 518. & similiter de epistola Papæ quando obliget vbique. ibid.

### C.

**C**Anonica portio, seu quarta funeralis, de quibus sit soluenda. f. 387. & seqq.

Non possunt Clerici obligare hæredes defuncti sepulti apud Religiosos, vt tot officia, vel Missas faciant

## Index rerum notabilium.

- celebrari in Ecclesia parochiali, quot defunctus dici iussit in monasterio in quo fuit sepultus. fol. 388.  
& seqq.
- Capitulum sede vacante succedit in omni iurisdictione quam habebat Episcopus mortuus etiam à Concilio Trid. f. 410. n. 1
- Causa cessante cessat effectus, quomodo intelligitur. fol. 469
- Causa commissa alicui censetur committi omnia necessaria ad executionem causæ. f. 168
- Captivi remigantes in irremis Turcarum, qui sunt Catholici, & hi remigant contra Christianos non peccant, neque sunt excommunicati. f. 371. n. 6
- Clausula ista, Aliter non fiat, vel nullus faciat, an annullat actum. f. 507
- Clerici vocabulum aliquando comprehendit Religiosos. f. 276
- Conditio & modus in quo differant in donationibus, & contractibus. prima par. tot. cas. 3
- Conatus solus ad crimen effectus per accidens non secuto, an sit puniendus pena ordinaria fol. 200 & seqq.
- Concilio generali non derogatur per derogationem generalem Bullæ Papalis, nisi id Papa exprimat. fol. 463
- Confirmatio statuti facta à Papa in forma communi, si non addat, ex certa scientia, nullum robur addit statuto confirmato præter antiquum. f. 452
- Confessor regularis approbatus, & à prælato iussus ne audiat confessiones, peccat, sed confessiones validæ sunt fol. 69
- Confessio rei facta per metum, fraudem, & inuoluntarie illi non nocet in iudicio. fol. 214. & tot. cas. 23. fol.

## Index rerum notabilium.

fol. 465

Confessores electi ab vno prouinciali ex compromissione Diffinitorij in Ordine Minorum, an fuerint valide electi. fol. 503. & seqq.

Conceptio B. Mariæ liberatur ab aliquibus calumniis cuiusdam Doctoris. fol. 533. & multis sequentibus. & multa circa illam.

Illius festum est ab Ecclesia canonizatum. fol. 558. Et quid sit canonizare sanctum, vel canonizare festum ibidem.

Lutherus & Erasinus illam esse immaculatam dixerunt. fol. 565

Illius diffinitionem petere à Summ. Pontifice est zelus fidei. fol. 570. n. 34. & seqq. & quam authoritatem habeant Laminæ repertæ in Monte sancto Granatæ loquentes de Conceptione immaculata. fol. 573. & seqq.

Est materia voti & iuramenti, dicere: Voueo me defensurum, & confessurum quod Deipara Conceptio fuerit immaculata. fol. 536. tota ibi quaestione de hoc per numeros 7. & quæ conditiones requirantur ad materiam voti, & iuramenti, ibidem num. 2.

Census emptus absque conditionibus requisitis in Bulla Pij V. quomodo sit validus in foro conscientiae, si aliàs seruentur conditiones iuris naturalis, & iustitiae, fol. 704. & seqq.

Commendam vendere non est materia simoniae. fol. 718

Contractum faciens bona fide, si reperiatur quod sit contractus vsurarius, quid facere debet, vel quid recipiet. fol. 710. n. 4

Consuetudo quid debeat habere, vt habeat vim legis.

## Index rerum notabilium.

- f. 336. num. 13. Et aliqua potest seruari Romæ, quæ non obligat in Hispania. fol. 554
- Conseruator esse potest prælatus regularis conuentualis, vt Goardianus, & similes, f. 482. n. 1. & seqq.
- Crimen quod erat occultum, si licite vel illicite fiat publicum, potest ac debet puniri. fol. 178
- Crimen occultum non potest prælatus punire iuridice fol. 213
- Crimen committens ob quod imponitur pœna amissionis officij vel beneficij, non perdit officium, vel beneficium donec per sententiam iudicis declaratur. fol. 499

### D.

- D**ebita contracta à prælato, vel prælata præcedente, pro bono communi monasterij, soluere tenetur prælatus succedens, f. 823. n. 2. & 3. & quando tenentur soluere debita contracta à subdito. ibidem
- Defensio naturalis quomodo possit fieri inculpate, & de moderamine inculpate tutelæ. fol. 633. n. 13
- Dicentj se habere commissionem ad aliquid agendum quod aliàs ex officio non potest, credendum non est nisi litteras commissionis ostendat. fol. 820. n. 5
- Denunciare iussus in termino certo quomodo debeat computare dies mandati. fol. 866
- Dispensare potest Prouincialis cum subdito irregulari ex homicidio voluntario notorio. fol. 689, & seqq. etiamsi fuerit propter abortum fœtus animati. Et possunt hoc alteri subdito committere. fol. 694. Et data hæc dispensatio in capitulo in communi valet. num. 7
- Dispensatio obtenta à Papa pro irregulari homicida clerici

## Index rerum notabilium.

clerici valida est, etiamsi homicida non expresserit  
quod clericum occiderit. fol. 690. n. 3

Dispensatio vt vir nobilis nubat cum consanguinea,  
eo quod omnes fœminæ nobiles in suo oppido par-  
uo sibi æquales sint suæ consanguineæ, est valida,  
etiamsi vna vel altera oppidi non sint consanguini-  
neæ. f. 647. & alia similia. f. 655. & seq.

Quando sit facienda expressio copulæ inter consan-  
guineos pro Dispensatione impetranda. f. 641. Et  
quando sit exprimenda copula habita inter consan-  
guineos cum spe facilius impetrandæ Dispensatio-  
nis. f. 648. & seq.

Quando in impetratione Dispensationis narrantur  
aliquæ causæ veræ ob quas solet dispensari, licet si-  
mul narretur aliquid falsum, Dispensatio tenet. fol.  
654. cum seq. & antecedentibus: & multa alia de di-  
spensatione toto illo casu 8.

Dispensare potest Episcopus cum clerico irregulari  
secreto ob homicidium casuale. f. 685. n. 5. & quid  
de Commissario generali Cruciatæ in Portugallia,  
ibidem.

Dispensator an teneatur semper imponere pœniten-  
tiam dispensato. fol. 8. & seqq.

Dispensare non possunt Regulares per sua priuilegia  
cum bigamo clerico vt ordinetur, vel vt ministret  
neque cum homicida sæculari. fol. 10. & seqq.

Dispensare potest Episcopus, vel Prælatus Regularis  
in eo quod Papa noluit dispensare, si alias id possit  
Episcopus, vel Prælatus per sua priuilegia. fol. 20.  
num. 7.

Dispensare non potest Prælatus Regularis cum noui-  
tio irregulari dum nouitius est. fol. 26

Dispensatus legitimè in aliquo, repudians apud se tan-

## Index rerum notabilium.

- tum dispensationem, potest postea eadem vti sine nouo recurſu ad diſpenſantem. fol. 346
- Diſpenſare poſſunt Epiſcopi, & Regulares per ſua priuilegia cum ſæcularibus in voto aliàs Papæ reſeruato, ſi tale votum non ſit abſolutum, ſed ſolum conditionatum.
- Dolus quid ſit, & quomodò electionem annullet. fol. 312.
- Dominium in re emphyteutica eſt duplex, directum, & vtile: & quid ſit vtrumque. fol. 740. num. 2.
- Diuortium factum inter coniuges facit reuocari donationes inter illos. fol. 723. num. 6.
- Vide fol. 723. num. 6.
- Donatio quando ſit conditionalis, quando vero modalis, fol. 283 à num. 2. & ſeqq.
- Donatio poteſt fieri per epiſtolam miſſiuam, fol. 609. & toto caſu 3. alia de donatione cauſa dotis, num. 3. & ſeqq.
- Donatio acceptata, & poſſeſſa, non poteſt reuocari, & alia de donatione, fol. 698. num. 2. & fol. 703. num. 5. & fol. 812. num. 1. & 2.
- Donans pro cauſa pia cenſetur donare irreuocabiliter. fol. 813. & quando poſſit reuocari donatio, fol. 814. num. 2.
- Donatio omnium bonorum, quæ habet donator, quomodo ſit licita: & quod in donatione attendi debet animas, & intentiã donantis, & alia de donationibus, fol. 888. num. 1. & ſeqq.

## E.

**E**lectio in qua quis dat ſuffragium ſine vllò diſcurſu, vel per errorem non valet. fol. 81. & ſeqq.  
Electio

## **In dex rerum notabiliũ.**

**Electio** Abbatissæ facta à prælato Regulari sine schedulis obsignatis, valida est. fol. 102. & seqq.

**Vocati** ad electionem, & nolentes venire renunciare censentur suo suffragio, nec vitiant electionem. fol. 249. num. 4.

**Pro numero** computandorum suffragiorum in electione vide duos casus. fol. 255. n. 12. 13

**Electio** non potest coarctari ad duos vel tres tantum fol. 895

**Eligendi** potestas, & consuetudo potest obtineri per trinum actum dandi suffragium. fol. 263

**In electionibus** etiam Regularium, potest dari suffragium ab absente per procuratorem. fol. 263

**Electus** concorditer, si ante confirmationem inueniatur culpatus, potest reprobari. fol. 17

**Electionis** scrutatores quando res dubia fuerit de numero suffragatium, possunt iurare quot fuerint suffragia. fol. 302. n. 1

**Electio** publicanda est statim post factum scrutinium. fol. 305. num. 3

**Electus** si sit indignus, non notorius, debet prius audiri antequam excludatur. fol. 306. & seq.

**Eligentes** indignum priuantur iure eligendi pro illa vice. fol. 307. & seq.

**Electus** minus dignus, debet confirmari etiam si sint alij digniores. fol. 308. Et ibidem dicitur quod electus per electionem habet ius ad rem.

**Electionis** præses non potest reicere illum cui electores dant suffragia nisi sit indignus, & illum prius audiat. fol. 417. nu. 1

**Error** quomodo annullet electionem. fol. 313. & ibid. dicitur quod errans non consentit.

**Edicto** publicato quod dabitur beneficium digniori

## Index rerum notabilium.

examinato, hic dandum sub pœna peccati mortalis  
fol. 673. & seqq.

Emphyteusis nominatio cum translatione dominij, &  
reseruatione fructuum est irreuocabilis: secus si fiat  
sine his conditionibus. fol. 738. n. 1

Episcopus an possit dispensare in Bigamia f. 16. & seqq.

Episcopus dispensat in impedimentis dirimētibus ma-  
trimonium si sunt occulta, cum aliis circumstantiis.  
ibidem.

Potest excommunicare Religiosum prelatum pro cau-  
sa matrimoniali notitiæ. fol. 19. & seq.

Episcopi olim multa inferebant grauamina Religio-  
tis, propter quæ Ecclesia Religiosis concessit exem-  
ptionem ab illorum iurisdictione. fol. 400. & seqq.

Episcopus non potest facere testamentum de rebus ac-  
quisitis ex redditibus Ecclesiasticis sine expressa li-  
centia Papæ. fol. 596. num. 2. Et quid possint donare  
in morte. ibidem

Episcopus successor non est hæres antecessoris, neque  
illi succedit vt hæres. ibidem. Nec tenetur soluere  
debita relicta à suo antecessore, nisi fuerint facta  
pro bono communi suæ Ecclesiæ. fol. 599. num. 5.  
& seqq.

Episcopus potest facere celebrari in suo Oratorio do-  
mus suæ. folio 746. num. 3. Et an possit concedere li-  
centiam vt hodie quis celebret in Oratorio domus  
sæcularis. ibidem

Episcopus potest dispensare cum subdito existens ex-  
tra suam diocesem. Et potest cum eodem dispen-  
sare in aliquibus deductis ad forum contentiosum  
à Tridentino prohibitis, postquam tamen finitum  
est iudicium contentiosum. fol. 871. n. 6

Excommunicare non potest parochus suum parochia-  
num.



## Index rerum notabilium.

- num. fol. 784. n. 2
- Duo excommunicati clerici percussores quando se possint adinuicem absolvere licite, & valide, si sunt secreti. fol. 507. & seq. maxime à n. 3. & 6
- Excommunicatus an possit absolui à confessore extra Sacramentum Pœnitentiæ. fol. 511. n. 5
- Excommunicatio posita contra scientes, vel detinentes rem certam, non ligat illos, quos noluerit ligari impetrans excommunicationem. fol. 516
- Excommunicatus quando possit sepeliri in loco sacro, & quando possint pro illo missæ celebrari. fol. 657. toto casu 10. Et quomodo vitari debeat.
- Excommunicatus si moriatur cum vera contritione carens copia confessoris, potest saluari, non obstante excommunicatione. fol. 672
- Eucharistiam possunt ministrare aliqui Religiosi secularibus etiam extra suos conuentus, in Oratoriis priuatis. fol. 844. & seqq. Excepto die Paschæ, & articulo mortis.
- Quomodo, & quando conuentus teneatur dare expensas ad litem Religioso litiganti contra prælatum: vel pater filio, vel maritus vxori f. 825. & toto illo casu. 36

### F.

- F**Acta contra legem prohibentem quando valeant. fol. 63. n. 8. & fol. 100.
- Filius familias habet dominium peculij aduentitij, viuentis patre: non vero vsumfructum. fol. 7. & seq.
- Filius quomodo peccet non obediens patri suadenti matrimonium particulare, vel nubens contra patris voluntatem. fo. 619. n. 2

## Index rerum notabilium.

Fillius patrī iniuriam notabilem faciens potest à patre exheredari, & quomodo id facieridum. fol. 619. & seq. per totum illum casum.

Fiscus soluere tenetur debita, quæ antea debebat confiscatus Reus, neque Reus tenetur illa soluere postea veniens in pinguiorem fortunam. fol. 877. & alia ibidem de hoc.

Fuga quando faciat probationem contra reum fugientem. fol. 231

Furtum rei parvæ quando sit peccatum mortale. folio 756

Forma actus quando sit dicenda substantialis, quando vero accidentalis. fol. 456

## G.

**G**uardianus in Ordine Minorum si possit esse ultra tres annos, & octo menses. fol. 414. toto casu 15.

## H.

**H**omicida voluntarius Regularis an possit dispensari à suo Prælato si delictum fuit occultum.

Et quid requiratur ut homicidium sit voluntarium, & de homicidio casuali. fol. 20. & seqq.

de alio Homicidio casuali. ibid:

alia de Homicidio voluntario. fol. 685. & fol. 734. num. 1.

Heres consanguineus renuncians hæreditati non tenetur soluere debita defuncti. fol. 101

Ignor

# Index rerum notabilium.

## I.

- I**gnorantia facti quando detur. fol. 219
- I**gnorantia excommunicationis positæ contra violantes præceptum naturale, excusat non à peccato, sed à censura fol. 376
- U**na Iniuria compensatur per aliam iniuriam in foro externo ita vt deobliget à restitutione, & venia petenda, non vero à peccato. fol. 624. & seqq.
- I**niuriam prior inferens tenetur veniam petere ab iniuriato quando ambo fecerunt iniuriam æqualiter. Si verò inæqualiter se iniuriarunt, debet prior veniam petere, qui grauius offendit. fol. 625. & 733
- Q**uæ liceant, vel non liceant homini iniuriato quoad offensæ remissionem, vel admissionem ad antiquam amicitiam. fol. 625
- P**rius Iniuriatus si reperiatur minus punitur. fol. 831
- I**llegitimus in Congregatione sancti Ioannis Euangelistæ in Portugallia per solam professionem, dispensatus manet, non solum quoad ordines, sed etiam quoad officia, & dignitates Ordinis fol. 767. & idem dices de Religiosis communicantibus in priuilegiis cum prædicta Congregatione. ibid.
- I**mpedimentum dirimens matrimonium, ignoratum à coniugibus, deprehensum à confessario intra confessionem, quomodo sit curandum. fol. 862
- I**rregularitas posita propter delictum non incurritur si adsit bona fides. fol. 853
- I**rregularitatem quando incurrat habens curam ægroti ob negligentiam applicandi remedia eidem. fol. 760. & alia ibi de irregularitate casu 23. & fol. 761.
- I**rregularitas in susceptione, vel exercitio ordinum excusatur ob Bonam fidem. fol. 864
- Irregu-

## **Index rerum notabilium.**

- Irregularitas** non orta ex delicto incurritur etiam si ignoretur, & actus fiat bona fide. fol. 19
- Iudex secularis** quando possit obuiare mandato Episcopi. fol. 99
- Iudex** ad quem appellatur debet citare, vel audire iudicem à quo, & sine processu prioris iudicis nihil potest innouare contra iudicem à quo. fol. 140
- Iudex superior** non potest auocare ad se causam ex prima instantia tollendo illam de manu inferioris Prælati ante appellationem. fol. 142
- Iudex iniuriatus** ab aliquo particulari, an possit facere processum, & punire se iniuriantem. fol. 168
- Iudex in foro conscientie** potest consilium dare reo pro sua defensione. fol. 751. & qui prius dedit consilium reo in secreto, potest in foro interno, esse iudex eiusdem, ibidem. Et alia de aduocato. Et potest iudex hodie iudicare secundum vnā opinionem probabilem, & mane secundum aliam opinionem oppositam probabilem. fol. 752
- Iuramentum** de semper defendenda Deipara à peccato originali est pium, & licitum. fol. 540
- Iuramentum** non obligat cum præiudicio tertij. fol. 309.
- Iuramentum**, vel votum filij quomodo possit pater irritare. fol. 650
- à Iure communi** non est recedendum, nisi quoad ea quæ inueniuntur excepta. fol. 837
- Iurisdictio** potest committi per coniecturas. fol. 453. & seqq.
- Ius patronatus** pro aliquo conventu Religiosorum quid requirat. f. 426. toto casu 17. Et illud non possunt dare fratres Minores in suis Ecclesiis, nisi cum talibus concurrentibus. ibidem nū. 1. Potest tamen Pro-

## Index rerum notabilium.

Prouincialis consentire.

ibidem

Ingressus fæminarum in clausuram virorum quas conditiones habere debet. fol. 835. & seq.

Ingressi non possunt fæminæ in monasteria virorum, solum ad videndum ornatum claustrum in festis, sine alia conditione ex assignatis à Papa. fol. 834. & per totum casum 38

### L.

**L**egata pia relicta in testamento alias nullo, sunt valida, & quæ sint legata pia. fol. 801. Et pro legato relicto Minoritæ fratri. Vide fol. 473. nu. 2

Legatum quando sit dicendum conditionale, quando modale. fol. 270. & fol. 286. 285. & fol. 292. & folio 478

Legatum alicui si nupserit, vel si filios habeat, non perditur si intret Religionem. fol. 271. & alia ibid. de materia legati.

Lex quomodo dicatur cessare cessante causa, seu fine legis. fol. 132

Prælati Regulares non tenentur iudicare causas subditorum secundum leges sæculares fol. 180. & seq.

Legis declaratio quotuplex sit. fol. 336. nu. 12. & 14

Quando duæ leges sunt contrariæ, secunda reuocat priorem. fol. 379

Lex Papalis ut obliget quomodo debet publicari, quomodo de illa possit supplicari ad Papam. fol. 527. & quomodo possit extendi de vno casu ad alium similem, ibid. nu. 16. & legis explicatio pendet ex processu legis. num. 17.

Lex Ecclesiæ per quot annos possit abrogari, & qualis debeat esse consuetudo ut ipsam abroget. fol. 838. num.

## Index rerum notabilium.

- num. 4  
**Expressum** in lege facit cessare præsumptum, seu omis-  
 sum in illa. fol. 894  
**Licentia** data, vel confirmata ab vno Collectore Apo-  
 stolico non expirat post egressum illius à regno, fi-  
 nito officio. fol. 817. & seq. n. 1.  
**Licentia** data ab vno prælato Regulari, & postea con-  
 firmata ab eodem Domino Collectore, non potest  
 amplius reuocari à prælato, qui prius dedit, vel à  
 superiore dantis. fol. 819. n. 3.  
**Licentia** tacita habetur pro expressa. fol. 883

### M.

- M**Andans aliquid fieri, quando teneatur restituere  
 damnum secutum ex mandato. fol. 773. & seqq.  
**Maria** Deipara, & omnes Apostoli baptizati sunt ba-  
 ptismo Christi D. antequàm sacram Eucharistiam  
 receperint. fol. 234. vide etiam. fol. 542  
**Metus** cadens in virum constantem quando fiat. folio  
 367. & seqq.  
**Metus** annullat electionem si fiat cum precibus im-  
 portunis à viro graui, & prælato &c. fol. 420. n. 4  
**Metus** reuerentialis sufficit ad annullandam professio-  
 nem, & alia de metu circa professionem. fol. 804. &  
 seqq. & fol 62. n. 6.  
**Minorita** frater quomodò possit habere legatum an-  
 nuum pecuniarum. fol. 475. n. 3  
**Miracula** facta ob defensionem Deiparæ à peccato  
 originali. fol. 542  
**Matrimonium** promittens famina non potest licite  
 ingredi Religionem post matrimonium solum ra-  
 tum cum illa. folio 662. num. 2. & seqq. & alia ibi de  
 deflo-

## Index rerum notabilium.

- deflorante virginem.  
Matrimonium ratum solum, an dissoluatur per ingres-  
sum Congregationis sancti Ioannis Euangelistæ in  
Portugallia. fol.664  
Matrimonium non tenetur contrahere vir cum illa,  
· quæ se passa est deflorari sine vi, precibus, vel pro-  
missione, & alia ad hoc intentum. fol.606. toto ca-  
su 2.  
Missæ relictæ à defuncto sepulto apud Religiosos, si  
defunctus non declarauit locum vbi sint dicendæ,  
· debent dici in Conuentu vbi defunctus sepultus  
est. Et ibi dictæ sunt vtiliores defuncto. fol.444  
Missæ sicca an hodie dici possit extra mare sine pecca-  
to. fol.770  
Missam audire in propria parochia non potest obligari  
parochianus sub censuris. f.785. & seqq.  
Moniales sanctæ Claræ subditæ Episcopis an gau-  
deant priuilegiis, & indulgentiis concessis Ordini  
Minorum. fol.409. & 767  
Monialis primæ Regulæ sanctæ Claræ potest habere  
peculium annuum pecuniarum cum licentia præ-  
lati. Et illæ in communi possunt habere annuos red-  
ditus. fol.461. n. 1. & seqq.  
Moniales sanctæ Claræ subditæ Minoritis gaudent  
· priuilegiis Minoritarum, siue illa sint primo con-  
· cessa Minoritis, siue ab illis participata. fol.767  
Monialis dicens se non esse professam, si intra clau-  
· ram non habet libertatem vt se defendat, potest ex-  
· trahi à Conuentu, & foris causam suam prolequi  
· in loco tuto, & honesto. fol.64  
Monialis licite exiens à claustrum, quomodo & quando  
· tenetur redire ad illam. fol.98. & seqq.  
Moniales conuenientius gubernantur per prælatos  
regu-

## Index rerum notabilium.

regulares, quam per Episcopos. fol. 393. & toto illo  
casu 13

### N.

**N**egotiari an possit Clericus in mercaturis, saltem  
per alium. fol. 885. & seqq.

Notarius Apostolicus Ecclesiasticus non potest valide  
approbare testamentum in Portugallia. fol. 793

Notorium delictum quando dicatur. fol. 20. & quando  
dicatur Notoria Clerici percussio. fol. 694

Nouitius post vltima vota sibi data à Conuentu quo-  
modo possit expelli. fol. 18

Nouitius an teneatur prodere suum occultum defe-  
ctum impediens professionem si interrogetur.  
fol. 48. & seqq.

Nouitij professio potest dilatari per sex menses vltra  
annum nouitiatus cum causa, & alia de anno noui-  
tius. f. 342. toto casu 7

### O.

**O**bligatio alicui rei annexa, si res alienetur transit  
cum re alienata. fol. 870. & seqq.

Occultum delictum si publicetur iuste vel iniuste, po-  
test ac debet puniri à prælato in foro externo. fo-  
lio 151

Officium diuinum tenetur dicere Religiosus secun-  
dum consuetudinem communem suæ Religionis.  
fol. 782

Officium Conceptionis Deiparæ incipiens, Sicut li-  
lium, quando incæperit, quis Author illius, & quæ  
priuilegia propter illud sint concessa, & quæ indul-  
gentiæ,



## Index rerum notabilium?

gentiæ, & alia de eodem. fol. 776. cas. 28.

Obedire an teneatur subditus in foro interno illi præ-  
lato quem certo scit esse nulliter electum ob ele-  
ctionis nullitatem. fol. 425.

Opinio vnius tantum Doctoris quando possit teneri  
contra multos alios oppositum dicentes. fol. 643.

Ordinatus bona fide, & non legitimus non incurrit  
suspensionem. fol. 244.

Ordinari potest Clericus carens patrimonio, si aliquis  
illi promittat aliquem annum redditum pro suf-  
ficienti sustentatione. fol. 698 & seqq.

Ordines sacros recipiens sine interstitiis peccat, sed  
non incurrit suspensionem, neque irregularitatem.  
fol. 850.

Ordines sacros extra tempora recipiens bona fide, vel  
ob defectum ætatis, & in illis ministrans bona fide,  
non incurrit suspensionem neque irregularitatem.  
fol. 852. & seqq.

Ordines minores omittens, & sine illis recipiens tres  
sacros, recipit verum characterem trium sacrorum.  
Et an ministrans in sacris sine minoribus incurrat  
aliquam censuram, & alia ad hoc intentum. fo. 857.  
& seqq. Et an ordines minores sint sacramenta. fo-  
lio 425.

P.

**P**apa aliquando aliqua concedit propter importu-  
nitatem, quæ postea reuocat, & emendat. fol. 398.  
Et vide fol. 339. quod Papa potest obliuisci legem  
antecessoris.

Parochus non est proprie prælatus, & non potest ex-  
communicare. fol. 768. & fol. 784. n. 2.

## Index rerum notabilium.

- Pater non tenetur soluere damna illata à filio familias,  
quorum pater causa non fuit. fol. 825. n. 4. & potest  
filium verberare, & punire. folio. 622
- Patrimonium ad cuius titulum clericus ordinatur po-  
test alienari, non obstante Tridentino, si clericus ha-  
bet alia bona, vnde commode viuat. fol. 280. & fol.  
698
- Particula, *Et*, copulatiua, aliquando disiunctiue acci-  
pienda est. fol. 899. §. 2. Ad primum, & seq.
- Peccata distinguuntur ex voluntate, & intentione ope-  
rantis. fol. 875, & seqq.
- Peccatum externum sumit suam malitiam, & speciem  
ab actu interno licet opus externum sit distinctæ  
speciei, fol. 200. & seqq.
- Faciens opus, quod à parte rei est peccatum M. putans  
tamen esse solum veniale, & non facturus si crede-  
ret esse mortale, peccat solum venialiter. fo. 755 to-  
to casu. 22
- Percussor clerici notorius, quis dicatur, & quæ testes  
sint necessarij ad præbandum notorium. fol. 509
- Percussor clerici notorius potest absolui per Bullam  
Cruciata, vel per priuilegia Regularium, etiam  
extra confessionem, data cautione, & satisfactione:  
& quæ requirantur ad istam satisfactionem. fo. 829  
& toto casu. 37
- Pompa funeralis defuncti, potest fieri de bonis quæ  
defunctus alias debebat, si non habet alia bona pro-  
pria. fol. 729
- Potens in maius quando intelligitur posse illud quod  
est minus. fol. 887
- Præcedentia locorum inter Religiosos non est dam-  
nanda ex se. fol. 318. & seqq.
- Pra-

## Index rerum notabilium.

Prælatus eligi non potest, qui est omnino idiota. fol. 497. num. 1. & seqq.

Prælatus Regularis præ morbo non potens visitare prouinciam potest inuitus amoueri ab officio. folio 500

Prælatus Regularis potest punire subditum ob crimine nefandum. fol. 898. & seqq. Subditum verò culpatum de hæresi non potest punire, sed tantum statim deferre ad DD. Inquisitores. folio 904. & seqq.

Prælatus recusatus pro visitatione poterit vices suas committere alicui delegato de consensu recusatoris. fol. 165

Prælatus Regularis non potest dimittere Ordinario regimen alicuius Conuentus Monialium sibi subditarum inconsulto Papa. fol. 36. & seqq. vsque ad finem.

Prælatus potest punire subditum ob delictum, quod fecit in alio regno, vel alio territorio. fol. 145. & seqq. & potest punire subditum delinquentem extra claustra ex solo processu facto, & misso ab Episcopo, sine eo quod prouincialis faciat nouum processum. fol. 147. & seqq.

Prouincialis potest dare votum pro Nouitio, vel pro Nouitia recipiendis ad professionem. fol. 89. & pro Abbatisa. fol. 245. & fol. 260. toto casu 30

Prouincialis non potest recusari vt suspectus ne visitet Conuentum ex officio, vel ne præsideat electioni Abbatisæ assumptis testibus ad beneplacitum partium. fol. 155. & toto casu 21

Prælatus generalis non potest eximere subditum quin obediat omnino suo Prælato locali. Neque potest

## Index rerum notabilium.

- per se solum dare subdito priuilegium vt habeat  
votum in capitulo. fol. 523
- inter Prælatum, & subditum an possit dari obligatio  
de iustitia. fol. 174. & seqq.
- Prælata, vel Prælatus successor tenetur stare contra-  
ctui facto per antecessorem si fuit factus pro bono  
communi Conuentus. Et tenetur soluere debita,  
quæ antecessor contraxit pro bono communi Con-  
uentus. fol. 890. & toto casu. 35
- Præuenta causa quando dicatur à Prælato in delicto  
mixti fori. fol. 908. & seqq.
- Præsumptio vehemens quomodo vincatur à præsum-  
ptione violenta. fol. 229. num. 9. & seqq.
- Quomodo possit probari quod præsumptio defuerit  
in aliquo actu. fol. 218. & seq. num. 3
- Principali destructo quomodo intelligatur destrui ac-  
cessorium: & quomodo accessorium pendeat à  
principali, & dispositum in vno censeatur disposi-  
tum in alio. fol. 848. & seqq.
- Priuilegium Martini V. pro officio diuino non dicen-  
do à Religiosis infirmis, & senibus Ordinis sancti  
Ieronymi explicatur fol. 897. Vide etiam casum vl-  
timum istius lib.
- Priuilegium etiam contra ius commune concessum  
toti alicui Religioni non est interpretandum stri-  
cte, sed ample. Et in quo differat priuilegium à di-  
spensatione. fol. 899.
- Priuilegium Religiosorum vt perdatur per non usum  
requiruntur centum anni: fol. 486. & quid de priui-  
legio concesso à Papa scienter cum præiudicio ter-  
tij. ibid.
- Priuilegia data aliquibus Religiosis ob labores littera-  
rios,

## Index rerum notabilium.

- rios, & similes pro bono communi non sunt taxan-  
da. fol. 331. n. 18. & seq.
- Priuilegio alicuius Religionis violato, debet prælatus  
adire suum Conseruatorem vt se defendat. folio  
784
- Priuilegium non debet extendi ad similes personas ob  
similem rationem, maxime si resultet præiudicium  
tertij. fol. 331
- Priuilegium quod vni Religioni primo concessum est,  
si communicatur alteri Religioni, fit ita proprium  
istius communicantis ac si illi primo fuisset conces-  
sum, & alia de hac materia. fol. 375. & folio 766. &  
seqq.
- Priuilegij forma si non seruetur, ipsum amittitur, &  
etiam per nonvsum perditur. fol. 424. & seqq. Et  
quod tempus ad hoc sufficiat, ibid. Et mutata mate-  
ria priuilegij ipsum mutatur. ibid. & seqq.
- Priuilegium prius invalidum in vna Religionè reuali-  
datur, si Papa pøsterior confirmet priuilegia Ordini  
Motu proprio, vel ex certa scientia. fol. 491.  
num. 7. & quid requiratur vt priuilegium amittatur  
per non vsum. fol. 493. num. 9
- Professio facta ob solum metum reuerentialem, an  
possit annullari. fol. 364
- Professus ad chorum an possit mutari ad statum laico-  
rum professorum arbitrio Prælati. fol. 364. nume-  
ro 11.
- Professio excommunicati nominatim est valida. folio  
235. num. 18. Imò & hæretici occulti, ibidem. Non  
vero est valida professio hominis non baptizati.  
ibid. num. 19. & seqq.
- Professio prius nulla quomodo possit conualescere si-

## Index rerum notabilium.

- ne eo quod iterum fiat professio. fol. 4. & seqq.  
Professus tacens delictum in professione an possit expelli ab ordine. fol. 46. & seqq. & de tacente morbum contagiosum in professione. fol. 48. & seqq.  
Professio facta ab excommunicato, & data ab excommunicato valida est. fol. 64. & seqq.  
Professio illius qui habet debita est hodie valida. folio. 664.  
Promissio quomodo debeat fieri, & acceptari ut obliget in foro externo. fol. 764. & ibidem de re promissa vni Ecclesiæ quando possit dari alteri Ecclesiæ. fol. 765. & seqq.

Q.

- Q**uarta funeralis non debetur parochiæ quando illi defunctus apud Religiosos sepultus reliquit legatum æquiualens quartæ funerali. fol. 478. & seqq. & alia ibi spectantia ad solutionem huius quartæ. Nec debetur de illis, quæ deferuntur post diem sepulturæ. fol. 483. vsque ad finem.  
Quinquennium ad reclamandum contra valorem professionis numerandum est à die professionis, non vero à die notitiæ quam habuit professus. fol. 866. num. 1. & seqq.

R.

- R**atihabitio veri domini potest reualidare donationem præteritam nullam. fol. 614. & alia ad hoc ibidem. fol. 615. & de actu facto sub spe ratihabitionis de futuro.

Ratifi-

## Index rerum notabilium.

- Ratificatio subsequens reualidat actum præcedentem nullum. fol. 187 & seqq.
- Contenta in Regula Religionis an possint abrogari per præsumptionem. fol. 433. num. 1
- Religio tota, nec Generalis ipsius possunt abrogare aliquod præceptum contentum in regula licet tale præceptum Regulæ non obliget ad veniale. folio 435. num. 3.
- Recusari quando possit iudex habens similem causam. fol. 486. num. 3. & vide fol. 137. & seqq. de recusatione.
- Redditus annui computantur pro re immobili. folio 472.
- Redditus annualis relictus Franciscanis pro legato, non potest ab illis acceptari, nec vendi. folio 30. & seqq.
- Remittere aliquid est donatio. fol. 724
- Renunciatio officij, vel priuilegij fieri non potest, nisi coram illo qui dedit officium. fol. 88 & seqq.
- Per renūciationem legitimam amittitur ius antiquum ita vt non possit renuntians ad illud redire sine noua collatione. fol. 89. num. 6
- Renunciare non potest quis priuilegio quod habet non ratione sui, sed ratione status. fol. 94. n. 9
- Renunciatio debet esse voluntaria non coacta. f. 343. fol. 356. post initium, & fol. 384. n. 6. & seqq.
- Renunciare dicitur is qui in iudicio facit actum contrarium suæ prætensionis, fol. 90. Et quod renunciens si reeligatur post renunciationem, valide eligitur. ibidem
- Vnaquæque res transit cum onere suo, quomodo intelligatur. fol. 871

## Index rerum notabilium.

Rescriptum Papæ quando censeatur reuocare legem  
in communi. fol. 807. & seqq. n. 4

Rescriptum ut censeatur subreptitium; vel obrepti-  
tium, quæ narratio falsi, aut taciturnitas veri re-  
quiratur. fol. 808

Restituere an quis teneatur rem pignoratam, vel em-  
ptam à latrone cum amissione rei propriæ, seu cum  
damno. Et an tunc teneatur denunciare iussus sub  
censura. fol. 877. & seqq.

Restituenda quomodo sit iniuria, maxime si iniuriatus  
ipse sit alias infamis. fol. 831

Restituere non tenetur, qui misit creditori rem debi-  
tam per nuncium destinatum à creditore, si Nun-  
cius fugit cum illa. Idem die de re missa per fa-  
mulum habitum pro valde fideli, & hoc saltem  
in foro conscientie. Et alij duo casus boni per quos  
quis deobligatur à restitutione. fol. 600

Restituere non tenetur, qui damnum dedit iuste. fol.  
619. & seq.

Restituere tenetur deflorans virginem inuitam. fol.  
732 num. 1

Restituere quando quis teneatur damnum secutum ex  
suo mandato. fol. 774. & seq.

Restitutionem in integrum possunt petere Religiosi  
læsi, etiam si non appellauerint suo tempore, & hoc  
circa possessiones, & iura communia conuentus,  
fol. 300. & seq. & fol. 431. n. 4

Restituere quando tenetur aliquis impediens alium  
ab assécutione alicuius lucri. fol. 798

Reuocare potest aliquis non solum verbo, sed etiam  
facto. fol. 30

Reuocare suum dictum quomodo quis possit, fol. 24.

Reus



## Index rerum notabilium.

Reus Religiosus an possit audiri de culpis grauib<sup>us</sup>  
verbo tenus, absque scripto continente culpas. fol.

138.  
Reo Religioso in culpis grauib<sup>us</sup> non potest assignari  
tempus breue vt 24. horarum vt respondeat. folio  
382. & seq. Nec potest citari ad locum non tutum,  
seu non commodum vbi non habet defensiones.  
fol. 384. nu. 4. & tenetur iudex recipere testes à reo  
oblatos, ibid. nu. 6. Et non potest renunciare suæ de-  
fensionì in criminalibus. ibid. num. 6

Per Rubricam affixam titulo Bullæ, seu capitulo iuris  
explicatur, & declaratur textus, & contenta in illis.  
fol. 330

### S.

Salomon saluatus est. fol. 575  
Scriptura non est necessaria, nisi quando lex expri-  
mit vt fiat in scriptis. fol. 170. & seq.

Scriptura vna dubia per aliam scripturam claram eius-  
dem processus explicanda est. fol. 453. & seq.

Sententia lata à Principe in vno casu particulari habe-  
tur pro lege communi in suo regno. fol. 518

Sepultura Ecclesiastica dari potest excommunicato  
non declarato, nec percussori clerici notorio. Et alia  
de sepultura danda in similibus casibus. fo. 667. &  
seqq. toto cas. 10

Sepultura vni prius iam data un possit alteri postea da-  
ri: & an sepultura possit vendi. fol. 447. toto casu 20.

Simonia est dare aliquid intercessori, vt intercedat  
pro beneficio assequendo si præcedat pactum; idem  
pro assequendo officio, vel ordinibus sacris, & alia

## Index rerum notabilium.

- de simonia, & de poenis simoniaci eiusque absolu-  
tione. fol. 687. n. 8
- Simoniam committit prælatus si sub pacto omittat  
punire subditum ob culpas cum pacto vt in electione  
det suffragium Petro ver. gratia. fol. 435. n. 5
- Socius criminis quando possit esse testis. fol. 196
- Statutum non potest facere Religio annullans profes-  
sionem Nouitij exeuntis tempore nouitiatus cum  
licentia, & habitu, vt de morbo curetur in domo  
saeculari. fol. 507
- Sponsalia iurata cum certa conditione, illa non imple-  
ta, non obligant Idem si post sponsalia alter sponsus  
cognouit defectum alterius, quo prius cognito non  
promitteret. fol. 644. toto casu 6. & alia ibi circa  
sponsalia.
- Sponsalia iurata cum defloratione virginis, obligant  
virum nobilem, vt contrahat cum femina etiam si  
sit plebea, & sibi inferior. fol. 647. toto casu 7
- Sponsalitiâ largitatem, seu donaria data à sponso an-  
te matrimonium, quando amittat sponsa. fol. 815
- Substitutiones factæ in testamentis contra profitentes  
in Religione euanescent per professionem. fo. 279  
num. 11.
- Suffragium datum pro Nouitio quas condiciones re-  
quirat fol. 66. & seq.
- Stylus Curia Romanæ an obliget vt lex in Hispania.  
fol. 542. & seq.

## T.

**T**Empus taxatum in lege potest Iudex pro causa  
aliquando prolongare. fol. 348. Et quod Tem-  
pus

## Index rerum notabilium.

- pus non currit impedito, vel ignoranti. *ibid.*
- Tertiarij Patris nostri Francisci qui viuunt in congregatione, & emittunt tria vota essentialia, non possunt obedire Episcopo, sed debent obedire praelato Generali Minorum, & alia multa de his Tertiariis. fol. 116. & toto casu 16. Et hi non gaudent priuilegiis Religiosorum, nec sunt personæ Ecclesiasticæ, si non emittant tria vota essentialia. *ibid.* maxime fol. 122. n.7
- Testamentum contradicens legi non valet quoad partem hanc. fol. 273
- Testari potest quis de illo cuius dominium actu non habet, sed habet tamen ius ad illud. f. 276. n.9
- per Testamentum potest testator reuocare prius testamentum, non vero præteritam donationem prius acceptatam. fol. 89. n.4
- Testatorem impediens ne libere testetur quam poenam incurrat, & alia de Testamenti approbatione. fol. 793. toto casu 33
- Testis recusati dictum semper recipi debet etiam si sit suspectus, & ad quid profit. fol. 142. n.7
- Testes deponentes contra aliquem in visitatione generali an sint repetendi, & ratificandi postea pro sententia contra aliquem ferenda. fol. 150. num. 2. & 6. vsque ad finem.
- Testis subscriptio an sit de substantia iuris, & an teneatur aliquando reuelare secretum naturale. fol. 177. & seqq.
- Testis an possit se remittere ad id quod dixit in alio testimonio nihil nunc addendo. fol. 171
- Testis an possit esse mulier in criminalibus contra Religiosum. fol. 194
- Tellis

## Index rerum notabilium.

- Testis infamis** quid probet: fol. 198.  
**Testium** nomina publicare reo petenti non est de substantia iuris, neque obligat in Religionibus nisi in re grauissima, maxime si alias periclitetur defensio rei. fol. 208  
**Testimonium** datum à Religioso coram Iudice sæculari absque licentia prælati potest à parte opponente annullari. Si tamen non opponat validum est. fol. 754  
**Testimonium** proprium pro se nulli potest prodesse in foro externo bene tamen in foro interno. folio 867.  
**Transferri** an possit Religiosus de vna Religione in aliam strictiorem petita sed non obtenta licentia ob certum priuilegium. fol. 374. tot. cas. 10

### V.

- V**enia petenda non est de malo proposito iniuriandi. fol. 214  
**Visitatio** generalis quomodo facienda sit à prælatis. fol. 249. per totum casum 20  
**Veneficas** consulere quæ pena sit. fol. 204  
**Votum** suum potest quisque per se ipsum sine dispensatione commutare in rem euidenter meliorem. fol. 128  
**Si voti** materia facta est inutilis, vel indifferens, cessat votum. fol. 129  
**Vouens** intrare Religionem cum animo vt sit de choro, si prælatus nolit illum recipere, nisi vt sit laicus frater, non tenetur ad votum fol. 355. num. 2. & alia ibidem ad hoc intentum.

Votum

## Index rerum notabilium.

- Votum**, vel iuramentum desinunt obligare, si illorum materia sit valde mutata. fol. 462
- Votum ore factum sine animo vouendi**, non obligat. fol. 804
- Votum alias Papæ reservatum**, si sit conditionale, vel pœnale, de illis quinque consuetis, potest dispensari ab Episcopo, vel confessore Regulari per sua priuilegia. fol. 883. & seq. & fol. 904
- Votens castitatem**, ex vi talis voti non tenetur ingredi Religionem. fol. 901
- Votum in capitul. Canonicorum datum à maiore parte Capituli**, & quando obliget illos, qui non consenserunt. fol. 888
- Vsura est mutuare aliquid alicui cum obligatione ut sibi vendatur census si sua pecunia non sibi reddatur in termino præfixo.** fol. 789. num. 1. & de lucro cessante quando excusetur ne sit vsura. fol. 791. n. 5
- Vsusufructus, vsus, & dominium**, quomodo distinguatur. 880. & seq. num. 2
- Vtens iure suo nulli facit iniuriam.** fo. 275
- Vtile per inutile non vitiatur**, quid significet in Regula iuris. fol. 610
- Vxorem alere tenetur vir**, etiam si illam sine dote duxerit in matrimonium. fol. 730
- Viux vocis oracula concessa Religiosis à Sum. Pontificibus**, licet D. Paulus V. reuocauerit Postea tamen D. Papa Urbanus 8. confirmavit Patribus Societatis IESV sine vlla clausula. fol. vltimo, & casu vltimo istius libri.

F I N I S.

THE UNIVERSITY OF CHICAGO  
LIBRARY  
540 EAST 57TH STREET  
CHICAGO, ILL. 60637

THE UNIVERSITY OF CHICAGO  
LIBRARY  
540 EAST 57TH STREET  
CHICAGO, ILL. 60637

